


Xtidxcoob Dios ni  
biädinä dad Jesucrist



New Testament in Zapotec, Mitla (MX:zaw:Zapotec, Mitla)

# Xtidxcoob Dios ni biädinä dad Jesucrist

## New Testament in Zapotec, Mitla (MX:zaw:Zapotec, Mitla)

copyright © 2006 Wycliffe Bible Translators, Inc.

Language: Zapotec, Mitla

Translation by: Wycliffe Bible Translators, Inc.

Zapoteco, Mitla [zaw], Mexico

### Copyright Information

© 2006, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

#### The New Testament

in Zapotec, Mitla

© 2006, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files dated 29 Jan 2022  
5cff1274-8dc3-5398-a94d-f6033bb363c9

## Contents

San Mateo . . . . .	1
San Marcos . . . . .	59
San Lucas . . . . .	95
San Juan . . . . .	156
Hechos . . . . .	200
Romanos . . . . .	258
1 Corintios . . . . .	281
2 Corintios . . . . .	303
Gálatas . . . . .	317
Efesios . . . . .	325
Filipenses . . . . .	333
Colosenses . . . . .	338
1 Tesalonicenses . . . . .	343
2 Tesalonicenses . . . . .	348
1 Timoteo . . . . .	351
2 Timoteo . . . . .	357
Tito . . . . .	362
Filemón . . . . .	365
Hebreos . . . . .	367
Santiago . . . . .	384
1 Pedro . . . . .	390
2 Pedro . . . . .	397
1 Juan . . . . .	401
2 Juan . . . . .	407
3 Juan . . . . .	408
Judas . . . . .	409
Apocalipsis . . . . .	411

## Guijtz Ni Bacuaa Mateo

### *Retoxpen<sup>g</sup>oldoo Jesucrist*

*(Lc. 3:23-38)*

<sup>1</sup> Guijtz ni rusule' laj retoxpen<sup>g</sup>oldoo xten Jesucrist xi'n toDavid, xi'n toAbraham.

<sup>2</sup> Abraham gujc xtd Isaac, Isaac gujc xtd Jacob, Jacob gujc xtd Judá con rebejtzni.

<sup>3</sup> Judá con Tamar gujc xczuzajn Fares con Zara. Fares gujc xtd Esrom, Esrom gujc xtd Aram.

<sup>4</sup> Aram gujc xtd Aminadab. Aminadab gujc xtd Naasón. Naasón gujc xtd Salmón.

<sup>5</sup> Salmón con Rahab gujc xczuzajn Booz. Booz con Rut gujc xczuzajn Obed. Obed gujc xtd Isaí.

<sup>6</sup> Isaí gujc xtd reii David. David con nani gujc chääł Urías gujc xczuzajn Salomón.

<sup>7</sup> Salomón gujc xtd Roboam. Roboam gujc xtd Abías. Abías gujc xtd Asa.

<sup>8</sup> Asa gujc xtd Josafat. Josafat gujc xtd Joram. Joram gujc xtd Uzías.

<sup>9</sup> Uzías gujc xtd Jotam. Jotam gujc xtd Acáz. Acáz gujc xtd Ezequías.

<sup>10</sup> Ezequías gujc xtd Manasés. Manasés gujc xtd Amón. Amón gujc xtd Josías.

<sup>11</sup> Josías gujc xtd Jeconías con rebetzni cheni huij rebeñ Israel pres lo guedx Babilonia.

<sup>12</sup> Che gudejd huij rebejnga pres Babilonia, dxejc guyu' xi'n Jeconías, Salatiel. Salatiel gujc xtd Zorobabel.

<sup>13</sup> Zorobabel gujc xtd Abiud. Abiud gujc xtd Eliaquim. Eliaquim gujc xtd Azor.

<sup>14</sup> Azor gujc xtd Sadoc. Sadoc gujc xtd Aquim. Aquim gujc xtd Eliud.

<sup>15</sup> Eliud gujc xtd Eleazar. Eleazar gujc xtd Matán. Matán gujc xtd Jacob.

<sup>16</sup> Jacob gujc xtd José chääł Marii nani gujc xnan Jesús ni birilaj Crist.

<sup>17</sup> Ni'cni gujc tzudaj xfamił reni agudejd gubi'reni lo guedxliujre che gubajni toAbram cheni gubajnliza toreii David. Tzudajza rexagdoo najc reni gudejd cheni gubajni toDavid cheni huijli rebeñ Israel pres Babilonia. Stzudaj rexagdoo najc reni gudejd cheni biriilireni pres Babilonia che gojlli Crist.

### *Cheni gojl Jesucrist*

*(Lc. 2:1-7)*

<sup>18</sup> Scree gujc cheni gojl Jesucrist. Abia'n xnanni, Marii, diidx guchnaani José ni gac chääłni. Per ansde xca' sa'reni, Marii agac nuxi'nni sa'csi biääđ Sprit Dxan xten Dios lojni.

<sup>19</sup> José com najcni te bensa'c, di rlanjni nuro'nni Marii nez loj rebejñ te niacbeereni, ni'c bejnni xhigab Guřonxhiga'tzni Marii.

<sup>20</sup> Xhigabga cayujnni cheni baluiloj te xangł Dios lojni, lo bacał räjpni lojni: —José xajg toDavid, na'c guidxejblu xca'lu Marii gacni chäällu sa'csi xi'nni nani chu najc xten Sprit Dxan xten Dios.

<sup>21</sup> Che gaal xi'nni cuälajluni Jesús sa'csi laani gusłani rexpejñni lo rextojłreni.

<sup>22</sup> Guiraa redee gujc si'c te guzobj diidx ni gunii tej ni bacuaa xtidx Dios. Räjpnj:

<sup>23</sup> Suu te dxapxteeb báz, sajl te xingaanni nani guirilaj: Emanuel, (lajni säloj Dios nabajñ con nuure).

<sup>24</sup> Che gubajñ José lo bacañ, bejnni si'cni räjp xangl Dad lojni. Cua'ni Marii gujc cháälñi.

<sup>25</sup> Luxh dini niembeeni si'c cháälñi dxejli cheni gudejd gojl xingangalojni ni gulälajni Jesús.

## 2

### *Che biädhuii reben nanduxh ni laa remagos lojni*

<sup>1</sup> Cheni gojl Jesús nen guedx Belén xten guedx Judea, najc Herodes reii xten guedx Judea. Dxejc bidzujñ rebennajñ ni najc remagos, siädäreni nejj cadro rliejn gubijdx, bidzujñreni guedx Jerusalén.

<sup>2</sup> Rniabdiidxreni:

—¿Con reii reben Israel nani golgaj, ä? Nurnu abihuiinu xpajlñi laadxlñu, ni'cni siopdoññuni.

<sup>3</sup> Che biejn diajg reii Herodes diidxga, guyuduxhni yärsia' näjza guiraa reben Jerusalén.

<sup>4</sup> Dxejcti batie'ni guiraa rebixhojzro ni rnibee loj rebixhojz, näjza guiraa renani ruluui xleii Moisés lo rebejñ te gunabdiidxni lojreni:

—¿Caro gaal Crist?

<sup>5</sup> Laarenj räjpreni:

—Nen guedx Belén xten guedx Judea sa'csi si'c gunii niguii ni bacuaa xtidx Dios che räjpni:

<sup>6</sup> Luj guedx Belén xten guedx Judea, dilu gajc maazru huin loj reguedxro xten guedx Judea sa'csi nen guejdxre guirii tej nani guinibee, te ni ga'p rexpenä Israel.

<sup>7</sup> Dxejcti guredx-xhiga'tz Herodes remagos te gunabdiidxni gucti biricaj bajl nani bahuiireni.

<sup>8</sup> Dxejcti baxhalñireni guedx Belén, räjpni lojreni:

—Colchäj ro'c, colñabdiidxsa'c xcuent biuuxga te che abidxältuni jäädniitu löä te näjza narä chaganäni.

<sup>9</sup> Che biejn diajgreni xtidx reii, sä'tireni. Bajl nani bahuiireni lagajc lajdxreni laltis niđñi lojreni. Che bidzujñlñireni cadro yu' bázga, dxejcru guzobdx bajlga.

<sup>10</sup> Che bahuii remagos loj bajlga, rbalazduxhreni.

<sup>11</sup> Si'c bidzujñreni. Che biu'reni nen yu', bahuiireni lo bázga con xnanni Marii. Dxejcti bazuxhijbreni, gojñreni bázga, baxhalreni rexcälñasa'ceni bazalazjreni oor, näjza yaal näjza yalnejxh.

<sup>12</sup> Che agojl guibi'reni, gunixcälñireni, räjp Dios lojreni:

—Na'c guibi'tu nez loj Herodes.

Dxejcti gunaazreni garenca nez yuj, gubi'reni lajdxreni.

### *Che siini Egipto*

<sup>13</sup> Che sii remagos lajdxreni, biäd te xangl Dios baluilojni lo José lo bacañ, räjpni:

—Huistie, cua' biuxe're näjza xnanni, huinäreni Egipto. Ro'c guläjz che guiniäli lojlu. Siguil Herodes biuxe're sa'csi rlanjñi ju'tñini.

14 Dxejc huistiegajc José, cua'ni biuxe're nájza xnanni, lagajc yáälga biringeni, siireni nez Egipto.

15 Ro'c guyu'reni cheni gujtle Herodes. Guiraa dee guzajc te guzobj diidx ni bacuaa niguii ni gunii xtidx Dios che räjpni: “Egiptoli guredxä xi'nä.”

### *Che guinibee Herodes gujt rebiuxbäz*

16 Che guchee Herodes abasguee remagosni, bidxechduxhni. Gunibeeni guet guiraa rebiuxniguii ni yu' tio'p iiz nájza rebiuxe' ni yu' guxiiru dxej, guideb nen guedx Belén nájza reguejdx ni re' gabiga, si'cti redxej ni räjp remagos lojni.

17 Dxejc guzobj diidx ni bacuaa Jeremías ni gunii xtidx Dios che räjpni:

18 Biejn xse' bejn nen guedx Ramá, te yälhuinduxh, te yälrbedxdi, yälrbedxnen: laa Raquel ni roon yejc rexi'nni.

Naaddini jiäjl lajzni sa'csi agujt rexi'nni.

19 Cheni gujt Herodes, dxejc lo te bacal huiluiloj xangl Dios loj José nen Egipto.

20 Räjpni:

—Huistie, cua' biuxe're nájza xnanni, gubisac nez Israel sa'csi agujt renani rlajz ju't biuxe're.

21 Dxejcti huistie José, cua'ni biuxe' nájza xnanni. Gubi'reni Israel.

22 Luxh che biejn diajgri nribee Arquelao guejdx Judea lacuaa Herodes, xtadni, bidxejbni nuiini ro'c. Dxejc gunisac Dios lojni loj te bacal, ni'c huijni lo reguejdx xten Galilee.

23 Dxejc biädläjzni nen guejdx ni laa Nazare't te si'c guzobj diidx ni bacuaa niguii ni gunii xtidx Dios cheni räjpni: “Sirilajni nazaren.”

## 3

### *Juan Bautist basule' xtidx Dios loj rebejn*

(Mr. 1:1-8; Lc. 3:1-9, 15-17; Jn. 1:19-28)

1 Nen redxejga biääd Juan Bautist lo reyubijdz xten guedx Judea, ro'c cagulijdxni,

2 cayäjpni:

—Colgusiechljaztu rextojltu sa'csi xcälrmibee Dios abidzuzngajxhni.

3 Juan najc nani basä't Isaías, te niguii ni gunii xtidx Dios, cheni bacuaani: Riejn xse' te ni rbedxa' nez lo reyubijdz:

“Colguslii xnezuyj Dad, colguslii xnezuyulajzni.”

4 Najcw Juan xquichlajd cameii. Naliib te duguijd xque'ni. Rajwni guxha't nájza dzujn xten baseerguijxh.

5 Riääd reben guedx Jerusalén náj guiraa reben Judea nájza rebejn ni tre' gajxh nez ro' gueu Jordán, riädcuadijgreni xtiidxni.

6 Che ruxhobdojlreni xtojlrini, rutiobnis Juanreni ro' gueu Jordán.

7 Che bahuiini siääd xhidajl reben guidoo ni najc refarisee nájza ni najc resaducee, rlajzreni gutiobnisnirenini, räjpni lojreni:

—La'tu benguidxduxh, najctu si'c bäl. ¿Chu balijdxtu guxuñtu loj xcälrdxe'ch Dios ni siääd?

8 Colguibañsa'c si'cni nungäj] te fiipac rebejn guliipac abasiechljaztu.

9 Na'c litis guntu xhigab naatu: “iNi nurnu najcnu rexagdo toAbram!” Rniliä lojtu, sajcxca' Dios reguijre gunni gacreni rexi'n toAbram.

10 Asojb guibyayj lo xlobaa reyayj, luxh guiraa reyayj nani di ninexhsa'c xcax lojni, sidinni te checni.

<sup>11</sup> Narä guliicani rustiobnisä con nis si'c te seen cheni abasiechlajztu, abaxhobdojl̥tu. Niluxh nani siääd detzä sutiobnisni la'tu con Sprit Dxiän xten Dios näjza con guiboo. Rnibeeruni loä. Beṅsacduxhni. Nicla xcura'chni digacdi chanää.

<sup>12</sup> Aca'ni xhi cojn gusiani triuu xtenni te chuchee triuuga neṅ ngodx xtenni. Dxejcti guixhtriuuga, suze'cni guixhga lo guiboo ni rejc par tejpas.

### *Che guobnis Jesús*

(Mr. 1:9-11; Lc. 3:21-22)

<sup>13</sup> Dxejc birii Jesús nez Galilee, bidzujṅni ro' gueu Jordán cadro yu' Juan te gutiobnis Juanni.

<sup>14</sup> Niluxh naaddi Juan gutiobnis Jesús. Räjṅ Juan lojni:

—Luj nanab gutiobnislu narä, niluxh ṅaj alga luj siäädlu loä te gutiobnisälu.

<sup>15</sup> Dxejc räjṅ Jesús lojni:

—Basaan gacni si'c ṅaj, sa'csi nanab gusoobnu guiraa ni rlanj Dios gac.

Dxejctiru batiobnis Juan Jesús.

<sup>16</sup> Cheni gulujx guobnis Jesús, birigajcni lo nis. Dxejc bixal xhaguibaa, bahuiini siädyäjt Sprit Dxiän xten Dios si'c te palom, biäjtni lojni.

<sup>17</sup> Dxejc xhaguibaali biejn diajgreni te xse' ni räjṅ:

—Dee najc xi'nä ni sanälazä. Laani rbanälazä.

## 4

### *Che huij Jesús lo reyubijdz*

(Mr. 1:12-13; Lc. 4:1-13)

<sup>1</sup> Dxejc bejn Sprit Dxiän xten Dios huij Jesús nez lo reyubijdz te nejzga nuhal bendxab Jesús.

<sup>2</sup> Che gulujx bacua'n Jesús tiuu gubijdx, tiuu guxhijṅ, gulaanni.

<sup>3</sup> Sas biääd bendxab lojni, räjṅni:

—Palga guliilu Xi'n Dioslu, gunibee gac reguijre yätxtiil.

<sup>4</sup> Badzu' Jesús diidxre lojni, räjṅni:

—Loj reguijtz xten Dios caj scree: “Xhet ganaxdi yälxtiil guibajṅ rebejṅ; sibajṅzani con guiraa diidx nani rnii Dios.”

<sup>5</sup> Dxejcti huiinä bendxab Jesús guedx Jerusalén. Gulä'pnini jiaa yejc xques guidoro. Dxejcru räjṅ bendxab lojni:

<sup>6</sup> —Palga Xi'n Dios luj, bitiäjs lo yujli, sa'csi scree caj loj rexquijtz Dios:

Sinibee Dios rexanglni ga'preni luj;  
siliäsreni luj con ṅaareni didi gacnaj ni'lu lo reguijga.

<sup>7</sup> Badzu' Jesús diidxre lojni, räjṅni:

—Caj loj rexquijtz Dios: “Na'c fallu Dad ni najc Xtioslu.”

<sup>8</sup> Stee huält huiinä bendxab Jesús yejc te danro. Dxejcti baluini lojni guiraa reguejdx, reguedxro ni tre' lo guedxliuj näj guiraa xcäl'nasa'creni.

<sup>9</sup> Dxejcti räjṅni loj Jesús:

—Guiraa redee sunidxä lojlu palga guzuxhijblu nez loä te ganlu narä.

<sup>10</sup> Dxejcti räjṅ Jesús lojni:

—iHuij nez rec bendxab! Scree caj loj rexquijtz Dios: “Dad Xtioslislu ganlu; lojtisni chulu.”

<sup>11</sup> Dxejcti gubicaj bendxab loj Jesús. Dxejc biääd rexangl Dios biädhuiireni Jesús.

### *Gusloj Jesús cayujṅ xtzuunni*

(Mr. 1:14-15; Lc. 4:14-15)

<sup>12</sup> Che biejn diajg Jesús yu' Juan nen ladzguiib, huijni nez Galilee.

<sup>13</sup> Dxejcti gudejdni guedx Nasare't, huiläjzni guedx Capernaum ni tre' gajxh nez ro' nis, nez reguejdx Zabulón con Neftalí.

<sup>14</sup> Si'c gujc te guzojb diidx ni bacuaa Isaías ni gunii xtidx Dios:

<sup>15</sup> Lajdx Zabulón, lajdx Neftalí, nezyuj ni rij nez ro' nisdoo, stelaad gueu Jordán,

Galilee cadro rbäjz rebejn nani di gac rexpen Israel.

<sup>16</sup> Rebejn nani rbäjz nen te yälkäjy abahuiireni te bajlga, luxh bajlga basanij xcäriejn renani nabajn lo xcälrdxejb, lo xpalaa yälgujt.

<sup>17</sup> Dxejcli gosloj cagulijdx Jesús, räjpni:

— Colgusiejchlajztu, colguxhobdojl te guibansa'ctu sa'csi abidzungajxh xcälrnibee Dios.

### *Che gurejdx Jesús tajp xpejn*

(Mr. 1:16-20; Lc. 5:1-11)

<sup>18</sup> Sasaj Jesús nez ro' nisdoo xten Galilee che bahuiini lo tio'p niguii. Tejni laa Simón, ni laaza Pedr. Steeni najc lagajc bejtzni, ni laa Andrés. Dzuun ni rujnreni najc rniaazreni bäjł, ni'c cacuaareni guijxh lo nisdoo.

<sup>19</sup> Dxejcti räjp Jesús lojreni:

— Coltanaj narä. Naj riniaaztu bäjł, niluxh narä gunä cueedxtu rebejn.

<sup>20</sup> Lagajc dxejc basa'nreni xquijxhreni te sanajlreni laani.

<sup>21</sup> Che gudejdreni ro'c, bahuiini loj stio'p niguii, Jacob con bejtzni Juan. Yu'reni nen te barcw con xtadreni, ni laa Zebedeo cayunsa'creni guijxh. Dxejc gurejdx Jesúsreni.

<sup>22</sup> Lagajc dxejc basa'nreni barcw näjza xtadreni te sanajlreni Jesús.

### *Caguluii Jesús xhidajł bejn*

(Lc. 6:17-19)

<sup>23</sup> Sasajti Jesús guideb nez región xten Galilee, caguluiini nen teja rexquidooreni. Cagusule'ni redidxcoob xten xcälrnibee Dios. Cagusiajczani guiraa yälracxhuu ni rajc rebejn guejdxga, guiraa yälgujdx.

<sup>24</sup> Biejn diajg reben Siria diidx xcuent ni cayujn Jesús. Sas biädnäreni guiraa rebenracxhuu ni cayajc guiraloj yälgujdx, yälñayan; guiraa reni rajc yejcreni, guiraa reni rajc malyälgujdx, reni rajc yälguidxbej, guiraareni abixu'n tiejxhreni. Dxejcti basiajč Jesús rebejnğa.

<sup>25</sup> Xhidalduxh beñ Galilee huinajłni, näj reben reguedx Decápolis, näjza reben guedx Jerusalén, näjza reben Judea näjza rebejn ni tre' stelaad gueu Jordán.

## 5

### *Yejc te dajn balijdx Jesucrist rebejn*

<sup>1</sup> Che bahuii Jesús loj reben xhidajł, huä'pni yejc te dajn. Dxejcti gubig rexpejn ni gurejdxni lojni.

<sup>2</sup> Dxejc gosloj caguluii Jesús reni'c, scree räjpni:

### *Rebejn ni sibaalajz*

(Lc. 6:20-23)

<sup>3</sup> —Sibaalajz rebejn nani nanchee rquinduxhreni xcälracnäj Dios, sa'csi laareni nungäjłreni xcälrnibee Dios.

<sup>4</sup> Sibaalajz rebejn nani rac-huin lajzreni xcuent rextojłreni, sa'csi sudzucaj Dios xtojłreni, susiäjłni lajzreni.



<sup>5</sup> 'Sibaalajz rebejn nani nadolajz nani r1ajz guntis si'cni rnibee Dios, sa'csi sacnäj Diosreni lo xcäl'nabajnreni lo guedxliujre.

<sup>6</sup> 'Sibaalajz rebejn ni nastoocanu rliaanreni, rioj1reni, sa'csi r1ajzreni guibaᅇsa'ctisreni nez loj Dios, sa'csi sudeed Dios lojreni guiraa ni rniabreni.

<sup>7</sup> 'Sibaalajz rebejn nani rulas1ajz sa'reni, sa'csi sulas1ajzza Diosreni.

<sup>8</sup> 'Sibaalajz rebejn nani najc nayatis lastooreni rujnreni rexhigabsa'c xten Dios sa'csi suhuiireni lo Dios.

<sup>9</sup> 'Sibaalajz rebejn nani ruscuedxilajz sabejnreni, sa'csi laareni sirilajzreni rexi'n Dios.

<sup>10</sup> 'Sibaalajz rebejn nani rusutijp lajzreni che rusacsı bejnreni sa'csi nabaᅇsa'creni nez loj Dios, sa'csi xtenreni najc xcäl'rnibee Dios xhaguibaa.

<sup>11</sup> 'Colspaalajztu che gusacsı bejntu tilnäjreni la'tu, guiniireni guiralaj didx-xhii xcuent xtidxä.

<sup>12</sup> Colguibaalajz, colbalajz sa'csi xhaguibaali sunidxduxh Dios xcuent xtzuntu. Sigajcza basacsıreni reniguii ni gubajn galoo ni gunii xtidx Dios.

### *La'tu najctu si'c sejd lo guedxliujre*

*(Mr. 9:50; Lc. 14:34-35)*

<sup>13</sup> Räjpzani:

—La'tu najctu si'c sejd lo guedxliujre. Palga di sejd gac nadzujy, ¿xho gacsacni nadzujy? ¿Xhi gun bejn ni dxejc? Susäl'reni sejdga detz yu', suläj bejn yejci.

<sup>14</sup> 'La'tu najctu si'c te bianij lo guedxliujre. Te guejdx nani tre' jiaa yejc te dajn, digacdi guiga'tzni.

<sup>15</sup> Digacdi xcaguij te bajl dxejcti jiäuuni nen te caj. Maazru huen soobni jiaa nen te gandilieer te gusanijni loj guiraa rebejn ni tre' nen yu'.

<sup>16</sup> Xcäl'nabaᅇsa'ctu najc si'c te bajl loj rebejn guedxliuj. Suhuiireni xtzunsa'ctu dxejc siliä'preni xpala'n xtadtu ni yu' xhaguibaa.

### *Ruluii Jesús xcuent leii*

<sup>17</sup> Räjpzani:

—Na'c guntu xhigab siädgudzucaä leii xten toMoisés, niclaza rediidx ni baluii redad ni gunii xtidx Dios. Xhet siädzducaädini, narä siälä te guluiäpacni si'cni najcni.

<sup>18</sup> Rniliäpac, dxejli che ni nitloj guibaa näjza guedxliuj, nicla tej letr ni caj loj leii di nit. Sajcpac guiralii ni caj lo reguijtzga.

<sup>19</sup> Ni'cni chutis ni r1ajz gusaan te diidx nani caj loj leii, mase te didxbäzni, luxh ruluiini gun bejn si'c, laani guxiduxh sajcti lajdx Dios guibaa. Niluxh renani rucuaadijg xtidx leii, luxh rujnpacreni si'cni caj lo leii, ruluiizani leii, bensacduxh gacni lajdx Dios guibaa.

<sup>20</sup> Ni'cni rniä lojtu, palga ditu gunsa'cru xtzun Dios, ditu guibaᅇsa'cru loj reni najn xcuent xleii toMoisés, näjza loj rebejn guidoo ni laa farisee, dipactu jiu' lajdx Dios xhaguibaa.

### *Ruluii Jesús xcuent yälrdxe'ch*

*(Lc. 12:57-59)*

<sup>21</sup> Räjpzani:

—Abiejnza diajgtu nani gunii rebeᅇgoldoo: “Na'c ju'tlu. Chutis te nani ju't sa'ni, sinärenini lo guxhtis te jiäuuni nen latzguuib.”

<sup>22</sup> Niluxh narä rniä chutis nani guidxechduxh lo sa'ni sijni lo guxhtis. Chutis ni guinii didxnaj lo sa'ni, sijni lo juejz. Chutis ni gäb lo sa'ni: “benᅇayäl1ajz” sidejdni loj yälᅇguxhtis xten Dios, sijni gabijl cadro cayejc guiboduxh.

<sup>23</sup> 'Che sanälu gojn guidoo te gusa'nluni lo bacuug, palga guinaj lajzlu yu' chu lo cadxe'chlu.

<sup>24</sup> basansijc gojn xtenlu lagajc ro'c, huisiäl'xгаа diidx con sa'lu, dxejcti guibi'lu te gac gusa'nlu gojn xtenlu.

<sup>25</sup> 'Palga yu' chu rdxe'ch lojlu, basquejn basiäjl diidx con laani lagajc cheni sasanäjuni loneyuy te di guteedni luj lo juejz. Luxh juejz suteedni luj loj reguixhajg te gusa'reni luj neñ latzguiib.

<sup>26</sup> Rniliäpac lojlu: "Dilu guirii ro'c palga dilu cue'c guiralii meel nani guiniabni lojlu."

*Rului Jesús xcuent yälrusguee sa'ni*

<sup>27</sup> Räjzani:

—Abiejn diajgtu guniireni galoo: "Na'c guesnäjtu gunaa nani di gac chäältu."

<sup>28</sup> Narä rniä, chutis te nani fii loj te gunaa dxejcti guisia' lajzni gunaaga, abejnni dojl neñ lastooni.

<sup>29</sup> Palga balojlu ladbee rujn rujnlu dojl, gulääni basäl'ni te laad sa'csi hueenru gunijtlu te balojlu quela chää guideb tiejxhlu gabijl.

<sup>30</sup> Palga naalu ladbee rujn rujnlu dojl, batiu'ni sa'csi hueenru gunijtlu te naalu quela chää guideb tiejxhlu gabijl.

*Rului Jesús xcuent yälru'o'n chää bejn*

*(Mt. 19:9; Mr. 10:11-12; Lc. 16:18)*

<sup>31</sup> Räjzani:

—Abiejn diajgtu guniireni galoo: "Chutis niguii ni rlanj guro'n chäälni, nanabtis gudeedni te guijt z nani rniä abaro'nni chäälni."

<sup>32</sup> Narä rniä, niguii nani guro'n chäälni niluxh xhet dojldi bejn chäälni, niguiiga sujn gun chäälni yälgubejxh, niluxh chutis ni guich'naa gunaaga sujnzani yälgubejxh.

*Rului Jesús xcuent che ria'n diidx*

<sup>33</sup> Räjzani:

—Abiejn diajgtu gunii rebengool: "Che ria'nlu diidx lo Dios gunlu xhi gunlu, na'c jial lajzlu; basa'pac xtiidxlu lo Dios."

<sup>34</sup> Narä rniä, na'c gunlu juraar, nicla tej mood, nicla por xhaguibaa, sa'csi ro'c najc lajdx Dios,

<sup>35</sup> nicla por loj guedxliuj sa'csi ro'c rsiuj ni'ni; nicla por guedx Jerusalén sa'csi ro'c najc guedxlaixdx reiuro,

<sup>36</sup> niclaza por lagajc bitiuvejclu, sa'csi digacdi guncheelu te guichyas niclaza te guich'nal, nicla tej guijch.

<sup>37</sup> Nanab guiniitisl: "Mbaj" o "Ajndi". Palga yu' xhuru rniilu, beñdxab najc ni rujn rniiluni.

*Chanälajzni rebejn ni rdxe'ch lojni*

*(Lc. 6:29-30)*

<sup>38</sup> Räjzani:

—Abiejn diajgtu gunii rebengool galoo: "Te baloj por ste baloj, te läjy por ste läjy, nalajznu bejn lo sa'lu si'ctis ni rujnni lojlu."

<sup>39</sup> Narä rniä, na'c tilnäjl te bejn ni bejn te cos guijdx lojlu. Palga chääzni ladbee lojlu badeed stelaad lojlu chääzni.

<sup>40</sup> Palga yu' chu rlanj tilnäjl te xca'ni xcamangwlu, badeedza näj xsa'cwlu lojni.

<sup>41</sup> Palga yu' chu guinibee guulu xcargwni te kilómetro, huináni tio'p kilómetro.

<sup>42</sup> Nani guiniab xhi guiniabxlia'ni lojlu, badeedni. Nani guiniablaa xhi guiniblaani lojlu na'c gudxojnlnuni lojni, na'c gäblu: "Xhetini."

<sup>43</sup> 'Abiejn diajgtu gunii rebeḡgool: "Cołchanälajz sa'tu. Cołguidxe'ch loj renani rdxe'ch lojtu."

<sup>44</sup> Narä rniä lojtu, cołchanälajz rebeḡn ni rdxe'ch lojtu. Benle' yejc reni rgue lojlu. Cołyejn dxunsa'c loj renani rdxe'ch lojtu. Cołcujdx, colnab loj Dios xcuent rebeḡn nani rdxagdijltu, rusacsireni la'tu,

<sup>45</sup> te si'c gactu xi'n xtadtu ni yu' xhaguibaa nani rujn rri xcubijdxni lo rebeḡsa'c sigajcza lo rebeḡguijdx. Rujnzani riabj nisguij lo rebeḡsa'c sigajcza lo rebeḡguijdx.

<sup>46</sup> Palga la'tu chanälajztu lagajctis rebeḡn nani rinälajz la'tu, ¿xhi gaan guntu dxejc? Najctu lagajc si'c najc rebeḡn ni rutie' meel ni rajx lo gubier.

<sup>47</sup> Palga guiniitu: "Xchan", lagajctis loj resa'tu, ¿xhini'c rujntu ni najc huenru lo chutis beḡn? ¿La et sigajcdiza rujn rebeḡn nani di gumbee Dios?

<sup>48</sup> Colyajc beḡsa'c si'c ni najc xtadtu ni yu' xhaguibaa.

## 6

### *Rului Jesús xho gudeedni gojn*

<sup>1</sup> Räjpzani:

—Na'c gusäbdiidx guntu dzunsa'c nez loj rebeḡn te fiitisreni xhi rujntu. Palga gusäbdiidxtu di xtadtu ni yu' xhaguibaa guniidx xhi xca'tu.

<sup>2</sup> Che gudeedlu gojn, na'c güilu diidx xhi badeedlu. Na'c gunlu si'c rujn rebeḡn nani rusguee neḡ reguidoo, näjza lad nezuyj. Rujnsireni si'c te ruhuii rebeḡn xhi rujnreni te rliä'p rebeḡn xpala'nreni. Narä rniä acua'reni gaan xtenreni.

<sup>3</sup> Luj che gudeedlu gojn xtenlu, na'c gachee nicla tej xamiigwlu xhi badeedlu,

<sup>4</sup> te gac gojn xtenlu xhiga'tz. Dxejcti xtadlu ni cahuii nani beḡnlu xhiga'tz, sacnäjni luj nez loj rebeḡn.

### *Rului Jesucrist xho cueedx, guiniabni lo Dios (Lc. 11:2-4)*

<sup>5</sup> Räjpzani:

—Cheni rbejdx, rniabtu lo Dios, na'c guntu si'c rujn rebeḡguidoo ni rusguee. Rchaglajzreni rniabreni lo Dios rsiuliireni neḡ reyuu' cadre rieł xtidx Dios, näjza guiraa resquuin, näjza nez ronejz te ruhuii rebeḡn xho rujnreni. Rniliäpac, acua'reni gaan xtenreni.

<sup>6</sup> Naj luj cheni cueedx, guiniablu lo Dios, biu' neḡ xyu'lu. Basäuu ro' yu'ga, dxejcti xhiga'tz gunii loj xtadlu ni yu' xhaguibaa. Dxejcti xtadlu ni cahuii xhi rujnlu xhiga'tz, sacnäjni luj nez loj rebeḡn.

<sup>7</sup> 'Cheni caniitu lo Dios, na'c guinisactu balti huält rediidx nani aguniitu. Si'c rujn rebeḡn nani di gumbee Dios. Naareni sa'csi sanuutis rniireni xhidajł diidx balti huält, siejn diajg Dios.

<sup>8</sup> Na'c guntu sigajc ni rujnreni, sa'csi anajn xtadtu xhini'c rquiintu che guiniabtuni lojni.

<sup>9</sup> Ni'cni scree colguinii lo Dios:

Xtadnu ni yu' xhaguibaa dxan najc lajlu.

<sup>10</sup> Sujiääd xcälrnibeelu;

beḡn si'cni rlaizlu lo guedxliujre sigajc rujnlu xhaguibaa.

<sup>11</sup> Nadxej baniidx xcu'nnu sa' ni rdaunu guira dxej.

<sup>12</sup> Basiäjł lajzlu redojl xtennu si'c riäjł lajznu redojl xten rebejn ni rujn dojl loonu.

<sup>13</sup> Na'c gusaanlu jiaabnu xhigabguijdx, basłaa nuure lo dojl,

sa'csi xten guejblu najc yälrnibee, yälınadip näjza yälrdimbicha' par tejpas. Sugacni si'c.

<sup>14</sup> Palga la'tu gusiäjł lajztu redojl ni rujn rebejn lojtu, xtadtu ni yu' xh-aguibaa susiäjłza lajzni rextojłtu.

<sup>15</sup> Palga ditu gusiäjł lajztu redojl ni rujn rebejn lojtu, sigajcza xtadnu ni yu' xhaguibaa di lajzni jiäjłza rextojłtu.

### *Ruluii Jesús xho gucu'a'n bejn*

<sup>16</sup> Räjpzani:

—Che rucua'ntu na'c guntu si'c rujn rebejn nani rusguee; rumbaa lojreni te fii rebejn cagucua'nreni. Rniliä acua'reni rexgaanreni.

<sup>17</sup> Niluxh la'tu, che rucua'ntu, colcuñ yejctu, colquuib lojtu

<sup>18</sup> te na'c gachee rebejn cagucua'ntu, xtadtistu suhui cagucuanxhiga'tztu. Xtdadtu ni cahuii xhi cayunxhiga'tztu suniidxni xhi xca'tu nez loj rebejn.

### *Yälınasa'c ni yu' xhaguibaa*

*(Lc. 12:33-34)*

<sup>19</sup> Räjpzani:

—Na'c gapdajntu yälınasa'c lo guedxliujre cadro rajw reman o rbihtiejn xhixtentu, niluxh richu' gubaan rolijz bejn te rbajnreni.

<sup>20</sup> Hueenru ga'ptu xcälınasa'ctu xhaguibaa cadro di reman gauu, diza rexixtentu cuibtiejn, diza regubaan jiu' te cuanreni.

<sup>21</sup> Sa'csi cadro yu' xcälınasa'ctu, ro'cza naga' lastootu.

### *Bianij xten tiejxhtu*

*(Lc. 11:34-36)*

<sup>22</sup> Räjpzani:

—Bianij xten tiejxhni najc balojni, ni'cni palga rhuisa'c balojtu, guideb tiejxhtu yu' lo bianij.

<sup>23</sup> Niluxh palga rebalojtu di fisa'c, guideb tiejxhtu yu' lo nacäy, ni'cni palga bajl nani yu' tiejxhtu dini gusanij, ilinacäiboo najc guidebtu!

<sup>24</sup> Nicla te bejn di gacdi gun dzuun loj tio'p lam tejsi junt, sa'csi sibälazni tejni laga sanälajzni steeni. Digacdi guntu xtzuun Dios palga caguuiltistu xcälınasa'ctu lo guedxliujre.

<sup>25</sup> Ni'cni rniä lojtu, na'c chutu yärsia' por xcälınabajntu, xhicha gautu, xhicha yätu, niclaza naatu xhicha lajd gajcwtu. Yälınabajn sajrcru lo yälrajw, luxh sajrcru tiejxhtu lo xhajbtu.

<sup>26</sup> Colhuii remane' ni rtajt xhaguibaa. Direni cue'c binij, dizareni guilia' gäjł, dizareni cuhee xhi gaureni neñ yu', luxh xtadtu ni yu' xhaguibaa rudeedni xhi rajwreni. ¿Laa xhet sajcdirutu loj remane'ga, ä?

<sup>27</sup> ¿Chu tej la'tu sa'csi ru'tu yärsia' sajc tiobrutu ste bo'c jiaaru?

<sup>28</sup> ¿Xhicient runduxhtu xhigab xcuent xhajbtu? ¿Colhuii reguii ni tre' nesiät! ¿Xho roobreni? ¿Xho rialreni? Direni gun dzuun, dizareni guzaa xhajbreni.

<sup>29</sup> Narä rniä lojtu, nicla rei Salomón guideb najcwni rexhabsa'c xtenni di nisiuchee si'c rsiuchee tej reguiiga.

<sup>30</sup> Palga Dios rujn rajc recuaan ni yu' nesiät ni rial nadxej luxh guixee ahuejcreni, ¿xhixh dini gunduxhru par la'tu, bejn nani guxii rililajz?

<sup>31</sup> Ni'cni na'c chutu yärsia' guntu xhigab: "¿Xhicha guidaunu, xhicha guidunnu, xhicha gacwnu?"

<sup>32</sup> Sa'csi rebejn nani di gumbee Dios xhigabtisga rujnreni, caguiilreni guiraa recosga. Niluxh xtadtu ni yu' xhaguibaa anajnni xhini'c rquiintu.

<sup>33</sup> Colquixgaa yälmbee xten Dios näjza yäl'nabansa'c si'cni rlajz Dios dxej sica'tu guiraa ni rquiintu.

<sup>34</sup> Ni'cni na'c gunduxhtu xhigab xho tedtu dxej guixee. Combast tedtu trabajw nani riääd dxej con dxej.

## 7

### *Na'c cubeetu sa'tu*

*(Lc. 6:37-38, 41-42)*

<sup>1</sup> Räjpzani:

—Na'c cubeetu sa'tu te na'cza cubee Dios la'tu.

<sup>2</sup> Sa'csi sigacni rgubeetu sa'tu, sigajcza sigubee Dios xhi rujntu; niluxh lagajc si'cni rutiehxhtu lo bejn, si'cza sutiehx Dios lojtu.

<sup>3</sup> ¿Xhicuent ruhuiilu loj guijxh ni yu' baloj sa'lu, luxh dilu fii yagro nani yu' lagajc balojlu?

<sup>4</sup> ¿Xhicuent gäblu lo sa'lu, nädonnu cuää guijxh ni yu' neñ balojlu, luxh dilu fii loj yagro ni yu' neñ balojlu?

<sup>5</sup> Benguidx ni rusguee, guläxgaa yagro ni yu' balojlu te gac fisa'clu te cuäalu guijxh nani yu' baloj sa'lu.

<sup>6</sup> Na'c guluiitu guiraa rextidx Dios loj chutis bejn sa'csi yu'reni najc si'c bä'cw, xlia'si rca'renini; sibi'reni, sauya'reni luj. Sigajcza recos sa'cru, na'c gudeedtuni loj chutis bejn, sa'csi yu'reni najc si'c cuch rbälazreni cossa'c najreni si'c cuch ni ruläj yejx xhitis xhi cos.

### *Colnab, colquiiil, colgusejz rolä'*

*(Lc. 11:9-13; 6:31)*

<sup>7</sup> Räjpzani:

—Colnab lo Dios te guniidxni nani rniabtu. Colquiiilni te guidxäjltuni. Colniilni rolä', te guixalni jiu'tu.

<sup>8</sup> Chutis ni rniab lo Dios sica'ni nani rniabni, nani rguuil xhi cos nez loj Dios rdxälzani nani rguuilni; nani rusejz rolä', suxhalzarenini lojni.

<sup>9</sup> ¿La yu' chu tejtu che guiniab xi'nni te yätxtiil, alga gudeedni te guij, ä?

<sup>10</sup> O palga guiniabni te la' bälj, ¿la sudeedni te bälj?

<sup>11</sup> Palga la'tu ni najc beñ guidx rajc rudeedtu cossa'c loj xi'ntu, aticaxh xtadtu ni yu' xhaguibaa. Laani suniidxni cossa'c loj renani guiniabni lojni.

<sup>12</sup> Ni'cni guira'ti cos ni rlajztu gunnäj bejn la'tu, sigajcza colyennäjreni, sa'csi si'c caj lo leii xten toMoisés, näjza lo diidx ni bacuaa redad ni gunii xtidx Dios.

### *Rolä' xten yäl'nabajn najc dää*

*(Lc. 13:24)*

<sup>13</sup> Coljiu' nez rolä' nani najc dää, sa'csi gulaj najc rolä', gulaj najcza nezyuj nani rinä bejn lo yälrunij, luxh xhidajlreni riu' nejzga.

<sup>14</sup> Sa'csi dää najc rolä', dääza najc nezyuj nani rinä bejn nez loj yäl'nabajn, niluxh guxii najc renani rdxäl nezyujga.

### *Ninexhsa'c ni rcaj loj te yajg rujn gumbeeni yajgga*

*(Lc. 6:43-44)*

15 Rāj̄pzani:

—Colnatiro rebejn nani r̄lajz gusguee la'tu. Rniisireni rusule'reni xtidx Dios. Rl̄uisci nadolajzreni si'c te xiil, niluxh direni gac. Alga si'c loob najcreni, rutie'chreni bejn si'c re'ch xiil che riädchu' loob lojreni.

16 Dzuun nani rujnreni sujn gumbeeturen̄i. Anajntu di uub xcaj lo reyaguejch, diza iigw xcaj lo guechbiojb.

17 Ni'cni lo guiraa reyagsa'c rcaj ninexhsa'c lojni, per lo guiraa reyajg ni xhet yagsa'c di, ganax ninejxh ni di ganaxsa'c rcaj lojni.

18 Digacdi xcaj ninexhdxuudx loj te yajg ninexhsa'c. Di gacdiza xcaj te ninexhsa'c loj te yajg ni di gac yagsa'c.

19 Guiraa reyajg nani di ninexhsa'c xcaj lojni, nanab guidinni te checni.

20 Sigajcza sajc gumbeetu beñsa'c sa'csi rujnreni dzunsa'c.

*Xhet guiraadi bejn jiu' lo xcäl̄rnibee Dios*

*(Lc. 13:25-27)*

21 Rāj̄pzani:

—Xhet guiraadi renani rn̄ii, “Dad, Dad”, jiu' lo xcäl̄rnibee Dios xhaguibaa. Ganaxtis renani rujn si'cni r̄lajz Xtaďa ni yu' xhaguibaa.

22 Sidzuj̄n dxej sinii xhidajl bejn loä: “Dad, Dad, con lajlu basule'nu xtiidxlu, con lajzalu biläanu rebendxab, con lajzalu biennu remilagw̄r.”

23 Dxejc säpä lojreni: “Dina gumbeä la'tu. Col̄bicaj loä beñlatsiaj.”

*Tio'p cimient*

*(Lc. 6:47-49; Mr. 1:22)*

24 Rāj̄pzani:

—Chutis nani rucuadiajg diidx nani caniä, luxh ruzoob xtidxä, laani najc si'c te beñsin̄ nani basoob rolijzni yejc te guilaj.

25 Che biajb nisguij, biäjt nis gueuu, gubi' bej, bidinreni yejc yu'ga sas di yu'ga niajb sa'csi sojbni yejc guilajga.

26 Nani riejn diajgni xtidxä, luxh dini guzoob xtidxä najc si'c te beñ gualajz nani basoob rolijzni lo yujxh.

27 Che biajb nisguij, biäjt nis gueuu, gubi' beduxh bidinreni yec yu'ga. Dxejc ligurebä'n yu'ga. Lacti xhiroob banijt bejnga.

28 Che gulujx gunii Jesús rediidxga, lacti bidxeloj rebejn rediidx ni baluiini,

29 sa'csi baluiini rebejn si'cpac te nani rnibee, xhet si'c ruluiidi rebejn ni najn leii.

## 8

*Rusiajc Jesús te bejn ni ral̄ tiejxhni*

*(Mr. 1:40-45; Lc. 5:12-16)*

1 Che biäjt Jesús yec dajn, xhidajl bejn huinajlni.

2 Dxejcti biääd te beñracxhuu ni ral̄ tiejxhni nez loj Jesús. Bazuxhijbni, rāj̄pni:

—Dad, palga r̄lajzlu, sajc gusiajclu narä.

3 Dxejcti basгаа Jesús ñaani, gudajnni dade'ga con ñaani, rāj̄pni:

—Rlazä jiajclu. Siajc tiejxhlu.

Lagajc dxejc gubicaj guejdx ni ral̄ tiejxhni.

4 Dxejcti rāj̄p Jesús lojni:

—Arniä, rut lojdi gäblu xhi guzajclu. Huijtis lo rebixhojz te badeed gojn ni gunii toMoisés gudeed bejn ni riajc, te fii rebixhojzga abiajclu.

*Rusiajc Jesús te xmos capitán roman*  
(Lc. 7:1-10)

<sup>5</sup> Che biu' Jesús guedx Capernaum, bidzujn te capitán roman nani rnibee te gayuu soldaad. Gunabduxhni lo Jesús,

<sup>6</sup> räjpni:

—Dad, xmosä naga' rolizä. Di gacdi guiniibni luxh cayanduxhni.

<sup>7</sup> Räjp Jesús:

—Do'o te gusiacäni.

<sup>8</sup> Dxejcti räjp capitán lojni:

—Dad, xhet sacädi; di nungäj] jiu' guejblu rolizä. Guiniitis te diidx, siacgajc xmosä.

<sup>9</sup> Narä nacäza xmos rebejn ni rnibee, niluxh rnibeäza te gayuu soldaad. Che rniä lo tejni: “Huij”, rijni. Che gäpä loj steeni: “Gudaa”, riädgajcni. Che gäpä loj xmosä: “Bejn dee”, rungajcni.

<sup>10</sup> Che biejn diajg Jesús si'c, bidxeloduxhni, räjpni loj renani siädna]jni:

—Rniliäpac lojtu, nicla nen guideb reguedx Israel dina nidxälä te bejn ni rililajz si'c rililajz dade're.

<sup>11</sup> Niluxh rniä, sirii xhidajl benzijt nez ladjiaa, nez ladjiät, te jäädcuena]reni Abram, Isaac, Jacoob lajdx Dios xhaguibaa.

<sup>12</sup> Luxh reben Israel nani niajc xi'n Dios sijreni te laad lo yälcä]y cadro soonreni, sauya'reni läjyreni, sidejdtisreni trabajw par tejpas.

<sup>13</sup> Dxejcti räjp Jesús loj capitán:

—Gubi' rolijzlu. Sigajcni huililajzlu, sigajcza gacni.

Dxejc lagajc orga bja]c xmosni.

*Rusiajc Jesús xnansueegr Pedr*  
(Mr. 1:29-31; Lc. 4:38-39)

<sup>14</sup> Che bidzujn Jesús rolijz Pedr, bahuiini naga' xnansueegr Pedr, cayacx-huuni, yu'ni xliaa.

<sup>15</sup> Dxejc gudajntis Jesús naani, birigajcni xliaaga. Dxejcti huistie nane'ga, gusloj cagudeedni xhi gau Jesús.

*Rusiajc Jesús xhidajl ben racxhuu*  
(Mr. 1:32-34; Lc. 4:40-41)

<sup>16</sup> Che biu' guxhijn, biädna]reni loj Jesús xhidajl bejn ni yu' rebendxab lostooreni; con xtiidxni gunibeeni birii guiraa reben]dxabga. Basiajczani guiraa reben racxhuu.

<sup>17</sup> Si'c bejn]ni te guzobj diidx ni bacuaa todad Isaías, ni gunii xtidx Dios, che räjpni:

Lagajc laani cua'ni rexcäl]racxhuunu, sanäzani rexcäl]nayannu.

*Reni rlajz ninaj] Jesús*  
(Lc. 9:57-62)

<sup>18</sup> Che bahuii Jesús tre' xhidalduxh rebejn guideb gabi cadro suga'ni, gunibeeni tednä]ni rexpejn]pacni stelaad ro' nis.

<sup>19</sup> Dxejcti biääd te be]n]najn loj Jesús, räjpni:

—Mastr, sisiaäza cadrotis chäälü.

<sup>20</sup> Räjp Jesús lojni:

—Rebäjz rajpreni xpiliääreni, remane' ni rutajt xhaguibaa rajpreni xpi-tiääreni, niluxh narä Xi'n Dios ni gujc Niguui dina gapä cadro gaa yecä.

<sup>21</sup> Stee rexpejn]pacni räjp lojni:

—Dad, basaan chaxgaä ladxä te chacuatzá xtadä.

22 Räj̄p Jesús lojni:

—Gudanajl narä. Basaan sugucua'tz resabengutreni rebejn̄ nani najc si'c bengut sa'csi najcreni beñdojl.

*Basiacdx̄i Jesús te beduxh*  
(Mr. 4:35-41; Lc. 8:22-25)

23 Che biu' Jesús neñ barcw, biu'za rexpejn̄pacni lagajc neñga.

24 Dxejc huäjs te bedonduxh lo nisdoo. Lirusiääzni barcw neñ nisdoo. Luxh Jesús nagayejsni.

25 Dxejcti huij rexpejn̄pacni huicuaäänni, räjpreni:

—Dad, gucnäj nuure te di guetnu.

26 Dxejc räj̄p Jesús:

—¿Xhicuent rdxejbtu, bejn̄ ni guxii rililajz?

Dxejcti huistieni, gudidxa'ni lo bej nájza lo nisdoo, te biacdxireni.

27 Dxejc bidxeloduxh rexpejn̄pacni, räjpreni:

—¿Chuni'c najc niguiire? ¡Ahuilaa xho rucuaadiajg bej nájza nisdoo xtiidxni!

*Rebendxab ni yu' lajdx regadarenos*  
(Mr. 5:1-20; Lc. 8:26-39)

28 Che bidzujñ Jesús stelaad nisdoo cadro najc lajdx regadarenos, tio'p bejn̄ ni yu' bendxab lastooreni biädchaglojreni Jesús. Rebejn̄ga riireni neñ rebaa, nialazduxhrene, ni'cni rut rajcdi rdejd nezuyuga.

29 Guredxa'reni räjpreni:

—¿Xhicuent siädchu'lu loonu luj ni najc Jesús Xi'n Dios? ¿La siäädlu ree te gusacsilu nuure luxh gad gal̄di xor̄nu, ä?

30 Nez te laad, zijte' cadro suga'reni, cayajp bejn̄ xhidalro cuch.

31 Dxejcti gunab rebendxabga loj Jesús, räjpreni:

—Palga cuäälu nuure, basaan jiu'nu neñ recuchre.

32 Dxejcti räj̄p Jesús:

—Colchäj.

Dxejcti biriireni neñ lastoo redade'ga, huichu'reni neñ recuchga. Dxejcti guiragajc recuchga caguxun̄reni, huitejbreni ro' te guilaj, biääzreni neñ nisdoo, gujttireni neñ nis.

33 Rebejn̄ ni cayajp recuchga, baxun̄reni, huijreni lajdxreni, huiyeireni diidx guiraa ni guzajcreni nájza ni guzajc redade' ni guyu' rebendxab lastooreni.

34 Dxejcti guiraa rebenguejdxga huichaglojreni Jesús. Che bahuiireni lojni, gunabduxhrene lojni, jiunejzni lajdxreni.

## 9

*Basijc Jesús te bejn̄ nani abixu'ñ tiejxhni*  
(Mr. 2:1-12; Lc. 5:17-26)

1 Dxejcti biu' Jesús neñ barcw. Gudejdni stelaad ro' nis te bidzujñni lajdxni.

2 Ro'c biädnärene lojni te bejn̄ nani abixu'ñ naani, ni'ni. Naga'ni lo te da'. Che bahuii Jesús lacti rililajzreni, räjpni loj beñracxhuuga:

—¡Baspaa lajzlu xi'nä! Agubicañ rextojllu.

3 Dxejcti gaii beñnajñ ni ruluii xleii Moisés cayujn̄reni xhigab ensilaareni, caniyaj dee Dios con rextiidxni.

4 Dxejc gucbegajc Jesús xhi xhigab cayujn̄reni, dxejc räjpni lojreni:

—¿Xhicuent cayujntu xhigabguijdx neñ lastootu?



<sup>5</sup> ¿Con ni najc guyasiru? Guiniä lo te bejn: “Agubicaj rextojllu”, o guiniä lo te bejn: “Huistie, guzaj.”

<sup>6</sup> Dec gunä te gacheetu Xi'n Dios ni gujc Niguij rajp yäl̄rnibee lo guedxliujre te gudzucajni dojl.

Dxejcti räjpni loj beñracxhuuga:

—Huistie, cua' xta'lu, huij rolijzlu.

<sup>7</sup> Dxejcti huistie beñracxhuuga, siini rolijzni.

<sup>8</sup> Che bahuii rebejn lojni, bidxeloduxhrene, gulä'preni xpala'n Dios, ni badeed yäl̄rnibee loj rebejn.

### *Che gurejdx Jesús Mateo*

(Mr. 2:13-17; Lc. 5:27-32)

<sup>9</sup> Dxejcti birii Jesús cadro basiajcnii beñracxhuu, sä'tini. Dxejc bahuiini loj te dade' ni laa Mateo. Sobga'ni loj te yagxhiil cadro rbej reni ruquijx xcuent guiraloj. Dxejc räjp Jesús lojni:

—Gudanajl narä.

Dxejcti huisuni, sanajlni Jesús.

<sup>10</sup> Cheni sobga' Jesús lo mex cayajwreni rolijz Mateo, biäädza xhidajl rebejn nani ruquijx xcuent guiraloj, ni najc rebejn ni di gac xpen̄ Israel, gurejzarenii lo mex näj Jesús näjza reni najc rexpejn̄pacni.

<sup>11</sup> Che bahuii rebejn guidoo, ni laa refarisee, xhi cayujn Jesús, räjpreni loj rexpejn̄pac Jesús:

—¿Xhicuent raunäj xmasrttu rebejn nani ruquijx xcuent reyuj näjza rebejn ni di gac xpen̄ Israel?

<sup>12</sup> Che biejn diajg Jesús xhi guniireni, räjpni lojreni:

—Rebejn nani nadaan dini guiquiin chu gusiajcnii, niluxh rebejn racxhuu ni'c rquiniireni chu gusiajcnii.

<sup>13</sup> Colchäj te colchaseed xhi säloj diidxre ni caj loj reguijtz: “Yäl̄rulaslaj rlazä, dina rlazä guniidxtu guidxaa loä.” Sa'csi narä dina niädtedxä beñsa'c, narä siädtedxä rebendojl te gusiechlajzreni.

### *Gunabdiidxreni xcuent yäl̄rucua'n*

(Mr. 2:18-22; Lc. 5:33-39)

<sup>14</sup> Dxejcti biääd rexpejn̄pac Juan loj Jesús räjpreni:

—Nuure con refarisee rcua'nnu xhidajl huält, ¿xhicuent di rexpejn̄pac lu gucua'n, ä?

<sup>15</sup> Räjp Jesús lojreni:

—Che ruchnaa te bi'n, ¿xhixh rac-huin lajz regelnejdx laga suga' bi'n con laareni? Palga yu' xhi sac bi'nga, dxejc sii soonreni, sucua'nreni.

<sup>16</sup> Rut gundi remiend te ladbiejw con te la' ladcoob sa'csi sixu'n ladcoobga, sutiäjsruni ladbiejwga, sajx xhiroobru cadro biräjsga.

<sup>17</sup> Niclaza gac guida' bincoob neñ reguidbiejw, sa'csi reguidbiejw siräjsni dxejc sixe' bin, sinijtza reguijdga. Ni'cni nanab guida' bincoob neñ reguidcoobza, te si'c nicla tejreni di nit.

### *Xindxa'p Jairo näjza gunaa nani gudajñ xhajb Jesús*

(Mr. 5:21-43; Lc. 8:40-56)

<sup>18</sup> Lañ ni caniini rediidxga, biääd te dade' ni rnibee neñ guidoo xten rexpejn̄ Israel. Bazuxhijbni nez loj Jesús räjpni:

—Entis gujt xindxa'pä. Gudaa, badzuub ñaalu yejcti te guibañsacni.

<sup>19</sup> Dxejcti huisu Jesús, sanäni Jairo. Näj rexpejn̄pacni sanajlreni.

20 Luxh guyu' te gunaracxhuu nani agujc tzubitio'p ijj cayajcni yälguidxbäi. Bidzujñni nez dejtz Jesús, gudajñni ro' xhajibni,

21 sa'csi bejñni xhigab neñ lastooni: "Palga sajç canätis ro' xhajibni, siacä."

22 Dxejc gubiré Jesús bahuiini loj gunaaga, dxejc räjpni:

—Gulecdxilajzlu xindxa'pä. Yälrililajz xtenlu abasiajclu.

Luxh lagajc dxejc bjaic gunaaga.

23 Cheni biu' Jesús rolizj dade' nani rnibee neñ xquidoo rexpén Israel, bahuiini rebejn ni roj bizej näjza xhidajl rebejn ni cabedxa' cayoon, li te biejj cayajc, dxejc

24 räjpni loj rebejnğa:

—Colguibicaj. Nagajejstis dxa'pğa, gajdni guet.

Dxejc rebejnğa alga ruhxiznäjreni Jesús.

25 Cheni abirii rebejn neñ yu', biu' Jesús, gunaazni naa dxape', dxejc huistie dxape'ğa.

26 Dxejcti bire'ch diidxğa guiraa neñ reguejdx ni tre' nejzğa.

### *Basiajc Jesús tio'p lotiä'p*

27 Che birii Jesús ro'c, huinajl tio'p bejñni nani di fi. Rbedxa'reni roonreni räjpreni:

—Balaslaiz nuure, Xi'n toDavid.

28 Che bidzujñ Jesús cadro caya'nni, gubigreni lojni. Dxejcti gunabdiidx Jesús lojreni, räjpni:

—¿La rililajztu sajç gunä ni rniabtu?

Redade'ğa basejc diidx, räjpreni:

—Sajç gunluni, Dad.

29 Dxejcti gudajñni balojreni, räjpni:

—Sugacni si'cpacni rililajztu.

30 Lagajc dxejc bixal balojreni. Sas räjpjac Jesús lojreni:

—Arniä, na'c chayeitu diidxre, te rut gacheedi xhi guzajctu.

31 Cuantsi biriireni ro'c guslojreni cagutie'chreni diidx xcuent Jesús guideb gabi neñ reguejdxğa.

### *Basnii Jesús te gop*

32 Che biriireni cadro bjaic baloj rebejnğa, biääd sgaii bejn biädnäreni te gop loj Jesús. Yu' xpriit beñdxab neñ lastoo bejnğa.

33 Che barilaagw Jesús xpriit beñdxab neñ lastoo beñgopğa, guslogajcni caniini. Rdxeloduxh rebejn räjpreni:

—Gajdpacnu guihuii sa' redzuunre lajdx rexpejn Israel.

34 Dxejc reben guidoo ni najc refarisee, räjpreni:

—Rbääni rexpriit beñdxab con yälrnibee xten beñdxabro.

### *Rulaslaiz Jesús rebejn*

35 Gudejd Jesús guiraa reguedxro näjza reguedxbäz, basule'ni xtidx Dios neñ reguidoo xten rexpejn Israel. Basääbni diidx xten xcälrnibee Dios. Basiajczani guiraloj yälracxhuu, guiraloj yälgujdx ni rajc bejn neñ reguejdxğa.

36 Che bahuiini loj reben xhidajl biaduxhni rebejnğa sa'csi rdebya' lajzreni, rac-huin lajzreni, najczeni si'c najc rexiiil nani di ga'p baxtoor.

37 Dxejcti räjpni loj rexpejn pacni:

—Guliipac xhidalduxh beñ guedxliuj di gan xtidxä, luxh guxii najc reni guliireni; najcni si'c gäjil ni agojl guilia', niluxh ruti mos ni guilia'ni.

<sup>38</sup> Colnab lo Dad nani najc xtenni guedxliujre te guxhalni rebejn ni sajc guluii rebejn guedxliujre, gacreni si'c mos ni rlia' gäj.

## 10

### *Gule Jesús guitzubitio'p rexpejnpacni*

(Mr. 3:13-19; Lc. 6:12-16)

<sup>1</sup> Dxejcti gurejdxni guitzubitio'p rexpejnpacni, badeedni yälrnibee lojreni te gurilaagwreni rexprit beñdxab lastoo bejn näjza te gusiajcreni guiraloj yälgujdx näjza yälracxhuu.

<sup>2</sup> Laj reguitzubitio'p rexpejnnci ni guleni najc: Simón, ni laaza Pedr; Andrés bejtz Simón; Jacoob xi'n Zebedeo; Juan bejtz Jacoob;

<sup>3</sup> Felipe; Bartolomé; Tomás; Mateo, ni najc colectoor; Jacoob, xi'n Alfeo; Lebeo ni rniireni Tadeo;

<sup>4</sup> Simón, te bejn ni yu' loj recananita; Judas Iscariote, nani bateed Jesús ladzṇaa rebejn nani rdxe'ch lojni.

### *Baxhal Jesús rexpejnpacni gutie'chreni diidx*

(Mr. 6:7-13; Lc. 9:1-6)

<sup>5</sup> Guitzubitio'p rebejnre baxhal Jesús. Balijdxnireni räjpni:

—Na'c chäätu nez cad yu' rebejn ni di gumbee Dios. Na'c jiu'tu lajdx rebejn samaritan.

<sup>6</sup> Colchäxgaa lo rexpejn Israel nani agunijt neñ dojl.

<sup>7</sup> Colchäj, colzäbdiidx lo rebejn, colye'tz lojreni xcälrnibee Dios abidzungajxh.

<sup>8</sup> Colgusiajç beñ racxhuu, colgusiajç tiejxh rebejn ni ral guejch tiejxhrene, colguspajn bengut. Colgurilaagw xprit beñdxab lastoo rebejn. Ligaj cua'tu yälrnibee, ligajza colyejn dzuun.

<sup>9</sup> Räjpszani:

—Na'c chanätu oor, niclaza pla't, niclaza coobr neñ xdobdäjltu,

<sup>10</sup> niclaza gujxh na'c chanätu lo nejz. Na'cza chanätu tio'p xhajbtu, nicla gura'ch, nicla baston sa'csi bejn ni rujn dzuun nungäjł xca'ni xhi gauni.

<sup>11</sup> Räjpszani:

—Che guidzujntu xhitis te guedxro, xhitis te guedxbäz, colquuil te beñsa'c. Rolijztisni coljia'n dxejli ni jiunejztu guejdxga.

<sup>12</sup> Cheni jiu'tu neñ yu', colni xtidx Dios lo rebejnga.

<sup>13</sup> Palga najcreni bejn ni numbee Dios, sujia'n yälrbexilajz loj rebejnga. Niluxh palga direni gac beñsa'c, naaddireni xca'reni xtidx Dios, suguibi' yälrbexilajzga lojtu, coljiunejz ro'c.

<sup>14</sup> Palga direni gusaan jiu'tu rolizreni, palga di rlanjreni gucuadiajgreni xtiidxtu, dxejç coljiunejz rolizj bejnga, o coljiunejz guejdxga, dxejç colcuijç guxhuj ni'tu si'c te seen gulälazreni xtidx Dios.

<sup>15</sup> Rniliäpac lojtu, dxej ni gun Dios xcälguxhtisni, te yälguxhtisoru gun Dios rebejnga, quela yälguxhtis ni gujç rebejn guedx Sodoma näj Gomorra.

### *Yälrusacsı ni siäd*

<sup>16</sup> Räjpszani:

—ıColhuiire! Narä suxhalä la'tu si'c xile' nez loj reloob, ni'cni colgacnasınduxh si'c najc te bäl, colyajçza nadolajz si'c te palom.

<sup>17</sup> Colnatiro rebejn sa'csi sutedreni la'tu ladzṇaa rexcuxhtisreni, siguijn-zareni la'tu neñ xquidooreni.

<sup>18</sup> Sinäzareni la'tu nez loj regubier, nez loj rereii xcuent rextidxä, te gusule'tu xtidxä nez lojreni näjza nez loj rebejn nani di gumbee Dios.

<sup>19</sup> Cheni chanäreni la'tu nez loj reguxhtis, na'c guntu xhigab xho guiniitu, ni'claza guntu xhigab xhicha ni'c guiniitu, sa'csi lagajc Dios suniidx diidx guiniitu orga.

<sup>20</sup> Sa'csi et la'ditu ni guinii dxejc, Sprit xten Xtadtu Dios ni yu' neñ lastootu, laani guinii neñ lastootu.

<sup>21</sup> Luxh rebejn suteedreni lagajc bejtzreni ladznaa reni ju'treni. Redad suteedreni lagajc xi'nreni, rexi'n bejn sidxe'chzaren i lo xczuzajreni te ju't bejn xczuzajreni.

<sup>22</sup> Guiraa rebejn guedxliuj sidxe'chreni lojtu xcuent xtidxä. Nani chanuu lo xtidxä dxej lultli, ni'c sujn gaan yäl'nabajn par tejpas.

<sup>23</sup> Che guirinajlreni la'tu te gusacsäreni la'tu neñ te guejdx, colguxuñ ro'c, colchäj stee guejdx. Rniliä lojtu, ditu gun gaan tedtu guiraa reguejdx xten rexpejn Israel ansde jiaäd Xi'n Dios ni gujc Niguii.

<sup>24</sup> Di te bejn ni casieedgaj benruru lo xmastrni, diza te mos gac benruru lo xlamni.

<sup>25</sup> Te bejn ni casieed, rsieedruni te gacni si'c najc xmastrni, sigajcza rujn mos, riuni xtidx xlamni te gacni si'c najc xlamni. Palga rbälajreni Beelzebü nani rnibee benxab, xho direni cuälajza Beelzebü rexi'nni, ä?

### *Chuni'c nanab guidxeybni*

(Lc. 12:2-9)

<sup>26</sup> Räjpzani:

—Ni'cni na'c guidxeybtu rebejn, sa'csi anajntu xheti te cos ni niäuu lojni ni di guidzujñ dxej guixal lojni, te fii chutis bejn lojni. Xhetiza te cos xhiga'tzdi ni di guidzujñ dxej siejn diajg bejn xcuentni.

<sup>27</sup> Diidx nani rniä lojtu guxhijñ, colguiniini che nianij lo guedxliuj. Rediidx nani rniä chigaj rodiajgtu, colguiniini dip, jiaali colzuj, guredxa' te jiejnñi.

<sup>28</sup> Na'c guidxeybtu renani rugu't bejn, sa'csi direni gun gaan ju'treni xaim bejn. Colguidxeybru nani rugu't tiexh bejn näjza xaim bejn neñ gabijl.

<sup>29</sup> '¿La di bejn guto' tio'p manbäz ni rutajt por te centaab, ä? Luxh racbee Xtadnu ni yu' xhaguibaa che rijajb tejni lo yuj.

<sup>30</sup> Näjza rexquidxeyclu nagab tebgajreni.

<sup>31</sup> Ni'cni rniä na'c guidxeybtu; sajcrutu lo te chinaa manbäz ni rutajt.

### *Renani rusule' xtidx Jesucrist nez loj rebejn*

(Lc. 12:8-9)

<sup>32</sup> Räjpzani:

—Chutis renani rusule' xtidxä nez loj rebejn, narä siniäza xcuentni nez loj xtidä ni yu' xhaguibaa.

<sup>33</sup> Guiraa renani di gusule' xtidxä nez loj rebejn, sigajcza narä dina guiniä xcuentni nez loj xtidä ni yu' xhaguibaa.

### *Rlia' Jesús sa' bejn*

(Lc. 12:51-53; 14:26-27)

<sup>34</sup> Räjpzani:

—Na'c guntu xhigab siädnää yäl'rbedxilajz lo reben guedxliujre, xhet yäl'cuedxidi ni siädnää, yäl'rxdagdijl siädnää.

<sup>35</sup> Narä siädnää yäl'rxdagdijl te bi'n con xtadni; te dxa'p con xnanni; te gulijzni con xnansueegrni.

<sup>36</sup> Ni'cni lagajc resa'tu ni yu' rolijztu sidxe'chreni lojtu.

<sup>37</sup> Nani sanälajzru xtadni, xnanni, luxh narä dini chanälajz, digacdi gacni xpenä; nani sanälajzru xingaanni o xinxda'pni, di gacdiza gacni xpenä.

38 Nani di guu xcrujzni, nalajznu tedni trabajw, jiädnaɟlni narä, di gacdi gacni xpenä.

39 Nani guidxäl xcäl'nabaj'nni lo guedxliujre, sunitni yäl'nabaj'n xhaguibaa. Luxh nani gunijt xcäl'nabaj'nni lo guedxliujre xcuent rextidxä, sidxäl'ni yäl'nabansa'c xhaguibaa.

*Gaan nani xca'ni*

*(Mr. 9:41)*

40 Räjzani:

—Nani guniidx rolijzni jia'ntu, runiidxzani rolijzni jia'nä; luxh nani ruscuääz narä rolijzni, rolijzni ruscuääzzani Gueb Dios nani baxhaɟ narä.

41 Nani guscuääz te niguii ni rnii xtidx Dios rolijzni sa'csi baxhaɟ Dios niguiiga, sica'za beɟnga lagajc gaan ni xca' niguii ni rnii xtidx Dios. Nani guscuääz te beɟsa'c rolijzni sa'csi beɟsa'cni, sica'zani lagajc gaan ni xca' beɟsa'cga.

42 Chutis nani gudeed mase te xhijgtis nis niäl'ij xcuentä lo rebiuxe're, rniliäpac lojtu, direni gunijt, sica'pacreni nani nungäjɟ xca'reni.

## 11

*Renani baxhaɟ Juan Bautist loj Jesús*

*(Lc. 7:18-35)*

1 Che gulujx baluii Jesús rexpeɟnpacni xho gunreni dzuun, dxejcti biriini ro'c te saluiini, chasule'ni diidx lajdx rexpeɟnpacni.

2 Juan yu' neɟ latzguuib. Che bieɟn diajɟni xhi cayujn Jesús, baxhaɟni tio'p xpeɟnpacni

3 te huinabdiidxreni:

—¿La luj ni najc Crist ni jiäd, ä?, o ¿la silääznu chu stee beɟn?

4 Dxejcti badzu' Jesús diidxre räjzani:

—Coɟchäj, coɟye'tz loj Juan recos nani rieɟn diajgtu, näjza recos nani ruhui-itu.

5 Reni di fii, ruhuiireni; reni di sa, arsiajreni, reni raɟ tiejxhni, abi-ajc tiejxhreni; reni di jien diajg, arieɟn diajgreni; rebengut, ahuaäjzreni, gubansa'ceni. Dxejcti loj rebeɟn proob nani cabäjz xcäl'racnäɟ Dios casusule'reni xtidx Dios ni rusläa beɟn neɟ doɟl.

6 Chicbaa renani di jieed narä.

7 Cheni sii rebeɟnga gusloj Jesús canii loj rebeɟn xcuent Juan:

—¿Chuni'c huihuiitu nez loj reyubijdz? ¿La te biquii ni rusniib bej, ä?

8 ¿Xhini'c huihuiitu? ¿Te beɟn ni sucheduxh, ä? Ni najntu rebeɟn nani sucheduxh rbäjzreni rolijz rereii.

9 La'tu ¿xhicuent huijtu ro'c? ¿Te fiitu te niguii ni rnii xtidx Dios, ä? O'n. Rniliä lojtu, luxh dini gac beɟntis ni rnii xtidx Dios; beɟnruroni.

10 Laa Juan nani rusä't ni bacuaa lo reguijtz cadro caj scree:

Narä suxhaɟä te niguii nani guinii xtidxä nez lojlu;

laani susucheeni nezyuj nezlojlu.

11 Guliipac rniä, loj guiraa rexingaan xten gunaa, nicla tejni gajd guiricaj ni najc te beɟsacduxh loj Dios si'c ni najc Juan Bautist. Niluxh beɟn nani najc beɟn huiɟnu lo xcäl'nibee Dios xhaguibaa, beɟnga maazru sajcnii loj Juan.

12 'Cheni gucli dxej ni gusloj rusule' Juan Bautist diidx näjli, yu'duxh reni rlanjpac jiu'reni lo xcäl'nibee Dios ni yu' xhaguibaa con yäl'rdxe'ch, sas reni nadxecha' rlanjzreni cuäxuuni xcäl'nibee Dios.

13 Guiraa reniguii ni gunni xtidx Dios nájza xleii Moisés, gunixgaareni recos ni churu gac, galooli hasta che biäädli Juan Bautist.

14 Palga rlanjtu chalilajztu, lagajc Juan najc Elías, niguii xten Dios nani bia'n diidx jiääd.

15 Nani sobdiajg diidx, gucuadiajgni.

16 '¿Xhicojn guntebloä rebejn nani tre' naj, ä? Najczeni si'c najc rebiuux nani rguijt nez lo guii cadro rdo', rbejdxreni lo sa'reni,

17 rniireni: "Bielnu bizej te guya'tu luxh ditu nuya'. Dxejcti bielnu redij ni nabaduxh luxh dizatu nioon."

18 Sa'csi che biääd Juan dini niajw dizani niä', luxh räjp rebejn najcni te xpejn bendxab.

19 Dxejcti biälä narä, Xi'n Dios ni gujc Niguii, rauä, rä'ä dxejcti räjp rebejn: "Niguiire rauxha't, rätejzani bin, najcni xamigw rebendojl nájza reniguii ni ruquijx xcuent reyuj ni rajx lo gubier." Luxh loj rebejn ni najc xpejn Dios yuduxh xcäl'najn Dios, ni'cni baxhalni guiro'p rebejnre.

### *Reguejdx gualajz*

*(Lc. 10:13-15)*

20 Dxejcti gusloj Jesús gudil'näjni reben'guejdx cadro benduxhni remilaagwr, sa'csi naaddireni gusiechljazreni xtoj'lreni, sanuutis nabaj'nreni nen dojl. Dxejcti räjpni:

21 —¡Gunatiru guedx Corazín! ¡Gunatiro guedx Betsaida! Paru nen guedx Tiro nájza guedx Sidón niajc remilaagwr nani gujc guedx lajdxtu, cadxejli nusiejch lajzreni xtoj'lreni, cadxejli niajcwreni nen godx, nidääb cobdäj yejcreni.

22 Luxh rniä lojtu: che guidzujn dxej ni gun Dios xcäl'guxhtisni, sidejdrutu castiigw loj rebejn ni guläjz guedx Tiro nájza guedx Sidón.

23 Luj guedx Capernaum di gunlu xhigab chäslu xhaguibaa; jiäjt nen baa jiajblu, sa'csi paru nen guedx Sodoma niajc sa' remilaagwr nani gujc guedx lajdxlu, pet najli tresijc guejdxga.

24 Luxh rniä lojtu, dxej ni gun Dios xcäl'guxhtisni, trabajwduxhru tedtu loj rebejn Sodoma.

### *Coltaa loä, te gusilajztu*

*(Lc. 10:21-22)*

25 Laa dxejcti räjp Jesús:

—Rliä'pä xpala'nlu Xtaäd, Dad xten xhaguibaa nájza guedxliuj, sa'csi bacua'tzlu recosre lo rebennajn, lo rebejn ni racbee, te baluiiluni loj rebennadolajz ni najc si'c biuxbäz.

26 O'n. Guliini, Xtaädä, sa'csi rujnlu xhigab si'c najc hueen gacni.

27 'Guiraa recosre abaniidx Xtaädä loä, rutru numbeedi xingaanni; xtadtisni rumbeeni. Rutruza numbeedi xtadni, xtebtis xingaanni, nájza loj renani gudeed xingaanni gumbee xtadni.

28 Coltaa loä guiraatu nani abadxajg, nani rsina', narä sunidxä yäl'rusilajz lojtu.

29 Colguisieed guntu dzuun si'cni ruluiätu. Colhunii xho runä, xho nacä nadolajz, dizana gacä ben'nayedxlajz nen lastöä, ni'cni sidxäl xaimtu yäl'rusilajz.

30 Sa'csi guyasi najc xtzunä ni ruluiätu, dizani gac naganduxh.

## 12

*Rutie' rexepejn Jesús triuu dxej ni rusilajzreni**(Mr. 2:23-28; Lc. 6:1-5)*

<sup>1</sup> Che sasaj Jesús nez loj reyuj cadro naga' triuu, luxh dxejga najc dxej ni rusilajz rexepejn Israel, calaan rexepejn<sup>pacni</sup>, guslojreni calädxa'reni doj lo triuu te cayajwrenini.

<sup>2</sup> Che bahuui reben<sup>guidoo</sup> ni laa farisee, räjpreni loj Jesús:

—Ahuii xho rujn rexepejn<sup>pacu</sup> dzuun nani di nungäj<sup>l</sup> gunreni dxej nani rusilajz bejn.

<sup>3</sup> Luxh laani räjpni lojreni:

—ÇLa gajdtu go<sup>l</sup> xhi caj loj reguijtz xcuent ni bejn toDavid che gulannäjni rexepejn<sup>ni</sup>, ä?

<sup>4</sup> Biu'reni xquidoo Dios, gudajwreni yätxtiil nani di nungäj<sup>l</sup> gauni, nicla laani, niclaza rebejn nani sanäni, sa'csi yätxtiilga rebixhojztis rajwni.

<sup>5</sup> O çLa gajdtu go<sup>l</sup> lo reguijtz xten leii cadro caj xcuent rebixhojz, ä? Laareni riu'reni ne<sup>n</sup> reguidoo dxej ni rusilajz bejn, rujnreni xtzuumreni niluxh xhet doj<sup>di</sup> rujnreni.

<sup>6</sup> Narä nriä lojtu, ree suga' tej nani sajcro loj guidoo<sup>ga</sup>.

<sup>7</sup> Paru niacbeetu xhi säloj dee: “Yäl<sup>r</sup>ulaslajz r<sup>l</sup>azä, xhet yäl<sup>r</sup>ejtdi guidxaa”, ditu nucuaquij redee ni xhet bejndi.

<sup>8</sup> Sa'csi narä Xi'n Dios ni gujc Niguui rni<sup>beä</sup> dxej ni rusilajz rebejn.

*Niguui ni rxu'n naani**(Mr. 3:1-6; Lc. 6:6-11)*

<sup>9</sup> Che birii Jesús ro'c, biu'ni te xquidobäzreni.

<sup>10</sup> Ro'c suga' te bejn ni gubijdz te naani. Luxh sa'csi caguuilreni xho gucuaquijreni Jesús, gusloj canabdiid<sup>xreni</sup> lojni, räjpreni:

—ÇLa rusaan leii gusiaj<sup>cni</sup> be<sup>n</sup>racxhuu dxej ni rusilajz bejn, ä?

<sup>11</sup> Badzu' Jesús diid<sup>xre</sup> lojreni, räjpni:

—Chutejtu ni rajp te xiil niluxh palga guitejb<sup>ni</sup> ne<sup>n</sup> bisie che ga<sup>l</sup> dxej ni rusilajz bejn, çxhixh dini cuää xiilga ne<sup>n</sup> bisie, ä?

<sup>12</sup> Sacduxhru te bejn loj te xiil, ni'cni susaan leii gun bejn dzunsa'c dxej nani rusilajz bejn.

<sup>13</sup> Dxejcti räjpni loj dade'ga:

—Baslii naalu.

Che basliini, dxejc biajc naani, guj<sup>cni</sup> tebloj si'c najc stelaad naani.

<sup>14</sup> Dxejcti birii reben<sup>guidoo</sup> ni laa farisee, bachagsa'zareni te bia'nreni diid<sup>ju</sup>'treni Jesús.

*Diid<sup>x</sup> ni guniireni xcuent Jesús*

<sup>15</sup> Che gucbee Jesús xhi xhigab cayujnreni, biriini ro'c. Xhidajl bejn sanajlni, dxejc basiajc Jesús guiraa reben<sup>racxhuu</sup>.

<sup>16</sup> Dxejc räjpni lojreni:

—Na'cpac gäbreni chu najcni.

<sup>17</sup> Si'c gujc te gusojb diid<sup>x</sup> ni gunii Isaías ni gunii xtid<sup>x</sup> Dios che räjpni:

<sup>18</sup> Deeni najc xmosä nani aguleä, laani sanälazä, laani rbanälazä, sudedä sprit xtenä lojni te gusule'ni yäl<sup>g</sup>uxhtis xtenä lo guedxliuj.

<sup>19</sup> Dini tilnä<sup>j</sup> bejn, dizani cuedxa'; rudza jie<sup>ndi</sup> diajgni xse'ni lad nezyuj.

<sup>20</sup> Dini qui'ch nicla te nijt ni cabiejc, dizani gusuui te duxiil ni cayujn guxh,

dxejli che gunni gaan guinibeeni yäl̄guxhtis.

<sup>21</sup> Lajtisi sustioob lastoo reben ni digac xpejn̄ Israel.

*Rucuaquijreni Jesús rajpni yäl̄rnibee xten beḅdxab  
(Mr. 3:19-30; Lc. 11:14-23; 12:10)*

<sup>22</sup> Dxejcti biädnaḅreni loj Jesús te bejn̄ ni di fii, dizani guinii, yu' te beḅdxab lastooni. Dxejcti basiajc Jesúsni, te gujc guniini, te gujcaz baḅuiini.

<sup>23</sup> Guiraa rebejn̄ bidxelojreni, räjpreni:

—¿Xhaa laa Xi'n toDavidni, ä?

<sup>24</sup> Che biejn̄ diajg reben̄ guidoo ni laa farisee rediidxga, räjpreni:

—Bejn̄re rbää rebeḅdxab con yäl̄rnibee xten Beelzebú ni rnibee loj rebeḅdxab.

<sup>25</sup> Che gucbee Jesús xhi xhigab cayujn̄reni, dxejc räjpni:

—Guiraa yäl̄rnibee nani rlia' sa'ni sinitloj; te guedrxo sigajc te famil nani rlia' sa'reni, nani ridilñaj sa'reni, sinitlojreni.

<sup>26</sup> Sigajcaz palga beḅdxab rbää sabēḅdxabni, silia' sa'reni, dxejc ¿xho gac chanuu xcäl̄rnibeereni?

<sup>27</sup> Palga narä rbää rebeḅdxab con yäl̄rnibee xten Beelzebú, ¿chu xcäl̄rnibee rajc rbää rexpējntu beḅdxab, ä? Ni'cni lagajc laareni suluiireni xhet laadi rujntu xhigab.

<sup>28</sup> Palga narä rbää rebeḅdxab con Xp̄rit xten Dios, guliipacni abidzujn̄ xcäl̄rnibee Dios lojtu.

<sup>29</sup> 'Bahuilaare. ¿Xho gac jiu' te bejn̄ cuan rolijz te beḅdaan, xho gac cuanni xhixten bejnga, palga dini gulibxgaani beḅdaanga? Che abiliib bejnga, sajc cuanni rexhixten bejnga.

<sup>30</sup> 'Nani xhet yu'di xladä, rdxe'chni loä. Nani di jiädnajl narä, rutie'chni reni siädnajl narä.

<sup>31</sup> 'Ni'cni rniä guira'ti dojl, guira'ti yäl̄rusguee xte bejn̄ sajc gusiäj̄l lajzni xtebtis yäl̄rniyaj Sprit Dxan xten Dios di Dios gusiäj̄l lajzni.

<sup>32</sup> Chutis ni guinii xhi te diidx yäl̄rniyaj Xi'n Dios ni gujc Niguii sajc gusiäj̄l lajzni, luxh chutis ni guiniyaj Sprit Dxan xten Dios, di Dios gusiäj̄l lajzni, nicla lo guedxliujre, niclaza xhaguibaa.

*Sajc gumbeetu bejn̄ xcuent diidx ni rniireni  
(Lc. 6:43-45)*

<sup>33</sup> 'Palga nasa'c te yajg sicaj ninexhsa'c lojni, per che di yajg gac yagsa'c, xho xcaj ninexhsa'c lojni. Ni'cni huenliisi siembeetu te yajg che fiitu xho najc ninejxh ni rcaj lojni.

<sup>34</sup> Sa' la'tu beḅguijdx ni najc si'c te bäl̄ niälasduxh, ¿xho gac guiniitu te didxsa'c?, ni ro' bejn̄ rniitis rexhigab ni yu' neḅ lastoo bejn̄.

<sup>35</sup> Te beḅsa'c rniini didxsa'c, sa'csi ganax xhigabsa'c yu' neḅ lastooni, te beḅguijdx rniitisni cosguijdx sa'csi ganax xhigabguijdx yu' neḅ lastooni.

<sup>36</sup> Narä rniäza, guiraa redidxguijdx nani rni bejn̄ sudeedreni cuent lo Dios cheni gunni yäl̄guxhtis,

<sup>37</sup> sa'csi lagajc rextiidxlu sujn̄ guinii Dios najclu beḅsa'c, lagajc rextiidxlu sujn̄ gunijtlu lo Dios.

*Rebeḅguijdx rniab te milagwr si'c te seen  
(Mr. 8:12; Lc. 11:29-32)*

<sup>38</sup> Dxejcti rebejn̄ ni ruluii xleii toMoisés näjza reben̄ guidoo ni laa farisee, räjpreni loj Jesús:

—Mastr, nuurnu rlanjnu guihuiinu te seen; bejn̄ te milagwr te fiinuni.



<sup>39</sup> Badzu' Jesús diidxre, räjpmi:

—Rebenguijdx ni rusguee rniab te seen, niluxh xhetru seendi fiireni xseen-tis Jonás, dade' ni gunii xtidx Dios.

<sup>40</sup> Sa'csi lagajc si'cni guyu' Jonás xque' te bälro choñ dxej, choñ yääl, si'cza chu Xi'n Dios ni gujc Niguii neñ lastoo guedxliuj choñ dxej, choñza yääl.

<sup>41</sup> Cheni gac yälguxhtis xten Dios pet sistie rebejn ni siääd Nínive te fiireni gac yälguxhtis rebejn ni tre' lo guedxliuj naj, niluxh säjb rebejn Nínive abanijt rebejnre sa'csi reben Nínive basiejch lajzreni, bia xtojreni che basule' Jonás xtidx Dios lojreni. Luxh nani yu' lojtu naj, sacduxhruni loj Jonás.

<sup>42</sup> Näjza reiñ xten reben sur sistieni te fiini gac yälguxhtis rebejn ni tre' lo guedxliujre naj, niluxh näjzani säjbni abanijtreni. Sa'csi laani zitduxh biriini te biädcuadiajni reyälnajn xten Salomón, luxh nani yu' lojtu naj nanduxhruni loj Salomón.

*Te spritdxuudx ni rbisac*

*(Lc. 11:24-26)*

<sup>43</sup> Räjpmi:

—Cheni rii te spritdxab neñ lastoo te bejn, ricanzajni nez lo reyubijdz, ritiilni cadro gusilajzni, per cad rdxäldini.

<sup>44</sup> Dxejcti rujni xhigab, naani, guibisacä cadro biriä. Cheni rbisacni ro'c, rdzujni si'c rdzujn te bejn neñ te yu' ni naya neñni, naliobsa'cni, sucheeni, luxh rut rbäjzdi ro'c.

<sup>45</sup> Dxejcti rijni, rixiini sgajdz sprit nani najc nadxuudxru lojni te jäldläznäjrenini neñ lastoo bejnga. Dxejcti rxhinduxhru bejnga lojni gujcn galoo. Sigajcza gac rebejn ni tre' lo guedxliujre naj.

*Xnan Jesús con rebejtni*

*(Mr. 3:31-35; Lc. 8:19-21)*

<sup>46</sup> Lañ ni caninäjni rebejn, bidzujn xnanni con rebejtni, suga'reni rolä' rlanjreni guiniireni lojni.

<sup>47</sup> Dxejcti biääd tej ni räjpmi loj Jesús:

—Xnanlu näjza rebejtzlu suga' rolä' rlanjreni guininäjreni luj.

<sup>48</sup> Laani badzu'ni diidx lo bejnga räjpmi:

—¿Chuni'c najc xnanä? ¿Chuni'c najc rebetzä?

<sup>49</sup> Dxejcti basgaani naani nez loj rexpejnpacni, räjpmi:

—¡Redee najc xnanä redeeza najc rebetzä!

<sup>50</sup> Chutis nani rujn si'cni rnibee Xtradä ni yu' xhaguibaa ni'c najc betzä, ni'c najc bisianä, ni'cza najc xnanä.

## 13

*Xcuent bejn nani rbe'c binij*

*(Mr. 4:1-9; Lc. 8:4-8)*

<sup>1</sup> Lagajc dxejga birii Jesús royu'ga, huicueni nez ro' nisdo.

<sup>2</sup> Xhidalduxh bejn bire' cadro suga'ni, sas biu'ni neñ te barcw, ro'c gurejni. Dxejcti rebejn gurej nez lo plaii.

<sup>3</sup> Dxejc gusloj caguluii Jesús con recuent, räjpmi:

—Colcuadiajg. Birii te dade' ni rbe'c binij te cue'cni binij.

<sup>4</sup> Lañ ni cabe'cni binij yu' binij ni bitejb gajxh nez ro' nesuij, biääd remane' ni rutajt, sas gudajwreni binijga.

<sup>5</sup> Yu' binij ni bitejb nez neñ reguij cadro guxii yu' yuj. Gulengajc binijga sa'csi direni nibej jäät neñ yuj.

<sup>6</sup> Che birii gubijdx, bigolreni sa'csi xhetiza xlobaani, dxejc gubijdzni.

<sup>7</sup> Yu'za binij ni bitejb nen reguejch. Che guroob reguejchga, dini nusaan niroob regäjle', gubijdztiri.

<sup>8</sup> Guyu' binij ni gurej lo reyusa'c, ro'c gucduxhni. Yu' binij cuaj te gayuu, yu'za binij cuaj gayojni, yu'za ni cuaj galbitzuuni loj cade tej binij ni gurej.

<sup>9</sup> Nani rsobdiajg diidx gucuadiajgni diidxre.

*Xhi pajr najc recuent xten Jesús*

*(Mr. 4:10-12; Lc. 8:9-10)*

<sup>10</sup> Dxejcti gubig rexpejn pacni, gunabdiidx lojni, räjpreni:

—¿Xhicuent rusule'lu diidx loj rebejn con recuent?

<sup>11</sup> Dxejcti badzu' Jesús diidx rajpni lojreni:

—Sacnäj Dios la'tu te gacbeetu recos xhiga'tz xten xcälrnibee Dios xh-guibaa, luxh laareni digacdi gacbeerenini.

<sup>12</sup> Chutis ni arajp yälracbee, sica'runi te gapruni te gapruni yälracbee. Sas nani guxii rajp yälracbee, guiraa yälracbee ni rajpni sibicaj.

<sup>13</sup> Ni'cni rniä lojreni con recuent sa'csi mase cadxelojreni, direni fii, mase cacuadiajgrendi di diajgrendi jiejn, xhet racbeedireni.

<sup>14</sup> Laareni najcreni si'c te soob diidx ni gunii Isaías, dade' ni gunii xtidx Dios, che räjpni:

Siejn diajgpactu, niluxh xhetliidi gacbeetu,

sidxelojactu, niluxh ditu fii.

<sup>15</sup> Sa'csi guyalajz rebejnre, lastooreni najc si'c te guij, di diajgrendi jiejn,

luxh niäuzä balojreni, didi fisa'creni con balojreni,

didi jiejnza diajgrendi, didi gacbeeza lastooreni,

didi gusiejch lajzreni guibi'reni loä te gusiaca lastooreni.

<sup>16</sup> La'tu colguibalaznäj balojtu sa'csi rhuisa'ctu, riensa'cza diajgtu.

<sup>17</sup> Rniliäpac, xhidajl redade' ni gunii xtidx Dios, näjza xhidajl beñsa'c rladuxh nuhüi sa' recos ni cahuiitu, luxh direni nuhüini, rladjzreni niejn diajgrendi sa' rediidx nani cayejn diajgtu, luxh di diajgrendi niejnini.

*Rusule' Jesús xcuent bejn ni rbe'c binij*

*(Mr. 4:13-20; Lc. 8:11-15)*

<sup>18</sup> Colcuadiajg xhi säloj xcuent bejn nani rbe'c binij.

<sup>19</sup> Rebejn nani rucuadiajg diidx xten xcälrnibee Dios, niluxh direni gacbeeni, najcreni si'c najc binij nani bitejb nez ro' nesuyj; riääd beñdxab rudzucajni rediidx nani biu' nen lastooni.

<sup>20</sup> Rebinij nani bitejb nez nen reguij, najc si'c rebejn nani rucuadiajg diidx, gustli rca'reni diidxga,

<sup>21</sup> luxh guxii yu' xlobaani, direni sutijp. Che rdejdreni trabajw, che rdxe'ch bejn lojreni, sa'csi rucuadiajgrendi xtidx Dios, rusiejch lajzreni, rbälazni diidxga.

<sup>22</sup> Rebinij nani gurej nen reyaguejch säloj rebejn nani rucuadiajg rextidx Dios rujnrureni te gunreni dzuun te ga'preni yäl'nasa'c ni yu' lo guedxliujre. Dxejcti rexäl'nasa'c xten guedxliujre rusgueereni. Guiraa recosre rutau lo xtidx Dios nen lastoo rebejnre, dini gusaan gac te cosechsa'c nen lastoo rebejnre.

<sup>23</sup> Dxejc rebinij nani rtejb lo reyusa'c, ni'c najc si'c rebejn nani rucuadiajg xtidx Dios, nani racbee diidxga, nani rutie'ru sa'reni te raxhidajlreni. Yu' bejn ni najc si'c binij ni gujc te gayuu; yu' bejn ni najc si'c binij ni gujc gayojn; yu'za bejn ni najc si'c binij ni gujc galbitzuu.

*Xcuent triuu cadro guyu' cuanguejch*

<sup>24</sup> Dxejc bij Jesús stee cuent, räjpni:

—Xcälrmibee Dios xhaguibaa najc si'c te bejn nani gule'c ganax triusa'c lo xyujni.

<sup>25</sup> La<sub>l</sub> nagaguejs bejnga, biääd te bejn nani rdxe'ch lajz loj xpaxhuaan binijga, biädle'cni bedz cuanguejch lo xtriuu bejnga, dxejcti sääni.

<sup>26</sup> Cheni gulejn triuuga, birii doj lojni, dxejc biricaj näjza cuanguejch ro'c.

<sup>27</sup> Dxejcti räjp remos lo xlamreni; “Dad, ¿la et ganax triusa'c di gule'clu, ä? ¿Caxh bazaj cuanguejchre?”

<sup>28</sup> Räjp xlamreni: “Te bejn ni rdxechlajz loä biädle'cchani.” Dxejcti gunabdidx rexmosni räjpreni: “¿La rlaiz guejblu cholädxa'nu recuanguejchga, ä?”

<sup>29</sup> Dxejc räjp xlamreni: “Na'c, sa'csi che guiliäädxtu cuanguejchga, nägajcza triuu guiliäädxtu.

<sup>30</sup> Colsaan tioobreni tebloj. Che guire' cose'ch, dxejc guinibeä remos gutiexgaareni cuanguejch, guliibrenini gacni ters, dxejcti checni. Dxejcti sajg gutie'reni triuu chucheeni neñ yu'.”

*Xcuent bedz muxhtas*

(Mr. 4:30-32; Lc. 13:18-19)

<sup>31</sup> Bijza Jesús stee cuent räjpni:

—Xcälrmibee Dios xhaguibaa najcni si'c te bedz muxhtas nani cue'c te bejn lo xyujni.

<sup>32</sup> Gulii bejdzga najc bäze'ru loj guiraa rebejdz, per che roob yajgga, rajcni guroobru loj guiraliü recuaan, rajcni te yagro, luxh riääd remane' ni rutajt riädüyjn xptiääreni lo xajcw yajgga.

*Xcuent levaduur*

(Lc. 13:20-21)

<sup>33</sup> Bijzani stee cuentre, räjpni:

—Xcälrmibee Dios xhaguibaa najc si'c levaduur nani rugu'ch te gunaa lo choñ mediid arin, dxejc ni'c rusaguijni guideb cojbgä.

*Xhicuent baluii Jesús ganaxtis con cuent*

(Mr. 4:33-34)

<sup>34</sup> Baluii Jesús guiraa rebejn ganaxtis con recuent, xhetiru stee mood nuluiini, ganaxtis con cuent guniini lojreni.

<sup>35</sup> Si'c bejn ni te guzobj xtidx dade' ni gunii xtidx Dios che bacuaani lo reguijtz, räjpni:

Suiyä diidx con recuent,

suiyä diidx xcuent recos ni naga'tz che bencheeli Dios guedxliuj.

*Rusule' Jesús xcuent cuanguejch nen triuu*

<sup>36</sup> Dxejcti basadiidx Jesús rebejn, biu'tini neñ yu' cadro bire' rexpejn pacni lojni, räjpreni lojni:

—Basule' loonu xcuent cuanguejch ni guyu' loniaa.

<sup>37</sup> Räjp Jesús lojreni:

—Bejn nani rbe'c retriusa'c, najc Xi'n Dios ni gujc Niguii;

<sup>38</sup> Loniaaga najc guedxliuj; retriusa'c najc rebejn nani najc xpejn Dios, nani rucuaadiajg xtiidxni; recuanguejchga najc rebejn ni najc xpejn bendxab.

<sup>39</sup> Bejn nani rdxe'ch lajz najc lagajc bendxab. Cose'ch säloj che nitloj guedxliuj; reni gutie' cose'ch najc rexangl Dios.

<sup>40</sup> Sigacni guire' recuanguejch te chääni lo guiboo te checni, sigajcza gac che gac fis guedxliuj.

41 Xi'n Dios ni gujc Niguii suxhal rexangl ni te jädgutie'reni, te jädlääreni lo xcäl'rnibeeni guiraa renani rujn riabj bejn neñ dojl, näjza reni rujn cosguijdx.

42 Susäl'reni rebejnğa neñ te or cadro cayecduxh. Ro'c sonduxh'reni, sauya'reni läjy'reni.

43 Dxejcti rebeñsa'c sidimbicha'reni si'c gubijdx lo xcäl'rnibee Xtad'reni. Palga sobdiajgtu, colgucuaadiagsa'c.

### *Te cossacduxh ni naga'tz*

44 Räjpzani:

—Si'cza xcäl'rnibee Dios xhaguibaa najc si'c te cossacduxh ni naga'tz lo te yuj loniaa. Bidxäl te dade'ni, luxh bacuatzsacnini. Dxejcti rbalajzni, huijni, huito'ni guiraa xhixtenni te rajpni meel siini yujga.

### *Perl nani sacduxh*

45 Räjpzani:

—Xcäl'rnibee Dios xhaguibaa najcza si'c najc te dad rapduxh nani caguuil perlsa'c te siini.

46 Che bidxäl ni te perlsa'c, tejni sacduxh, bato'ni guiraa xhixtenni te gusiini perlga.

### *Guijxh ni rniaaz bäj*

47 Räjpzani:

—Xcäl'rnibee Dios xhaguibaa najcza si'c te guijxh ni rusäl bejn lo nis te rniaaz'reni guiraloj cuaa bäj.

48 Cheni agudxajni, rbäärenini nez ro' nisdoo, te ro'c rbereni loj rebäj. Rebäj ni najc hueen rucheeni neñ te dxijm; nani di gac hueen rusäl'renini te laad.

49 Si'cza gac che gac fis guedxliuj; sirii rexangl Dios te sudzucaj'reni rebeñguijdx lo rebeñsa'c.

50 Dxejcti susäl'reni rebeñguijdx neñ te or cadro cayecduxh; ro'c sonduxh'reni, sauya'reni läjy'reni.

### *Te beñ rajp*

51 Dxejcti gunabdiidx Jesús loj'reni, räjpnini:

—¿La racbeetu guiraa ni caniä lojtu, ä?

Dxejcti räjpreni:

—O', racbeenuni Dad.

52 Dxejcti räjpnini loj'reni:

—Cheni rsieed te bejn nani najn leii xcuent yäl'rnibee xten Dios xhaguibaa, najcni si'c te lam nani rajc rbää lo rexcäl'nasa'cni recos ni nacoob, näjza recos bieju.

### *Jesús lo guedx Nazare't*

(Mr. 6:1-6; Lc. 4:16-30)

53 Che gulujx basule'ni recuentre, biriini ro'c, sääni.

54 Huijni lagajc lajdxni. Ro'c gusloj caguluiini neñ xquidobäz'reni ro'c. Dxejcti rdxeloduxh rebeñ ro'c, räjpreni:

—¿Caro bisieedni reyäl'najnre? ¿Xho rajc rujnini remilagwr?

55 ¿La et laadi dee ni najc xi'n carpinteer, ä? ¿La et Mariidi najc xnanni? Dee ni najc bejtz Jacob, José, Simón con Judas.

56 Luxh rebisiajnini rbäjz'reni lo guejdxre. ¿Cacharo bisieedni guiraa nani caguluiini?

57 Dxejcti cayujn'reni xhigab chugan la guliini, dxejc räjpn Jesús loj'reni:

—Guiraa rebejn rinälajz te niguii nani rnii xtidx Dios, biädla reben lajdx-pacni direni jiu xtiidxni.

<sup>58</sup> Ni'c dini niujn xhidäl milagwr ro'c sa'csi direni chalilajz xtiidxni.

## 14

### *Che gujt Juan Bautist*

(Mr. 6:14-29; Lc. 9:7-9)

<sup>1</sup> Lagajc neñ redxejga Herodes, ni laaza tetarca, biejn diajgni diidx xcuent ni cayujn Jesús.

<sup>2</sup> Dxejc räjpni lo rexmosni:

—Dee najc Juan Bautist. Pet agubansacni lo rebengut, ni'cni rajpni yälrmibee te rujnni remilagwr.

<sup>3</sup> Si'c gunii Herodes sa'csi laani basäuuni Juan neñ latzguiib. Niluxh gunibeeni biliibni con caden neñ latzguiib xcuent Herodías, ni gujc chääl bejtzni Felipe.

<sup>4</sup> Bidxe'chni sa'csi räjp Juan lo Herodes:

—Et laadi rujnlu rbäznäjlu chääl bejtzlu.

<sup>5</sup> Rlajz Herodes nugu'tni Juan, luxh rdxejbni rebenguejdx, sa'csi guiraareni nriireni Juan najc te niguii ni rnii xtidx Dios.

<sup>6</sup> Dxejc che gojlaj Herodes gujc lanij, birii xindxa'p Herodías te baya'ni nez loj regolnejdx. Luxh sa'csi bidxaglazduxh Herodes baya'ni,

<sup>7</sup> räjpni loj gunaaga:

—Gunab xhitis ni rlajzlu, sa'csi gudix lazä gunidkä ni guiniabtsilu.

<sup>8</sup> Dxejcti gunaaga, abalijdx xnannini, räjpni lo Herodes:

—Loj te platón baniidx bitiuwejc Juan Bautist.

<sup>9</sup> Diidxga benhuin lastoo reii Herodes, per sa'csi abia'n diidx, niluxh abiejn diajg rebejn, gunibeeni gudeedreni nani guiniab gunaaga.

<sup>10</sup> Dxejcti gunibeeni biru' wejc Juan Bautist neñ latzguiib.

<sup>11</sup> Sas biädnäreni wejcti lo te platón, badeedrenini loj gunaaga. Dxejcti gunaaga badeednini lo xnanni.

<sup>12</sup> Dxejcti bidzujn rexpejn Juan sanäreni togoolda te huicua'tzrenini. Dxejru huisa'nreni diidx loj Jesús.

### *Bayaan Jesús gatii miñ bejn*

(Mr. 6:30-44; Lc. 9:10-17; Jn. 6:1-14)

<sup>13</sup> Che biejn diajg Jesús xhi guzajc Juan, xtebni huä'pni neñ te barcw huijni stee laad nez lo reyubijdz. Che gubee rebejn caro sääni, huinajlreni Jesús lo yuj. Guiraa neñ reguejdxga biriireni.

<sup>14</sup> Che birii Jesús neñ barcw, bahuiini loj xhidalduxh bejn, dxejc balazla-znirenini, basiajcti rebejn nani racxhuu.

<sup>15</sup> Cheni acayu' guxhijn, gubig rexpejnpacni lojni räjpreni:

—Rut rbäjzdi nez lo reyubijdzre, niluxh agudxej naj. Basadiidx rebejn te jiiireni nez rerench te chasiireni xhi gaureni.

<sup>16</sup> Räjp Jesús:

—Xhicuent jiiireni. La'tu colgudeed xhi gaureni.

<sup>17</sup> Dxejcti räjpreni:

—Xhetru rajpdinu ree. Gaiitis yätxtiil näjza tio'p bäjl rajpnu.

<sup>18</sup> Laani räjpni:

—Coltanäni ree.

<sup>19</sup> Dxejcti gunibeeni gurej rebejn lo guixa'. Dxejcti cua'ni guigaii yätxtiil näjza guiro'p bäjl, guläsni lojni xhaguibaa, badeedni xquixhtios lo Dios, dxejcti gula'ni reyätxtiil. Badeednini loj rexpejn<sub>pacni</sub>. Dxejcti rexpejn<sub>pacni</sub> gudisrenini loj reben xhidajl.

<sup>20</sup> Guiraareni gudajw, gudxaj xque'reni. Dxejcti batie'reni yätxtilbiujy nani bia'n. Si'cti tzubitio'p dxijm<sub>gudxajni</sub>.

<sup>21</sup> Renani gudajw najcreni si'cti gaii mil niguii, xhet näjdi regunaa niclaza rebiuux bigab.

### *Gusaj Jesús lo nisdoo*

*(Mr. 6:45-52; Jn. 6:16-21)*

<sup>22</sup> Sas gunibee Jesús biu' rexpejn<sub>pacni</sub> nen<sub>neñ</sub> barcw te ganidreni tedreni stee lad nis la'ni casadiidxni rebejn.

<sup>23</sup> Che gulujx basadiidxni rebejn, huä'p Jesús yecdajni te xtebni guninäjni Dios Xtdani. Che gojl guxhijñ, ro'c sugaxteb Jesús.

<sup>24</sup> Luxh barcw galäii lo nis sasaj. Cagusnibduxh reol<sub>barcw</sub> liriääzni lo nis sa'csi cabi' beduxh cadre sääreni.

<sup>25</sup> Rsildooru gubig Jesús, bidzujñni lojreni, siädsajni lo nisdoo.

<sup>26</sup> Che bahuii rexpejn<sub>pacni</sub> siädsajni lo nisdoo, bidxejbreni, räjpreni:

— Colhuui te fantasmni — guredxa'reni sa'csi bidxebduxhreni.

<sup>27</sup> Dxejc gunii Jesús lojreni, räjpni:

— Na'c guidxejbtu, laa naräni; colsutijp lastootu.

<sup>28</sup> Dxejcti gunii Pedr lojni, räjpni:

— Dad, palga lujni, gunibee jäälä lojlu nez lo nisre.

<sup>29</sup> Räjp Jesús:

— Gudaä pues.

Dxejcti birii Pedr nen barcw gusajni lo nis te sääni nez loj Jesús.

<sup>30</sup> Che bahuii Pedr beduxh ni cabi', bidxejbni, dxejc gusloj cayääzni nen nisdoo. Guredxa'ni, räjpni:

— Dad, jgulää narä!

<sup>31</sup> Lagajc dxejc gunaaz Jesús naani, räjpni loj Pedr:

— Guxii rajplu yäl'rililajz. ¿Xhicuent guctio'p lajzlu?

<sup>32</sup> Che huä'preni nen barcw, guläzgjajc bej.

<sup>33</sup> Dxejcti renani sää nen barcw bazuxhijbreni nez loj Jesús räjpreni:

— Guliipacni najclu Xi'n Dios.

### *Basajc Jesús reben racxhuu guedx Genesare't*

*(Mr. 6:53-56)*

<sup>34</sup> Che gudejdreni lo nis, bidzujñreni nez lo reyuj xten Genesare't.

<sup>35</sup> Che biembree reben ro'cni, batie'chreni diidx guideb gabi lajdxreni. Dxejcti biädnäreni guiraa reben racxhuu lojni.

<sup>36</sup> Gunabduxhreni gusaanni canreni ro' xhajbtisni. Dxejcti guiraa renani gudajw xhajbni, biajcreni.

## 15

### *Nani ruxhin bejn*

*(Mr. 7:1-23)*

<sup>1</sup> Dxejcti gubig gaii rebejn nani ruluii leii näjza rebejn guidoo ni laa farisee. Siäädreni guedx Jerusalén, räjpreni loj Jesús:

<sup>2</sup> — ¿Xhicuent di rexpejn<sub>pacnu</sub> jiu xcostrumbr rebengool? ¿Xhicuent direni gusoob yäl'rdiib naareni che rajwreni?

<sup>3</sup> Badzu'ni diidx, räjpni:

—¿Xhicuent di la'tu gusoobzatu xtidx Dios? Dee alga riurutu rexcostum-brtu.

<sup>4</sup> Dios gunibeeni xho guntu che räjpni: “Gojp xpala'n xtaclu, xnanlu”, näjza “Nani guiniyaj lo xtaclni o loj xnanñi, suguetni.”

<sup>5</sup> Luxh la'tu rniitu sajç gäb chutis bejn loj xtaclni o loj xnanñi: “Digacdi gacnäätu sa'csi guiraa ni rapä abadedäni lo Dios.”

<sup>6</sup> Luxh chutis ni guiniñ si'c, xhetru nanabdi gacnäjni xtaclni o xnani. Si'c ni cabälaztu rextidx Dios te gac chanuutu rexcostumbrtu.

<sup>7</sup> Bejn ni rusguee najctu! Laaca gunii Isaías, bejn nani gunii xtidx Dios xcuenttu cheni räjpni:

<sup>8</sup> Rebenguejdxre con ro'reni rliä'preni xpala'nä niluxh lastooreni zijt suga' nez loä.

<sup>9</sup> Xlia'si rajnreni narä, sa'csi ruluiireni si'c xtidxä reyäl'rnibee xten reben guedxliuj.

<sup>10</sup> Dxejcti gurejdxni rebejn, räjpni lojreni:

—Colcuadiajg, colyacbee.

<sup>11</sup> Nani riu' ro' bejn di guxhiñ bejnga, sanga nani rii ro' bejnga ni'cni ruxhiñ bejnga.

<sup>12</sup> Dxejcti rexpejn pacni gubig lojni, räjpreni:

—¿La najnlu bidxe'ch rebejn farisee che biejn diajgreni diidx ni guniilu?

<sup>13</sup> Dxejç laani räjpni:

—Xhitis yajg nani di Xtaclä ni yu' xhaguibaa nusuñ siliädx'a'ni guideb xlobaani.

<sup>14</sup> Colgusaanreni; lotiä'preni, ruluiireni nezyuj lo salotiä'preni. Luxh palga te beñ lotiä'p guluii caneñ chää stee lotiä'p, guiro'preni sitejbreni neñ te gueed.

<sup>15</sup> Räjp Pedr loj Jesús:

—Basule' cuentre loonu.

<sup>16</sup> Räjp Jesús:

—¿La näjza la'tu ditu gachee, ä?

<sup>17</sup> ¿La ditu gachee guiraa ni rajw bejn ru' xque'ni, dxejcti che rdejdn i xque'ni, abigo'ñni?

<sup>18</sup> Niluxh diidx nani rii ro' bejn, neñ lastoo bejn riini; dee ni ruxhiñ bejn.

<sup>19</sup> Sa'csi neñ lastoo bejn rii rexhigabguijdx xten rebejn ni rugu't sa'ni; xten rebejn ni rusguee gunaa; xten rebejn ni rusguee chääñ sa'ni; xten rebejn ni rbajñ; xten rebejn ni rniñ didxxhiñ lo sa'ni; xtenza rebejn ni rutijñ sa'ni.

<sup>20</sup> Laa sa' recosre ni ruxhiñ bejn. Che dini gusoob recostumbr xte yäl'rñdiib naani, di ni'c guxhiñ bejn.

### *Te gunazit nani huililajz xtidx Jesús*

(Mr. 7:24-30)

<sup>21</sup> Biriiti Jesús ro'c, sääni nez región xten Tiro näjza Sidón.

<sup>22</sup> Nejzga rbäjz te gunaa cananee, cabedxa'ni biäädni lo Jesús, räjpni:

—Dad, xi'n toDavid, balaslajz narä. Xindxa'pä yu' xpej beñdxab lastooni, niluxh cagusacsíduxhñini.

<sup>23</sup> Xhet räjpdi Jesús lojni. Dxejcti biädñabduxh rexpejn pacni lojni, räjpreni:

—Barilaagw gunaare, didi rbedxa'ni siädñajñi luñ.

<sup>24</sup> Dxejcti räjp Jesús lojni:

—Dios baxhal narä lojtis xpen Israel nani agunijñ neñ dojl.

<sup>25</sup> Dxejcti gubig gunaaga, bazuxhiñbni nez loj Jesús, räjpni:

—Dad, gucnäñ narä.

<sup>26</sup> Dxejc räjp Jesús lojni:

—Di gac hueen xca' bejn xcuxtiil rexi'nni gusalnini lo rebä'cw.

<sup>27</sup> Dxejc räjp gunaaga lojni:

—Guliini Dad, näjza rebä'cw rajw te la' yätxtiil ni rtejb lo mex xten xpax-huaanni.

<sup>28</sup> Dxejcti räjp Jesús lojni:

—Nane', lacti guroob najc xcälirililajzlu. Sugac si'cni rlanjlu.

Lagajc dxejc biajc xindxa'pni.

### *Basiajc Jesús xhidal beñ racxhuu*

<sup>29</sup> Biriñ Jesús ro'c gudejdni nez ro' nisdoo ni laa Galilee. Huäpgajcni yejc te dajn, ro'c gurejni.

<sup>30</sup> Xhidajl bejn bidzujñ cad sobga'ni. Siädnäreni reben ni rajc ni'ni, reben ni najc lotiä'p, reben gop, reben ni xheti naani, näjza xhidalso beñ racxhuu, bidzunnäjrenini nez loj Jesús. Dxejcti basiajcnireni.

<sup>31</sup> Ni'cni lacti bidxeloduxh reben xhidajlga che bahuiireni rnii regop, riajc reni xheti naani, rsiaj reni rajc ni'ni, ruhuii relotiä'p, dxejc rliä'preni xpala'n Xtios rexpēñ Israel.

### *Badeed Jesús xhi gudajw tajp miñ bejn (Mr. 8:1-10)*

<sup>32</sup> Gurejdx Jesús rexpejn pacni räjpni lojreni:

—Riaä rebejnre sa'csi agujc choñ dxej yunäjreni narä luxh xhet ca'direni gaureni. Di rlazä guxhaläreni jüireni rolijzreni palga gajdreni gau didi guidxajgreni lo nezyuj.

<sup>33</sup> Dxejcti räjp rexpejn pacni lojni:

—¿Xho guidxälnu xhi gau reben xhidajlre nez lo reyubijzre cadro rut rbäjzdi, ä?

<sup>34</sup> Räjp Jesús lojreni:

—¿Bal yätxtiil ca'tu?

Räjpreni:

—Gajdzisni, näjza gaii bälbäze'.

<sup>35</sup> Sas gunibee Jesús cue rebejn lo yuj.

<sup>36</sup> Dxejc cua' Jesús guigajdz yätxtiilga näjza rebäj, badeedni xquixtios lo Dios dxejc gula'ni reyätxtiilga näjza rebäjga badeednireni loj rexpejn pacni. Dxejcti laareni gudisreni yätxtiilga con rebäjga lo rebejn xhidajlga.

<sup>37</sup> Guiraareni gudajw, gudxaj xque'reni. Che gulujx gudajwreni, batie'reni reyätxtiil ni bia'nga, gudxaj gajdz dxijmni.

<sup>38</sup> Renani gudajwga najc si'cti tajp miñ bejn, niluxh xhet näjdi regunaa niclaza rebuux bigab.

<sup>39</sup> Dxejcti basadiidx Jesús rebejn, biu'tini neñ barcw te gudejdni lo nisdoo nez región xten Magdala.

## 16

### *Reben guidoo ni laa farisee näjza saducee rniabreni te milagwr si'c te seen (Mr. 8:11-13; Lc. 12:54-56)*

<sup>1</sup> Refarisee näjza saducee bidzujñreni lo Jesús, gunabreni gunni te milagwr, gudeedni te seen ni rien xhaguibaali. Niluxh cagugueesireni, sa'csi rlanjreni guiga' Jesús.

<sup>2</sup> Dxejc badzu' Jesús diidxre räjpni lojreni:



—Che rajl gudxej, rniitu: “Saru gac te dxej guixee sa'csi naxniaa xhaguibaa.”

<sup>3</sup> Che rajl rsil rniitu: “Etladi gac te dxej nadxej sa'csi naxniaa xhaguibaa niluxh tre' za.” Xhoxh numbeetu xhi säloj reseen ni rien xhaguibaa, luxh ditu gumbee xhi säloj reseen xcuent redxejre, nalajznu rechos ni cayajc.

<sup>4</sup> Rebeñ guijdxre, rebeñ guyalajz rniab te senro, te milagwr, luxh dirureni fii stee milagwr; suhuiitisreni xsen Jonás.

Dxejcti basa'n Jesúsreni ro'c, sä'tini.

*Levaduur xten refarisee*

(Mr. 8:14-21)

<sup>5</sup> Che gudejd rexpejn pacni stelaad nisdoo biäl-lajzreni ninäreni yätxtiil.

<sup>6</sup> Dxejcti räjp Jesús lojreni:

—Bacuadiajg, colnati levaduur xten refarisee näjza resaducee.

<sup>7</sup> Dxejcti bejnreni xhigab neñ lastooreni: “Si'c caniini sa'csi dinu niopnä yätxtiil.”

<sup>8</sup> Luxh gucbee Jesús xhigabga, dxejc räjpni lojreni:

—¿Xhicuent rujntu xhigab xhet yätxtiildi ca'tu, ä? ;Huinuxh najc xcälirililajztl!

<sup>9</sup> ¿La gajdtu gachee? ¿La diza lajztlu guinaj che gudisä gaii yätxtiil gudajw gaii miñ bejn, ä? ¿Bal dxijmni batie'tu, ä?

<sup>10</sup> ¿La diza lajztlu guizaj che gudisä gajdz yätxtiil gudajw tap miñ bejn, ä? ¿Bal dxijmni batie'tu?

<sup>11</sup> ¿Xhicuent ditu gachee et yätxtiildi cagusä'tä cheni caniä lojtu colnati levaduur xten refarisee näjza resaducee?

<sup>12</sup> Dxejrcu gucbeereni dini niäj: “Colnati levaduur xten yätxtiil.” Laani caniini: “Colnaäti yäl'ruluii xten refarisee näjza resaducee.”

*Bicäjp Pedr Jesús najc Cristpac*

(Mr. 8:27-30; Lc. 9:18-21)

<sup>13</sup> Che bidzujñ Jesús región xten Cesarea xten guedx Filipo, gunabdiidx Jesús loj rexpejn pacni, räjpni:

—¿Chu naj rebejn nacä narä Xi'n Dios ni gujc Nigui?

<sup>14</sup> Laareni räjpreni:

—Yu'reni naj luj najclu Juan Bautist; yu'zareni rni luj najclu Elías, peta sgaiireni rni luj najclu Jeremías o stee nigui ni rni xtidx Dios.

<sup>15</sup> Dxejcti räjpni lojreni:

—La'tu, ¿chuni'c rniitu nacä?

<sup>16</sup> Dxejc räjp Simón Pedr:

—Luj najclu Crist, Xi'n Dios nani nabajn.

<sup>17</sup> Badzu' Jesús diidxre, räjpni:

—Chicbaalu, Simón Pedr, xi'n Jonás, sa'csi xhet bejn di baluii dee lojlu, Xtdätis ni yu' xhaguibaa baluiinini lojlu.

<sup>18</sup> Narä rniä lojlu, luj najclu Pedr, nani säloj: “Te guij.” Sa'csi sibäxtiejl guidxagsa'za renani rililajz xtidxä, niluxh che guetreni, direni nitloj.

<sup>19</sup> Narä gunidxä yäl'rnibee lojlu te gulijdxlu rebejn nani ahuiililajz xtidxä. Xhitis ni gusaanlu gunreni, o xhitis ni dilu gusaan gunreni, susoob Dios xtiidxlu.

<sup>20</sup> Dxejcti gunibee Jesús rutlojdi gäb rexpejn pacni laani najc Guejb Crist.

*Gunii Jesús xho guetni*

(Mr. 8:31-9:1; Lc. 9:22-27)

<sup>21</sup> Lagajc dxejc gusloj cagusule' Jesús diidx lo rexpeljnpacni, guniini lojreni xho nanabpac cháani guedx Jerusalén te ro'c tedni trabajwduxh ladzṇaa rebengool xten guidoo, ladzṇaa rebixhojz, nájza rebejn ni najn xleii Moisés. Guniizani sugu'trenini, niluxh ni riojn dxej sibansacni lo rebengut.

<sup>22</sup> Dxejcti huinä Pedr Jesús te laad, gusloj cadilṇäjnnini, räjpnj:

—¡Gacñäj Dioslu, Dad! ¡Gurniälojlu gaclu si'c!

<sup>23</sup> Dxejc gubiré Jesús, räjpnj lo Pedr:

—¡Gubicaj loä bendxab! Na'c rusiejtytisluloä. Luj dilu gun xhigab xten Dios, alga xhigab xten rebenguedxliuj rujnlu.

<sup>24</sup> Dxejcti räjpn Jesús loj rexpeljnpacni:

—Palga yu' chu tejturu rälaz guirinajl narä, sucuälazni lagajc laani, suguuni xcrujzni, nalajznu tedni trabajw, sujiädajnlni narä.

<sup>25</sup> Sa'csi nani rälaz gunni gaan xcälṇabajnṇi, sunijtnini. Luxh nani runijt xcälṇabajnṇi por narä, sidxälṇi xcälṇabajnṇi par tejpas.

<sup>26</sup> Sa'csi çxhi gaan gun te bejn palga ga'pni guideb guedxliuj, luxh nit xaimni lo Dios, ä? o çla yu' xhi gudeed bejn te siini xaimni?

<sup>27</sup> Sa'csi narä Xi'n Dios ni gujc Niguii siälä lo yälrdimbicha' xten Xtäda con rexanglni, dxejcti siguixä tebgaj bejn si'ctis ni gujc xtzuunni.

<sup>28</sup> Rniliäpac lojtu, loj reni tre' ree ṇaj, yu'reni di guet dxejli ni fixgaareni jiälä narä Xi'n Dios ni gujc Niguii lo xcälṇnibeä.

## 17

### *Chuni'c najc guroob*

(Mr. 9:2-13; Lc. 9:28-36)

<sup>1</sup> Che gudeed xho'p dxej, huinä Jesús Pedr, Jacobob, con Juan betz Jacobob, xtebreni huijreni jiaa yejc te dajn.

<sup>2</sup> Dxejcti nez lojreni bidxaa xho rujn lojni. Lojni gusloj rdimbicha' si'c gubijdx; xhajbni gujc nolbäj si'c te bajl.

<sup>3</sup> Dxejc bahuigajcreni loj Moisés nájza loj Elías, cayujyreni diidx con Jesús.

<sup>4</sup> Dxejcti räjpn Pedr loj Jesús:

—Dad, ¡huenduxh suga'nu ree! Palga rälazlu, sajc jiennu choṇ yuguixh, tejni gac xten guejblu, steeni gac xten Moisés, steeni gac xten Elías.

<sup>5</sup> Laṇi canii Pedr, biäjṭ te za ni rdimbicha' guideb gabireni; neṇ zaga biejn te xse' ni räjpn:

—Dee najc xi'nä ni sanälazä, ruspaduxhni lazä, coṭcuadiajg xtiidxni.

<sup>6</sup> Che biejn diajg rexpeljnpac Jesús diidxga, bazuxhijbreni, basajbreni lojreni lo yuj, bidxebduxhreni.

<sup>7</sup> Dxejcti gubig Jesús lojreni, batzuubni ṇaani yejcreni, räjpnj:

—Coṭchasulii, na'c rdxejbtu.

<sup>8</sup> Che guläs lojreni, lojtis Jesús bahuiireni, rutru suganäjḍini.

<sup>9</sup> Cheni sayäjṭreni yejc dajnga, gunibee Jesús lojreni, räjpnj:

—Rutlojdi gäbtu xhini'c bahuiitu dxejli ni guibaṇsacä narä Xi'n Dios ni gujc Niguii lo rebengut.

<sup>10</sup> Dxejcti gunabdiidx rexpeljnpacni lojni:

—çXhicuent rñii rebejn ni najn xleii Moisés ganid Elías nanab jiääd, ä?

<sup>11</sup> Badzu' Jesús diidxre, räjpnj:

—Guliini siädxgaa Elías, laani gunsa'cni guira'ti,

12 niluxh narä rniä lojtu, abiääd Elías, di rebejn nienbeeni, luxh bennäjrenini si'ctis ni rlanjreni, basacsíduxhrenini. Sigajcza gunnäjreni narä Xi'n Dios ni gujc Niguui, susacsíduxhreni narä.

13 Dxejcti gucbee rexpejn<sub>pacni</sub> caniini xcuent Juan Bautist.

*Jesús basiajc te biuux ni guyu' xpej be<sub>nd</sub>xab*

*(Mr. 9:14-29; Lc. 9:37-43)*

14 Cheni bidzuj<sub>nreni</sub> cadro tre' xhidajl bejn, gubig te bejn lojni bazuxhijbni, dxejc räjpni:

15 —Dad, balaslajz xinä sa'csi laani cayacxhuuni, rajcni yälguidxbej, rusacsíduxh yälgujdxgani, yu' huält rtejbni lo guiboo yu' huält rtejbni lo nis.

16 Biädnäni loj rexpejn<sub>paclu</sub>, luxh di niajcdi nusajcneni.

17 Jesús badzu' diidxre lojreni räjpni:

—Benguijdx, bejn ni di chalilajz, ¿gucli yu'ä lojtu? ¿Cati gac gunä huant la'tu? ¡Coltanä biuuxga ree!

18 Dxejcti gudil<sub>näj</sub> Jesús be<sub>nd</sub>xab ni yu' lastoo biuuxga, gunibeeni biriini, lagajc dxejc bjaic biuuxga.

19 Dxejc guninäj rexpejn<sub>pacni</sub> Jesús te laad, gunabdiidxreni räjpreni:

—¿Xhicuent di niajcdi nibäanu be<sub>nd</sub>xab nen <sub>lastoo</sub> biuuxga?

20 Jesús räjp lojreni:

—Sa'csi la'tu guxiduxh rililajztu. Rniliä lojtu, paru najc yäl<sub>rililajz</sub> xtentu si'cti te bejdz muxhtas, sajc gäbtu loj dajn rec: “Gubicaj ro'c, gudejd stelaad”, luxh sibicaj dajnga. Palga rililajz<sub>pac</sub>tu, xhetliidi yu' ni di gacdi guntu.

21 Niluxh sa' be<sub>nd</sub>xabre, dini guirii palga ditu guiniabduxh lo Dios, gu-cua'nzatu.

*Jesús rusule' stehuält xho guetni*

*(Mr. 9:30-32; Lc. 9:43-45)*

22 La<sub>lni</sub> sasajreni nez región xten Galilee, räjp Jesús:

—Suteedreni narä Xi'n Dios ni gujc Niguui ladz<sub>naa</sub> reben<sub>dojl</sub> te gusacsíreni narä.

23 Niluxh sugu'treni narä, dxejc ni riojn dxej siba<sub>nsacä</sub> lo reben<sub>gut</sub>.

Che biejn diajgreni diidxga, guc-huinduxh lajzreni.

*Gudijxni impuest xten guidoo*

24 Che bidzuj<sub>n</sub> Jesús näjza rexpejn<sub>pacni</sub> guedx Capernaum, biääd rebejn ni rusquijx xcuent guidoo lo Pedr, gunabdiidxreni lojni, räjpreni:

—¿La di xmastrtu quiix impuest xten guidoo?

25 Räjp Pedr:

—Rguijxnini.

Che biu' Pedr nen <sub>yu'</sub>, ganid Jesús gunii lojni, räjpni:

—¿Xhi rchalolu, Simón? ¿Chuni'c rusquijx rebejn ni rnibee lo guedxliujre? ¿Chuni'c rguijx reimpuest, recuyo't? ¿Rebe<sub>n</sub> lajdxreni o reben<sub>zajt</sub>?

26 Badzu' Pedr diidxre räjpni:

—Reben<sub>zajt</sub>.

Räjp Jesús:

—Ni'cni di rexi'nreni quiixni.

27 Luxh te di guidxe'chreni, huij ro' nisdoo, bacuaa ansuel, gulää bälj ni guiniaxgaalu. Ro' bäljga sidxällu te melpla't ni saj<sub>l</sub> te chatijxlu impuest xcuentä näjza xcuentlu.

## 18

*¿Chuni'c sajcru lajdx Dios xhaguibaa?*

*(Mr. 9:33-37; Lc. 9:46-48)*

1 Laa dxejcní gubig rexpejn pac Jesús lojni te gunabdiidxreni:

—¿Chuni'c sajcru lajdx Dios xhaguibaa?

2 Dxejcti gurejdx Jesús te biuxbáz, bazujnini nez galáireni,

3 dxejc rájpní:

—Rniliápac lojtu, palga ditu gusiechljaztu, palga ditu gac nadolajz si'c te biuxbáz, ditu jiu' lajdx Dios xhaguibaa.

4 Ni'cni chutis bejn nani gac nadolajz si'c biuxe're, laani gac ni sajcru lajdx Dios xhaguibaa.

5 Chutis ni riu te sa' biuxe're, sa'csi rinálajzni narä, lagajc narä riuni.

*Riezgw jiajbni nen dojl*

*(Mr. 9:42-48; Lc. 17:1-2)*

6 Rájpzani:

—Chutis ni gudzucaj lo xnezyuä te sa' biuxe're ni ahuililajzni xtidxä, maazru huen niliib te guij xten molin dojb yejnni, chatejbni loj nisdoo, palga gunni jiajb tej reni'c lo dojl.

7 Proobza guedxliuj sa'csi yuduxh xhigabguijdx lojni. Sa'csi nanabpac chu xhigabguijdx. Gunatiro, bejn ni ruzobloj rexhigabguijdxre, ni rujn riajbza lo dojl reni rililajz xtidxä, ni najc si'c biuxe're.

8 Palga ni'lu o ñaalu gun jiajb lu lo dojl, batiu'ni. Hueenru jiu'lu lo xcälñabajn Dios nitiujnglu o ñatiujnglu lacuaa jiilu con guiro'p ni'lu o guiro'p ñaalu lo balduxh ni rejc par tejpas.

9 Palga te balojlu rujn riajb lu lo dojl, gulääni. Hueenru jiu'lu lo xcälñibee Dios najclu lotiä'p lacuaa chu guiro'p baloj chazälreni luj lo balduxh ni rejc par tejpas.

*Xcuent xiil ni gunijt*

*(Lc. 15:3-7)*

10 Rájpza Jesús lojreni:

—Colnatiro, andi cuälaztu rebejn ni najc si'c biuxbázre ni sasaj lo xnez Dios, sa'csi rexangl Dios ni cahuiireni, guiraatis dxej yu'reni loj Dios.

11 Sa'csi Xi'n Dios ni gujc Niguii biääd te guslaani rebejn nani agunijt nen dojl.

12 Rájpzani:

—¿Xho rhuiitu? Palga rajp te bejn te gayuu xiil, dxejc nit tejni, ¿laa dini gusaan stabitzubigaaga ni yu' nen gurajl te chatiilni xile' ni gunijt, ä?

13 Luxh palga guidxälñi xile'ga, rniliä lojtu, sibalazduxhruni xcuent xile'ga luxh guxiuru guibanäj lajzni xcuent rexiiil nani di ninijt.

14 Sigajcza Xtdadnu ni yu' xhaguibaa di rlanj nit lo Dios nicla tej reni ahuililajz xtiidxni, ni najc si'c biuxbázre.

*Xho gunnäjlu bejtzlu*

*(Lc. 17:3)*

15 Rájpzani:

—Palga gun bejtzlu te cosguijdx lojlu, guninäjni xtebtislu, gojs lojni xhi dojl bejni lojlu. Palga saru gucua diajgni xtiidxlu, abiäj lajztu.

16 Palga naaddini gucua diajgni, dini jiu xtiidxlu, dxejc huinä stee o stio'p bejn chaninäjluni, te guiraa ni guiniitu jiejn diajg rebejn ga, te arajplu tio'p o choñ testiigw.

17 Palga di bejtzlu gucuadiajg xtidx rebejn̄ga, luxh dizani jiu xtiidxreni, neñ guidoo huile'c xquejlu loj rebejn̄ ni ricuadiajg xtidx Dios. Palga dizani jiu reben guidoo, sugacni nez lojlu si'c te beñguijdx ni di gumbee xtidx Dios o si'c rebejn̄ nani rusquijx loj rebejn̄ nani ruto'.

18 'Ni'cni rniliäpac lojtu, guiraa yäl̄guxhtis xten bejn̄ ni di gusiechlazj xtojreni ni guntu lo guedxliuj, si'c jia'nni xhaguibaa; guiraa redojl̄ nani gusiäl̄j lajztu lo guedxliuj sa'csi basiechlazj beñdojla, si'cza jia'nni xhaguibaa.

19 'Sigajcza rniä lojtu, palga tio'ptu tejsi xhigab guntu xhini'c guiniabtu lo Dios, che guiniabtuni lo Dios, Xtaďa ni yu' xhaguibaa suniidxni ni rniabtu lojni.

20 Sa'csi cadrotis nadxagsa' tio'p o choñ bejn̄ sa'csi rinälajzreni narä, anasuga'ä galäii rebejn̄ga.

21 Dxejcti gubig Pedr loj Jesús, gunabdiidxni:

—Dad, ¿palga gunijt betzä loä, bal huält nanab gusiäl̄j lazä? ¿La sajl̄ gajdzli huält, ä?

22 Badzu' Jesús diidxre lojni räjpni:

—Dina guiniä gajdztis huält, rniä gayoñbidzuu huält, nalajznu si'ctiza huält basiäl̄j lajztu.

### *Xcuent tio'p bejn̄ ni nazäab meel*

23 'Xcäl̄rnibee Dios xhaguibaa najc si'c te reii ni flajz gunni cuent lac nazäab rexmosni lojni.

24 Agusloj cayujnni xcuentni chela bidzunoñajreni te mos ni nazäab balti mil lojni.

25 Luxh mosre xhet rajpdini te quiixni rexti'nni, ni'c gunibee reii guido'ni si'c sclav, näjza chääl̄ni, näjza rexi'nni, nägajcza guiralii xhixtenni, te gaxh xti'nni.

26 Dxejcti mosga bazuxhijbni loj xlam̄ni, gunabduxhni lojni, räjpni: “Guläzsijc tiop-choñ dxej, Dad, te gac quixä xti'nä.”

27 Dxejcti lamga balazlajzni xmosni, badzucajni guiraa ni nazäab mosga lojni, baslaanini.

28 Cheni birii mosga rolizj xlam̄ni, bidxaagni stee samosni ni nazäab bale'si beex lojni. Gunaaznini, baxhiya'ni yejn̄ni, dxejc räjpni: “Gudijxga ni nazäablu loä.”

29 Dxejcti ste mosga bazuxhijbni lojni, räjpni: “Guläzsijc. Siguixäca guiraa ni nazäbä lojlu.”

30 Luxh steega naaddini, alga huisäugacni samosni neñ latzguuib te bejn̄ni gaan gudijxni guiraa ni nazäabni.

31 Cheni bahuii sgaii mos xhini'c bejn̄ni, gucnaduxhlajzreni, huiye'tzreni lo xlam̄reni xhi huiyejn̄ni.

32 Dxejcti gurejdx xlam̄reni mosga, räjpni lojni: “iMos guijdx! Narä badzucä di'n ni nazäablu loä, sa'csi gunabduxhlu loä.

33 Si'cza niunnäjlu sa'lu, nulazlajzluni sigajc ni balazlazälu.”

34 Sas lacti bidxehdudx lamga, gunibeeni biäuuni te gudijxni guiragajc ni nazäabni lo xlam̄ni.

35 Baluux Jesús cuentga, räjpni:

—Sigajcza gunnäj Xtaďa ni yu' xhaguibaa guiraa rebejn̄ ni di gusiäl̄lajzpac guiraa redojl̄ ni rujn resa'ni lojni.

## 19

*Jesús rului xcuent yärru'o'n sa'ni*  
(Mr. 10:1-12; Lc. 16:18)

1 Che gulujx gunii Jesús recuentre, biunejzni Galilee, huijni lo región xten Judea, stelaad gueu Jordán.

2 Xhidajl bejn birinajlni, ro'c basiajzni rebenracxhuu,

3 dxejc gubig refarisee lojni, rlanjzeni gusguesireni Jesús ni'c räjpreni lojni:

—¿La sajc guro'n te niguii cháälni che rlanjzteni, ä?

4 Badzu' Jesús diidxre lojzeni, räjzni:

—¿La gajdtu goj lo reguijtz nani bacuaa to Moisés cadre caj xho benchee Dios bejn galooli: “Niguii näjza gunaa bencheenireni?”

5 Guniiza Moisés: “Ni'cni gusaan niguii xtadni con xnanni te xca'ni cháälni, dxejc dirureni gac tio'p, tejtis bejn najczeni.”

6 Ni'cni dirureni gac tio'p, anajczeni tejtis bejn, digacdi guilia' rebejn lo sa'ni nani abachagsa' Dios lo sa'ni.

7 Dxejcti gunabdiidxzeni lojni, räjzni:

—¿Xhicuent gunibee Moisés gudeed niguii te guijtz lo cháälni te si'c gac guro'nni gunaaga, ä?

8 Räjpn Jesús lojzeni:

—Sa'csi najc lastootu si'c te guij, ni'c basaan to Moisés baro'n niguii cháälni, niluxh galodoo et si'cti gujzni.

9 Luxh rniä lojtu, niguii nani gusaan cháälni, luxh xhet dojldi bennäj cháälni stee niguii, dxejcti guchnaani ste'ca gunaa, rujnni dojl. Sigajcza niguii ni guchnaa gunaaga ni abaro'n cháälhini, rujnza niguiiga dojl.

10 Dxejc räjpn rexejnpacni lojni:

—Palga si'c najc xcuent niguii con cháälni, hueenru na'c guchnaani.

11 Jesús räjpn lojzeni:

—Xhet guiraadi bejn rajc gacbee rediidxre, rebejntis ni rudeed Dios te xcăriensa'c ni'ctis racbee.

12 Yu' xhicuent digacdi guchnaa niguii: yu'reni digacdi guchnaa sa'csi si'c gojlni; yu'reni digacdi guchnaa sa'csi baxhin sabejneni; yu'zarení digacdi guchnaareni sa'csi rlanjzeni gunreni xtzuantis Dios. Nani rajc racbeeni rediidxre, sugacbeenireni.

*Biädnäreni rebiuux loj Jesús*

(Mr. 10:13-16; Lc. 18:15-17)

13 Dxejcti biädnäreni rebiuxe' loj Jesús te gudzuubni naani yejcreni, guinabni lo Dios xcuentreni. Luxh rexejnpacni gudilnäj rebejn ni siädnä rebiuxe'ga.

14 Dxejc räjpn Jesús lojzeni:

—Colgusaan guibig rebiuxe' loä, na'c gudxojuenteni, sa'csi xcälrnibee Dios xhaguibaa najc xten reni nadolajz si'c najc rebiuxe're.

15 Che gulujx badzuubni naani yejc rebiuxe', biunejzni ro'c.

*Te ben ni rajp guninä; Jesús*

(Mr. 10:17-31; Lc. 18:18-30)

16 Dxejc biäd te bi'n lo Jesús, gunabdiidxni lojni; räjzni:

—Mastr sa'c, ¿xhini'c nanab gunä te xca'ä yälınabajn lo Dios par tejpas?

17 Dxejc räjpn Jesús lojni:

—¿Xhicuent rniilu maestr sa'c narä? Diostis najc sa'c. Per par rlanjzlu xca'lu yälınabajn lo Dios, bazoob rextidx Dios ni caj lo xleii Moisés.

<sup>18</sup> Dxejcti räjp bi'nga lojni:

—¿Xhi rediidxga?

Dxejc räjp Jesús lojni:

—Na'c ju'tlu, na'c guesnäjl'u bejn nani di gac cháällu, na'c cuanlu, na'c guiliäslu didxxhii xcuent bejn.

<sup>19</sup> Bazoob xtidx xtdadu con xnanlu, huinälajz sa'lu si'cni sanälajzlu lagajc luj.

<sup>20</sup> Dxejcti räjp bi'nga lojni:

—Guiraa rediidxre runä che nacäli biuux. ¿Xhiruxni'c riäädx gunä?

<sup>21</sup> Dxejc räjp Jesús lojni:

—Palga rlajzlu gaclu beñsa'c lo Dios, huij, bato' guiraa ni rajplu, dxejc gudisni lo rebenproob, dxejc xhaguibaa sapduxhlu xhixtenlu. Dxejcti gudaa te jiädnajllu narä.

<sup>22</sup> Cheni biejn diajg bi'nga rediidxre, gac-huinduxh lajzni sa'csi rajpni xhidalduxh xhixtenni.

<sup>23</sup> Sas Jesús räjp loj rexpejn pacni:

—Rniliäpac lojtu, naganduxh jiu' te beñ rajp loj xcäl'rnibee Dios.

<sup>24</sup> Rnisacä lojtu, guyasiru ted te camei neñ baloj te guux; naganduxhru jiu' te bejn ni rajp lo xcäl'rnibee Dios.

<sup>25</sup> Che biejn diajg rexpejn pacni rediidxre, bidxeloduxh reni, dxejc canabdi-dix loj sa'reni:

—¿Chuni'c sajc jiu' lo xcäl'rnibee Dios?

<sup>26</sup> Dxejc bahuidzu'tz Jesús lojreni, räjpni:

—Naganduxh gun rebejn dee, Diostis sajc gun guiraloj.

<sup>27</sup> Dxejcti Pedr räjp lojni:

—Nuurnu basa'nnu guiraa xhixtennu te siopnalnulu. ¿Xhini'c jia'pnu ro'c?

<sup>28</sup> Jesús räjp lojreni:

—Rniliäpac lojtu, la'tu ni biädnejltu narä, che guscobä guiraa recos cheni cueä narä, Xi'n Dios ni gujc Niguüi, lo yagxhil cadro guinibeä lo guiraa reben guedxliuj, la'tu ni siädnejltu narä sibejzatu lo tzubitio'p yagxhil te guinibeetu loj guitzubitio'p guejdx xten rexpejn Israel.

<sup>29</sup> Luxh guiraa rebejn ni basa'n rolizni o rebejtzni, o rebisiajnni, o xtdani, o xnanni, o cháällni, o xi'nni, o rexhujni, te siädnejl'ni narä, rebejn ga sajp te gayuu huält locni gojpni, nägajc ga'preni xcäl'nabajn Dios par tejpas.

<sup>30</sup> Rebejn nani rchalo najcreni beñroru lo sa'reni nez loj Dios, reni'c gac bejn ni guxii sajc nez loj Dios. Rebejn nadolajz ni di guchalo sajcrureni lo sa'reni, reni'c sajcrureni nez loj Dios.

## 20

### *Xcuent reni rujn dzuun*

<sup>1</sup> Räjzpzi:

—Xcäl'rnibee Dios najc si'c te bejn ni najc baxhuaan xten te renchro. Rsildooru biriini te satiilni mos gun dzuun lo xyujni, lo reyaguub.

<sup>2</sup> Che bidxäl'ni gaii mos, bachaagni diidx. Bia'reni diidx quiixnireni te denaar tebdxej cade tej remosga. Dxejc baxhal'nireni loj xyujni sayujnreni dzuun.

<sup>3</sup> Birisacni, satiilni sgaii mos si'cti rcagaa, rsil. Bidxaagni sgaii bejn ni xhet cayujndi, suga'sireni nez lo guüi.

<sup>4</sup> Räjpn'i lojreni: “Näjza la'tu colchayujn dzuun lo xyuä. Narä siguixä si'cni riäj'l xca'tu.” Sä'ti rebejn ga lo dzuun.

<sup>5</sup> Birisac dade' si'cti läiidxej, birisaczani si'cti rcachon gudxej. Bidxaagni sgaii bejn, sigajcza räjpni loj rebejn̄ga.

<sup>6</sup> Dxejc si'cti rcagaii birisacni, huijni lo guii. Ro'c bidxälni sgaii bejn ni xhet cayujndireni, suga'sireni nez lo guii. Dxejc räjpni lojreni: “¿Xhicuent suga'tu ree guideb dxej xhet cayujnditu?”

<sup>7</sup> Dxejc räjpreni lojni: “Sa'csi rut siädtildinu te choyennu dzuun.” Dxejcti räjpni lojreni: “Näjza la'tu colchayejn dzuun lo xyuä. Narä siguixsa'cätu.”

<sup>8</sup> Che biu' guxhijn, räjp lam lo mos ni rnibee remos: “Gurejdx remos te quixlureni. Gudix-xгаа reni biu' gudxejru lo dzuun. Lult gudijx reni biu' ganid lo dzuun.”

<sup>9</sup> Dxejc ganid biu' remos ni agudxej biu'reni lo dzuun. Cade tejreni cua' te denaar, si'cni rca' ni rujn dzuun guideb dxej.

<sup>10</sup> Cheni biu' reni biu' lo dzuun rsildoo, bejnreni xhigab sica'rureni meel, per sigajcza laareni cua'reni te denaar cade tejreni.

<sup>11</sup> Che cua'reni xcuentreni gusloj cadxe'chreni lo baxhuaan xten dzuunga.

<sup>12</sup> Räjpreni: “Redee ni biu' lult lo dzuun pet teb ortis bejnreni dzuun, luxh gudijxlureni sigajcni gudijxlu nuurnu, luxh biennu dzuun guideb dxej, luxh biennu dzuun lo yäl̄nanlaa.”

<sup>13</sup> Dxejc räjp lamga lo tejreni: “Xamigwä, xhet cosguijdxdi cayunä lojlu. ¿La xhet bia'ndinu diidx te denaar quixälu tebdxej?”

<sup>14</sup> Huij, cua' xmeellu. Narä rlazä quixä bejn̄re ni biu' lult sigajc ni gudixä lojlu.

<sup>15</sup> ¿La di gacdi gunä si'ctis ni rlazä con xmelä? ¿O rdxechlajzlu löä sa'csi nacä hueen, ä?”

<sup>16</sup> Ni'cni reni biääd lult sajcreni tebloj con reni biääd ganid, luxh reni biääd ganid sajcreni tebloj con reni biääd lult.

*Gunisac Jesús xho guetni  
(Mr. 10:32-34; Lc. 18:31-34)*

<sup>17</sup> Che sasaj Jesús lo nezuyj sääni Jerusalén, huinäni rexpeljnpacni te laad te räjpni lojreni:

<sup>18</sup> —La'tu ruhuiitu sosaanu nez guedx Jerusalén. Ro'c narä, Xi'n Dios ni gujc Niguii, siabä ladzṇaa reni rnibee lo rebixhojz, näjza lo rebejn̄ ni najn leii. Laareni sinibeereni guetä.

<sup>19</sup> Suteedreni narä ladzṇaa rebenzijt te cubeereni narä quinnreni narä, dxejc gucuaareni narä lo crujz. Luxh ni riojn dxej, sibansacä loj rebengut.

*Ni gunab xnan Jacobo näjza Juan  
(Mr. 10:35-45)*

<sup>20</sup> Dxejcti gubig xnan Jacobo näjza Juan, xi'n Zebedeo loj Jesús. Bazuxhijbni nez loj Jesús, te gunabni lo Jesús.

<sup>21</sup> Gunabdiidx Jesús lojni:

—¿Xhini'c rlanjzlu?

Räjp gunaaga lojni:

—Che jiu'lu lo xcäl̄rnibeelu, gunibelaa cue tej rexi'nä xladbeelu, steeni cue xladbäjgwlu.

<sup>22</sup> Dxejc räjp Jesús:

—iDitu gan xhini'c rniabtu! ¿La sajc tedtu yäl̄rsacsä sa'ni tedä? ¿La sajc tedtu trabajwduxh sa' ni nanab tedä?

Dxejc räjpreni:

—Sajc tednuni.

<sup>23</sup> Dxejcti räjp Jesús lojreni:



—Guliipacni. Sidedxgaatu trabajw, sidedxgaazatu yälrsacsí. Et narädi cueä reni cue xladbägwä o xladbeä. Xtadä ni yu' xhaguibaa alaguleni rebejnğa.

<sup>24</sup> Che biejn diajg stzuu rexpejnpac Jesús, bidxe'chreni loj guiro'p rexi'n nane'ga.

<sup>25</sup> Dxejc gurejdx Jesús reni, räjpni:

—La'tu najntu xho rujn regubier ni rnibee lo rebenzijt, rnibeereni rebejnğa si'c xlamreni. Luxh reni najc rebenro lojreni runnäjreni rebejnğa si'ctis ni rlanjreni.

<sup>26</sup> Et si'cni gunditu la'tu loj rebejn. Chutis rlanj gac beņro lojtu, nanab gunni dzuun gacnäjni guiraliitu si'c te mos.

<sup>27</sup> Luxh chutis tejtu ni rlanj guiliä'p xpala'nni, nanab gacni si'c xmos lo guiraliitu.

<sup>28</sup> Sigajcza biääd Xi'n Dios ni gujc Niguii. Dini niniab mos chu lojni, alga laani najc xmos bejn, badeedzani lagajc yälñabajn xtenni te gudijxni baslaani xhidal bejn ni yu' lo dojl.

*Jesús rusiajc tio'p lotiä'p*

*(Mr. 10:46-52; Lc. 18:35-43)*

<sup>29</sup> Che gojl guiriireni guedx Jericó, xhidalduxh bejn sanajlni.

<sup>30</sup> Dxejcti sobga' tio'p bejn ni di fii cuä' nez yuj. Che biejn diajgteni sadejd Jesús ro'c, gusloj cabedxa'reni:

—Dad, Xi'n toDavid, balazlajz nuurnu.

<sup>31</sup> Gudilñaj rebejnreni, te gusaurenı ro'reni. Luxh laareni dipru guredxa'reni:

—ıDad, Xi'n toDavid, balazlajz nuurnu!

<sup>32</sup> Dxejc guzudxi Jesús, gurejdxni reni di fii, räjpni lojreni:

—ıXhini'c rlanjtu gunä?

<sup>33</sup> Räjpreni lojni:

—Dad, rlaaznu guixal balojnu te gac fiinu.

<sup>34</sup> Dxejc balazlajz Jesúsreni, gudajnni balojreni. Sas biacgajc balojreni, gujc bahuiireni, sanajltireni Jesús.

## 21

*Biu' Jesús guedx Jerusalén*

*(Mr. 11:1-11; Lc. 19:28-40; Jn. 12:12-19)*

<sup>1</sup> Cheni Siäddzũngajxhreni guedx Jerusalén, bidzujñreni te guedxbäz ni laa Betfagé, cuä' dajn ni laa Oliib. Baxhal Jesús tio'p xpejnpacni,

<sup>2</sup> räjpni lojreni:

—Colchäj loj guedxbäzre ni tre' nez lojtu. Ro'c guidxältu te burgunaa caduu näjza teburhuin. Colguxhecni, coltanäni loä.

<sup>3</sup> Palga yu' chu naa: “ıXhini'c rujntu?”, colye'tz lojni: “Dad caquiinnini terate'. Suxhalgajcnni.”

<sup>4</sup> Luxh guiraa dee gujc te guzojb diidx ni gunii dade' nani bacuaa xtidx Dios agujc xchero, che räjpni:

<sup>5</sup> Colye'tz loj reni rbäjz guedx Sión,

bahuii xreilu siääd lojlu, nadolajzni bijbni te burbäz, te burbäz, xi'n man ni rujn dzuun, ni ruu cargw.

<sup>6</sup> Dxejcti huij rexpejnpacni, bejnreni si'c gunibee Jesús gunreni.

<sup>7</sup> Biädnäreni burga näjza burbäz xi'nni. Gudixhreni xhajbreni detz burbäzga, dxejc gubijb Jesús burbäzga.

<sup>8</sup> Xhidalduxh bejn tre' ro'c, luxh yu' reni gudixh xhajbreni lo nez yuj, peta sgaiireni batiu' balajg te gudixhreni rebalajg lo nez yuj cadre ted Jesús.

<sup>9</sup> Rebejn ni nijd, nájza reni siáad dejtzní gusloj cabedxa' reni, rájpreni:

— ¡Xchej guibajn Xi'n toDavid! ¡Chicbaa ni siáad xcuent Gueb Dios! Rliá'pnu xpala'n Guejblu Dios.

<sup>10</sup> Cheni biu' Jesús neñ guedx Jerusalén, guiraa rebeñ guejdxga gusloj camojm, yu' reni canabdiidxreni loj sa' reni:

— ¿Chucha najc bejñre?

<sup>11</sup> Yu'zarení rájpní:

— Dee najc Jesús, niguii ni rusule' xtidx Dios. Guedx Nazare't xten Galilee siáadni.

### *Basia Jesús guidoro*

*(Mr. 11:15-19; Lc. 19:45-48; Jn. 2:13-22)*

<sup>12</sup> Dxejc biu' Jesús neñ guidoro xten Dios, guláani guiraa rebejn ni caguto' nájza rebejn ni casii. Barexhátni remex xten reni ruchaa meel xten rebejn, nájza reyagxhil xten reni ruto' repalom.

<sup>13</sup> Dxejc rájpní lojreni:

— Loj reguijtz ni bacuaa rebengaloo caj: “Sirilaj xquidoá yu' xten yálrbejdx, yálrniab loj Dios.” Niluxh la'tu abejntuni xpiliáa gubaan.

<sup>14</sup> Lagajc neñ guidooga, gubig loj Jesús gaii bejn ni di fii nájza gaii bejn ni rsiacoj, luxh basiajcnireni.

<sup>15</sup> Cheni bahuii reni rnibee loj rebixhojz, nájza reni najn leii remilagwr ni bejn Jesús, luxh biejnza diajgreni xho cabedxa' rebixuxe' caniireni: “Rliá'pnu xpala'nlú Xi'n toreií David”, bidxe'ch rebixhojzga.

<sup>16</sup> Dxejc rájprení loj Jesús:

— ¿La riejn diajglu xhi caniireni, ä?

Badzu' Jesús diidxre lojreni rájpní:

— O'n, riejn diagáni. ¿La gadtu goł lo reguijtz ni bacuaa te dade' ni gunii xtidx Dios? Ro'c caj xcuent redee, cadre caj rediidxre:

Abejnlu goł rebixuxe nájza rebáznite' dij ni rliápsa'cpac xpala'n Dios.

<sup>17</sup> Dxejcti basaan Jesúsreni, biunejzni ro'c sääni guedxe' ni laa Betania, ro'c gudejdní yáäl.

### *Te yag iigw ni gubijdz*

*(Mr. 11:12-14, 20-26)*

<sup>18</sup> Cheni bara yáäl, rsilru gubisac Jesús guedx Jerusalén. Lał ni sääni, gusloj calaanni.

<sup>19</sup> Bahuiini loj te yag iigw cuá' nezyuj. Gubigni gajxh ni' yajgga, per xhet ninejxhdi bidxálni, ganaxhtis balajg caj lo yajgga. Dxejc rájpní Jesús lo yajg iigwga:

— ¡Nuncru xcaj nicla tej ninejxh lojlu!

Dxejcti gubidzgajc yajgga.

<sup>20</sup> Cheni bahuii rexpejñpacni, bidxeloduxhreni, gunabdiidxreni loj Jesús:

— ¿Xhi cuent gubidzgajc yajgga?

<sup>21</sup> Rájpní Jesús lojreni:

— Rniliápac lojtu, palga chalilajzpacu, luxh ditu gun tio'p lajztu, xhet ganaxdi sa' cosre guntu, palga gábtu lo te dajn: “Gubicaj ro'c, gusuj galáii nisdoo”, si'c gacni.

<sup>22</sup> Guiraa ni guiniabtu loj Dios, palga chalilajzpacu, suniidxnini.

### *Xcäl'rnibee Jesús*

*(Mr. 11:27-33; Lc. 20:1-8)*

<sup>23</sup> Dxejcti biu' Jesús neŋ guidoro, dxejc laĵ ni caguluiini rebejn gubig reni rnibee loj rebixhojz nájza rebengool, gunabdiidxreni lojni:

—¿Xhi yälrnibee rajplu ni'cni rajc rujnlu recosre? ¿Chuni'c baniidx yälrnibeere lojlu?

<sup>24</sup> Badzu' Jesús diidxre lojreni rájpmi:

—Sigajcza narä gunä te yälgunabdiidx lojtu; palga sajz gudzu'tu diidxga loä, dxejc guiniä lojtu chuni'c baniidx yälrnibee te runä recosre.

<sup>25</sup> ¿Chuni'c gunibee gutiobnis Juan ni rutiobnis? ¿La Dios o la beŋ guedxliuj?

Dxejc gusloj cayäjp lo sa'reni, palga jie'tznu Dios gunibeeni, dxejc sinajni loonu, ¿xhicuten ditu nililajz xtiidxni?

<sup>26</sup> Palga jie'tznu bejn guedxliuj gunibeeni, dxejc sixa't rebejn yejcnu sa'csi guiraareni rililajzreni Juan najc te Dade' ni gunii xtidz Dios.

<sup>27</sup> Dxejc rájpmi loj Jesús:

—Dinu guidon.

Dxejc rájpmi Jesús lojreni:

—Sigajcza narä dina guiniä caro siääd yälrnibee te runä guiraa recosre.

### *Te dade' ni guyu' tio'p xi'nni*

<sup>28</sup> Jesús rájpmi lojreni:

—Guidon xho guichalootu diidxre. Te dade' guyu' tio'p xi'nni. Rájpmi loj xingangaloini: “Xi'nä, nadxej chayujnlu dzuun cadro care' uub.”

<sup>29</sup> Dxejc badzu' xi'nni diidx lojni, rájpmi: “Di rlazädi cha'a.” Luxh che gojl ste ra't, basiejch lajzni säätini sayujnni xtzun xtadni.

<sup>30</sup> Dxejc rájpmi dade'ga lo stee xi'nni: “Xi'nä, nadxej chayujnlu dzuun.” Dxejc badzu' xi'nni diidxre, rájpmi: “Mbaj, dad, sia'ä.” Luxh dini nij.

<sup>31</sup> Loj guiro'preni, ¿chuni'c bejn si'cni rlazj xtadni?

Dxejc rájpmi:

—Xingangalooni.

Dxejcti rájpmi Jesús lojreni:

—Rniliäpac lojtu, reni ruquijx guiraloj, nájza regunabdxab ganidreni jiu'reni lojtu loj xcälrnibee Dios,

<sup>32</sup> sa'csi Juan ni rutiobnis biädluini la'tu xho guibajntu, luxh ditu nililajz xtiidxni. Biädla reni ruquijx guiraloj, nájza regunadxab huililazduxhrene xtiidxni. Niluxh la'tu bahuiitu guiraa recosga, ditu nusiechlaiz te nililajztu xtiidxni.

### *Xcuent remosguidx*

(Mr. 12:1-12; Lc. 20:9-19)

<sup>33</sup> ¡Colcuadijg stee cuentre! Guyu' te dade' ni najc baxhuaan xten te renchro, gule'cni yaguub loj xyujni, bateedni bazaa guideb gabi yujga. Gudäänni te gueed te gujcní te tanc te chuchee nisuubga che rxii reuub. Bencheezani te yu' ni najc jiaaro te ro'c cue te ni fii guideb loj xyujni. Badedlaani yujga loj gaii bejn ni rujn dzuun, sä'tini te biaj zijtro.

<sup>34</sup> Che agojl guire' cose'ch baxhaĵ baxhuaanga gaii xmosni loj xyujni te chaxiireni cose'ch ni riäjĵ xca' baxhuaanga.

<sup>35</sup> Dxejc reni biannäj yujga gunaazreni remosre, gudijnreni tejni, bagu'treni steeni, bacuaareni guij yejc steeni.

<sup>36</sup> Dxejc baxhaĵsac baxhuaanga sgaii mos. Niluxh reni biannäj yujga sigajcza bennäjreni remosga.

<sup>37</sup> Dxejcti bejn baxhuaanga xhigab: “Maazru huen guxhaĵä xi'nä; sucuaadijgurení xtiidxni.”

<sup>38</sup> Cheni bahuiireni lo xi'n baxhuaan xten yujga, bejnreni xhigab: “Deeni jiannäj yujre; do'o guigu'tnuni te jiannäanu yujre.”

<sup>39</sup> Dxejcti gunaazrenini, guläärenini te laad, dxejc bagu'trenini.

<sup>40</sup> Dxejc gunabdiidx Jesús räjpni:

—Che jiääd baxhuaan xten yujga, çxhi gunnäjni rebejn nani biannäj xyujni?

<sup>41</sup> Dxejc räjpreni loj Jesús:

—Dini gulazlajz rebenguijdxga, sugu'tnireni, sudedlaani xyujni loj ste'ca bejn nani gudeed cose'ch ni riäjł xca'ni che gal guire' cose'chga.

<sup>42</sup> Dxejcti räjp Jesús lojreni:

—çLa gajdtu goł lo reguijtz nani bacuaa dade' nani gunii xtidx Dios galoo? Rediidxre caj ro'c:

Guij nani gulälaz reni runchee yu',  
cua' Dios lagajc guiija gudixhnini squiin yu',  
sajcruni loj guiraa reguij.

Dee bejn Gueb Dios, luxh rdxeloduxhnu dzunrore ni bejnii.

<sup>43</sup> 'Ni'cni rniä lojtu, sibicaj xcälrmibee Dios lojtu, sidejndi loj rebejn nani gudeed ni riäjł xca' xcälrmibee Dios, nalajznu renani chalilajzpac xtiidxni.

<sup>44</sup> Luxh xcuent guiija: nani jiajb lo guiija, silia'ni, per nani guitejb guiija yejçni, li siujyni, gacni däj.

<sup>45</sup> Che biejn diajg reni rnibee lo rebixhojz näjza refarisee recuent ni canii Jesús, gucbeereni cagusa'tni lagajc laareni.

<sup>46</sup> Rlajzreni niniaazrenini, per bidxejbreni rebejn sa'csi salilajz rebejn najc Jesús bejn ni rnii xtidx Dios.

## 22

### *Xcuent yäl'ruchnaa*

<sup>1</sup> Guslosac canii Jesús lojreni con recuent, räjpni:

<sup>2</sup> —Xcälrmibee Dios najc si'c te reii ni bejn te sa' te guchnaa xi'nni.

<sup>3</sup> Baxhalni rexmosni te saxiireni regolnejdx chääreni sa', niluxh rebejnre di rlajzdireni.

<sup>4</sup> Dxejc baxhalçacni rexmosni, räjpni: “Cołye'tz loj reni abidon, agujc comiid. jAbagutä balti gonsa'c, gonguro'! Anacchee guira'ti yälrajw. Cołtaa.”

<sup>5</sup> Niluxh reni abidonga di niu xtiidxreni. Tejni sahuüi rexyujni, steeni säa lo rexnegosni,

<sup>6</sup> dxejcti sgaii reni niajc biooz gunaazreni rexmos reii, basacsíreni remosga, sas bagu'trenini.

<sup>7</sup> Che biejn diajg reiiga, bidxe'chduxhni, baxhalni rexsoldaadni te sagu'treni guiraa rebenguijdxga, te saze'czareni guejdx cadre rbäjzreni.

<sup>8</sup> Dxejcti räjpni loj rexmosni: “Guiraa dee anacchee, di nungäjł jiäädru reni abidon.

<sup>9</sup> Cołchäj, pues, lo resquii lo nezyuj, cołcuejdx chutis bejn ni guidx-aagtistu.”

<sup>10</sup> Birii rexmosni, sääreni lo nezyuj. Dxejc bachagsa'reni guiraatis bejn ni bidxaagreni, reni najc beņguijdx sigajc reni najc beņhueen te gudxaj rolizj reiiga.

<sup>11</sup> 'Dxejc biu' reii biädhuiini loj rebiooz. Bahuiini loj te bejn ni sobga' ro'c, luxh xhet xhablanijdini najcwni.

<sup>12</sup> Dxejc räjp reii lojni: “Xamigwä, çxho bejnlu biu'lu ree luxh xhet xhablani-dilu najcwlu?” Dxitis sobga' bejnğa, xhet rniidini.

<sup>13</sup> Dxejc räjp reii loj rexmosni: “Colguliib ni'ni näjza naani, colsälni detzyu' cadro nacäy te ro'c gonduxhni chubejli reläjyni.”

<sup>14</sup> Sa'csi xhidajl najc reni bidon luxh guxii najc reni bibee.

*La sajc quiixni impuest*

(Mr. 12:13-17; Lc. 20:20-26)

<sup>15</sup> Dxejcti sii refarisee, bia'nreni diidx siguiilreni xho gunijt Jesús te diidx te guiga'ni.

<sup>16</sup> Ni'c baxhalreni gatii xpejnreni näjza gatii bejn ni nadxaag Herodes te räjpreni loj Jesús:

—Mastr, anajnnu rniilu ganax didxlii, ruluiizalu xtiidxpac Dios, luxh dilu jiu xhi rni bejn, sa'csi dilu cue bejn ni sajrcu lo stee bejn.

<sup>17</sup> Gunii loonu, pues: ¿La laaca najc quiixnu impuest lo César ni rnibee loonu o et laadi?

<sup>18</sup> Dxejc gucbee Jesús xhet laadi xhigab cayujnreni nen lastooreni, dxejc räjpni lojreni:

—iBenguidx! ¿Xhicuent rlanjtu guquiltu narä?

<sup>19</sup> Colguluii te meel laä.

Dxejc badeedreni te meel ni laa denario.

<sup>20</sup> Che bahui Jesús loj meelga, gunabdiidxni lojreni, räjpni:

—¿Chuni'c caj lo meelre?

<sup>21</sup> Dxejc räjpreni:

—Loj César.

Dxejc räjp Jesús lojreni:

—Colgudeed lo César ni riäj xca' César, colgudeedza lo Dios ni riäj xca' Dios.

<sup>22</sup> Che biejn diajgreni rediidxre, bidxeloduxhreni. Dxejc basaanrenini, sä'tireni.

*Canabdiidxreni xho gac che guibañsac rebejn*

(Mr. 12:18-27; Lc. 20:27-40)

<sup>23</sup> Lagajc dxejga bidzujn gatii reni laa saducee, reni di chalilajz sibañsac bejn loj rebengut. Gubigreni loj Jesús, gunabdiidxreni,

<sup>24</sup> räjpreni:

—Mastr, si'c naj to Moisés, palga yu' te bejn ni abachnaa, luxh ruti xi'nni che guetni, riäj guchnaa bejtzni biuudga te chu xi'nreni xcuent bejtzni.

<sup>25</sup> Mbaj. Loonu yu' gajdz niguii ni najc bejtz sa'reni. Betzgoolga bachnaa, dxejc gujtni, luxh di xi'nni niu'. Basa'nni chäälni lo bejtzni.

<sup>26</sup> Sigajcza gusajc ni ro'p bejtzni; sigajcza gusajc ni riojn bejtzni. Si'c huinuu gujc che basa'li guigajdz bejtzga.

<sup>27</sup> Sas che gujt guiraareni, näjza gunaaga gujt.

<sup>28</sup> Che guibañsac rebejnga lo rebengut, ¿chu tej lo rebejtzga gac chäälpac gunaaga, ni guiraareni bachnaareni gunaaga?

<sup>29</sup> Dxejcti badzu' Jesús diidxre lojreni, räjpni:

—Et laadi rujntu xhigab sa'csi ditu gacbee xtidx Dios niclaza xcuent xcälrnibee Dios.

<sup>30</sup> Ni che guibajn rebengut, diru yäl'ruchnaa chu, diruza bejn gudeed rexindxa'preni guchnaa. Dxejc sajcreni si'c rexangl Dios ni yu' xhaguibaa.

<sup>31</sup> Dxejc xcuent yäl'rbañsac loj rebengut, ¿la gajdtu goļ reguijtz ni bacuaa to Moisés che räjp Dios xcuent retoxtadgoldoonu:

<sup>32</sup> “Narä nacä Xtios Abram, Xtios Isaac, näjza Xtios Jacob”, ä? Dios di gac Xtios bengut, Xtioistis rebejn ni nabajn najcni.

<sup>33</sup> Che biejn diajg rebejn xtidx Jesús, bidxeloduxhrene diidx ni ruluiini.

*Diidx ni maazru sajc*

*(Mr. 12:28-34)*

<sup>34</sup> Che gucbee refarisee basäu Jesús ro' resaducee, bidojpreni, bachaagreni diidx.

<sup>35</sup> Dxejc tejreni nani najn leii, rlanjzni guquuilni Jesús ni'c gunabdiidxni lojni räjpni:

<sup>36</sup> —Mastr, ¿xhi diidx ni gunibee Dios sajcrú lojreni caj lo leii?

<sup>37</sup> Räjp Jesús lojreni:

—Nani rnii scree: “Huinälajz Dad Xtioslu guideb lastoolu, guideb xaimlu, näjza guidebgajc xcäriejnlu.”

<sup>38</sup> Diidxre ni gunibee Dios najc ni sajcrú, luxh ganidni siädni loj rextidx Dios.

<sup>39</sup> Ni ro'p'ga sigajcza najcni: “Huinälajz resa'lu sigajc ni sanälajzlu lagajc luj.”

<sup>40</sup> Guiro'p remandamientre nanab te guzoob bejn guiraa rediidx ni bacuaa to Moisés näjza ni bacuaa redade' nani gunii xtidx Dios.

*¿Chu xi'n najc Crist?*

*(Mr. 12:35-37; Lc. 20:41-44)*

<sup>41</sup> Lałni tre' refarisee, gunabdiidx Jesús lojreni, räjpni:

<sup>42</sup> —¿Xhi rujntu xhigab xcuent Crist? ¿Chu xi'n najcni?

Räjpreni lojni:

—Laani najc xajg to David.

<sup>43</sup> Räjp Jesús lojreni:

—¿Xhicuent räjp David “Xtadä” lojni che basanij Sprit Dxañ xten Dios lastooni? Ni'c bacuaa to David rediidxre:

<sup>44</sup> Dad Dios räjp lo Xtadä,

gurej xladbeä lał ni gudzugä guiraa reni rdxe'ch lojlu ladzni'lu.

<sup>45</sup> Palga lagajc David rnii: “Dad” lojni, ¿xho mood najcni xi'nni?

<sup>46</sup> Dxejc rut gujcdi badzu' nicla te diidx lojni, luxh dxejlga rutru gojpdí xhi diidx niniabdiidxrueni lojni.

## 23

*Rucuaquij Jesús refarisee näjza rebejn nani najn leii*

*(Mr. 12:38-40; Lc. 11:37-54; 20:45-47)*

<sup>1</sup> Dxejc räjp Jesús loj reben xhidaalga näjza loj rexpejn pacni:

<sup>2</sup> —Rebejn ni najn leii näjza refarisee rajp yäl'najn te gusule'reni xleii Moisés.

<sup>3</sup> Ni'cni colguzoob guiraa rextiidxreni, na'c guntu sa' recos ni rujnreni, sa'csi laareni rniireni xhini'c guntu, dxejcti lagajc laareni direni gun ni rnibeereni guntu.

<sup>4</sup> Rnibeereni gun rebejn cos naganduxh ni najc si'c te cargw naduxh ni di gac guu bejn, per laareni nicla con te bicuenaareni direni gusniibni.

<sup>5</sup> Guiraa recos ni rujnreni, rujnrenini te fiitis rebejn. Rchaglajzreni rcaj lo cuajsreni näjza roxhajgwreni recaje' cadre yu' tla' guitz ni caj xtidx Dios lojni. Rustioolzarení xi' xhajbreni.

<sup>6</sup> Rlajzreni ganidreni tedreni lo mex che gal te lanij; rlanjzreni cuereni lo rebancw ni suga' delant nen reguidobáz.

<sup>7</sup> Sigajcza rlanjzreni guchagro' bejn naareni nez lo guii, guiniiza rebejn “Mastr” lojreni.

8 'Na'c gusaantu guinii rebejn "Mastr" lojtu, sa'csi tejtisni yu' ni najc Mastr, laani najc Crist. Peta la'tu guiraatu najctu tejsi sa'tu.

9 Na'c guiniitu "Xtadä" loj te bejn guedxliuj sa'csi yu' tejtis ni najc Xtadtu, ni'c najc Dios ni yu' xhaguibaa.

10 Na'cza gusaantu guiniireni lojtu "Mastr" sa'csi yu' tejtis Mastr, ni'c najc Crist.

11 Ni yu' si'c mos lojtu ni'c najc bejroru loj resa'ni.

12 Sa'csi chutis ni rchaloni najcni bejro lo sa'ni, ni'c sustuiyä lojni, chutis ni najc nadolajz loj Dios, ni'c sunäni bejro lo sa'ni.

13 'iProobzatu remastr xten leii näjzatu refarisee, najctu bejnguidx! Sa'csi rudxojujtu jiu' rebejn loj xcälrnibee Dios. Lagajc la'tu ditu jiu' luxh dizatu gusaan jiu' rebejn ni rlanj jiu'.

14 'iProobzatu remastr xten leii näjzatu refarisee, najctu bejnguidx! Sa'csi rudzuecaju rolijz renanbiuud lajsi cabedx canabduxhtu lo Dios, naatu gusueetu bejn si'c. Sa'csi rujntu scree, siabduxh fis xten Dios yejctu.

15 'iProobzatu remastr xten leii näjzatu refarisee, najctu bejnguidx! Zijt rijtu lo reneyuj näjza lo nisdoo te guntu gaan guchaa mase tejtis bejn xmoodni te ganäni Dios si'c rajntuni. Luxh che ahuililajz bejnga xtiidxtu, rujntuni tio'p huält maazru te xi'n gabijl loj ni najctu.

16 'iProobzatu, najctu si'c lotiä'p, rlanjtu guluiitu nezyuj! La'tu ni rni palga te bejn guiniliipac xtiidxni guzä'tni guidoro, xhet sajcdi xtiidxni. Palga guiniliipacni guzä'tni oor ni yu' nejn guidoo, dxejc sii rniliini dxejc nungäjl guzoobni xtiidxni.

17 jBejn nayääl, bejlotiä'p! ¿Xhini'c sajcru? ¿La oor la guidoro ni rundxan oorga?

18 Rniizatu: "Palga te bejn guiniliipacni guzä'tni lo bacuug ni yu' nejn guidoro, di xcuenti xtiidxni. Luxh palga yu' chu guiniliipac guzä'tni gojn ni dzuub lo bacuug, dxejc sii rniliipacni dxejc nungäjl gusoobni xtiidxni."

19 jBejn nayääl, bej lotiä'p! ¿Xhini'c sajcru? ¿La gojn o la bacuug nani rundxan gojnga, ä?

20 Nani ruzä't lo bacuug che rniliipacni, et ganaxdi lo bacuug ruzä'tni, näjza guiraa ni tre' lo bacuug ruzä'tni.

21 Ni ruzä't guidoro che rniliipacni, et ganaxdi guidoro ruzä'tni, näjza Dios ni rbäzza nejn guidoro ruzä'tni.

22 Sigajcza ni ruzä't guibaa che rniliipacni caguzä'tzani yagxhiltro xten Dios näjza lagajc Dios ni sobga' ro'c.

23 'iProobzatu remastr xten leii näjzatu refarisee, najctu bejnguidx! Bedxtil, anis näjza comin ni rajptu, rudeedtu lo Dios tej tantga yejc cade te tzuu, niluxh ditu jiu' ni sajcru lo xtidx Dios, cadro caj xcuent yälnabanya, yälrulazlajz, näjza yälrililajz. Deeza ni riäjlpac guntu la'l ni cayujnzatu steega.

24 jLa'tu, lotiä'p ni rlanj guluu nezyuj! Riutu rediidx ni guxii saj, niluxh rediidx ni sacduxh ditu jiu'ni, najctu si'c bejn ni rbää te rex lo xpla'tni dxejcru räjmni te cameii.

25 'iProobzatu remastr xten leii näjzatu refarisee, najctu bejnguidx! Rusiatu detz bas näjza pla't luxh nejni najc-dxuudx. Sigajcza la'tu riuduxhtu recostumbr, luxh lastootu guidxa yälgubaa näjza yälrde'chljaz.

26 Farisee ni najc lotiä'p: gudibxgaa nejn bas näjza nejn pla't, dxejc näj dejtznij sajc naya.

<sup>27</sup> ¡Proobzatu remastr xten leii nájzatu refarisee, najctu benguijdx!, sa'csi najctu si'c rebaa ni nacchesa'c; nolbájreni, saru rluuini, luxh nenreni guidxa dzujt xte bengut nájza bályudx.

<sup>28</sup> Sigajca najctu la'tu. Saru rujn lojtu, rchalo rebejn najctu bensa'c, niluxh lastootu guidxa yálrusguee nájza yálguyalajz.

<sup>29</sup> ¡Proobzatu remastr xten leii nájza refarisee, najctu benguijdx! Runcheetu xpaa redade' ni gunii xtidx Dios galoo, rusucheezatu ro' xpaa rebejn ni gujc bensa'c,

<sup>30</sup> dxejc rniitu: “Paru nibajnnu nen redxej ni gubajn retoxtadgoldoону dinu niacnáj reni bagu't redade' ni gunii xtidx Dios.”

<sup>31</sup> Lagajc con rediidxre rcájptu najctu rexajg renani bagu't redade' nani gunii xtidx Dios.

<sup>32</sup> ¡Colguscuááz guntu sa' recos ni guláxtiej retoxtadgoldootu!

<sup>33</sup> ¡La'tu ni najc si'c bál, la'tu ni najc si'c te bitiááz guidxa bálnialajz! ¿Xho guntu te na'c cháātu gabijl par tejpas?

<sup>34</sup> Ni'cni, guxhalä rexpənä ni guinii xtidxä, nájza bennajn, nájza maestr. Luxh yu'reni sugu'ttu sucuaatireni lo cruzj; yu'zarení siguijntu nen reguidobáz, sirinajltureni guejdx por guejdx.

<sup>35</sup> Si'cza yejctu jiajb xtiejn guiraa rebennadolajz ni bagu't bejn xchejli toAbel ni gujc nadolajz, xchejliza Zacarias, xi'n Berequias, ni bagu'ttu nen guidoro gajxh lo bacuug.

<sup>36</sup> Rniliäpac lojtu, dojl xten guiraa recosga siajb yejc rebejn ni tre' lo guedxliuj naj.

### *Jesús biin xcuent guedx Jerusalén*

*(Lc. 13:34-35)*

<sup>37</sup> Rájpa Jesús:

—¡Jerusalén, Jerusalén! Xpejnlu rugu't redade' ni rniit xtidx Dios, ru-cuaazareni guij yejc rebejn ni ruxhal Dios te gusule'reni xtiidxni lojtu. ¡Balti huält rlazä nutie'ä la'tu si'cni rutie' guidco'c rexquidbázni nen xhigani, per ditu nicäjb!

<sup>38</sup> Colhunii xho jianxteb xquidootu cuälazrenini.

<sup>39</sup> Rnixgaä lojtu, naj dirutu fii loä, dxejli che guiniitu: “Benle' Dios nani siääd xcuentni.”

## 24

### *Jesús räjp sibijl guidoro*

*(Mr. 13:1-2; Lc. 21:5-6)*

<sup>1</sup> Birii Jesús nen guidoro te asiini, dxejc gubig rexpeljnpacni lojni, gusloj caguluireni reyuduxhga lojni.

<sup>2</sup> Dxejc räjp Jesús lojreni:

—¿La ruhuiitu guiraa reyu're? Rniliäpac nicla te guij di jia'n yejc sa'ni ree; guiragajc reyu're sibijl.

### *Cos ni guluiloj gac fis*

*(Mr. 13:3-23; Lc. 21:7-24; 17:22-24)*

<sup>3</sup> Dxejcti huijreni yejc te dajn ni laa Oliib. Che gurej Jesús ro'c, biääd rexpeljnpacni lojni te xhiga'tz gunabdiidxreni lojni:

—Rlaaznu guiniilu loonu guc gac guiraa recosre. ¿Xhi seen guluiloj ameer jiaädlu nájza che ameer nitloj guedxliuj?

<sup>4</sup> Dxejc räjp Jesús lojreni:

—¡Colnatiro te rut gusgeedi la'tu!



<sup>5</sup> Sa'csi su' xhidajl reni jiaäd, naareni: “Narä nacä Crist”, luxh susgueereni xhidajl bejn.

<sup>6</sup> Siejn diajgtu xcuent cadro cayajc guer, näjza xcuent cadro rlajz chu guer, na'c guidxejbtu sa'csi si'c nungäjl gac, niluxh gajd galädi nitloj guedxliuj.

<sup>7</sup> Sa'csi siäjs te naciön sidilnäjni stee naciön; te yälrnibee sujn guer con stee yälrnibee, luxh su' gubijn, su' yälgujdx, su'za xuduxh xhidajl lajt.

<sup>8</sup> Luxh guiraa redee cuäxtiejtis retrabajwduxh ni churu chu.

<sup>9</sup> 'Dxejc guteedreni la'tu ladznaa rebeñdojl te gusacsireni la'tu, te gugu'tzareni la'tu, luxh guiraa rebejn sidxe'ch lojtu sa'csi sanälajztu narä.

<sup>10</sup> Nen redxejga, xhidajlreni sibälaz xcälirililajzreni, sidxe'ch lo sa'reni, suto' sa'reni lo sa'reni.

<sup>11</sup> Dxejc siricaj xhidajl bejn ni rusguee, gäbreni xcuent Dios rniireni, luxh susgueereni xhidajl bejn.

<sup>12</sup> Sa'csi lacti suduxh yäl'latsaj lo guedxliuj, diru bejn chanälajz sa'ni.

<sup>13</sup> Dxejcti bejn ni chasanäj xnezyujtis Dios, ni'c sun gaan xca'ni yäl'nabajn par tejpas.

<sup>14</sup> Luxh sisiule' xtidx Dios guideb lo guedxliuj te gacbee guiraa rebeñ guedxliuj xtiidxni; dxejcru jiaäd fis xten Dios.

<sup>15</sup> 'Cheni fiitu asobga' te beñguidxduxh neñ yu' ni najc dxan neñ guidoro, si'cni gunixgaa toDaniel ni gunii xtidx Dios gacni, bejn ni goädee sugacbeeni nani roäni,

<sup>16</sup> dxejc renani rbäjz lo guedx Judea, suguxunreni gucuatxlojreni neñ dajn.

<sup>17</sup> Bejn ni niä'p yejc xyu'ni dxejga di galädi jiaätjni te chalääni xhixtenni neñ xyu'ni;

<sup>18</sup> bejn nani cayujn dzuun lo niaa, na'c guibi'ni niclaza chaxhiini xhajbni.

<sup>19</sup> iProobza regunaa ni nuxi'n, näjza reni cagusiä' báz neñ redxejga!

<sup>20</sup> Colnabduxh loj Dios xhet nendi redxej ni cayacnalduxhdi nanab guxunditu, niclaza dxej che rusilajz bejn.

<sup>21</sup> Sa'csi su' trabajwduxh neñ redxejga, sa' ni gajd bejn fii dxejli ni guzobloj guedxliuj, luxh che tedni, diru guibi' chuni.

<sup>22</sup> Luxh palga di Dios gutiu' yejc redxejga, nicla tej bejn di laa. Luxh sutiuj Dios yejc redxejga sa'csi rinälajzni reni aguleni.

<sup>23</sup> 'Neñ redxejga palga yu' chu naa lojtu: “Colhunii, aree Crist”, o “Colhunii ani arec”, na'c chalilajztuni.

<sup>24</sup> Siääd xhidajl niguii ni rusguee, gäbreni najcreni crist; sidzujnza rebejn ni rusguee ni gäb xtiidxpac Dios rusule'reni; luxh sujnreni remilagwr sujnzareni senro, parsi susgueereni, susgueduxhrenei rebejn, niluxh rlajzreni gusguezareni rebejn ni agule Dios, ni rililajz xtiidxni.

<sup>25</sup> Agunixgää lojtu xhini'c gac.

<sup>26</sup> Ni'cni palga naareni lojtu: “Bahuii, a crist yu' nez lo reyubijdz”, na'c chäätu; o palga naareni: “A crist suga' neñ yu're”, na'c chalilajztuneni.

<sup>27</sup> Sa'csi si'cni guideb xhaguibaa rien che rdinya' ladjjaa näjza ladjiätli, si'cza suhuiitu loä, Xi'n Dios ni gujc Niguii, cheni jiaäsacä lo guedxliuj.

<sup>28</sup> Ni najntu cadro naga' te mangut, ro'c re' regolbetz.

*Cheni jiaäsac Xi'n Dios ni gujc Niguii*

*(Mr. 13:24-37; Lc. 21:25-33; 17:26-30, 34-36)*

<sup>29</sup> Räjpzani:

—Cuantsi ted guiraa retrabajwduxh, sicäy lo gubijdx, diruza bäii gusanij, sitejba rebajl ni yu' xhaguibaa, sinibduxhza guideb xhaguibaa.

<sup>30</sup> Dxejcti suhuiireni xhaguibaa seen xten Xi'n Dios ni gujc Niguui, luxh guiraa rebejn ni rbäjz nen guiraa reguejdx lo guedxliujre, sonduxhrenei suhuiireni siäd Xi'n Niguui lo reza xhaguibaali. Siädäni con yälrnibee näjza yälrdimbichaduxh.

<sup>31</sup> Dxejc suxhalni rexanglni con te trompet ni guscuedxa'reni dipduxh te guire' guiraa rebejn ni aguleni lo guidajp lajd squiin guedxliuj, guideb lo guedxliuj näjza xhaguibaa.

<sup>32</sup> 'jColguiseed ni ruluii yajg iigw! Che naren reñaani che cabääni be'n, asiädäi bäi curex,

<sup>33</sup> sigajcza cheni fiitu cayajc guiraa recosre, sacbeetu asiädgajxh fis, rolä'li abidzujñni.

<sup>34</sup> Rniliäpac lojtu, guiraa redee sajclal ni nabajñ gatii rebejn ni suga' ree naj.

<sup>35</sup> Guibaa näjza guedxliuj sinitloj, niluxh xtidxä di nitloj.

<sup>36</sup> 'Rut najndi xhi dxej, xhior gacni, nicla rexangl Dios, niclaza Xi'n Dios; Dad Diostis najn.

<sup>37</sup> 'Sigajcni gujc nen redxej che gubajñ toNoé, si'cza gac che jiälä Xi'n Dios ni gujc Niguui.

<sup>38</sup> Nen redxe galoo, cheni gajd nisguiduxhga jiajb, rebejn ni nabajñ dxejc cayajwreni, cayä'reni, caguchñaareni, cagudeedza bejn xindxa'preni guchña, dxejli cheni biu' Noé nen barcwro.

<sup>39</sup> Direni niacbee xtiidxn; cheni biädli nisguiduxh ni sanä guiraareni dxejrcu gucbeereni. Sigajcza gacni che jiälsacä narä Xi'n Dios ni gujc Niguui.

<sup>40</sup> Nen redxejga palga cayujñ tio'p bejn dzuun lo niaa tejni guibee, steeni sia'n.

<sup>41</sup> Palga cayo't tio'p gunaa xobniil, tejni guibee, steeni sia'n.

<sup>42</sup> 'Ni'cni colsusin, sa'csi ditu gan xhi dxej jiädä Dad xtentu.

<sup>43</sup> Colganchee, paru niacbee baxhuan xten yu' cor yääl niäd gubaan ni siädlan rolijzni, nisiusiñni dxejc, dini nusaan niu'ni rolijzni te cuanni.

<sup>44</sup> 'Ni'cni colsusinza la'tu, sa'csi siäd Xi'n Dios ni gujc Niguui lagajc or ni ditu gun xhigab jiädäni.

### *Xcuent te mossac näjza te mosguijdx*

*(Lc. 12:41-48)*

<sup>45</sup> '¿Chuni'c najc mossac ni ruzoob diidx, ni basannäj xlamni rebejn ni yu' rolijzni te gudeedni xhi gaureni ä?

<sup>46</sup> Chichaa mos ni saru cayujñ tzuunni che guidzujñ xlamni.

<sup>47</sup> Rniliäpac lojtu, lamga susa'nni sa' mosga te fiini guiraa xhixtenni.

<sup>48</sup> Dxejc palga mosga di gusoob xtidx xlamni, gunni xhigab: "Sacladuxh guibi' xlamä",

<sup>49</sup> dxejc gisloj cagusacsíni resamosni, guislojni gaunäjni, yänäjni rebengu.

<sup>50</sup> Dxejc sidzujñ xlamni dxej che dini gun xhigab jiädäni, luxh or ni dini gan guidzujñni.

<sup>51</sup> Dxejc siguinduxhni mosguijdxga, surilaagwnini te guidxagsa'ni sabenguixdxi, dxejc sonduxhni, chubejli reläjyni.

## 25

### *Xcuent tzuu gunaa*

<sup>1</sup> Räjpa Jesús:

—Pues xcälrnibee Dios najc si'c tzuu gunadxa'p nani cua' xcandilse'treni te huijreni te sa'.

<sup>2</sup> Gaii regunaaga nasin, sgaireni nayääl.

<sup>3</sup> Reni nayäälga sanäreni xcandilreni, niluxh direni nica' sijn se't.

<sup>4</sup> Niluxh reni nasinga sanäreni sijn se't te guze'creni neñ xcandilreni.

<sup>5</sup> Sa'csi bi'nga di nidzujungaj, gunaaz bacal regunadxap'ga, gudiejstireni.

<sup>6</sup> Dxejc si'cti garol yääl, biejn te xse' ni räjp: "Bi'n asiääd, colchäj, colchachaglojni."

<sup>7</sup> Guiraa regunaare huistieguxuñreni, dxejc buisa'creni xcandilreni, te cuaguñreni.

<sup>8</sup> Dxejc guigaii regunayääl räjpreni loj reni nasin: "Colgunidxlaa te bo'c se't gusanijnxu xcandilnu, sa'csi arlajzni jiuini."

<sup>9</sup> Dxejcti regunanasin räjp lojreni: "Digacdini, dxejc dini gal nicla par nuurnu nicla par la'tu. Colchäj cadro ruto'reni se't colchazii xse'ttu."

<sup>10</sup> Lałni sasiu guigaii regunaa-nayäälga se't, bidzujñ bi'n. Regunaa-sin ni cabäjz bi'n biunäjrenini lo sa', biäuti ro lä'.

<sup>11</sup> Cheni bidzujñ regunanayäälga, räjpreni: "Dad, Dad, baxhal ro lä'."

<sup>12</sup> Dxejc räjpni lojreni: "Rniliäpac lojtu, dina gumbeätu."

<sup>13</sup> Dxejc Jesús räjp lojreni:

—Colsusinza, sa'csi ditu gan nicla xhi dxej nicla xhi or siääd Xi'n Dios ni gujc Niguii.

### *Xcuent lam ni badeed meel*

<sup>14</sup> Xcälrnibee Dios xhaguibaa najc si'c te bejn ni agojl guirii chääni zijt te bij. Gurejdxni rexmosni, badeedni meel lojreni.

<sup>15</sup> Lo tejni badeedni si'cti gaii miel meel, lo steeni badeedni si'cti tio'p miel, dxejc steeni cua' te miel. Loj tejnani badeedni si'cti ni rujnni xhigab sajç gunnäjreni dzuun, dxejcti biriini xpiajni.

<sup>16</sup> Ni cua' gaii miel meel bejn te dzunro, bejnni gaan sgaii miel meel.

<sup>17</sup> Sigajcza ni cua' tio'p miel meel, bejnni gaan stio'p miel.

<sup>18</sup> Dxejcti ni cua' te miel meel, huicua'tzni xmeel xlamni neñ te gueed ni gudäänni lo yuj.

<sup>19</sup> 'Gudejdti balti bäii, dxejc gubi' xlam remosga, bejnni cuent loj guiraareni.

<sup>20</sup> Che bidzujñ ni cua' gaii miel meel, bidzunnäjni sgaii miel meel ni bejnni gaan, räjpni loj xlamni: "Dad, baniidx guejblu gaii miel loä. Aree sgaii miel meel ni benä gaan."

<sup>21</sup> Räjp xlamni lojni dxejc: "Hueenca, mos hueen najclu, rusoobzalu xtidxä. Sa'csi gujclu bensa'c con te cos bäs, naj sunidxä guinibeelu xhiroobru. Biu' loä, bibalaznäj narä."

<sup>22</sup> Che bidzujñni ni cua' tio'p miel meelga, räjpni loj xlamni: "Baniidx guejblu tio'p miel meel loä, aree stio'p miel meel ni benä gaan."

<sup>23</sup> Räjp xlamni lojni: "Mbaj. Mos hueen najclu rusoobzalu diidx. Sa'csi gujclu bensa'c con te cosbäs, naj sunidxä guinibeelu xhiroobru. Biu' loä, bibalaznäj narä."

<sup>24</sup> Che bidzujñ mos ni cua' te miel meel, räjpni lo xlamni: "Dad, ananä najclu te bejn ni di gulazlajz; rca'lu cose'ch cadro dilu nibe'c binij, rutojpszalu cadro dilu nutie'ch binij.

<sup>25</sup> Ni'cni bidxebä, huicua'tzä xmeellu neñ yuj. Niluxh axh aree xmeellu."

<sup>26</sup> Dxejc räjp xlamni lojni: "¡Mos guijdx, mos ploj! Najnlu rca'ä cose'ch cadro dina nibe'cä binij, rutopä cadro dina nutie'chä binij.

<sup>27</sup> Riäjñ nisa'nlu xmelä neñ te bancw te che nibi'ä nicasacä xmelä con xi'nni ni nujni gaan."

<sup>28</sup> Dxejc räjpni loj reni suga' ro'c: "Colgudzucaj te miġ meel ni ca'ni colgudeedni loj ni rajp tzuu miġ meel.

<sup>29</sup> Sa'csi loj ni rajp sudedäru, niluxh ni xhet rajpdi sudzucaä tudxe'n nani rajpni."

<sup>30</sup> Dxejc räjpni: "Colca' mosre ni xhet sajcdi, colguzäġni lo yälñacäjy, cadro chu yälñonduxh, näjza yälñajw reläjy bejn."

### *Yälğuxhtis xten reguejdx*

<sup>31</sup> 'Che jädśac Xi'n Dios ni gujc Niguui con yälrdimbicha' xtenni, siädñäni rexangl Dios. Dxejc sibejni lo tron ni rdimbicha' xtenni te guinibeeni.

<sup>32</sup> Sa'csidej sidojpp nez lojni guiraa reben guedxliuj. Dxejc sibeni lojreni, silia'ni sa'reni si'c rujn te baxtoor cheni rbeni rexiil loj redxib, te rlia'reni loj sa'reni.

<sup>33</sup> Suzujni rexiil xladbeeni dxejc redxib xladbäjgwni.

<sup>34</sup> Dxejc säjb reii loj reni suga' xladbeeni: "Coltaa, la'tu ni benle' Xtaä. Coljiu' lo yälñabee ni guc-chee cheni guzoblojli guedxliuj.

<sup>35</sup> Sa'csi che calanä la'tu baniidx xhi gudaü, che cayolä, la'tu baniidx xhi gu'a. Che cuanzaä si'c te benzijt, la'tu banidxlaatu cadro bia'nä.

<sup>36</sup> Che xheti xhabä, la'tu baniidxni, che gucxhuä, la'tu biädhuiitu narä, che guyu'ä neñ latzguuib, biädhuiitu narä."

<sup>37</sup> Dxejc sinii reni suga' xladbeeni, säjbreni: "Dad, ħguc bahuiinu gulaanlu, baniidxnu xhi gudajwlu? ħGuc bahuiinu cayojllu, baniidxnu xhi gu'lu?"

<sup>38</sup> ħGuc bahuiinu najclu si'c te benzijt, baniidxnu cadro bianlaalu, o biädädx xhajblu, baniidxnu xhi gojtlu?"

<sup>39</sup> O ħguc bahuiinu cayacxhuulu, o yu'lu neñ latzguuib, biophuiinu lojlu?"

<sup>40</sup> Dxejc reiiga säjb lojreni: "Rniliäpac lojtu, xhitis xhi bejntu loj te rexpenä ni rniü xtidxä mase proobreni, lagajc loä bejntu recosga."

<sup>41</sup> 'Dxejc säjppzani loj reni suga' ladbäjgwni: "Colguibicaj loä, benguijdx, colchäj lo balduxh ni cayejc par tejpas ni cayejc par benđxab ni rnübee näjza rexpenđxabni.

<sup>42</sup> Sa'csi gulanä, luxh ditu nuniidx xhi niaü; biolä, per ditu nuniidx xhi niä'ä;

<sup>43</sup> cuanzaä si'c te benzijt, luxh ditu nunidxlaa cadro nia'nä, biädxza xhabä, niluxh ditu nuniidx xhi niacwä; gucxhuä, guyu'äza neñ latzguuib, niluxh ditu niädhuii loä."

<sup>44</sup> Dxejc laareni säjbreni: "Dad, ħguc bihuiinu calaanlu, o cayojllu, o canzajlu si'c te benzijt, o cayäädx xhajblu, o cayacxhuulu, o yu'lu neñ latzguuib, luxh dinu niacnäjlu?"

<sup>45</sup> Dxejc säjb reiiga lojreni: "Rniliäpac lojtu, loj xhitis ni ditu niacnäj rebejn ni rililajx xtidxä, mase proobreni naräni ditu niacnäj."

<sup>46</sup> Dxejcti sij rebejnre lo yälñusacsí par tejpas, per rebejn ni nadolajx, ni agule Dios, sijreni lo xcälñabajñ Dios par tejpas.

## 26

### *Bejnreni xhigab xho guiniaazreni Jesús*

(Mr. 14:1-2; Lc. 22:1-2; Jn. 11:45-53)

<sup>1</sup> Che gulujx gunii Jesús rediidxre, räjpni loj rexpejn pacni:

<sup>2</sup> —Anajntu stio'p dxejctis cayäädx gac lanij ni laa pascw. Luxh suteedreni narä, Xi'n Niguui ladznäa reni gucuua narä lo crujx.

<sup>3</sup> Dxejc bidojpe rebejn ni rnibee rebixhojz, nájza remastr xten leii, nájza rebeḡgool lo rexpejn Israel. Lo xle' Caifás, ni rnibee loj rebixhojz, bidojpreni.

<sup>4</sup> Ro'c bachaagreni diidx xho guiniaazreni Jesús con yálrusguee, te ju'trenini.

<sup>5</sup> Luxh rájpreni lo sa'reni:

—Na'c jiennuni neḡ redxe lanij, te di gun rebejn bieiduxh.

*Te gunaa ni biädnä perfum*

(Mr. 14:3-9; Jn. 12:1-8)

<sup>6</sup> Che yu' Jesús guedx Betania, rolijz Simón te bejn ni basiajcní che ral tiejxhni,

<sup>7</sup> ro'c gubig te gunaa lojni, ca'ni te vasguij ni laa onix, guidxani te perfum ni sajc melro. Che sobga' Jesús lo mex, bachajni perfum yejc Jesús.

<sup>8</sup> Che bahuii rexpejn pacni xhi cayujni, bidxe'chreni, gusloj cayäjpreni:

—¿Xhicient casáxlía'ni perfumga?

<sup>9</sup> Perfumre niajc nido'ni, nirii xhidajl meel lojni te niacnájni rebeḡproob.

<sup>10</sup> Biejn diajg Jesús xhi caniireni, dxejc rájpreni lojreni:

—¿Xhicient cadxe'chnájtu gunaaare? Ni te coshúeen najc dee nani bejnni loä.

<sup>11</sup> Ni guirasi dxej su' rebejn ni xhet rajpdi lojtu, peta narä guxii dxej su'ä lojtu.

<sup>12</sup> Nani bejn gunaaare che bachajni perfumre guideb lagaa tiexhä, najcni par guzucheeni narä te guiga'tzá.

<sup>13</sup> Rniliäpac lojtu, cadrotis gusule'reni xtidxä lo guideb guedxliuj, sujyreni diidx xcuent ni bennäj gunaaare narä, te guinaj lajzreni gunaaare.

*Judas bato' Jesús*

(Mr. 14:10-11; Lc. 22:3-6)

<sup>14</sup> Dxejc lo retzubitio'p rexpenpac Jesús birii tej ni laa Judas Iscariote, huininäjni rebejn ni rnibee loj rebixhojz,

<sup>15</sup> rájpreni:

—¿Lac guniidxtu loä te gutedä Jesús ladznaatu?

Dxejc badeedreni galbitzúu melpla't lojni.

<sup>16</sup> Dxjecli caguuil Judas xho gutedni Jesús lojreni.

*Lult xchej xten Jesús*

(Mr. 14:12-25; Lc. 22:7-23; Jn. 13:21-30; 1Co. 11:23-26)

<sup>17</sup> Primer dxej lanij, dxej ni rajwreni yätxtiil ni di saguij, gubig rexpejn pacni loj Jesús, rájpreni lojni:

—¿Caro ríajzlu chozucheenu te gaulu xchej xten lanipascw?

<sup>18</sup> Dxejc rájpreni lojreni:

—Colcháj lo guejdx rolijz te dade', colye'tz lojni: “Si'c naj Dad mastr: Asiäddzún gajx xo'ni, ni'cni rolijzlu gaunäjni rexpejn ni xchej lanipascw.”

<sup>19</sup> Bejnti rexpejn pacni si'cni gunibee Jesús gac, bazucheereni xchej xten pascw.

<sup>20</sup> Che biu' guxhijñ, sobga' Jesús lo mex con retzubitio'p xpejn pacni.

<sup>21</sup> Lał ni cayajwreni rájpreni lojreni:

—Rniliä lojtu, yu' tejtú ni guto' narä.

<sup>22</sup> Dxejc guc-huinduxh lajzreni, rájpreni lojni:

—Dad, ¿andi naráni?

<sup>23</sup> Dxejcti rájpreni Jesús lojreni:

—Ni gaunäj narä neḡ tejtis pla't, laa ni'cni guto' narä.

<sup>24</sup> Xi'n Dios ni gujc Niguui sajc si'ctis ni caj loj guiitz xten Dios, per gunatiro bejn ni guto'ni. Huenru na'c niajl bejnga.

<sup>25</sup> Dxejcti gunii Judas, ni caguto' Jesús, räjpni:

—Mastr, ¿andi naräni?

Jesús räjp lojni:

—O'n, lujni.

<sup>26</sup> Lał ni sobga'reni cayajwreni, guläs Jesús yätxtiil, badeedni xquixtios lo Dios, dxejcti gula'nini, badeednini loj rexpejnpacni, räjpni:

—Coltajw; dee najc si'c tiexhä.

<sup>27</sup> Dxejc guläsni te vas, badeedni xquixtios lo Dios, dxejcti badeednini loj rexpejnpacni, räjpni:

—Guiraatu colyä',

<sup>28</sup> sa'csi dee najc si'c xtienä; ni'cni riannäa la'tu te didxcoob, luxh rejnre sixe'ni xcuent xhidajl bejn te guslaanireni nen dojl.

<sup>29</sup> Luxh rniä lojtu, diruna yä'ä nis nani rii yejc uub, dxejlini yänäsacätu lo xcälrnibee Dios, Xtadä.

### *Räjp Jesús sibälaz Pedroni*

(Mr. 14:26-31; Lc. 22:31-34; Jn. 13:36-38)

<sup>30</sup> Che gulujx bilreni te dij, biriireni, sääreni lo dajn ni laa Oliib.

<sup>31</sup> Dxejc räjp Jesús lojreni:

—Guiragajctu sactio'p lajztu xcuentä, susa'ntu narä naguxhijn sa'csi lo reguijtz xten Dios caj scree: “Sugu'treni baxtoor dxejc sire'ch rexiil.”

<sup>32</sup> Dxejc cheni guibañsacä lo rebengut, ganidä cha'ä región Galilee, dxejcti jiädnajltu narä.

<sup>33</sup> Dxejc räjp Pedr loj Jesús:

—Masque guiraareni cuälazlu, narä dina cuälazälu.

<sup>34</sup> Dxejc räjp Jesús lojni:

—Rniliäpac lojlu, lagajc guxhijnre, nicla gajd guidgaii cuedxa', luxh luj alagulälazlu narä choñ huält.

<sup>35</sup> Räjp Pedr loj Jesús:

—Masque riäjł guetnäälü, dina cuälazälu.

Dxejc sigajcza gunii guiraa rexpejnpacni.

### *Gurejdx-gunab Jesús loj Dios nen Getsemani*

(Mr. 14:32-42; Lc. 22:39-46)

<sup>36</sup> Dxejcti bidzujñ Jesús näjza rexpejnpacni te lajt ni laa Getsemani, räjpni lojreni:

—Colcuésijc ree lał ni cuedx-guiniabä lo Dios.

<sup>37</sup> Dxejc sanäni Pedr näjza guiro'p xi'n Zebedeo, luxh gusloj cayachuinduxh lajzni, cayu'zani yärsiaduxh.

<sup>38</sup> Dxejc räjpni lojreni:

—Te yälhuinduxh yu' lastoä; astoocanu agojl guetä. Coljia'n ree, coltie'ch bacal lojtu.

<sup>39</sup> Dxejc guzaj Jesús stla', guzuxhijbni dxejc basajb lojni lo yujli, gusloj cabedx-canabni lo Dios:

—Xtadä, palga sajcnı, basanlaa tedcaj trabajwduxhre ni tedä, te na'c tedäni. Xhet si'cdi ni rlazä gacni; si'cpacni rlazzlu gac, si'c gacni.

<sup>40</sup> Dxejcti gubi'ni cadre suga' guichoñ rexpejnpacni, che bidzujñni ro'c, nagayejsreni. Räjpni lo Pedr:

—¿La di niajcdı nutie'chtu bacal lojtu nicla tebor, ä?

<sup>41</sup> Colguibajñ, colñab lo Dios te na'c jiajbtu neñ dojl. Guliipacni, lastootu nadip, niluxh tiejxhtu rdxajc.

<sup>42</sup> Gubi' Jesús stehuält, gurejdx-gunabni loj Dios, räjpni:

—Xtadä, palga digacdi tedcaj tedä trabajwre, sugacni si'ctis ni rlaizlu gacni.

<sup>43</sup> Dxejc gubisacni, bidxälñi rexpejn̄pacni, nagayejsreni sa'csi yuduxh bacal lojreni.

<sup>44</sup> Basaannireni, dxejc säasacni, gurejdx-gunabni lo Dios ni riojn̄ huält, gunisacni lagajc rediidx̄ ni guniini galoo.

<sup>45</sup> Dxejc huijni cadro suga' rexpejn̄pacni, räjpni lojreni:

—¡Naj sii, colguejs, colgusilajz! Abidzujñ or̄ ni gutedreni Xi'n Dios ni gujc Niguii ladzñaa rebeñdojl.

<sup>46</sup> ¡Colchastie, colcho', colhuii! Asiääd nani guted narä ladzñaa rebeñdojl.

### *Gunaazreni Jesús sanärenini pres*

*(Mr. 14:43-50; Lc. 22:47-53; Jn. 18:2-11)*

<sup>47</sup> Lañi canii Jesús bidzujñ Judas, nani najc tej retzubitio'p xpejn̄pacni. Bidzunnäjni xhidalduxh bejn̄ ni ca' espaad, ni ca' garo't, najcreni xpejn̄ reni rnibee rebixhojz, näjza xpejn̄ rebeñgool xten rexpejn̄ Israel.

<sup>48</sup> Judas, ni bato' Jesús, abadedxgaani te seen lojreni räjpni:

—Nani guchagro'ä, ni'c najc laani; colguiniazgjacni.

<sup>49</sup> Dxejc gubigni loj Jesús, räjpni:

—Xchan, Dad Mastr.

Dxejc bachagro'ni lojni.

<sup>50</sup> Jesús räjp lojni:

—Xamigwä, ¿xhi siäädlu?

Dxejcti gubig rebejn̄ lojni, gunaazrenini.

<sup>51</sup> Per tej reni suganäj Jesús gulääni te spaad, batiu'ni diajg te mos xten rebixhojz ni rnibee.

<sup>52</sup> Dxejc räjp Jesús lojni:

—Guluchee xspaadlu loj xse'ni. Guiraa reni rucuanäj con spaad, lagajc con spaad guetreni.

<sup>53</sup> ¿La ditu gan sajcaz guiniabä lo Xtadä, luxh laani suxhalgjacni gayoñbitzubitio'p miñ xanglni gacnäj narä?

<sup>54</sup> Dxejc xho gac soob diidx̄ ni caj lo reguijtz xten Dios ni rnixgaa riäjñ gac guiraa recosre lagajc si'cni cayajcni.

<sup>55</sup> Dxejc räjp Jesús loj rebejn̄ xhidajlga:

—¿La siädñātu spaad näjza garo't te guiniaaztu narä astoocanu nacä si'c te gubaan? Ni guirasi dxej gureä galäiitu, baluiātu neñ guidoro, luxh ditu niniaaz narä.

<sup>56</sup> Niluxh guiraa recosre cayajc te soob rediidx̄ ni caj lo reguijtz ni bacuaa redade' ni gunii xtidx̄ Dios.

Dxejcti guiraa rexpejn̄pacni basanxtebreni Jesús, baxun̄reni lojni.

### *Jesús nez loj rebixhojz*

*(Mr. 14:53-65; Lc. 22:54-55, 63-71; Jn. 18:12-14, 19-24)*

<sup>57</sup> Reni gunaaz Jesús huiñänini nez loj Caifäs, ni rnibee loj guiraa rebixhojz, bidzujñreni cadro abidojp guiraa rebejn̄ nani ruluui leii näjza rebeñgool xten xpejn̄ Israel.

58 Dxejcti zit-zijt biädnaĵl Pedr rebeĵnga, bidzujnlireni lole' xten bixhojz ni rnibeega. Ro'c biu'ni, gurenäjni rexquixhajg bixhojzga te ro'c bia'nni te fiini xhini'c gac.

59 Reni rnibee rebixhojz, näjza rebengool con guiraa reni rajp yälrnibee gusloj caguilireni xhitis te diidx, masque xhet guliidini, te gucuaquijreni Jesú te guinibeereni guetni.

60 Niluxh xhet bidxäldireni, luxh gubig xhidajl bejn, guniireni xhidajl didx-xhii xcuent Jesús. Dxejcti bidzujn tio'p dade' ni gunii didx-xhii,

61 räjpreni:

—Niguiire gunii scree: “Narä sajz gutzulä guidoro xten Dios, sajza gunch-esacäni nen choñ dxej.”

62 Dxejc gusulii dade' ni rnibee lo rebixhojz, räjpni loj Jesús:

—¿Xhicuent xhet rniidilu, ä? ¿Xhini'c canii reniguiire cagucuaquijreni luj?

63 Niluxh dxitis suga' Jesús. Dxejcti räjp dade' ni rnibee loj rebixhojz lojni:

—Rnibeä guiniliilu, guiniliipaclu con laj Gueb Dios nani nabajñ. Gunii don, ¿la luj najc Crist, Xi'n Dios?

64 Jesús räjp lojni:

—Lagajc guejblu naj si'c. Niluxh empac rniä lojtu, desde ñajli suhuiitu cueä narä Xi'n Dios ni gujc Niguii xladbee Dios ni rnibee, suhuiizatu jiälä lo reza ni tre' xhaguibaa.

65 Dxejc batiäjs dade' ni rnibee loj rebixhojz xhajbni, räjpni:

—¡Niguiire aguniyajni Dios con xtiidxni! ¿Xhiru testiigw rquiinnu? Abiejn diajgtu didxyaj xtenni.

66 ¿Xhi rchalotu?

Dxejc basejcreni diidx:

—¡Abiga'ni! Riäjł guetni.

67 Dxejc batiobxhejnreni lojni, gudijnrenini. Yu'reni gudajp lojni,

68 räjpreni lojni:

—Palga najclu Crist, gunii chuni'c gudijnlu.

*Di Pedr nicäjp numbeeni Jesús*

*(Mr. 14:66-72; Lc. 22:56-62; Jn. 18:15-18, 25-27)*

69 Lał ni cayajc reni'c, Pedr sobga' lole'. Dxejc gubig te dxape' ni rujn dzuun ro'c, räjpni lojni:

—Näjza luj cuansanäjlu Jesús, ni siääd nez Galilee.

70 Per di Pedr nicäjp nez loj guiraa'reni, räjpni:

—Dina ganä xhini'c caniilu loä.

71 Asii Pedr nez ro' puert, che bidxaagni stee dxape' ni rujn dzuun ro'c. Dxape're räjp loj reni suga' ro'c:

—Näjza dade're cuansanäj Jesús ni siääd Nazare't.

72 Dxejc basguee Pedr stehuält, räjpni:

—Rniliäpac dina gumbeä dade'ga.

73 Che gojl sterate', gubig reni suga' ro'c loj Pedr, räjpreni:

—Guliini; näjza luj najclu te xpejñni; huenliisi riejn diidx ni rniilu.

74 Dxejcti guslojni cagueni, caguzä'tni Dios, räjpni:

—Dipacna gumbeä niguiiga.

Guniitisini si'c, chela guredxa' te guidgaii.

75 Dxejrcru banalajz Pedr rediidx ni gunii Jesús lojni che räjpni: “Che gajldi guidgaii cuedxa', choñ huält alaguniilu dilu gumbee narä.” Dxejc birii Pedr ro'c, gusloj cayonduxhni.



## 27

*Batedreni Jesús loj Pila't**(Mr. 15:1; Lc. 23:1-2; Jn. 18:28-32)*

<sup>1</sup> Che bianij lo guedxliuj, guiraa reni najc rebixhojz ni rnibee nájza rebengool xten rexpejn Israel bia'nreni diidx xho gunreni ju'treni Jesús.

<sup>2</sup> Baliibrenini, guläärenini ro'c, huisa'nrenini loj Poncio Pila't, ni najc gubernadoor.

*Xho gujt Judas*

<sup>3</sup> Dxejcti Judas, ni bato' Jesús, che bahuiini bacuaquijreni Jesús, basiejch lajzni, guc-huin lajzni, dxejc huidzu'ni galbitzuu meel pla't loj rebixhojz ni rnibee nájza loj rebengool.

<sup>4</sup> Rájpmi:

—Banitduxhä lo Dios sa'csi bato'ä te bejn ni xhet bejndi.

Dxejc rájpmi lojni:

—Xhixh gunnu. Ni'c najc xcuentlu; luhti najn.

<sup>5</sup> Dxejc bacuaa Judas meelga lo yuj nen guidoro, biritini ro'c. Sas huijni, baliibni te duu guejnni, gojlni lo te yajg, ro'cti gujtni.

<sup>6</sup> Rebixhojz ni rnibee batojpmeni meelga, rájpmeni:

—Di gac di guizälnu meelre nen caj gojn sa'csi najcni xcuent xtiejn te bejn.

<sup>7</sup> Dxejc bia'nreni diidx con meelga siireni te la' yuj xten te dade' ni runchee guejs te ro'c gucua'tzreni rebenzajt.

<sup>8</sup> Ni'cni najli rniireni yujga: “Yurejn”.

<sup>9</sup> Si'c gusojb diidx ni gunii Jeremias, dade' ni gunii xtidx Dios galoo che rájpmi: “Cua'reni galbitzuu melpla'tga si'cti basoob rexi'n Israel sajc bejnga.

<sup>10</sup> Con meelga guziireni yuj lo bejn ni runchee guejs, sigacni gunibee xtađnu Dios.”

*Gusuj Jesús nez loj Pila't**(Mr. 15:2-5; Lc. 23:3-5; Jn. 18:33-38)*

<sup>11</sup> Bidzunájreni Jesús loj Pila't ni najc gubernadoor. Dxejc gunabdiidxni, rájpmi lo Jesús:

—¿La luj najc reii xten rexpejn Israel, ä?

Rájpmi Jesús lojni:

—Najcni si'cni najlu.

<sup>12</sup> Lałni cabe'c rebixhojz ni rnibee nájza rebengool rexquej Jesús xhetliidi guniidi Jesús.

<sup>13</sup> Dxejc rájpmi Pila't lojni:

—¿La di diajglu jiejn guiraa rediidx ni caniireni cagucuaquijreni luj, ä?

<sup>14</sup> Per xhetliidi diidxdi basejc Jesús, nicla xcuent tejsi diidx ni bacuaquirenini. Ni'cni bidxeloduxh gubernadoorga.

*Gunibeereni guet Jesús**(Mr. 15:6-20; Lc. 23:13-25; Jn. 18:38-19:16)*

<sup>15</sup> Nen redxe lanij rajpmeni costumbr ruslaa Pila't tej bejn ni cue rebejn loj reni yu' nen latzguib.

<sup>16</sup> Nen redxejga guyu' te bejn ni säab xtiidxni ni laa Barrabás.

<sup>17</sup> Cheni tre' guiraareni ro'c, gunabdiidx Pila't lojreni:

—¿Chuni'c rlajztu guslaä, la suslaä Barrabás o Jesús ni laa Crist?

<sup>18</sup> Sa'csi najn Pila't rdxe'chljazreni lo Jesús, ni'c bateedrenini lojni.

<sup>19</sup> Lał ni sobga' Pila't lo yajgxhiil cadro rujnni yälguxhtis, baxhał chäälni diidx lojni, rájpmi:

—Xhet gundilu dade'ga ni xhet bejndi, sa'csi nuchej nadxuudx gunixcaḷä xcuentni.

<sup>20</sup> Niluxh rebixhojz ni rnibee näjza rebengool baquiilreni rebejn te gunabreni laa Barrabás, näjza te guet Jesús.

<sup>21</sup> Dxejcti gunii gubernadoor stehuält, räjpni lojreni:

—¿Chu tej loj guiro'preni rlajztu guslaä?

Dxejc guredxa'reni, räjpreni:

—¡Barrabás!

<sup>22</sup> Gunabdiidx Pila't, räjpni:

—¿Xhi gunnäá Jesús ni laaza Crist?

Guiraareni guredxa':

—Bacuaani lo cruzj.

<sup>23</sup> Dxejc räjp Pila't lojreni:

—¿Xhi latsiaj bejnni?

Niluxh laareni guredxa'rureni, räjpreni:

—¡Bacuaani lo cruzj!

<sup>24</sup> Che bahuii Pila't xlia'si caniini, alga gusloj rebejn cayujn te bieiduxh, cua'ni nis, gudiibni naani nez lojreni, räjpni:

—Dina xcaquiä xtiejn bejnre ni xhet bejndi. La'tu colhuii xho guntu. Xcuenttitu najcni.

<sup>25</sup> Dxejc guiraa rebejnğa badzu' diidxre, räjpreni:

—Suxcaquijnu xtiejnni, nuurnu näjza rexi'nnu.

<sup>26</sup> Dxejc baslaa Pila't Barrabás, dxejc gunibeeni gudijnreni Jesús dxejc bateednini ladžnaa rebejn te gucuaarenini lo cruzj.

<sup>27</sup> Dxejc huinä resoldaad xten gubernadoor Jesús lo pretoor, yu' cadre rujnreni yälguxhtis, ro'c batojpreni guiraa resa'reni.

<sup>28</sup> Dxejc gulääreni xhajbni, bashuajcwrenini te lad xnıaa.

<sup>29</sup> Dxejc bencheereni te coron guejch, basälrenini yejcnı, basälreni te yabixijl naani, xladbeenı, sas bazuxhıjbreni nez lojni guslogajc caguxhisnäjrenini, räjpreni:

—¡Collä'p xpala'n reii xten rexpejn Israel!

<sup>30</sup> Sas batiobxhejnreni lojni, cua'reni yabixijlga te ni'c batiäjlneni yejcnı.

<sup>31</sup> Che gulujx baxhiznäjrenini, gulääreni lad xnıaa ni najcwnı. Dxejc bashuacwsarenini lagajc xhajbni, sanätirenini te xcajıni lo cruzj.

### *Bacuaareni Jesús lo cruzj*

(Mr. 15:21-32; Lc. 23:26-43; Jn. 19:17-27)

<sup>32</sup> Cheni sariireni, bidxaagreni te bejn ni siääd guedx Cirene, laani Simón, basguureni dade'ga xcruzj Jesús.

<sup>33</sup> Che bidzujnreni te lajt ni laa Gólgota, nani säloj: dan Calabeer,

<sup>34</sup> ro'c badeedreni bin nu'ch cuanlaa te gu' Jesús. Te bochäztisni gu'ni, dxejc naaddirıni niä'nini.

<sup>35</sup> Cheni abacuaareni Jesús lo cruzj, gudzujt resoldaad yejc xhajbni, te si'c gudisreni xhajb Jesús cua'reni, te si'c guzojb diidx xten te dade' ni gunii xtidx Dios.

<sup>36</sup> Gurejtireni ro'c, gusloj canäjreni Jesús.

<sup>37</sup> Yejc cruzjga bacuaareni te guıjt con letro. Lo guıjtzga rcay xhini'c najc xtojł nani cayejt. Lo guıjtzga caj: “Dee najc Jesús reii xten rexpejn Israel.”

<sup>38</sup> Näjza tio'p gubaan cuaj lo stio'p cruzj con laani. Tejni cuaj lo te cruzj xladbee Jesús, steeni cuaj xladbäjgwnı.

<sup>39</sup> Luxh renani sadejd nejzga guniyajreni Jesús, cagusniıbreni yejcreni,

40 cayäjpreni lojni:

—Jä'a! Luj ni nutiexhlu guidoo, luxh chontis dxej niunchesacluni; palga guli najclu Xi'n Dios, biäjt loj cruzjga.

41 Näjza rebixhojz ni rnibee, näj remastr xten leii, baxhiznäjrenini räjpreni loj sa'reni:

42—Baslaani xhidajl bejn, xhoxh di gacdi guslaani lagajc laani. Palga najcni reii xten rexpelj Israel, sujiäjtnei lo cruzj nanaj te challajznu xtiidxni.

43 Huinälajzni Dios, naj suguslaa Diosni palga sanälajz Diosni; ni najni: “Narä nacä Xi'n Dios.”

44 Regubaan ni caj lo recruzj sigajcza guniyajreni Jesús.

### *Che gujt Jesús*

(Mr. 15:33-41; Lc. 23:44-49; Jn. 19:28-30)

45 Dxejcti bicäy guidob guedxliuj läidxej hasta rcachon gudxej.

46 Si'cti rcachon gudxej guredxa' Jesús dipduxh, räjpni:

—Elí, Elí, ¿lama sabacatani? —dee säloj: Xtiozä, Xtiozä, ¿xhicuent gulälazlu narä?

47 Yu' reni suga' ro'c, che biejn diajgreni räjpni si'c, räjpreni:

—Cabejdx Dade're Elías.

48 Baxungajc tejreni, huica'ni te sponj, bahuajdxnini loj binagr, bacuaanini yec te biquii te badzugin binargra ro' Jesús.

49 Dxejc reni tre' ro'c räjp:

—Basaan; guidon la siääd Elías te guslaanini.

50 Dxejc guredxaduxh Jesús stehuält, baslaatini xpritrni.

51 Lagajc orga biräsyä' ladro ni zääb nen guidoro, gujcni tio'p la' jiaali hasta lo yuj. Gujc te xuro, sas gusuj bej reguiro.

52 Dxejc gubicaj reguij ni niäuu ro' rebaa, luxh gubansac xhidajl xpejn Dios ni gujt aguc xchej.

53 Dxejcti, che huäjs Jesús lo rebengut, biriireni nen baa, baluilojreni lo xhidajl bejn ni rbäjz guedx Jerusalén.

54 Dxejc capitán xten resoldaad näjza resoldaad ni canäj Jesús, che bahuiireni xuduxh näjza guiraa recos ni gujc ro'c, bidxejbreni, räjpreni:

—Guliipacni najc dade're Xi'n Dios.

55 Zijtru tre' xhidajl regunaa ni biädnajl Jesús che biriini nez Galilee te bahuiireneni. Cadxelotjisreni guiraa ni cayajc ro'c.

56 Tej regunaaga najc Marii Magdalen, steeni najc Marii xnan Jacoob näjza José, steeni najc xnan rexi'n Zebedeo.

### *Huicua'tzreni Jesús*

(Mr. 15:42-47; Lc. 23:50-56; Jn. 19:38-42)

57 Che gojl gudxej, bidzujn te benrajp ni siääd guedx Arimatea; laani José. Näjza dade'ga najc tej reni birinajl Jesús.

58 Huij dade'ga loj Pila't, gunabni tiejxh Jesús. Dxejc gunibee Pila't gudeedreni lojni.

59 Cua'ti José tiejxh Jesús, batejbnini nen te bariadya,

60 huitixhnini nen xpaapacni. Nacoob baaga, gojnni bidäänni cuä' te guilaj. Dxejc basäuni ro' baaga cön guiro, dxejcti siini.

61 Sobga'za Marii Magdalen näjza stee Marii nez loj baa, bahuiireni biga'tzni.

*Xhi räjp resoldaad ni cuanäj xpaa Jesús*

<sup>62</sup> Che gudejd dxej xten ni gulec-cheerēni lanij, bara yāäl bidojpb rebixhojz ni rnibee nājza rebejn ni laa refarisee, bidzujnreni loj Pila't,

<sup>63</sup> räjpreni lojni:

—Dad, banaj laaznu xhi räjp bejn ni rusgueere. Räjpni: “Che ted choṅ dxej sibansacni loj rebengut.”

<sup>64</sup> Ni'c baxhal chu chacanāj ro' baaga dxejli guisa' choṅ dxej, te di chää rexpējnacni chaläärenini tiejxhni, dxejc gābreni loj rebejn: “Agubansacni loj rebengut.” Yäl rusgueega sajc cuentroru loj ni gujc ganid.

<sup>65</sup> Räjp Pila't lojreni:

—La'tu rajptu te cuaa soldaad; colchāj, basäutu'tz ro' baaga si'ctis ni sajc guntu.

<sup>66</sup> Dxejcti sääreni, basäutu'tzreni ro' baaga; con resoldaad bacuaareni te seii lojni te rut falḍini. Dxejc basa'nreni resoldaad canāj ro'c.

## 28

### *Sibansac Jesús loj rebengut*

(Mr. 16:1-8; Lc. 24:1-12; Jn. 20:1-10)

<sup>1</sup> Che gudejd sabd, dxej ni ruzilajz rexpējn Israel, che gusloj cayānij lo guedxliuj te jiu' stee xmaan, bidzujn Marii Magdaleṅ nājza stee Mariiga, siādhuiireni lo baa.

<sup>2</sup> Luxh alagujc te xuro ni basniib lo yuj, sa'csi biääd te angl xten Dios xhaguibaali te badzucajni guij ni niāuu ro' baaga, dxejc gurejni yejc guijga.

<sup>3</sup> Rdimbichaduxhni si'c najc che rdinya', luxh xhajbni najc nolbāj si'c najc yej ni riajb.

<sup>4</sup> Che bahuii resoldaadni, bichebduxhreni, sädiidxreni, gujcreni si'c bengut.

<sup>5</sup> Dxejc räjp guixhajg xte Diosga loj reguna:

—Na'c guidxejbtu. Ananā caguilltu Jesús ni cuaj lo cruzj.

<sup>6</sup> Rutini ree sa'csi agubansacni sigajc ni najni. Coltahuii cadro gojtni.

<sup>7</sup> Colguxun, colchaye'tz loj rexpējnacni agubansacni loj rebengut. Luxh naj agunijdni lojtu sääni regiön xten Galilee. Ro'c suhuiitu lojni. Dee najc diidx ni rniā lojtu.

<sup>8</sup> Dxejcti rusquenduxh regunaaga, biriireni ro' baaga. Cadxejbreni, cabal-azduxhzareni sanäreni diidx loj rexpējnac Jesús.

<sup>9</sup> Chela bidxaagreni Jesús lo nejz, räjpni: “Xchan”, lojreni. Sas gubigreni loj Jesús, bazuxhijbreni, gudääzreni guenni'ni, gojnrenini.

<sup>10</sup> Dxejc räjpni lojreni:

—Na'c guidxejbtu. Colchanā diidx loj rexpēnā, chääreni regiön Galilee, sa'csi ro'c suhuiireni loä.

### *Rediidx ni räjp resoldaad*

<sup>11</sup> Laḷni sää regunaaga, bidzujn gaii soldaad ni huicanāj ro' baa lo guejdxga, huisa'nreni diidx lo rebixhojz ni rnibee xcuent guiraa ni guzajc ro' baaga.

<sup>12</sup> Dxejc rebixhojz ni rnibee bachagsa'zareni con rebengool te bia'nreni diidx gudeedreni xhiroob meel lo resoldaad,

<sup>13</sup> räjpreni lojreni:

—Scree colye'tz lo rebejn: “Laḷ ni nagayesnu, canājnu ro' baa, biääd rexpējnac Jesús gulāxhiga'tzreni tiejxhni.”

<sup>14</sup> Palga jiendiajg gubernadoor dee, siohuiinuni te di yu' xhi gunni la'tu.

<sup>15</sup> Dxejcti cua' resoldaad meel, bejnreni si'cni räjp rebixhojz. Luxh si'c bire'ch diidx loj guiraa rexpēn Israel. Najli canisijcreni si'c.

*Baxhal Jesús rexpejn pacni**(Mr. 16:14-18; Lc. 24:36-49; Jn. 20:19-23)*

<sup>16</sup> Dxejcti sää retzubiteeb xpejn pac Jesús lo región Galilee, lo dajn cadro bia'n Jesús diidx guidxaagnireni.

<sup>17</sup> Cheni bahuiireni loj Jesús, bazuxhijbreni, gojnrenini, per yu' reni ractio'p lajzreni.

<sup>18</sup> Dxejc gubig Jesús lojreni, guninäjnireni, räjpni:

—Arapä guiraa yälrnibee xhaguibaa näjza lo guedxliuj.

<sup>19</sup> Ni'cni, colchäj, guideb guedxliuj colchagajn bejn gac xpenä, colgutiobnisreni, con laj Gueb Dios, näj laj Xi'n Dios näjza laj Sprit Dxa xten Dios.

<sup>20</sup> Colguluiireni gusoobreni guiraa rediidx ni guinibeä. Luxh lagajc narä suganää la'tu guiraa redxej, dxejli che nitloj guedxliuj. Sugacni si'c.

## Diidx Xcuent Jesucrist Nani Bacuaa San Marcw

### *Baluu Juan ni rutiobnis*

(Mt. 3:1-12; Lc. 3:1-9, 15-17; Jn. 1:19-28)

<sup>1</sup> Scree gusloj diidx xcuent Jesucrist, Xi'n Dios.

<sup>2</sup> Si'cni bacuaa tolsaías, ni gunii xtidx Dios, che rájp Dios:

Bahuii gan, guxhalä ni chanä xtidxä, ganidni cháani lojlu te guzucheeni xnezyujlu.

<sup>3</sup> Riejn xse' ni rbedxa' nez loj reyubijdz:

“Colyunsac' xnezyuj Dad, colslui rexnezyulajzni.”

<sup>4</sup> Biricaj Juan ni rutiobnis nez loj reyubijdzga. Răpgajcni nanabpac gusiech-lajzreni, tiobnisgajczeni, te jia xtojłreni.

<sup>5</sup> Riădcuadiajg xhidajł reni rbăjz Judea, năjza reni rbăjz guedx Jerusalén. Dxejcti cheni ruxhobdojłreni lo Dios, rustiobnis Juanreni neņ gueu Jordán.

<sup>6</sup> Xhajb Juan nacchee con guichlajd cameii, xsindoorni nacchee con guijd, niluxh gudajwni guxha't năjza dzunbăserguijxh.

<sup>7</sup> Caguluiini rebejn, răpgajcni:

—Detzä siăäd tej nani sajcro loä, nani nicla di nungăjł surloä, cuăä xcura'chni.

<sup>8</sup> Narä abatiobnisä la'tu con nis, biädla laani guxhalni Sprit Dxcu xten Dios te cuăäzni neņ lastootu. Si'c gustiobnis nani jiăäd detzä la'tu.

### *Batiobnis Juan Jesús*

(Mt. 3:13-17; Lc. 3:21-22)

<sup>9</sup> Dxejc, neņ redxejga, birii Jesús guedx Nasare't ni yu' Galilee. Dxejcro batiobnis Juan Jesús neņ gueu Jordán.

<sup>10</sup> Che birii Jesús neņ nis, bahuiini bixal guibaa. siădyăjt Sprit Dxcu xten Dios yejcti si'c te palom.

<sup>11</sup> Dxejcti guibaali biejn xse' te ni răjp:

—Luj najclu xi'nä ni sanălazä; rbanălazduxhălu.

### *Bateed bendxab prueb Jesús*

(Mt. 4:1-11; Lc. 4:1-13)

<sup>12</sup> Sas baxhal Sprit Dxcu xten Dios Jesús lo reyubijdz.

<sup>13</sup> Dxejc guyu' Jesús ro'c tiuu dxej, guyu'ni cadro yu' reman. Sas gudiil bendxab nani rnibee, nani laa Satanás, xho niujnni te nusoob Jesús xtiidxni. Dxejcro biăäd reangł xten Dios, biădhuiireneni.

### *Gusloj Jesús xtzuumni*

(Mt. 4:12-17; Lc. 4:14-15)

<sup>14</sup> Basăłreni Juan neņ latzguiib. Dxejcti huij Jesús nez Galilee, huiluini xtidx Dios.

<sup>15</sup> Dxejc răjp Jesús:

—Abidzujł dxej, luxh yăłrnibee xten Dios abidzujł gajxh. Colșiejch lajztu, colchalajz xtidx Dios.

### *Gurejdx Jesús tajp bejn ni rniaaz băjł*

(Mt. 4:18-22; Lc. 5:1-11)

16 Sasajti Jesús nez ro' nis xten Galilee, che bahuini lo Simón nájza loj Andrés bejtz Simón. Cazäl'reni xquijxhrene lo nis, sa'csi rniaazrene bájł.

17 Dxejc rájł Jesús lojrene:

—Coltanajł narä, te gunä cuedxte bejł lacuaa ni guiniaaztu bájł.

18 Lagajc dxejc basa'nrene rexquijxhrene, sanätireneni.

19 Dxejc gusaj Jesús sche'n, sas bahuini loj Jacobo náj Juan, rexi'n Zebedeo. Cayunsa'czeni xquijxhrene neñ xcanuureni.

20 Guredxgajcni guiro'preni, dxejcti laareni basa'nrene xtadrene Zebedeo neñ canuu, nájza rexmosni, sanätireni Jesús.

*Te bejł nani guyu' beñdxab neñ lastooni*

*(Lc. 4:31-37)*

21 Bidzujñtirenene guedx Capernaum. Dxejcru sabd, dxej ni rusilajz rexpene Israel, biu' Jesús neñ guidobáz xten rexpene Israel. Dxejcti baluii Jesús rebejł ni tre' ro'c.

22 Bidxelojni rebejł xtiidxni, sa'csi caguluiinireni si'cpac te ni rnibee, xhet si'cdi remastr xten leiidi.

23 Neñ xquidobázrene yu' te bejł yu' te beñdxab neñ lastooni. Beñdxabga guredxa', rájłni:

24 —Jesús, ni siäd Nazare't, ¿xhicuent riu'lu loonu? ¿La siädgunitlojlu nuunu? Narä numbeälu, luxh nanä luj najclu beñdxan ni siäd lo Dios.

25 Dxejcti gudidxa' Jesús lo beñdxabga, rájłni lojni:

—Basäuu ro'lu, birii neñ lastoo niguiire.

26 Sas beñdxabga batienguij niguiiga, luxh cabedxa'ni biriini neñ lastoo niguiiga.

27 Bidxejbtı guiraareni, canabdiidx loj sa'reni:

—¿Xhi dee? ¿Xhi dzuun nacoobre ruluini? Niguiire rnibeeni náj re-beñdxab, luxh ruzoobrene xtiidxni.

28 Di niaclaa guchbee rebejł guideb nez Galilee xhi rujł Jesús.

*Basiajc Jesús xnan suegr Pedr*

*(Mt. 8:14-15; Lc. 4:38-39)*

29 Che biriireni xquidobáz rexpejł Israel, huinä Jesús Jacobo náj Juan rolizj Simón nájza Andrés.

30 Luxh xnan suegr Simón naga', yu'ni xliaa. Dxejc rájłpreni lo Jesús:

—Cayacxhuuni.

31 Dxejcti gubig Jesús lojni, gunaazni ñaani, guläsnini; lagajc dxejc biriini xliaa. Dxejc gusloj cayunireni.

*Xhidajł benracxhuu basiajc Jesús che huääz gubijdx*

*(Mt. 8:16-17; Lc. 4:40-41)*

32 Che huääz gubijdx, luxh abiu' guxhijł, biädñareni guiraa rebenracxhuu loj Jesús, nájza renani yu' beñdxab neñ lastooni.

33 Luxh guideb guejdxga bidojł ro' yu'ga.

34 Basiajc Jesús xhidajł renani rajc garen-garen yälguijdx. Niluxh gulääzani xhidajł beñdxab, niluxh dini nusaan ninii rebenracxhaga, sa'csi najnrene chu najcni.

*Baluii Jesús nez Galilee*

*(Lc. 4:42-44)*

35 Che bara yääl, cäjyru bistie Jesús, biriini sääni te laad cadro ruti bejł. Ro'c cabejdx-canabni loj Dios.

36 Dxejcti Simón náj resa'ni huitilrene Jesús.

37 Che bidxälrenini, räjpreni lojni:

—Guiraa rebejn caguiillu.

38 Dxejc räjp Jesús lojreni:

—Cołcho' reguejdx ni yu' gajxh, te gusuleä xtidx Dios ro'c. Par ni'cpac biälä.

39 Dxejcru cuansaj Jesús guideb nez Galilee, caguluiini xtidx Dios neñ reguidobáz xten rexejn Israel. Gunibeezani birii rebendxab neñ lastoo xhidajl rebejn.

*Basiajc Jesús te bejn ni ral tiejxhni*

*(Mt. 8:1-4; Lc. 5:12-16)*

40 Gubig te beñracxhuu ni ral tiejxhni loj Jesús, bazuxhijbni. Dxejcti räjpni lojni:

—Nará nanä sajc gusajclu narä palga rlajzlu.

41 Balaslajc Jesús beñracxhuuga, gunaazni ñaani, räpgajcni:

—Rlazä jiajclu. Biajc naj.

42 Cheni guniini scree, biacgajc beñracxhuuga.

43 Dxejcti gulunejz Jesús bejnga. Per räpxgaani lojni:

44 —Ahuiire, rutlojdi guiniilu dee. Huiluii tiejxhlu lo bixhojz. Badedgajc lo Dios nani räjp toMoisés gudeed bejn lo Dios si'c te seen, te gacbee rebejn abiajclu.

45 Dxejc sää bejnga. Sas gusloj cayujyni diidx lo rebejn xcuent guiraa nani gujcn. Ni'cni diru niajcdi niu' Jesús nicla tej guejdx. Cansajni te laad cadre ruti bejn. Niluxh guiranejz rii rebejn, siädhuiireni Jesús.

## 2

*Basiajc Jesús te bejn ni di guniib*

*(Mt. 9:1-8; Lc. 5:17-26)*

1 Che agudejd balti dxej, biusac Jesús neñ guedx Capernaum. Dxejcti bejn diajg rebejn arbäjzni.

2 Bidopgajc xhidalduxh bejn. Gudxaj neñ yu'. Nicla rolä' di niajl nisiujreni. Dxejcti caguluii Jesús xtidx Dios lo rebejn.

3 Dxejcti bidzujñ tajp bejn, nuureni te bejn ni digacti guiniib; siädñärenini lo Jesús.

4 Luxh di niajcdi nidzujñreni cadre suga' Jesús, sa'csi yu' xhidajl bejn ro'c. Ni'c baxhalreni yej yu' nejz cadre sujni. Dxejcru cadre baxhalreni basiäjtreni da' ni naga' beñracxhuuga lojni.

5 Che bahuii Jesús rililajzreni, dxejc räjpni loj beñracxhuuga:

—Xi'nä, agubicaj rextojllu.

6 Sas gaii bejn ni ruluii leii ni sobga' ro'c bejnreni xhigab neñ lastooreni, naareni:

7 “¿Xhicuent rñii niguiire scree? Caniyajni Dios; rut rajcdi rudzucaj dojl. ¡Dioſtis rajc rudzucaj dojl!”

8 Dxejcti gucbegajc Jesús xhi xhigab cayujñreni. Dxejc räjpni lojreni:

—¿Xhicuent rujntu xhigab si'c neñ lastootu?

9 ¿La guyasiru gäbni loj beñracxhuure: “Agubicaj rextojllu”, o la gäbni: “Huistie, cua' xta'lu, gusaj”?

10 Baj naj, te gantu rajc rudzucaj Xi'n Dios, nani gujc Niguii, dojl lo guedxliujre, cania loj beñracxhuure:

11 —Lojlu rñiä, ¡Huistie, cua' xta'lu, huij rolizlu!

12 Lagajc dxejc huistie beñracxhuuga, guläzni xta'ni, biriini ro'c nez loj guiraareni. Ni'cni bidxelo guiraareni. Dxejc gulä'preni xpala'n Dios, räjpreni:



—Gajdpacnu guihui sa' dzuunre.

*Gurejdx Jesús Leví*  
(Mt. 9:9-13; Lc. 5:27-32)

<sup>13</sup>Dxercru gubisac Jesús ro' nis xten Galilee, luxh che bidojɔp guiraa rebejn lojni, baluini xtidx Dios lojreni.

<sup>14</sup>Sasaj Jesús che bidxaagni Leví, xi'n Alfeo. Sobga'ni cadro rusquijxni rebejn. Dxejc räjp Jesús lojni:

—Gudanajl narä.

Sas huisuni, sanajltini Jesús.

<sup>15</sup>Dxejc sobga' Jesús cayajwni rolijz Leví. Luxh sobganäj Jesús xhidajl reni rusquijx, näjza rebendojɔl ni di chasanäj leii, näjza rexpejnɔpacni, lo mex. Xhidajlreni tre', luxh sanajlreni Jesús.

<sup>16</sup>Dxercru rebejn ni ruluii leii näj refarisee, che bahuiireni cayaunäjni renani rusquijx näjza rebendojɔl, räjpreni loj rexpejnɔpac Jesús:

—¿Xhicuent rbenäj xmasrtu reni rusquijx näj rebendojɔl, luxh raunäjnireni, ränäjnireni?

<sup>17</sup>Che biejn diajg Jesús xhi caniireni, räjpni lojreni:

—Renani nadip nadaan di guiquiin doctoor, per reni racxhuu rquuin doctoor. Dina niädtedxä rebensa'c, biädtedxä rebendojɔl, te gusiech lajzreni.

*Gunabdiidxreni loj Jesús xcuent yälrucua'n*  
(Mt. 9:14-17; Lc. 5:33-39)

<sup>18</sup>Cagucua'n rexpejn Juan näj rexpejn refarisee, renani najc rebenguidoo loj guedx Israel. Dxejc biäd gaii bejn loj Jesús, gunabdiidxreni lojni räjpreni:

—¿Xhicuent cagucua'n rexpejn Juan näj rexpejn refarisee luxh rexpejnɔpacu di gucua'n?

<sup>19</sup>Dxejcti räjp Jesús lojreni:

—¿La rucua'n rebejn ni rdon chää cadro ru' yälruchnaa che meer suga' bi'n? Che meer suga' bi'n lojreni, direni gucua'n.

<sup>20</sup>Per sidzujɔn dxej sibicaj bi'n lojreni, dxejc sii sucua'nreni.

<sup>21</sup>'Rut rucuaadi tla' ladcoob loj tla' ladyux, sa'csi ladcoob rxu'nni luxh rutiäjzni ladyuxga, dxejc xhiroobruni räjs.

<sup>22</sup>Rutza rusäldi bin ni gajd guilaj nen guidyux ni abigaa. Sa'csi bin ni gajd guilajga sutiäjzni guijdga che guilajni, luxh sinijt binga näjza guijdga. Ni'cni nanab gusälni bincoob nen guidcoobza.

*Batojɔp rebejn ni rinajl Jesús triuu sabd*  
(Mt. 12:1-8; Lc. 6:1-5)

<sup>23</sup>Te sabd, dxej ni rusilajz rexpejn Israel, sasaj Jesús nez loj reyuya'n. Sas gusloj rexpejnɔpacni caläädx doj lo triuu.

<sup>24</sup>Dxejc räjp refarisee, renani najc benguidoo loj guedx Israel, loj Jesús:

—Arniä, ¿xhicuent rujn rexpejnɔpacu dzuun ni di guchaag gunni nen dxej ni rusilajznu, ä?

<sup>25</sup>Dxejcti räjp Jesús lojreni:

—¿La gajdtu goɔl nani bejn toDavid te huält, laani näj resa'ni, ä? Che biädäx xhi gauureni, gulaanreni.

<sup>26</sup>Biu' David nen xyu' Dios cheni guyu' toAbiatar loj Dios. Abiatar sajcru loj rebixhojz ni guyu' nen xquidoo rexpejn Israel. Dxejc gudajw toDavid reyätxtiil ni dzuub ro'c. Badeedzanini gudajw rebejn ni yunäjni. Luxh rebixhojztis rajc rajw yätxtiilga.

<sup>27</sup>Räjpza Jesús lojreni:

—Dios bejn dxe sabd sa'csi najnni naquiinpac gusilajz bejn. Dini niujn sabd te gapda bejn.

<sup>28</sup> Ni'cni narä, Xi'n Dios ni gujc Niguui, näjza sabd rnibeä.

### 3

#### *Niguui ni nabijdz te naani*

*(Mt. 12:9-14; Lc. 6:6-11)*

<sup>1</sup> Biu' Jesús stehuält neñ xquidobäz rexpejn Israel. Ro'c yu' te niguui nani nabijdz te naani.

<sup>2</sup> Niluxh ro'c cagula'tz rebejn Jesús don la susiajcní niguuiiga sabd, dxej ni rusilajz rexpejn Israel, sa'csi rlaizreni cue'creni xquejni loj nani rnibee rexpejn Israel.

<sup>3</sup> Dxejc räjp Jesús lo niguui nani nabijdz naani:

—Huistie, guzuj galäiire.

<sup>4</sup> Dxejcti gunabdidxgajcni loj gaii rebejnğa, räjpni:

—¿La laaca gunni dzunza'c, o la dzunguijdx, sabd, ä? ¿La suslaani yälnabajn, o la sugu'tni?

Luxh laareni biacdxireni.

<sup>5</sup> Dxejc nadxe'ch bahuii Jesús lojreni, luxh guc-huin lajzni, sa'csi guc najd lajzreni. Dxejc räjp Jesús loj niguuiiga:

—Baslii naalu.

Dxejcti basliini naani. Biajctini.

<sup>6</sup> Dxejcro biunejz refarisee. Guslogajceni caguchaagreni diidx con reni nadxaag Herodes, te don xho ju'treni Jesús.

#### *Xhidajl bejn bire' ro' nis*

<sup>7</sup> Jesús näjza rexpejn pacni sääreni ro' nis, luxh xhidajl beñ Galilee birinajlni.

<sup>8</sup> Che gojnreni redzunro ni rujn Jesús, xhidajlreni biääd. Yu'reni birii Judea, yu'reni birii guedx Jerusalén, yu'reni birii Idumea, yu'zarení birii nejz stelaad gueu Jordán, biriizarení nez guedx Tiro, näj nez guedx Sidón, biädhuiireni loj Jesús.

<sup>9</sup> Ni'cni räjp Jesús loj rexpejn pacni quilreni te canuu, te na'c gutää rebenxhidaalgani.

<sup>10</sup> Abasiajc Jesús xhidajl beñracxhuu, ni'cni guiraasi beñracxhuu caxa't lojni, te canreni te jiajcreni.

<sup>11</sup> Niluxh che rhuii rebenxhab lojni, ruzuxhijbreni lojni. Dxejcti rbedxa'reni räjpreni:

—Luj najclu Xi'n Dios.

<sup>12</sup> Dxejcti Jesús gudidxa' lojreni te na'c niäjbreni chu najcni.

#### *Gule Jesús tzubitiop bejn loj reni rinajlni*

*(Mt. 10:1-4; Lc. 6:12-16)*

<sup>13</sup> Birii Jesús sääni lo te dalje' cadro gurejdxni renani rlaizni cueni. Gubigtireni lojni.

<sup>14</sup> Dxejcti guleni tzubitio'preni te sanäjreni laani, te guxhálnireni chaluireni xtidx Dios;

<sup>15</sup> te ga'preni yälnrabee te gusiajcreni beñracxhuu, te cuääzarení rebenxhab.

<sup>16</sup> Retzubitio'p bejn ni gule Jesús najc: Simón, ni gulälajzani Pedr.

<sup>17</sup> Dxejcti Jacob con Juan, rexi'n Zebedeo, gulälaj Jesús Boanerges. Con xtiidxnu sälojni bejn ni nasesya', si'c guzii.

<sup>18</sup> Nāj Andrés, Felipe, Bartolomé, Mateo, Tomás, Jacoob xi'n Alfeo, Tadeo, Simón, ni di guidxejb rnigajc,

<sup>19</sup> nāj Judas Iscariot, ni bato' Jesús loj reni rdxechlajz lojni. Să'tireni rolizjz te dade'.

*Yälrmijaj loj Sprit Dxan xte Dios*

(Mt. 12:22-32; Lc. 11:14-23; 12:10)

<sup>20</sup> Dxejc bidopsac rebejnxhidaalga; nicla niajc niaunāj Jesús rexpejnpacni.

<sup>21</sup> Che biejn diajg resa' Jesús dee, biädxhiirenini, sa'csi naareni, yejcnı cayajc.

<sup>22</sup> Rebejn ni ruluii leiı ni birii guedx Jerusalén bidzujnza lo Jesús, dxejc räjpreni:

—Beelzebú, nani rnıbee rebejndxab, yu' neñ lastoo niguiire. Niluxh nani rnıbee rebejndxab rudeed yälrnıbee lo Jesús te cuääni bejndxab.

<sup>23</sup> Dxejc gurejdx Jesús rebejnğa, bijyni te cuent ni ruluii lojreni, räjpni:

—¿Xho gurılaagw bejndxab lagajc sabendxabni?

<sup>24</sup> Palga rebejn xten te yälrnıbee la'reni, luxh tilnäj te cuaani ste cuaaga, di yälrnıbeega chu xchej.

<sup>25</sup> Palga te famil rdılınäj lagajc sa'ni, di familga chu xchej.

<sup>26</sup> Palga bejndxab nani rnıbee tilnäj lagajc laani, di xcälrnıbeeni chu xchej, sa'csi ni'c gun luuxni.

<sup>27</sup> Rut gacdi jiu' rolizjz te niguidaan, cuanni xhixhtenni, palga dini gulıbx-gaani, si'ctis sajz cuanni xhixhtenni.

<sup>28</sup> Rnılıäpac lojtu guiraa dojl näjza yälrmijaj xten rebejn sajz jia.

<sup>29</sup> Nani guiniyaj Sprit Dxan xten Dios, digacdi guıbicaj rextoljni, anuutisni xtojlnı par tejpas.

<sup>30</sup> Räjpni si'c sa'csi caniireni yu' bejndxab neñ lastooni.

*Xnan con rebetzhuin Jesús*

(Mt. 12:46-50; Lc. 8:19-21)

<sup>31</sup> Dxejcru bidzujn xnan Jesús, nāj rebetzhuinni. Direni niu', baxhałtisreni chu huıtejdxni.

<sup>32</sup> Rebejn ni sobga' gabi Jesús räjpreni lojni:

—Xnanlu nāj rebejtzlu suga' ro lä', caguıilreni luj.

<sup>33</sup> Dxejcti räjp Jesús lojreni:

—¿Chu reni'c najc xnanä nāj rebetzä?

<sup>34</sup> Bahuıgajcni loj renani sobga' gabini, dxejc räjpni lojreni:

—Redee najc xnanä, rebetzä.

<sup>35</sup> Chutis ni rujn ni rıajz Dios, ni'c najc betzä, bisianä, näjza xnanä.

## 4

*Xcuent niguii ni sale'c binij*

(Mt. 13:1-23; Lc. 8:4-15)

<sup>1</sup> Suga' Jesús ro' nis guslosac caguluıini xtidx Dios, luxh bidojpb xhidajl bejn cadro suga'ni. Xhidalduxh najczeni, ni'cni biu' Jesús neñ te canuu ni suga' ro' nisga. Dxejcti gurejni nenga, biääd guiraa bejn bia'ntireni ro' nis.

<sup>2</sup> Dxejc baluiinireni guıraloj, ganax cuent ni ruluii guniini. Che caguluıini, räjpni lojreni:

<sup>3</sup> —Gucuadıajgtu dee. Guyu' te niguii. Biriini sale'cni binij.

<sup>4</sup> Che guslojni cabe'cni, yu' lajt biajpb binijga cuä' nezyuj. Sas biääd reman xhaguıbaa, gudajwreni binijga.

<sup>5</sup> Stee lajt biajb binijga neñ guij cadre xheti xhidajl yuj. Binijga gulengajcni, sa'csi xheti xhidajl yuj ro'c.

<sup>6</sup> Dxejc, sa'csi lo jiaa yu' xlobaani, che birii gubijdx, bigoḷni, gubijdztni.

<sup>7</sup> Stee lajt biajb binijga neñ yaguejch. Dxejcti biroob reyaguejchga, luxh bejnreni balaa loj binijga, ni'cni gujcnj ganax bilii.

<sup>8</sup> Per stee lajtga biajb binij lo yusa'c. Gulejn reyajlga, guroobreni, gucsa'creni. Yu'reni cuaj galbitzuu xob, yu'reni cuaj gayojñ xob, yu'zarenj cuaj tegayuu xob.

<sup>9</sup> Dxejc räjpni lojreni:

—Chutis ni rlanj guisheed, sucuadiajgni.

<sup>10</sup> Che asii xhidajl bejn, rebejn nani suga' gajxh cadre suganäj Jesús guitzubitio'p xpejn pacni gunabdiidx lo Jesús xhi säloj cuentre.

<sup>11</sup> Dxejc räjp Jesús:

—Dios abejn gacheetu te gantu xho najc yälxhiga'tz xten xcälrnibee Dios nani najc xhiga'tz najli. Niluxh lo ste'ca bejn con cuenttis rniä guiraa recosre,

<sup>12</sup> te mase cahuiireni direni gumbee, te mase cayiejn diajgreni, direni gacbee. Scree gacni, te na'c gusiejch lajzreni, te na'c guibicaj xtojreni.

<sup>13</sup> Räjpzani lojreni:

—¿La ditu gacbee cuentre? ¿Xhocha gacheetu xhidajlru cuent?

<sup>14</sup> Niguiire nani sale'c binij najc si'c te nani ruluii xtidx Dios.

<sup>15</sup> Yu' bejn ni najc si'c binij ni biajb cuä' nezyuj: riejn diajgreni xtidx Dios nani ruluii bejn. Dxejc che jiejn diajgreni xtidx Dios, riäd Satanás rbägajcni xtidx Dios ni yu' neñ lastooreni.

<sup>16</sup> Yu'za rebejn ni najc si'c binij ni biajb neñ reguij, renani che jiejn diajgreni xtidx Dios, rbaa lajzreni rca'reni diidxga.

<sup>17</sup> Niluxh direni nisiudzu'tz, sa'csi guxii huilii lajzreni. Che rdejreni trabajw o che rusacsj bejnreni xcuent xtidx Dios, rusaanreni xtidx Dios.

<sup>18</sup> Yu'zarenj najc si'c binij ni biajb neñ yaguejch, riejn diajgreni xtidx Dios,

<sup>19</sup> dxejc che ru'rurenj yärsia' xcuent recos guedxliujre, rsia' lajzreni ga'preni meel, rlanjreni ga'prurenj guiraloj recos, dxejc riu' redee neñ lastooreni, rusäuni lo xtidx Dios, xlia'si biejn diajgreni xtidx Dios.

<sup>20</sup> Yu'za bejn ni riejn diajgreni xtidx Dios, rlii lajzreni diidxga, xhet xlia'ti biejn diajgreni xtidx Dios. Najceni si'c binij ni biajb loj yusa'c. Yu' rebejn ni najc si'c nani cuaj galbitzuu xob lojni, yu'za rebejn ni najc si'c nani cuaj gayojñ xob lojni, yu'za rebejn ni najc si'c nani cuaj tegayuu xob lojni.

### *Xhet yuchetzu'tzdi ni di guidzujñ dxej sisäbdiidx (Lc. 8:16-18)*

<sup>21</sup> Räjpza Jesús lojreni:

—¿La riädnätu te bajl te suuni dejt te alm, o neñ te loon, ä? ¿La xhet nanabdi suuni jiaa te guzanijni, ä?

<sup>22</sup> Xhet yuchetzu'tzdi ni di guidzujñ dxej sisäbdiidx. Xhetiza xhicos naga'tztis. Naga'tzni naj, niluxh sidzujñ dxej sule'ni.

<sup>23</sup> Pal yu' chu rlanj guisheed, sucuadiajgni.

<sup>24</sup> Räjpza Jesús lojreni:

—Coḷyunxgaa xhigab rediidx ni riejn diajgtu. Nani rusälḷtu loj xhigabtu, ni'cza guniidx Dios xca'tu, luxh sisiojbru yejc ni xca'tu.

<sup>25</sup> Renani rajp che'n yälnajñ, lojreni sudeedru Dios yälnajñ. Luxh renani xhetru rusälḷdi loj xhigabreni, sudzucaj Dios yälnajñ nani rajpreni.

### *Xcuent binij ni roob*

<sup>26</sup> Guniiza Jesús lojreni:

—Yälrnibee xten Dios najc si'c rsiajč te niguii che rbe'cni binij lo yuj,

<sup>27</sup> dxejč yääl riguesni, rdxee ristieni, dxejcti rliejn binijga, luxh di niguiiga gan xho roobni.

<sup>28</sup> Acanajz yujga rajč binij lojni. Galoo rii cuane'ga, sas rii doj lojni. Dxejcru rdaxaj bejdze' neñ dojga.

<sup>29</sup> Dxejcti che aguyajl bedze'ga, ruxhałni chu ritiuugni, sa'csi abidzujn dxej ni guidojpnı.

*Xcuent bedz muxhtas*

(Mt. 13:31-32; Lc. 13:18-19)

<sup>30</sup> Räjpza Jesús:

—¿Xhini'c najc si'c najc xcälrnibee Dios? ¿Xhi te cuent guiniinu te guiluiin-uni?

<sup>31</sup> Si'c te bedz muxhtas ni rbej loyuj, si'c najcni. Bedz muxhtas najcni bedz baze'ru loj guiralii bedze' ni yu' loj guedxliuj.

<sup>32</sup> Dxejč che agurejni, roobni, rajcni yagruru loj recuaan. Dxejcti roob rexajcwni te rajč rujn reman xhaguibaa xpitiäzni neñ xpalaani.

*Si'c baluii Jesús ganax con cuent*

(Mt. 13:34-35)

<sup>33</sup> Si'c ruluii Jesús rebejn xtidx Dios guniini xhidat cuent sa' redee, si'ctis ni rajč racheereni.

<sup>34</sup> Con recuent ni ruluiitis guni Jesús lojreni. Niluxh lo rexpejnıpacni basule'ni guiraa recuentre.

*Rusiadxi Jesús bej näj nisdo*

(Mt. 8:23-27; Lc. 8:22-25)

<sup>35</sup> Lagajč gudxejga räjpni loj rexpejnıpacni:

—Colcho', chonnu stelaad nis xten Galilee.

<sup>36</sup> Basa'ntireni rebejn, sanätireni Jesús neñ canuu cadro sobgajcni. Dxejcti sgaii canuu sanajlnı.

<sup>37</sup> Chela gubi' te beduxh, gusloj cayu' nis neñ canuuga. Cadxaj canuuga nis.

<sup>38</sup> Nagayejs Jesús dejtž canuuga, nagayejsni. Bacuäänreni Jesús, räpgajceni lojni:

—Dad mastr, ¿la dilu jiu siääznu neñ nis, ä?

<sup>39</sup> Dxejč huistie Jesús, gudidxa'ni lo bejga, räjpzani lo nis:

—Guredxi.

Guläzgjajč bej, biacdxini.

<sup>40</sup> Räjıp Jesús loj rexpejnıpacni:

—¿Xhicuent cadxebduxhtu? ¿La ditu chalilajž xtidxä, ä?

<sup>41</sup> Luxh laareni bidxelorejreni, räjpreni loj sa'reni:

—¿Chucha dee ni rnibee bej con nis, luxh ruzoobreni xtiidxni?

## 5

*Nigui Gadara ni yu' bendxab neñ lastooni*

(Mt. 8:28-34; Lc. 8:26-39)

<sup>1</sup> Bidzujntireni stelaad ro' nisga, lo yuj xten Gadara.

<sup>2</sup> Si'ctis ni birii Jesús neñ canuu, biädgjajč te niguii lojni ni birii neñ rebiliää cadro rga'tž bengut. Yu' bendxab neñ lastoo niguiiga.

<sup>3</sup> Rbäjzni neñ rebiliääga luxh rut rajcdi rucuaduuni, nicla con cadenguiib.

<sup>4</sup> Xhidajl huält agacbacuaduureni ni', naa niguiiga con cadenguiib, luxh litis batiuugni recadenguiibga, rut rajcdi rusiadcxini.

<sup>5</sup> Si'ctis canzajni, dxej, yääl. Rbedxa'ni neṅ redajn, neṅ rebiliää, luxh cagutiugni tiejxhni con reguij.

<sup>6</sup> Che bahuini loj Jesús zijtru, baxuṅni huichaglojni Jesús, bazuxhijbni lojni.

<sup>7</sup> Dxejcti rbedxaduxhni, räjpni:

—¿Xhicuent siäädlu loä, Jesús, Xi'n Dios ni yu' jiaro? Rniabä lojlu nez loj Dios na'c gusacsilu narä.

<sup>8</sup> Sa'csi agac cayäjb Jesús lojni:

—Luj, beṅdxab, birii neṅ lastoo niguiiga.

<sup>9</sup> Dxejcti gunabdiidx Jesús räjpni:

—¿Chu laalu?

Dxejc räjpni:

—Narä laä Legión, nani säloj xhidalro, sa'csi xhidajl najcnu.

<sup>10</sup> Sanuutis canabni lo Jesús na'c guxhaṅni rebēṅdxabga ste'ca guejdx.

<sup>11</sup> Ro'c tre' xhidalduxh cuch cuä' dane'ga, cayajwreni.

<sup>12</sup> Dxejc gunab rebēṅdxabga loj Jesús, räjpreni:

—Baxhaṅ nuure loj recuchre te jiu'nu neṅ lastooreni.

<sup>13</sup> Dxejcti basaan Jesúsreni. Biriiṅni rebēṅdxabga neṅ niguiiga, dxejc biu'reni neṅ lastoo recuchga. Yu' si'cti tiop miṅ cuch ro'c. Baxuṅ recuchga, dxejc biroṅreni ro' guilaj, bitejbreni neṅ nis, gujtireni neṅ nisga.

<sup>14</sup> Renani cayajp recuchga baxuṅreni, huiyeiireni diidxga neṅ guejdx, näjza loniaa. Dxejc biääd beṅ biädhuui nani gujc ro'c.

<sup>15</sup> Che bidzujṅreni cadro suga' Jesús, bahuiireni loj niguii nani guyu' rebēṅdxabga neṅ lastooni. Sobga'ni ro'c, najcwni xhajibni luxh nasa'c yejcti. Niguiire najc nani guyu' beṅdxab ni laa Legión neṅ lastooni. Bidxejbti rebeṅ nani bahui lojni.

<sup>16</sup> Dxejcru rebeṅ ni bahuii xhi gujc ro', huiyeiireni diidx xho guzajc niguiire nani guyu' beṅdxab neṅni galoo, näjza nani guzajc recuch.

<sup>17</sup> Dxejc gosloj canabreni loj Jesús jiunejzni.

<sup>18</sup> Che biu' Jesús neṅ canuu, niguii nani guyu' beṅdxab neṅ lastooni gunabni loj Jesús, räjpni:

—Huinä narä.

<sup>19</sup> Per di Jesús nusaan nijni. Räjp Jesús lojni:

—Huij rolizlu, lo resa'lu. Huiyeii diidx lojreni xho bennäj Dadlu, näjza xho balaslajzni luj.

<sup>20</sup> Sä'ti niguiiga, gosloj cayujyini diidx neṅ reguejdx xten Decápolis xho bennäj Jesúsni. Guiraa rebeṅ bidxeloj.

### *Xindxa'p Jairo näjza gunaa ni bahual xhajib Jesús*

*(Mt. 9:18-26; Lc. 8:40-56)*

<sup>21</sup> Che bidzunsac Jesús stelaad ro' nisga neṅ canuu, bidzujṅ xhidalduxh beṅ cadro suga'ni. Bia'nti Jesús ro' nisga.

<sup>22</sup> Dxejcru biääd te niguii nani laa Jairo, ni rnibee neṅ xquidobäz rexpen Israel. Che bahuini loj Jesús, bazuxhijbni lojni.

<sup>23</sup> Canabpacni lojni, räjpni:

—Xindxapä'ä acayejt. Gudaa, guzujlu naalu yejcti, te jiajcti, te guibajṅni.

<sup>24</sup> Sanäti Jesús beṅga. Xhidajl beṅ sanajlṅni, luxh cagutääreneni.

<sup>25</sup> Loj rebēṅxhidaalga yu' te gunaa ni agujc tzubitio'p ijz racxhuuni yälguidxbäii.

26 Agudedduxhni trabajw, abahuii xhidajl doctoorni. Xlia'si abanijtni guiraa nani rajpni, luxh xhet racnäjđini, alga rxuuruni.

27 Sa'csi biejn diajgni xhini'c canii rebejn xcuent Jesús, gubig gunaaga nez dejt Jesús, guideb neñ rebejn, bahualni xhajb Jesús.

28 Cayujni xhigab, naani: "Palga narä falä xhajbtisni, siacä."

29 Lagajc dxejc guläjz caxe' xtiejñni, gucbeeza tiejxhni abirii xcälracxhuuni.

30 Gucbegajc Jesús yu' chu abasiajñi. Gubiregajcni neñ rebeñxhidaalga, räjpni:

—¿Chuni'c bahual xhabä?

31 Dxejcru räjp rexejñpacni lojni:

—Rhuiilu beñxhidaal cagutäalu, luxh naalu: "¿Chuni'c bahual xhabä?"

32 Sas cahuii Jesús nez ree, nez rec, te fiini loj nani bahualni.

33 Dxejc bidxejb gunaare, racejsni, sa'csi gucbeeni xhini'c gujñi. Dxejc biäädni, bazuxhijbni loj Jesús, räbliini loj Jesús guira'ti ni bejñni.

34 Dxejc räjp Jesús lojni:

—Xindxä'pä, abiajclu sa'csi huililajzlu. Gulecdxi lajzlu, huij rolijzlu, abiajc xcälracxhuulu.

35 Canisijc Jesús si'c che bidzujñ renani birii rolijz dade' ni rnibee neñ xquidobäz rexejñ Israel. Räjpreni:

—Agujt xindxape'lu. ¿Xhicuent rusieedrulu Dad mastr?

36 Dxejc che biejn diajg Jesús nani caniiireni, räjpni lo dade'ga:

—Na'c guidxejblu. Bililajztis.

37 Luxh dini nusaanru nij chu ninäni, Pedrtis näj Jacob näjza Juan bejtni.

38 Che bidzujñni rolijz dade'ga, bahuii Jesús biey ni cayujñ rebejn ni rbedxa' roon.

39 Biu'tini räjpni:

—¿Xhicuent rujntu si'c? Gajd dxape're guet. Nagayejsini.

40 Alga baxhiznäjrenini. Dxejc gunibee Jesús birii guiraa rebejnga. Dxejcti huiñäni xcuzajñ dxape'ga con renani sanäni. Biu'reni cadro naga' dxape're.

41 Gunaazni naa dxape'ga, dxejc räjpni:

—Talita cumi —nani säloj con xtiidxnu: Dxape', lojlu rniä, huistie.

42 Dxejcti huistiegajc dxape'. Tzubitio'p ijz yu' dxape'ga. Bidxeloduxh rebejn ni bahuii guläs Jesús dxape'ga.

43 Dxejc balijdx Jesús reni te rut lojdi chaye'tzreni xhini'c gujc. Gunibega-jñi gudeedreni xhi gauu dxape'ga.

## 6

### *Che guyu' Jesús Nazare't*

(Mt. 13:53-58; Lc. 4:16-30)

1 Dxejcru birii Jesús ro'c, huijñi lajdxni, sanäzani rexejñpacni.

2 Che bidzujñ sabd, dxej nani rusilajz rexejñ Israel, gusloj caguluiini neñ xquidobäz rexejñ Israel. Bidxeloj xhidajl bejn nani biejn diajg rextiidxni, räjpreni:

—¿Caro bisieed niguiire guiraa recosre? ¿Xhi yälñajnre cua'ni ni'c rajc rujñi rextzunduxh Dios con ñaani?

3 ¿La xhet laadi carpinteer, xi'n Marii, bejtz Jacob, näj José, näj Judas, näjza Simón dee, ä? ¿La xhet reedi rbäjz rebisianhuinni?

Luxh bidxechlajzreni lojni.

4 Dxejc räjp Jesús lojreni:

—Catis rinälajzreni te ni rnii xtidx Dios. Lajdxtisni, lagajc loj resa'ni, rolijztisni, ro'c rut rinälajzdini.

<sup>5</sup> Luxh di niajcdi niujn Jesús xhidajl milaagwr ro'c. Tiopchontis beñracxhuu basiajčni, bazujni naani yejčreni.

<sup>6</sup> Bidxelo Jesús sa'csi di lajzreni nilii. Caguluiitini neñ guiraa reguejdx'e ni ria'n gajxh nejzga.

*Baxhal Jesús tzubitio'p bejn ni rinajl ni chaluiireni xtidx Dios*  
(Mt. 10:5-15; Lc. 9:1-6)

<sup>7</sup> Dxejcru gurejdxni guitzubitio'p xpejn pacni. Gusloj caguxhal ni tiopgajreni; badeedzani yäl rñibee lojreni te guinibeereni loj rebendxab.

<sup>8</sup> Gunibeeni xhet chanädireni lo nejz, ganaxhtis te yajg te sanäjreni. Di nungäjł chanäreni nicla bisuuud, nicla yätxtiil, niclaza meel neñ dobdäjł.

<sup>9</sup> Nungäjłza xcaj gura'ch ni'reni, năgajc ga'preni tejtis gamangw, xhet tio'pdini.

<sup>10</sup> Dxejcti răjpn i lojreni:

—Cadrotis jiu'tu neñ te guejdx, coljia'n neñ tejtis yu' guiraa redxey ni chutu guejdxga.

<sup>11</sup> Palga yu' te guejdx cadro direni gusaan jiu'tu luxh di rłajzreni cuadi-ajgreni diidx ni sanātu, colrii guejdxga, colcuijb guxhuj ni'tu si'c te seen te gacbeereni xhet laadi bejnreni. Rniliăpac lojtu, guxiiru trabajw ted reben Sodoma năj reben Gomorra quela rebejn ni yu' guejdx cadro direni gusaan jiu'tu.

<sup>12</sup> Dxejc biriireni, săäreni. Cayăbgajčreni nanabpac gusiejch lajz rebejn.

<sup>13</sup> Gulăăzaren i xhidajl beñdxab dxejcti gudăăbreni se't yejc xhidajl beñracxhuu, luxh biajčreni.

*Xcălgujt Juan ni rutiobnis*  
(Mt. 14:1-12; Lc. 9:7-9)

<sup>14</sup> Herodes najc nani rñibee dxejc. Biejn diajgni xpala'n Jesús, sa'csi guirali i rebejn cală'p xpala'n ni. Dxejc răjpn Herodes:

—Juan nani rutiobnis ahuăjs loj rebengut, ni'c rajc rujnni remilagwre.

<sup>15</sup> Sgaii bejn răjpn:

—Laa Elías ni gunii xtidx Diosni.

Sgaiireni răjpn:

—Laa te bejn ni rnii xtidx Dios, o sa' te rebejn ni gunii xtidx Dios agujc xchero.

<sup>16</sup> Che biejn diajg Herodes si'c, răjpn i:

—Laa Juan dee, nani gunibeă biru' yejčni, luxh năj agubansacni loj rebengut.

<sup>17</sup> Sa'csi lagajc Herodes gunibee biga' Juan, dxejc bacuaduurenini con cadenguiib neñ latzguiib, xcălnasa'c Herodías. Herodías gujc chăäl Lib, bejtz Herodes, dxejc cua' Herodes gunaaga si'c chăäl ni.

<sup>18</sup> Răjpn Juan loj Herodes:

—Xhet laadi rbăznăjlu chăäl bejtzlu.

<sup>19</sup> Ni'cni rdxechlajz Herodías loj Juan, luxh rłajzni ju'tnini, luxh di niajcdini

<sup>20</sup> sa'csi rdxejb Herodes Juan, sa'csi najnni beñsa'c, beñdxan najc Juan, ni'cni dini nusaan niujn Herodías latsiajni. Mase dini gacbesa'c ni rnii Juan, rucuađiagsa'cni xtiidxni.

<sup>21</sup> Niluxh guyu' xmood Herodías. Che gojł laj Herodes, bayaanni rexpejnni ni rñibee, năjza rebejn nani sajč nez regiön Galilee.



22 Dxejcti biu' xindxa'p Herodías cadro cayajwreni, baya'ni nez lojreni. Bidxaglazduxh Herodes nájza rexpoozni baya' gunaaga, xindxa'p Herodías. Dxejc rájp Herodes lo gunaaga:

—Gunab ni rljatzislu loä, narä sunidxäni.

23 Dxejcru räplii Herodes lojni:

—Sunidxä xhitis ni guiniablu. Mase gala' yuj ni rnibeä.

24 Biriitini neñ yu', huiye'tzni loj xnanni, rájpmi:

—¿Xhini'c guiniabä lojni?

Dxejc rájp xnanni lojni:

—Gunab yejc Juan ni rutiobnis lojni.

25 Huigajcni loj rei, sas gunabni lojni, rájpmi:

—Rlazä gunidxgajclu loä yejc Juan ni rutiobnis. Neñ te pla't baniidx yejcmi.

26 Dxejcti guc-huinduxh lajz Herodes, sa'csi abadeedni xtiidxni lojni, luxh sa'csi abiejn diajg renani sobganäjni lo xmexni, ni'c dipac rljazni nudxojjni nani gunaaga gunaaga lojni.

27 Baxhalgajc rei te soldaad ni rcanäj ro'c, baxhalnini, te chaxiini yejc Juan.

28 Ni'c huij, dxejcti bagu'tni Juan neñ latzguiib, biädñätini yejc Juan neñ te pla't. Badeedtinini loj gunaaga. Dxejcti gunaaga badeednini loj xnanni.

29 Che biejn diajg rexpejnpac Juan si'c, biädñäsreni togoolga. Dxejcti bacua'tzrenini neñ te baa.

### *Bayaan Jesús gaii mil bejn*

*(Mt. 14:13-21; Lc. 9:10-17; Jn. 6:1-14)*

30 Che gubi' renani baxhal Jesús, bijreni diidx guiraa ni bejnreni nájza ni baluiireni.

31 Dxejc rájp Jesús lojreni:

—Coltaa, xtebnu choñnu cadro rut rbäjzdi, guisilaaznu tudxe'n.

Rájp Jesús si'c sa'csi yu' xhidajl bejn ni sää, ni siääd, nicla gal gauureni.

32 Dxejcti sääreni neñ te canuu cadro rut rbäjzdi.

33 Bahuii xhidajl bejn sääreni, biembeereni Jesús. Dxejc xhidajlreni huini' ro'c, xhidajl guejdx biriireni, ganidreni bidzujñreni loj Jesús nájza rexpejnpacni, dxejcti bidojpreni lojni.

34 Birii Jesús neñ canuu, bahuiini loj beñxhidaalga. Dxejc balazlajznireni, sa'csi najczeni si'c rexiiil ni ruti baxtoor xtenreni. Dxejc gusloj caguluiinireni guiraloj.

35 Che gojl gudxej, gubig rexpejnpacni lojni, rájpreni:

—Rut rbäjzdi ree, luxh agudxej naj.

36 Baxhal rebejn te cháäreni lo reguejdx, nájza reñench, te chasiireni yätxtiil gauureni sa'csi xheti xhi gauureni ree.

37 Dxejc rájp Jesús lojreni:

—La'tu coldeed xhi gauureni.

Dxejc rájpreni loj Jesús:

—¿Xhixh sajl tiop gayuu meel yätxtiil chosiinu gauu guiraa rebeñxhidajlre?

38 Dxejcti rájp Jesús lojreni:

—¿Bal yätxtiil rajptu? Colchahuii.

Che gojnreni balni dxejc rájpreni:

—Gaii yätxtiil, nájza tiop bäjł.

39 Dxejcru gunibee Jesús rájpreni loj guiraa rebejn:

—Colcuej xcua-xcuaatu loj guixhaya'.

<sup>40</sup> Sas gurej xcua-xcuaareni. Yu' lajt gurej tegayuureni, yu' lajt gurej garol gayuureni.

<sup>41</sup> Dxejcti cua' Jesús guigaii yätxtiilga näjza guiro'p bäljga, bahuiini xh-aguibaa, badeedni xquixhtios loj Dios. Dxejcti gula'ni yätxtiil näjza guiro'p bälj, badeednini loj rexpejn<sub>pacni</sub> te badeedrenini loj guiraa reben<sub>xhidaalga</sub>.

<sup>42</sup> Dxejc gudajw guiraareni, gudxaj xque'reni.

<sup>43</sup> Dxejcru batojpreni tzubitiop dxijm<sub>q</sub> guidxadoo yätxtiil näjza bälj ni bia'n.

<sup>44</sup> Luxh loj guiraa rebejn ni gudajw yu' si'cti gaii mil niguii.

### *Guzaj Jesús loj nis*

*(Mt. 14:22-27; Jn. 6:16-21)*

<sup>45</sup> Gunibee Jesús jiu' rexpejn<sub>pacni</sub> neñ canuu, chägajcreni Betsaida, ni tre' dejtz nis stelaad, lałni cagusadiidxn<sub>i</sub> rebejn.

<sup>46</sup> Che gulujx basadiidxnireni, sääni neñ redane', sanabni lo Dios.

<sup>47</sup> Cheni acayu' guxhijñ, yu' rexpejn<sub>pacni</sub> neñ canuu galäi nis lał ni suga' Jesús xtebni ro' nis.

<sup>48</sup> Dxejcti bahuii Jesús abadxajgreni cagusajreni xcanuureni, sa'csi säbduxh bej. Bejga rulanaareni nez dejtzreni stehuält. Dxejcru che acara yääl, gusaj Jesús loj nis, huijni cadro sasajreni, rlanjzi ninijdni lojreni.

<sup>49</sup> Dxejc che bahuiireni sasaj Jesús loj nis, naareni pet te beñmalni, ni'c guredxa'reni.

<sup>50</sup> Guiraareni bahuiireni lojni, bidxebduxh<sub>reni</sub>. Sas gunigajcni lojreni, räjpni:

—Colsutijp lajztu. Laa naräni. Na'c guidx<sub>e</sub>jbtu.

<sup>51</sup> Dxejcti huä'p Jesús neñ canuu cadro yu'reni. Lagajc dxejc biacdx<sub>i</sub> bej, luxh laareni bidxeloduxh<sub>reni</sub>,

<sup>52</sup> sa'csi direni niacbee xhini'c bennäj Jesús reyätxtiil. Guc najd lajzreni, ni'c direni niacbee.

### *Basajc Jesús reben<sub>racxhuu</sub> neñ guedx Genesare't*

*(Mt. 14:34-36)*

<sup>53</sup> Gudejdreni lo nis, bidzujñreni lo yuj xten Genesare't. Ro'c bacuaduureni canuu ro' nis.

<sup>54</sup> Che biriireni neñ canuu, biembegajc rebejn Jesús,

<sup>55</sup> dxejcti birii rebejn guideb nejzga. Guslojti siädnäreni beñ<sub>racxhuu</sub> loj Jesús, naga' reben<sub>racxhuuga</sub> lo da'. Cadrotis riejn diajgreni yu' Jesús riädnäreni reben<sub>racxhuu</sub>.

<sup>56</sup> Niluxh cadrotis rij Jesús, neñ reguedxbäz, neñ reguedxro, näjza loj rerench, rguixh<sub>reni</sub> reben<sub>racxhuu</sub> cadro rajc guii. Dxejcti rniabreni loj Jesús te gac caanreni xhajbni, niluxh b<sub>ia</sub>jc guiralii renani gudajw xhajb Jesús.

## 7

### *Nani runijt lastoo bejn*

*(Mt. 15:1-20)*

<sup>1</sup> Dxejcti refarisee, renani najc beñguidoo loj guedx Israel, näjza gaii rebejn ni ruluii leii, renani birii Jerusalén, bidojpreni loj Jesús.

<sup>2</sup> Bahuiireni cayajw gaii rexpejn<sub>pac</sub> Jesús, luxh canii rebejn nacdxuudx naareni (dee säloj direni quiib <sub>naareni</sub> si'ctis ni rdiib <sub>naa</sub> rebeñ lajdxreni). Ni'cni guniyajreni rexpejn<sub>pac</sub> Jesús.

<sup>3</sup> (Guiraa rebejn xten Israel, näjza refarisee, sasanäj nani baluii rebengool ni yu' guedx Israelreni. Direni gauu palga direni quiib <sub>naareni</sub> balti huält.

<sup>4</sup> Che rbi'reni rijreni lo guii, rguibsa'creni ñaareni, lojreni, ni'reni, dxejcti rajc rajwreni. Niluxh guyu' xhidajl costumbr ni sasanäjrureni, luxh yu' mood rguibreni rextrastreni nájza rexplooreni, nájza rextrastguiibreni, nájza rexloonreni.)

<sup>5</sup> Dxejc gunabdiidx referarisee nájza rebejn ni ruluii leiij loj Jesús, rájpreni:

—¿Xhícuient di rexpejn̄pacu gun si'cni baluii rebengool, niluxh rajwreni guideb nacdxuudx ñaareni?

<sup>6</sup> Dxejcti gunii Jesús lojreni rájpn̄i:

—¡Ben̄ guijdx! Laaca gunii Isaías xcuenttu che guniini xtidx Dios. Scree cajni loj guijtz:

Guejdxre sanälajz narä con rextiidxni,  
niluxh lastooreni zitro suga' loä.

<sup>7</sup> Xli'a'si ruzuxhijbreni, sa'csi direni chanälajz narä.

Ruluüireni si'c xtiidxpac Dios nani rniij rebejn.

<sup>8</sup> Rusa'ntu xleii Dios, sasanäzdu'tztu costumbr nani baluii rebengool. Rdibsa'c rexploortu, rextrasttu, luxh rujnzatu xhidajlru cos sa' redee.

<sup>9</sup> Rájpa Jesús lojreni:

—Rusa'ntu xtidx Dios te risanäjtu recostumbr xtenttu.

<sup>10</sup> Sa'csi rájpn̄ Moisés: “Huinälajz xtadlu con xnanlu.” Rájpzani: “Suju'tpactu nani gudzubde yejc xtadni o yejc xnanni.”

<sup>11</sup> Niluxh la'tu rniitu sajc gäb bejn loj xtadni o loj xnanni: “Dina gapä xhi cojn gacnäálu” (nani säloj, abadedä guira'ti loj Dios).

<sup>12</sup> La'tu ditu gusaan gunru bejn̄ por xtadni nicla por xnanni.

<sup>13</sup> Si'c rbälaztu xtidx Dios, te sasanäjtu recostumbr nani ruluiitu, luxh xhidajl cos sa' dee rujntu.

<sup>14</sup> Gurejdx Jesús guiraa rebejn, dxejc rájpn̄i loj guiraareni:

—Colcuadijg, colyacbee xtidxä.

<sup>15</sup> Rexhicos yälrajw ni rajw bejn, dini gunij̄t bejn̄ga, rediidx ni r̄ii nen̄ lastoo bejn, nájza recos ni rujn̄ bejn, ni'c runij̄t bejn̄ga.

<sup>16</sup> Pal yu' chu rlajz guisieed, sucuadijḡni.

<sup>17</sup> Dxejcti gula'reni loj reben̄xhidaal, biu'reni nen̄ yu'. Dxejc gunabdiidx rexpejn̄pacni loj Jesús xhi säloj cuent ni guniini.

<sup>18</sup> Basejc Jesús diidx lojreni, rájpn̄i:

—¿La nájza la'tu xheti xcäriejntu? ¿La di'tu gacbee xhitis yälrajw nani riu' nen̄ bejn digacdi gunij̄t̄ni lastoo bejn, ä?

<sup>19</sup> Sa'csi dini jiu' nen̄ lastooni; riu'ni xque'ni, rdejdtini.

Si'c guniini te baluiini guira'ti xhicos najc naya.

<sup>20</sup> Dxejc rájpn̄i:

—Rediidx ni r̄ii nen̄ lastoo bejn, nájza recos ni rujn̄ bejn, ni'c sii runij̄t lastoo bejn.

<sup>21</sup> Sa'csi nen̄ lastoo rebejn̄ r̄ii rexhigabguijdx, nájza yälresnäj chääl sa'ni, yälresnäj ni xhet najcdi chääl̄ni, yälrgu't sa'ni,

<sup>22</sup> yälgubaan, yälrlajz̄ni ga'pni xhixhten bejn, yäl̄latsiaj, yäl̄rusgueeni, yäl̄ xheti xtujy lojni, yäl̄rdxchlajz, yäl̄rudzubde sa'ni, yäl̄nayechlajz̄ni, yäl̄guyalajz.

<sup>23</sup> Guiraa reyäl̄latsiajre nen̄ lastoo bejn̄ r̄iireni, luxh reni'csi runij̄t bejn.

*Tej guna Sirofenicia ni bililajz xtidx Jesús  
(Mt. 15:21-28)*

24 Dxejc biriini ro'c, sääni nez guedx Tiro näjza nez Sidón. Ro'c bia'nni neñ te yu' sa'csi di rlazni niacbee rebejn caro yu'ni, niluxh di niajcdi niuxhiga'tztisni.

25 Biengajc diajg te gunaa ro'c yu' Jesús. Xindxape' gunaaga yu' beñdxab neñ lastooni. Bidzujñ gunaaga, bazuxhijbni lo Jesús.

26 Gunaaga nñi griegw, najcni beñ Sirofenicia. Gunabni lojni guinibeeni guirii beñdxabga neñ lastoo xi'nni.

27 Dxejc räjp Jesús lojni:

—Basaan gauxgaa rebiuux, sa'csi xhet laati gudzucajni xcuxtiil rebiuux te gudeednini loj rebä'cw.

28 Dxejc gunii gunaaga, räjpni loj Jesús:

—Yo, Dad. Näjza rebäcuc' ni suga' neñ mex rajw nani rtejb ro' rebiuux.

29 Dxejcti räjp Jesús lojni:

—Laaca rniliilu. Huij rolizlu. Abirii beñdxab neñ lastoo xindxape'lu.

30 Luxh che bidzujñ gunaare rolizni, a dxape' naga' lo da'. Gucbegajc gunaaga abirii beñdxab neñ lastoo dxape'ga.

### *Basiajc Jesús te beñgop*

31 Dxejcru birii Jesús stehuält lo rexyuj guedx Tiro, gudejdni nez Sidón näjza rexyuj Decápolis. Bidzujñtini ro' nis xten Galilee.

32 Biädnä gaii bejn te niguii ni nacua't diajg ni lo Jesús. Digacdiza guinisa'c niguiiga. Biäd nabreni lo Jesús nusujni naani yejc niguiiga.

33 Dxejcti badzucajnini loj rebejn. Baquitzgajcni rebicueñaani neñ diajg ni, dxejcru batiobxhejn ni, gudajntini lujdxi.

34 Bahuiini xhaguibaa, bazaa lajzni, dxejc räjpni:

—¡Efata! —nani säloj bixal.

35 Dxejcru bixalgajc rediajg ni, gubangajc lujdxi, gunisa'cni.

36 Dxejcti gunibee Jesús rutlojdí gäbreni, per che räjpni lojreni si'c, laareni batie'chrureni diidxga.

37 Rdxeloduxhreni, räjpreni:

—Guira'ti laaca rujñni; ruxhalni diajg rediagcua't, luxh rusniini regop.

## 8

### *Bayaan Jesús tajp mil bejn (Mt. 15:32-39)*

1 Nen redxejga bidojp xhidalro bejn, luxh xheti xhigauureni. Dxejc gurejdx Jesús rexpejn pacni ni rinajlni, räjpni lojreni:

2 —Rulazlazä rebejnre, sa'csi naj rajc choñ dxej tre'reni loä, luxh xhet yu'di gauureni.

3 Niluxh palga guxhaläreni rolizreni, xliajzreni, sidxajgreni lo nejz; sa'csi yu' renani zijtru siädreni.

4 Dxejcru räjp rexpejn pacni lojni:

—¿Caro chaca'nu yätxtiil te cha xque' rebejnre ree, cadre rut rbäjzdi?

5 Sas gunabdiidx Jesús lojreni:

—¿Bal yätxtiil rajptu?

Dxejcru räjpreni:

—Gajdztsni.

6 Gunibee Jesús gurej rebeñxhidaalga loj yuj. Sas cua'ni guigajdx yätxtiilga, badeedni xquixhtios lo Dios, gula'ni reyätxtiilga. Dxejc badeednini loj

rexpejn pacni te guteedrenini loj rebenxhidaal. Bateedtireni yätxtiilga lo rebenxhidaalga.

<sup>7</sup> Rajpzareni gail bälbäz, dxejcti badeedsac Jesús xquixhtios lo Dios, guibeeni bateedzareni rebälbäzre loj rebenxhidaalga.

<sup>8</sup> Dxejc gudajwreni, gudxaj xque'reni. Dxejc batojp rexpejn pac Jesús gajdz dxijm reyätxtiil näj rebäjl dxuc ni bia'n.

<sup>9</sup> Niluxh renani gudajwga najcreni si'cti tajp mil bejn. Dxejcti basadi-dixnireni.

<sup>10</sup> Biunägajc Jesús rexpejn pacni nen canuu, biädreni nez Dalmanuta.

### *Gunab refarisee te senro loj Jesús*

(Mt. 16:1-4; Lc. 12:54-56)

<sup>11</sup> Biäd refarisee, renani najc rebenguidoo loj guedx Israel, guslojreni cayeinäreni Jesús. Canabreni gunni te senro nani Diostis ni yu' guibaa sajc gun. Cagula'tzsireni, don xhi gunni.

<sup>12</sup> Dxejcti bazaa lajz Jesús nen lastooni, räjpni:

—¿Xhicuent rlazj rebejn ni nabajn naj fii gac resenro xten Dios? Rniliäpac lojtu, di rebejn ni nabajn naj fii nicla tej sen xhaguibaali.

<sup>13</sup> Dxejcti basa'nnireni ro'c, biusacni nen canuu, sä'tini stelaad nisga.

### *Levaduur xten refarisee*

(Mt. 16:5-12)

<sup>14</sup> Biallajzreni nica'reni yätxtiil, luxh xhetliidi sanädireni. Tejtis yätxtiil nuureni nen canuu.

<sup>15</sup> Cagulijdx Jesús rexpejn pacni, räjpni lojreni:

—Colsusin, colnati levaduur xten refarisee, colnatiza levaduur xten Herodes. (Nalajznu, xtiidxreni najc si'c levaduur.)

<sup>16</sup> Dxejcti cayeinäj sa'reni diidx xcuent nani gunii Jesús lojreni, dxejc räjpreni:

—Sa'csi dinu jia'p yätxtiil, ni'c rniini scree.

<sup>17</sup> Che gucbee Jesús xhini'c caniireni, räjpni:

—¿Xhicuent rniitu: "Sa'csi dinu jia'p yätxtiil"? ¿La gajdtu fii, la gajdtu gacbee? ¿La laltis nacnajd lastootu?

<sup>18</sup> ¿La yu' balojtu, luxh ditu fii? ¿La sojb diajgtu luxh di diajgtu jiejn? ¿La dilajztu guizaj?

<sup>19</sup> Che gula'a guigaii yätxtiil te gudajw gail mil niguii, ¿bal dxijm yätxtiil biujy batojptu?

Sas räjpreni lojni:

—Tzubitio'pni.

<sup>20</sup> —Che gula'a guigajdz yätxtiil te gudajw tajp mil bejn, ¿bal dxijm yätxtiil biujy batojptu?

Sas räjpreni:

—Gajdzni.

<sup>21</sup> Dxejc räjpni lojreni:

—¿La gajdtu gacbesa'c xhi benä?

### *Basiajc Jesús te lotiä'p Betsaida*

<sup>22</sup> Bidzunäj Jesús rexpejn pacni guedx Betsaida. Dxejc biädnäreni te lotiä'p loj Jesús, gunabreni loj Jesús caanni bejnga.

<sup>23</sup> Dxejc gunaazni naa lotiä'pga, guläänini nen guejdx. Che batiobxhejn ni nen rebalojni, basugajcni naani yejc baloj lotiä'pga, gunabdixgajc Jesús:

—¿La yu' xhi rhuilu, ä?

24 Luxh che bahuii bejnga räjpni:

—Rhuiä sasaj rebejn, luxh si'c yajg rhuiä lojreni.

25 Basusac Jesús naani yejc rebaloj bejnga. Dxejc bejn Jesús bahuii bejnga. Biajctini, zijtru gujc bahuisa'cni lo guiraa rebejn.

26 Dxejcti baxhal Jesúsni rolizjni, räjpni:

—Basquejn, huijga rolizjlu, na'c jiu'lu neñ guejdx, na'c gäblu xhi gujclu lo rebejn ni yu' neñ guejdx.

*Basule' Pedr Jesús najc Crist*

*(Mt. 16:13-20; Lc. 9:18-21)*

27 Birinäj Jesús rexpejnpacni lo reguejdx ni ria'n nez Cesarea xten Filipo. Lałni sasajreni lo nejz räjp Jesús loj rexpejnpacni:

—¿Chuni'c rnii rebejn nacä narä?

28 Sas räjpreni lojni:

—Yu'reni rnii najclu Juan ni batiobnis, yu'zareni rnii najclu Elías, yu'zareni rnii najclu te rebejn ni gunii xtidx Dios.

29 Dxejc räjpni lojreni:

—¿La'tu a'? ¿Chuni'c rniitu nacä narä?

Dxejc bazejc Pedr diidx, räjpni lojni:

—Luj najclu Crist.

30 Dxejcti räjp Jesús lojreni:

—Rutlojdi gäbtu chu nacä.

*Gunii Jesús xho guetni*

*(Mt. 16:21-28; Lc. 9:22-27)*

31 Dxejcti gusloj Jesús caguluiini rexpejnpacni, räjpni:

—Narä nacä Xi'n Dios, ni gujc Niguui. Nanabpac tedä trabajwduxh. Sibälaz rebengool ni najc guxhtis neñ guedx Israel narä, näjza renani rnibee loj rebixhojz, näjza rebejn ni ruluui leii: sugu'treni narä, luxh ni riojn dxej guibañsacä lo rebengut.

32 Guyasi guniini rediidxre. Sas huinä Pedr Jesús telaad, dxejc räjpni loj Jesús:

—Na'c guiniilu si'c.

33 Dxejc batzuré loj Jesús, bahuiini loj rexpejnpacni. Dxejc gudilñäjni Pedr räjpni:

—Gubicaj loä, Satanás, luj dilu gun xhigab xten Dios, xhigab ni rujn rebejntis rujnlu.

34 Dxejc gurejdxni rebeñxhidaal con reni najc xpejnpacni, räjpni lojreni:

—Palga yu' chu rlajz gac xpeñäpac, sucuääz gunni ni rsia' lajzni gunni, sutedni trabajw si'c tej ni caj lo crujz, sujiädñajlni narä.

35 Sa'csi nani rlajz guslaa xcälñabajñni, sunijtni xcälñabajñni. Luxh nani runijt xcälñabajñni xcälñasa'c narä, xcälñasa'c xtidxä, silñiapac xcälñabajñni.

36 Xlia' ga'p bejn guiraloj lo guedxliujre palga nitni lo Dios par tejpas.

37 Xhet gacdi gudeed bejn te guibaññajni Dios.

38 Nani guituinäj narä con rextidxä naj, cheni najc rebejn bendojl, narä, Xi'n Dios nani gujc Niguui, situinäázani che jiädñää reangl xten Dios che jiälää lo xcälrdimbicha' Xtaä.

## 9

1 Dxejc räjp Jesús lojreni:

—Rnliäpac lojtu, yu'reni suga' ree nani di guet fixgaareni abiääd xcälñnibee Dios.

*Gubixhlo Jesús garenca*  
(Mt. 17:1-13; Lc. 9:28-36)

<sup>2</sup> Che gudejd xho'p dxej, Jesús cua' Pedr, náj Jacoob, nájza Juan, laatisreni huiñäni yejc te danro. Ro'c gubixhlojni garenca lojreni.

<sup>3</sup> Gunsoj rdimbicha' rexhajnbi, gujc xhajnbi nolbäj. Rut rajcti rusquijtz lajd lo guedxliujre si'c biquijtz xhajnbi.

<sup>4</sup> Dxejc baluuiioj Elías nájza Moisés lojreni, cayuinäjreni Jesús diidx.

<sup>5</sup> Sas räjp Pedr loj Jesús:

—Dad, laaca dxunnu ree. Náj jiennu chon yuguixa', tejni xtenlu, steeni xten Moisés, steeni xten Elías.

<sup>6</sup> Si'c guiniini sa'csi nicla niacheeni xhini'c guiniini, sa'csi cadxebduxhreni.

<sup>7</sup> Dxejc biääd te za bejn balaa yejreni. Neñ zaga biejn xse' te ni räjp:

—Dee najc xi'nä nani sanälazä, coꞤcuadiajg xtiidxni.

<sup>8</sup> Che batzuré lojreni, bahuiireni rutru suganäjti Jesús, xtebtis Jesús suga'.

<sup>9</sup> Che siädjiäjtreni dajnga, gunibee Jesús rut lojdi guiniireni xcuent ni bahuiireni, guibañxgaasi Xi'n Dios nani gujc Niguii lo rebengut.

<sup>10</sup> Basälcheereni rediidxre neñ lastooreni. Dxejcru canabdiidx lo sa'reni xhicha säloj guibañsacni lo rebengut.

<sup>11</sup> Sas gunabdiidxreni lojni, räjpreni:

—¿Xhicuent rni remastr xten leii naquinpac jäidxgaa Elías?

<sup>12</sup> Dxejcti bazejcn diidx lojreni, räjpni:

—Guliireni siädxgaapac Elías, luxh sunsa'cni guira'ti xhi cos. Náj a', ¿xhicuent caj lo guijtz xcuent Xi'n Dios ni gujc Niguii, sidejdni trabajwduxh, rutza jjudini?

<sup>13</sup> Luxh narä rniä lojtu, abiääd Elías, luxh bennäjrenini si'ctis ni rrlajzreni, si'cpac ni caj loj guijtz ni rusule' xcuentni.

*Basiajc Jesús te biuux ni guyu' bendxab neñ lastooni*  
(Mt. 17:14-21; Lc. 9:37-43)

<sup>14</sup> Che asiäädreni cadre tre' sgaii rexpejnpac Jesús, bahuiireni loj xhidalro bejn ni tre' lojreni, luxh cayeinäj rebejn ni ruluu leiireni.

<sup>15</sup> Che bahuii guiraa rebejn loj Jesús, bidxeloduxhreni, baxunreni, huiye'tzreni xchan lojni.

<sup>16</sup> Dxejc gunabdiidx Jesús lojreni:

—¿Xhini'c rusieinäjtu laarení?

<sup>17</sup> Sas gunii tej reni yu' lo beñxhidaalga, räjpni:

—Dad, ree siädnää xi'nä lojlu, yu' bendxab neñ lastooni, nani rujn najcni gop.

<sup>18</sup> Cheni nriaaznini, rutienta'ni xi'nä, luxh riduxh bitzun ro'ni, nájza rauya'ni ro'ni, luxh cabijdzni. Aräpä loj rexpejnpaclu cuääreni bendxabga, niluxh di niäjcdi nibäärenini.

<sup>19</sup> Dxejcti gunii Jesús lojreni, räjpni:

—La'tu, bejn ni di chalilajz, ¿gucli chu'ä lojtu te chalilajztu? ¿Gucli gusieedtu narä? ¡Coltanäni loä!

<sup>20</sup> Dxejc biädnäreni biuuxga lojni. Che bahuii bendxab lo Jesús, basnijni bi'nga, basäl'ta'tinini lo yuj. Sädiidxni, luxh carii bitzun ro'ni.

<sup>21</sup> Gunabdiidx Jesús loj xtadni:

—¿Gucli rajcni si'c?

Dxejc räjp dade'ga:

—Che gujclini biuxbäz.

<sup>22</sup> Balti huält rusäl'nini lo guiboo näjza lo nis te ju'tnini. Palga yu' xhi gac gunlu, balazlajz nuunu, gucnäj nuunu.

<sup>23</sup> Sas räjp Jesús lojni:

—¿Xhicuent rniabdiidxlu la sajc gacnäälü? Xhitis sajc gac par nani rililajz.

<sup>24</sup> Guredxa' xtad bi'nga, räjpni:

—¡Rililazä! Gucnäj narä te chaliiru lazä.

<sup>25</sup> Che bahuii Jesús bixa't xhidajl bejn lojni, gudidxa'ni lo beñdxabga räjpni lojni:

—Beñdxab ni rujn gop, narä canibeä, birii neñ lastoo bi'nga. Na'cru chulu neñ lastooni.

<sup>26</sup> Dxejcrü guredxa' beñdxabga, luxh basnibzejsni bi'nga, dxejcrü biriini neñ lastooni. Astoo te beñgut bia'n bi'nga ro'c. Xhidajl rebejn räjp:

—Agujtni.

<sup>27</sup> Dxejc gunaaz Jesús ñaa bi'nga guläsnini. Guzuliiti bi'nga.

<sup>28</sup> Dxejcti che abiu' Jesús neñ yu', gunabdiidx rexejnpacni lojni:

—¿Xhicuent di niajcdi nibäänu beñdxabga?

<sup>29</sup> Dxejc räjp Jesús lojreni:

—Di gacdi cuäätu sa' beñdxabre palga ditu cuedx-guinab lo Dios, palga ditu gucuanxgaa.

### *Gunisac Jesús xho guetni*

*(Mt. 17:22-23; Lc. 9:43-45)*

<sup>30</sup> Dxejc biriireni ro'c, gudejdreni Galilee. Luxh di rlanj Jesús niacbee rebejn sadejdreni nejzga,

<sup>31</sup> sa'csi caguluiini rexejnpacni. Cayäjpni lojreni: “Xi'n Dios ni gujc Niguii sidejdni ladznaa rebejn, niluxh sugu'trenini. Che guiza' choñ dxej gujtni, sibajñni stehuält.”

<sup>32</sup> Niluxh laareni direni niacbee xhini'c guniini, bidxejzbareni niniabdiidxreni lojni.

### *¿Chuni'c sajcrü?*

*(Mt. 18:1-5; Lc. 9:46-48)*

<sup>33</sup> Bidzujñtirenini Capernaum. Che biu'ni neñ yu' räjpni lojreni:

—¿Xhini'c cagusiejytu lo nejz?

<sup>34</sup> Dxejc xhet guniitireni, sa'csi laareni cagusieinäj sa'reni lo nejz don chuni'c sajcrü lojreni.

<sup>35</sup> Sas gurej Jesús, dxejc gurejdxni guitzubitio'p xpejnpacni, räjpni lojreni:

—Palga yu' chu rlanj gasajcrü lojtu, sugacxgaani si'c te nani xhet sajcti, suganzani xtzuun chutis.

<sup>36</sup> Dxejcti cua'ni tej biuxbáz, huinänini galäiireni. Dxejc gudääzni biuxbázga, räjpni lojreni:

<sup>37</sup> —Chutis ni gacnäj te rebiuxe're sa'csi rinälajzni narä, sacnäjni narä, luxh nani gacnäj narä, xhet narätis gacnäjtini, näjza xtadä nani baxhañ narä racnäjni.

### *Nani di guiniyaj nuunu, xladnu yu'ni*

*(Lc. 9:49-50; Mt. 10:42)*

<sup>38</sup> Dxejcti gunii Juan räjpni lojni:

—Bahuiinu lo te bejn ni rbää beñdxab con xcäl'rniabee lajlu, niluxh dini sanäj nuunu. Sas huiye'tznu lojni na'c gunni si'c sa'csi dini sanäj nuunu.

<sup>39</sup> Dxejc räjp Jesús lojni:



—Na'c gudxojntu gunni si'c sa'csi bejn nani rujn milagwr con xcälrnibee laä digacdi guiniyagajcni narä.

<sup>40</sup> Nani di guidxagdijl nuunu, xlaadnu yu'ni.

<sup>41</sup> Rniliäpac lojtu, chutis ni guniidx te bas nis lojtu sa'csi najctu xpejn<sub>pac</sub> Crist, siguijx Diosni xcuent nani bejn<sub>ni</sub>.

### *Nani rujn jiajb bejn lo dojl*

*(Mt. 18:6-9; Lc. 17:1-2)*

<sup>42</sup> 'Chutis ni gusiu' tej rebiuxe' ni rililajz narä neñ dojl, sugal te guimolin vej<sub>nni</sub> dxejcti gucuaarenini lo nisdoo.

<sup>43</sup> Palga tej naalu gun gunlu dojl, batiu'ni: hueenru natiujnglu chaläjzlu cadro yu' Dios quela sojb guiro'p naalu gusälreni luj gabijl, loj bajl ni di jiuüi,

<sup>44</sup> cadro diza xpisiujgreni guet, diza bajl jiuüi.

<sup>45</sup> Luxh palga tej ni'lu gun gunlu dojl, batiu'ni: hueenru nitiujnglu chaläjzlu cadro yu' Dios quela sojb guiro'p ni'lu luxh chääl<sub>u</sub> gabijl, lo bajl ni di jiuüi,

<sup>46</sup> cadro di xpisiujgreni guet, diza bajl jiuüi.

<sup>47</sup> Luxh palga tej balojlu gun gunlu dojl, gulääni: hueenru chääl<sub>u</sub> cadro rnibee Dios natiä'p lojlu quela sojb guiro'p balojlu chääl<sub>u</sub> gabijl,

<sup>48</sup> cadro di xpisiujgreni guet, diza bajl jiuüi.

<sup>49</sup> 'Si'cni rloj sejd yejc xhi cos yälrajw, si'cza guiloj bajl yejc guiraareni. Guilojza sejd lo guira'ti ni rdeed bejn lo Dios.

<sup>50</sup> Hueen najc sejd, luxh palga agudejd yäl<sub>n</sub>adzij yejcni, çxho guntu te gacsacni nadzij? Colyajc nadzij la'tu, colguiba<sub>n</sub>näsa'c sa'tu.

## 10

### *Baluu Jesús xcuent rälrur'o'n sa'ni*

*(Mt. 19:1-12; Lc. 16:18)*

<sup>1</sup> Dxejcru birii Jesús ro'c huijni nez Judea näjza nez ro' gueu Jordán stelaad. Ro'c bidoj<sub>p</sub> xhidajl bejn lojni stehuaält, sas guslosacni caguluüinireni si'ctis ni ruluüinireni.

<sup>2</sup> Sas refarisee, renani najc rebenguidoo loj guedx Israel, gubigreni loj Jesús, cagula'tzreni Jesús. Ni'c gunabdiidxreni, räjpreni:

—çLa laaca gun niguii gusaan chääl<sub>ni</sub>, ä?

<sup>3</sup> Dxejc laani bazej<sub>cni</sub> diid<sub>x</sub>, räjpni lojreni:

—çXhini'c gunibee Moisés guntu?

<sup>4</sup> Dxejcru räjpreni:

—Moisés basaan gudeedni te guitz gusaan chääl<sub>ni</sub> che guro'nnini.

<sup>5</sup> Dxejc Jesús räjp lojreni:

—Sa'csi guyaa lajztu, ni'cni bacuaa Moisés diid<sub>x</sub>ga lojtu.

<sup>6</sup> Niluxh che birixtiej beñ guedxliuj, “niguii con gunaa benchee Diosreni.”

<sup>7</sup> “Ni'cni te niguii siriüni loj xtdadni, loj xnanni te cuäznäjni chääl<sub>ni</sub>.”

<sup>8</sup> Niluxh renani gujc tiop bejn sajcreni si'c tejsi bejn”, dirureni gac tiop bejn, si'c tejsi bejn gacreni.

<sup>9</sup> Na'c gudzucaj bejn lo sa bejn<sub>ni</sub> nani abachaag Dios lo sa'ni.

<sup>10</sup> Che biu'reni neñ yu' gunabdiid<sub>x</sub>sac rexpejn<sub>pac</sub>ni lojni xcuent rediid<sub>x</sub>re.

<sup>11</sup> Dxejc räjpni lojreni:

—Chutis niguii ni gusaan chääl<sub>ni</sub>, sas guch<sub>n</sub>aa<sub>ni</sub> ste'cani, ruj<sub>nni</sub> dojl.

<sup>12</sup> Niluxh palga gunaa guro'n chääl<sub>ni</sub> sas guch<sub>n</sub>aa<sub>ni</sub> ste'ca niguii, rujnzani dojl.

*Gunab Jesús gunle' Dios yejc rebiuxbáz**(Mt. 19:13-15; Lc. 18:15-17)*

<sup>13</sup> Biädnäza rebejn biuxbáz lojni te gutzuub Jesús ñaani yejcreni, sas gudidxa' rexpejnpacni lojreni.

<sup>14</sup> Che bahuii Jesús xhi cayujn rexpejnpacni, bidxe'chni räjpni lojreni:

—Cołsaan jiaäd rebiuxbáz loä. Na'c gudxojtntureni, sa'csi xcälñibee Dios najc xten reni najc nadolajz si'c najc biuxbáz.

<sup>15</sup> Rñiliäpac lojtu, chutis ni rıajz jiu' lo xcälñibee Dios nanab guzobdiajgreni xtidx Dios si'c ruzobdiajg rebiuxe' xtidx xtadreni. Palga dini gun si'c, dini jiu' lo xcälñibee Dios.

<sup>16</sup> Dxejcti gudäaz Jesús rebiuxbáz, bazujzani ñaani yejcreni, gunab Jesús gunle' Dios yejcreni.

*Te bi'n ni rapduxh guninäi Jesús**(Mt. 19:16-30; Lc. 18:18-30)*

<sup>17</sup> Che birii Jesús loj xnejzni, ruxuñ te niguii biääd lojni, bazuxhibjni. Dxejcti gunabdiidx niguiiga lojni räjpni:

—Dad, beñsa'c, çxhini'c gunä te xca'a yälñabajñ par tejpas?

<sup>18</sup> Sas räjp Jesús lojni:

—çXhicuent rniilu loä beñsa'c? Tejtisni najc beñsa'c; Diostis najc beñsa'c.

<sup>19</sup> Najnlu xhini'c gunibee Dios gunni: “Na'c guesnäjlu chääl sa'lu, na'c ju'tlu, na'c cuanlu, na'c gusgueelu chutis, na'c cuäalu yejc xhixten sa'lu, huinälajz xtadlu, xnanlu.”

<sup>20</sup> Dxejc räjp niguiiga lojni:

—Dad, guiraa redee cayunä cheni gucäli bi'n.

<sup>21</sup> Che bahuii Jesús lojni, huinälajznini, räjpni lojni:

—Tejtis nani cayäädx gunlu. Huij, huito' guiraa xhixtenlu, badeed xcuentni loj rebejn nani diga'p, dxejcti guniidx Dios xhidajl xhi ga'plu xhaguibaa. Gudanajl narä, mase tedlu trabajw.

<sup>22</sup> Dxejc che biejn diajgni diidxre, guc-huin lajzni, xhet laadi yu'ni siini, sa'csi naclenduxh xhixtenni yu'.

<sup>23</sup> Dxejc bahuii Jesús guideb gabi lojreni, räjpni loj rexpejnpacni:

—Naganduxh jiu' rebejn nani yu'duxh xhixtenni lo xcälñibee Dios.

<sup>24</sup> Dxejc bidxelo rexpejnpacni che biejn diajgreni rextiidxni. Dxejc räjp Jesús lojreni stehuält:

—ıAiiitu xi'nä!, lacti naganduxh gusaan renani sanälajz xhixtenni guinibee Diosreni.

<sup>25</sup> Guyasiru ted te cameii ni' te guux quela gusaan te bejn ni yuduxh xhixtenni guinibee Diosni.

<sup>26</sup> Dxejc bidxeloduxhrenei, räjpreni lojni:

—çChuxhni'c sajc laa lo dojl?

<sup>27</sup> Dxejc bahuii Jesús lojreni, räjpni:

—Bejn digacdi guslaa sabejnñi, Diostis rajc ruslaa bejn lo dojl, sa'csi Dios rac rujn guira'ti.

<sup>28</sup> Sas gusloj Pedr cayäjp lojni:

—Ñaj nuure ahuilälaznu guira'ti te siopnajlñu luj.

<sup>29</sup> Dxejc räjp Jesús:

—Rñiliäpac lojtu, chutis nani cuälaz rolijzni, rebejtzni, rebisiajñni, xtadni, xnanni, chäälñi, rexi'ñni, rexyujni, xcälñasa'c narä, näjza xcälñasa'c xtidx Dios,

<sup>30</sup> sica'ni lo guedxliujre te gayuu huält xhidajlru. Sica'ni rolijzni, rebejtzni, rebisiajnni, xnanni, rexi'nni, rexyujni. Sisiunajlrenini naj, dxejc xhaguibaa sica'ni yäl nabajñ par tejpas.

<sup>31</sup> Xhidajl rebejñ nani sajc lo guedxliujre xhet sajc direni xhaguibaa; niluxh rebejñ nani xhet sajc di lo guedxliujre, xhaguibaaru gasajczeni.

*Gunisac Jesús diidx xho guetni*  
(Mt. 20:17-19; Lc. 18:31-34)

<sup>32</sup> Dxej cru sasaj Jesús, ni dñi lo rexpejñ pacni sääreni Jerusalén, luxh cadx-elojreni. Cadxejbza rebejñ nani sanajlreni. Dxejcti guläsac Jesús rexpejñ pacni lo rebejñ, gusloj cayäjpni lojreni guira'ti nani sacni.

<sup>33</sup> Räj p Jesús:

—Sionnu Jerusalén, luxh narä, Xi'n Dios nani guj Niguii, sidedä ladznaa rebixhojz nani rnibee näjza rebejñ ni ruluii lei. Luxh sinibeereni guetä. Suteedreni narä lo rebenzajt nani digac xpejñ Israel.

<sup>34</sup> Suxhisnäjreni narä, siguijnreni narä, sutiobxhejnzareni loä, dxej cru sugu'treni narä. Che riojn dxej sibansacä.

*Gunab Jacob näjza Juan te yäl nasa'c*  
(Mt. 20:20-28)

<sup>35</sup> Dxejcti gubig Jacob näjza Juan, rexi'n Zebedeo, räjpreni lojni:

—Dad, rlaaznu gunlaalu nani guiniabnu lojlu.

<sup>36</sup> Dxejc räj p Jesús lojreni:

—¿Xhini'c rlaiztu gunä xcuent la'tu?

<sup>37</sup> Räjpreni:

—Cue tejnu cuä'lu ladbee, xteenu cue cuä'lu ladbägw che acanibeelu.

<sup>38</sup> Dxejc räj p Jesús lojreni:

—Ditu gan xhini'c rniabtu. ¿Xhixh sajc yätu nani yä'ä? ¿Xhixh sajcza guirobnistu si'cni guirobnisä? Nalajznu, xhixh sajc tedtu trabajw nani tedä narä.

<sup>39</sup> Sas räjpreni lojni:

—Sajc tednuni.

Dxejc räj p Jesús lojreni:

—Guliini sajc yätu nani yä'ä, luxh guirobnistu si'cni guirobnisä narä.

<sup>40</sup> Te cue tejtu ladbee xtenä steetu cue xladbägwä, xhet xtenä dini te gunidxäni. Rebejñ nani agule Dios, reni'c cue xladbeä, xladbägwä.

<sup>41</sup> Luxh che biejn diajz stzuureni bidxe'chreni loj Jacob näjza loj Juan.

<sup>42</sup> Sas gurejdx Jesúsreni, räj pni lojreni:

—La'tu najntu renani rnibee lo rebejñ nani digac xpejñ Israel, rdxagljaz gasajcuren lo rebejñ. Luxh rebejñ ni sajc rnibeduxhreni lo rebejñ.

<sup>43</sup> Xhet si'c di guntu la'tu. Chutis nani rlaiz gasajcru lojtu, riäj l gacni mos lojtu.

<sup>44</sup> Luxh chutis la'tu nani rlaiz gasajcru, riäj l gacni xmos guiraatu.

<sup>45</sup> Di Xi'n Dios ni guj Niguii niääd, te ga'ptisni mos, biäädzani te quiixni con xcäl nabajñni te laa xhidajl bejñ lo dojl.

*Basiajc Jesús Bartimeo, ni natiä'p lojni*  
(Mt. 20:29-34; Lc. 18:35-43)

<sup>46</sup> Dxejcti biäädreni Jericó. Che birii Jesús ro' guedx Jericó con rexpejñ pacni näjza rebenxhidaal, cuä' nezyuj sobga' Bartimeo, xi'n Timeo. Natiä'p lojni. Ro'c cabääni gojn.

47 Che biejn diajgni laa Jesús ni siääd Nasare't ni sadejd ro'c, guslojni rbedxa'ni, räjpni:

—Jesús, xi'n David, balazlajz narä.

48 Xhidajlreni gudidxa' lojni, te jäüu ro'ni. Dxejc laani dipru rbedxa'ni räjpni:

—Xi'n David, balazlajz narä.

49 Dxejc guzudxi Jesús, gunibegajcni gucrejdx niguiiga.

Gurejdxreni lotiä'pga, räjpreni lojni:

—Basutijp lajzlu, gusuli, luj cabejdxni.

50 Sas rolca xhablajzni gudixhni, huisuliini, biäädtni lo Jesús.

51 Dxejc räjp Jesús lojni:

—Naja', ¿xhini'c rlanjlu gunä?

Dxejc räjp lotiä'pga loj Jesús:

—Dad, rlazä gunlu fiä.

52 Dxejcti räjp Jesús lojni:

—Huij, abiajclu sa'csi rililajzlu.

Lagajc dxejc gujc bahuiini. Sanajltini Jesús lo nejj.

## 11

### *Biu' Jesús Jerusalén*

(Mt. 21:1-11; Lc. 19:28-40; Jn. 12:12-19)

1 Cheni sadzujñreni gajxh Jerusalén, gudejdreni neñ reguedx Betfagé nájza neñ guedx Betania nez cuä' dajne' ni laa dan Oliib. Baxhal Jesús tiop xpejn pacni,

2 räjpni lojreni:

—Colchäj guedxe' ni ria'n nez lojtu. Che guidzujntu ro' guejdxga, sidxälu te bure' ni caduu. Gajd bejn cuibni. Colxhečni, coltanägajcni.

3 Palga yu' chu naa lojtu: “¿Xhicuent rujntu si'c?” Colye'tztis: “Dad caqui-inni.” Dxejc suxhalgajcni bure'ga ree.

4 Säätireni ro'c. Dxejcru ronejz bidxälreni te bure' caduu ro' te lä'. Dxejcti baxhecrenini.

5 Gaii bejn ni tre' ro'c räjp lojreni:

—¿Xhicuent caguxhectuni?

6 Dxejc räjpreni loj rebejn ga si'cni räjp Jesús lojreni gäbreni. Basangajc rebejn ga sanäreni bure'ga.

7 Dxejcru biädnäreni bure'ga loj Jesús. Badzuubreni xhablajzreni dejtz bure'ga. Gubijbti Jesús bure'ga.

8 Xhidajlza bejn gudixh xhablajzreni lo nezyuj, sgaiireni gudi'ch balajg lo reyajg te gudixhrenini lo nezyuj.

9 Rebejn ni nijd lojni näj reni sanajl dejtzni guredxa'reni, räjpreni:

—¡Colguiliä'p xpala'nni! Coldeed xquixhtiooz loj Dios sa'csi baxhalni nani siääd xcuentni.

10 Coldeed xquixhtiooz loj Dios sa'csi agubiré xcälrnibee toxtadnu David. ¡Colguiliä'p xpala'n Dios ni yu' jiaro!

11 Dxejcti biu' Jesús neñ guedx Jerusalén. Biu'zani neñ guidoro. Che bahuii Jesús guira'ti ni cayajc nenga, sanäni guitzubitio'p xpejn pacni, sääreni Betania sa'csi agudxej.

### *Batzubde Jesús yejc te yagigw ni xhet cajdi lojni*

(Mt. 21:18-19)

12 Che bara yääl, biunejzreni Betania. Dxejcti gusloj calaan Jesús,

13 bahuiini zijt sojb te yag iigw caj balajg lojni. Sas gubigni, bahuiini don gaxäjsi caj iigw lojni. Xhet bidxäldini lojni; balajgtis caj lojni, sa'csi xhet xtiempdi iigw dxejc.

14 Sas gunii Jesús räjpni loj yag iigwga:

—Rutru gauudi ninejxh ni rcaj lojlu par tejpas.

Biejnza diajg rexpejn pacni.

*Gulää Jesús renani ruto' näj renani rsii neñ guidoo*

*(Mt. 21:12-17; Lc. 19:45-48; Jn. 2:13-22)*

15 Dxejcti bidzujnreni guedx Jerusalén. Biu' Jesús neñ guidoro. Gusloj cabääni renani ruto' näj renani rsii neñ guideoga. Niluxh batiejxhni rexmex renani rucha meel, näjza reyagxhil xten renani ruto' paloom.

16 Diruni nusaan nidednäjreni xhicos nez neñ guideoga.

17 Dxejc caguluinireni, räpgajcni lojreni:

—¿La et screedi caj loj guijt? “Xyu'ä sirilaj yu' cadro rninab guiraa rebeñguedxliuj lo Dios.” La'tu abejntuni si'c xpiliää gubaan.

18 Rebixhojz ni rnibee näjza remastr xten leii biejn diajgreni nani gunii Jesús. Sas gudiilreni xho ju'trenini, sa'csi rdxejbreni Jesús, sa'csi guiraa rebejn rdxejoj rextidx Jesús.

19 Che biu' guxhijn, birii Jesús guejdxga.

*Gubijdz yagiigw ni bidzubde*

*(Mt. 21:20-22)*

20 Che bara yääl gudejdreni, bahuiireni agubijdz guideb yagiigw, näj rexlobaani.

21 Dxejc banaj lajz Pedr, räjpni loj Jesús:

—Dad, bahuii yagiigw nani batzubdelu yejnci, agubijdzni.

22 Dxejcti gunii Jesús räjpni lojni:

—Colchalilajz Dios.

23 Rniliäpac lojtu, chutis nani gäb loj dajnre: “Gubicaj, bitejb loj nisdoo”, luxh dini guntio'p lajzni, chalilajztisni scree gac nani guniini, sajcpac nani guniini.

24 Ni'cni rniä lojtu, xhitis nani guiniabtu lo Dios che rninäjtuni, colchalilajz xca'tuni, dxejc sica'tuni.

25 Luxh che guiniabtu Dios, palga yu' chu loj rdxechlajztu, colsiäjlza lajztu, te näjza Xtadtu nani yu' xhaguibaa gusiäjlza rextojltu.

26 Palga ditu gusiäjl lajztu con resa'tu, diza Xtadtu nani yu' xhaguibaa gusiäjl lajzni rextojltu.

*Yälrnibee xten Jesús*

*(Mt. 21:23-27; Lc. 20:1-8)*

27 Sas bidzunsacreni guedx Jerusalén. Lał ni sasaj Jesús neñ guidoro, rebixhojz nani rnibee, näjza rebejn ni ruluii leii, näjza reguxhtis gubig lojni.

28 Räjpreni lojni:

—¿Xhi yälrnibee rajplu, ni'c rujnlu redzuunre? ¿Chu baniidx yälrnibee rujnlu redzuunre?

29 Dxejc räjp Jesús lojreni:

—Guiniabdidxäza lojtu. Coltzu'ni loä, dxejcti guiniäza xhi yälrnibeere rapä ni'c runä redzuunre.

30 ¿Chu baxhał Juan ni batiobnis? ¿La Dios o la rebejn? Colnii loä naj.

31 Dxejcti gunii loj sa'reni, räjpreni:

—Palga jie'tznu “Dios”, naani “¿Xhicuent ditu nililajz xtiidxni?”

<sup>32</sup> Diza niacti niäjbreni “rebejn” sa'csi rdxejbreni rebenxhidaal, sa'csi guiraa rebejn huililajz Juan gujc te bejn ni guniipac xtidx Dios.

<sup>33</sup> Dxejcti guniireni, räjpreni loj Jesús:

—Dinu guidon.

Sas räjp Jesús lojreni:

—Dizana guiniä xhi yälrnibeere rapä runä redzuunre.

## 12

*Te xcuent rebenquijdx ni rbäzlaa*

*(Mt. 21:33-46; Lc. 20:9-19)*

<sup>1</sup> Dxejcti gosloj caguseed Jesús rebejn con recuent ni ruluui, räjpni:

—Yu' te bejn bazuj yaguub loj xyujni, bejnzani bazaani, dxejcro gudäänni te lajt cadro jä't uubga. Dxejcti bejnini te yu' jiaa, te ro'c cue nani ga'p lo xyujni.

<sup>2</sup> Badedlaatinini loj gaii bejn, sä'tini zijt.

<sup>3</sup> Che bidzuj xpäi uub, baxhal baxhuaan uubga te xmosni loj rebejn ni rbäzlaa ro'c, te xca'ni uub nani riäj xca' bejnga.

<sup>4</sup> Dxejc rebejn ni rbäzlaa ro'c gunaazreni mosga, gudijnrenini, luxh bazejrenini siini ganaxni.

<sup>5</sup> Dxejcro baxhal baxhuaanga stee mos lojreni. Niluxh laareni bacuaareni guijni, gudilgujdxreni yejc mosga, xho rniajni gubi'ni.

<sup>6</sup> Dxejc baxhal bejnga stee mos, dxejc bagu'trenini. Baxhalni xhidajlrureni. Gaii gudilgujdxreni, sgaiani bagu'treni.

<sup>7</sup> Yu'za tejtis xi'nni, luxh sanälajznini. Por lult näjza xi'nni baxhalni, naani: “Siucareni xi'nä.”

<sup>8</sup> Dxejc rebejn nani rbäzlaa ro'c räjp loj sa'reni: “Dee najc laa ni jiannäj ree. Coltaa, guigu'tnuni, te xca'nu yujre.”

<sup>9</sup> Sas gunaazrenini, bagu'trenini. Guläätirenini lo yujga.

<sup>10</sup> ¿Xhicha gun baxhuaan yaguubga rebejnre? Siäädni luxh sugu'tni rebejnre, dxejcti gudeedni yujga loj ste'ca bejn.

<sup>11</sup> ¿La gajdtu gol guijtz ni rnii scree?

Guij nani guläcaj renani runchee yu', ni'c agujc mastr ni guzuj galoo.

<sup>12</sup> Dad xtenu bejn scree, cos sacduxhni nezlojnu.

<sup>13</sup> Dxejc rlaiz reguxhtis nani bacuadiajg cuentre niniaaz Jesús, sa'csi gucbeereni laareni cacuaa Jesús diidxre. Sa'csi bidxejbreni rebenxhidaal, ni'c basa'nrenini, sä'tireni.

*Diidx xcuent reimpuet*

*(Mt. 22:15-22; Lc. 20:20-26)*

<sup>1</sup> Dxejcti baxhalreni gaii xpejn refarisee näjza gaii xpejn Herodes loj Jesús te gula'tzreni don xho gac guiniaazreni Jesús.

<sup>2</sup> Dxejcti biäädreni, räjpreni lojni:

—Dad, nadonnu luj najclu te bejn ni rnili. Par luj guiraasi bejn sajc tebloj, sa'csi dilu fiila sajc bejn o la xhet sajc di bejn. Luj ruluupaclu xhini'c rlaiz Dios gun bejn. ¿La laaca quix bejn reimpuet lo xcubieer César o la xhet laadi? ¿La guidiixnu o la dinu guidiix?

<sup>3</sup> Dxejcti laani gucbegajcni rujnsireni si'cni rniabdiidxreni. Räjpni lojreni:

—¿Xhicuent runnäjtu narä scree? Coltanä te meelga loä, te fiä lojni.

<sup>4</sup> Badeedtireni te meel lojni, dxejc räjpni lojreni:

—¿Chu yejc caj lojni, chu laj caj lojni?

Dxejc räjpreni:

—Xten César.

<sup>17</sup> Dxejc räjp Jesús lojreni:

—Coldeed nani najc xten César loj César; coldeedza nani najc xten Dios loj Dios.

Baschelojni rebejn̄ga con xtiidxni.

*Yäl̄rniabdiid̄x xcuent yäl̄rbansacni lo rebengut*

*(Mt. 22:23-33; Lc. 20:27-40)*

<sup>18</sup> Sas biädhuii resaducee loj Jesús. Resaducee najc rebejn̄ nani rnīi di rebengut guibansac. Dxejc gunabdiid̄xreni lojni, räjpreni:

<sup>19</sup> —Dad, xleii Moisés ruluu loonu, palga guet te niguii luxh gusa'nni chäälni ruti xi'nni, nanabpac xca' bejtzni chäälni, te chu xi'nni con laani lacua niu' xi'n tobejtzni.

<sup>20</sup> Guyu' gajdz niguii, bejtz najczeni. Sas cua' niguigalooga chäälni. Che gujtni ruti xi'nni.

<sup>21</sup> Dxejcti cua' ni rojpga gunaaga. Che gujtni, rut gajc̄di xi'nni. Si'cza gusajc ni riojn̄ga.

<sup>22</sup> Si'cza guläznäj gunaaga guigajdzreni. Per nicla tej reni di xi'nreni niu'. Dxejcti gujtza gunaaga.

<sup>23</sup> Guigajdzreni guläznäjreni gunaare. Cheni guibansacreni lo rebengut, ¿chu chäälgacni?

<sup>24</sup> Dxejc bazejc Jesús diid̄x lojreni, räjpni:

—Et laadi rnīitu, sa'csi ditu gumbesa'c rextid̄x Dios nani bacuaa reniguii lo guijtz, dizatu gumbee yäl̄rnibee xten Dios.

<sup>25</sup> Che guibansacreni loj rebengut, direni guch̄naa, rutza gudeed̄tiren̄i te guch̄naaren̄i. Niluxh sajcreni si'c najc rexangl̄ Dios nani yu' xhaguibaa.

<sup>26</sup> Palga canabdiid̄xtu la r̄bansac rebengut, ¿la di lajztu guisaj bil̄tu guijtz ni bacuaa Moisés? Moisés bacuaa nani gunii Dios lojni neñ bajl, räjpni: “Narä nacä Xtios Abraham, Xtios Isaac, Xtios Jacob.”

<sup>27</sup> Palga Dios najc Xtios rebejn̄re, direni gac bengut, nabañäjreni Dios. Et laadi najc xhigabtu.

*Yäl̄rnibee ni sajcr̄u*

*(Mt. 22:34-40)*

<sup>28</sup> Dxejcr̄u bidzuj̄n tej rebejn̄ ni najn̄ leii, biejn̄ diajgn̄i xhi caniīreni, biejn̄za diajgn̄i laaca gunii Jesús lojreni. Dxejcti gunabdiid̄xni loj Jesús:

—¿Xhi mandamient sajcr̄u lo guiraaren̄i?

<sup>29</sup> Dxejc räjp Jesús lojni:

—Mandamient nani sajcr̄u loj guiraaren̄i najc dee: “Bacuadiajg luj, guejdx xten Israel, Dad Xtiosnu, Dad tejtis najcni.

<sup>30</sup> Chanälajzlu Dad Xtioslu guideb lastoolu, näj xaimlu, näj guideb xcäriejn̄lu, näjza guideb xcäl̄nadiplajzlu.”

<sup>31</sup> Sigajcza najc mandamient ni rojpga: “Huinälajz sabejn̄lu si'ctis sanälajzlu lagajc luj.” Redee najc remandamient nani sajcr̄u loj guiraaren̄i.

<sup>32</sup> Dxejcti räjp bejn̄ga ni najn̄ leii lojni:

—Laaca guniilu Dad. Tejtis najc Dios, luxh ruti chu stee najc si'c laani.

<sup>33</sup> Luxh sacduxh chanälajz bejn̄ Dios guideb lastooni, näj xcäriejn̄ni, näjza xaimni, näj guideb xcäl̄nadiplajzni, luxh chanälajzni resabejn̄ni sigajc laani. Redee sajcr̄u loj ni rujn̄ bejn̄ che rudeedreni gojn̄ lo Dios.

<sup>34</sup> Che bahuii Jesús laaca guniini, räjpmi lojni:  
—Guxii cayäädx te jiu'lu loj xcälrnibee Dios.  
Sas rutru biajxhdi gunabdiidx loj Jesús.

*Chu xi'n najc Crist*

(Mt. 22:41-46; Lc. 20:41-44)

<sup>35</sup> Che caguseed Jesús nen guidoro, räjpmi:  
—¿Xho mood rnii rebejn ni najn leii Crist najc xi'n David?

<sup>36</sup> Sprit Dxan xten Dios basnii David che bacuaani:

Räjpmi Dios loj Dad xtenä:

“Gurej ladbee xtenä, che gudzugäli reni rdxe'ch lojlu.”

<sup>37</sup> Palga lagajc David räjpmi: “Dad, xtenä”, che guniini xcuent Crist, ¿xhoxh najc Crist xi'n David?

Rebenxhidaal nani yu' guejdxga bacuadiagsa'creni xtiidxni.

*Gule'c Jesús xquej remastr xten leii*

(Mt. 23:1-36; Lc. 11:37-54; 20:45-47)

<sup>38</sup> Lałni caguseedni rebejn, räjpmi lojreni:

—Cołsusiñ, na'c gu'chtu loj rebejn ni ruluu leii. Laareni rlaiz sanäj relad-siool xtenreni. Rdxaglaizreni rnii bejn lojreni nez lo reguii.

<sup>39</sup> Rlaizzeneni cuereni cadro rbej renani sajrcu nen reguidoo näjza cadro ru' relanij.

<sup>40</sup> Rudzucajzeneni xhixten rebiiud, rniizareneni xhidalduxh diidx che rołreni le', te rusäuureneni loj rebejn. Castigwroru gac redee.

*Gojn xten te biud prob*

(Lc. 21:1-4)

<sup>41</sup> Dxejcti gurej Jesús cuä' caj cadro rusäl bejn gojn. Cahuiini cagusäl rebejn meel nen caga. Xhidajl reni rajp cagusäl xhidajl meel nenga.

<sup>42</sup> Che biääd te biud prob, basälni tiop melbäz ni sajc si'cti tej centaab.

<sup>43</sup> Dxejrcu gurejdx Jesús rexpejnpacni, räjpmi lojreni:

—Rniliäpac lojtu, biud probre basäl xhidajlrlo lo guiraa renani basäl nen cajre,

<sup>44</sup> sa'csi guiraa reneni abasäl che'nsi xhixtenreni. Luxh gunaare basäl guiraa nani rajpmi. Ni'ctis najc nani gaunäjni.

## 13

*Gunii Jesús sibijl guidoo*

(Mt. 24:1-2; Lc. 21:5-6)

<sup>1</sup> Cheni sariireni nen guidoro, räjpmi tej rexpejnpacni lojni:

—Dad, bahuii lacti reguij, lacti reyu'.

<sup>2</sup> Dxejcti räjpmi Jesús lojni:

—¿La rhuuilu loj reyu're? Nicla tej guij dija'n dzuub yejc sa'ni, guiraliireni sire'ch.

*Recos ni gac che ameer nitloj guedxliuj*

(Mt. 24:3-28; Lc. 21:7-24; 17:22-24)

<sup>3</sup> Dxejc sobga' Jesús yejc dajne' ni laa dan Oliib, cahuiini nez ro' guidoo. Che sugaxhtebreni, gunabdiidx Pedr näj Jacoob näjza Juan näjza Andrés lojni, räjpmi:

<sup>4</sup> —Gunii loonu, ¿guc gac dee? ¿Xhi guihuiinu te gacbeenu asiäddzungenajxh soob guiraa rediidxre?

<sup>5</sup> Dxejcti gusloj gunii Jesús lojreni, räjpmi:



—Colhunii, te rut gusgueedi la'tu,

<sup>6</sup> sa'csi xhidalduxh bejn jiaäd con laä, gäbreni: “Narä nacä Crist”, luxh rniisireni si'c, susgueezareni xhidajl bejn.

<sup>7</sup> 'Che jiejn diajgtu yu' guer näj yäl'nadxeeb xten guer, na'c guidxejbtu. Nanabpac gacni; et dxejcdi nitloj guedxliuj.

<sup>8</sup> Säjs nación yejc sanacionni, näj yäl'rnibee yejc sayäl'rnibeeni. Xhidajl lajt sajc xu, siliianza bejn, luxh säjs rebejn yejc sa'ni. Redee najc ni guisloj guidxejb, gachuinza lajzni.

<sup>9</sup> 'Dxejc la'tu col'susin sa'csi sutedre ni la'tu ladznaa reguxhtis, siguijnzareni la'tu neñ reguidoo. Sacrejdxto lo regubieer näjza loj re'reii xcäl'nasa'c narä, te si'c gac guiniitu xtidx lojreni.

<sup>10</sup> Nanabpac guirechxgaä xtidx Dios loj guiraa reben guedxliuj.

<sup>11</sup> Che guiniaazareni la'tu, che chanäreni la'tu loj reguxhtis, na'c gunxgaatu xhigab xhi diidx guiniitu. Col'nii nani jiaäjtis yejctu dxejc, sa'csi xhet la'ditu ni guinii, Sprit Dxan xten Dios ni guinii.

<sup>12</sup> Luxh suto' bejn lagajc bejtzni te guet bejtzni. Suto'za dad lagajc xi'nni. Säjs rebiiux yejc rexcusajnni te guet reguzajnga.

<sup>13</sup> Sidxechlajz guiraa rebejn lojtu sa'csi najctu xpenä; nani ted guiraa retrabajwre, ni'c gudeed Dios xcäl'nabajnni.

<sup>14</sup> 'Che fiitu loj nani najc yäl'rdxechlajz, nani najc yäl'runitloj, nani gunii Daniel ni gunii xtidx Dios. Che fiitu nani suga' cadro di nunyäl'l suuni, dxejcti suguxuñ renani yu' nez Judea chääreni nez neñ redajn. (Nani goļ guijtze sugacheenini.)

<sup>15</sup> Bejn nani suga' yejc yu' na'c jiaäjtne jiu'ni neñ te yu' xca'ni gaii xhixtenni.

<sup>16</sup> Nani yu' loj niaa, di gal jiaät te xca'ni xhablajzni.

<sup>17</sup> ¡Ai! Xhiza nalas chu regunaa ni nuu bäs, luxh renani rusiä' xi'nni, neñ redxejga.

<sup>18</sup> Col'nab loj Dios na'c sactu scree neñ rebäinajl.

<sup>19</sup> Neñ redxejga su' trabajwduxh, nani gajd chu che bencheeli Dios guedxliuj, luxh diruni chu, dxejctis chuni.

<sup>20</sup> Paru di Dad gusia'tz redxejga, nicla tej bejn di laa. Susia'tzni redxejga sa'csi sanälajzni rexpejnni nani aguleni.

<sup>21</sup> 'Dxejc palga yu' chu naa lojtu: “Colhunii, aree Crist”, o “Colhuiire, ani suga' rec”, na'c chalilajztuni.

<sup>22</sup> Sa'csi su' bejn nani rniisi najcni Crist. Su'za reniguii nani rniisi rniireni xcuent Dios. Sujnzareni milaagwr, te gusgueerene, te palga sajcn, rlaizrene gusguelireni renani agule Dios.

<sup>23</sup> Ni'cni la'tu col'susin; agunixgaä lojtu guira'ti ni gac.

*Xho gac che jiaäd Xi'n Dios ni gujc Niguii*

(Mt. 24:29-35, 42-44; Lc. 21:25-36)

<sup>24</sup> 'Neñ redxejga, cheni luux retrabajwduxhga, sicäy lo gubijdx, luxh diru bäi gusanij.

<sup>25</sup> Sitejb rebal'xhaguibaa, sinibsejs recos nani nasnäj rebal'xhaguibaa.

<sup>26</sup> Dxejcti suhuii rebejn loä, Xi'n Dios nani gujc Niguii, siälä neñ reza guideb yäl'rnibeduxh xtenä, näjza xcäl'dimbicha'ä.

<sup>27</sup> Dxejcti guxhal'gacä rexanglä jiaätojpreni renani guleä guideb lo guedxliuj, cat nalooli guedxliuj näjza cadro nalooli guibaa.

<sup>28</sup> 'Col'guiseed nani ruluii yagiigw. Cheni rii rebäte' lojni luxh che rcaj balajg lojni, acaxhnajntu bäi gusguij asadzun'gajxh.

<sup>29</sup> Sigajcza, che fiitu acayajc recosre, sacbeetu asiädgaxhä, ameer guidzuñä.

<sup>30</sup> Rniliäpac lojtu, rebejn ni nabajn dxejc, direni nitloj, fixgaareni gac recosga.

<sup>31</sup> Sinitloj guibaa näjza guedxliuj, rextidxä di nitloj.

<sup>32</sup> 'Naj, rut najndi gac gac recosga, nicla rexangl Dios ni yu' xhaguibaa, niclaza narä Xi'n Dios, Xtadätis najn.

<sup>33</sup> 'Colhuiu, colsusin, colnab loj Dios, sa'csi ditu gan gac guidzujn redxejga.

<sup>34</sup> Dee najc si'c najc te bejn ni birii säa zijt. Che gajdlini guirri, badeedni xtzun rexmosni, luxh gunibeezani susin nani canäj rolä'.

<sup>35</sup> Si'cza colsusin, sa'csi ditu gan gac jääd baxhuaan yu'ga, la jäädni gudxej, o la jäädni garol yääl, o la cäy, o la jäädni rsil.

<sup>36</sup> Colsusin, te di guiga'tu nagajejstu che guidzujni.

<sup>37</sup> Rediidx nani rniä lojtu, loj guiraa rebejn rniäni: colsusin.

## 14

### *Ruchaagreni diidx te guiniaazreni Jesús*

*(Mt. 26:1-5; Lc. 22:1-2; Jn. 11:45-53)*

<sup>1</sup> Riäädx tiop dxej guidzujn lanij, dxej ni ruzaa lajzreni gulaareni ladznaa reEgipto. Neñ redxejga rajwreni yätxtiil nani di saguij. Rebixhojz nani rnibee neñ guidoo xten rexpejn Israel näj rebejn ni ruluiu leii rlanjreni niniiaazreni Jesús con yälrusguee, te nugu'trenini.

<sup>2</sup> Dxejcti räjpreni lo sa'reni:

—Na'c jiennu scree neñ redxelanij, te na'c gun benguejdx biey.

### *Te gunaa ni basäl se't yejc Jesús Betania*

*(Mt. 26:6-13; Jn. 12:1-8)*

<sup>3</sup> Yu' Jesús Betania, rolizj Simón, nani guyu' guejch ni ral tiejxhni. Che sobga'ni lo mex, biääd te gunaa ca' te bo'tguij yu' setnard nenñi. Rlianexhduxhni, sacduxhni. Dxejc gudi'chni yejn bo'tguijga, te basäl'ni se'tga yejc Jesús.

<sup>4</sup> Yu'za gaiireni ro'c ni bidxe'ch, räjp loj sa'reni:

—¿Xhicuent banijtni setnejxhga?

<sup>5</sup> Paru nido' se'tga, nijni si'cti choñ gayuu denar, te nica' meelga rebejn ni xhet rajpdi meel.

Luxh caguidxa'reni loj gunaaga.

<sup>6</sup> Dxejc räjp Jesús lojreni:

—Colsaanni, ¿xhicuent rudxojntu nani cayujn gunaare? Cos sacduxh dee bennäjni narä.

<sup>7</sup> Guideb ni guibajntu, su' rebejn nani xhet rajpdi lojtu, luxh che rlanjtu sajc gacnäjturen. Narä et xchejdi chu'ä lojtu.

<sup>8</sup> Gunaare abejnni nani gujctis bejnñi. Abaslanexhxgaani tiexhä, te chää tiexhä neñ baa.

<sup>9</sup> Rniliäpac lojtu, cadrotis guidzujn xtidx Dios, guideb lo guedxliuj, sini-izareni xcuent nani bejn gunaare, te guinaj lajzreni gunaare.

### *Rlanj Judas guto' Jesús*

*(Mt. 26:14-16; Lc. 22:3-6)*

<sup>10</sup> Dxejcti huij Judas Iscariot, nani najc tej retzubitio'p xpejn'pac Jesús, loj rebixhojz nani rnibee te guto'ni Jesús lojreni.

<sup>11</sup> Che biejn diajg rebixhojz xtiidxni, bibalajzreni. Räjpreni sudeedreni meel lojni. Dxejcti caguil Judas xho guto'ni Jesús.

*Gudauxchej Dad con rexpejnpacni**(Mt. 26:17-29; Lc. 22:7-23; Jn. 13:21-30; 1Co. 11:23-26)*

12 Biu'ti xmaan che rajwreni yätxtiil ni di saguij. Dxej lanijga, rugu'treni xiil, te ruzaa lajzreni dxej ni gulaareni ladznaa reEgipto. Räj p rexpejnpacni loj Jesús:

—¿Caro rlaizlu chosucheenu te gauulu nadxej, dxelani?

13 Dxejc baxhałni tiop rexpejnpacni, räj pni lojreni:

—Colchäj neñ guejdx, ro'c guidxaagtu te niguii ni nuu te re' nis. Colchanajl niguiiga.

14 Cadro jiu'ni colye'tz loj bejn ni najc rolizni ro'c: “Naj Dad mastr, ¿con yu' cadro ria'n rebiooz, cadro gaunäjni rexpejnpacni nadxej, dxelani?”

15 Dxejcti guluiini lojtu te yu' ni sojb jiaaliga yejc sa'ni, ni asuchexгаа neñni. Colyujn xhi guidaunu ro'c.

16 Sas huij rexpejnpacni, bidzujnreni neñ guejdxga. Bidxälreni te yu' si'cni räj Jesús lojreni. Ro'c bejnreni xhi gudajwreni dxelani.

17 Che huääz gubijdx, bidzunäj Jesús guitzubitio'p xpejnpacni.

18 Lałni sobga'reni lo mex cayajwreni, räj Jesús lojreni:

—Rniliäpac lojtu, tej la'tu ni cayaunää, suto'ni narä.

19 Dxejcti gosloj cayac-huin lajzreni, räj p tebgajreni lo Jesús:

—¿La naräni?

Räpgajc steeni:

—¿La naräni?

20 Dxejcti guniini, räj pni lojreni:

—La tej retzubitio'p, tej ni cayajw loj xpła'tä.

21 Sa'csi narä Xi'n Dios nani gujc Niguii, sia'ä, si'cpacni caj loj xtiidx Dios, per xhiza nalajz niguii ni guto' narä. Huentejti na'c niajl niguiire.

22 Lałni cayajwreni, cua' Jesús yätxtiil, badeedzani xquixhtiooz loj Dios dxejc gula'nini, badeednini lojreni. Dxejcti räj pni:

—Colca' yätxtiilre. Dee najc si'c tiexhä.

23 Cuagajcni te bas. Che abadeedni xquixhtiooz loj Dios, badeednini lojreni, gu' guiraareni neñ basga.

24 Dxejcti räj Jesús lojreni:

—Dee najc si'c xtienä ni ruluii diidx ni biä'nnu, nani guixe' xcuent xhidajl rebejn.

25 Rniliäpac lojtu, diruna yä'ä bin nani rii yejc uub, dxejli yä'äni stehuält loj xcälrnibee Dios.

*Gunii Jesús sinii Pedr dini gumbeeni**(Mt. 26:30-35; Lc. 22:31-34; Jn. 13:36-38)*

26 Che gulujx bilreni te dij xten Dios, biriireni, sääreni nez dajne' ni laa dan Oliib.

27 Dxejcru räj Jesús lojreni:

—Guiraatu sibälaztu narä naguxhijn, sa'csi si'c cajni lo guijt: “Sugu'tä baxhtoor luxh suxun rexiil.”

28 Che guibansacä loj rebengut, ganidä cha'a Galilee, dxejcti jiaädту.

29 Dxejc räj p Pedr loj Jesús:

—Palga guiraareni cuälazlu, narä dina cuälazälu.

30 Dxejc räj Jesús lojni:

—Rniliäpac lojtu, lagajc guxhijnre, nicla gajd guidgaa cuedxa' tiop huält, luj aguiniilu choñ huält dilu gumbee narä.

31 Luxh laani sanuutis xtiidxni, räj pni:

—Cadro guetlu setäza, dina guiniä dina gumbeälu.  
Luxh guiraa rexpejn pacni gunii si'c.

*Gunab Jesús loj Dios che yu'ni Getsemani*  
(Mt. 26:36-46; Lc. 22:39-46)

<sup>32</sup> Dxejcti bidzujñreni te lajt cadro laa Getsemani. Dxejc räjpni loj rexpejn pacni:

—Colcuej ree lajni chanabä lo Dios.

<sup>33</sup> Dxejcru sanäni Pedr näj Jacoob näjza Juan. Dxejc gusloj cayac-huinduxh lajzni, luxh cayu'ni yälrsiaduxh.

<sup>34</sup> Dxejc räjpni lojreni:

—Cayac-huinduxh lazä, an sugu'tni narä. Coljia'n ree, coltie'ch bacal.

<sup>35</sup> Sas gusajni tla', bazuxhijbni lo yuj, dxejcti gunabni lo Dios don la niajc nidedcaj nani sacni dxejc.

<sup>36</sup> Räjpni:

—Abba, xtadä, luj rajc rujnlu guira'ti: badzucay retrabajwre loä. Xhet si'cni rlazädi narä, bejn si'cni rlazlu luj.

<sup>37</sup> Dxejc biädni gunaaznireni nagayejsreni. Dxejc räjpni lo Pedr:

—Simón, ¿la nagayejslu? ¿La nicla te rate' diniajcdi nutie'chlu bacal?

<sup>38</sup> Coltie'ch bacal, colnab lo Dios, te na'c guntu dojl. Lastootu rlanj gutie'chtu bacal, luxh tiejxhtu abadxaj.

<sup>39</sup> Huij Jesús stehuält, binabni loj Dios, guniini lagajc rediidx ni guniini galoo.

<sup>40</sup> Dxejcti biädsacni cadro tre'reni, gunazsacnireni nagayejsreni, sa'csi yuduxh bacal lojreni. Luxh direni nidxäl xhi niniireni lojni.

<sup>41</sup> Ni riojn huält biädni, dxejc räjpni lojreni:

—Agojl colguejs, colsilajz, agujc, abidzujñ or ni ted Xi'n Dios ni gujc Niguii ladznaa rebendojl.

<sup>42</sup> Colchastie, colcho'. Asiäddzujñgajxh ni guto' narä.

*Gunaazreni Jesús*  
(Mt. 26:47-56; Lc. 22:47-53; Jn. 18:2-11)

<sup>43</sup> Canisijcni scree, che bidzujñ Judas, ni najc te retzubitio'p xpejn pacni, siädnäni xhidajl bejn. Ca'reni spaad, ca'reni yajc biriireni lo rebixhojz nani rnibee, näjza rebejn ni ruluii leii, näjza rebengool nani najc guxhtis.

<sup>44</sup> Niluxh nani ruto' Jesús abadeedni te seen lojreni, räjpni:

—Nani guchagro'ä, ni'c najc laani. Colnaazni, colyaptzu'tzni te si'c chanätuni.

<sup>45</sup> Che bidzujñ Judas, gubigni loj Jesús, räjpni lojni:

—Dad, Dad.

Sas bachagro'nini.

<sup>46</sup> Dxejcru gunaazreni Jesús ro'c.

<sup>47</sup> Dxejc tej reni suga' ro'c, gulää xspaadni, gudilguijdxni xmos bixhojz nani sajcru, batiu'ni diajgni.

<sup>48</sup> Dxejc räjp Jesús loj rebejn:

—¿La siädxhiitu narä con spaad näjza garo't si'c rixiitu te gubaan?

<sup>49</sup> Guiraa dxej guyu'ä lojtu neñ guidoo, caguluiätu xtidx Dios luxh ditu niniiaaztu narä. Scree cayajcni, te soob diidx ni caj lo reguijtz.

<sup>50</sup> Dxejcru rexpejn pacni gulälazreneni, baxuntireni.

*Bi'n nani baxun*

<sup>51</sup> Sanajlza te bi'n Jesús, nadejbni ganaxhtis te bariaad. Si'c gunaazreneni.

<sup>52</sup> Dxejcti baxunni, libasa'nni bariaadga, sä'tini xhabäälmi.

*Suga' Jesús loj reguxhtis**(Mt. 26:57-68; Lc. 22:54-55, 63-71; Jn. 18:12-14, 19-24)*

<sup>53</sup> Dxejc biädnäreni Jesús loj bixhojz ni sajrcu. Bidojpb rebixhojz nani rnibee, näj rebengool ni najc guxhtis, näjza rebejn ni ruluii leii.

<sup>54</sup> Luxh Pedr zijt zijt sanajlni Jesús. Che bidzujntini lo xle' bixhojz ni sajrcu, gurenäjni rebejn nani rajp ro'c, cagucha' lajzni lo bajl.

<sup>55</sup> Rebixhojz nani rnibee, näjza guiraa rebengool ni najc guxhtis, caguuiilreni xhi tej xquej Jesús nidxälreni, te nugu'treni Jesús, xhet bidxäldireni.

<sup>56</sup> Xhidajl bejn gunii didxxhii, räjpreni et laadi rujn Jesús, niluxh di xtiidxreni nile', sa'csi garen garen guniireni.

<sup>57</sup> Dxejc huisulii gaii bejn ni guniireni stee didxxhii xcuent Jesús, räjpreni:

<sup>58</sup> —Nuunu biejn diaagnu guniini: “Sutiexhä xyu' Dios ni guc-chee con ñaa rebejn, luxh chontis dxej guncheä steeni, ni nac-chee et con ñaadi rebejn.”

<sup>59</sup> Nicla si'c di xtiidxreni nile', sa'csi garen garenza guniireni.

<sup>60</sup> Dxejcti huisulii bixhojz ni sajrcu galäii guiraa rebejn, gunabdiidxni loj Jesús räjpni:

—¿La digacdi guiniilu xhi guiniilu xcuent requej ni cabe'c reniguiire, ä?

<sup>61</sup> Laani niäuuutis ro'ni, xhet guniidini. Dxejcti gunabdidxsac bixhojz ni sajrcu lojni, räjpni:

—¿La luj ni najc Crist, xi'n Dios nani rliä'p bejn xpala'nni, ä?

<sup>62</sup> Dxejcti räjp Jesús lojni:

—Naräni. Suhuuiitu loä, Xi'n Dios nani gujc Niguii, sobga'ä xladbee Dios ni rnibee, siäläza nen reza ni tre' xhaguibaa.

<sup>63</sup> Dxejcru bixhojz ni sajcruga, batiäjsni tla' xhajbni, räjpni:

—¿Xhi jienrunu guidiilnu diidx xcuentni?

<sup>64</sup> Abiejn diajgtu xho guniyajni Dios. Naja', ¿xhi najtu?

Dxejcti guiraa reni räjp nungäjlpac guetni.

<sup>65</sup> Dxejc yu' reni gusloj cagutiobxhejn lojni, luxh basäuureni lojni, dxejc huääzrenini, räjpreni lojni:

—Gunii, ¿chuni'c huääzlu?

Luxh renani canäjni gudajp lojni.

*Gunii Pedr dini gumbee Jesús**(Mt. 26:69-75; Lc. 22:56-62; Jn. 18:15-18, 25-29)*

<sup>66</sup> Dxejc suga' Pedr lo yuj, nez lo le'ga, che biääd te xcriaad bixhojz ni sajrcu.

<sup>67</sup> Luxh bahuiini cagucha' lajz Pedr, cadxelojni lojni. Dxejcti räjpni:

—Näj luj nadxaaglu Jesús ni siääd Nazare't.

<sup>68</sup> Dxejc Pedr basgueeni, räjpni:

—Dina gumbeäni. Dizana ganä xhini'c caniilu.

Dxejcti biriini sääni ro' suaan. Dxejcti guredxa' guidgaii.

<sup>69</sup> Dxejc bahuisac criaadga lojni, räjpni loj renani suga' ro'c:

—Niguiire najc laa tejreni.

<sup>70</sup> Luxh laani basgueeni stehuält. Che gojl stera't, räpsac renani suga' ro'c loj Pedr:

—Guliipacni näj luj najclu tejreni, sa'csi bejn Galileelu, luxh guyasi riejn rniilu si'c rnii reben Galilee.

<sup>71</sup> Dxejc gusloj canii Pedr:

—Dios gun castiigw narä palga xhet guliidi ni caniä. Dios najc testiigw, dina gumbeä niguii nani caniitu.

<sup>72</sup> Dxejcti barojp huält guredxa' guidgahi. Dxejc banalajz Pedr nani räjp Jesús lojni: “Che gajldi guidgahi cuedxa' tiop huält, luj gacla choṇ huält aräjplu dilu gumbee narä.”

Dxejc guslojni cayoonni.

## 15

### *Suga' Jesús loj Pila't*

(Mt. 27:1-2, 11-14; Lc. 23:1-5; Jn. 18:28-38)

<sup>1</sup> Che bara yääl bidxaag sa' rebixhojz ni rnibee, näj rebenḡool ni najc guxhtis, näjza rebejn ni ruluii leii, näjza guiralii reguxhtis. Dxejcti gusloj cachaagreni diidx xho gunreni. Baliibreni Jesús, sanätirenini, niluxh badeedrenini loj Pila't.

<sup>2</sup> Dxejc gunabdiidx Pila't loj Jesús räjpni:

—¿La luj ni najc reii xten rexpejn Israel, ä?

Räjp Jesús lojni:

—Si'cni guniilu, si'c najcni.

<sup>3</sup> Dxejc gusloj rebixhojz nani rnibee cabe'c rexquej Jesús.

<sup>4</sup> Gunabdiidxsac Pila't lojni:

—¿Xhet rniidilu ä? Ahuii lacti xquejlu cabe'ceni.

<sup>5</sup> Bidxeloj Pila't sa'csi nicla si'c xhetru guniidi Jesús.

### *Gunibeereni guet Jesús*

(Mt. 27:15-31; Lc. 23:13-25; Jn. 18:38-19:16)

<sup>6</sup> Dxelanijpac ruslaa Pila't tej rebejn ni yu' latzguiib. Ruslaani chutis te ni rniab rebejn.

<sup>7</sup> Lo rebejn ni yu' latzguiib nadxaag te niguii ni laa Barrabás. Bagu'tni te bejn che nu'chni lo te cuaa bejn ni gudilnäj gubieer.

<sup>8</sup> Dxejc bidojp xhidajl bejn loj Pila't, gunabreni lojni gunni si'ctis rujjni casob lanij.

<sup>9</sup> Dxejc gunabdiidx Pila't lojreni, räjpni:

—¿La rlanjtu guslaä reii xten rexpejn Israel, ä?

<sup>10</sup> Sa'csi gucbegajcni rdxechlajz rebixhojz loj Jesús, ni'c bateedrenini lojni.

<sup>11</sup> Ni'cni baquuilza rebixhojz ni rnibee rebenḡhidaal te gäbreni lo Pila't:

—Baslaa Barrabás loonu lacuaa ni guslaalu Jesús.

<sup>12</sup> Dxejc räjp Pila't lojreni stehuält:

—¿Xhini'c rlanjtu gunnä nani rniitu reii xten rexpejn Israel?

<sup>13</sup> Dxejcru guredxa'reni:

—¡Bacuaani lo cruzj!

<sup>14</sup> Dxejc räjp Pila't lojreni:

—¿Xhini'c xhet laati bejnni?

Dxejcti laareni rbedxa'rureni:

—¡Bacuaani lo cruzj!

<sup>15</sup> Baslaati Pila't Barrabás, sa'csi rlanjz ni nuspaani lajz rebenḡhidaal. Che gulujx gunibee Pila't, bia Jesús. Bateedti Pila't Jesús loj rexsoldaadni, te xcajni loj cruzj.

<sup>16</sup> Dxejc huinä rexsoldaadni Jesús neṇ Pretoor, yu' cadro rujnreni yälḡuxhtis, ro'c batojpreni guiraa resa'reni.

<sup>17</sup> Dxejcti bashuajcwreni Jesús te lad moraad, bencheereni te coroṇ guejch basäl'reni yejcn.

<sup>18</sup> Guslogajc caguxhi näjrenini, caniireni lojni:

—¡Colguiliä'p xpala'n reii xten rexpejn Israel!

<sup>19</sup> Batiäj|reni te yabixhij| yejcnj, batiobxhejnreni lojni, luxh guzuxhijbreni te rajnrenini.

<sup>20</sup> Che gulujx basacsireni Jesús, gulääreni lad moraad ni najcwni, sas bashuajcwrenini xhajbpacni. Gulägajceni Jesús te cuaarenini lo cruzj.

*Bacuaareni Jesús loj cruzj*

(Mt. 27:32-44; Lc. 23:26-43; Jn. 19:17-27)

<sup>21</sup> Te niguii ni laa Simón, ni siääd Cirene, sadejd ro'c, bazajni lo nejz. Niguiire najc xtað Alejandro näjza Rufo. Che sadejdni nejzga, la fuerz basguurenini xcruzj Jesús.

<sup>22</sup> Dxejcti huinäreni Jesús cadro laa Gólgota, nani säloj: dan Calabeer.

<sup>23</sup> Ro'c badeedreni lo Jesús bin nani nu'ch mir lojni, dxejc laani naaddini niä'ni binga.

<sup>24</sup> Che gulujxti bacuaareni Jesús loj cruzj, gudzujtreni yejc rexhajbni, te don xhini'c xca' tejegareni.

<sup>25</sup> Agujc choñ or gulejn gubijdx che bacuaareni Jesús lo cruzj.

<sup>26</sup> Letreer cadro bacuaareni xtoj|ni scree bejnrenini: “Reii xten rexpejn Israel.”

<sup>27</sup> Bacuaazareni lo stiop cruzj tiop gubaan, tejni xladbee Jesús, xtee xladbäjgwini.

<sup>28</sup> Dxejc guzobj diidx ni caj loj guijtj nani rnii: “Loj rebenguijdx bigabni.”

<sup>29</sup> Luxh renani sadejd nejzga guniyajreni Jesús, cagusniibreni yejcreni, räjpreni lojni:

—¡Jaa! Luj nutiejxhlu guidoo luxh choñtis dxej niunchesacluni.

<sup>30</sup> Naj baslaa lagajc luj, biäj't loj cruzjga.

<sup>31</sup> Näjza rebixhojz ni rnibee, näj rebejn ni ruluii leii, baxhiznärenini, räjp loj sa'reni:

—Ste'ca bejn ruslaani, xhoxh digacdi guslaani lagajc laani.

<sup>32</sup> Naj sujijät Cristre, reii xten rexpejn Israel, lo cruzj te guihuiinu, te chalilaaznu.

Näj regubaan ni caj lo cruzj guniyazareni Jesús.

*Xcälgujt Jesús*

(Mt. 27:45-56; Lc. 23:44-49; Jn. 19:28-30)

<sup>33</sup> Che gojl läidxej, bicäjy si'cti choñ or.

<sup>34</sup> Che gudejd choñ orga, guredxa' Jesús dipro, räjpni con xtiidxni:

—Eloi, Eloi, ¿lama sabactani? —dee säloj: Xtiozä, Xtiozä, ¿xhicuent gulälazlu narä?

<sup>35</sup> Biejn diajg gaii bejn ni suga' ro'c räjpni si'c, dxejc räjpreni:

—Colcuadijg, Elías cabejdxni.

<sup>36</sup> Sas baxuñ tejni, bahuajdxni te sponj loj binagr. Dxejcru basäl|nini yejc te yabixhij|, badeednini loj Jesús te yänini, räbgajcni:

—Colgusaan guihuiinu don la siäd|äjd Elíasni loj cruzj.

<sup>37</sup> Dxejcru guredxaduxh Jesús, gujttni.

<sup>38</sup> Dxejc lajd ni najl nen guidoro biräjsni, gujcnj tiop la', jiaali lo yujli.

<sup>39</sup> Suga' capitän nani rnibee te gayuu soldaad nez loj Jesús, luxh che bahuiini xho guredxa' Jesús scree näj xho gujttni, räjpni:

—Guli'pacni, niguiire najc Xi'n Dios.

<sup>40</sup> Suga'za gaii gunaa, zijt cadxelojreni. Lojreni yu' Marii Magdalen, näj Marii, xnan Jacob ni najc huinru, näjza José, näjza Salomee.

<sup>41</sup> Che guyu' Jesús Galilee birinajl regunaare Jesús, luxh bahuiirenini. Yu'za xhidajlrū regunaa ni biädñajl Jesús che biäädni Jerusalén.

*Biga'tz Jesús*

(Mt. 27:57-61; Lc. 23:50-56; Jn. 19:38-42)

<sup>42</sup> Biu' gudxhijñ, luxh najcni dxe bispr che rusucheereni par sabd, dxej ni rusilajz rexpejn̄ Israel.

<sup>43</sup> Biääd José ni siääd Arimatea, najcni te rebejn̄ ni sajc loj reguxhtis. Näjza laani cabäjzni xcälrmibee Dios. Guideb yälñabajn̄ gunabni tiexh Jesús lo Pila't.

<sup>44</sup> Bidxelo Pila't alagujt Jesús, sas gurejdxni capitán ni rnibee tej gayuu soldaad, gunabdiidxni lojni la balagujt Jesús.

<sup>45</sup> Che räjp capitángalojni agujt Jesús, dxejc badeed Pila't tiexh Jesús loj José.

<sup>46</sup> Agusii José te bariaad, luxh che gulätñi Jesús lo cruzj, batejbnini nen̄ bariaadga. Dxejc gudixhni Jesús nen̄ te biliää ni caj cuä' te guilaj, dxejcru batzugini te guiro ro' biliääga.

<sup>47</sup> Bahuii Marii Magdalen̄ näj Marii xnan José cadro biga'tz Jesús.

## 16

*Huäjz Jesús loj rebengut*

(Mt. 28:1-10; Lc. 24:1-12; Jn. 20:1-10)

<sup>1</sup> Che gudejd sabd, dxej ni rusilajz rexpejn̄ Israel, Marii Magdalen̄ näj Marii xnan Jacoob näjza Salomee gusii setnejxh te chatääbreni se'tga tiexh Jesús.

<sup>2</sup> Che biu' xmaan, rsildooru, che calejn̄ gubijdx, biäädreni ro' xpaani.

<sup>3</sup> Cayäjp loj sa'reni:

—¿Chu gudzucaj guiroga ro' xpaani te jiu'nu?

<sup>4</sup> Che gudixhlojreni, bahuiireni alagubicaj guijga, luxh najcni te guiroduxh.

<sup>5</sup> Che biu'reni nen̄ biliääga, bahuiireni lo te bi'n sobga' ladbee nen̄ biliääga. Najcw bi'nga te ladnol ni najc siool. Dxejc bidxejb regunaaga.

<sup>6</sup> Dxejcti räjp bi'nga lojreni:

—Na'c guidxejbtu. Caguiiltu Jesús ni siääd Nazare't, nani cuaj lo cruzj. Rutiruni ree. Agubajñni lo rebengut, coltahuii cadro gudixhreni tiejxhni.

<sup>7</sup> Colchäj, colchaye'tz lo rexpejn̄pacni, loj Pedr, ganidla Jesús guidzujñ Galilee, dxejcti guidzujñtu. Ro'c fiitu lojni, si'cni guniini lojtu.

<sup>8</sup> Biriitireni ro' biliääga, racejslireni sa'csi cadxejbreni. Rut lojdi guniidi-reni sa'csi cadebduxhreni.

*Baluiloj Jesús loj Marii Magdalen*

(Jn. 20:11-18)

<sup>9</sup> Gubajn̄ Jesús loj rebengut rsildooru che biu' xmaan. Baluilojni galoo loj Marii Magdalen̄, nani agacgulääni gajdz ben̄dxab nen̄ lastooni.

<sup>10</sup> Dxejcti huij Marii Magdalen̄, huiye'tzñi loj renani cuansanäj Jesús, renani cayac-huin̄ lajzñi, cayooren̄i.

<sup>11</sup> Che biejn̄ diajgreni ahuäzsac Jesús lo rebengut, luxh Marii abahuii lojni, di lajzreni nilii.

*Baluiloj Jesús loj tiop xpejn̄pacni*

(Lc. 24:13-35)

<sup>12</sup> Ste'ca najc Jesús baluilojni loj tio'p renani sasaj sääreni lo nejz.

<sup>13</sup> Dxejcti gubi'reni, huiye'tzreni loj sgaiga, luxh nicla xtidx reni'c di lajzreni nilii.



*Baxhal Jesús repost**(Mt. 28:16-20; Lc. 24:36-49; Jn. 20:19-23)*

<sup>14</sup> Lult baluilojni loj guitzubiteebreni che sobga'reni lo mex. Gudidxa' Jesús lojreni, sa'csi di lajzreni nilii luxh guyaa lajzreni. Di lajzreni nilii xtidx renani bahuii loj Jesús che gubangajcni loj rebeṅgut.

<sup>15</sup> Rājṗ Jesús lojreni:

—Colchāj guideb lo guedxliuj, colnii xtidx Dios lo guiraa rebejṅ.

<sup>16</sup> Nani chalilajz luxh tiobnisni, siliaani loj dojl; biāda nani di lajzni chalii sinijtni lo dojl.

<sup>17</sup> Niluxh remilagwre jiannāj renani chalilajz: sibääreni beṅdxab xcuentä; siniireni ste'ca diidx;

<sup>18</sup> guiniaazreni bäl con ṅaareni; masque yäreni xhicos ni rugu't bejṅ, xhet gacdireni; susujreni ṅaareni yejc rebeṅracxhuu luxh siajc rebeṅracxhuu.

*Huä'p Jesús xhaguibaa**(Lc. 24:50-53)*

<sup>19</sup> Gulujxti gunii Dad Jesús si'c lojreni. Dxejc huäjsni sääni xhaguibaa. Ro'c huicueni cuä' Dios ladbee.

<sup>20</sup> Dxejcti laareni bire'chreni, guniireni xtidx Dios guiranejz. Lagajc Dadga gucnājreni, bejnii milagwr te guchee bejṅ laapac xtidx Dios ni caniireni. Sugacni si'c.

## Rediidx Nani Bacuaa Lucas Xcuent Jesucrist

### *Xhicuent bacuaa Lucas rediidxre*

<sup>1</sup> Xhidajl bejn abacuaa lo guijtz xcuent guiraa redzuun ni gujc nez loonu te cuäxnejzreni redzuunga

<sup>2</sup> si'cpac ni biääd rediidxga loonu. Rebejn nani bahuiloj guiraa recosre cheni guslojlireni, näjza reni gucnäj basule' xtidx Dios najc renani basule' rediidxga loonu.

<sup>3</sup> Luxh sa'csi abilä, abahuiloä, abenduxhä xhigab xcuent guiragajc ni gusajc che gusoblojlini, ni'c runä xhigab laaca gucuaä rediidxre, xnejz-xnejzni lo guejblu, Dad Teófilo,

<sup>4</sup> te gachesa'c guejblu ni najc didxlii xcuent guiraa rediidx ni abisieed guejblu.

### *Te xangl Dios gunii xho gaal Juan ni rutiobnisi*

<sup>5</sup> Cheni gujc Herodes reii xten región Judea, guyu' te bixhojz ni laa Zacarías, ni nadxaag lo rexpejn Abías. Chäälni laa Elisabe't, ni najcza te xagdoo bixhoz Aaron.

<sup>6</sup> Guiro'preni najcreni nadolajz nez loj Dios, rusoobreni xtidx Dios näjza xleii Dios, ni'c digacdi gucuaquij bejnreni xcuent nicla tej dojl.

<sup>7</sup> Luxh ruti xi'nreni, sa'csi chäälni digacdi chu xi'nni. Luxh guiro'preni anajcreni bengool.

<sup>8</sup> Te dxej, la<sub>l</sub> ni cayujn Zacarías dzuun neñ guidoro si'c bixhojz nez loj Dios,

<sup>9</sup> dxejc con daad bibee chuni'c jiu' neñ yudxan xten guidoro te guze'creni yaal si'cni najc costumbr xten rebixhojzga. Dxejc si'c gulereni Zacarías gunni.

<sup>10</sup> La<sub>l</sub> ni caguze'cni guxhyaal, suga' guiraa rebejn lo xle' guidoro, cabedx-canabreni lo Dios.

<sup>11</sup> Dxejcti baluiloj te xangl Dios lo Zacarías, suliiini ladbee lo dxan cadro cayejc guxhyaal.

<sup>12</sup> Che bahuii Zacarías lo xangl Dios, di jien xhi gunni, lacti bidxebduxhni.

<sup>13</sup> Sas xangl Dios räjp lojni:

—Na'c guidxnejblu, Zacaríi, sa'csi Dios abiejn diajgni xtiidxlu, luxh su' te xi'n chäälu, Elisabe't; cuälajluni Juan.

<sup>14</sup> Sibalazduxhlu, siroob lastoolu; xhidajl bejn sibalajz sa'csi gaalni,

<sup>15</sup> sa'csi beñro gac xi'nlu nez loj Dios. Dini yä bin, nicla maxcaal. Sibäjz Sprit Dyan xten Dios neñ lastooni cheni gaallini.

<sup>16</sup> Sujnni gusiechlazj xhidajl rexpejn Israel, guibi'reni lo Gueb Dios.

<sup>17</sup> Juanre sinijdni loj Dad, sujni lagajc xhigab, sajpní lagajc yälnibee ni gojp profe't Elías, te che jiejn diajgreni xtiidxni susiechlazj redad, susiäjzarení diidx con rexi'nreni. Sigajcza rebejn ni di gusoob xtidx Dios sisieedreni gusoobreni xtidx Dios, te si'c jiädsucheeni lastoo rebejn te chalilajzreni xtidx Dad ni jiääd.

<sup>18</sup> Gunabdiidx Zacaríi loj anglga, räjpni:

—¿Xho mood gacheä guliilu? Sa'csi anacä bengol, sigajcza chälä.

<sup>19</sup> Dxejcti räjp anglga lojni:

—Narä nacä Gabriel, runä dzuun lo Dios. Laani baxha<sub>l</sub>ni narä te guininää luj, jiädnaä didxhueenre lojlu.

<sup>20</sup> Luxh naj, sa'csi dilajzlu nilii xtidxä, sia'nlu gop, digacdiru guiniilu, cheni gaalli xi'nlu sinisaclu. Rextidxä sisiojb che guidzujn dxej che riäjĭl gacni.

<sup>21</sup> Laĭni cayajc dee, cadxeloj rebejn ni suga' nez ro' yudxan cabäjzreni guirĭi Zacarĭi sa'csi cayaclaani neĭ yudxan.

<sup>22</sup> Che birĭi Zacarĭi, di niajcdiru niniini loj rebejn; dxejc gucbeereni yu' xhi cosro bahuiini neĭ yudxan xten guidoo. Dxejc con seen guninäjni rebejnga, sa'csi xheti xse'ni te niniini.

<sup>23</sup> Che gulujx bejnni dzuun neĭ guidoro, gubi'ni rolizjni.

<sup>24</sup> Che gudejd redxej dxejcti bazeĭ nuu Elisabe't, chääĭni, báz, gaii bäi diruni niĭri rolizjni. Bejnni xhigab, räjpni:

<sup>25</sup> "Si'c bejn Dad Dios narä naj, gucnäjni narä te diru bejn cuälaz narä sa'csi ruti xi'nä."

### *Biäddeed te xangl Dios diidx lo Marii gaal Jesús*

<sup>26</sup> Che gudejd xho'p bäi, baxhaĭ Dios xangĭni Gabriel lo te guedx Galilee ni laa Nazare't,

<sup>27</sup> te chahuiini te dxapxteeb ni laa Marii. Agojt xtiidxni te guchnaani te dade' ni laa José. Dade're najc xagdoos toĕrii David.

<sup>28</sup> Biu' anglre cadro sobga' dxape'ga, räjpni lojni:

—Xchan, dxa'p ni sanälajz Dios, ni agule Dios loj guiraa regunaa. Dios gacnäĭlu. Abenle' Dioslu loj guiraa regunaa.

<sup>29</sup> Luxh che bahuiini lo xangl Dios bidxelojni lo rextiidxni, rujnne xhigab: "¿Xhicuent caniini si'c loä?"

<sup>30</sup> Dxejc räjp xangl Dios lojni:

—Na'c guidxejblu, Marii; agule Dios luj.

<sup>31</sup> Bacuadiajg diidx. Suulu báz, su' te xi'nlu. Che gaalni guirilajni Jesús.

<sup>32</sup> Laani sajni te bejn ni sacduxh. Sirilajzani Xi'n Gueb Dios ni yu' xhaguibaro. Gueb Dios sujn gacni reiĭ sigajc ni gujc toxtadgoldooni David,

<sup>33</sup> te tejpas guinibeeni loj rexi'n Israel, luxh dipac xcälrnibeeni nitloj.

<sup>34</sup> Dxejc gunabdiidx Marii lo xangl Dios, räjpni:

—¿Xho mood gac dee? Ni dxapxteeb narä, gajd narä gumbeä niguii.

<sup>35</sup> Badzu' xangl Dios diidxre lojni, räjpni:

—Sprit Dxan xten Dios siääd loĭlu, xcälrnibee Gueb Dios ni yu' xhaguibaa suhuajcwni luj si'c te za. Ni'cni báz ni gaal sajni te beĭdxan, sibälaj bejnne Xi'n Dios.

<sup>36</sup> Näza sa'lu Elisabe't su' te xi'nni luxh anajcni te beĭgool; ni'cni gunaa nani najreni digacdi chu xi'nni agujc xho'p bäi nuuni báz.

<sup>37</sup> Xheti te cos ni naganduxhtej nez loj Dios —räjp Xangl Dios.

<sup>38</sup> Dxejcti räjp Marii:

—Narä nacä xmos Xtadnu Dios; mbaj, sugunnäj Dios narä si'ctisni gunii gueblu loä.

Dxejcti biunejz angl xten Dios lojni, sä'tini.

### *Bihuii Marii lo Elisabe't*

<sup>39</sup> Neĭ redxejga, basquejn Marii sääni lo te guejdx ni tre' neĭ redajn xten Judea.

<sup>40</sup> Biu'ni rolizj Zacarĭi, guniini xtidxbee loj Elisabe't.

<sup>41</sup> Che biejn diajg Elisabe't guniini, biniib xi'nni xque'ni, gudxaj Sprit Dxan xten Dios lastoo Elisabe't.

<sup>42</sup> Dxejc dipduxh guniini räjpni:

—Abenle'ru Gueb Dios luj loj guiraa regunaa. Abenle'zani xi'nlu.

43 ¿Chu narä te siädhuii xnan Xtioozä narä?

44 Biejntis diagä xtiidxlu, bibalzgjajc xi'nä, biniibni xque'ä.

45 Sibaa lajzlu, luj ni huililajz sisiojbpac nani gunii Xtadnu Dios.

46 Dxejc räjp Marii:

Xaimä rliä'p xpala'n Xtadnu Dios.

47 Rbalazduxhza lastoä xcuent Dios ni ruslaa narä lo dojl.

48 Sa'csi agule Dios narä,  
nacä te mos gunaa ni xhet sajcdi,  
luxh najli sinii rebejn näjza reni churu chu lo guedxliuj,  
chicbaani loj guiraa regunaa.

49 Sa'csi Gueb Dios ni rajp guiraa yälrnibee abejn xhidajl cosro loä,  
dxanduxh najc lajni.

50 Dini cuäaz gulaslajzni guiraa rebejn ni riu xtiidxni, reni rajjni.

51 Xhidajl cosnagajn abejnni con lagajc naani,  
abatie'chni renani rustioob lastooreni rliä'p lagajc xpala'nreni.

52 Abasajbni reni rnibee,  
per rebenmadolajz bejnni gacreni benro.

53 Bachajni xque' reni calaan,  
badeedni ganax cossa'c,  
niluxh badzu'ni rebejn ni yu' xhixtenreni xhet badeed dini lojreni.

54 Gucnäjni nación xten xpejn Israel, ni najc xmos Dios.

Di lajzni niäl nulaslajznireni

55 sa'csi si'c bia'nni diidx con retoxtadgoldoonu,  
sinuu gulazlajzni toAbram näjza rexagdooni par tejpas.

56 Dxejc bia'n Marii rolizj Elisabe't si'cti choñ bäii, dxejc gubisacni rolizjni.

### *Che gojl Juan ni rutiobnis*

57 Che baza' xpäi Elisabe't, dxejc gojl xpäzni te báz niguiini.

58 Dxejc bidzujñ rexpisinni näjza resa'ni biädhuiireni guiro'preni che  
gucbeereni lacti hueen gujc Dios con laani. Bibalaznäjreni.

59 Che gudejd xhujñ dxej, huinäreni baze'ga chuni bee. Rlajz rebejn nirilaj  
baze'ga si'c laa xtadni, Zacarí.

60 Niluxh xnanni räjp:

—Na'c, guirilajpacni Juan.

61 —¿Xhicult? —räjpreni—. Ruti xfamillu ni laa si'c.

62 Dxejcti gunabdiidxreni con seen lo xtad baze'ga te gacbeereni xho rlajzni  
guirilaj baze'ga.

63 Xtadni gunab te la' guijtj, dxejc bacuaani: “Lajni najc Juan.” Dxejc  
guiraa'neni bidxelajreni.

64 Luxh lagajc dxejc gujc gunii Zacarí stehuält, dxejc guslojni calä'pni  
xpala'n Dios.

65 Bidxeloduxh rexpisinni xhini'c gujc ro'c. Luxh bire'ch diidx xcuent  
recosre guideb nen redajñ xten Judea.

66 Guiraa reni biejn diajg rediidxga gusloj cayujñreni xhigab, dxejc gunab-  
diidxreni loj sa'reni:

—¿Chuchani'c gac biuxe'ga?

Si'c guniireni sa'csi huenliisi abenle' Diosni.

### *Dij ni bil Zacarí*

67 Dxejcti biädä Sprit Dxiän xten Dios nen lastoo xtadni Zacarí, gusloj  
caniini rediidx ni badeed Dios lojni, räjpni:

68 Guiliä'pnu xpala'n Dios, Xtios rexpejn Israel, sa'csi abiädhuiini loonu, ni najcnu rexpejñi, te siädguslaani nuurnu nen dojl.

69 Abaxhalni loonu te bejn ni rajp yälrusladuxh bejn nen dojl. Najcni te rexagdoo toxmosni David.

70 Lagajc si'cni badeed Dios gunii redade' ni bacuaa xtiidxni lo guijtz galoo:

71 Suslaani nuurnu loj reni rdxe'ch loonu, näjza ladznaa rebejn ni gulälaz nurnu.

72 Te gulaslajzni retoxtadgoldoonu, te soob diidx ni bia'nni con rebejnnga.

73 Scree bia'nni diidx con toxtadgoldoonu, Abram:

74 Suslaani nuurnu ladznaa rebejn ni rdxe'ch loonu, te na'c guidxeebnu chunu lojni gusoobnu xtiidxni,

75 con yäl'nabansa'c näjza yälguxhtis guiraa redxej ni guibajñnu.

76 Luxh luj, bäze', sirilajlu dade' nani rnii xtidx Gueb Dios ni yu' xhaguibaa, sa'csi sinijdlu lo Dad te gusucheelu rexnezyulajzni,

77 te gunlu gacbee rexpejñi xho gac laani lo dojl, te gac guibicaj xtojlneni.

78 Sa'csi Dios sanälajz bejn,

näjza rulaslajzni bejn ni'cni xhaguibaali suxhalni xi'nni te jiädnäni te dxe-coob,

79 te gusanijni lo rebejn ni nabajn lo yälxcäjy xten dojl,

näjza rebejn ni nabajn lo xpalaa yälgujt, te guluiini xho sänu lo xnez yälrbecdxilajz.

80 Dxejc gunis biuxe'ga, guyuduxh xcäriejñi xcuent recos xten Dios. Gubajñni nez loj reyubijdz cheni bidzujñli dxej che baluilojni loj rexpejn Israel, che gusloj cagusule'ni xtidx Dios.

## 2

### *Che gojl Jesús (Mt. 1:18-25)*

1 Nen redxejga, gunibee Augusto César xcaj laj rebejn guideb guedxliuj lo xquijtzni.

2 Ni'c nacobgujc yälbigabre cheni najc Cirenio gobernador xten Siria.

3 Guiraa rebejn nanab chääreni lagajc lajdxreni te ro'c guigabreni.

4 Ni'cni birii José guedx Nazare't Galilee, te huijni Judea, lo guedx Belén, cadro gojl toDavid, sa'csi najc José xagdoo toDavid.

5 Huinäni Marii, nani guchnaani, huijreni guedx Belén te ro'c guigabreni. Luxh nuu Marii báz.

6 Lalsi yu'reni guedx Belén, bidzujñ dxej ni gaal xi'n Marii.

7 Ro'c gojl xi'n galooni, dxejc batejbnini te xzuudni. Dxejc gudixhnini cadro rusälreni guijxh rajw reguidxaa sa'csi xhetiru yu' xcalaareni jia'nreni.

### *Rexangl Dios näjza rebaxtoor*

8 Gajxh guejdxga guyu' gaii baxtoor cayajpreni xhiilreni lo niaa guxhijñ.

9 Chela baluiloj te xangl Dios, luxh bianij guideb gabireni con yälrdimbicha' xten Dios, dxejc bidxebduxhreni.

10 Sas anglga räjp lojreni:

—Na'c guidxejbtu, narä siädnäa lojtu te didxsa'c ni suspalajz guiraa beñ guedxliuj.

11 Nadxej gojl neṅ guejdx xten toDavid, tej ni gus<sub>laa</sub> bejn neṅ dojl, laani najc Crist ni najc Dad.

12 Dee najc te seen lojtu, sidxältu bāze'ga nadejbni neṅ te xzuudni, naga'ni cadro rusäl'reni guijxh rajw reguidxaa.

13 Lagajc dxejc guideb gabi anglga baluiloj naclejn xangl Dios, gulä'preni xpala'n Dios, räjpreni:

14 Collä'p xpala'n Dios ni yu' xhaguibaali.

Suchu yäl'rbedxilajz lo reben guedxliuj ni balazlajzni.

15 Che gubi' rexangl Dios xhaguibaa, gusloj rebaxtoor canii loj sa'reni:

—Colcho' guedx Belén colchohuii ni guzajc ro'c ni gunii Xtadnu Dios loonu.

16 Rusquenduxhrene sääreni, dxejc bidxäl'reni Marii näjza José näjza bāze' ni naga'neṅ cadro rusäl'reni guijxh rajw reguidxaa.

17 Cheni bahuiireni loj rebejn<sub>ga</sub>, bijreni diidx xhi räjp rexangl Dios lojreni xcuent bāze'ga.

18 Niluxh guiraa reni biejn diajg rediidxre bidxeloduxhrene xtidx rebaxtoorga.

19 Niluxh Marii gulucheeni guiraa rediidx ni biejn diajgni neṅ lastooni, rujntisni xhigab xcuent rediidxga.

20 Dxejcti rebaxtoorga gubisacreni cayol'reni, calä'pzareni xpala'n Dios xcuent guiraa rediidx ni biejn diajgreni näjza ni bahuiireni sa'csi guiraani gujc si'cni räjpreni lojreni.

### *Cheni huinäreni Jesús chuni bee*

21 Che gudejd xhujn dxej, huinäreni bāze'ga chuni bee, dxejc gulälajrenini Jesús, lagajc laj ni räjp xangl Dios loj Marii guirilajni galooli guuni bāzga.

22 Che basa' redxej ni gac naya te nan si'cni gunibee toMoisés loj xquijtzni, huinäreni bāze'ga guedx Jerusalén, neṅ guidoro gunabreni gacnäj Diosni par tejpas.

23 Bejnreni scree sa'csi caj lo guijtz xten Dios: “Guiraa rexingangaloo xten bejn guilia'tu lo sa'reni te gunreni xtzunä”, räjp Dios.

24 Bidzujnreni ro'c ca'reni te gojn si'cni rnibee rexquijtz Dios: “Tio'p gugue' o tio'p palombäz.”

25 Neṅ redxejga, neṅ guedx Jerusalén rbājz te dade' ni laa Simeón. Najcni te beṅsacduxh, raṅduxhni Dios, cabājzni jiäd te bejn ni gus<sub>laa</sub> rexpejn Israel. Rbājz Sprit Dxaṅ xten Dios neṅ lastoo Simeón.

26 Sprit Dxaṅ abejn gacheeni dini guet ansde fiini loj Crist ni guxhaḷ Dios.

27 Dxejcti räjp Sprit Dxaṅ xten Dios lojni chääni guidoro. Lalni yu'ni nen guidoo, bidzujn José con Marii, biädnäreni bāz Jesús, te gunnājreni Jesús nani rnibee xtidx Dios gunreni.

28 Dxejc gudääz Simeón bāze'ga, gusloj calä'pni xpala'n Dios, räjpni:

29 Dad, asajc gusaanlu guetä con yäl'rbedxilajz, sa'csi abasooblu nani bia'n diidx gunnäjlu xmoslu.

30 Sa'csi abahuiloä nani siädgus<sub>laa</sub> nuurnu neṅ dojl,

31 ni abasujlu nez loj guiraa reben guedxliuj.

32 Laani najc bianij ni susanij loj rebejn ni di gac xpejn Israel, näjza nani gac xpala'n rexpejnlu guedx Israel, lajdxlu.

33 Bidxeloy José näjza xnan Jesús rediidx ni canii Simeón xcuent bāze'ga.

34 Dxejc benle' Simeón yejceni, dxejc räjpni lo Marii xnan Jesús:

—Bahuii gan; bāze're biäd te loj rexpejn Israel chu reni sibälaz xtiidxni, te chuza reni sililajz xtiidxni. Laani gacni te seen nani sibälaz bejn,

<sup>35</sup> te si'c jienloj xhi xhigab rujn cade tej rexpejn Israel neŋ lastooreni. Dxejcti par luj sajnci asdoo chääz te spaad lastoolu, sa'csi gac-huinduxh lastoolu.

<sup>36</sup> Suga'za te nane' ni laa Ana ro'c, rniini xtidx Dios xcuent recos ni churu gac. Najnci xindxa'p Fanuel, ni najc famil' xten Aser. Anajnci bengolduxh. Bachnaani che najnci dxaphuin, luxh gajdztis ijz guläznäjni chäälni che bia'nni biuud.

<sup>37</sup> Najnci te gunabiuud ni yu' tajbitajp ijz. Diruni guirii guidoro, ro'ctis yu'ni dxej, yääl te yu'tisni lo Dios con yälrucua'n näjza yälrbedx-rniab lo Dios.

<sup>38</sup> Che gubigni lojreni lagajc dxejc, badeedni xquixtios lo Dios sa'csi abidzujn tej ni guslaa rebejn lo dojl. Dxejc gusloj caniini diidx xcuent báz Jesús loj guiraa renani cabäjz yälruslaa xten Jerusalén.

### *Che gubi'reni guedx Nazare't*

<sup>39</sup> Che gulujx bejn xcuzajnni guiraa recos ni caj lo xquijtz Dios gunreni, gubisacreni Galilee, lo guedx Nazare't, lajdxreni.

<sup>40</sup> Gunis biuxe'ga, guc nadaanni, guc nasinruzani sa'csi cayacnäj Diosni.

### *Che biu' Jesús guidoro*

<sup>41</sup> Casob ijz rij rexcuzejn Jesús guedx Jerusalén te rinäreni te gojn xten lanij pascw.

<sup>42</sup> Che basa' Jesús tzubitio'p ijz, huij guiraareni guedx Jerusalén si'c najc costumbr gac lanijga.

<sup>43</sup> Che gulujx lanijga, gubisacreni. Bia'n Jesús guedx Jerusalén, luxh nicla xnanni niclaza José direni niacbee bia'nni.

<sup>44</sup> Bejnreni xhigab pet siädsanäjni rebeŋsa'ni. Si'c guzajreni tebdxej, dxejc gudiilrenini loj resa'reni, näjza loj reni rumbeereni,

<sup>45</sup> direni nidxälni. Dxejc gubisacreni guedx Jerusalén te huitiilrenini ro'c.

<sup>46</sup> Choŋ dxej gudiilrenini dxejc bidxälrenini neŋ guidoro, sobga'ni nez galäii rebejn ni najn leii, cacuadiajni xtiidxreni, cayujnzani yälgunabdiidx lojreni.

<sup>47</sup> Luxh guiraareni cacuadiajg xtiidxni, cadxeloduxhreni yälnajn xtenni, näjza rediidx ni cagudzu'ni lojreni.

<sup>48</sup> Che bahuii rexcuzejn lojni, bidxelojreni. Dxejc räjp xnanni lojni:

—Xi'nä, ¿xhicuent bennäjlu nuurnu scree? Narä näjza xtdalu cayunduxhnu xhigab caguiilnu luj nezree, nezre'c.

<sup>49</sup> Dxejcti räjp Jesús lojreni:

—¿Xhicuent caguiiltu narä? ¿La ditu gan riäjł gunä xtzun Xtaďä, ä?

<sup>50</sup> Luxh laareni direni niacbee rediidx ni guniini lojreni.

<sup>51</sup> Dxejcti gubinäjnireni guedx Nazare't, sanuuni rusoobni xtiidxreni. Luxh Marii gulucheetisni guiraa recosre neŋ lastooni.

<sup>52</sup> Duurtis gunis Jesús, caroobruza xcälnajnni. Sanälajz Diosni, sanälajza guiraa rebejnni.

## 3

### *Yälrusule' Juan ni rutiobnis*

(Mt. 3:1-12; Mr. 1:1-8; Jn. 1:19-28)

<sup>1</sup> Neŋ redxej cheni agujc tzuun ijz najc Tiberio César reii, Poncio Pila't najc gobernadoor xten Judea; Herodes najc gobernadoor xten Galilee; Felipe, bejtz Herodes najc gobernadoor xten Iturea näjza Traconite; Lisantias najc gobernadoor xten Abilinia.

<sup>2</sup> Lagajc neŋ redxejga Anás nájza Caifás najc rebixhojzro xten guidoro guedx Jerusalén. Neŋ redxejga biääd xtidx Dios lo Juan, xi'n Zacaríi cheni rbájzni nez lo reyubijdz.

<sup>3</sup> Ni'c cuanzaj Juan guideb nez reyuj xten gueu Jordán, ro'c basule'ni xcuent yälrusiechljajz, yälrobnis ni nanab gunreni te gudzucaj Dios xtojreni.

<sup>4</sup> Si'cni caj lo xquijtz Isaías, dade' ni gunii xtidx Dios, cadre räjpni:

Riejn xse' te ni rbedxa' nez loj reyubijdz:  
 “Colyunsac'c xnezyuj Dad, colslíi rexnezyulajzni.”

<sup>5</sup> Guiraa cadre sojb gueed sidxe'ni, guiraa relom sibicajreni, guiraa renezyuj ni xhet naliidi, siliireni, guiraa renezyudxuudx, sacsa'ceni.

<sup>6</sup> Dxejcti guiralii bejn suhúii loj nani guxhaj Dios.

<sup>7</sup> Che bahúii Juan siääd xhidalduxh bejn te guirobnisreni, räjpni lojreni:

—¡La'tu benguijdx ni najc si'c bälñialajz! ¿Chuni'c balijdxtu guxuñtu loj xcälrdxe'ch Dios ni siädgajxh, ä?

<sup>8</sup> Colguchaa xmoodtu te si'c fii bejn guliini abasiechljajztu. Na'c cuentis rniitu lagajc neŋ lastootu “Abram najc xtadnu”, sa'csi narä rniä lojtu, sajcxca' Dios reguijre te con laareni guncheeni bejn gac rexagdoo toAbram.

<sup>9</sup> Aguibyajg naga' cuä' xlobaa reyajg; ni'cni guiraa reyajg nani di ninexhsa'c xcax lojni, sidinreni te checeni.

<sup>10</sup> Dxejcti gunabdiidx rebejn lojni, räjpreni:

—¿Xhini'c nanab jiennu?

<sup>11</sup> Dxejc badzu' Juan diidxre räjpni:

—Ni rajp tio'p xhajbni, sugudeedni tejni lo bejn ni xhet rajpdi. Sigajcza gun reni rajp xhi gaureni, quisrenini loj ni xheti xhi gauni.

<sup>12</sup> Nájza gaii bejn nani rusquijx xcuent reimpuet bidzujñ lojni te guirobnisreni, dxejc gunabdiidxreni lo Juan räjpreni:

—Dad, mastr, ¿xhini'c nanab jiennu?

<sup>13</sup> Räjp Juan lojreni:

—Na'c gusquijxtu bejn maazdi ni nungäjñ quiixreni.

<sup>14</sup> Nájza gaii resoldaad gunabdiidx lojni räjpreni:

—¿Nurnu a'? ¿Xhini'c nanab jiennu?

Dxejc räjpni lojreni:

—Na'c guchejbtu bejn; na'c gäbtu chale'ctu xcälquij bejn ni xhet bejndi parsi guniidxreni meel lojtu; colbalaznäj nani rujntu gaan.

<sup>15</sup> Cadxeloj rebejn, cayujnreni xhigabduxh, naareni, “pet Juan najc Crist ni jiääd.”

<sup>16</sup> Dxejc badzu' Juan diidxre, räjpni loj guiraa rebejn:

—Guliipac rutiobnisä la'tu con nis, luxh siääd tej ni sajcro loä, nani nicla gac surloä, cuää xcura'chni. Laani sutiobnisni con Sprit Dxan xten Dios te cuääzni neŋ lastootu nájza con guiboo, sa'csi rajpruni yälrnibee loä.

<sup>17</sup> Aca'ni pal te gusiani triuu te cuääni triusa'c lo guijxh te cucheeni triuu neŋ ngodx xtenni, dxejcti reguixhtriuuga suze'cnini lo bajl ni rejcx par tejpas.

<sup>18</sup> Rediidxre nájza xhidajñ yälñulijdx gunii Juan te basule'ni redidxcoob loj rebejn.

<sup>19</sup> Nájza lo Herodes ni najc gobernadoor basule' Juan diidx, gudilñajnini sa'csi xhet laadi cayujnni, sa'csi rbäznäjni Herodías, chääñ bejtzni Felipe, nájza xcuent sgaii dojl ni bejnini.



<sup>20</sup> Di Herodes niu xtidx Juan, alga bejnni stee dojl, basälni Juan nen latzguuib.

*Che gurobnis Jesús*

(Mt. 3:13-17; Mr. 1:9-11)

<sup>21</sup> Che batiobnis Juan rebejn, näjza Jesús birobnis. Cheni cabedx-canabni lo Dios, bixal xhaguibaa,

<sup>22</sup> dxejc biäjt Sprit Dxan xten Dios si'c te palom, bidzujjni cadro suga' Jesús. Dxejc xhaguibaali biejn xse' te ni räjp:

—Luj, najclu xi'nä ni sanälazä. Rbanälazduxhä luj.

*Resa' Jesús*

(Mt. 1:1-17)

<sup>23</sup> Yu' Jesús galbitzuu ijz che gusloj cayujjni dzuun ni badeed Dios gunni. Rchalo rebejn najcni xi'n José, xi'n Elí.

<sup>24</sup> Elí gujc xi'n Matat. Matat gujc xi'n Leví. Leví gujc xi'n Melqui. Melqui gujc xi'n Jana. Jana gujc xi'n José.

<sup>25</sup> José gujc xi'n Matatías. Matatías gujc xi'n Amós. Amós gujc xi'n Nahum. Nahum gujc xi'n Esli. Esli gujc xi'n Nagai.

<sup>26</sup> Nagai gujc xi'n Maat. Maat gujc xi'n Matatías. Matatías gujc xi'n Semei. Semei gujc xi'n José. José gujc xi'n Judá.

<sup>27</sup> Judá gujc xi'n Joana. Joana gujc xi'n Resa. Resa gujc xi'n Zorobabel. Zorobabel gujc xi'n Salatiel. Salatiel gujc xi'n Neri.

<sup>28</sup> Neri gujc xi'n Melqui. Melqui gujc xi'n Adi. Adi gujc xi'n Cosam. Cosam gujc xi'n Elmodam. Elmodam gujc xi'n Er.

<sup>29</sup> Er gujc xi'n Josué. Josué gujc xi'n Eliezer. Eliezer gujc xi'n Jorim. Jorim gujc xi'n Matat.

<sup>30</sup> Matat gujc xi'n Leví. Leví gujc xi'n Simeón. Simeón gujc xi'n Judá. Judá gujc xi'n José. José gujc xi'n Jonán. Jonán gujc xi'n Eliaquim.

<sup>31</sup> Eliaquim gujc xi'n Melea. Melea gujc xi'n Mainán. Mainán gujc xi'n Matata. Matata gujc xi'n Natán.

<sup>32</sup> Natán gujc xi'n David. David gujc xi'n Isaí. Isaí gujc xi'n Obed. Obed gujc xi'n Booz. Booz gujc xi'n Salmón. Salmón gujc xi'n Naasón.

<sup>33</sup> Naasón gujc xi'n Aminadab. Aminadab gujc xi'n Aram. Aram gujc xi'n Esrom. Esrom gujc xi'n Fares. Fares gujc xi'n Judá.

<sup>34</sup> Judá gujc xi'n Jacob. Jacob gujc xi'n Isaac. Isaac gujc xi'n Abraham. Abraham gujc xi'n Taré. Taré gujc xi'n Nacor.

<sup>35</sup> Nacor gujc xi'n Serug. Serug gujc xi'n Ragau. Ragau gujc xi'n Peleg. Peleg gujc xi'n Heber. Heber gujc xi'n Sala.

<sup>36</sup> Sala gujc xi'n Cainán. Cainán gujc xi'n Arfaxad. Arfaxad gujc xi'n Sem. Sem gujc xi'n Noé. Noé gujc xi'n Lamec.

<sup>37</sup> Lamec gujc xi'n Matusalén. Matusalén gujc xi'n Enoc. Enoc gujc xi'n Jared. Jared gujc xi'n Mahalaleel. Mahalaleel gujc xi'n Cainán.

<sup>38</sup> Cainán gujc xi'n Enós. Enós gujc xi'n Set. Set gujc xi'n Adán. Adán gujc xi'n Dios.

## 4

*Che biricaj bendxab loj Jesús*

(Mt. 4:1-11; Mr. 1:12-13)

<sup>1</sup> Jesús, sa'csi rbäjz Sprit Dxan xten Dios lastooni, biunejzni gueu Jordán, dxejc huinä Sprit Dxan xten Diosni lo reyubijdz.

<sup>2</sup> Ro'c bia'nni tiuu gubijdx, tiuu guxhijñ. Ro'c bidzujñ beñdxab ni rnibee te rlanjni gunni gusoob Jesús xtiidxni. Luxh calaan Jesús, sa'csi gajdni gau guiraa neñ redxeja.

<sup>3</sup> Dxejc räjp beñdxab lojni:

—Palga guliilu Xi'n Dioslu, gunibee gac reguijre yätxtiil.

<sup>4</sup> Badzu' Jesús diidx lojni räjpni:

—Acaj loj reguijtz xcuent Dios: “Xhet ganaxdi yätxtiil gun sajc guibajñ bejn, näjza guiraa diidx nani rnii Dios sujn guibajñ bejn.”

<sup>5</sup> Dxejcti huinã beñdxab Jesús jiaa yejc te dajn. Teratbãztis baluilojni guiraa reguedxro ni tre' lo guedxliuj.

<sup>6</sup> Dxejc räjp beñdxab lojni:

—Narã sunidxã guiraa yãrnibee näjza reyãlnasa'c ni yu' loj reguejdxga sa'csi xtenã guiraareni, luxh sajc gudedãni lo chutis ni rlazã.

<sup>7</sup> Palga luj suzuxhijblu loã, guiliã'plu xpala'nã, guiraani sajc xtenlu.

<sup>8</sup> Dxejc Jesús badzu' diidx, räjpni lojni:

—Acaj loj xquijtz Dios: “Dad Xtiostislu ganlu, luxh lojtisni chulu gunlu dzuun.”

<sup>9</sup> Dxejcti huinã beñdxabni lo guedx Jerusalén, huinãnini jiaa yejc xques guidoro. Dxejc räjp beñdxab lojni:

—Palga guliilu najclu Xi'n Dios, gutiãjs lo yuj

<sup>10</sup> sa'csi si'c caj loj rexquijtz Dios:

Suxhañ Dios rexanglni te ga'preni luj,

<sup>11</sup> guiniaazreni luj didi jiajblu lo guij.

<sup>12</sup> Badzu' Jesús diidx lojni, räjpni:

—Cajza lo rexquijtz Dios: “Na'c fallu Dad ni najc Xtioozlu.”

<sup>13</sup> Che baluux beñdxab rextiidxni, gubicajni lo Jesús sa'csi dini niujñ gaan nusoob Jesús xtiidxni. Gulãjni guidzujñ stee dxej te gusacsãruni Jesús.

### *Gasloj Jesús cayujñ xtzuunni*

*(Mt. 4:12-17; Mr. 1:14-15)*

<sup>14</sup> Dxejc gubi' Jesús lo rexyuj Galilee räjpni yãrnibee xten Sprit Dyan. Bire'ch diidx xcuentni guiraa neñ reguejdx ni tre' nejzga.

<sup>15</sup> Ruluiini neñ reguidobãz luxh guiraa rebejn rliã'p xpala'nni.

### *Jesús guyu' guedx Nazare't*

*(Mt. 13:53-58; Mr. 6:1-6)*

<sup>16</sup> Dxejcti huij Jesús guedx Nazare't cadro gulaani. Che gojl dxej ni rusilajz rexpejn Israel, biu'ni neñ guidobãz sigajc ni rujnpacni, dxejc huisuliini te bilni

<sup>17</sup> reguijtz xten Dios. Badeedreni lojni guijtz ni bacuaa Isaías; cheni baxhalni guijtzga, bidxãlni cadro rnii scree:

<sup>18</sup> Sprit Dyan xten Dios suganãj narã, sa'csi agule Dios narã te gusule'ã xtidxcoobni lo rebenprob.

Baxhalni narã te gusiacã lastoo renani di lastooreni cuedxi,

te gusule'ã yãruslaa lo rebejn ni yu' lo dojl,

te gusiacã baloj reben lotiã'p, te guslaã reben ni cadejd trabajw,

<sup>19</sup> te gusule'ã abiu' ijzsa'c che rulaslajz Dios rebejn.

<sup>20</sup> Dxejc basãu Jesús reguijtzga, badeednini loj bejn ni cayacnãj neñ guidooga, dxejc gurejni. Sa'csi guiraa rebejn ni sobga' neñ guidooga cahuidzu'tzreni lojni,

<sup>21</sup> gusloj guniini, räjpni lojreni:

—Lagajc nadxej guzobj rediidx ni caj lo reguijtzre nez loj guiraatu.

22 Guiraareni sarú guniireni xcuent Jesús, bedxeloduxhzareni redidxsaruduxh ni guniini lojreni. Gunabdiidxreni loj sa'reni, räjpreni:

—¿La et xi'ndi José dade're, ä?

23 Dxejc räjp Jesús lojreni:

—Siniipactu rediidxre loä: “Doctoor, basiajc lagajc luj”; siniizatu loä: “Recos ni biejn diajnu bejnlu nez guedx Capernaum, lagajc recosga bejn nez ree cadro najc lajdxlu.”

24 Dxejc huinuu xtiidxni, räjpni lojreni:

—Rniliäpac lojtu, nicla tej redade' ni rnii xtidx Dios, di reben lajdxreni jiu xtiidxni.

25 Luxh rniliä lojtu, che gubajn Elías lo guedxliuj, guyu' xhidajl gunabiuid guedx Israel che di nisguij niajb choñ ijz garol, dxejc guyu' yärliaiduxh guideb guejdxga.

26 Luxh di Dios nuxhal Elías rolijz nicla tej regunabiuid ni guläjz guedx Israel, alga baxhalnini lo benzijit, rolijz te gunabiuid ni rbäjz Sarepta, gajxh guedx Sidón.

27 Sigajcza che gubajn Eliseo lo guedxliuj, guyu' xhidajl ben racxhuu ni ral tiejxhreni guedx Israel, luxh dini nusiajc nicla tejreni, alga basiajcní dade' ni laa Naamán, ni siääd te guedxzijit ni laa Siria.

28 Che biejn diajg reni sobga' neñ guidoo rextidx Jesús, bidxechduxhreni,

29 huisuliireni, guläärenini neñ guejdxga. Dxejc huinärenini yejc dajn cadro tre' guejdxga cadro yu' te balaro, te ro'c rlajzreni nustejbrenini.

30 Dxejc Jesús sigaj gudejdni galäiireni, sä'tini ste'ca lajt.

### *Gulää Jesús bendxab lastoo te dade'*

*(Mr. 1:21-28)*

31 Dxejc huij Jesús guedx Capernaum, te guejdx xten Galilee. Ro'c gusloj cagusule'ni diidx loj rebejn che gojl dxej ni rusilajz rexepejn Israel.

32 Bidxeloduxhreni xtiidxni sa'csi rusule'ni si'c te beñnajn, si'c te ni rnibee.

33 Neñ guidooga suga' te dade' ni rbäjz te bendxab neñ lastooni. Guredxa'ni

34 räjpni:

—¡Aii! ¡Basaan nurnu! ¿Xhicuent riädchu'lu loonu Jesús ni siääd Nasare't? ¿La siäädlu te gunitlojlu nuurnu, ä? Narä numbeälu, nanä najclu Xin Dxañ Dios.

35 Gudidxa' Jesús lo bendxabga, räjpni lojni:

—Basäu ro'lu, birii lastoo niguiire.

Dxejcti bendxabre basäl niguiiga lo yuj nez loj guiraareni, dxejc biriini neñ lastoo dade'ga, per xhet bejndini dade'ga.

36 Bidxeloduxh rebejnga, dxejc gusloj caniireni lo sa'reni, räjpreni:

—¿Xhi diidx najc redee? Bahuii xho rnibee dade're rebendxab con yälrnibee, luxh rusoob rebendxab xtiidxni, riireni lastoo bejn.

37 Dxejc gusäb xtidx Jesús lo guiraa reguejdx ni tre' guideb gabi guejdxga.

### *Rusiajc Jesús xnan xueerg Pedr*

*(Mt. 8:14-15; Mr. 1:29-31)*

38 Birii Jesús guidobáz, huijni rolijz Simón. Dxejc naga' xnan sueerg Simón, cayacxhuuni, yu'ni xliaduxh. Sas gunabduxhreni lojni te gusiajcnini.

39 Gubig Jesús loj nane'ga, gudidxa'ni xliaaga, luxh lagajc orga biriini xliaa. Dxejc huistiegajcni, gusloj cayujnni mandaad, cahuiinireni.

### *Rusiajc Jesús xhidajl yälracxhuu*

*(Mt. 8:16-17; Mr. 1:32-34)*

<sup>40</sup> La<sub>1</sub> ni cayääz gubijdx, guiraa reni rajp be<sub>n</sub>racxhuu ni rajc garen garen yäl<sub>1</sub>racxhuu biäd<sub>1</sub>näreni rebejn<sub>1</sub>ga lo Jesús. Dxejc laani batzuubni naani yejc tejgareni, dxejc b<sub>1</sub>ajc rebe<sub>n</sub>racxhuuga.

<sup>41</sup> Loj rebe<sub>n</sub>racxhuuga, yu'reni birii rebe<sub>n</sub>dxab ne<sub>n</sub> lastooreni, rbedxa'reni räjpreni:

—Luj najclu Xi'n Dios.

Luxh Jesús gudi<sub>1</sub>lnäjni rebe<sub>n</sub>dxab, dini nusaa niniireni sa'csi laareni najn-  
reni najcni Crist ni cabäjzreni.

*Rusule' Jesús xtidx Dios*

(Mr: 1:35-39)

<sup>42</sup> Che bianij, biriini lo guejdx, huijni te lajt cadro rut rbäjzdi. Niluxh gudi<sub>1</sub>l rebejn<sub>1</sub>ni, dxejc bidzuj<sub>1</sub>nreni cadro suga'ni. Rlajzreni nuscuääzrenini te di nuuini.

<sup>43</sup> Dxejc Jesús räjp lojreni:

—Nanab cha'a chasule'ä rextidx xcuent xcäl<sub>1</sub>rnibee Dios xhidajlruza guejdx, ni'cni baxhal<sub>1</sub>pac Dios narä.

<sup>44</sup> Dxejc si'ctis cuanzaj Jesús basule'ni xtidx Dios ne<sub>n</sub> guiraa reguidobäz ne<sub>n</sub> reguejdx xten Galilee.

## 5

*Che gunaazreni xhidajl bäj*

(Mt. 4:18-22; Mr: 1:16-20)

<sup>1</sup> Cheni suga' Jesús ro' nis ni laa Genesare't, gubig xhidajl bejn lojni te jiejn diajg<sub>1</sub>reni xtidx Dios.

<sup>2</sup> Dxejc bahuii Jesús tio'p barcw ni suga' ro' nisga, rud yu'di ne<sub>n</sub>reni sa'csi rebejn ni rniaaz bäj abiriireni ne<sub>n</sub> rebarcw te caguuibreni xquijxh<sub>1</sub>reni ro' nisga.

<sup>3</sup> Dxejc biu' Jesús ne<sub>n</sub> te barcw ni najc xten Simón, dxejc gunab Jesús chää barcwga lo nis te la', te guibicajni ro' yuj. Dxejc gurej Jesús ne<sub>n</sub> barcwga, ro'cli guslojni caguluuini rebejn.

<sup>4</sup> Che gulujx xtiidxni, räjpni loj Simón:

—Huinä barcw cadro jäät<sub>1</sub>ru, col<sub>1</sub>cuaa xquijxhtu lo nis te guiniaaztu bäj.

<sup>5</sup> Räjp Simón lojni:

—Mastr, guideb yääl biennu dzuun, luxh dinu niniaaz nicla tej bäj, niluxh naj agunibeelu gusäl<sub>1</sub>sacnu guijxh lo nis.

<sup>6</sup> Cheni basäl<sub>1</sub>reni xquijxh<sub>1</sub>reni lo nis, gunaazreni xhidalduxh bäj, dxejc guslojli caräjs xquijxh<sub>1</sub>reni.

<sup>7</sup> Dxejc bejnreni seen loj resa'reni ni yu' ne<sub>n</sub> stee barcwga te jääd<sub>1</sub>yacnäjäreni. Bidzuj<sub>1</sub>ntireni, bachajreni guiro'p barcw. Gudxaduxh rebarcw, ameer niääzreni ne<sub>n</sub> nis.

<sup>8</sup> Che bahuii Simón Pedr recosre, bazuxhijbni nez loj Jesús, dxejc räjpni:

—Gubicaj loä Dad, sa'csi narä nacä te be<sub>n</sub>dojl.

<sup>9</sup> Si'c gunii Simón sa'csi bidxejb laani näjza guiraa rebejn ni yunäjni sa'csi gunaazreni xhidalduxh bäj.

<sup>10</sup> Näjza Jacoob näjza Juan, rexi'n Zebedeo, ni runnäj Simón dzuun, näjzaren i bidxejbreni. Per Jesús räjp lo Simón:

—Na'c guidxejblu, najli guisloj cueedxlu bejn lacuaa ni guiniaazlu bäj.

<sup>11</sup> Dxejc, che bidzun<sub>1</sub>näjreni rebarcw ro' nis, basa'nreni guiraa xhixtenreni, te sanajlreni Jesús.

*Basiajc Jesús te bejn ni raĵ tiejxhni**(Mt. 8:1-4; Mr. 1:40-45)*

12 Cheni guyu' Jesús tej reguejdx, bidzujn te bejn lojni ni rajc lepra te yälguidxduxh ni raĵ tiejxhni. Che bahuiini loj Jesús, bazuxhijbni, basajbni lojni lo yuj, räjpni lojni:

—Dad, palga rĵazlu, sajc gusiajclu narä.

13 Dxejc batzuub Jesús naani yejčni räjpni lojni:

—Rlazä jiajclu. Susiacälu.

Che guniini rediidxre, biacgajc beñ racxhuuga.

14 Dxejcti gunibee Jesús lojni rut lojdi gäbni xhi guzajcni. Räjpni lojni:

—Huijtis lo bixhojz te fini lojlu, huisa'nza gojn xcuent ni biajclu si'cni rnibee xleii Moisés, te filoj rebejn abiajclu.

15 Luxh xpala'n Jesús sanuutis cayä'pruni, guixe-guixee care'ch diidx xcuentni. Rdojppza xhidalduxh bejn te gucuadiajgreni xtidx Jesús näjza te gusiajčni yälracxhuu xtenreni.

16 Yu'za huält riunejz Jesús rijni relajt cadro ruti rebejn, te ro'c rbedx-riabni lo Xtadni Dios.

*Basiajc Jesús te bejn ni digacdi guiniib**(Mt. 9:1-8; Mr. 2:1-12)*

17 Te dxej laĵni caguluini rebejn, nejzga sobga' gaii farisee näjza gaii bejn ni ruluii leii garen-garen reguejdx, siädreni guideb nez reguejdx xten Galilee, näjza región Judea, näjza guedx Jerusalén. Dxejc huenniisi rluijoj suganäj xcälrnibee Dios Jesús te rajc russiajčni rebenracxhuu.

18 Dxejc bidzujn gaii dade' nuureni lo te lonbäz te bejn ni di gacdi guiniib, rĵazreni gusu'renini nen yu' te quixhrenini nez loj Jesús.

19 Niluxh direni nidxäl canejz niu'reni sa'csi nadäduxh ro'c sa'csi tre' xhidajl rebejn. Dxejc huäpnäjrenini yejci yu'ga, badzucajreni gaii tej, dxejc basajbreni xloon benracxhuuga yejcli yu'ga te gujc bidzujni nez loj Jesús.

20 Che bahuii Jesús yälrlililajz xtenreni, räjpni loj benracxhuuga:

—Dade', agubicaj xtojllu.

21 Dxejc rebejn ni ruluii leii näjza refarisee gusloj cayujnreni xhigab, naareni: “¿Chucha niguiire ni caniyajni Dios con rextiidxni? Ruti te bejn ni sajc gudzucaj xtojĵ rebejn, Diostis rudzucaj dojĵ.”

22 Dxejc gucbee Jesús xhi xhigab cayujnreni, ni'c räjpni lojreni:

—¿Xhicuent rujntu xhigab si'c nen lastootu?

23 ¿Xhini'c najc guyasiru guiniini: “Agubicaj rextojllu”, o guiniini: “Huistie, guzaj”, ä?

24 Mbaj naj, suluiä nez lojtu Xi'n Dios ni gujc Xi'n Niguii rajp yälrnibee, yälnadip lo guedxliujre te gudzucajni xtojĵ rebejn.

Dxejc räjpni lo bejnğa ni digacdi guiniib:

—Lojlu rniä, ĵhuistie, guläs xloonlu, huij rolizlu!

25 Lagajc dxejc nez lojreni huistiegajc bejn ni digacdi guiniib, guläsni xloonni cadro naga'ni, dxejc siini rolizni, calä'pni xpala'n Dios.

26 Guiraareni rdxeloduxhreni recosga, dxejc guslojreni calä'preni xpala'n Dios, rdxejbliireni räjpreni:

—Abihuiinu cosro, cos ni guidxeloj bejn nadxej.

*Rbejdx Jesús Levi**(Mt. 9:9-13; Mr. 2:13-17)*

<sup>27</sup> Che gudejd gulujx recosre, birii Jesús ro'c. Dxejc bahuiini lo te bejn ni rusquijx xcuent impuest, nani laa Leví. Sobga'ni lo te mex cadro rusquijxni impuest; ro'c bahuii Jesús lojni. Räjþ Jesús lojni:

—Gudanajl narä.

<sup>28</sup> Dxejc huisu Leví, basa'nni guiraa recosga, dxejc sanajlni Jesús.

<sup>29</sup> Dxejc bejn Leví te lanij rolizjni par Jesús. Biääd xhidajl bejn ni rusquijx xcuent impuest näjza sgaai bejn; sobganäjnireni lo mex.

<sup>30</sup> Dxejcti refarisee näjza rebejn ni ruluui leii guslojreni cayeinäjreni rexpejnþac Jesús, räjþreni:

—¿Xhicuent raunäjtu, ränäjtu rebejn ni rusquijx impuest näjza rebendoj], ä?

<sup>31</sup> Dxejc badzu' Jesús diidxre, räjþni lojreni:

—Rebejn ni nadaan di guiquiin te doctoor, ganaxtis rebejn nani racxhuu rquiinreni te doctoor.

<sup>32</sup> Dina niädtedxä rebeñsa'c, narä biädtedxä rebendoj] te gusiechlazjreni.

*Gunabdiidxreni loj Jesús xcuent yärrucua'n  
(Mt. 9:14-17; Mr. 2:18-22)*

<sup>33</sup> Dxejc gunabdiidx rebejnþga loj Jesús, räjþreni:

—¿Xhicuent lacti rucua'n rexpejn Juan näjza rexpeñ refarisee, lacti rbedx-nriabreni loj Dios; niluxh rexpejnþaclu alga rajwreni, rä'reni?

<sup>34</sup> Badzu' Jesús diidxre lojreni, räjþni:

—¿La sajç gucua'n rebejn ni yu' lo te sa' lañni yunäjreni bi'n, ä?

<sup>35</sup> Niluxh sidzujþ dxej cheni sibicaj bi'n lojreni, dxejc sii sucua'nreni.

<sup>36</sup> Guniiza Jesús cuentre lojreni, räjþni:

—Rut rucuaadi te remiend ladcoob loj te ladyujxh, sa'csi che rxu'n ladcoob rutiäjzni ladyujxhga, dxejc xhiroobruni guiräjs, luxh diza ladcoob guchaag lo ladyujxh.

<sup>37</sup> Di gacdi gusälni bincoob neñ te guidbiejw sa'csi bincoobga sutiäsy'a'ni guidbiejwga dxejc sixe' binga, sixijþza guidbiejwga.

<sup>38</sup> Ni'cni nanab gusälni bincoob neñ guidcoob si'c sigucheeza guiro'preni.

<sup>39</sup> Luxh nicla tej bejn ni agu' bin ni yu' agujc xchej rlazj yä bincoob, sa'csi säjþni: “Bin ni yu' agujc xchej najc huenru.”

## 6

*Rutie' rexpejn Jesús triuu dxej nani rusilajzreni  
(Mt. 12:1-8; Mr. 2:23-28)*

<sup>1</sup> Te dxej ni rusilajz rexpejn Israel sasaj Jesús näjza rexpejnþacni nez loj reyuj cadro naga' triuu. Dxejc, sa'csi calaanreni gusloj caläädxreni doj lo triuu te cayajwrenini.

<sup>2</sup> Dxejc gunabdiidx gaa refarisee ni najc benguidoo, räjþreni lojreni:

—¿Xhicuent rujntu dzuun ni di nungäj] guntu che rajl dxej ni rusilajznu?

<sup>3</sup> Dxejc räjþ Jesús lojreni:

—¿La gajdtu go] loj reguijtz xhi bejn toDavid cheni calannäjni rebejn nani sanäni, ä?

<sup>4</sup> Biu'ni neñ xquidoo Dios, gudajwni yätxtiil nani di nungäj] gau bejn sa'csi xtebtis rebixhojz rajc rajwni, luxh badeedni yätxtiilga gudajw resa'ni.

<sup>5</sup> Räjþza Jesús lojreni:

—Sigajcza narä, Xi'n Dios ni gujç Niguii, rnibeä dxej ni rusilajztu.

*Niguii ni nabijdz naani  
(Mt. 12:9-14; Mr. 3:1-6)*

<sup>6</sup> Che gojl stee dxej ni rusilajz rexpejn Israel, biu'ni neñ te guidobäz, dxej guslojni caguluiini rebejn. Lagajc ro'c sobga' te dade' ni nabijdz naani ladbee.

<sup>7</sup> Dxej remastr xten leii näjza refarisee cagula'tzreni te don la susiajčni bejnga dxej ni rusilajzreni, sa'csi caguuilreni xho gucuaquijreni Jesús.

<sup>8</sup> Niluxh laani najjni xhi xhigab cayujnreni, dxej guniini lo dade' ni nabijdz naani, räjpni:

—¡Huisulii! ¡Gudaa nez galäiire!

Dxejc huisulii bejnga, gubigni lojni.

<sup>9</sup> Dxej räjp Jesús lojreni:

—Rlazä guiniabdidxä lojtu dee: ¿Xhini'c najc huen gunni che rajl dxej ni rusilajznu? ¿La te dzunsa'c o la te dzunguijdx? ¿La gacnäjnu bejn laa xcäl'nabajñni o la gudzucajnu yäl'nabajñni, ä?

<sup>10</sup> Che gulujx bahuii Jesús loj guiraa rebejn ni tre' guideb gabini, räjpni loj bejn ni nabijdz naani:

—¡Baslii naalu!

Dxejc bejnni si'c, luxh biacgajc naani.

<sup>11</sup> Dxejc bidxechduxh rebejn ni tre' ro'c, gusloj canabdiidxreni lo sa'reni xhi gunnäjreni Jesús.

### *Gule Jesús guitzubitio'p rexpejnpacni*

(Mt. 10:1-4; Mr. 3:13-19)

<sup>12</sup> Neñ redxejga, huij Jesús loj te dajn te huininäjni Xtadni Dios. Ro'c gudejdni yääl cabedx-canabni lo Dios.

<sup>13</sup> Che bianij lo yuj, gurejdxni rexpejñni. Ro'c guleni tzubitio'preni te gacreni xpejnpacni. Gulälajniireni reapost.

<sup>14</sup> Renani guleni najc Simón ni gulälajni Pedr; Andrés, bejtz Simón; Jacob; Juan; Felipe; Bartolomé;

<sup>15</sup> Mateo; Tomás; Jacob xi'n Alfeo; Simón ni nagab loj rexpeñ cananista;

<sup>16</sup> Judas, bejtz Jacob; näjza Judas Iscariote ni guto' Jesús loj rebixhojz.

### *Ruluii Jesús xhidajl bejn*

(Mt. 4:23-25)

<sup>17</sup> Che biätñäj Jesúsreni yejc dajnga, guzudxireni yejc te danbäz sa'csi suga' xhidajl bejn ro'c. Siäädreni guiraa nez reguedx Judea, näjza guedx Jerusalén näjza reguejdx ni tre' gajxh nisdoó Tiro con Sidón. Rebejnga bidzujñreni te gucua diajgreni xtidx Jesús, te gusiajczanireni xcäl'racxhuureni.

<sup>18</sup> Guiraa ni rdejda trabajw yu' beñdxab neñ lastooreni näjza reni'c biajc.

<sup>19</sup> Guiraa rebejn rlanj caan Jesús, sa'csi rusiajčni guiraareni con xcäl'rnibeeni.

### *Balijdx Jesús rebejn*

(Mt. 5:1-12)

<sup>20</sup> Dxejc bahuii Jesús loj rexpejnpacni räjpni lojreni:

—Chicbaatu, bejn nani xheti xhixtentu, sa'csi xtentu najc cadre rñibee Dios xhaguibaa.

<sup>21</sup> Chicbaatu, bejn nani calaan naj, sa'csi suniidx Dios lojtu nani rniabtu.

'Chicbaatu, bejn nani roon naj sa'csi susiäjñ Dios lajztu dxejcro suxhijztu.

<sup>22</sup> 'Chicbaatu, bejn nani rdexchlajz bejn lojtu, rbääreni la'tu te laad, rniya-jreni la'tu, luxh rbälazreni lajtu si'c te cos guijdx sa'csi rililajztu xtidx Xi'n Dios ni gujc Niguii.

<sup>23</sup> Colguibalajz nen redxejga, na'c gac-huin lastootu sa'csi sunidxduxh Dios xhi xtentu xhaguibaa. Sigajcza basacsí retoxtdagdooreni rebejn nani gunii xtidx Dios galoo.

<sup>24</sup> 'Probe'zatu, la'tu benrajp, sa'csi agojptu xcäl'nasa'ctu, xcäl'rbalajztu lo guedxliujre.

<sup>25</sup> 'Probe'tu nani rajp guiraloj xhixtentu naj, sa'csi sidejdtu yäl'rliaan.

'Proobzatu ni ruxhijztu naj, sa'csi sonduxhtu sidejdtu yäl'huinduxh, yäl'nalas.

<sup>26</sup> 'Probe'tu palga rliä'p rebejn xpala'ntu naj, sa'csi si'c bejn retoxtdagdooreni rebejn ni gunii didx-xhii lacuaa niniireni xtiidxpac Dios.

*Chanälajzni rebejn nani rdxe'ch lojni*

(Mt. 5:38-48; 7:12)

<sup>27</sup> Räjpzani:

—La'tu ni cacuadiajgtu rextidxä rniä diidxre lojtu: col'chanälajz rebejn ni rdxe'ch lojtu, colyujn dzunsa'c loj rebejn ni rdxe'ch lojtu.

<sup>28</sup> Benle' yejc rebejn ni rgube la'tu. Gunab lo Dios xcuent rebejn ni rcuaquij la'tu.

<sup>29</sup> Palga yu' chu rrajz quinn te laad lojlu, badeedza stelaad quinni. Palga yu' chu gudzucay xhablojiaalu, badeedza näj xcamangwlu xca'ni.

<sup>30</sup> Xhitis ni guiniabreni lojlu, badeedni; ni gudzucay te xhi xtenlu lojlu, na'c guiniabsacluni lojni.

<sup>31</sup> Sigajc ni rrajzlu gunnäj bejn la'tu, si'cza la'tu colyennäj bejn.

<sup>32</sup> 'Palga la'tu sanälajztistu rebejn nani sanälajz la'tu, xlia'sini, sa'csi sigajcza rujn rebendojl.

<sup>33</sup> Palga guntu hueen lojtis rebejn ni rujn hueen lojtu, xhet laadi cayujntu, sa'csi sigajcza rujn rebejn ni nabajn nen dojl.

<sup>34</sup> Palga gudedlaatu lojtis reni rujntu xhigab gunidxsacni lojtu, ¿xhi cos hueen rchalotu rujntu? Ni rebendojl rudedlaazareni loj rebejn ni najnreni siguixsac ni nasääbreni.

<sup>35</sup> La'tu, nanab chanälajztu rebejn ni rdxe'ch lojtu, guntu hueen lojreni, gudedlaatu loj rebejn, na'c gunlojtu xcasactu recos ni rudedlaatu, te si'c guroob gac nani guzalajz Dios lojtu; te si'c gactu xi'n Gueb Dios ni nabajn xhaguibaa. Sa'csi si'cza najc Dios huenduxh loj reni di gudeed xquixtios lojni, näjza loj rebendojl.

<sup>36</sup> Colgulasajz resa'tu si'c rulasajz Xtadnu Dios guiraa rebejn.

*Colgulasajz sa'tu*

(Mt. 7:1-5)

<sup>37</sup> Räjpzani:

—Na'c guntu yäl'guxhtis nani rujn bejn, naatu xhet laadi rujnni; te na'cza gun Dios yäl'guxhtis rextojltu. Na'c gucuaquijtu bejn te sigajcza di Dios gucuaquij la'tu. Colgusiäj'l-lajz dojl ni rujn sa'tu, te si'cza gusiäj'l-lajz Dios rextojltu.

<sup>38</sup> Colgudeed loj bejn ni rquiinreni te si'cza guzalajz Dios ni rquiintu. Suniidxreni xca'tu te mediid guidxadoo, sibetijp ni yu' nenni, cupe'tlini gusäl'reni nen xpolstu. Dios suniidx lojtu lagajc con mediid ni rudeedtu loj rebejn.

<sup>39</sup> Guniiza Jesús stee cuent räjpn:

—¿La sajc guluii te ben lotiä'p nez yuj lo stee ben lotiä'p, ä? ¿La di guiro'preni guitejb nen te gueed, ä?

<sup>40</sup> Te bejn ni casieed di gacdi guisieedruni loj ni najn xmastrni. Te bejn, che agulujx bisieedni, sajcn si'cni najc mastr xtenni.



41 '¿Xhicient cahuiilu guixhe' ni yu' baloj bejtzlu, luxh dilu fii yagro ni yu' balojlu?

42 O, ¿xho mood gäblu lo bejtzlu: “Guidon cuää guixhe' ni yu' balojlu”; luxh dilu gacbee yu' te yagro balojlu, ä? ¡Benguijdx! Guläxгаа yagro ni yu' balojlu, dxejc sajc fisa'clu te cuäálu guixhbäs ni yu' baloj bejtzlu.

*Ninexhsa'c ni rcaj loj te yajg sujn gumbeeni yajg*  
(Mt. 7:17-20; 12:34-35)

43 Räjpzani:

—Xheti te yagsa'c ni rudeed ninejxh ni xhet sajcđi, xhetiza te yajg ni xhet sajcđi ni rudeed ninexhsa'c.

44 Sa'csi tebgaj reyajg rusenlojni xhi yajgni xcuent ninejxh ni rcaj lojni. Di bejn gutie' iigw lo reyaguejch, diza bejn gutiu' uub lo te yag balagrejñ.

45 Rebensa'c rnii didxsa'c, sa'csi xhigabsa'c yu' neñ lastooni. Niluxh rebenguijdx rnii ganax didxguijdx sa'csi xhigabguijdx yu' neñ lastooni, sa'csi ro'ni rnii nani yu' neñ lastooni.

*Tio'p bejn ni benchee tio'p yu'*  
(Mt. 7:24-27)

46 Räjpzani:

—¿Xhicient rniitu loä: “Dad, Dad,” luxh ditu gun nani rniä guntu?

47 Guiniä lojtu chuni'c najc si'c bejn ni riääd loä, rucudiajgni xtidxä luxh rusoobni xtidxä.

48 Najcni si'c te bejn ni benchee rolijzni, ganid gudäänni jiät, dxejcti bejnñi cimient yejc te guilaj. Cheni biäjñ nisro ro' gueuu, bidijn nisro cuä' yu'ga, luxh nicla nusniibnini, sa'csi yu'ga sobgadzuz' tz yejc te guilaj.

49 Niluxh reni rcuadiajg xtidxä, dxejc direni guzoob xtidxä, najcreni si'c te bejn ni bejn xyu'ni loj yujxh, dini niujñ cimient xten yu'ga. Dxejcti biäjñ nisro, bidijnñi cuä' yu'ga, dxejc li gurebä'n yu'ga, gunitlojtini.

## 7

*Basiajc Jesús xmos te beñ roman ni rnibee*  
(Mt. 8:5-13)

1 Che gulujx gunii Jesús loj rebejn, huijni te guejdx ni laa Capernaum.

2 Ro'c yu' te beñ roman ni rnibee, yu' te mos lojni, luxh sanälazduxhni mosga. Cayacxhuduxh mosga, ameerli guetni.

3 Che biejn diajg capitán cagasä'treni Jesús, baxhalgajcni gaii bengool lo rexpejn Israel te chagajnreni Jesús jiäädni te gusiajcni xmos dade'ga.

4 Che gubigreni loj Jesús, gosloj gunabduxhreni lojni, räjpreni lojni:

—Dade're najc bensä'c, nungäjñ gacnäjluni

5 sa'csi sanälajzni lajdx rexpejn Israel, luxh lagajc laani gunibee guc-chee xquidobäznu.

6 Dxejcti huinä Jesúsreni. Cheni siäddzuzgajxhreni royu', baxhal capitánğa gaii xamiigwni, gäbreni loj Jesús:

—Si'c naj capitán: “Di rlazä gotalä xtzuumlu. ¿Chu narä te jiu'lu rolizä? Xhet sacädi.

7 Ni'c dina niapä baloor te lagajc narä niädganä guejblu, sa'csi rajplu yälrnibeduxh niluxh narä rut nacädi. Ni'cni gunibeetis jiajc xmosä, luxh laani siacgajcni.

8 Sa'csi narä nacä xmos rebejn ni rnibee, luxh rnibeäza loj resoldaad. Che gäpä lo tejni: Huij rec, rijni; che gäpä loj steeni: Gudaa ree, riäädni; che gäpä loj xmosä: Bejn dee, rungajcniñi.”

9 Che biejn diajg Jesús rediidxre, bidxeloduxhni, gubiréni loj rebejn ni siädnajlni, räjpni lojreni:

—Rniliäpac lojtu, nicla lo rexpejn Israel gajdna guidxälä te bejn ni rililajzduxh si'c ni rililajz capitánre.

10 Che gubi' rebejn ni huij loj Jesús rolijz capitán, bahuiireni abiajc xmosni.

### *Baspañsac Jesús xi'n te gunabiuud*

11 Neñ redxejga, huij Jesús te guejdx ni laa Naín. Huinäni rexpejn pacni näjza xhidajl bejn ni sanajlni.

12 Che bidzujñni gajxh ro' guejdxga, bahuiini sacua'tzreni te bengut, te bi'n ni najc xtebtis xi'n te gunabiuud. Xhidalduxh bejn sacua'tzni.

13 Che bahuii Jesús loj gunabiuudga, biani nane'ga, räjpni lojni:

—¡Na'c roonlu!

14 Dxejc gubig Jesús lo rebejn ni sanä bengutga, dxejc guzudxi reni nuu bengutga. Dxejc räjp Jesús loj bengutga:

—¡Bi'n!, narä rniä lojlu; ¡Huistie!

15 Dxejc huistie bengutga, sobga'ni guslojni caniini. Dxejc badeed Jesúsni lo xnanni.

16 Che bahuiireni xhini'c gujc, bidxejbreni, bidxeloduxhreni, guslojreni calä'preni xpala'n Dios, räjpreni:

—Te niguisacduxh ni rnií xtidx Dios abidzujñ nez loonu.

Caniizareni:

—Lagajc Guejb Dios abiädhuii rexpejnñi.

17 Dxejc bire'ch diidx xcuent Jesús guideb nez reguedx Judea näjza guiraa reguejdx ni tre' nejzga.

### *Xpejn Juan ni rutiobnis huinabdiidx loj Jesús*

*(Mt. 11:2-19)*

18 Rexpejn pac Juan ni rutiobnis bij rediidxga lojni che yu'ni latzguiib.

19 Dxejc baxhalni gaiireni lo Jesús te sanabdiidxreni: “¿La guliipac najclu Crist ni jiaäd o sibäjznu chu stee bejn, ä?”

20 Dxejcti gubig rexpejn Juan loj Jesús, räjpreni:

—Juan ni rutiobnis baxhal nuurnu te guiniabdiidxnu lojlu: “¿La luj najc Crist ni jiaäd o la sibäjznu chu stee bejn?”

21 Lagajc dxejc che bidzujñreni, basiajc Jesús xhidajl bejn ni rajc garen-garen yälgujdx, ni yu'za rebeñdxab lastooreni, basiajczani baloj ni di fii.

22 Dxejcti badzu' Jesús diidxre, räjpni:

—Colchaye'tz lo Juan guiraa ni abahuiitu näjza ni abiejn diajgtu. Colye'tz lojni: “Relotiä'p ruhuisac; rebeñcoj rsiasa'c; rebeñ ni ral guejdx tiejxhni, abiajc tiejxhni; rediagcua't riensac diajgreni; rebeñgut, agubansacreni; luxh loj rebeñproob nani cabäjz xcälracnäj Dios riejn diajgreni rsiule' xtidx Dios xcuent xho laa bejn lo dojl.

23 Chicbaa nani rumbee narä, nani di cuälaz narä.”

24 Cheni sii rexpejn Juan, gusloj Jesús caniini xcuent Juan loj rebejn, räjpni:

—¿Chuni'c huihuiitu nez lo reyubijdz? ¿La te nijt ni rusniib bej, ä?

25 ¿Xhini'c huihuiitu? ¿Te bejn ni sucheduxh, ä? La'tu najntu rebejn ni sucheduxh näjza reni nabañsa'c, rolijz rereii yu'reni.

26 ¿Chuxhni'c birriitu huihuiitu? ¿Te niguii ni rnií xtidx Dios, ä? O'n, rniliä lojtu, luxh te ni sacduxhru loj guiraa reñgüi ni rnií xtidx Dios.

27 Juan najc niguii ni ruzä't rexqujtz Dios cadro caj scree: Narä guxhalä te niguii nani guinií xtidxä,

te nidni lojlu, te laani guzucheeni xnezyujlu nez lojlu.

<sup>28</sup> Rniliäpac, loj guiraa rexingaan regunaa, nicla tejni gajd guiricaj ni najc te beñsacduxhru nez loj Dios si'c najc Juan ni rutiobnis. Niluxh nani guxiiru sajc lo xcälrnibe Dios ni jääd, sajcruni loj Juan.

<sup>29</sup> Che biejn diajg rebejn näjza reni rusquijx impuest rextiidxni xcuent Juan, gucbeereni rujn Dios yälguxhtissa'c, sa'csi abatiobnis Juanreni.

<sup>30</sup> Niluxh refarisee näjza rebejn ni ruluui leii gulälazreni nani niujn Dios par laareni, sa'csi direni nicäjb nutiobnis Juanreni.

<sup>31</sup> Räjpa Jesús lojreni:

—¿Xhocha guiniä najc rebejn nani tre' naj?

<sup>32</sup> Najreni si'c rebixbäz nani rguijt nez lo guii cadro rdo', rbedxa'reni loj sa'reni, rniireni: “Bielnu te bizej te guya'tu, niluxh ditu nuya'. Bielzanu te dij ni nabaduxh dxejcti dizatu nioon.”

<sup>33</sup> Sa'csi che biääd Juan, dini niauxha't, dizani niä' bin, luxh räjptu: “Yu' bendxab lastooni.”

<sup>34</sup> Dxejcti biälä narä, Xi'n Dios ni gujc Niguii, rauä, rä'ä. Dxejc räjptu: “Bahuilaare, dade're rauxha't, rä'zani, najcni xamiigw rebendojl näjza rebejn ni rusquijx reimpuet xten gubier.”

<sup>35</sup> Ni'cni xcälnajn Dios huenliisi rienloj loj dzuun ni rujn rebejn ni najn.

### *Jesús huij rolizj Simón ni najc farisee*

<sup>36</sup> Dxejc tej refarisee gunii loj Jesús, räjpmi:

—Jiädldu rolizä te guidaunu.

Dxejc huij Jesús rolizjni, ro'c gurejni lo mex.

<sup>37</sup> Rbäjz te gunagubejxh lo guejdxga. Che biejn diajgni satajw Jesús rolizj fariseega, bidzunäjni te bo't guidxa se't nejxh, luxh bo'tga najc si'c onix, botsa'cni.

<sup>38</sup> Che biu' gunaaga, bidzujjni lo ni' Jesús, guslojni cayoوني. Con nisbee caguiibni ni' Jesús, dxejc caguspjdzni ni'ni con xquidxejcti. Dxejc bachagro'ni ni'ni bazaazani setnejxhga ni' Jesús.

<sup>39</sup> Che bahuii farisee ni gurejdx Jesús rolizjni, recosre, bejnmi xhigab: “Palga gulii najc niguiire Xi'n Dios, sacbeeni chu najc näjza xho najc gunaare ni cagajn ni'ni, sacbeezani najcni te gunadojduxh.”

<sup>40</sup> Dxejc gunii Jesús loj fariseega, räjpmi:

—Simón, yu' xhi rlazä guiniä lojlu.

Dxejc räjpm fariseega lojni:

—Guniini, Dad mastr.

<sup>41</sup> Dxejc räjpm Jesús lojni:

—Tio'p bejn nazäab meel lo te bejn ni rudedlaa meel. Tej reni nazäab si'cti gaiigayuu meel. Steeni nazäab si'cti tiubitzuu meel.

<sup>42</sup> Cheni di niajcdi niguijxreni xti'nreni, basiäl lajzmi xti'n guiro'preni. Naj gunii loä, ¿chu tejreni sianälajzru dade'ga, ä?

<sup>43</sup> Badzu' Simón diidxre lojni, räjpmi:

—Rchaloä bejn ni nazäabru lojni.

Dxejc räjpm Jesús:

—Laaca rniilu.

<sup>44</sup> Dxejc gubiré Jesús, bahuiini loj gunaaga. Dxejc räjpmi loj Simón:

—¡Bahuii loj gunaare! Che biu'ä rolizjlu, dilu nuniidx nis te nidiib ni'ä. Per gunaare gudibnäjni ni'ä nisbee ni birii balojni, dxejc baspijdzni ni'ä con xquidxejcti.

<sup>45</sup> Dilu nuchagro' narä, luxh laani cheli biu'ä ree, gajdni cuääz guchagro'ni ni'ä.

<sup>46</sup> Dilu nusäl se't yecä, niluxh laani basälni se't ni rlianexhduxh ni'ä.

<sup>47</sup> Ni'cni rniä lojlu, dojl xten gunaare, luxh xhidalduxh najcreni, abadzucaj Dios redojlga sa'csi huenliisi sanälajzni Dios. Luxh rebejn ni rudzucaj Dios guxii xtojłreni, guxiiza sanälajzreni Dios.

<sup>48</sup> Dxejcti räjpni loj gunaaga:

—Agubicaj rextojłlu.

<sup>49</sup> Dxejc rebejn ni sobga' lo mex con laani, che biejn diajgreni rediidxre, gusloj canii lo sa'reni, räjpreni:

—¿Chuchani'c najc niguiire, ni'cni rudzucajlini xtojł bejn, ä?

<sup>50</sup> Räjp Jesús loj gunaaga:

—Agulaalu lo xtojłlu sa'csi ahuililajzlu; huij naj, bascuedxi lajzlu.

## 8

### *Regunaa ni guncäj Jesús*

<sup>1</sup> Dxejcti gusloj huij Jesús guiraa reguejdx näjza rerench, cagusule'ni xtidx Dios, caguluiini xcuent xcälrnibee Dios loj rebejn. Sanäni rexpejn pacni

<sup>2</sup> näjza gaii gunaa ni abasiajcti, agulääni rebendxab lastooreni, näjza basi-ajcni xcälgujdxreni. Tejni laa Marii ni laaza Magdalen, ni gulää Jesús gajdz bendxab neñ lastooni.

<sup>3</sup> Stee gunaa laa Xuan, ni najc chääl Chuza, ni ruhuii xhixten Herodes. Stee gunaa laa Susan. Guyu'za sgaii gunaa. Guiraa reni'c rudeed lagajc xhixtreneni te rio' recos ni rquineneni.

### *Xcuent bejn ni rbe'c binij*

*(Mt. 13:1-9; Mr. 4:1-9)*

<sup>4</sup> Dxejcti bire' xhidajł bejn lojni ni birii xhidajł reguejdx. Lojreni gunii Jesús con te cuent ni ruluii, räjpni:

<sup>5</sup> —Birii te bejn sale'c binij. Cheni cabe'cni binij, yu' binij ni bitejb cuä' nezyuj. Che sadejd rebejn baläjreni yejc binijga, biääda remane' ni rutajt xhaguibaa, gudajwreneni.

<sup>6</sup> Yu'za lajt bitejb binijga neñ reguij cadre xheti xhidajł yuj. Che gulejn binijga, gubidzgajcni sa'csi xheti xcojł ro'c.

<sup>7</sup> Yu'za lajt bitejbni nez neñ reyaguejch. Che gulejnni, di reyaguejch nusaan niroob gäjga.

<sup>8</sup> Yu'za lajt bitejb binijga lo yusa'c, ro'c gucduxhni. Cheni guroobni, yu' binijga gujc te gayuu xob loj tejsa binij ni gule'c dade'ga.

Che gulujx guniini scree, dxejc guniini dip räjpni:

—Palga sajc gucua diajgtu rediidxga, colcuadiagsa'cni.

### *Xhicuent gunii Jesús recuent*

*(Mt. 13:10-17; Mr. 4:10-12)*

<sup>9</sup> Dxejcti gunabdiidx rexpejn pacni lojni räjpreni:

—¿Xhi säloj cuentre?

<sup>10</sup> Dxejc räjpni lojreni:

—Lojtu ni najc rexpejnä suniidx Dios yälnajn te gacheetu reyälxhiga'tz xten xcälrnibeeni. Loj chutis stee bejn, siniä recuent lojreni te mase cadxelojreni, direni fisa'c, luxh mase cacua diajgreni, direni gachesa'c.

### *Rusule' Jesús xcuent ni rbe'c binij*

*(Mt. 13:18-23; Mr. 4:13-20)*

<sup>11</sup> Räj pzani:

—Scree säloj cuentre, rebini najc si'c xtidx Dios.

<sup>12</sup> Binij ni biajb lo nezyuj najc si'c rebejn ni rucuadiajg xtidx Dios. Dxejc riääd beñdxab, riäädzucajni rediidxga lastooreni te na'c chalilajzreni xtidx Dios, te na'c za laareni lo dojl.

<sup>13</sup> Binij ni biajb neñ reguij najc si'c rebejn ni rucuadiajg xtidx Dios, rbaalajzreni; per sa'csi xheti xlobaareni, nälajznu, direni gandzu'tz xtidx Dios, rililajzreni te bo'c, per che rsacsí rebejnreni, rbälazreni xtidx Dios.

<sup>14</sup> Binij ni biajb neñ reyaguejch najc si'c rebejn ni rucuadiajg xtidx Dios, per la' ni sanuureni xnejzreni, rijia'nreni lo recos guedxliuj, lo yäl'nasa'c ni ruhuiireni, näjza rujnreni si'ctis ni rlanj tiejxhreni. Reni'c rujn runi-jtreni xtidx Dios, ni'cni direni guzoob xtidx Dios, direni chanuu te gunreni xtzunsa'c Dios.

<sup>15</sup> Binij ni riabj lo reyusa'c najc si'c rebejn nani rucuadiajg xtidx Dios, ni rililajz diidxga guideb te lastoya ni najc hueen. Randzu'tzreni xtidx Dios, dxejc ruedeareni te yäl'nasa'c, nalajznu ruzoobreni xtidx Dios, rujnreni xtzunsa'c Dios.

*Xhet yu'di ni naga'tz par tejpas*

(Mt. 4:21-25)

<sup>16</sup> Räj pzani:

—Ruti te bejn ni rucuaguij te bajl dxejc rusäuni te caj yejc bajlga, dizani gusujnini dejtz te loon. Alga rusoobnini neñ candilieer loj te mex te guzanijni guideb neñ yu'ga te reni jiu' fiireni lo bajlga.

<sup>17</sup> Xhet yu'di ni yuchetzu'tzdi ni di guidzujñ dxej guiluiini; xhet yu'diza ni naga'tz naj ni di guidzujñ dxej gacbee bejn ni.

<sup>18</sup> Ni'cni colcuadiagsa'c diidx; sa'csi guiraa rebejn ni rajp yälracbee, sajprureni yäl'najn. Luxh reni di ninuu nucuadiajg xtidx Dios, lojni sibicaj näj ni abacuadiajgni, ni rchaloni najjni.

*Xnan Jesús con rebejtzni*

(Mt. 12:46-50; Mr. 3:31-35)

<sup>19</sup> Dxejc bidzujñ xnan Jesús näjza rebejtzni cadro suga'ni, niluxh di niajcdi nibigreni lojni sa'csi tre' xhidalduxh bejn ro'c.

<sup>20</sup> Dxejcti huisa'n te bejn diidx loj Jesús, räjpni:

—Xnan guejblu näjza rebejtz guejblu suga' rolä', luxh rlanjzreni fiireni lo guejblu.

<sup>21</sup> Badzu' Jesús diidxre lojreni, räjpni:

—Xnanä näjza rebetzä najc rebejn ni rucuadiajg, ni ruzoobza xtidx Dios.

*Basiacdxí Jesús te beduxh*

(Mt. 8:23-27; Mr. 4:35-41)

<sup>22</sup> Te dxej biu' Jesús näjza rexpejn pacni neñ te barcw. Dxejc räjpni lojreni:

—Colcho' stelaad ro' nisre.

Basyu'reni barcw lo nis, sä'tireni.

<sup>23</sup> Cheni sadejdreni galäii nisga, gudiejs Jesús neñ barcw. Dxejc gubi' te beduxh lo nisga, luxh sa'csi lacti nadip ro' bejga, gusloj cayu' nis neñ barcw, ameerli jäáz barcwga lo nis.

<sup>24</sup> Dxejcti huicuäänreni Jesús, räjpreni lojni:

—¡Mastr! ¡Mastr! ¡Cayääznu lo nis!

Che gubajñni, huistieni, dxejc gudidxa'ni lo bejga näjza lo nis ni cayäsjaiaa. Dxejc guläjz bejga, guredxiza nisga.

<sup>25</sup> Dxejc räjpni lojreni:

—¿Con xcälirililajztu, ä?

Per laareni bidxejbreni, bidxeloduxhreni, canabdiidxreni lo sa'reni:

—¿Chuni'c najc niguiire te rnibeeni bej näjza nis, luxh rusobdiajg bej näjza nis xtiidxni?

*Te beñ Gadara ni guyu' rexsprit bendxab lastooni*

*(Mt. 8:28-34; Mr. 5:1-20)*

<sup>26</sup> Bidzujntireni lo yuj xten Gadara ni tre' stelaad ro' nis nez loj reyuj xten Galilee.

<sup>27</sup> Cheni biäjt Jesús neñ barcw baläjni lo yuj, gubig te bejn ni siääd guejdxga lojni. Agujc xchej yu' rebendxab neñ lastooni. Dini gacw xhajnbi, dizani cuääz neñ yu', alga rbäjzni cadro yu' rebaa.

<sup>28</sup> Che bahuiini loj Jesús bazuxhijbni nez lojni, guredxa'ni räjpni:

—¿Xhicuent riädchu'lu loonu, luj, Jesús Xi'n Gueb Dios ni rbäjz xhaguibaa? Rniabduxhä lojlu, na'cru gusacsilu nuurnu.

<sup>29</sup> Guniini rediidxre sa'csi canibee Jesús guirii rebendxabga neñ lastoo bejnre. Agujc xchero cazob rniaaz rebendxabga bejnğa ruliib rebejn ni'ni, naani con cadenguuib te guilibdzu'tzni, te xhet gundini bejn. Niluxh laani rutiugya'ni recaden, dxejc rebendxabga rinärenini nez lo reyubijdz.

<sup>30</sup> Jesús gunabdiidx lojni, räjpni:

—¿Chu laalu?

Dxejc badzu'ni diidxre loj Jesús räjpni:

—Legión najc laä.

Si'c guniini sa'csi xhidalduxh najc rebendxab ni yu' neñ lastooni.

<sup>31</sup> Dxejc gunabduxhreni loj Jesús na'c guxhalsacnireni cadro biriireni.

<sup>32</sup> Lagajc dxejc suga' xhidajl cuch cayajwreni guixa' lagajc nejzga lo te bala'. Dxejc gunab rebendxabga loj Jesús te gusaanni jiu'reni neñ recuchga. Che cuäjb Jesús,

<sup>33</sup> birii rebendxabga neñ lastoo dade'ga, biugajcreni neñ recuchga. Che biu'reni neñ recuch, baxun recuchga bitejbreni ro' te bala', dxejc biajbreni lo nis, ro'cti gujtreni.

<sup>34</sup> Baxun reni cayajp recuchga che bahuiireni xhini'c gujc ro'c, huisa'nreni diidx lo rebenguejdxga näjza lo reben rench.

<sup>35</sup> Dxejc biädhuii rebejn xhini'c gujc ro'c. Che bidzujnreni cadro suga' Jesús, bahuiireni loj bejn ni birii bendxab lastooni. Sobga'ni cuä' ni' Jesús, najcwini xhajnbi, luxh xhetru rajcdi yejcnj; dxejc bidxebduxh rebejnğa.

<sup>36</sup> Sas reni bahuiloj xho gujcnj, bijreni diidx xho basiajc Jesús bejn ni guyu' rebendxabre lastooni.

<sup>37</sup> Dxejc guiraa reben Gadara näjza reguejdx ni tre' nejzga, gunabreni jiunejz Jesús ro'c sa'csi cadxebduxhreni. Ni'cni biu' Jesús neñ barcw te gubisacni nejz cadro siäädni.

<sup>38</sup> Dade' ni birii rebendxab lastooni gunabni lo Jesús gusaanni chanajlnini, niluxh Jesús gunibee jia'nni, räjpni lojni:

<sup>39</sup> —Gubi' rolizlzu te güilu diidx recosro ni bejn Dios xcuent luj.

Dxejc sääni, batie'chni diidx guideb lo guejdxga xhi bennäj Jesúsni.

*Xindxap Jairo näjza te gunaa ni gudajn xhajn Jesús*

*(Mt. 9:18-26; Mr. 5:21-43)*

<sup>40</sup> Che gubi' Jesús stelaad nis, bibalajz rebejn gubi'ni, sa'csi cabäjzpacreni guibisacni.

<sup>41</sup> Dxejc bidzujn te bejn ni laa Jairo, ni rnibee te guidobäz, bazuxhijbni nez loj Jesús, gunabni chanänini rolizjni

<sup>42</sup> sa'csi yu' tejtis xindxa'pni. Yu'ni tzubitio'p ijz, luxh cayacxhuuni, ameerli guetni. Lałsi sää Jesús rolizni, birinajl xhidalduxh bejn̄ni, catäälirenini.

<sup>43</sup> Loj rebejn̄ga nadxaag te gunaa ni agujc tzubito'p ijz cayacxhuuni, cayajcni yälguidxbäii. Xlia'si abanijtni guiraa xhixtenni cua' renani rujn remeed.

<sup>44</sup> Gubig gunaaga dejtš Jesús te gudajnni ro' xhajbni. Lagajc dxejc biacgajcni.

<sup>45</sup> Dxejcti gunabdiidx Jesús räjpni:

—¿Chuni'c najc ni gudajn narä, ä?

Guiraa rebejn̄ räjp:

—Dinu gan.

Räjpza Pedr:

—Mastr, ni yu'lu galäii reben̄ xhidajl, luxh cagutäälireni luj. ¿Xhicuent rniabdiidxlu: “¿Chu gudajn narä?”

<sup>46</sup> Räjpjac Jesús lojni:

—Yu' chu gudajn narä, sa'csi guceä yu' chu basiajc xcäl̄rnibeä.

<sup>47</sup> Che gucee gunaaga anajn Jesús gudajnni xhajbni, bidxejbni, racejslini gubigni loj Jesús, bazuxhijbni lojni. nez loj guiraa rebejn̄ räjpni xhicuent gudajnni xhajbni näjza xho biacgajcni.

<sup>48</sup> Dxejc räjp Jesús lojni:

—Huij. Gulecdxilajzlu, xinda'pä. Abiajclu sa'csi huililajzlu.

<sup>49</sup> Lałni canii Jesús si'c bidzujn̄ te bejn̄ ni siäd roliz Jairo, ni rnibee te guidobäz. Räjpni loj Jairo:

—Agujt xindxa'plu. Na'cru gutajllu xtzuum Dad Mastr.

<sup>50</sup> Che biejn̄ diajg Jesús rediidxga, räjpni loj Jairo:

—Na'c guidxejblu. Huililajztis te jiac xindxa'plu.

<sup>51</sup> Che bidzujn̄reni rolizni, xtebtis Pedr, Jacoob, Juan näjza xcuzajn dxape'ga biunäjni nen̄ yu'ga. Peta rebejn̄ ni siädnajl̄ni bia'nreni rolä'.

<sup>52</sup> Cayonduxh guiraa rebejn̄ ni sobga' nen̄ yu'. Dxejc Jesús räjp lojreni:

—Na'c roontu, gajd dxape're guet, nagayejstisni.

<sup>53</sup> Alga baxhiznäjn̄renini, sa'csi anajn̄reni agujt dxape'ga.

<sup>54</sup> Dxejcti gunaaz Jesús naa dxape'ga, dip guniini, räjpni lojni:

—¡Dxape', huistie!

<sup>55</sup> Dxejc gubansac dxape'ga, huistiegajcni. Dxejc gunibee Jesús gudeedreni xhi gauni.

<sup>56</sup> Bidxeloduxh rexcuzajnni. Per gunibee Jesús na'c güireni diidx xhini'c gujc ro'c.

## 9

*Ruxhal Jesús guitzubitio'p rexpejn̄pacni  
(Mt. 10:5-15; Mr. 6:7-13)*

<sup>1</sup> Batie' Jesús guitzubitio'p rexpejn̄pacni te badeedni yäl̄rnibee lojreni te cuääreni reben̄dxab lastoo rebejn̄, näjza te gusiajcreni reben̄racxhuu.

<sup>2</sup> Baxhal̄nireni te gusule'reni diidx xcuent xcäl̄rnibee Dios näjza te gusiajcreni reben̄racxhuu.

<sup>3</sup> Dxejc räjpni lojreni:

—Xhet chanäditu lo nejz, nicla baston̄, nicla bols, nicla yätxtiil, nicla meel; na'cza chanätu tio'p xhajbtu; tejtisni chanätu.

<sup>4</sup> Chutis rolijz bejn cadro guidzujntu, ro'c coljia'n cheni guiriilitu lo guejdxga.

<sup>5</sup> Palga direni gusaan jiu'tu rolijzreni, che jiunejztu lo guejdxga, colcuijb guxhuj ni'tu si'c te seen direni nililajz xtiidxtu.

<sup>6</sup> Dxejc biriireni sääreni garen-garen reguejdx, cagusule'reni xtidx Dios, cagusiajczareni rebenracxhuu cadrotis rdzujnreni.

*Xho gujt Juan ni rutiobnis*  
(Mt. 14:1-12; Mr. 6:14-29)

<sup>7</sup> Che biejn diajg Herodes ni rnibee guiraa ni cayujn Jesús, guyu'ni yärsia', dini gan xho gunni xhigab, sa'csi yu' reni canii laa Juan ni agubansac lo rebenhut.

<sup>8</sup> Sgaiireni canii abaluiloj Elías. Yu'zareni canii pet laa stee niguii ni gunii xtidx Dios galoo ni agubansac.

<sup>9</sup> Per räjp Herodes:

—Lagajc narä gunibeä biru' yejc Juan ni rutiobnis, ¿chuchani'c najc niguiire ni riejn diagä xhidajl didxro xcuentni?

Dxejc rlaizpac Herodes fii lojni.

*Bayaan Jesús gaii mił bejn*  
(Mt. 14:13-21; Mr. 6:30-44; Jn. 6:1-14)

<sup>10</sup> Che gubi' rexpejnpacni, bijreni diidx loj Jesús xhini'c bejnreni. Sas huinä Jesúsreni te lajt cadro ruti bejn, gajxh te guejdx ni laa Betsaida.

<sup>11</sup> Che gucbee rebejn caro sääreni, huinajlrenini bidxälrenini. Che siädreni lojni huichaglojnireni, sas gusloj cagusule'ni lojreni xcuent xcälrnibee Dios. Basiajczani rebejn ni cayacxhuu.

<sup>12</sup> Che gusloj cayäaz gubijdx, gubig rexpejnpacni loj Jesús, räjpreni lojni:

—Gojs loj rebejnre, agojl jüireni te chatiilreni xhi gaureni, näjza cadro tedreni guxhijn lo rerench, nen reguedxbäz, sa'csi ree xhet yu'di.

<sup>13</sup> Dxejcti räjp Jesús loj rexpejnpacni:

—¡La'tu colgudeed xhi gaureni!

Dxejc räjpreni lojni:

—Xhet rajpdinu, gaiitis yätxtiil näjza tio'p bäjl. Ni'ctis yu' palga dinu chasiiru xhi gau reben xhidajlre.

<sup>14</sup> Luxh najc rebejnğa si'cti gaii mił niguii. Dxejc räjp Jesús loj rexpejnpacni: —Coljejtz lojreni cuereni xcua-xcuaareni, si'cti tiuubitzugajreni te cuaa.

<sup>15</sup> Si'c bejnrenini, sas gurej guiraa rebejnğa si'c.

<sup>16</sup> Dxejc cua' Jesús gaii yätxtiilğa näjza tio'p bäjlğa, guläsni lojni xhaguibaa, badeedni xquixtios lo Dios xcuent yälrajwga. Che guluix badeedni xquixtios gula'ni reyätxtiilğa näjza rebäjlğa, dxejc sanuutis badeednini loj rexpejnpacni te gudisrenini loj rebejnğa.

<sup>17</sup> Guiraa reben xhidaalga gudajw, gudxaj xque'reni. Dxejcti batojpreni ni bia'n bachajreni tzubitio'p dxijm yätxtilbiujy näjza bälbiujy ni bia'n.

*Gunii Pedr Jesús najc Crist*  
(Mt. 16:13-19; Mr. 8:27-29)

<sup>18</sup> Te dxej lälni cabedx-canab Jesús lo Dios, xtebni näjza rexpejnpacni, gunabdiidxni lojreni, räjpni:

—¿Chuni'c rnii rebejn nacä?

<sup>19</sup> Dxejc räjpreni lojni:

—Yu'reni rnii najclu Juan ni rutiobnis; yu'zareni rnii najclu Elías; sgaiireni rnii najclu stee niguii ni gunii xtidx Dios galoo ni agubansac.



20 Dxejc gunabdiidxni lojreni, räjpni:

—¿La'tu a? ¿Chuni'c rniitu nacä?

Dxejc räjp Pedr lojni:

—Luj najclu Crist Xi'n Dios ni cabäáznü.

*Jesús rnixгаа xho guetni*

(Mt. 16:20-28; Mr. 8:30-9:1)

21 Dxejc gunibee Jesús lojreni, räjpni:

—Na'c gäbtu si'c lo rebejn.

22 Räjpszani lojreni:

—Nanab ted Xi'n Niguii trabajwduxh; rebengool xten guidoo, näjza rebix-hojz, näjza rebejn ni ruluui xleii Moisés sibälazreni narä, naareni dina gacä Crist ni cabäáznü. Sugu'treni narä Xi'n Dios ni gujc Niguii, niluxh sibansacä ni riojn dxej.

23 Dxejc räjpni loj guiraareni:

—Palga chu tejtu rlawz guirinajl narä, nanab jäällajzni xhixtenni, te guixe-guixee guntisni nani gudedä gunni.

24 Sa'csi nani rlawz guiniazdu'tzni xcäl'nabajñni, sunijtni yäl'nabajñ lo Dios; luxh nani runijt xcäl'nabajñni xcuent xtidxä, sica'ni yäl'nabajñ par tejpas.

25 Sa'csi ¿xhi gaan gun te bejn palga xca'ni guideb guedxliuj, luxh gunijtni xcäl'nabajñni lo Dios?

26 Niluxh nani guituinäj narä näjza xtidxä, sigajcza narä, Xi'n Dios ni gujc Niguii, situinäázani cheni jäälä si'c reii guideb yäl'rdimbicha' xten Xtaä näjza rexanglni.

27 Guliipac rniä lojtu, yu' gaii reni suga' ree, ni di guet, suhuixgaareni xcäl'rnibee Dios.

*Bachaa xho rluijoj Jesús*

(Mt. 17:1-8; Mr. 9:2-8)

28 Gudejdti xhujñ dxej gunii Jesús diidxre, dxejcru huinä Jesús Pedr näjza Jacob näjza Juan, huijreni jiaa yejc te dajn te guredx-gunabni loj Dios.

29 Lañi cabedx-canab Jesús lo Dios, bidxaa xho ruluui lojni; dxejc xhajbni gujc nolbäj, rdimbicha'lini.

30 Biricajza tio'p dade' caninäjrenini. Redade'ga najc toMoisés näjza Elías.

31 Rdimbicha'za redade'ga. Caninäjreni Jesús xcuent xho guetni guedx Jerusalén.

32 Luxh Pedr näjza resa'ni guyuduxh bacal lojreni; che bire'ch bacal lojreni bahuiireni lo yäl'rdimbicha' xten Jesús näjza loj guiro'p redade' ni caninäjni.

33 Cheni agojl jiunejz redade'ga loj Jesús, räjp Pedr loj Jesús:

—Dad, Mastr, huenduxh suga'nu ree. Basaan jiencheenu choñ yue', tejni par luj, tejni par Moisés, steeni par Elías.

Luxh di Pedr gaan xhini'c caniini.

34 Lañi caniini si'c, bire' te za gusloj cayäjt yejcreni, dxejc bidxejbreni che biu'reni nen zaga.

35 Dxejcti biejn diajgreni nen zaga te xse' te ni gunii, räjpni:

—Dee najc Xi'nä ni sanälazä, colcuadiajg xtiidxni.

36 Che gulujx guniini rediidxga, bahuiireni sugaxteb Jesús. Dxejc niäutis ro'reni nen redxejga, rut lojdi bijreni diidx xcuent ni bahuiireni ro'c.

*Basiajc Jesús te biuux ni guyu' bendxab lastooni*

(Mt. 17:14-21; Mr. 9:14-29)

37 Barayääl cheni biäjtreni yejc dajnga, xhidalduxh bejn cabäjz Jesús.

<sup>38</sup> Dxejcti te dade' ni nadxaag rebejn̄ga guredxa'ni, rāj̄pni loj Jesús:

—Mastr, balaslajz narā, gudahui xi'nā, sa'csi xtebtisni najcni xinganā.

<sup>39</sup> Luxh bendxab rniaazni, sas ruscuedxa'nini, rajcni si'c yālguidxbej, rbāāni bitzūn ro'ni, rusacsíduxhnini, luxh dini gusaanni.

<sup>40</sup> Agunabā loj rexpejn̄pacu nibāāreni bendxabga, luxh di niajcdini.

<sup>41</sup> Dxejc badzu' Jesús diidxre, rāj̄pni:

—iBejn̄ ni di chalilajz, benguijdx! ¿Gucli chunāātu, gucli gunā huant la'tu? iGudanā xi'nlu ree!

<sup>42</sup> Dxejc che cabig biuuxga lojni, basālta' bendxabga biuuxga lo yuj, sas gusloj cayajcni si'c yālguidxbeduxh. Dxejc gudidxa' Jesús loj bendxabga, basi-agajcni biuuxga, dxejc badeednini lo xtadni.

<sup>43</sup> Guiraa rebejn̄ bidxeloduxh yālr̄nibeduxh xten Dios.

### *Rnii Jesús stehuākt xho guetni*

*(Mt. 17:22-23; Mr. 9:30-32)*

Lałni cadxeloj rebejn̄ lo recos ni bejn̄ Jesús, rāj̄pni loj rexpejn̄pacni:

<sup>44</sup> —Cołcuadiajgsa'c rediidxre, na'cza jiālajztureni, sa'csi sutedreni narā Xi'n Dios ni gujc Niguui ladznaa rebejn̄.

<sup>45</sup> Niluxh di rexpejn̄pacni niacbee xhi sāloj rextiidxni, sa'csi Dios bacua'tznini lojreni te di niacbeerenini. Bidxejbzareni niniabdiidxreni loj Jesús xhi sāloj rediidxga.

### *Chuni'c sajcru*

*(Mt. 18:1-5; Mr. 9:33-37)*

<sup>46</sup> Guslojza rexpejn̄ Jesús canabdiidx lo sa'reni:

—¿Chuchani'c sajcru loonu?

<sup>47</sup> Per gucbee Jesús xhi xhigab cayujnreni. Dxejc cua'ni te biuxbāz, bazujnini cuā'ni,

<sup>48</sup> rāj̄pni lojreni:

—Chutis ni xca' te biuxe' sa'csi sanāljazni narā, narāni rca'ni luxh ni rca' narā, rca'ni xtadā ni baxhał narā. Ni najc maazru nadolajz lojtu, ni'c najc ni sajcru.

### *Nani di guiniyaj nuurnu, xladnu yu'ni*

*(Mr. 9:38-40)*

<sup>49</sup> Dxejc rāj̄p Juan loj Jesús:

—Mastr, bihuiinu loj te bejn̄ ni rbāā rexp̄ndxab nen̄ lastoo bejn̄ con xcālr̄nibee lajlu. Dxejc rie'tznu lojni na'cru gunni si'c, sa'csi din̄i sanāj nuurnu.

<sup>50</sup> Dxejc rāj̄p Jesús lojreni:

—Na'c gudxojtuni, sa'csi nani di guiniyaj nuurnu, xladnu yu'ni.

### *Jesús gudidxa' loj Jacoob nājza Juan*

<sup>51</sup> Che siāddzuj̄n redxej ni chāā Jesús xhaguibaa, bejn̄ni xhigab chāāpacni guedx Jerusalén.

<sup>52</sup> Baxhałni gaii bejn̄ gunijd lojni chāāreni te guejdx xten Samaria te satiilreni cadro jia'nreni ro'c.

<sup>53</sup> Luxh rebejn̄ samaritan̄ di rlajzreni gudedlaareni te lajt cadro jia'nreni, sa'csi najnreni chāāreni guedx Jerusalén.

<sup>54</sup> Che biejn̄ diajg Jacoob nāj Juan, tio'p xpejn̄pacni, si'c, sas rāj̄preni loj Jesús:

—Dad, ¿La rlajzlu guinibeenu jiājt guiboo xhaguibaali te guze'cni guiraa rebenguejdxga si'cni bejn̄ Elías?

<sup>55</sup> Dxejc bahuii Jesús lojreni, gudidxa'ni lojreni, rāj̄pni:

—Ditu gaan chuni'c rnibee lastootu.

<sup>56</sup> Sa'csi narä Xi'n Dios ni gujc Niguui dina niälä te gudzucaä xcäl'nabajñ rebejn. Narä biälä te guslääreni lo dojl.

Dxejcti huijreni garenca guejdx.

*Reni rlajz nirinajl Jesús*

(Mt. 8:19-22)

<sup>57</sup> Lałni sääreni lo nezyuj, biääd te bejn gunii loj Jesús, räjpni:

—Dad, narä rlazä jiädnalä guejblu cadrotis cháä guejblu.

<sup>58</sup> Dxejc badzu' Jesús diidxre lojni, räjpni:

—Rebäjz rajp xpiliääreni, remane' ni rutajt rajp xptiääzreni, niluxh narä Xi'n Dios ni gujc Niguui, dina gapä nicla te lajt cadro guscugä yecä.

<sup>59</sup> Dxejcti räjp Jesús lo stee bejn:

—Gudanajl narä.

Luxh laani räjpni:

—Dad, basaan suchacua'tzxcaä xtadä, dxejcru jiädnalä guejblu.

<sup>60</sup> Dxejc räjp Jesús lojni:

—Basaan suchacua'tz rebejn ni najc si'c bengut, resabengutreni. Per luj, huij, huisule' diidx xcuent xcäl'rnibee Dios.

<sup>61</sup> Dxejc räjp steeni lojni:

—Dad, rlazä jiädnalälu, niluxh basanxgaa chasadixä resa'ä ni tre' rolizä.

<sup>62</sup> Dxejc räjp Jesús lojni:

—Nani ruzuj naani yejc garaad, dxejc rudzuré lojni ruhuiini nez dejtzni di gacdi gunni dzuun lo xcäl'rnibee Dios.

## 10

*Ruxhal Jesús regayonbitzuu*

<sup>1</sup> Che gulujx reni'c, gule Jesús gayonbitzuu bejn, baxhalnireni tio'pgajreni te basniädnireni lojni loj reguejdx cadro nanab tedni.

<sup>2</sup> Räjpni lojreni:

—Guliipacni, cayacduxh cose'ch, niluxh guxii najc rebejn ni gun dzuun gutie'nini. Ni'cni colguiniab lo baxhuaan xten cose'ch te guxhalni xhidajlru bejn ni gun dzuun gutie'xcose'chni.

<sup>3</sup> Colçhäj la'tu; colhuii xho ruxhalä la'tu si'c xiil galäii recuyo't sa'csi sunnäjreni la'tu si'tcisni rlajzreni.

<sup>4</sup> Na'c chanätu ngodx, niclaza guijxh, niclaza xcura'chtu, luxh na'c sudxitu guininäjtu bejn lo nejz.

<sup>5</sup> Cheni jiu'tu rolijz te bejn, ganiddoo colye'tz: “Sucuedxilajz reni rbäjz ree.”

<sup>6</sup> Palga najcni te bejn ni rdxaglaiz yälrbecdxilajz sia'n xcäl'rbecdxilajztu ro'c, luxh palga dini gac, sibi' xcäl'rbecdxilajztu lojtu.

<sup>7</sup> Colçhia'n lagajc rolijz bejn cadro guidzujntu. Ro'c coltajw, colyā'za xhitis ni guniidxreni, sa'csi nani rujn dzuun, riäjł xca'ni xcuent dzuunga. Colçhia'n tejtis lajt dxejtis ni chutu lo guejdxga.

<sup>8</sup> Xhitis te guejdx ni jiu'tu, palga jiureni la'tu, colgajw xhitis ni guniidxreni lojtu.

<sup>9</sup> Colgusiajc rebenracxhuu ni yu' ro'c, colye'tz lojreni: “Abidzujngajxh xcäl'rnibee Dios.”

<sup>10</sup> Palga jiu'tu te guejdx cadro di rlajzreni gucuadiajgreni xtiidxtu, colrrii lo nezyuj, ro'c colye'tz lojreni:

11 “Guxhuj xten lajdxtu ni rcaj ni'nu, rudzu'nuni nez lojtu si'c te seen sa'csi ditu nililajz xtiidxnu. Colgacbee dee, abidzũngajxh xcãlrmibee Dios lojtu.”

12 Ni'cni nriliãpac lojtu, che gac fis xten Dios, nalasru gac fis xten Dios lo guejdxga loj ni gujg guedx Sodoma ni guyu' galoo.

### *Reguejdx ni di niu xtidx Jesucrist*

(Mt. 11:20-24)

13 Rãjpszani:

—jProbe'tu beŋ guedx Corazín! jProbe'zatu beŋ guedx Betsaida! Paru nuhuiu rebenzjzt ni gubajŋ guedx Tiro nãjza Sidón remilaagwr ni benã nez lojtu, pet gucli nusiechljazzeni, niajcwreni ladnagas, nibejzareni lo cobdãj si'c te seen abasiechljazzeni.

14 Che gun Dios fis rextojl rebejŋ guedxliuj, guxiiru gac xfis Dios lo rebenzjzt ni gubajŋ guedx Tiro nãjza Sidón. Fisroru gun Dios reguedx Corazín nãjza Betsaida.

15 Luxh luj guedx Capernaum, rchalolu siãjslu xhaguibaa, alga siajblu gabijlli, cadro gaclu fisro xten Dios.

16 Rãjpszani lo rexejŋpacni:

—Ni riu xtiidxtu, laa xtidxã ni riuni. Nani di jiu xtiidxtu, laa xtidxã ni dini jiu. Luxh ni di jiu xtidxã, laa xtiidx ni baxhãl narã ni dini jiu.

### *Rbi' regayonbitzuu*

17 Che gubi' regayonbitzuu bejŋ nani baxhãl Jesús, rbaduxh lajzzeni, rãjpreni:

—Dad, nãjza rebenãxab rusobdiajg xtiidxnu che rusã'tnu lajlu.

18 Rãjpsz Jesús lojzeni:

—O'n. Ni'cni narã bahuiã che gunijt xcãlrmibee beŋãxab, bitejbni xhaguibaa si'c bianij xten guzii.

19 Colgacbee. Narã runidxã yãlrmibee lojtu te gulãjtu yejc bãl nãjza yejc naxejb; runidxãza yãlrmibee te guntu gaan lo xcãlrmibee beŋãxab. Xhetliidi gun daan la'tu.

20 Na'c guibalajztistu sa'csi rusobdiajg rebenãxab xtiidxtu; colguibalajzru sa'csi acuj lajtu lo xquijtz Dios xhaguibaa.

### *Bibalajz Jesús*

(Mt. 11:25-27; 13:16-17)

21 Lagajc dxejc bibalaznãj Jesús Sprit Dxan xten Dios, dxejc rãjzni lo Dios:

—Rliã'pã xpala'nlu Xtaďã ni rribee xhaguibaa nãjza guedxliuj, sa'csi bacua'tzlu xnezyujlu lo reben nanduxh, per baluiilu xnezyujlu loj rebejŋ ni najc nadolajz si'c te biuxbãz. O'n, Xtaďã, sa'csi si'c rlanjlu gunlu.

22 Guiraa recosre abaniidxlu loã Xtaďã. Dadtis najn chuni'c najc Xi'nni, rutru najndi chu najcni. Rutza najndi chuni'c najc Guejblu Xtaďã, xtebtis narã ni najc Xi'nlu, con rebejŋ ni rlazã gumbee luj.

23 Dxejc bahuui Jesús loj rexejŋpacni, rãjzni lojtisreni:

—Chicbaa la'tu nãjza renani ruhuiu guiraa nani cahulojtu.

24 Sa'csi nriliã lojtu, balti redade' ni gunii xtidx Dios galoo, baltiza rereii rlanj nuhiireni guiraa ni cahulojtu, niluxh direni nuhiireni. Rlazzeni nejŋ diajgzeni rediidxre ni cayejn diajgtu, luxh di diajgzeni nejŋni.

### *Xcuent te beŋhuen ni siããd Samaria*

25 Dxejc huisulii te mastr xten lei, huininãjni Jesús, rlanjzni nuxhiidni Jesús lo xtiidxni, gunabdiidxni lojni:

—Dad, Mastr, çxhini'c nanab gunã te guibanãã Dios par tejpas?

26 Sas räjp Jesús lojni:

—¿Xhini'c caj lo guitz xten leii? ¿Xho rolluni?

27 Dxejc badzu'ni diidxre, räjpni:

—Chanälajzlu Dad, Xtioslu guideb lastoolu, guideb xaimlu, guideb xtijplu, näjza guideb xcäriejnlu. Huinälajzza resa'lu si'ctis ni sanälajzlu lagajc luj.

28 Dxejc räjp Jesús lojni:

—O'n, laaca rudzu'lu diidx. Palga gunlu si'c, sajplu yäl'nabajñre.

29 Per maestr xten leii, rlanjni nidedbiani ni'cni gunabdiidxni loj Jesús räjpni:

—¿Chuni'c najc resa'ä?

30 Dxejc räjp Jesús lojni:

—Te ben laadxnu birii guedx Jerusalén, sääni guedx Jericó. Dxejc lo nezyuj biricaj gaii gubaan, gulajnreni guiraa xhixtenni, näjli xhajbni ni najcwni. Sas gudijnrenini, basa'nrenini ro'c, guxii cayäädx nugu'trenini.

31 Gudejd te bixhojz ni siääd laadxnu, sazaj lagajc nezyujga, cheni bahuiini lojni, alga gudejdni stee laad, sä'tini.

32 Gudejdza te levita, bejn ni rujnza dzuun neñ guidoo. Che bidzujñni cadro naga' bejnğa, gudejdni stelaad, sä'tini.

33 Dxejcti te beñ Samaria, lałni sääni biaj, gudejdni nezyujga, bidzujñni cadro naga' bejnğa. Che bahuiini lojni, balaslajznini.

34 Gubigni loj bejnğa, basälni se't näjza bin loj bejn ni nadxälguijdx, dxejc batejbnini te la' lajd. Dxejc bascuijbnini dejt lagajc xmanni, huinänini cadro rudedlaareni yu', ro'c cuanäjnini.

35 Che bara yääl, gulääni tio'p meel badeedni lo baxhuaan yu'ga. Dxejc räjpni: “Cuanälaa bejnre; palga gunijtrulu, siguixätini lojlu che guibi'ä.”

Sä'tini.

36 Dxejc räjp Jesús lo maestr xten leii:

—¿Chu tej lo guidxoñ rebejnğa najc si'c sa' xten dade' ni biajb ladzña gubaan?

37 Dxejc räjpni loj Jesús:

—Ni balaslajz bejnğa.

Dxejc räjp Jesús lojni:

—Huij te sigajcza chayejnlu.

### *Bidzujñ Jesús rolijz Mart näjza Marii*

38 Lałni huinuu xnezyujni, bidzujñni te guejdx. Ro'c bidxaagni te gunaa ni laa Mart ni huinänini rolijzni.

39 Yu' te bäjł Mart ni laa Marii, luxh laani gurejni cuä' ni' Jesús te cacuadi-ajgni xtiidxni.

40 Mart cagusquejñni cayujñni xhi gaureni. Sas gubigni loj Jesús, räjpni lojni:

—¿La dilu jiu rusanxteb bälä narä te xtebä cayunä remandaad? ¡Gojs lojni gacnäjnini narä!

41 Dxejc räjp Jesús lojni:

—Mart, Mart, cayuduxhlu yärsia', riulu xhidajł cos,

42 luxh yu' tejtis ni nanabpac. Agule Marii ni najc huenru, rut sajcdi gudzucajnini lojni.

## 11

*Rului Jesús xho guiniabni lo Dios  
(Mt. 6:9-15; 7:7-11)*

<sup>1</sup> Te huält cabedx-canab Jesús loj Xtadni Dios, suga'ni te lajt. Che gulujx cabedx-canabni, gunii te xpejn̄pacni lojni, rājpn̄i:

—Dad, baluui nurnu xho cuedx-guiniabnu lo Dios, si'c baluui Juan ni batiobnis rexpejn̄pacni.

<sup>2</sup> Dxejc rāj̄p Jesús lojreni:

—Che cuedx-guiniabtu lo Dios, scree col̄ni:

Xtadnu ni yu' xhaguibaa, suchā'p xpala'nlu, sujiāād xcāl̄rnibeelu.

Sugac si'ctisni rlaizlu gac lo guedxliuj si'cpac rajcni xhaguibaa.

<sup>3</sup> Guira dxej baniidx xcu'nnu si'ctis ni rquiinnuni.

<sup>4</sup> Basiāj̄l lajzlu redojl̄ xtenu si'cni riāj̄l lajznu redojl̄ ni rujn rebejn̄ loonu.

Na'c gusaanlu jiajbnu lo xcāl̄rnibee beṅdxab.

Bas̄laa nuurnu lo dojl̄.

<sup>5</sup> Dxejc rāj̄pza Jesús lojreni:

—Paru tejt̄u yu' te xamiigw̄ni, luxh guidzuj̄ni rolijz̄ni garol yāäl, gābni: “Xamigwā, banidxlaa choṅ yāt̄xtiil,

“sa'csi bidzuj̄n te xamigwā rolizā ni bazaj biaj, luxh xhet ra'pādi te gudedā xhi gauni.”

<sup>7</sup> Xhixh sinii ni naga' neṅ xyu'ni, gābni: “Na'c riādtie'chlu bacal̄ loä. Niāu rolā' luxh rexi'nā naga' cuā'ā, digacdi chāstieā te gunidxā xhi gunidxā lojlu.”

<sup>8</sup> Rniliā lojtu, mase dini chastie te gudeednini sa'csi najcni xamiigw̄ni, sisteni, sudeedni nani rquiintisni te na'cru gutie'chni bacal̄ni.

<sup>9</sup> Sigajcza rniā lojtu, palga guiniabtu xhi guiniabtu, sica'tuni. Palga chatiiltu xhi chatiiltu, sidxāltuni. Palga chasejz̄tu rolā', suxhalreni rolā' lojtu.

<sup>10</sup> Sa'csi chutis ni rniab, rca'ni nani rniabni; chutis ni rguuil xhi cos, rdxālnini; nani rusejz̄ rolā', suxhalzaren̄i lojni.

<sup>11</sup> “Paru tejt̄u ni najc dad, jiāād te xi'ntu guiniabni te yāt̄xtiil lojtu, ḷla sudeedtu te guij, ā? O palga guiniabni te bāj̄l, ḷla sudeedtu te bāj̄l, ā?”

<sup>12</sup> O palga guiniabni te tzutbejt̄, ḷla sudeedtu te naxejb, ā?

<sup>13</sup> Palga la'tu, ni najc beṅdojl̄, rajc rudeedtu cossa'c loj rexi'ntu, aticaxh Dios ni yu' xhaguibaa sudeedni Sprit Dxaṅ xtenu loj renani rniabni lojni.

*Rucuaquijreni Jesús, rniireni rajpni yāl̄rnibee xten beṅdxab  
(Mt. 12:22-30; Mr. 3:19-27)*

<sup>14</sup> Gulāā Jesús te beṅdxabgop lastoo te bejn̄. Che birii beṅdxabga lastoo bejnga, guslogajc canii bejnga, dxejc bidxeloduxh rebeṅ xhidaalga.

<sup>15</sup> Dxejc yu' reni rāj̄p:

—Niguiire rbāā rebeṅdxab con yāl̄rnibee Xten Beelzebú ni rnibee loj rebeṅdxab.

<sup>16</sup> Sgaiireni rlaiz guquiilrenini, ni'c canabreni gunni te seen ni siāād xhaguibaali.

<sup>17</sup> Niluxh laani gucbeeni xhi xhigab cayuj̄reni dxejc rāj̄pni lojreni:

—Xhitis gubieer ni rlia' sa'ni lo sa'ni, luxh til̄nāj̄ te cuaani stee cuaaga, di gaḷlaa sinij̄t gubierga lo guedxliuj. Palga te famiḷ rdil̄nāj̄ lagajc sa'ni, di gaḷlaa sinitloj famiḷga.

<sup>18</sup> Palga guiliā' sa' rebēṅdxab, ḷxho mood chanuu xcāl̄rnibeereni? Dee rniā sa'csi la'tu rniitu narā rbāā rebeṅdxab con lagajc yāl̄rnibee xten Beelzebú.

<sup>19</sup> Palga si'c najcni, ḷchuni'c rudeed yāl̄rnibee loj rexpej̄ntu te rbāāreni beṅdxab? Lagajc laareni ruluui xhet laadi ruj̄ntu xhigab.

<sup>20</sup> Palga narā rbāā rebeṅdxab con xcāl̄rnibee Dios, ni'cni ruluiloj abidzuj̄n xcāl̄rnibee Dios lojtu.

21 'Cheni suga' te beṇḁaan, ca'ni guiib, canājni rolizni, rutliidi ruhuaḁdi rehxixtenni.

22 Niluxh che jiāād stee ni nadipru lo beṇḁaanga, rudxagdijḁnini, rujnni gaanni, dxejc rudzucajni xquiibni ni badeed yāḁbeṇḁaan lojni, dxejc sajc chanāni guiraa rehxixtenni.

23 Reni xhet yu'di xladā, rdxec'hreni loā. Ni di gutopnāj narā, rutie'chni.

24 Rājḁzani:

—Cheni rii te beṇḁxab neṇ lastoo te bejṇ, ricansajni nez lo reyubijdz, cagui-  
ilni cadro gusilajzni. Che cad rdxāḁdini, rujnni xhigab, naani: “Guibisacā  
rolizā cadro biriā.”

25 Cheni guibi'ni, rdxāḁni lastoo bejṇga si'c te yu' ni entis gulujx bilioobni, suchesa'cni.

26 Dxejcti rixiini sgajdz beṇḁxab ni rujnru latsiaj lojni. Dxejc riu'reni neṇ  
lastoo bejṇga, dxejc nalasru riā'n bejṇga loj ni gujḁni galoo.

### *Chicbaa renani riu xtidx Dios*

27 Laḁ ni canii Jesús rediidxre, te nane' ni yu' lo rebeṇ xhidaalga dipli  
guniini, rājḁni:

—iChicbaa nan ni biāḁnālu guedxliuj! Chicbaaza nani baḁḁaa luj.

28 Luxh laani rājḁni:

—Xhet si'cḁi najcni; chicbaaru rebejṇ ni rucuadiajg xtidx Dios, ni ru-  
zoobza xtiidxni.

### *Rebeṇḁujdx rniab te milagwr si'c te seen*

*(Mt. 12:38-42; Mr. 8:12)*

29 Sanuutis cadojḁ rebejṇ gabi Jesús, dxejc guslojni caniini, rājḁni:

—Rebejṇ ni yu' ṇaj beṇḁuidxduxhrenei, rniabzareni te milaagwr si'c te seen;  
niluxh xhetru seendi fiireni, seentis xten Jonās, dade' ni gunii xtidx Dios  
galoo fiireni.

30 Lagajc si'c ni gujḁ Jonās te seen loj rebejṇ guedx Nīnive, si'cza narā, Xi'n  
Dios ni gujḁ Niguii, gacā te seen lo rebejṇ ni nabajṇ ṇaj.

31 Cheni guidzujṇ dxej ni gac fis sistie te nane' ni gujḁ rein lo reyuj ni tre'  
ladbājgw, sucuaquijni rebejṇ ni tre' guedxliuj ṇaj sa'csi laani biriini zitduxh  
te bacuadiajḁpacni yāḁṇajṇ xten Salomón. Ree suga' galāiitu tej ni sacduxhru  
lo Salomón,

32 luxh ditu chalilajx xtiidxni. Rebejṇ ni gulājx guedx Nīnive sisiunāj  
rebejṇ ni nabajṇ ṇaj neṇ redxej ni gac fis. Dxejc sucuaquijrenei rebejṇ ni  
nabajṇ ṇaj sa'csi laareni, che huināli Jonās xtidx Dios lojrenei, basiechḁajzrenei,  
basa'nreni xtojḁrenei. Ni suga' lojtu ṇaj sajcruni lo Jonās, niluxh ditu jiu  
xtiidxni.

### *Ni rusanij xcāriejṇ bejṇ*

*(Mt. 5:15; 6:22-23)*

33 Rājḁzani:

—Rut rucuaguijdi te bajl, te gusuḁnini te lat xhigat'z, niclaza neṇ te caj.  
Susujni bajḁga jiaa te rajc ruhuisa'c chutis ni riu' neṇ yu'.

34 Balojlu najc si'c bajl xten xcāriejṇlu. Palga ruhuisa'c balojlu, guideb  
xcāriejṇlu yu' si'c bianij. Palga rajc balojlu dilu fisa'c, guideb xcāriejṇlu yu'  
si'c lo nacājy.

35 Gunatiro te di gac xpianijlu yāḁnacājy.

36 Palga guideb xcāriejṇlu yu' bianijtis, xheti te lajt nacājy, sajc fisa'clu  
guira'ti, si'c najc che rusanij te bajl neṇ yu'.

*Rucuaquij Jesús refarisee nájza rebejn ni najn leii*  
(Mt. 23:1-36; Mr. 12:38-40; Lc. 20:45-47)

37 Che gulujx gunii Jesús, biädgajñ te farisee Jesús cháäni rolizjni te chatajwni. Sä'tireni. Che biu' Jesús, gurejni lo mex.

38 Bidxeloy fariseega sa'csi dini niguiib naani si'cpac caj lo xleii Moisés gunreni te gaureni, sa'csi rujnreni xhigab si'c racnayareni lo Dios.

39 Dxejcti räjp Jesús lojni:

—La'tu ni najc refarisee, rguiibtu nez dejtz te bas nájza te pla't, niluxh la'tu guidxa lastootu yälgubaan nájza yällatsiaj.

40 ¡Ben nadduxh! ¿La ditu gacbee? Nani benchee dejtzni, bencheeza neñni.

41 Colyajc nadolajz, colyacñaj rebejn con ni rniitu, dxejc guiraa recos sajc naya par la'tu.

42 ¡Probe'zatu, ben farisee! Rudeedtu lo Dios tej lo tejga tzuu ni rajptu: rudeedtu bedzxtiil nájza ruud, naj guiraa recuane' ni rajptu lo le', niluxh ditu jiu xcälguxhtis Dios nájza xcälrinälajz Dios. Dee nanab guntu ganid, luxh na'cza gusaantu guntu ni alacayujntu par Dios.

43 ¡Proobza la'tu reben farisee! Rchagljajztu rbejtu lo reyagxhil xten rebejn ni sajc neñ reguidobáz, rchagljajztu saru rni rebejn “xchan Dad” lojtu che rijtu lo guii.

44 ¡Probe'zatu! La'tu najctu si'c rebaa ni di guzen, rsiaj rebejn yejc cadre naga'reni luxh direni gan.

45 Dxejcti badzu' tej rebejn ni ruluii leii diidxre lojni, räjpni:

—Dad mastr, che rniilu rediidxre, rniyajlu nuurnu.

46 Dxejc räjp Jesús lojreni:

—¡Probe'za la'tu rebejn ni ruluii leii! Sa'csi rnibeetu gun rebejn recos naganduxh ni najc si'c te cargw naduxh ni di gacdi guu bejn. Luxh la'tu di rlajztu fal'tuni nicla con te bicuenábäztu.

47 ¡Proobzatu! Sa'csi runcheetu xpa redade' ni gunii xtidx Dios galoo, luxh najctu rexajg renani bagu't redade'ga.

48 Ni'cni najnpacktu xhi gusajcreni, rchagljajzatu redzuun ni bejn retoxtad-goldootu; si'cza gunnäjtu nará sa'csi laareni bagu'treni redade'ga, dxejc la'tu runcheetu xpaareni.

49 Ni'cni gunii Dios, sa'csi yuduxh xcälñajnni, räjpni: “Suxhalä reniguii ni guinii xtidxá nájza reapost, luxh sugu'treni gaiireni, susacsízareni sgaiireni.”

50 Loj rebejn ni nabajñ naj siniab Dios gudeedreni cuent xcuent xtiejn guiraa redade' ni gunii xtidx Dios ni bagu'treni cheni guc-cheeli guedxliuj.

51 Guislojni xtiejn toAbel, nájza xtiejnli Zacarias ni bagu'treni galäi nez lodxan neñ guidoro. Ni'cni rniä lojtu, siniab Dios cuent xten xcälgujt guiraareni loj rebejn ni nabajñ naj.

52 ¡Probe'za la'tu, rebejn ni ruluii leii! Sa'csi rniitu la'tistu rajptu yälñajn, luxh di rlajztu chalilajztu xtidx Dios, dizatu gusaan chalilajz rebejn ni rlajz chalilajz xtidx Dios.

53 Cheni räjp Jesús rediidxre, bidxe'ch rebejn ni ruluii leii nájza refarisee lojni. Dxejc guslojreni canabdiidxreni xhidalduxh diidx,

54 te cagula'tzreni don la sajc guiga'ni lo xhitis te diidx ni guiniini.

## 12



1 La<sub>1</sub> ni caniini, bidojp xhidajl mi<sub>1</sub> bejn ro'c, calaro'li sa'reni. Dxejc gusloj canixгаа Jesús loj rexpeljpacni, rájpmi lojreni:

—Colnati levaduur xten refarisee, rusgueereni rniitisreni xhidajl diidx luxh direni gunni.

2 Sa'csi xheti xhi niáu lojni ni di guxal lojni luxh xheti xhi naga'tz ni di jienloj.

3 Ni'cni guiraa ni guniitu lo nacäy, sien<sub>1</sub>ni lo bianij xten dxej. Luxh ni gunii xhiga'tztu nen reyu' ni niäudz'u'tz, sibedxa'renini rediidxga yejcli reyu'.

*Chuni'c nanab guidxejbtu*

(Mt. 10:28-31)

4 Rájpmi:

—Rniä lojtu, xamigwä, na'c guidxejbtu rebejn ni sajc ju't tiejxhtu, dxejc xhetru sajdi gunreni.

5 Guiniä lojtu chuni'c nanab guidxejbtu. Colguidxejb nani che abadzucajni yäl<sub>1</sub>nabajn rajpmi yäl<sub>1</sub>rnibee gusäl<sub>1</sub>ni la'tu gabijl lo bajl ni cayejc par tejpas. Ni'csii colguidxejb.

6 'Anajntu sajc jio' gatii mane' tio'p melbáz, luxh di Dios jiällajz nicla tej remane'ga.

7 Rexguidxejctu abigab tebgajni. Na'c guidxejbtu; la'tu sajcrutu loj xhidajl remane'ga.

*Reni riembee Jesús nez loj rebejn*

(Mt. 10:32-33; 12:32; 10:19-20)

8 Rájpmi:

—Rniä lojtu, guiraa rebejn nani rcäjp rililajzni xtidxä nez loj rebejn, narä Xi'n Dios ni gujc Niguii sicäpä najcni xpenä nez loj rexangl Dios.

9 Luxh reni di guicäjp rililajzni xtidxä nez loj rebejn, sigajcza sunnääni nez loj rexangl Dios xhaguibaa.

10 'Chutis ni guinii te didxnaj xcuentä, susiäjllajz Dios laani. Niluxh chutis ni guiniyaj Sprit Dxaan xten Dios, di Dios gusiäjllajz xtojlni.

11 'Cheni chanäreni la'tu nez loj reben guidobáz o nez loj reguxhtis, na'c guntu xhigab xhi gudzu'tu diidx o xhini'c guiniitu,

12 sa'csi che guidzujn or ni guiniitu, Sprit Dxaan xten Dios suluiini xhini'c guiniitu.

*Reyäl<sub>1</sub>nasa'c rusajb bejn nen dojl*

13 Te niguii ni nadxaag rebejn xhidaalga rájpmi loj Jesús:

—Dad, Mastr, gojs lo betzä guniidxni gala' xhixtenä ni basa'n toxtadnu loonu.

14 Dxejc rájpmi Jesús lojni:

—Dade', ¿chuni'c gule narä gunä yäl<sub>1</sub>guxhtis o gacä abogaad lojlu, ä?

15 Dxejc rájpmi Jesús lojreni:

—Colnatiro, colgantz'u' te di rlaiztistu ga'ptu yäl<sub>1</sub>nasa'ctis sa'csi xcäl<sub>1</sub>nabajn bejn dini gac yäl<sub>1</sub>rajptis xhidajl xhi cos.

16 Dxejcti bij Jesús te cuent, rájpmi lojreni:

—Guyu' te bejn rapduxh. Racduxh cose'ch lo rexcäjlni.

17 Dxejcti gusloj bejn<sub>1</sub>ni xhigab: “¿Xhocha gunä? Dina gapä cadre cucheä recose'ch.”

18 Sas bejn<sub>1</sub>ni xhigab: “Ananä xhini'c gunä. Gudzulä reyu' cadre rgucheä recose'ch, te gustiobä reyu'ga, te ro'c cucheä guiraa recose'ch näjza rehxixtenä.”

<sup>19</sup> Dxejcti siniä lo lastoä: “Lastoä, agulucheelu xhidajl xhi cos, sajlni xhidajl ijz. Basilajz naj, gudajw, gu', bibalajz.”

<sup>20</sup> Dxejc räjp Dios lojni: “¡Ben najd! Lagajc guxhijñre siniabä xaimlu. ¿Dxejca'? ¿Chu xca' guiraa recos ni gulucheelu?”

<sup>21</sup> Si'c sisiajc guiraa rebejn ni rguiltis xcäl'nasa'creni lo guedxliujre, niluxh xhet rajpdireni loj Dios.

### *Rcanäj Dios rexi'nni*

*(Mt. 6:25-34)*

<sup>22</sup> Che gojl stera't, räjp Jesús loj rexpejn'pacni:

—Ni'cni rniä lojtu, na'c rujntu xhigab xcuent xho guibajntu o xhini'c gautu te guibajntu, niclaza xcuent lajd ni gacwtu.

<sup>23</sup> Yäl'nabajñ sajcruni lo yäl'rajw; tiejxhni sajcruni lo lajd ni rajcw bejn.

<sup>24</sup> ¡Colhuii rebaloo! Direni cue'c binij, dizareni gutojp cose'ch, dizareni ga'p nicla yu' nicla te cadro chuchee cose'ch, per rudeed Dios xhi rajwreni. ¿La xhet sajcdirutu loj rebalooga, ä?

<sup>25</sup> Luxh ¿Chu tejtü palga runduxhni xhigab sajc tioobruni sgarol metr'?

<sup>26</sup> Palga di gacdi guntu nicla te cosbäz, ¿xhiciuent ru'tu yärsia' xcuent xhi stee cos'?

<sup>27</sup> ¡Colhuii xho rga' reguino'ch! Direni gun dzuun, dizareni gun lajd lo dzujb, luxh rniä lojtu, nicla reii Salomón con guiraa xcäl'nasa'cni, dini nisiuchee si'c rsiuchee reguiiga.

<sup>28</sup> Palga rusuchee Dios recuaan ni rga' lo niaa, ni rial nadxej, luxh guixee-huijdx, che agubijdzni, rejcní lo däj, aticaxh Dios suniidx xhi gacw la'tu, ¡bejn nani guxii rililajz!

<sup>29</sup> Ni'cni rniä na'c runtejtü xhigab xho quiiltu xhini'c gautu, xhini'cza yätu, na'c chutistu yärsia'.

<sup>30</sup> Si'ctis rujñ rebenguedxliuj guideb xtijpreni rguilreni rexhicosre. Niluxh xtadtu ni yu' xhaguibaa anajñni xhini'c rquiintu.

<sup>31</sup> La'tu colquiiltis xcäl'rnibee Dios, dxejcti laani suniidxzani guiraa recos ni rquiintu.

### *Yäl'nasa'c ni yu' xhaguibaa*

*(Mt. 6:19-21)*

<sup>32</sup> Räjpszani:

—La'tu ni najc rexilä'ä, na'c guidxejbtu, sa'csi rbaali lajz Dios, aguleni la'tu te la'tu guntu yäl'guxhtis lo xcäl'rnibeeni.

<sup>33</sup> Colguto' xhixtentu, colgudeedni loj rebejn ni caquinduxhni, te si'c guntu te bols ni di jiuixh, te chu yäl'nasa'c neñni xhaguibaa cadro di gubaan jiu' niclaza xcabäj rexhicos.

<sup>34</sup> Sa'csi cadro rajptu xcäl'nasa'ctu, ro'cza yu' lastootu.

### *Nanab susintu*

<sup>35</sup> Räjpszani:

—¡Col'susin! ¡Col'hualguij rebajl!

<sup>36</sup> Col'yujñ si'c remos ni cabäjz guibi' xlamreni ni sää te sa', te cheni guibi'ni guxhalgajcreni rolä'.

<sup>37</sup> Chicbaa remos ni susin che guibi' xlamreni. Rniliäpac lojtu, lagajc xlamreni sajcnwi xhajbni sibe'cni rexmosni lo mex, dxejc lagajc laani sudeedni xhi gaureni.

<sup>38</sup> Mase guidzujñni garol yääl, mase guidzujñni cäjyru, palga guidxälñi arexmosni susin, ¡chicbaa remosga!

39 Colyacbeepac, paru gacbee baxhuaan xten yu' xhi or guidzujñ gubaan rolijzni, dini gusaan guxhalreni rolijzni te cuanreni xhixtenni.

40 Nájza la'tu col̄susin, sa'csi or ni ditu gun xhigab jiädni, sidzujñ Xi'n Dios ni gujc Niguii.

*Te mos gujdx*

(Mt. 24:45-51)

41 Dxejc gunabdiidx Pedr lojni, räjpni:

—Dad, ¿la lootisnu rujylu cuentre o la najcni par guiraa rebejn?

42 Dxejc räjp Jesús lojreni:

—¿Chuni'c najc mos hueen, mos nasin, ni rusannäj xlamni guiraa rexmosni te gudeedni xhi gaureni che gal oor, ä?

43 Chichaa mosga palga laaca cayujñni che guibi' xlamni.

44 Rniliápac lojtu, lamga sudeed guiraa rexhixtenni te xcanäj mosgani.

45 Per palga gun mosga xhigab nen lastooni: “Saclaa guibi' xlamä”, sas guislojni gusacsini resamosni, gunaa sigajc niguii, dxejc guisloj gauni, yäni, soozni;

46 sibi' xlamni te dxej ni xhet cabäjzdinini, or ni dini gun xhigab guidzujñni. Dxejc sii sudeedni te castigwro lojni, sutiäjlni te duu dejtzni dxejc sinibeeni jiini, guidxaagni rebejn ni di gusobdiajg diidx.

47 Mosga ni najn xhini'c rlajz xlamni gac, luxh dini susin, dizani guzoob xtiidxni, sutiälduxhrene duu dejtzni.

48 Niluxh mos ni di gan xhi rlajz xlamni gac, ni'c rujñni redzuun ni di xlamni guidxaglaiz gac, guxiiru castiigw gacni. Reni rca' xhidajl, xhidajlza riäjl gudeedreni; loj reni rca' yälrnibeduxh, xhiroobza siniabni lojni.

*Rlia' Jesús bejn lo sa'ni*

(Mt. 10:34-36)

49 Räjpza Jesús:

—Narä biälä te gucuaguia guedxliujre; ¡malai alagusloj cayejcni!

50 Niluxh nanab tedä te yälrobnis ni säloj te trabajwduxh, ni'c cayuduxhä yärsia' cheni chale'lini.

51 ¿La rujntu xhigab biälä te jiädnaä yälrbedxi loj guedxliuj, ä? Rniä lojtu, dini gac si'c. Alga biälä te guilia'ä bejn lo sa'reni.

52 Silia' sa' te famil; loj gaiireni, sidxe'ch choñreni loj tio'preni, luxh tio'preni sidxe'chza lo choñreni.

53 Silia' sa'reni; sidxe'ch dad lo xingaanni, luxh xingaanga sidxe'chza lo xtadni; nane' sidxe'ch lo xindxa'pni, luxh xindxa'pga sidxe'chzani lo xnanni; nansuegr sidxe'chni lo xculijzni, luxh gulijzga sidxe'ch lo xnansuegrni.

*Reseen xten retiemp*

(Mt. 16:1-4; Mr. 8:11-13)

54 Caniiza Jesús lo reben xhidajlga, räjpni:

—Cheni rhuiitu räjs reza nez lad jiät, rniitu: “Siajb nisguij.” Luxh riajbni.

55 Che rbi' bej nez lad danbägw, rniitu: “Sacnalaa nadxej”, luxh si'c rajcni.

56 ¡Bejn ni rusguee! La'tu racbeetu xhi säloj reseem ni rien lo guedxliuj nájza xhaguibaa, ¿xhicuent ditu gan xhi säloj retiemp ni dxunnu naj, ä?

*Basiäj diidx con rebejn ni rdxe'ch lojlu*

(Mt. 5:25-26)

57 Räjpzani:

—¿Xhicuent ditu quiil lagajc la'tu xhini'c najc hueen, xhini'c najc laaca te guntuni?

<sup>58</sup> Sa'csi palga yu' chuni'c chale'c xquejlu lo guxhtis, lałni sanāni luj ro jusgaad, basiājł diidx con laani lo nejz, te na'c chanāni luj lo reguxhtis, sa'csi dxejc reguxhtis sutedreni luj lo reguixhajg te gusaureni luj nen latzguiib.

<sup>59</sup> Luxh rniā lojlu, dilu guirii ro'c hasta gusa'lu quixlu guiraa lojreni.

## 13

### *Colgusiejch lajztu te di guettu*

<sup>1</sup> Lagajc dxejc, gubig gaii reni huisa'nreni diidx loj Jesús xcuent gaii ben Galilee ni bagu't Pila't nen guidoo, bagu'chni xtiejnreni con xtiejn reman ni siādnāreni si'c gojn lo Dios.

<sup>2</sup> Sas rājp Jesús lojreni:

—ŁLa rujntu xhigab si'c gusajc reben Galileega sa'csi najcrueni beņdojł lo rebejn lajdxreni?

<sup>3</sup> Narā rniā, dini gac si'c. Palga di'tu gusiechlajz sigajcza sejt guiragajctu.

<sup>4</sup> O xcuent guitzunchon rebejn nani gujt che gubixh te or ni laa Siloē yejcreni, ŁLa rujntu xhigab najcrueni beņ dojł lo rebejn ni rbājz guedx Jerusalén, ā?

<sup>5</sup> Narā rniā, dini gac si'c. Palga di'tu gusiechlajz, sigajcza sejt guiragajctu.

### *Xcuent te yag iigw*

<sup>6</sup> Dxejcti gusloj bij Jesús te cuent ni ruluiini lojreni, rājpni:

—Te dade' gojp te yagiigw ni basujni lo xyujni. Sas huihuiini don la caj ninejxh lojni. Luxh xhet ninejxhdi bidxālmi.

<sup>7</sup> Dxejc rājpni loj bejn ni canāj xyujni, agujc chon ijz siādtiā ninejxh lo yajgre, luxh xhetini. Batin yajgre. iXlia'si sujni lo yuj!

<sup>8</sup> Luxh xmosni rājp lojni: “Dad, basaanni steb ijz, guslaā yuj ni'ni, gusālā abonni.

<sup>9</sup> Palga xcaj ninejxh lojni steb ijz, laaca, palga dini xcaj, dxejc guitinnuni.”

### *Rusijc Jesús te gunaa*

<sup>10</sup> Te dxej ni rusilajz rexpejn Israel caguluii Jesús nen te guidobāz.

<sup>11</sup> Ro'c suga' te nane' ni agujc tzunchon ijz racxhuuni. Beņdxab cagusoodni, niluxh di gacdi suliini.

<sup>12</sup> Che bahuii Jesús lojni, gurejdxnini, dxejc rājp Jesús lojni:

—Gunaa, abasaan yālguijdxga luj.

<sup>13</sup> Che basujni naani yejcn, lagajc dxejc gujc gusulii nane'ga. Dxejc guslojni calā'pni xpala'n Dios.

<sup>14</sup> Luxh dade' ni rnibee guidobāz bidxe'chni sa'csi basijc Jesús nane'ga che najcni dxej ni rusilajzreni, ni'c gusloj cayājpni loj rebejn:

—Xho'p dxej sajg gun bejn dzuun; nen redxejga sajg jiāđtu te jiajctu, per na'c jiāđtu dxej ni rusilajz rexpejn Israel.

<sup>15</sup> Dxejc badzu' Jesús diidxre, rājpni lojni:

—ŁBen rusguee! ŁLa di chutis tejt guxhec xconni o xpurni te chanānini yāni nis, mase najcni dxej ni rusilajz bejn, ā?

<sup>16</sup> Luxh nane're najc te xagdoō toAbram, nani numbee Dios, ni agujc tzunchon ijz baliib beņdxabni, Łla digacdi guixecni lo xcālguijdxni mase najcni dxej ni rusilajz bejn, ā?

<sup>17</sup> Che gunii Jesús rediidxre, bianxtujy rebejn ni rdxe'ch loj Jesús, luxh reben xhidaalga cabalazduxhreni sa'csi cayujn Dios redzunro nez lojreni.

### *Xcuent bedz muxhtas*

(Mt. 13:31-32; Mr. 4:30-32)

18 Ni'cni räjp Jesús lojreni:

—¿Xhocha najc xcäl̄rnibee Dios? ¿Xhicha cojn guiniä najcni tebloj?

19 Najcni si'c te bedz muxhtas ni rbe'c te bejn lo xyujni. Luxh che guiroobni, rajcni te yagro. Dxejc riääd remane' ni rutajt siädyunchee xpitiääzni loj rexhajcwni.

*Xcuent cojb ni rusaguij*

*(Mt. 13:33)*

20 Guniiza Jesús stehuält te gacbeereni xho guire'ch rextidx Dios. Räjpni lojreni:

—¿Xhicha cojn guntebloä xcäl̄rnibee Dios?

21 Najcni si'c levaduur ni rugu'ch te gunaa lo choñ mediid arin, luxh rusaguijni guiraa cojbga.

*Dää rolä' cadre jiu'ni xhaguibaa*

*(Mt. 7:13-14, 21-23)*

22 Huinuu Jesús xnejzni sääni guedx Jerusalén. Lañni sadejdni reguejdx näjza renench caguluiini rebejn.

23 Dxejc gunabdiidx te bejn lojni, räjpni:

—Dad, ¿la guxii najc rebejn ni cañaa loj rextojlreni, ä?

Dxejc räjpni lojreni:

24 —Dää rolä' cadre jiu' bejn xhaguibaa. Ni'cni coltip lajztu te jiu'tu ro'c, sa'csi xhidajl bejn rlanj jiu'reni ro'c, niluxh direni gun gaan.

25 Cheni abasäu baxhukaan xten yu' rolä', dxejc la'tu ni suga' detz yu' guisloj gusejstu rolä', guiniitu: “Dad, baxhal-laa rolä’”, dxejc laani sudzu'ni diidx, siniini: “Dina ganä caro siäädту.”

26 Dxejc guislojtu guiniitu: “Bidxunnäanu, bidaunäanu, bidunnäanu luj, baseedlu nuurnu lo xnezyuunu.”

27 Dxejc siniini lojtu: “Rniliä lojtu, dipacnä gumbeä la'tu. Coljij guiraatu, benlatsiaj.”

28 Dxejcti sonduxhtu, chubejli läjytu che fiitu abiu' toAbram, con toIsaac, con toJacob, näjza guiraa redade' ni gunii xtidx Dios, suga'reni lo xcäl̄rnibee Dios xhaguibaa, luxh la'tu di gacdi jiu'tu.

29 Dxejga sidzujñ xhidajl benzijt ni siääd ladjiaa, ladjiaät, ladbäjäw, näjza ladbee, te jiu'reni lo xcäl̄rnibee Dios xhaguibaa, ro'c sibejzarení lo mex.

30 Luxh yu' reni rujntu xhigab guxii sajcreni naj, sacduxhrene dxejc. Yu'za reni rchalotu sacduxh naj, xhet sajcdireni dxejc.

*Jesús biin xcuent guedx Jerusalén*

*(Mt. 23:37-39)*

31 Lagajc dxejga, bidzujñ gaii refarisee, räjpreni lojni:

—Huij, biunejz ree, sa'csi Herodes rlanj ju'tlu.

32 Dxejc laani badzu'ni diidxre lojreni, räjpni:

—Gojz lo bájzga, beñ rusguee: “¡Bahuii! cabää rebeñxab lastoo rebejn, cagusiäcä rebejn ni racxhuu nadxej näjza guixee, luxh huijdxli guluxä xtzunä.”

33 Niluxh mase si'c gacni nanab chanuä xnezyuä nadxej näjza guixee, huijdx, sa'csi di gacdi guet te dade' ni rnii xtidx Dios ste'ca guejdx, guejdxitis Jerusalén sajc guetni.

34 ¡jProbe'tu, la'tu beñ Jerusalén! Rugu'ttu redade' ni riädni xtidx Dios lojtu, rucuaazatu guij yejc rebejn ni ruxhal Dios lojtu. Balti huält rlanzä nuchagä sa'tu si'c ruchagsa' te guidco'c rexquidbäzni lajd xhigani, niluxh ditu nicäjp.

<sup>35</sup> Bahuii xho bianxteb xquidootu. Ni'cni arnixgaä lojtu, dirutu fii loä cheni guidzujñli dxej ni guiniitu loä: “Chicbaa ni siääd xcuent Dios.”

## 14

### *Rusiajc Jesús te bejn ni guidxa guij*

<sup>1</sup> Che gojl te dxej ni rusilajz rexpejn Israel, huitajw Jesús rolijz tej ni rnibee loj refarisee. Cagula'tz gaii refarisee, guidon xhini'c gun Jesús,

<sup>2</sup> sa'csi nez loj Jesús suga' te dade' ni guidxa guij tiejxhni.

<sup>3</sup> Dxejc gunabdiidx Jesús lo rebejn ni ruluii leii nájza lo refarisee, räjpni lojreni:

—¿La sajc gusiajcní te beñracxhuu dxej ni rusilajz bejn o la di gacdiní?

<sup>4</sup> Per laareni dxitis suga'reni, niäutis ro'reni. Dxejc cua' Jesús beñracxhuuga, basiajcnini, gunibeezani biunejzni.

<sup>5</sup> Dxejc räjpni loj refarisee:

—Chu la'tu ni rajp te bur o te gon, palga jiajbni nen te bisie, ¿la ditu chalägajcni mase najcni dxej ni rusilajz bejn, ä?

<sup>6</sup> Dxejc di niajcní nudzu'reni diidx lojni.

### *Reni bidon cháä sa'*

<sup>7</sup> Cheni bahuii Jesús xho rchaglajz rebejn rbereni latsa'c te cuereni cuä' rebejnro, bijni te cuent ni ruluii lojreni, räjpni:

<sup>8</sup> —Cheni guidontu cháätu te sa', na'c guntu te cuetu cuä' rebenro, te di guidzujñ te beñroru lojlu,

<sup>9</sup> dxejc jiääd bejn ni cayujñ lanij, naani lojlu: “Badeed cue dade're ro'c.” Dxejc situjylilu chacuelu ste'ca lajt lo le'li.

<sup>10</sup> Maazru hueen, cheni guidonlu cháälu te sa', huicue lo mex ni zuj lo le' te che guidzujñ bejn ni cayujñ lanij, naani lojlu: “Xamigwä, gudaa cuelu nen yu' cadro rbej rebenro.” Si'c sä'p xpala'nlu nez loj guiraa rebejn ni sobganäjlu lo mex.

<sup>11</sup> Sa'csi ni rlaiz chá'p xpala'nni nez loj rebejn, sianxtujyni nez lojreni. Luxh bejn ni najc nadolajz, sä'p xpala'nni nez loj guiraa rebejn.

<sup>12</sup> Räjpzani loj bejn ni cagudeed xhi gaureni:

—Cheni gunlu te lanij o guteedlu bejn lo xmexlu, na'c cueedxtislu rexamigwlu con rebejtzlu, con resa'lu, niclaza rexpisinlu ni najc ri'cw, sa'csi laareni sigajcza sibejdxreni luj che gunreni te lanij, luxh si'c agudijxreni ni badeedlu lojreni.

<sup>13</sup> Che gunlu te lanij, alga gurejdx rebenproob, rebencoj, nájza rebenlotiä'p,

<sup>14</sup> dxejcti sibaa lajzlu sa'csi laareni di gacdi gunidxsacreni ni badeedlu lojreni; luxh si'c siguixsac Dios ni bejnlu che gal dxej ni guibansac rebejn loj rebenqut.

### *Xcuent te laniro*

<sup>15</sup> Che biejn diajg tej reni sobga' lo mex, räjpni loj Jesús:

—Chicbaa rebejn ni gau yätxtiil cadro rnibee Dios.

<sup>16</sup> Dxejc räjp Jesús lojni:

—Guyu' te dade' ni bejn te laniro rolijzni. Gunibeeni bidon xhidajl bejn te jiädaunäjrenini.

<sup>17</sup> Che bidzujñ or ni gaureni, baxhał dade'ga te xmosni chatejdxni rebejn ni abidon, räjpni lojreni: “Colchäj, asuchee lo mex.”

<sup>18</sup> Dxejc guiragajczeni gusloj cayäjb di gacdi cháäreni. Tejni räjp: “Entis gusiä te la' yuj, luxh naj nanab chahuiä xho najcni. Goslaa di gacdi jiälä.”

19 Steeni räjp: “Gusiä gaii nejs gon, luxh nanab चाहुिä xho rujnreni dzuun. Goslaa di gacdi jiälä.”

20 Steeni räjp: “Entis bachnaä ni'cni di gacdi jiälä.”

21 Che gubi' mosga, badeedni diidx lo xlamni xhi räjp rebejnğa lojni. Dxejc bidxechduxh lamga, räjpni lo xmosni: “Basquejn huij ladneyzuj näjza ladneyzuj däa, gudanä rebenproob, rebencoj, rebenlotiä'p, rebennatiujnc.”

22 Si'c bejn mosga. Che gubi'ni räjpni lo xlamni: “Dad, abenä si'c ni gunibeelu, luxh lajtru yagxhiil.”

23 Dxejc räjp lamga lo xmosni: “Huij lo reneyzuj ni sii loj reguedxziyt, gudanäj rebejn ni guidxaaglu nejzga, te cha bejn rolizä.

24 Rniliä lojtu, nicla tej reni bidoṅ ganid di gau xhuej nani benä.”

### *Ni nanab gunni te chanajlni Crist*

25 Laḷ sasaj Jesús lo nejz, xhidalduxh bejn sanajlni. Dxejc gubirēni, gusloj cayäjpni lojreni:

26 —Palga yu' chu tej ni jiääd loä, ni di cuälaz xtadni, xnanni, chäälni, rexi'nni, rebejtzni, näjza rebisiajnni, nägajcza xcäl'nabajnni, di gacdi gacni te rexpēä.

27 Palga yu' chutis tej ni di rlaiz tedni trabajw te jiädnajlni narä, di gacdi gacni te rexpēäpac.

28 Chu tejtü ni rlaiz gun te yuro, ni di gunxгаа xhigab lacti meel chanä yu'ga, te guidon la sajc guluuxnini.

29 Didi cheni abejnni recimient, di gacdi guluuxnini, dxejc guiraa reni fii lojni suxhiznäjrenini,

30 säjpreni: “¡Bahuilaa! Bejnre gusloj bencheeni te yu' per di niajcdi nuluuxnini.”

31 ¿Chu te reiḷ ni gun xhigab chachagdijlni stee reiḷ, ni di gunxгаа xhigab don laa sajc gunni gaan con tzuu miḷ soldaad loj stee reiḷ ni siääd con gajḷ miḷ soldaad, ä?

32 Palga di gacdi gucuanäjnni, che gacbeeni zijtli siääd stee reiḷga, suxhaḷni te xpejnni chanab yäl'rbedxi lojni.

33 Ni'cni palga chutis tejtü di gusaan rehxixtēni te jiädnajlni narä, di gacdi gacni te rexpēäpac.

### *Che diru sejd gac nadzujy*

(Mt. 5:13; Mr. 9:50)

34 Räjpzani:

—Huen najc sejd. Per cheni diruni gac nadzujy, ¿xho gacru gac nadzujyni?

35 Xhetru sajcdini, nicla te chääni loj yuj, niclaza te chääni lo abon. Gusäḷtis bejn sejdga. Reni rlaiz gucuađiajg xtidxä, sucuađiaḡsa'creni.

## 15

### *Xcuent xiiḷ ni gunijt*

(Mt. 18:10-14)

1 Guiraa reni rusquijx impuest näjza rebeṅdojḷ cabigreni loj Jesús, te cuadiajgreni rextiidxni.

2 Refarisee näjza rebejn ni ruluii leii gusloj camojmreni, räjpreni:

—Bejnre rusaan rbig rebeṅdojḷ lojni, luxh raunäjzanireni.

3 Dxejcti bij Jesús cuent ni ruluiire lojreni, räjpni:

4 —Chutejtu ni rajp tegayuu xiil, palga chanijtne tejni, ¿la dini gusaan stapbitzuubigaa rexiilni lo niaa te chatiilni xile' ni gunijf, hasta guidxällini, ä?

5 Luxh che guidxällini sibaduxh lajzni, dxejc sutzuubnini ro xhajcwni.

6 Che guidzujjni rolijzni sutojpmi rexamiigwni näjza rexpisiñni te gäbni lojreni: “Colguibalaznäj narä sa'csi abidxälä xile' ni gunijf.”

7 Rniä lojtu, sigajcza su'ru yälrbalajz xhaguibaa xcuent tejtis bejn ni guibig lo Dios ni gusiechlajz xtojlni quela xcuent tapbitzubigaa bejn ni di guiquiin gusiechlazreni xtojlni.

### *Xcuent meel ni gunijf*

8 Räjpszani:

—Sigajcza te gunaä ni rajp tzuu meel, palga chasälñi tejni, ¿la dini gusanij te bajl te guloobni neñ yu' hasta guidxällini, ä?

9 Luxh che guidxällini, sutojpmi rexamiigwni näjza rexpisiñni, säjpmi lojreni: “Colguibalaznäj narä sa'csi abidxälä meel ni gunijf.”

10 Rniäza lojtu, sigajcza sibalajz rexangl Dios xhaguibaa xcuent te beñdojl ni rusiechlajzni.

### *Te bejn ni baxun te xi'nni*

11 Dxejc bijza Jesús cuentre lojreni:

—Guyu' te dade' ni yu' tio'p xingaanni.

12 Dxejc xi'nni ni najc huinruga, räjpni lo xtadni: “Dad, baniidx yälñasa'c nani nungäjñ xca'a.” Sas badeed xtadni xerensni.

13 Di niaclaa, balsi dxejc gudejd, chela bato' xinhuinñi guiraa xhixtenni, dx-  
ejc sääni, bidzujjni te guedxziyt. Ro'c banijtni guiraa xmeelni lo recosguijdx.

14 Che abanijtni guiraa xhixtenni, biääd te gubinuxh guedxziytga cadro yu'ni. Sas guslojzani calaanni.

15 Dxejc huitiilni dzuun lo te beñgejdxga. Baxhañ bejngani te huigajpmi cuch lo xyuj dade'ga.

16 Luxh calanduxhni bejnñi xhigab malaii sajç gauni recuaan ni najc si'c lia ni cayajw recuch, niluxh rut badeeddi xhi niajwni.

17 Lañ ni cadejdmni trabajwga, bianij xcäriejñni bejnñi xhigab, naani: “Balti rexmos xtadä rausa'c, ria'nru xhi gaurenì. Luxh narä ree calanduxhä, ameerli guetä.

18 Guibi'älis ladxä, rolijz xtadä, gäpä lojni, Dad, banitä lo Dios näjza lojlu.

19 Diru nungäjñ guirilaä xi'nlu. Cua' narä si'c te xmoslu.”

20 Dxejc gunazgajcni nejz te gubi'ni rolijz xtadni.

21 Cheni zijtru siäädni, bahuii xtadni lojni. Dxejc balaslajznini, ruxunlini, huichaglojnini, sas gudääznini, bachagro'ni lojni.

22 Dxejc räjp xi'nni lojni: “Dad, abanitä lo Dios näjza lojlu. Diru nungäjñ guirilaä xi'nlu.”

23 Per räjp xtadni loj rexmosni: “Coltanä te ladsa'c, colshuajcwnini xi'nä, colgusäl te niil bicuenaani, xcajza te gura'ch ni'ni.

24 Coltanä te biser ni guro' colgu'tni. ¡Colsquejn te guidaunu, jiennu te lanij!

25 Sa'csi xi'näre abenä xhigab gujtni, luxh naj si'cni agubansacni, gunijtni niluxh naj abidxäjlni.” Dxejc guslojreni bejnñi te lanij.

26 Lañ ni cayajç dee, xingangalooni cayujñ dzuun lo niaa. Che gubi'ni, siäddzungajxhni rolijzni, che biejn diajgñi cayel rolijzni, caguya'zarenì.

27 Dxejcti gurejdxni te mos, gunabdiidxni lojni xhi cayajç royu'.



<sup>27</sup> Dxejc räjp mosga lojni: “Gubisac bejtzlu, luxh xtaḍlu gunibee gujt te biser guro' te gac lanij sa'csi nadaanni gubi'ni.”

<sup>28</sup> Dxejc bidxe'ch xingangalooni. Naadtini jiu'ni rolizjni. Che gucbee xtaḍni naadtini jiu'ni, bihuii xtaḍnini te gunabni jiu'gani.

<sup>29</sup> Dxejc räjpni lo xtaḍni: “¡Bahulaare! Agujc xchej cayunä dzuun lojlu, luxh rusobdiagä guiraa xtiidxlu, per nicla tej huält gajḍlu guniidx nicla te dxibe' loä te gunä te lanij con rexamigwä.”

<sup>30</sup> Luxh naj ni abidzujñ xi'nlure, ni banijt xmeellu con regunadxab, xhoxh bagu'tlu te biser guro' te cayujnlu xlanijni.”

<sup>31</sup> Dxejc räjp xtaḍni lojni: “Xi'nä, sugagajclu loä, luxh guiraa ni rapä najc xtenlu.

<sup>32</sup> Niluxh naj riäjlpac jiennu lanij, guibalaaznu, sa'csi bejtzlu ni benä xhigab agujt, agubi'ni naj, najcni si'cni gubansacni; gunijtni, naj abidxäjlni.”

## 16

### *Xcuent te ni rnibee loj remos*

<sup>1</sup> Dxejc cayujyza Jesús stee cuent loj rexpejnpacni, räjpni:

—Guyu' te benrajp ni guyu' lojni te ni rnibee loj rexmosni. Dxejc biääd reni badeedreni diidx lojni, räjpreni: “Bejn ni rnibee loj rexmoslu xhetlaadi cayujnni cagunijtni rexhixtenlu.”

<sup>2</sup> Dxejcti gurejdx xlamnini, räjpni lojni: “¿Xhi dee ni riejn diagä caniireni xcuentlu, ä? Naj guniidxlu loä cuent xte xtuunlu, sa'csi dirulu chanuu guinibeelu lo rexmosä.”

<sup>3</sup> Dxejc bejnğa bejn xhigab: “¿Xhichani'c gunä naj ni gudzucaj xlamä dzuun loä? Dina ga'pä yälrstijp te gunä dzuun lo niaa, luxh situjyä chanabä gojn.

<sup>4</sup> Ananä xhini'c gunä te che dirunä ga'pä dzuun, sibejdx rexamigwä narä rolizreni.”

<sup>5</sup> Dxejcti gurejdxni tebgajreni rebejn ni nazäab lo xlamni, dxejc räjpni loj ni bidzunxgaa: “¿Lac nazääblu lo xlamä?”

<sup>6</sup> Dxejc räjpni: “Nazäbä si'c te gayuu baril se't.” Dxejc räjpni lojni: “Basquejn, cua' guijtzre, bacuaa tiubitzuutis baril nazääblu lojni.”

<sup>7</sup> Dxejc gunabdiidxni loj steeni, räjpni: “¿Luj a'? ¿Lac nazääblu lo xlamä?” Dxejc räjpni lojni: “Te gayuu dximro triuu.” Dxejc räjpzani: “Aree xquijtzlu; bacuaa tajtis dximro.”

<sup>8</sup> Bidxeloj xlamni, gulä'pni xpala'n benguijdxga ni gunibee sa'csi bisinni bejnni recosga. Dxejc räjpza Jesús, rebejn ni di gumbee xtidx Dios nadxällajzreni lo rextzuunreni con sa'reni loj rebejn ni arumbee xtidx Dios.

<sup>9</sup> Rniä lojtu, colquuil rexamiigwtu con reyäl'nasa'c ni räjpju loj guedxliujre, te che abaraj xhixtentu, sica' Diostu xhaguibaa cadro yu' rolizjtu par tejpas.

<sup>10</sup> Renani runsa'c dzuun lo te dzunbäs, sajca gunsac'ni dzuun lo te dzunro, luxh reni di gacdi gunsac' dzuun lo te dzunbäs, di gacdiza gunsac'reni dzuun lo te dzunro.

<sup>11</sup> Ni'cni palga xhetlaadi cuaräl'näjtu reyäl'nasa'c xten guedxliuj, jxho guniidx Dios reyäl'nasa'c xtenni lojtu!

<sup>12</sup> Palga xhetlaadi cuaräl'näjtu xhixten bejn, ¿chu guniidx lojtu ni gac xtenpactu, ä?

<sup>13</sup> Nicla tej mos di gacdi gunni dzuun lo tio'p lam, sa'csi sidxe'chni lo tejni, steeni sinälajzni o susobdiajgpacni xtidx tejni, sibälazni steeni. Di gacdi gun bejn xtzun Dios lañ ni sanälajztisni xcäl'nasa'cni.

14 Mbaj naj, refarisee, sa'csi rchaglazduxhrenei meel, cacuadiagdzu'tzreni xtiidxni, dxejc caguxhisnäjreni Jesús.

15 Dxejcti räjp Jesús lojreni:

—La'tu najctu bejn ni ruhuu rebejn lojtu, naareni beñsacduxhtu, niluxh acanajn Dios xhi xhigab rujntu neñ lastootu. Sa'csi guiraa ni rchalojtu najc yälñasacduxh, guiraa ni'c rbixhlajz Diosni.

### *Xleii Moisés con xcälñibee Dios*

16 Räjpszani:

—Dxejli ni biääd Juan ni rutiobnis, guyu' xleii Moisés, näjza xtidx redade' ni gunii xtidx Dios. Cheni biääd Juan gusloj rsule' didxsa'c xcuent xcälñibee Dios, ni'cni xhidajl bejn cagusutijp lajzni te jiu'reni loj yälñibeega.

17 Per guyasiru nitloj xhaguibaa näjza guedxliuj quela di jialoj guirali rediidx ni bacuaa Moisés; nicla te j diidxga di nitloj.

### *Ruluu Jesús xcuent ru'o'n sa' bejn (Mt. 19:1-12; Mr. 10:1-12)*

18 Räjpszani:

—Palga guro'n te bejn chäälñi, dxejc guchñaani stee gunaa, rujñni dojl, luxh nani ruchñaa te gunaa ni abaro'n chäälñini, niguiiga rujnzani dojl.

### *Te beñrajp näjza Lázaro*

19 Räjpszani:

—Guyu' te beñrajp ni rchaglajz rajcwni ganax reladsacduxh, luxh guixee guixee rujñni laniro.

20 Guyu'za te beñproob ni laa Lázaro ni rniab gojn, ricueni ro xlä' beñrajpga, yu' guejdx ni rgaadz tiejxhni.

21 Rajzñi maläii xho gunni gauni nani rtejb loj xmex beñrajpga, luxh direni gusaan. Dxejc rebä'cw siääd rilejp loj reguejdx ni rgaadz ni guidxa tiejxhni.

22 Guyu'ti te dxej gujt beñproobga, biädläs rexangl Dios xaimni, huinäreneni cadro yu' Abram xhaguibaa. Dxejcti näjza beñrajpga gujt, huicua'tztireneni.

23 Che yu'ni gabijl cadro rij guiraa rebendojl, ro'c cadejdni trabajwduxh. Dxejcti guläsni lojni, bahuiini zitduxh cadro suganäj Abram Lázaro.

24 Dxejcti guredxaduxh beñrajpga, räjpni lo Abram: “iXtadä Abram! Bala-lajz narä, baxhal Lázaro guhuajdxni yejc bicueñaani nis te gusiäluyjni ludxä, sa'csi ree cadedä trabajwduxh lo guiboo.”

25 Luxh räjp Abram lojni: “Xi'nä, basaa lajzlu che gubajñlu lo guedxliuj gojplu guira'ti xhixtenlu, luxh sigajcza Lázaro gudejdni trabajwduxh. Per naj ree casilajzñi, naj luj cadejdlu trabajwduxh.

26 Luxh di gacdi jääd Lázaro ro'c, sa'csi yu' te baladuxh ni rlii' sa'nu, te mase rlajz bejn guirii ree te tedreni lojlu ro'c, di gacdin. Di gacdiza ted reni yu' ro'c te jäädreni loonu.”

27 Dxejcti räjp beñrajpga lojni: “Rniabduxhä lojlu, xtadä, baxhalñaa Lázaro chääni roliz xtadä,

28 sa'csi ro'c yu' gaii betzä, te chaliidxni laareni, te gusiechljazreni, te di näjza laareni jäädreni ree cadro rdejd bejn trabajwduxh.”

29 Dxejc räjp Abram lojni: “Arajpreni guijt cadro caj xleii Moisés näjza xtidx redade' ni gunii xtidx Dios, sugusobdiajgreni rediidxga.”

30 Luxh beñrajpga badzu' diidxre, räjpni lojni: “Gulii dad Abram, per palga chäs te bejn loj rebengut, chani lojreni, dxejc sii pet susiechljazreni.”

<sup>31</sup> Dxejc räjp Abram lojni: “Palga direni gusobdiajg xtidx to Moisés näjza xtidx redade' ni gunii xtidx Dios, dizareni chalilajz xtidx te bejn ni guibañsac loj rebengut.”

## 17

*Riesgw jiajbni lo dojl*  
(Mt. 18:6-7, 21-22; Mr. 9:42)

<sup>1</sup> Räjp Jesús loj rexpejn pacni:

—Siääd pac recos ni gun jiajb bejn lo dojl. Proobza bejn ni rujn riajb bejn lo dojl.

<sup>2</sup> Maaz guliibni te guiij xten molin guejnni, gusäl bejnni lo nisdoo cadro jätro quela gunni jiajb rexi'nä ni ahuililajz xtidxä.

<sup>3</sup> ¡Col susin!

'Palga gun bejtzu dojl lojlu, balijdxni. Palga gusiechljazni, basiäjł diidx con laani.

<sup>4</sup> Masque gajdz huält nen teb dxej gunni dojl lojlu, palga jädniini lojlu gajdz huält, naani: “Xhet laadi benä, basiäjł lajzlu”, basiäjł lajz con laani.

*Bastioob xcärrililaaznu*

<sup>5</sup> Gunii rexpejn pacni lo Jesús, räjpreni:

—Dad, baniidxru yäl rililajz loonu.

<sup>6</sup> Dxejc räjp Jesús lojreni:

—Palga rajptu yäl rililajz, mase najcni si'cti te bedzbäz xten muxhtas, sajç gäbtu lo yagro rec: “Biliädxä' ro'c, guzuj galäii nisdoo”, susobdiajg yajgga xtiidxtu.

*Ni riäjł gun te mos*

<sup>7</sup> Räjpzani:

—¿Chu tejtü ni rajp te mos ni riga'n o ni rigajp rexquidxaani ni gäbni lojni che guibi'ni lo niaa: “Biu'ga, gurej lo mex te gaulu”?

<sup>8</sup> Dini gäb si'c. Niluxh säjpni lojni: “Bachaa xhajblu. Bejn xhi gauä, gudanäni loä. Che luux gauä, yä'ä, dxejc sajç gauzalu, yäzalu.”

<sup>9</sup> Dini gudeed xquixtios lo mosga sa'csi rujnni recos ni gunibeeni sa'csi si'c riäjł gunni.

<sup>10</sup> Sigajcza la'tu, che luux guntu guiraa redzuun ni guniä guntu, riäjł guiniitu lo Dios: “Najcnu mos ni xhet sajçdi, nani riäjł jiennu, ni'ctis biennu.”

*Basiajc Jesús tzuu bejn ni ral tiejxhreni*

<sup>11</sup> Lał ni sasaj Jesús nez guedx Jerusalén, gudejdni loj región Samaria näjza región Galilee.

<sup>12</sup> Che biu'ni tej reguejdxga, huichagloj Jesús tzuu bejn ni rajc te yälgujdx ni ral tiejxhreni, niluxh zijtru guzujreni.

<sup>13</sup> Dxejc rbedxa'reni räjpreni:

—Jesús, Dad, Mastr, balaslajz nuurnu.

<sup>14</sup> Che bahuii Jesús lojreni, räjpni lojreni:

—Colchäj, te fii rebixhojz abiajctu.

Lał ni sääreni, bia tiejxhreni.

<sup>15</sup> Dxejc tejreni, che bahuiini abiajçni, gubiguxunni, cabedxa'ni calä'pni xpalä'n Dios.

<sup>16</sup> Bazuxhijbni nez loj Jesús, basajbni lojni lo yuj cagudeedni xquixtios loj Jesús. Luxh bejnre najc te beñzajt, te beñ Samaria.

<sup>17</sup> Dxejcti räjp Jesús lojni:

—¿La et tzuudi najc reni biajc, ä? ¿Con sgaareni?

18 ¿La rutru gubi'di loä te guiliä'preni xpala'n Dios, xtebtis benzijtre, ä?

19 Dxejc räjp Jesús loj bejnre:

—¡Huisulii, huij! Abiajclu sa'csi huililajzlu.

*Xho guidzujn xcälrnibee Dios*

*(Mt. 24:23-28, 36-41)*

20 Dxejc, sa'csi agunabdiidx refarisee loj Jesús guc guidzujn xcälrnibee Dios, badzu'ni diidxre, räjpni lojreni:

—Di xcälrnibee Dios guidzujn con seen ni sajc fiitu.

21 Diza bejn naa: “Bahuii, aniree”, o “Anirec”, sa'csi abidzujn xcälrnibee Dios lojtu.

22 Dxejc räjp Jesús lo rexpejn pacni:

—Sidzujn dxej rlaizgatu fiitu te dxej sa' ni chu che jiädsac Xi'n Dios ni gujc Niguii, luxh ditu fiini.

23 Luxh siniireni lojtu: “Aniree”, o “Anirec”, per na'c chäätu, na'cza chanajltu reni rihuii.

24 Sa'csi sigajc ni rien che rdinya' te laad xhaguibaa hasta stelaad xhaguibaa, si'cza gac che jiälä narä, Xi'n Dios ni gujc Niguii, che gal dxej guibi'ä.

25 Luxh ganiddoo sidedä trabajwduxh, sa'csi sibälaz reben guedxliuj ni tre' naj narä.

26 Si'cni gujc nen redxey cheni gubajn toNoé, si'cza gac nen redxey che jiälä narä, Xi'n Dios ni gujc Niguii.

27 Nen redxey ni gubajn toNoé gudajwreni, gu'reni, bachnaareni, badeedzareni xindxa'preni guchnaa bejn, bidzujnli dxej cheni biu' toNoé nen barcwro ni bencheeni. Dxejc biääd nisguiduxh, gujt guiraa reben dojl, guzääbreni lo nis.

28 Sigajcza gujc nen redxey ni gubajn toLo't: gudajwreni, gu'reni, gusiireni, bato'reni, gule'creni binij, bencheezareni rolizreni.

29 Niluxh cheni birii Lo't lo guedx Sodoma, biajb guiboo xhaguibaali, näjza te däj ni rudxuii, gunitlojti guiraa rebejn dojl, huejcreni.

30 Sigajcza gac nen redxey cheni jiälä narä, Xi'n Dios ni gujc Niguii.

31 'Dxejga, palga yu' chu niä'p yejc yu', diru galäi jiäjtnei te chalääni rexhixtenni ni yuchee nen yu'; palga yu' chu suga' nezjiät, di galdirumi guibi'ni rolizni.

32 Colgusnaj lajztu xhi gujc chääl toLo't.

33 Ni rlaiz ga'p xcäl'nabajn ni lo guedxliujre, sunijtnini, nani gunijt xcäl'nabajn ni lo guedxliujre xcuent rextidä, xcäl'nabajn ni rajpni xhaguibaa.

34 'Rniä lojtu, guxhijnga ni jiälä lo tio'p reni naga' lo te da', chää tejni, steeni jia'n.

35 Lo tio'p gunaa ni cayo't, chää tejni, steeni jia'n.

36 Lo tio'p bejn ni yu' lo niaa, chää tejni, steeni jia'n.

37 Che biejn diajgreni rediidxre, gunabdiidxreni lojni, räjpreni:

—Dad, ¿caro gac recosre?

Badzu' Jesús diidxre, räjpni:

—Cadro naga' te mangut, ro'c rdojp regolbetz.

## 18

*Xcuent te gunabiuud con te juejz*

<sup>1</sup> Bijza Jesús te cuent ni rului lojreni, te guisiedreni xho riajl cuedx-guiniabreni lo Dios lacuaa gac-huin lajzreni,

<sup>2</sup> räjpni lojreni:

—Te guejdx guyu' te juejz ni di chalilajz xtidx Dios, dizani jiu rebejn.

<sup>3</sup> Lagajc guejdxga guyu' te gunabiuud. Guixe-guixee rijni lo juejz, rniabni lojni gunni yälguختis lo bejn ni rdxe'ch lojni.

<sup>4</sup> Balti dxej naadti juejzga gun yälguختisga. Dxejcti bejnna xhigab, naani: “Mase dina guidxebä Dios, dizana jiuä rebejn,

<sup>5</sup> sa'csi gunabiuudre sanuutisni siäädni loä, abasiedliini narä, gunälis yälguختis xten gunaaga, te di chanuutis riädgusiesedni narä.”

<sup>6</sup> Dxejc räjp Jesús lojreni:

—Riejn diajgtu xtidx juezguijdxga,

<sup>7</sup> Naj çxho di Dios, ni najc hueen, gucuadiajg xtidx rexi'nni ni rbedx-rniab lojni dxej-yääl? Di gaclaa gunni yälguختis xcuent reni aguleni.

<sup>8</sup> Ni'cni rniä lojtu, sungajcni yälguختis par laareni. Luxh che guibi' Xi'n Dios ni gujc Niguui, çla sidxälni bejn ni rililajz xtiidxni lo guedxliuj?

### *Xcuent te farisee con te ni rusquijx impuest*

<sup>9</sup> Bij Jesús stee cuent ni rului loj rebejn ni rluuisi najc beñsa'c, ni rchalo xhet sajcdi resabejnreni. Räjpni:

<sup>10</sup> —Tio'p dade' huij guidoo te huinabreni lo Dios. Tej ni najc farisee, steega najc te dade' ni rusquijx impuest.

<sup>11</sup> Sulii fariseega laj ni canabni lo Dios, räjpni: “Dad, Dios, runidxä xquixtios lojlu sa'csi dina gacä si'c najc rebejn ni najc gubaan, ni najc beñ nadiplajz, ni najc bendojl, dizana gacä si'c najc bejnre ni rusquijx impuest.

<sup>12</sup> Rucua'nä tio'p huält neñ te xmaan, luxh rudedä te tzuu lo te beex loj guiraa ni runä gaan.”

<sup>13</sup> Niluxh bejn ni rusquijx impuest, zijtru suga'ni, dini guiliäs lojni xh-aguibaa. Catiälnaatisini lastooni, caniini lo Dios, räjpni: “Dad, Dios, jbalaslajz narä, nacä te bendojl!”

<sup>14</sup> Rniliäpac lojtu, ni rusquijx impuest rbaali lajzni gubi'ni rolizni sa'csi badzucaj Dios rextojlni, niluxh di Dios nudzucaj rextojl beñ farisee. Sa'csi guiraa rebejn ni rlanj guiliä'p lagajc xpala'nni, susanxtiujy Diosreni, dxejc reni di rlanj guiliä'p lagajc xpala'nreni, siliä'p Dios xpala'nreni.

### *Benle' Jesús yejc rebixbäz*

(Mt. 19:13-15; Mr. 10:13-16)

<sup>15</sup> Yu'reni siädnä rexpixbäzreni loj Jesús te guzujni naani yejcreni. Che bahuii rexpejn pacni si'c, gusloj cadildiidxreni con rebejn te na'c jiädnäreni rebixue'.

<sup>16</sup> Dxejc gurejdx Jesúsreni, räjpni lojreni:

—Colgusaan jiäd rebixue' loä, na'c gudxojnuren, sa'csi xcälrnibee Dios najc xten reni najc nadolajz si'c rebixbäze're.

<sup>17</sup> Rniliäpac lojtu, chutis ni rlanj jiu' lo xcälrnibee Dios nanab gusobdiajgreni xtidx Dios si'c rusobdiajg rebixue' xtidx xtadreni. Palga dini gun si'c, dini jiu' lo xcälrnibee Dios.

### *Te bi'n ni rajp xhidajl xhixtenni*

(Mt. 19:16-30; Mr. 10:17-31)

<sup>18</sup> Te bi'n ni rnibee gunabdiidx loj Jesús, räjpni:

—Dad, mastrsa'c, çxhini'c nanab gunä te xca'a yäl nabajñ par tejpas?

<sup>19</sup> Dxejc räjp Jesús lojni:

—çXhicuent rniilu narä: “Mastrsa'c”? Rutru najcdi beñsa'c, xtebtis Dios.

20 Anajnlx xho najc remandamient ni caj lo xleii Moisés: “Na’c guesnäjlx gunaa ni di gac chäällu; na’c ju’tlu bejn; na’c cuanlu, na’c guiniilu didx-xhii xcuent bejn; bazoob xtidx xtadlu, xnanlu, bahuiizareni.”

21 Dxejc räjp bi’nga lojni:

—Guiraa remandamientre rusobä cheni gucäli biuux.

22 Che biejn diajg Jesús xtiidxni, räjpni lojni:

—Tejtis cayäädx gunlu. Bato’ guiraa rehxixtenlu, gudisni loj rebejn ni xhet rajpdi dxejc sajplu xcäl’nasa’clu xhaguibaa. Dxejc gudanajl narä.

23 Che biejn diajg bi’nga rediidxre, guc-huinduxh lajzni, sa’csi najcni te bejn ni rapduxh.

24 Dxejc rdxelotjis Jesús lojni, guc-huinza lajzni räjpni:

—Naganduxh jiu’ rebenrajp lo xcäl’rnibee Dios.

25 Guyasiru ted te cameii ni’ te guux lo ni jiu’ rebenrajp lo xcäl’rnibee Dios.

26 Reni biejn diajgni rediidxre, räjpreni:

—¿Chuxhni’c sajc laa lo dojl, palga si’c najcni?

27 Dxejc räjp Jesús lojreni:

—Guira’ti ni di gacdi gun rebejn, guyasi rajc rujn Diosni.

28 Dxejc räjp Pedr lojni:

—Dad, nuurnu abasa’nnu guiraa rehxixtenu te siopnalnu luj.

29 Dxejc badzu’ Jesús diidxre lojni, räjpni:

—Rniliäpac lojtu, chutis ni gusaan rolijzni näjza rexcuzajnni, rebejtzni, chäälni, xi’nni xcuent xcäl’rnibee Dios,

30 sica’ni xhiroobru lo guedxliujre, luxh sica’ni yäl’nabajn par tejpas.

### *Rusule’ Jesús stehuält xho guetni*

*(Mt. 20:17-19; Mr. 10:32-34)*

31 Gurejdx Jesús rexpejnpacni te laad, te räjpni lojreni:

—Naj chonnu guedx Jerusalén cadre nanab soob rediidx nani bacuaa dade’ ni gunii xtidx Dios galooli xcuent Xi’n Dios ni gujc Niguii.

32 Sutedrenini ladzḡaa rebenzjzt, suxhiznäjrenini, susacs’frenini, sutiobxhejnlireni lojni,

33 luxh che luux quinenrenini, dxejc sugu’trenini, luxh ni riojn dxej sibansacni loj rebengut.

34 Dxejc laareni direni niacbee rediidxre, dizareni gan xhini’c caniini, sa’csi najcreni diidx ni di gacdi gacbeereni.

### *Rusiajc Jesús te ben lotiä’p*

*(Mt. 20:29-34; Mr. 10:46-52)*

35 Cheni sadzujn Jesús te guejdx ni laa Jericó, sobga’ te ben lotiä’p ro’ nezyuj, canabni gojn.

36 Che biejn diajgni cadejd xhidajl bejn lo nezyujga, gunabdiidx ben lotiä’pga xhini’c cayajc.

37 Dxejc räjpreni:

—Jesús ni siääd Nazare’t cadejdni nezga.

38 Dxejc guredxa’ni räjpni:

—iJesús, xi’n toDavid, balaslajz narä!

39 Rebejn ni nijd lojreni gudiñäjreni ben lotiä’pga te jiäu ro’ni, niluxh laani dipru guredxa’ni, räjpni:

—iXi’n toDavid, balaslajz narä!

40 Dxejc guzudxi Jesús ro’c, gunibeeni jiädnäreni bejnğa lojni. Che bidzujnni lojni, gunabdiidx Jesús lojni, räjpni:

41 —¿Xhini'c rlaizlu gunnäå luj?  
Badzu' beñ lotiä'pga diidxre, räjpni:

—Dad, rlaizä jien loä.

42 Dxejc räjp Jesús lojni:

—¡Sujien balojlu! Abiajclu sa'csi huililajzlu.

43 Lagajc dxej, biengajc lojni, calä'pni xpala'n Dios, huinajlni Jesús. Luxh guiraa rebejn ni bahuii xhi guzajcni, gulä'pzareni xpala'n Dios.

## 19

### *Huij Jesús rolizj te bejn ni laa Zaqueo*

1 Dxejc biu' Jesús guedx Jericó, sadejdzani guejdxga.

2 Ro'c rbäjz te beñrapduxh, ni laa Zaqueo, ni rnibee lo reni rusquijx xcuent impuest.

3 Rlaiz Zaqueo fiini loj Jesús te gumbeenini, per digacdi fiini lojni sa'csi najcni te beñxhate', luxh xhidajl bejn siädsaj guideb gabi Jesús.

4 Ni'c baxunni gunijdni lojreni, huä'pni lo te yajgro ni suga' gajxh nez cadre ted Jesús te si'c sajç fiini loj Jesús.

5 Che gudejd Jesús nejzga, guläsni lojni jiaa, bahuiini cadre sobga' bejnre. Dxejc räjpni lojni:

—Zaqueo, basquejn biäjt ro'c, lagajc nadxej rlaizä chajia'nä rolizjlu.

6 Dxejcti biätguxun Zaqueo lo yajgga, rbalazduxhni huinäni Jesús rolizjni.

7 Che bahuii guiraa rebejn xhi gujc, gusloj camojmreni, direni jilulajz, räjpreni:

—Jesús sajjia'n rolizj te beñdojl.

8 Dxejcti huisulii Zaqueo, räjpni loj Jesús:

—Bahuilaare, Dad, gala' xhixtenä gudedä loj rebenproof; luxh palga yu' chu loj cua'ä xhixtenni con yälrusguee, sudzu'ä lojni tajp huält si'cti ni cua'ä.

9 Räjp Jesús lojni:

—Lagajc nadxej gubicaj xtojllu näjza xtojll reni rbäjz rolizjlu, sa'csi guliipac najclu te xagdoo to Abram.

10 Pues Xi'n Dios ni gujc Niguii biädtil rebendojl te guslaani rebejnğa ni gunijt nen dojl.

### *Xcuent tzuu meel*

11 Laļ ni cagucuaadiajgreni xtidx Jesús, bijzani te cuent ni ruluii, sa'csi asiäddzujngajxhrenei guedx Jerusalén, luxh laareni rujnreni xhigab sisloj guinibee Jesús si'ctisni guidzujjni guejdxga.

12 Dxejc räjpni lojreni:

—Guyu' te bejn, beñrajpni, huijni te guejdx zijtro te gacni reii, dxejc guibisacni.

13 Che gajdni guirii, gurejdxni tzuu xmosni, te badeedni lo tebgajreni te melpla't ni sacduxh, räjpni lojreni: “Coluyjn dzuun con meelre che guibisacäli.” Sä'tini.

14 Per reben lajdxni dipacreni guichaglaiz bejnğa, ni'c baxhalreni gaii bejn te saye'tzreni: “Di rlaizdinu gacni xreiiinu.”

15 Luxh empac gujçni reii, dxejc guibisacni lajdxni. Che bidzujjni gurejdxni rexmosni ni badeedni meel cua'reni, te gabeeni lac bejn tejjareni gaan.

16 Ni bidzujn ganid räjpni lojni: “Dad, xmeellu bejn gaan stzuu meel.”

17 Dxejc räjp reii lojni: “Hueenca, luj najclu te mossac, sa'csi laaca bejnlu dzuun lo te dzunbäz, naj sunidxä guinibeelu loj tzuu guejdx.”

18 Bidzujñ stee mos lojni, räjpni: “Dad, xmeellu bejn gaan gaii meel.”

19 Dxejcti räjpni lojni: “Luj guinibeelu loj gaii guejdx.”

20 Bidzujñti stee mos lojni, räjpni: “Dad, aree xmeellu, guluchedzu'tzäni nen te baii

21 sa'csi bidxebä guejblu, sa'csi najc guejblu te beñ nadiplajz, rutojpp guejblu cadro di guejblu nuzuj, luxh rliäs guejblu cose'ch cadro di guejblu nibe'c.”

22 Dxejcti räjp rei lojni: “iMosguijdx! lagajc ro'lu birii diidx ni gunälu yälguxhtis. Palga najnlu nacä te beñ nadiplajz, najnlu rutopä cadro dina nusü, najnlu rliäsä cose'ch cadro dina nibe'cä,

23 çXhicuent dilu nisa'n xmelä nen te bancw te che nibi'ä nica'a xmelä nägajc xi'n meelga?”

24 Dxejc räjpni loj reni suga' ro'c: “Colgudzucaj meelga lojni, colgudeedni loj ni rajp tzuu meel.”

25 Laareni räjpreni: “Dad, per laani arajpni tzuu meel.”

26 Dxejc badzu' rei diidxre lojreni, räjpni: “Ni'cni rniä, reni rajp, sica'rueni, niluxh reni di ga'p lojreni sibicaj guiraa recosbäz ni rajpreni.

27 Luxh xcuent reni rdxe'ch loä, ni di rlajz niacä rei lojreni, coltanäreni ree, colgugu'treni nez loä.”

### *Che biu' Jesús guedx Jerusalén*

*(Mt. 21:1-11; Mr. 11:1-11; Jn. 12:12-19)*

28 Che gulujx guniini guiraa rediidxre, huinuuni xnejzni, sääni nez lo guejdx Jerusalén.

29 Che asadzungajxhni reguejdx ni laa Betfagé näjza Betania, gajxh lo dajn ni laa Oliib, baxhalni tio'p rexpejñpacni,

30 räjpni lojreni:

—Colchäj lo guejdx' ni suga' lad rec. Che guidzujñtu, guidxäلتu caduu te bur huin ni gajd beñ cuib. Colguxheeni, coltanäni ree.

31 Palga yu' chu guiniabdiidx lojtu: “çXhicuent caguxhectuni?” colye'tz lojni: “Dad caquiinnini.”

32 Sä'ti rexpejñpacni nani baxhalni, bidxälreni manga sigajctisni räjp Jesús.

33 Cheni caguxhecreni bure'ga, rexpaxhuaan bure'ga räjp lojreni:

—çXhicuent caguxhectu bure'ga, ä?

34 Dxejc badzu'reni diidxre, räjpreni:

—Sa'csi caquiin Dadni.

35 Sas huinäni bure'ga loj Jesús, gudixhrenei xhajbreni dejtzni, te gubijb Jesúsni.

36 Guideb cadro gudejd Jesús gudixhrenei xhajbreni lo nezyuj cadro tedni.

37 Cheni ameer guidzujñni bajaad xten dan Oliib, gusloj cabaa lajz guiraa rebejñ, rbedxa'lireni calä'preni xpala'n Dios sa'csi bahuiireni guiraa remi-lagwr ni bejñni.

38 Räjpreni:

Chicbaa rei ni siääd xcuent Xtdanu Dios te guinibeeni loonu.

Sucuedxilajz guiraa reni yu' guibaa, chä'p xpala'n Dios xhaguibaali.

39 Dxejc gaii refarisee ni suga' galäii rebejñ, räjpreni loj Jesús:

—Mastr, gudidxa' lo rebejñ ni siädñajllu te na'cru guiniireni si'c.

40 Dxejc Jesús räjp lojreni:

—Rniliä lojtu, palga redee gusäu ro'reni, sibedxa' reguijre.



<sup>41</sup> Che bidzuj<sub>n</sub>i gajxh, che bahuini guedx Jerusalén, biin Jesús xcuent guejdxga,

<sup>42</sup> räjpni:

—iMaläi gacheelu, masque ne<sub>n</sub> redxejre, xhini'c sajc guniidx yäl<sub>r</sub>bedxilajz lojlu! Per <sub>n</sub>aj naga'tzni, luxh digacdi filu lojni.

<sup>43</sup> Sidzuj<sub>n</sub> dxejga lojlu, cheni jääd reni rdxe'ch lojlu sujnreni si'c te gur<sub>r</sub>alyuj guideb gabilu, nez lojlu sigajc nez dejtzlu sisiujreni.

<sup>44</sup> Susäl'ta'reni luj lo yujli. Sugu'treni rebejn ni rbäjz ro'c, luxh nicla gusaanreni cuib te guij yejc sa'ni sa'csi dilu niembee dxej ni biäd Dios biädhuilu.

### *Rusia Jesús ne<sub>n</sub> guidoro*

(Mt. 21:12-17; Mr. 11:15-19; Jn. 2:13-22)

<sup>45</sup> Dxejcti biu' Jesús ne<sub>n</sub> guidoro, guslojni cabääni rebejn ni caguto' näjza reni casii.

<sup>46</sup> Dxejc räjpni lojreni:

—Loj rexquijtz Dios caj rediidxre: “Rolizä sajc te yu' cadre jäädnabt lo Dios”, niluxh la'tu abejntuni si'c te biliää xte gubaan.

<sup>47</sup> Guixe-guixee caguluii Jesús ne<sub>n</sub> guidoro, luxh reni rnibee loj rebixhojz näjza rebejn ni ruluii leii, näjza rebengool xte guejdxga caguilreni mood te ju'treni,

<sup>48</sup> luxh direni nidxäj<sub>r</sub>l xho niujnreni sa'csi guiraa rebejn cacuadi-agdzu'tzreni xtiidxni.

## 20

### *Xcäl<sub>r</sub>nibee Jesús*

(Mt. 21:23-27; Mr. 11:27-33)

<sup>1</sup> Te dxej suga' Jesús ne<sub>n</sub> guidoro, caguluii rebejn, cagusule'zani diidx xcuent xho guibicaj xtoj<sub>r</sub>lreni, che bidzuj<sub>n</sub> reni rnibee loj rebixhojz näjza rebejn ni ruluii leii näjza rebengool,

<sup>2</sup> räjpreni lojni:

—¿Xhi yäl<sub>r</sub>nibee rujnlu recosre? ¿Chu baniidx yäl<sub>r</sub>nibeega lojlu?

<sup>3</sup> Dxejcti räjp Jesús lojreni:

—Narä sigajcza gunä te yäl<sub>r</sub>gunabdiidx lojtu, col<sub>r</sub>gudzu' diidxre loä,

<sup>4</sup> ¿chuni'c baxhal<sub>r</sub> Juan te gutiobnisni rebejn? ¿La Dios o la rebejn, ä?

<sup>5</sup> Niluxh laareni guslojreni canabdiidx lo sa'reni, räjpreni:

—¿Xhichani'c jie'tznu? Palga jie'tznu Dios baxhal<sub>r</sub>ni, dxejc naani loonu: “¿Xhixhcuent ditu ninilajz xtiidxni?”

<sup>6</sup> Palga jie'tznu: “Rebejn baxhal<sub>r</sub>ni”, guiraa rebejn sucuaa guij yejcnu, ju'tlireni nuurnu sa'csi laareni rujnpacreni xhigab gunii Juan xtidx Dios.

<sup>7</sup> Dxejc badzu'reni diidxre, räjpreni:

—Dinu guidon chuni'c baxhal<sub>r</sub> Juan te biäd<sub>r</sub>tiobnisni.

<sup>8</sup> Dxejc räjp Jesús lojreni:

—Dizana guiniä xhi yäl<sub>r</sub>nibee rapä te runä recosre.

### *Xcuent remosgijdx*

(Mt. 21:33-44; Mr. 12:1-11)

<sup>9</sup> Dxejc gusloj canii Jesús loj rebejn, bijni cuentre lojreni, räjpni:

—Guyu' te bejn bazuj yaguub lo xyujni. Dxejc badedlaanini lo gaii bejn chääreni meed, sä'tnini zijt, gucladuxhni ro'c.

10 Che bidzujn dxej ni guidojpc cose'ch, baxhalni te xmosni sanab cose'ch ni riäl xca'ni. Per laareni gudijnreni mosga, xhetliidi badeedreni chanäni lo xpaxhuaan yujga.

11 Dxejcti baxhalni stee mos lojreni. Dxejc sigajcza gudiñäjnrenini, gudijnrenini, luxh xhetza badeeddireni lojni, ganaxni gubi'ni lo xlamni.

12 Dxejcti baxhalni ni riojn mos lojreni, per sigajcza gudinduxhrenini, barilaagwrenini.

13 'Dxejc bejn baxhuaanga xhigab, naani: "¿Xhichani'c gunä? Suxhalä xi'nä ni sanälazä; che fireni lojni, pet siureni xtiidxni."

14 Dxejc che bahuii reni go'n-meed lo xi'nni, dxejc räjpreni lo sa'reni: "Laa deeni gac xtenni reyujre. Do'o guigu'tnuni te nuurnu xca'nu yujre gacni xtennu."

15 Dxejcti barilaagwrenini lo yujga, sas bagu'trenini.

Dxejc gunabdiidx Jesús lojreni, räjpni:

—¿Xhichani'c gunñaj xpaxhuaan yujga reben guijdxre, ä?

16 Sidzujni, sugu'tni guiraa reni cayujn dzun-meed lo yujga, dxejc sudeedni yujga lo garenca bejn.

Che biejn diajgreni rediidxre, räjpreni:

—¡Na'c gusaan Dios gacni si'c!

17 Bahuii Jesús lojreni, dxejc räjpni:

—¿Xhixhni'c caj lo guijtz ni bacuaa redade' ni gunii xtidx Dios galoo? Ro'c cajni:

Guij nani guläcaj renani runchee yu',

ni'c agujc guisa'c ni guzuj galoo.

18 Chutis ni jiajb yejc guijga, sianduxhni, per nani jiajb guijga yejcnii siujypacni, li däj gacni.

### *Xcuent reimpuest*

(Mt. 21:45-46; 22:15-22; Mr. 12:12-17)

19 Reni rnibee loj rebixhojz, näjza reni ruluii leii rlajzreni guiniaazreni Jesús lagajc orga, sa'csi gubeerreni lojreni gunii Jesús cuentre, luxh xhet bejndireni sa'csi rdxejbreni rebejn.

20 Dxejc cagula'tztisrenini, baxhalreni gaii bejn te gunsireni si'c ni najceni ben dxan, te gucuadiajgreni xtiidxni don gaxäjssi guiga'ni lo te diidx te guteedrenini lo yälgu xhtis, yälrnibee xte gubernadoor.

21 Dxejc gunabdiidxreni lojni, räjpreni:

—Dad, Mastr, nadonnu laaca rnii guejblu, laaca ruluii guejblu, luxh di guejblu fixгаа la yu' chu najc bejn, ruluisa'c guejblu xnez lo Dios.

22 Gunilaa loonu, ¿la laaca guidiixnu reimpuest loj xcubieer César o la xhet laadini, ä?

23 Sas gubecajc Jesús cayujnsireni yälgunabdiidxga, dxejc räjpni lojreni:

—¿Xhicuent runnäjtu narä scree?

24 Baluii loä te xmeeltu. ¿Chucha yejc caj lojni, chucha laj caj lojni?

Dxejc räjpreni:

—Xten César.

25 Dxejc räjpni lojreni:

—Coldeed lo César nani najc xten César; coldeedza lo Dios nani najc xten Dios.

26 Luxh direni niujn gaan niga'ni loj nicla te diidx ni guniini nez loj rebejn. Rdxelojtisreni lo rextiidxni, biäuti ro'reni, guzudxireni.

### *Rniabdiidxreni xcuent yälrbansac lo rebengut*

(Mt. 22:23-33; Mr. 12:18-27)

<sup>27</sup> Dxejc huij gaaɪ resaduceos huihuiireni loj Jesús. Di resaduceos chalilajz rbaɪsac beɪɲ lo rebɛɲgut. Ni'cni gunabdiidxreni loj Jesús,

<sup>28</sup> räjpreni:

—Dad, Mastr, basa'n Moisés guijtɔ loonu, lojga caj: “Palga guet te beɪɲ, gusaanni chäälni ruti xi'nni, nanabpac xca' bejtzni gunaaga te chu xi'nni coɲ laani xcuent tobejtzni.”

<sup>29</sup> Guyu' gajdz niguii, bejtz najcreni. Sas cua' niguigalooga chäälni. Che gujtni ruti xi'nni.

<sup>30</sup> Dxejcti cua' ni rojɔga gunaaga. Che gujtni, rutiza xi'nni.

<sup>31</sup> Sigajcɔa guzajc ni riojnga. Si'cɔa guläsnäj gunaaga guigajdzreni. Guiraareni gujt, nicla tejreni di xi'nreni niu'.

<sup>32</sup> Dxejcti näj gunaaga gujt.

<sup>33</sup> Guigajdzreni guläsnäjreni gunaare, ni'cni, che guibaɪsacreni lo rebɛɲgut, ¿chu chääɪ gacni, ä?

<sup>34</sup> Dxejc räjp Jesús lojreni:

—Lo guedxliujre ruchnaa rebeɪɲ, rudeedzarenɪ xindxa'preni ruchnaa.

<sup>35</sup> Niluxh rebeɪɲ ni agule Dios te chääreni xhaguibaa, näjɔa te guibaɪsacreni loj rebɛɲgut, di reni'c guchnaa, dizarenɪ gudeed xindxa'preni guchnaa,

<sup>36</sup> sa'csi diru gac guetreni, anajcreni si'c najc rexangɪ Dios. Laareni najc xi'n Dios sa'csi abaspaɪsac Diosreni.

<sup>37</sup> Moisésli basule' xcuent ni rbaɪsac rebeɪɲ loj rebɛɲgut che bacuaani diidx xcuent yajɔ ni gurebajɪ. Ro'c gurejdxni Dios räjpni: “Xtios Abram, Xtios Isaac, näjɔa Xtios Jacob”, ni'cni nabajɪpacreni lo Dios.

<sup>38</sup> Sa'csi di Dios gac Xtios rebɛɲgut; najcni Xtios rebeɪɲ ni nabajɪ par tejpas, sa'csi par laani guiraa rebeɪɲ nabajɪ.

<sup>39</sup> Dxejc gaaɪ reni ruluii leii badzu'reni diidxre, räjpreni lojni:

—Mastr, laaca guniilu.

<sup>40</sup> Sa'csi dirurenɪ niajɔ niniabdiidxrurenɪ lojni.

### *Chu xi'n najc Crist*

*(Mt. 22:41-46; Mr. 12:35-37)*

<sup>41</sup> Dxejcti räjp Jesús lojreni:

—¿Xho mood rniireni Crist najc xi'n toDavid, ä?

<sup>42</sup> Ni lagajc toDavid bacuaa lo reguijtz ni laa reSalmo:

Dad Dios räjp lo Xtadä:

<sup>43</sup> “Gurej xladbeä cheni guidzujɪni dxej ni gudzugä guiraa ni rdxe'ch lojlu te gacbeereni luj rnibeelu guira'ti.”

<sup>44</sup> ¿Xho mood gacni xi'nni palga rniɪ toDavid lojni “Dad”?

### *Rucuaquij Jesús reni ruluii leii*

*(Mt. 23:1-36; Mr. 12:38-40; Lc. 11:37-54)*

<sup>45</sup> Guiraa rebeɪɲ cagucuadiajɔ che räjp Jesús loj rexpejɪpacni:

<sup>46</sup> —Colyajɔ cuidaad reni ruluii leii, sa'csi rdaxagɪajzreni rajcwreni lajɔ siool, rlajzreni saru guinii guiraa rebeɪɲ “xchan” lojreni, rlajzreni jiu beɪɲreni nez loguii, rlajzreni cuereni lo reyagxhilsa'c neɲ reguidobäz, näjɔa cadro rajc lanij.

<sup>47</sup> Rudzucajzarenɪ rehxixten regunabiuud, dxejc rolreni rele' siolduxh che rniabrenɪ lo Dios te fii rebeɪɲ, te naa beɪɲ najcreni beɪɲdxan, luxh lojreni suxhɪ Dios te castigwroru.

## 21

*Gojn xten te gunabiuud*  
(Mr. 12:41-44)

1 Nen guidoro bahuii Jesús cagusäl rebenrajp gojn nen te guiñ cadro rdojp gojn.

2 Bahuiizani lo te gunabiuud, lacti proobni. Basälñi xcojnñi nen guiñga, tio'ptis melbáz basälñi.

3 Dxejc räjp Jesús:

—Rniliäpac lojtu, gunabiuud proobga basälñi loj guiraa reni casäl gojn,

4 sa'csi guiraa redex ni cagusäl xcojnñi casälreni tudxe'nsi xmeelreni, niluxh gunaare loj xcälproobni, basälñi guiragajc ni rajpni te jio' xhi gauni.

*Räjp Jesús sibijl guidoro*  
(Mt. 24:1-2; Mr. 13:1-2)

5 Yu' reni cayujy diidx xcuent guidoro, räjpreni:

—Lacti sacruduxh rienñi sa'csi guisa'c naccheeni, suchenäjzani xhidajl recossa'c ni badeed bejn si'c gojn.

Dxejc gunii Jesús lojreni, räjpni:

6 —Sidzujñ dxej sibijl guiralii ni cahuiitu, nicla tej guiñ di jia'n yejc sa'ni, guiragajcni sibijl.

*Reseen ni chu che nitloj guedxliuj*  
(Mt. 24:3-28; Mr. 13:3-23)

7 Dxejc gunabdiidx rexpejn pacni lojni, räjpreni:

—Dad, Mastr, ¿guc gacni? ¿Xhi seen chu che gac recosga?

8 Räjp Jesús lojreni:

—¡Colsusin te na'c gusgueereni la'tu! Sa'csi xhidajl reni jiaäd sinii: “Narä nacä Crist”, o “Asiädgajxh redxex che jiaädni”, per na'c chalilajztu xtiidxreni, na'ca chanajltureni.

9 Luxh che jiejn diajgtu cayajc guer cadilñäj sa' bejn, na'c guidxeljbtu, sa'csi ganid recosga gac, luxh gad galđi nitloj guedxliuj.

10 Dxejc sanuu cayäjpn lojreni:

—Säjs te nación, sucuanäj stee nación, näjza te ladx bejn sucuanäj stee lajdx bejn.

11 Sajcza xuro, su' gubijn, su'za yälgujidx nez ree nez rec. Luxh xhaguibaali sien guiraloj ni ruchejb näjza seenro.

12 Luxh ganid gac recosre, siniaazreni la'tu, sirinajlreni la'tu, suteedreni la'tu trabajw. Suteedreni la'tu lo reben guidobáz, susälzaren i la'tu nen latzguiib, sinäzaren i la'tu nez loj reii näjza gubernadoor sa'csi rinälajztu xtidxä.

13 Luxh guiraa dee sajctu te gac gusule'tu xtidxä lojreni.

14 Na'c gunxgaatu xhigab nen lastootu xhini'c guiniitu lojreni,

15 sa'csi narä sunidxä diidx guiniitu, sunidxäza yälñajn lojtu te digac gudzu'reni diidx lojtu niclaza gacdi guiniyajreni xtiidxtu.

16 Näjza rexuczajntu sibire lojtu, suto'reni la'tu, sigajcza rebejtztu, resa'tu, rexamiigwtu, luxh yu'tu sugu'treni.

17 Guiraa rebejn guedxliuj sibälaz la'tu sa'csi rinälajztu xtidxä.

18 Niluxh ni'cla tej xquidxejctu di nitloj.

19 Luxh palga sutijptis lajztu, sajptu yälñabajñ par tejpas.

20 'Che fiitu tre' xhidajl soldaad guideb gabi guedx Jerusalén colyabee abidzujñ dxej ni guibijlñi.

<sup>21</sup> Dxejc reni yu' guedx Judea, nanab guxuṇreni chacuatzlojreni neṇ redajn; reni yu' guedx Jerusalén, nanab jiunejzreni ro'c; reni suga' lo niaa, na'c guibi'reni lo guejdxga,

<sup>22</sup> sa'csi neṇ redxejga sujn Dios fis lo guejdxga te soob rediidx ni caj lo reguijtz xten Dios.

<sup>23</sup> Probe'za regunaa ni nuu báz neṇ redxejga, nájza regunaa ni ca' báz, sa'csi su' yälhuinduxh lo guedxliuj, nájza fis ni gun Dios loj rebejnga.

<sup>24</sup> Yu'reni guet lo guer, yu'zarení chää pres, sijreni balti guedxzijit. Dxejc rebenzijt sinibee guedx Jerusalén che guiza'li redxej ni gusaan Dios guinibee rebejn ni di gac xpejn Israel.

### *Cheni jiääd Xi'n Niguii*

*(Mt. 24:29-35, 42-44; Mr. 13:24-37)*

<sup>25</sup> Rájpzani:

—Dxejc su' seen lo gubijdx nájza lo bäii, nájza loj rebajle' ni yu' xhaguibaa. Luxh lo renacion guedxliuj su' rebejn yärsia', di jien xhi gunreni, sidxebduxhreni sa'csi siejn diajgreni chubeduxh lo nisdoo, säsduxh nis ni räjs lo nisdoo.

<sup>26</sup> Sitiol rebejn xcuent yälrdxebduxh che gunreni xhigab xhicharuni'c gac lo guedxliuj, sa'csi náj guideb guibaa sinibsejs.

<sup>27</sup> Dxejcti suhuiireni lo Xi'n Dios ni gujc Niguii, siäädni lo te za guideb xcälrnibeeni, nájza yälrdimbichaduxh.

<sup>28</sup> Che guisloj gac recosre, colsutijp lajztu, colguiliäs yejctu, colguibalajz sa'csi asadzujn dxej gusilajztu.

<sup>29</sup> Guniizani stee cuent lojreni, rájzni:

—jColhuui lo yagiigw nájza lo guiraa reyajg!

<sup>30</sup> Che fiitu acabääni be'n, colyacbee lagajc la'tu, abidzungejxh bäii nisguij.

<sup>31</sup> Sigajcza che fiitu agusloj cayajc recosre, colyacbee asiäddzujn xcälrnibee Dios.

<sup>32</sup> 'Rniliäpac lojtu, guiraa recosre sajc ansde guet rebejn ni yu' naj.

<sup>33</sup> Guibaa nájza guedxliuj sinitloj, rextidxä dini nitloj.

<sup>34</sup> 'jColsusin lagajc la'tu! Na'c gusaantu cha lajztu yälrausa'c, yälrä', yälga'ptu xhixtentu, dxejc ditu gachee che bidzujn dxejga.

<sup>35</sup> Sa'csi si'c sidzujn dxejga loj guiraa reben guedxliuj.

<sup>36</sup> Colsusin, colbejdz, colguiniabtis lo Dios, te gac laatu lo guira'ti ni gac, gacza suutu nez loj Xi'n Dios ni gujc Niguii.

<sup>37</sup> Rdxee ruluii Jesús neṇ guidoro dxejc guxhijn sajjia'nni yejc dan Oliib.

<sup>38</sup> Rsilru ristie rebejn te rdzujnreni lo Jesús neṇ guidoro casob rsil, te gucuadiajgreni rextiidxni.

## 22

### *Ria'nreni diidx xho guiniaazreni Jesús*

*(Mt. 26:1-5, 14-16; Mr. 14:1-2, 10-11; Jn. 11:45-53)*

<sup>1</sup> Siäddzungejxh dxe lanij che rajwreni yätxtiil ni di säguij, laaza lanijga pascw.

<sup>2</sup> Dxejc reni rnibee loj rebixhojz nájza rebejn ni ruluii leii caguuilreni xho gunreni te ju'treni Jesús, sa'csi rdxejbreni rebengejdx.

<sup>3</sup> Dxejc biu' benṇxab lastoo Judas ni laaza Iscariote, ni najc tej retzubitio'p xpejn pacni.

<sup>4</sup> Dee huininäjni dade' ni rnibee loj rebixhojz näjza loj reni rnibee rexcuxhtis guidoo. Guninäj Judasreni xho gunni te gutedni Jesús ladzn̄aareni.

<sup>5</sup> Dxejc bibalajzreni, bia'nreni diidx gudeedreni meel lojni.

<sup>6</sup> Cuäjbtı Judas, dxejcnı guslojni caguilni xho gunni gutedni Jesús ladzn̄aareni che rut bejn̄di suga'.

*Xchej xten Dad Jesús*

*(Mt. 26:17-29; Mr. 14:12-25; Jn. 13:21-30; 1Co. 11:23-26)*

<sup>7</sup> Bidzujn̄ dxe lanij che rajwreni yätxtiil ni di säguıj, che rugu'tzareni te xiil si'c ni caj lo xleii toMoisés.

<sup>8</sup> Dxejc baxhal Jesús Pedr näjza Juan, räjpni lojreni:

—Colchayejn xchej xten pascw te guidaununi.

<sup>9</sup> Dxejc laareni gunabdiidxreni lojni, räjpreni:

—¿Caro rlajzlu choyennuni?

<sup>10</sup> Räjp Jesús lojreni:

—Cheni jiu'tu lo guejdx, sidxaagtu te dade' ni nuu te re' nis. Colchanajni, coljiu' rolıjz bejn̄ cadro jiu'ni laani.

<sup>11</sup> Dxejc colye'tz lo bejn̄ ni najc rolıjzni ro'c: “Si'c naj Dad Mastr: ¿Con yu' cadro sajz gauxchenää rexpənä naj pascw?”

<sup>12</sup> Dxejc guluini lojtu te yu' ni sojb jiaa yejc stee yu'. Asuchexгаа yu'ga. Ro'c colyejn̄ xhi guidaunu.

<sup>13</sup> Sä'tireni. Si'ctis ni räjp Jesús lojreni, si'cpac bidxälreni. Dxejc bejnreni xchej xte lanij pascw gaureni.

<sup>14</sup> Che bidzujn̄ or, gurenäj Jesús rexpejn̄pacni lo mex.

<sup>15</sup> Dxejc räjpni lojreni:

—Guyuduxhä gaan gaunääpactı xchej xten pascw ansde tedä trabajwduxh.

<sup>16</sup> Sa'csi rniä lojtu, diruna gaunää la'tu pascw cheni guidzujn̄li dxej ni gacni lo xcälrnibee Dios.

<sup>17</sup> Dxejc cua'ni te co'p, badeedni xquixtios lo Dios, räjpni:

—Colyá' dee, colgudeedni lo sa'tu.

<sup>18</sup> Sa'csi rniä lojtu, diruna yä'ä nis ni rii yejc uub stehuält cheni guidzujn̄li xcälrnibee Dios.

<sup>19</sup> Dxejctı cua'ni yätxtiil, badeedni xquixtios loj Dios, gula'nini, gudisnini lojreni, räjpni:

—Dee najc si'c tiexhä ni gudedä ju'treni xcuenttu. Colyejn̄ screeza te guinalajztu narä.

<sup>20</sup> Si'cza bennäjni co'p che guluıjz gudajwreni, räjpni lojreni:

—Ni yu' neñ co'p najc si'c xtienä ni guixe' che ju'treni narä xcuenttu te si'c jiu' didxcoob ni jia'n Dios con rebejn̄ ni aguleni.

<sup>21</sup> Per bahuılaare, bejn̄ ni guto' narä sobganäj narä lo mexre.

<sup>22</sup> Guliipacni, Xi'n Dios ni gujc Niguıi sinuu tedni loj nezyuj ni abaluii Dios lojni. Luxh proobza bejn̄ ni guto' narä.

<sup>23</sup> Dxejc gusloj canabdiidxreni lo sa'reni, ¿chuchani'c gunni?

*Cayejyreni chuni'c najc beñroru*

<sup>24</sup> Sas gusloj cayejyreni, don chuni'c guibee gac beñro lojreni.

<sup>25</sup> Dxejctı räjp Jesús lojreni:

—Rereii ni rnibee lajdx bejn̄ ni digac xpejn̄ Israel, rnibeereni lojreni astoo xtenpacreni najc reguejdxga. Luxh rebeñguejdxga rniı lacti hueen najc rereııga.

26 Per la'tu na'c gactu si'c. Nani najc beṅgoolru lojtu, ni'c riäjł gacni si'c najc ni huinru lojtu. Luxh nani rnibee riäjł gacni si'c mos.

27 ¿Chuni'c sajcru lo bejn? ¿La bejn ni rbej lo mex te gauni o la ni ruteed xhi gaureni lo mex? ¿La xhet sajcdiru bejn ni sojb lo mex, ä? Niluxh narä yu'ä lojtu si'c ni ruteed xhi gauni.

28 'La'tu najctu ni gusunäj narä guideb ni gudedä retrabajw ni gudedä.

29 Ni'cni narä runidxä yälrnibee lojtu sigajc ni baniidx xtdad yälrnibee loä,

30 te gautu, yätu lo xmexä xhaguibaa, te cuezatu lo yagxhil cadro guntu yälguختis loj rexpejn guitzubitio'p rexagdoo Israel.

*Räpxgaa Jesús di Pedr guicäjp numbeeni*  
(Mt. 26:31-35; Mr. 14:27-31; Jn. 13:36-38)

31 Räjł Jesús loj Simón:

—Simón, Simón, agunab beṅdxab ni laa Satanás luj te gusniibni luj si'c rusniib bejn xob te jiani.

32 Narä agunabä lo Dios xcuentlu te na'c jiäädx xcälrlilajzlu. Luxh luj che gusiejch lajzlu, guibi'lu, bastioob lastoo resa'lu.

33 Räjł Simón lojni:

—Dad, narä sirinalälu; mase gusäureni luj latzguuib, näjza narä siäunäälü; mase ju'treni luj, näjza narä setnäälü.

34 Dxejcti räjł Jesús loj Simón:

—Pedr, rniä lojtu, nicla gajd guidgaa cuedxa' nadxej niluxh luj alaräjplu choṅli huält, dipaclu gumbee narä.

*Nanab soob rediidx ni bacuaareni xcuent Jesús*

35 Dxejc gunabdiidx Jesús lojreni räjłpni:

—Che ganaxtu baxhalä la'tu, xhet bolsdi sanätu, nicla carteerdi, niclaza stee gura'chdi, ¿la yu' xhi biqiiintu, xhi biäädx lojtu, ä?

Dxejc räjłpni:

—Xheti.

36 Dxejc räjłpni lojreni:

—Luxh naj rniä lojtu, ni rajp bols, suchanänini; sigajcza carteer. Luxh ni di ga'p espaad, guto'ni xchamarni te siini tejni.

37 Sa'csi rniä lojtu, sisiojb rediidx ni caj lo requijtz Dios xcuentä, cadro caj: “Bigabnäjni reben latsiaj.” Guiraa ni caj lo reguijtz xten Dios xcuentä nanab soobpacni.

38 Dxejc räjłpni lojni:

—Dad, aree tio'p espaad.

Dxejc räjłpni lojreni:

—Sajł reni'c.

*Rbedx-rniab Jesús loj Dios*  
(Mt. 26:36-46; Mr. 14:32-42)

39 Dxejcti birii Jesús, si'cni rujnpacni, sääni nez dajn ni laa Oliib. Dxejc sanajł rexpejn pacni.

40 Che bidzujłreni ro'c, räjłpni lojreni:

—Colcujdx, colnab lo Dios te na'c jiajbtu lo dojl.

41 Dxejc gubicaj Jesús lojreni, huijni te lajt zite' cadro suga'reni, si'cti cadro rdzujł te guij che rucuaanini. Ro'c bazuxhijbni, gurejdx-gunabni lo Dios,

42 räjłpni:

—Xtdä, palga rlajzlu, baslaa narä loj trabajwduxhre. Niluxh na'c gacni si'c ni rlazä narä. Bejn si'cni rlajzlu gunlu.

43 Dxejc biricaj te xangl Dios lojni te badeedni yälrutiplajzni.

44 Lałni cadejdni trabajwduxh, cayac-huinduxh lajzni, cabedx-canabruni lo Dios. Guzunislini gusloj catejb lo yuj biniduxh si'c rejn lojni.

45 Cheni huisuni, gulujx gurejdx-gunabni lo Dios, huijni cadro suga' rexpejn pacni. Ro'c bidxálnireni nagayejs guiraareni sa'csi cayac-huin lajzreni.

46 Dxejc räjpni lojreni:

—¿Xhicuent nagayejstu? ¡Cołchastie! ¡Cołnab lo Dios te na'c jiajbtu lo dojl!

### *Che gunaazreni Jesús*

(Mt. 26:47-56; Mr. 14:43-50; Jn. 18:2-11)

47 Lał ni canii Jesús lojreni, bidzujn xhidajl bejn. Tej rexpejn pacni ni laa Judas, nijdni nez loj rebejn ga. Dxejcti gubigni loj Jesús, te bachagro'ni loj Jesús.

48 Dxejc räjp Jesús lojni:

—Judas, ¿la con te yäl ruchagro' ruteedlu Xi'n Dios ni gujc Niguii ladznaa rebejnre, ä?

49 Che bahuii reni suganäj Jesús xhini'c cayajc ro'c, gunabdiidxreni loj Jesús, räjpreni:

—Dad, ¿la sixa'tnu yejcreni con spaad, ä?

50 Sas tej rexpejn Jesús gudılınäj te mos xten ni rnibee loj rebixhojz, batiu'ni diajgni ladbee.

51 Dxejc räjp Jesús lojreni:

—¡Agujc! ¡Cołgusaanreni!

Dxejc gudajn Jesús diajg mosga, basiajcnini.

52 Gunigajc Jesús loj reni rnibee loj rebixhojz näjza reni najc guixhajn xten guidoo näjza rebejnool, guiraa reni siädxiiinini, räjpni:

—¿La siädnațu spaad näjza garo't, astoocanu siädxiiitu te gubaan, ä?

53 Cheni suga'a lojtu guixe-guixee nen guidoo, ditu nuhual narä. Per dee najc xortu, luxh arnibee yäl nacäjy la'tu.

### *Di Pedr guicäj numbeeni Jesús*

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

54 Dxejcti gunaazreni Jesús huiäreneni roliz bixhojz ni rnibee lo guiraa rebixhojz. Siädnațl Pedrni zit-zijt.

55 Che bidzujnreni gule'creni guiboo galäii lole' xten bixhojzga, gurejreni guideb gabi, te bidxa' lajzreni. Näj Pedr nadxaag lojreni gurej ro'c.

56 Dxejc te gunaa ni rujn dzuun ro'c, che bahuiini sobga' Pedr ro'c, rdxelotisni lojni, räjpni:

—Näj niguiire guyunäj Jesús.

57 Dxejc basuni' Pedr räjpni:

—Nan, dina gumbeäni.

58 Che gojl stera't, che bahuii stee bejn lojni, räjpni lojni:

—Näj luj najclu te rexpejn ni.

Per Pedr räjp lojni:

—Gurniälojlu, Dad, dina gacä xpejn ni.

59 Che gudejd si'cti teb or, räjp stee bejn lojni:

—Guliipacni, näj bejnre guyunäjni, sa'csi laani najczani te bejn Galilee.

60 Dxejc räjp Pedr lojni:

—Gurniälojlu Dad, dipacna ganä xhini'c canii luä.

Lałni canii Pedr rediidxre, guredxa' te guidgaii,



<sup>61</sup> luxh gubiréza Jesús, bahuidzu'tzni lo Pedr, dxejc banalajz Pedr nani gunii Jesús lojni, rájpmi: “Che gajd guidgaii cuedxa', abazuni'lu choñ huält, rájplu dilu gumbee najrà.”

<sup>62</sup> Dxejcti guc-huin lajz Pedr, biriini ro'c, ronduxhni.

### *Rniyajreni Jesús*

(Mt. 26:67-68; Mr. 14:65)

<sup>63</sup> Rebejn ni canäj Jesús, gusloj caguxhishnäjreneni, caguijnzeneni.

<sup>64</sup> Dxejc basäureni lojni, gudajpreni lojni, rájpmi lojni:

—¡Gunii chuni'c gudijnlu!

<sup>65</sup> Luxh guiralaj cayäjbreni lojni, caniyaduxhneni.

### *Bidzunäjreni Jesús nez loj rebixhojz*

(Mt. 26:59-66; Mr. 14:55-64; Jn. 18:19-24)

<sup>66</sup> Che bara yääl, bidojpbengool ni rnibee, näjza reni rnibee loj rebixhojz, näjza rebejn ni ruluii lei, huinäreni Jesús te suuni nez lojreni nen yu' cadre rujnreni yälguxhtis. Dxejcti rájpmi lojni:

<sup>67</sup> —Palga luj najclu Crist, bicäjpni loonu.

Dxejc badzu' Jesús diidxre lojreni, rájpmi:

—Palga guicäpäni, ditu chälilajz.

<sup>68</sup> Luxh palga gunä te yälgunabdiidx lojtu xcuent Crist, ditu gudzu' diidxga loä.

<sup>69</sup> Per najli sibej Xi'n Dios ni gujc Niguii xladbee Gueb Dios ni yu' xhaguibaa.

<sup>70</sup> Dxejc gunabdiidx guiraareni lojni, rájpmi:

—Mbaj pues, ¿la luj najclu Xi'n Dios, ä?

Dxejc badzu' Jesús diidxre lojreni rájpmi:

—Nacäni, si'cni najtu la'tu.

<sup>71</sup> Dxejc rájpmi lo sa'reni:

—¿Xhirucxhamaaz rlajztu? Dirunu guiquiin diidx guinii bejn, sa'csi lagajc nuurnu abiejn diajgnu diidx ni guniini lagajc laani.

## 23

### *Jesús nez loj Pila't*

(Mt. 27:1-2, 11-14; Mr. 15:1-5; Jn. 18:28-38)

<sup>1</sup> Dxejc huisu guiraareni, huinäreni Jesús nez loj Pila't.

<sup>2</sup> Ro'c guslojreni cabe'creni xquejni, rájpmi:

—Bidxälnu bejnre cayujnni bieje lo rexejpnnu. Rájpmi xhet nanabdi quixnu impuest lo reii César. Caniizani laani najcni Crist, nalajznu najczani reii.

<sup>3</sup> Dxejc gunabdiidx Pila't lojni, rájpmi:

—¿La luj ni najc reii xten rexejpn Israel, ä?

Sas badzu' Jesús diidxre rájpmi:

—Najcni lagajc si'c ni guniilu.

<sup>4</sup> Dxejc rájpmi Pila't loj reni rnibee loj rebixhojz näjza loj guiraa rebejn:

—Dina guidxälä nicla tej dojl xten bejnre.

<sup>5</sup> Niluxh laareni sanuutis caniireni, dipru caniireni, rájpmi:

—Guiraa reben Judea cayu' yärsia' xcuent xcäl'ruluiini. Guslojni guedx Galilee, luxh reeli sanuu caguluiinini.

### *Jesús nez loj Herodes*

<sup>6</sup> Che biejn diajg Pila't rediidxre, gunabdiidxni: “¿La Galilee siääd bejnnga?”

<sup>7</sup> Cheni räjpreni ro'c siäädni, baxhañnini loj Herodes ni najc gubernadoor xten Galilee, sa'csi neñ redxejga yu' Herodes guedx Jerusalén.

<sup>8</sup> Che bahuii Herodes loj Jesús, bibalajzni sa'csi agujc xchej rrajzni fini lojni, sa'csi abiejn diagni diidx xcuent ni cayujnni. Luxh rrajzni fini gunni te milaagwr.

<sup>9</sup> Xhidajl yälgunabdiidx bejn Herodes, luxh xhet guniidi Jesús.

<sup>10</sup> Ro'c suga'za reni rnibee loj rebixhojz nájza rebejn ni ruluu leii, cabec-duxhrureni xquejni.

<sup>11</sup> Dxejc gulälaz Herodes náj rexsoldaadni Jesús, baxhiznäjrenini, ni'c bashuajcwrenini te ladsa'c sa' ni rajcw reii, dxejcti baxhañsacrenini loj Pila't.

<sup>12</sup> Lagajc dxejga, Pila't nájza Herodes gujcreni amiigw, luxh galoo bidxe'ch lo sa'reni.

### *Gunibeereni guet Jesús*

*(Mt. 27:15-26; Mr. 15:6-15; Jn. 18:39-19:16)*

<sup>13</sup> Dxejc gurejdx Pila't reni rnibee loj bixhojz, nájza rebengool ni najc guxhtis, nájza rebenguejdx.

<sup>14</sup> Dxejc räjpni lojreni:

—La'tu biädna'tu bejnre loä, najtu caguquilni rebejn gunreni bieje, luxh narä agunabdiidxä guiraloj lojni nez lojtu, luxh abahuiitu dina nidxälä nicla tej dojl ni cagucuaquijtuni.

<sup>15</sup> Niclaza Herodes di nidxäl nicla tej dojl, ni'cni baxhañsacnini loonu, luxh abahuiitu xhet dojldi bejnne te guetni.

<sup>16</sup> Ni'cni quinäni, dxjecti guslääni.

<sup>17</sup> Najc costumbr rusläa Pila't te bejn ni yu' neñ latzguiib casob rajc lanijre.

<sup>18</sup> Per guiraareni guredxa'reni si'c tejsi bejn, räjpreni:

—jBagu't bejnre, basläa Barrabäs!

<sup>19</sup> Barrabäs najc ni basäl'reni latzguiib sa'csi batojpni te cuaa bejn ni bacuanäj resoldaad xten Rom, nájza sa'csi yu' chu bagu'tni.

<sup>20</sup> Rrajzpac Pila't gusläani Jesús, ni'c gunisacni lojreni,

<sup>21</sup> niluxh rebejn dipru guredxa'reni, räjpreni:

—jBacuaani lo cruzj, bacuaani lo cruzj!

<sup>22</sup> Riojn gunisac Pila't lojreni, räjpni:

—¿Xhi dölduxh bejnne? Xhetlidi dojl rdxälä bejnne te guetni. Ni'cni siguinäni dxejc suslääni.

<sup>23</sup> Luxh laareni sanuutis guredxa'reni, gunabreni xcajni lo cruzj. Luxh sa'csi guredxa'tisreni, bejntireni gaan gujc si'c ni rrajzreni.

<sup>24</sup> Dxejc cuäjb Pila't gunibeeni gac si'c ni gunabreni.

<sup>25</sup> Dxejc basläani bejn ni yu' latzguiib sa'csi bejnne bieje, bagu'tzani bejn, dxejc badeedni Jesús lojreni te gunnäjrenini si'ctis ni rrajzreni.

### *Che cuaj Jesús lo cruzj*

*(Mt. 27:32-44; Mr. 15:21-32; Jn. 19:17-27)*

<sup>26</sup> Cheni sanäreni Jesús xcaj lo cruzj, gunaazreni te bejn ni laa Simón ni siääd guedx Cirene; basaj bejnğa lo niaa. Dxejc basguurenini cruzj, siädnajltini dejt Jesús.

<sup>27</sup> Siädnajlza xhidalduxh bejn, nájza xhidajl gunaa ni cayonduxh, cabedxa'reni sa'csi cayac-huinduxh lajzreni xcuent Jesús.

<sup>28</sup> Dxejc gubiré Jesús, räjpni lojreni:

—Gunaa Jerusalén, na'c roontu xcuentä, colyoon lagajc xcuenttu nájza xcuent rexi'ntu.

<sup>29</sup> Sa'csi sidzujn dxej gäbreni: “Chicbaa regunaa ni di gacdi chu xi'nni, chicbaaza reni di nuxi'n, renani di nusiä' báz.”

<sup>30</sup> Dxejc guisloj rebejn gäb loj redajn: “Coljiajb yejcnu”, säjzbareni loj relom: “Colgucua'tz nuurnu.”

<sup>31</sup> Palga scree runnäjreni narä ni nacä si'c te yagnaga, aticaxh gunnäjreni la'tu ni najc si'c te yagbijdz.

<sup>32</sup> Sanäzareni tio'p benguijdx xcajzareni loj recrujz, guetnäjreni Jesús.

<sup>33</sup> Che bidzujnreni te lajt ni laa Calabeer, ro'c bacuaareni Jesús lo te crujujz, bacuaazareni guiro'p rebenguijdxga lo stio'p crujujz, tejni xladbee, steeni xladbäjgwni.

<sup>34</sup> Cheni cagucuaa rebejn reni lo crujujz, gunii Jesús, räjpni:

—Xtadä, badzucaj xtojł rebejnre, sa'csi direni gan xhini'c cayujnreni.

Dxejc gudzujt resoldaad daad yejc xhajbni, te gudisreni xhajbni cua'renini.

<sup>35</sup> Suga' rebejn ro'c cadxelojtisreni. Näjza reguxhtis caguxhisnäjreni laani, cayäjpreni:

—Balti bejn baslaani, naj suguslaani lagajc laani palga guliini laani najcni

Crist ni gule Dios.

<sup>36</sup> Näjza resoldaad caguxhisnäjni, gubigreni lojni te badeedreni bin-nii yäni.

<sup>37</sup> Dxejc räjpreni lojni:

—Palga guli najclu reii xten rexpejn Israel, baslaa lagajc luj.

<sup>38</sup> Luxh bacuaareni gaii diidx loj te baräjd ni cuaj yejc crujujz. Con didx griegw, con didx latin, näjza didx hebreo, bacuaareni scree: “Dee najc Reii xten rexpen Israel.”

<sup>39</sup> Te rebejn guijdx ni najł lo te crujujz ni caj cuä'ni caniyajni Jesús, räjpni lojni:

—Palga luj najclu Crist, baslaa lagajc luj nägajcza nuurnu.

<sup>40</sup> Per benguijdx ni najł lo crujujz stelaadga gudidxa'ni loj stee benguijdx ni caniyaj Crist, räjpni:

—¿La dilu guidxejb Dios? ¡Ni cayajczalu tejsi castiigw!

<sup>41</sup> Per nuurnu cayajcnu castiigw ni riäjl gacnu te guidiixnu redojl ni biennu. Luxh laani xhet dojlđi bejnni.

<sup>42</sup> Dxejc räjpni loj Jesús:

—Bazalajzlu narä che guidzujnlu lo xcälrnibeelu.

<sup>43</sup> Dxejc badzu' Jesús diidxre, räjpni lojni:

—Rniliäpac lojlu, lagajc nadxej chunäjlu narä xhaguibaa.

### *Che gujt Jesús*

*(Mt. 27:45-56; Mr. 15:33-41; Jn. 19:28-30)*

<sup>44</sup> Agojl si'cti läidxej. Dxejc bicäyj guideb guedxliuj, si'c bianxcäyj si'cti rcachonti.

<sup>45</sup> Bicäyj lo gubijdx, luxh ladró ni najł nejn yudxanro xten guidoro, biräjsni gucni tio'p la'.

<sup>46</sup> Dxejcti guredxa' Jesús, räjpni:

—Xtadä, ladznaalu rutedä xaimä.

Che guniini si'c, gujtini.

<sup>47</sup> Che bahuii capitán ni rnibee loj resoldaad guiraa ni guzajc, gulä'pni xpala'n Dios, räjpni:

—Guliipacni, xhet dojlđi bejn bejnre.

<sup>48</sup> Guiraa rebejn ni suga' ro'c ni bahuii guiraa ni guzajc ro'c, gubi'reni rolijzreni, cayääzreni lagajc lastooreni.

<sup>49</sup> Luxh guiraa reni rumbee Jesús, nájza regunaa ni biädnajlmi che biriilini Galilee, zijtru bia'nreni cahuiireni guiraa recos ni cayajcre.

*Che biga'tz Jesús*

*(Mt. 27:57-61; Mr. 15:42-47; Jn. 19:38-42)*

<sup>50</sup> Guyu' te bejn ni laa José, lacti huen najcni, luxh laaca rujnni guira'ti. Siäädni guedx Arimatea, región Judea. Nadxaagzani loj reni rnibee nen guidoro xten rexpejn Israel.

<sup>51</sup> Cabäjzza José jiaäd yälrnibee xten Dios, ni'cni dini nidxaglazj nani bejn resa'ni.

<sup>52</sup> Dxejcti huijni lo Pila't, gunabni tiejxh Jesús.

<sup>53</sup> Che gulät'nini lo cruzj, batejbnini nen te bariaad, dxejcti bacua'tznini nen te baa ni guc-chee cuä' te guilaj. Nacoob baaga, nicla tej bejn gajd guiga'tz ro'c.

<sup>54</sup> Dxejga najc dxej ni rusucheereni guira'ti, luxh agojl jiu' dxej ni rusilajzreni.

<sup>55</sup> Regunaa ni guzanäj Jesús che biriilini Galilee huihuiireni robaaga te bahuiireni xho gudixhzeni togoolga nen baa.

<sup>56</sup> Che gubi'reni rolizreni bencheereni recuaan ni rlianexhduxh náj te ni najc si'c te saj ni rlianexhduxh ni ruzaareni retogool. Dxejcti basilajzreni dxej ni rusilajz bejn, si'cni caj lo xleii Moisés gunreni.

## 24

*Che gubansac Jesús lo rebengut*

*(Mt. 28:1-10; Mr. 16:1-8; Jn. 20:1-10)*

<sup>1</sup> Dxej ni gusloj xmaanga, rsildooru huinä regunaaga robaa recuaan ni rlianejxh ni bencheereni.

<sup>2</sup> Che bidzujnreni, bahuiireni agubicaaj gui ni rusäu ro' baa.

<sup>3</sup> Dxejc che biu'reni nen baaga, direni nidxäl tiejxh Jesús.

<sup>4</sup> Lał ni cadxelojreni, di jien xhi gunreni, biricaj tio'p dade' gusuj cuä'reni. Rdimbichaduxh xhajbreni.

<sup>5</sup> Bidxebduxh regunaaga, basajbreni lojreni lo yuj. Dxejc räjp redade'ga lojreni:

—¿Xhicuent siädtiltu te bejn ni nabajñ lo rebengut, ä?

<sup>6</sup> Rutini ree. Agubansacni. Colgusnaj lajztu rediidx ni guniini cheni guyusijcni Galilee,

<sup>7</sup> che najni lojtu: “Riäjł jiajb Xi'n Dios ni gujc Niguii ladznaa rebendojl, xcajzani lo cruzj, dxejc ni riojn dxejga sibansacni loj rebengut.”

<sup>8</sup> Dxejc banaj lajz regunaa xtidx Jesús,

<sup>9</sup> biriireni robaa, gubi'tireni te bijreni diidx lo retzubiteeb rexpejn pacni nájza loj rebejn ni yunäjreni.

<sup>10</sup> Reni huisa'n diidx loj rexpejn pac Jesús najc redee: Marii Magdalen, nájza Xuan, nájza Marii xnan Jacob, nájza sgaii gunaa.

<sup>11</sup> Niluxh rexpejn pacni bejn xhigab didxnayälmi, direni nililajz xtidx regunaaga.

<sup>12</sup> Dxejc huisu Pedr, ruxunlini huijni ro' baa. Che gudixhlojni, bahuiini nen baaga, ganaxtis bariaad dzuub te laad. Dxejc gubi'ni rolizni, rdxelojtisni xcuent ni gujc.

*Ni guzajc lo nezyuj ni sii guedx Emaús*

*(Mr. 16:12-13)*

13 Lagajc dxejga, tio'p rexpejn pacni sääreni te guejdx ni laa Emaús, ni ria'n si'cti tzubiteeb kilómetro loj guedx Jerusalén.

14 La<sub>1</sub> ni sasajreni lo nezyujga, cayujyreni diidx xcuent reni gujc ro'c.

15 La<sub>1</sub> ni caniireni gubig Jesús lojreni, gusloj sasanäjnireni.

16 Luxh mase cahuiireni lojni, yu' xhi badxojn niembeerrenini.

17 Dxejg gunabdiidx Jesús lojreni, räjpni:

—¿Xhini'c rujytu la<sub>1</sub> ni sasajtu, ä? ¿Xhicuent cayac-huin lajztu?

18 Tejreni ni laa Cleofas badzu' diidxre, räjpni:

—Guiraasi bejn najn xhi gujc ne<sub>1</sub> guedx Jerusalén. ¿La lujtis bia'nlu ne<sub>1</sub> guejdxga ni di gan xhi gujc ro'c, ä?

19 Dxejcti räjp Jesús lojreni:

—¿Xhini'c gujc ro'c?

Dxejc räjpreni lojni:

—Recos xcuent Jesús ni siäd guedx Nazare't, ni gujc te niguii ni gunii xtidx Dios, rajpni yälrnibeduxh xten Dios loj redzuun ni rujnni näjza loj rediidx ni rniini, nez loj Dios näjza nez loj rebejn.

20 Näjza xho bejn reni rnibee loj rebixhojz näjza rexcuxhtisnu, bateedrenini ladz<sub>1</sub>naa reni gunibee guetni, dxejc bacuaarenini lo cruzj.

21 Niluxh nuurnu cabääznu laani gacni nani nus<sub>1</sub>laa rexpejn Israel ladz<sub>1</sub>naa rebenzijt. Naj agujc cho<sub>1</sub> dxej ni gujc recosre.

22 Luxh yu' gaii gunaa ni nadxaag loonu ni baschelorejreni nuurnu. Barsil, che huijreni robaa xtenni,

23 direni nidxäl tiejxhni. Biädsa'nreni diidx loonu najreni bahuiireni lo tio'p xangl Dios ni räjp lojreni, aguba<sub>1</sub>nsac Jesús lo rebengut.

24 Dxejcti huihuii gaii sa'nu robaa, bahuiizarenini najcni si'ctis ni naj regu-naaga loonu, niluxh direni nuhuii loj Jesús.

25 Dxejc räjp Jesús lojreni:

—¡Lacti nayääl tre' xcäriejntu! Lacti ne<sub>1</sub> rililajztu xtidx redade' ni gunii xtidx Dios xcuent Crist.

26 ¿La di nungäj<sub>1</sub> tedxgaa Crist retrabajwduxhre dxejcti jiu'ni lo xcälrdimbicha' Dios, ä?

27 Dxejc gusloj cagusule'ni guiraa rediidx ni caj lo xquijtz Dios xcuent Crist. Guslonäjni xtidx Moisés, dxejc huinuuni basule'ni guiraa reguijtz ni bacuaa redade' ni gunii xtidx Dios.

28 Che bidzuj<sub>1</sub>reni guejdx cadro sääreni, bejn Jesús si'cni chanuuni chääni lo nezyuj.

29 Dxejc laareni bascuääzrenini te jiannäjnireni, räjpreni lojni:

—Biannäj nuurnu, sa'csi acayajc gudxej, agojl jiu' guxhij<sub>1</sub>.

Dxejcti biu' Jesús te jiannäjnireni.

30 Cheni sobganäjnireni lo mex, cua'ni yätxtiil, benle'nini, dxejc gula'nini, gudsnni lojreni.

31 Lagajc dxejg, baxhal Dios balojreni, biembeerreni Jesús, dxejc laani gunitlojni lojreni.

32 Dxejcti räjpreni lo sa'reni:

—¿La di lastoonu nibeguiboo cheni siädniini loonu lo nezyuj, che cagusule'ni xtidx Dios?

33 Dxejc dirureni nibäjz ro'c, alga gunasgajcneni nez, gubi'reni guedx Jerusalén. Ro'c bidxälreni abidojp xpejn pac Jesús näjza sgaai bejn.

34 Dxejcti bijreni diidx loj guiro'preni bidzuj<sub>1</sub>, räjpreni:

—Guliipac guba<sub>1</sub>nsac Jesucrist, luxh baluilojni loj Simón.

<sup>35</sup> Dxejc guiro'p reni bidzujn bijzareni diidx ni gusajcreni lo nezyuj, nāj xho biembeezareni Jesús che gula'ni yätxtiil.

*Baluiloj Jesús loj rexpejn pacni  
(Mt. 28:16-20; Mr. 16:14-18; Jn. 20:19-23)*

<sup>36</sup> Canisi'creni rediidxre chela baluiloj lagajc Jesús galäiireni, guniini xchan lojreni, räjpni:

— ¡Colcuedcxi lajztu!

<sup>37</sup> Per laareni rdxelorejreni bidxejbreni, naareni cahuiireni lo te sprit.

<sup>38</sup> Dxejc räjp Jesús lojreni:

— ¿Xhicuent cadxejbtu? ¿Xhicuent rac tio'p lastootu?

<sup>39</sup> ¡Colhuii reñaä, nājza reni'ä! Lagajc naräni. Colcajn narä te fiipactu laa naräni, sa'csi anajntu di te sprit ga'p bääl niclaza tzujt si'c rapä narä.

<sup>40</sup> Che guniini rediidxga, baluigajcni reñaani nājza reni'ni.

<sup>41</sup> Laḷ ni cadxelorejreni, di gacdi chalilajzreni, sa'csi cabaduxh lajzreni, räjpni lojreni:

— ¿La yu' xhi rajptu gauä ree, ä?

<sup>42</sup> Dxejc badeedreni te la' bälbigue', nājza te la' seer ni yu' tzujn.

<sup>43</sup> Ni'c cua'ni gudajwnini nez lojreni.

<sup>44</sup> Dxejc räjpni lojreni:

— Dee najc xtidxä ni rniä lojtu cheni yusicä lojtu, rniä riäjḷ soob guiraa rediidx xcuentä ni caj lo xleii Moisés, nājza lo rexquijtz redade' ni gunii xtidx Dios nājza ni caj lo rexquitz Salmos.

<sup>45</sup> Dxejcti basanijni xcäriejnreni te gucbeereni xhi säloj rediidx ni caj lo rexquijtz Dios xcuentni.

<sup>46</sup> Dxejc räjpni lojreni:

— Scree caj lo reguijtz: Nanab guet Crist, dxejc ni riojn dxej, guibaḷsacni loj rebengut.

<sup>47</sup> Sire'chza diidx xcuent xho rusḷaa Crist rebejn neḷ dojḷ che rusiejchreni lajzreni, che rililajzreni xtiidxni. Guedx Jerusalén guislojni, dxejc sire'ch diidx guideb guedxliuj.

<sup>48</sup> La'tu najctu testiigw guiraa recosre.

<sup>49</sup> Narä suxhalä Sprit Dxan xten Dios lojtu, ni'c coljia'n guedx Jerusalén cheni jiädläjzlini neḷ lastootu, guniidxni yäḷrniḷbee ni siääd xhaguibaali.

*Huäjs Jesús xhaguibaa  
(Mr. 16:19-20)*

<sup>50</sup> Dxejc huinä Jesúsreni stelaad guedx Jerusalén gajxh lo te guejdx ni laa Betania. Ro'c guläḷni ḷaani, benle'ni yejcreni.

<sup>51</sup> Laḷ ni cayujni si'c, gubicajni lojreni, huäjsni xhaguibaa.

<sup>52</sup> Peta laareni gulujx gojnrenini, dxejc cabalazduxhreni gubi'reni guedx Jerusalén.

<sup>53</sup> Ro'c guixe-guixee guyu'reni neḷ guidoro, calä'preni xpala'n Dios. Sug-acni si'c.

## Redidxhuen Xten Jesucrist Ni Bacuaa San Juan

### *Xtidx Dios najc te Niguii*

<sup>1</sup> Galodoo che gusloj guira'ti, ala yu' Diidx. Luxh nani najc Diidxga yunäj Dios, luxh Diidxga najc Dios.

<sup>2</sup> Che gajd gac-cheeli guedxliuj, yunäjni Dios.

<sup>3</sup> Xcuent laani benchee Dios guedxliuj nájza guira'ti ni yu' lojni. Guiraa recos ni yu' di gacdi niu'reni paru rutini.

<sup>4</sup> Laani gojp yäl'nabajn. Yäl'nabajnga najc bianij xten rebejn.

<sup>5</sup> Luxh bianijga rdimbicha' nez lo yäl'cäy, niluxh yäl'cäyga di niajcdi nusui-nini.

<sup>6</sup> Guyu' te niguii birilaj Juan, ni baxhal Dios.

<sup>7</sup> Laani biädni te basule'ni diidx. Biädsule'ni diidx xcuent bianij te nililajz guiraa rebejn diidx xcuent bianij.

<sup>8</sup> Laani dini gac bianij, laani biädsule'ni diidx xcuent bianij.

<sup>9</sup> Laa bianijpacga ni rusanij lastoo guiraa rebejn, luxh naj abiädni lo guedxliujre.

<sup>10</sup> Nani najc Diidxga guyu' lo guedxliujre, xcuent laazani guc-chee guedxliujre, luxh di reben guedxliujre nililajz chu najni najcni.

<sup>11</sup> Biädni loj rexpen Israel, niluxh rexpejni direni nicäjb niu'ni lojreni.

<sup>12</sup> Dxejc loj guiraa reni cuäjb guyu'ni lojreni, loj renani huililajz xtiidxni, loj reni'c badeedni yäl'rnibee gacreni xi'n Dios.

<sup>13</sup> Laa reni'c ni di gac si'c xi'n ben guedxliuj, ni gojl sa'csi rlajz te biniet chu xi'nni, dee najcpacreni Xi'n Dios sa'csi sudeedni yäl'nabajn par tejpas lojreni.

<sup>14</sup> Diidxga gujc te ben guedxliuj. Guläjzni lo guedxliujre, bahuulojzanu xcäl'rdimbicha'ni, si'c yäl'rdimbicha' xten xingan xteb xtadni, laani najcpacni nani sanälajz nuurnu, nani rnii didxlii loonu.

<sup>15</sup> Juan gunii xcuent Jesús. Guredxa'ni, räjpni:

—Laa dee ni rniä, nani siäd detzä sajcruni loä, sa'csi laani ganidni nabajni loä.

<sup>16</sup> Sa'csi guiraanu cua'nu xcäl'nasacduxhni, yäl'racnäy detz yäl'racnäy.

<sup>17</sup> Leii xten Dios biädna toMoisés, niluxh yäl'racnäy nájza redidxlii biädna Jesucrist.

<sup>18</sup> Rut chu tejdi abahuii lo Dios, xinxtebni ni yunäjpac Dios, laani basule'ni diidx xcuent Dios loonu.

### *Juan ni rutiobnis gunii chuni'c najc Jesucrist*

(Mt. 3:11-12; Mr. 1:7-8; Lc. 3:15-17)

<sup>19</sup> Dee najc diidx nani gunii Juan ni rutiobnis che baxhal rexpejn Israel rebixhojz nájza rexpejn guidoo ni laa levitas, biriireni guedx Jerusalén te sanabdiidxreni lo Juan, räjpreni lojni:

—¿Luj chu najclu?

<sup>20</sup> Dxejcti bicäjpni lojreni, xhet bacua'tzdini lojreni, räjpni:

—Et narädi nacä Crist ni jiäd.

<sup>21</sup> Dxejcti gunabdiidxreni lojni, räjpreni:

—¿Chuxhni'c najclu? ¿La lujni najc Elías?

Räjpni:

—Dina gacäni.

Räjpreni:

—¿La najclu te dade' ni gunii xtidx Dios ni cabääznu jiaäd?

Dxejc räjpni:

—Dina gacäni.

<sup>22</sup> Räjpreni:

—¿Chuxhni'c najclu? Te chonänu diidx loj reni baxhaļ nuure. ¿Xhi rniilu, chuxhni'c najclu?

<sup>23</sup> Räjp Juan:

—Narä nacä nani rbedxa' nez lo reyubijdz si'c ni gunii Isaías, ni gunii xtidx Dios scree: “Colyensa'c xnezyuj Dad.”

<sup>24</sup> Rebejn ni baxhaļ redee najc reni rniireni “farisee”.

<sup>25</sup> Dxejc gunabdiidxreni stee, räjpreni lo Juan:

—¿Xhicuent rutiobnislu palga dilu gac Crist ni jiaäd niclaza Elías niclaza stee niguii ni rnii xtidx Dios ni cabääznu jiaäd, ä?

<sup>26</sup> Dxejcti räjp Juan lojreni:

—Narä rutiobnisä con nis, niluxh galäiitu yu' tej nani ditu gumbee.

<sup>27</sup> Laa dee ni siääd detzä niluxh di nungäjl nicla surloä cuää xcura'chni, sa'csi sajcruni loä.

<sup>28</sup> Guiraa recosre gujc stelaad cadro laa Betábara, ni ria'n stelaad ro' gueu Jordán cadro cagutiobnis Juan.

### *Jesús najc Xile' xten Dios*

<sup>29</sup> Che bara yääl, bahuü Juan siääd Jesús lojni. Dxejc räjpni:

—¡Colhuii! Aree Xile' xten Dios nani rudzucaj xtojļ rebejn guedxliuj.

<sup>30</sup> Lagajc xcuent dee ni rniä cheni guniä lojtu: “Detzä siääd te niguii ni sajcru loä, sa'csi ganidli narä agac nabajñni.”

<sup>31</sup> Luxh dina niembeäni, per biädtiobnisä con nis te guluiä lo rexpejn Israel chu najcni.

<sup>32</sup> Guniiza Juan stee diidx xcuentni, räjpni:

—Narä bahuiä biäjt Sprit Dxan xten Dios xhaguibaa si'c te palom guzudxini yejcn.

<sup>33</sup> Dina niembeäni, per nani baxhaļ narä gutiobnisä con nis, laani najni loä: “Cheni fiilu jiajt Sprit Dxan xten Dios xhaguibaa si'c te palom, sudxini yejc te bejn, laanini najc ni gutiobnis con Sprit Dxan xten Dios.”

<sup>34</sup> Narä abahuüä lojni, ni'cni rniiliä: “Dee ni najc Xi'n Dios.”

### *Reni gujc xpejn Jesús ganiddoo*

<sup>35</sup> Che bara stee yääl, sugasac Juan ro'c, suganäjni tio'p rexpejñni.

<sup>36</sup> Bahuiini lo Jesús che sasajni, dxejc gunii Juan, räjpni:

—¡Colhuii! ¡Laa dee ni najc Xiil xten Dios!

<sup>37</sup> Biejn diajg guiro'p rexpejn pac Juan diidxga, dxejc sanajlreni Jesús.

<sup>38</sup> Che gubiré Jesús bahuiini siädnajlreni, dxejc räjpni:

—¿Xhi caguilltu?

Räjp rebejn ga:

—Mastr, ¿caro rbäjzlu?

<sup>39</sup> Badzu' Jesús diidxre, räjpni:

—Coltaa, te fiitu.

Dxejcti huijreni te bahuiireni caro rbäjzni ro'c. Biannäjrenini ro'c sa'csi agojl si'cti rcatajp gudxej.



40 Tej reni biejn diajgni xtidx Juan laa Andrés, bejtz Simón Pedr dxejc huinäjłni Jesús.

41 Ganiddoo huitiilni bejtzni, dxejc räjpmi lojni:

—Abidxälnu Mesías nani sälojza Crist ni cabääznu jiaäd.

42 Sas huinänini loj Jesús. Che bahuii Jesús lojni, räjpmi:

—Luj najclu Simón xi'n Jonás; sirilajlu Cefas nani sälojza Pedr.

### *Gurejdx Jesús Felipe näjza Natanael*

43 Bara yäälga rłajz Jesús chää nez Galilee. Dxejc bidxaagni Felipe, räjpmi lojni:

—Gudanajł narä.

44 Felipe siääd guedx Betsaida, guedxro ni najcza lajdx Andrés näjza Pedr.

45 Felipe bidxaag Natanael räjpmi lojni:

—Abidxälnu bejn nani bacuaa toMoisés xcuentni lo reguijtz xten leii agujc xchej, nani bazä'tza reniguii ni gunii xtidx Dios, Jesús xi'n José ni siääd Nazare't.

46 Räjpmi Natanael:

—¿La sajc guirii te bensa'c guedx Nazare't, ä?

Räjpmi Felipe lojni:

—Gudaa, te fiilu.

47 Che bahuii Jesús siääd Natanael nez lojni, räjpmi:

—Colhunii te bejn Israelpac nani dipacni gusguee.

48 Räjpmi Natanael:

—¿Xho numbeelu narä?

Badzu' Jesús diidxre lojni räjpmi:

—Che gajd Felipe cueedx luj, che suga'lilu ni' te yagiigw, bahuiä lojlu.

49 Badzu' Natanael diidxre, räjpmi:

—Mastr, luj najc Xi'n Dios, luj najc Reii xten rexpejn Israel.

50 Räjpmi Jesús lojni:

—Sa'csi rniä lojlu, “bahuiä suga'lu ni' yagiigw”, ¿ni'c rililajzlu, ä? Xhidajł cosroru suhuilu.

51 Dxejcti räjpmi:

—Rniliäpac lojtu, suhuiitu guixal xhaguibaa, näjza rä'p riäjł rexangł Dios yejc Xi'n Dios ni gujc Niguii.

## 2

### *Te sa'ni guyu' guedx Caná xten Galilee*

1 Che gudejd choñ dxej, guyu' te sa' guedx Caná xten Galilee. Ro'c guyu' xnan Jesús.

2 Huijza Jesús näjza rexpejnpacni, sa'csi bidoñreni chääreni lo sa'ga.

3 Gubijdz bin. Dxejc räjpmi xnan Jesús lojni:

—Dirureni ga'p bin.

4 Dxejc badzu' Jesús diidxre räjpmi:

—¿Xhicuent rniilu si'c loä, xnanä? Gajd xhorä guidzujł.

5 Niluxh räjpmi xnanni loj remos ni tre' ro'c:

—Colyejn guira'ti si'ctis ni guiniini lojtu.

6 Suga' xho'p guesguij nani rdxaj nis te rdiib naa rexpejn Israel te racnareneni te si'c guisa' xleii toMoisés. Neñ tejga guesguijga ru' si'cti te gayuu litr nis.

7 Räjpmi Jesús loj remos:

—Colguchaj reguesguijre nis.  
Dxejcti bachadoo rebejnġani.

<sup>8</sup> Dxejcti räjp Jesús lojreni:

—Colca' che'n ni naj te colchanäni lo nani cahuii cayajc sa're.

Dxejc huinä remosga che'n bin lojni.

<sup>9</sup> Che gu' dade'ga che'n nis ni gubixhloj bin (luxh dini gan caro siäädni, remostis ni gulä'p nis, ni'ttis najn). Dxejcti gurejdx dade'ga bi'n.

<sup>10</sup> Dxejcti räjpni:

—Guiraa rebejn rudeedreni binsa'c räxгаа rebejn, dxejcti che agudxaj xque'reni, rudeedreni bin nani di xcuent, niluxh luj gulucheelu binsa'cre najli.

<sup>11</sup> Seenre najc ganiddoo ni gusloj bejn Jesús; bejnnini nen guedx Caná xten Galilee. Seenga bazäbdiidx yälrnibee xtenni luxh ni'cni huililajz rexpejn pacni xtiidxni.

<sup>12</sup> Che gudejd sa'ga, huijni guedx Capernaum con xnanni, rebejtzni näjza rexpejn pacni. Ro'c bia'nreni tio'p-choñ dxej.

### *Basia Jesucrist guidoro*

(Mt. 21:12-13; Mr. 11:15-18; Lc. 19:45-46)

<sup>13</sup> Sa'csi abidzungejxh lanij pascw xten rexpejn Israel cheni rnalajzreni guxhijn ni gudejd guixhajx xten yälgujt nen Egipto, ni'c sää Jesús guedx Jerusalén.

<sup>14</sup> Nen guidoro bidxälmi xhidajl bejn nani ruto' gon, xiil, palom näjza reni sobga' caguchaa melzijt.

<sup>15</sup> Dxejc bejn ni te chico't con gaii duu, guläani regon con rexiiil nen guidoo. Batie'chni xcoobr rebejn nani ruchaa melzijt, barexh-xhätni rexmexreni.

<sup>16</sup> Räjpzani loj reni caguto' repalom:

—Colcuää redee, na'c rujntu rolizj xtaä sä'c te guii cadro rdo' guiraloj.

<sup>17</sup> Dxejcti banajlajz rexpejn pacni xhi caj lo reguijtz ni bacuaa redade' ni gunii xtidx Dios: “Gucnaj lazá xcuent ni runnäjreni rolizlu.”

<sup>18</sup> Dxejcti gunabdiidx reni najc xpejn Israel lojni, räjpreni:

—¿Xhi seen guluiilu loonu naj te fiinu arajplu yälrnibee te abejnlu recosre?

<sup>19</sup> Badzu' Jesús diidxre räjpni:

—Colgutzujl guideore, luxh narä nen chontis dxej sunchesacäni.

<sup>20</sup> Räjp rexpejn Israel lojni:

—Tiubixho'p ijz guclaa ni guc-chee guideore, ¿xhixh sajz gunchesacluni nen chontis dxej, ä?

<sup>21</sup> Niluxh laani caniini xcuent guidoo ni najc lagajc tiejxhni.

<sup>22</sup> Ni'cni cheni gubansacni loj rebengut, banajlajz rexpejn pacni rediidxre ni guniini, dxejc huililajzreni nani caj lo rexquijtz Dios näjza rediidx ni gunii Jesús.

### *Numbee Jesús guiraa rebejn*

<sup>23</sup> Cheni guyu' Jesús guedx Jerusalén cadro cayajc lanij pascw, lañ ni cayajc lanijga, xhidajl rebejn huililajz xtiidxni, bahuiizaren i remilagwr ni bejn ni.

<sup>24</sup> Luxh di Jesús nililajz xtidx rebejn ga, sa'csi arumbeeni xho najc rebejn.

<sup>25</sup> Niluxh dini niqiuin chu gäb lojni xho najc bejn, sa'csi lagajc laani anancheeni xho najc lastoo teja bejn.

<sup>1</sup> Guyu' te niguii lo rexpejn refarisee ni laa Nicodem, najcni te beņroru loj reni rnibee rexpejn Israel.

<sup>2</sup> Te guxhijn biādxhiga'tzni nez loj Jesús, räjpni lojni:

—Mastr, nadonnu lo Dios siädlu si'c te ni ruluii, sa'csi rut rajcdi rujn sa' remilagwr nani rujnlu palga di Dios sunäjni.

<sup>3</sup> Dxejcti räjp Jesús lojni:

—Rniliāpac lojlu, nani di gaal stehuält, di gacdi fiini xcälrnibee Dios xhaguibaa.

<sup>4</sup> Dxejcti räjp Nicodem lojni:

—¿Xho gac gaal te bejn stehuält niluxh anajcni beņgool? ¿Xhixh sajc chusacni xque' xnanni stehuält te galsacni, ä?

<sup>5</sup> Badzu' Jesús diidre räjpni:

—Rniliāpac lojlu, nani di gaal con nis, näjza con Sprit Dхан xten Dios, di gacdi jiu'ni lo xcälrnibee Dios xhaguibaa.

<sup>6</sup> Nani rajl xi'n beņ guedxliujre, ni'c najctisni bejn guedxliuj, luxh nani rajl por Sprit Dхан xten Dios, Spritza najcni.

<sup>7</sup> Na'c rdxelojlu sa'csi rniä: “Nanabpac gaallu stehuält.”

<sup>8</sup> Rbi' bej cadrotis rlajzni; riejn diajglu rubejni niluxh dilu gan caro siädni, dizalu gan caro sääni. Si'cza rebejn guedxliuj direni gan xho rajl rexpejn Dios stehuält con Sprit Dхан xten Dios.

<sup>9</sup> Badzu' Nicodem diidre, räjpni:

—¿Xho mood sajc gac recosre?

<sup>10</sup> Räjp Jesús lojni:

—¿La najclu te mastr xten rexpejn Israel luxh dilu gan recosre, ä?

<sup>11</sup> Rniliāpac lojlu, aguniinu xcuent recos ni nadonnu, abasule'nu recos ni abahuiloonu, niluxh la'tu ditu nililajz xtiidxnu.

<sup>12</sup> Palga ditu chalilajz xtiidxnu che guniinu xcuent recos guedxliuj nani rniinu: ¿Xho chalilajztu xtiidxnu palga guiniinu xcuent recos xhaguibaa?

<sup>13</sup> Rut chutejdi ahuä'p xhaguibaa, xtebtis nani biäjt xhaguibaa, lagajc Xi'n Dios ni gujc Niguii.

<sup>14</sup> Lagajc si'cni guläsjiäa toMoisés bäl guuib lo yajg neņ reyubijdz, sigajcza nanab chäs Xi'n Dios ni gujc Niguii jiaa;

<sup>15</sup> te guiraa renani chalilajz xtiidxni direni nit lo Dios, sica'reni yäl nabajņ par tejpas.

### *Xho huinälajz Dios reben guedxliuj*

<sup>16</sup> Sa'csi huinälazduxh Dios rebejn guedxliuj, ni'cni badeedni biäd Xinxtebni lo guedxliuj, te guiraa renani chalilajz xtiidxni direni nit lo Dios, sa'csi sajpreni yäl nabajņ par tejpas.

<sup>17</sup> Sa'csi di Dios nuxhal xi'nni te gusnijtni rebejn guedxliuj, alga baxhalnini te laa rebejn neņ xtojłreni xcuentni.

<sup>18</sup> Nani chalilajz xtiidxni näjza chalilajz najcni chu najni najcni dini nit, luxh nani di chalilajz xtiidxni agunijtni sa'csi dini nililajz xtidx Xinxteb Dios.

<sup>19</sup> Ni'cni dee najc yälnijtga: abiäd bianijga loj guedxliuj, biädnä Xi'n Diosni, niluxh rebejn guedxliuj bidxagłajzrurenini yäl nacäy cadro tre'reni, gulälazreni bianijga sa'csi xhet laadi najc xtzunreni.

<sup>20</sup> Guiraa reni rujn dzunguijdx, rbälaz bianijga, dizarenini guibig loj bianijga, didi gululoj bianijga rextzunguijdxreni.

<sup>21</sup> Luxh reni rusob didxlii, rbigreni loj bianijga, te bianijga rululoj najc rextzunreni redzunsac xten Dios.

### *Rnisac Juan ni rutiobnis xcuent Jesús*

<sup>22</sup> Dxejcti biääd Jesús näjza rexpejn<sup>pacni</sup> nez lo reyuj xten Judea. Ro'c guyunäjnireni, batiobnisza rexpejn<sup>pacni</sup> rebejn.

<sup>23</sup> Juan ni Rutiobnis cagutiobniszani bejn te lajt ni laa Enón ni tre' gajxh Salim, sa'csi ro'c yu' sijl nis. Ro'c säa rebejn lojni te cagutiobnisnireni.

<sup>24</sup> Dxejc gajdreni gusaü Juan neñ latzguuib.

<sup>25</sup> Dxejcti gusloj rexpejn Juan cayujy diidx con gaii xpejn Israel xcuent yälrdiib naareni ni najc xcostumbr rexpejn Israel.

<sup>26</sup> Dxejc biäädreni lo Juan, räjpreni:

—Mastr, dade' nani guyunäjlu stelaad gueu Jordán, nani basule'lu xcuentni, adade'ga cagutiobnis, luxh guiraa rebejn asää lojni.

<sup>27</sup> Dxejc badzu' Juan diidxre, räjpni lojreni:

—Nicla tej bejn digacdi ga'p te xhi cos palga di Dios gudeedni lojni.

<sup>28</sup> Lagajc la'tu nancheetu guniliä: “Dina gacä Crist ni cabäjzta jiaäd.” Guniäza: “Narä nacä nani biädnijd lojni.”

<sup>29</sup> Che rajc sa', nani sobganäj dxa'p, ni'c najc bi'n ni gac chäälni, luxh xamigw bi'n nani suga' ro'c, riejn diajgni rniini, rbalazduxhni sa'csi riejn diajgni xse' bi'n. Sigajcza abibaduxh lazä xcuentni.

<sup>30</sup> Nanab gacni laani beñroru, beñsajcru, biädla narä riajl gacä beñhuinru, ni guxiiru sajc lojni.

### *Nani siääd Xhaguibaa*

<sup>31</sup> Nani siääd jiaali, ni'c rnibee guiralii, niluxh nani najc beñ guedxliuj ni'c rniini xcuent recos guedxliuj. Nani siääd xhaguibaa ni'c rnibee guiralii.

<sup>32</sup> Nani bahuiini, nani biejn diajgni, ni'c rusule'ni niluxh guxii rililajzreni xtiidxni.

<sup>33</sup> Nani rililajz diidx ni rusule'ni, bejnğa ruluiloj guliipac najc xtidx Dios.

<sup>34</sup> Nani baxhaļ Dios, ni'c rniini xtidx Dios sa'csi che rudeed Dios Sprit xtenni, dini gudeed guxiini.

<sup>35</sup> Dad Dios sanälajzni xingaanni, abadeedzani guiraliiti chu ladzñaani.

<sup>36</sup> Nani rililajz xtidx xingaanni arajp yälñabajn par tejpas, luxh ni di chalilajz xtidx xi'nni, dini fii yälñabajn, siääd xcälrdxe'ch Dios yejcni, sujn Dios castiigwni.

## 4

### *Rdxaag Jesús te gunaa Samaria*

<sup>1</sup> Che gucbee Jesús abiejn diajg refarisee xhidajlru bejn sanajl Jesús luxh guxiiru sanajlreni Juan, luxh cagutiobnisreni,

<sup>2</sup> (niluxh xhet Jesúsdi cagutiobnis. Rexpejn<sup>ni</sup> ni catiobnis), dxejc

<sup>3</sup> biriini Judea gubisacni nez Galilee.

<sup>4</sup> Laļ ni sasajni, nanab tedni nez Samaria.

<sup>5</sup> Ni'c bidzujn<sup>ni</sup> te guedxro xten Samaria ni laa Sicar, gajxh nejz loj te la' yuj ni badeed toJacoob lo xi'nni toJosé.

<sup>6</sup> Ro'c sojb te bisie ni rniireni “xpisie Jacoob”. Sa'csi abadxajg Jesús siädsajni, gurejni ro bisiega. Agojl läidxej.

<sup>7</sup> Bidzujn te gunaa siädlä'pni nis, dxejc räjp Jesús lojni:

—Baniidx che'n nis yä'ä.

<sup>8</sup> Sa'csi rexpejn<sup>pacni</sup> asääreni guejdxga sasiireni xhi gaureni.

<sup>9</sup> Räjpni guna samaritanga lo Jesús:

—¿Xho mood rniablu nis loä, luj ni najc te beṅ Israel luxh narä nacä gunaa samaritan?

(Sa'csi di rexpeṅ Israel chanä sa'reni rebeṅ Samaria.)

<sup>10</sup> Räjṅ Jesús lojni:

—Paru najnlu xhini'c najc yälṅulasajz xten Dios, paru numbeelu chuni'c canab nis lojlu, luj siniablu lojni te laani guniidxni nisnabajṅ lojlu.

<sup>11</sup> Räjṅti gunaaga lojni:

—Dad, xhet ca'dilu te guiliä'plu nis, luxh bisiere najc jätduxh. ¿Caxh chaca'lu nisnabajṅga, ä?

<sup>12</sup> ¿La beṅrorulu lo toxtadgoldoonu Jacob ni basa'n bisiere cadro huä'p nis gu'ni, gu'za rexi'nni, näjza rexquidxaani, ä?

<sup>13</sup> Badzu' Jesús diidxre lojni, räjṅni:

—Guiraa reni rä' nis bisiere, siojṅreni stehuält.

<sup>14</sup> Luxh nani yä nis nani gudedä, diruni jiojṅ, sa'csi nis nani gudedä neṅ lastooni sajṅni si'c te bisie nani rdatis nisni te gudeedni yälṅnabajṅ par tejpas.

<sup>15</sup> Dxejṅti räjṅ gunaaga lojni:

—Dad, baniidx nisga yä'ä, te na'cru jiojä, te na'cruza guibi'ä jiadlä'pä nis ree.

<sup>16</sup> Räjṅ Jesús:

—Huij, huitejdx chäälṅ gudanäni ree.

<sup>17</sup> Räjṅ gunaa loj Jesús:

—Ruti chälä.

Räjṅ Jesús lojni:

—Laaca guniilu,

<sup>18</sup> sa'csi aguyu' gaiili chäällu. Luxh nani rbäznäjlu ṅaj dini gac chäällu; guliica najlu.

<sup>19</sup> Che bieṅ diajṅ gunaaga si'c, räjṅni:

—Dad, rchaloä najclu te niguii ni rnii xtidx Dios.

<sup>20</sup> Retoxtadgoldoonu gojṅreni Dios lo dajnre, luxh la'tu rniitu guedx Jerusalén najc cadro nanab ganni Dios.

<sup>21</sup> Räjṅ Jesús lojni:

—Gunaa, huililajz xtidxä, sidzujṅ or cheni nicla lo dajnre, niclaza guedx Jerusalén ditu chagajṅ Dad Dios.

<sup>22</sup> La'tu rajṅtu Dios nani ditu gumbee, nuunu rajṅnu Dios nani rumbeenu; sa'csi yälṅruslaa beṅ lo dojṅ siäd xcuent rexpeṅ Israel.

<sup>23</sup> Niluxh sidzujṅ or, luxh alabidzujṅni, che reni guliipac rajṅ Dad, reni'c neṅ lastooreni, lo xcäriejṅreni sajṅreni Dios. Sa'csi sa' beṅre rguilṅ Dad Dios te gaṅrenini.

<sup>24</sup> Dios najc te Sprit. Reni rajṅ Dios nanab gaṅrenini neṅ lastooreni, lo xcäriejṅreni, guideb xtijṅreni sa'csi rumbeerenini.

<sup>25</sup> Räjṅ gunaa lojni:

—Ananä siäd Mesías ni laaza Crist. Cheni jiadṅni, laani susule'ni guiraliiti loonu.

<sup>26</sup> Räjṅ Jesús lojni:

—Narä ni caniä lojlu, nacä laani.

<sup>27</sup> Dxejṅ bidzujṅ rexpeṅpacni, bidxelojṅreni sa'csi gunii Jesús lo gunaaga, niluxh rut gunabdiidxdi xhi rṅajzni, niclaza rut gunabdiidxdi xhini'c caninäjṅni gunaaga.

<sup>28</sup> Dxejṅti basa'n gunaaga xtie'ni, sä'tini guedxroga. Dxejṅti räjṅni loj rebeṅ:

29 —Coltaa, fitu te niguii ni gunii loä guira'ti nani abenä. ¿La et laadi dee Crist ni cabääznu jiääd, ä?

30 Dxejc birii rebejn<sub>nguejdxga</sub>, bidzujntireni lojni.

31 Reni najc rexpejn<sub>pacni</sub> canabduxhrenei gau Jesús, räjpreni:

—Mastr, gudajw.

32 Laani räjpni:

—Narä rapä xhi gauä nani ditu gumbee.

33 Dxejcti räjp rexpejn<sub>pacni</sub> lo sa'reni:

—¿Xhaa yu' chu abiädnä xhi gudajwni, ä?

34 Räjp Jesús:

—Yälrajw xtenä najc gunä si'cni rlajz nani baxhal narä, näj guluxä xtzuunni.

35 La'tu rniitu riäädx tajp bäii te guire' cose'ch. Narä rniä colguiliäs lojtu, colfisa'c loniaa, abiquijt regäj, agoj guire' cose'ch.

36 Nani rujn dzuun rutie' cose'ch rca'ni xcuentni, luxh ni caca'ni najc par yäl<sub>nabajn</sub> par tejpas, te tejsi guibalaznä nani gule'c binij näj nani batie' cose'ch.

37 Sa'csi gullii najc diidx nani rniie bejn, rniireni: “Tejni rbe'c binij, ste'cane rutie'ni.”

38 Narä abaxhalä la'tu gutie'tu cose'ch nani ditu nibe'c; ste'ca najc nani bejn dzuun gule'cni binij, dxejc la'tu jiu'tu gutie'tu cose'ch loj xtzuunni.

39 Xhidajl reben Samaria huililajz xtidx Jesús xcuent rediidx ni räjp gunaaga lojreni che räjpni: “Guniini loä guiralii nani abenä.”

40 Ni'cni, che biääd reben guedx Samaria lojni gunabreni loj Jesús jia'nni lajdxreni. Dxejc bia'nni ro'c tio'p dxej.

41 Dxejc xhidajlrureni huililajz xtiidxni ni guniini lojpacreni.

42 Dxejcti räjpreni loj gunaaga:

—Dirunu chalilajz ganaxtis xcuent diidx ni guniilu loonu, sa'csi lagajc nuure abiejn diajgnu xtiidxni, ni'c nancheenu dee najcpac ni rusläa rebejn guedxliuj loj dojl. Laani najc Crist ni cabääznu jiääd.

### *Basiajc Jesús xi'n te bejn ni rujn xtzuun gubier*

43 Che gudejd tio'p dxej, biriini guedx Samaria, huinuuni xnezyujni nez Galilee.

44 Sa'csi lagajc Jesús gunii, räjpni: Te bejn nani rniie xtidx Dios di reben lajdxpacni chanälajz xtiidxni.

45 Che bidzujni rexyuj Galilee, reben Galilee huichaglojrenini sa'csi näj laareni huijreni lanij pascw guedx Jerusalén, ro'c bahuiireni guiraa redzuun nani bejn.

46 Gubisacni, bidzujni guedx Caná xten Galilee cadro bejnni bidxaa nis gujcti bin. Dxejcti guyu' te dade' nani rujn xtzuun reii. Guedx Capernaum naga' te xi'nni cayacxhuu.

47 Che biejn diajg dade'ga abirii Jesús Judea, abidzujni nez Galilee, huijni lo Jesús, gunabduxhni lojni chääni te gusiajcti xi'nni nani naga' cuentro, ameerli guetni.

48 Dxejcti räjp Jesús lojni:

—Paru ditu fii reseen, remilagwr, ditu chalilajz chuni'c nacä narä.

49 Dade' ni rujn xtzuun reii, gunii lojni, räjpni:

—Do'o Dad, te di guet xi'nä.

50 Räjp Jesús lojni:

—Huij. Di xi'nlu guet.

Huililajz dade'ga, sä'tini.

<sup>51</sup> Che gubi'ni rolijzni, birii rexmosni, huichaglojni, badeedreni diidx nabajñ xi'nni.

<sup>52</sup> Dxejcti gunabdiidxni:

—¿Corti gusloj cayajcni?

Räjpreni lojni:

—Naii si'cti rcatej gudxej biriini xliaa.

<sup>53</sup> Dxejcti gucbee dade'ga lagajc orga ni räjpre Jesús lojni: “Di xi'nlu guet.” Dxejc dade'ga najza guiraa rebejn ni yu' rolijzni huililajzreni Jesús najc ni cabäjzreni jääd.

<sup>54</sup> Dee barojp seen ni bejn Jesús cheni biriini Judea, biu'ni Galilee.

## 5

### *Bejn Betesda nani naxu'n*

<sup>1</sup> Che gujcti recosre, guyu' te lanij xten rexpejn Israel, dxejc huij Jesús guedx Jerusalén.

<sup>2</sup> Guedx Jerusalén, gajxh ro' puert ni laa xten rexiil, yu' te guipilro nis; xtidx hebreo laani Betesda. Cuä' guipilroga caj gaii cordoor.

<sup>3</sup> Ro'c naga' xhidajl bejn racxhuu, yu' bejn ni di fii, beñcoj, näj bejn nani bixu'n tiejxhni. Cabäjzreni guiniib nisga

<sup>4</sup> sa'csi gucti-guc riääd te xangl Dios rusniib nisga. Dxejc bejn nani gun gaan chachu' lo nis ganiddoo che guiniibni, riajcti lo xhitis yälguijdx ni rajcti.

<sup>5</sup> Ro'c guyu' te beñ racxhuu nani agujc galbitzubixhujñ ijz cayacxhuuni.

<sup>6</sup> Cheni bahuii Jesús naga'ni, badeedzani cuent lacti xchero raxchuuni, räjpreni lojni:

—¿La rlanjzlu jiajclu?

<sup>7</sup> —Dad —räjpre beñ racxhuuga lojni—, dina gapä chu gusäl narä neñ nis cheni rniib nisre. Cheni rlazä chachu'ä lo nis, stee bejn rujñ gaan narä, ganidni richu'ni lo nisga.

<sup>8</sup> Räjpre Jesús lojni:

—Huistie, guläs xta'lu, guzaj, huij.

<sup>9</sup> Lagajc dxejc biajc bejñga, guläsni xta'ni, gusloj gusajni. Niluxh dxejga najc dxej nani rusilajz rexpejn Israel,

<sup>10</sup> ni'c räjpre rexpejn Israel lo bejn ni biajcga:

—Nadxej najc dxej ni rusilajz bejn. Di gacdi guulu xta'lu.

<sup>11</sup> Laani räjpreni:

—Nani basiajc narä, laani naj loä: “Guläs xta'lu, gusaj.”

<sup>12</sup> Dxejc gunabdiidxreni lojni:

—¿Chuni'c naj lojlu “Guläs xta'lu, gusaj”?

<sup>13</sup> Dxejcti beñ racxhuu ni biajcga dini gaan, sa'csi gunitloj Jesús, biriini ro'c lañ ni tre' xhidajl bejn lajtga.

<sup>14</sup> Che bidxaagni Jesús stehuält neñ guidoro, räjpre Jesús lojni:

—Ahuii, naj ni abiajclu, na'c gunlu dojl stehuält, didi sajclu xhi stee ni najc cuentroru.

<sup>15</sup> Sä'ti bejñga, huiye'tzni loj rexpejn Israel laa Jesús ni basiajcti.

<sup>16</sup> Ni'cni gusloj rexpejn Israel carinajlreni Jesús, rlanjzreni guiga'ni te ju'trenini, sa'csi rujñni redzuunga dxej ni rusilajzreni.

<sup>17</sup> Luxh räjpre Jesús lojreni:

—Xtadä Dios najli cayujñni dzuun, ni'cni näjza narä cayunä dzuun.

<sup>18</sup> Ni'cni rlanjru rexpejn Israel ju'tni, xhet ganaxdi sa'csi rujnni dzuun dxej ni rusilajzreni, per nájza sa'csi rájpní Dios najc Xtdadni, rniizani tebloj najcni con Dios.

### *Yálrnibee xten Xi'n Dios*

<sup>19</sup> Badzu' Jesús diidxre rájpní lojreni:

—Rniliá, rniliápac lojtu. Di gacdi gun Xi'n Dios dzuun xtebni, palga dini fixgaa rujn Xtdadni dzuunga, sa'csi guira'tis dzuun ni rujn Xtdadni, dzuunga rujnza Xi'nni sigajc rjuj Xtdadni.

<sup>20</sup> Sa'csi rinälajz Dad xi'nni, ruluiini lo xi'nni guiraa redzuun nani rujnni, luxh dzunroruza suluiini lojni gunni, te guidxelojtu.

<sup>21</sup> Sigajc ni rliás Dios rebengut, rudeedni yálnabajñ lojreni, sigajcza sudeed xi'nni yálnabajñ lo renani rlanjztsini.

<sup>22</sup> Nicla Dad di gun yálguxhtis, alga badeedni guiralii yálguxhtis gun Xi'nni, <sup>23</sup> te guiraa bejn guiliá'p xpala'n xi'nni si'cni rliá'preni xpala'n Dad. Nani di guiliá'p xpala'n Xi'nni, dizani guiliá'p xpala'n Xtdadni ni baxhañni biáadni.

<sup>24</sup> 'Rniliá, rniliápac lojtu, nani rucuadiajg xtidxá, ni chalilajzani nani baxhañ nará, ni'c rájpní yálnabajñ par tejpas; niluxh dini ted lo yálguxhtis, alga abiriini lo yálgujt, agudejdni lo yálnabajñ.

<sup>25</sup> Rniliá, rniliápac, sidzujñ or, luxh alabidzujñni, cheni siejn diajg rebengut xse' Xi'n Dios, luxh reni riejn diajgni diidxga sibansacreni lo rebengut.

<sup>26</sup> Si'cni rájpní Dad Dios yálnabajñ lagajcsi laani, sigajcza badeedni lo Xi'nni ga'pni yálnabajñ lagajcsi laazani.

<sup>27</sup> Badeedzani lojni yálrnibee te gunni yálguxhtis, sa'csi najcni Xi'n Dios ni gujc Niguui.

<sup>28</sup> Na'c rdxelojtu rediidxre, sa'csi sidzujñ or cheni guiraa reni yu' neñ baa siejn diajgreni xse'ni

<sup>29</sup> siriizareni neñ baa. Reni bejn dzunsa'c siriireni te guibansacreni loj yálnabansa'c, niluxh reni bejn dzunguijdx, siriireni te guibansacreni te tedreni lo xcálguxhtis Dios.

### *Nani ruluiloj yálrnibee ni rájpní Jesús*

<sup>30</sup> 'Xhet rajcdi runá lagajcsi nará. Sigajc ni riejn diagá, sigajcza runá yálguxhtis. Luxh yálguxhtis ni runá laaca najcni sa'csi dina quila guná nani rlanjztsini, rguilátsi guná si'c ni rlanjz Dad nani baxhañ nará.

<sup>31</sup> Palga narátsi rniá diidx lagajc xcuentá, xhet sajcdi diidxga.

<sup>32</sup> Yu' stee nani rnilií diidx xcuentá, luxh nancheá diidx ni rniini xcuentá sacduxhni, guliipacni.

<sup>33</sup> La'tu abaxhaltu chu huij loj Juan, huinabdiidxreni lojni “chu najc bejnga”, niluxh badzu'ni diidx lojreni guniini diidx guliipac xcuent chu nacá.

<sup>34</sup> Nará dina jiuá diidx nani rnií rebejn xcuentá luxh canisacá rediidxre te laatu lo xtojltu.

<sup>35</sup> Juan gujc si'c te bajl ni ralguij, basanijzani. Luxh la'tu huihuiituni bibalajztu lo xpianijni balsi dxej.

<sup>36</sup> Luxh nará rapá xhi ruluilojru chu nacá lo diidx ni gunii Juan; sa'csi lagajc dzuun nani baniidx Xtdá guná, lagajc redzuun ni runá, huenliisi ruluilojreni Xtdá Dios baxhañ nará.

<sup>37</sup> Xtdá ni baxhañ nará lojtu agunilii chu nacá. Gajdpactu jiejn diajg xse'ni, gajdzatu fii lojni.

<sup>38</sup> Dizatu ga'p xtiidxni neñ lastootu, sa'csi di lajztu chalii xtiidx nani baxhañ nará.



<sup>39</sup> La'tu rolduxhtu reguijtz xten Dios sa'csi rchalotu si'c sidxäلتو yäl\_nabaj\_n par tejpas, luxh lagajc reguijtzga rusule' chu narä.

<sup>40</sup> Naadditu jiäädту loä te ga'ptu yäl\_nabaj\_n par tejpas.

<sup>41</sup> 'Narä dina quilä chu bej\_n guiliä'p xpala'nä nez loä.

<sup>42</sup> Luxh narä anumbeätu, ananä ditu chanälajz Dios nen lastootu.

<sup>43</sup> Narä biälä xcuent Xtradä, luxh ditu gucuadiajg xtidxä; paru jiääd chu stee bej\_n xcuentcani, ni'c sii sucuadiajgtu xtiidxni.

<sup>44</sup> Xho gac chalilajztu, ni rliä'ptu xpala'n lagajc sa'tu. Ditu quiil xho gac guiliä'p Gueb Dios xpala'ntu.

<sup>45</sup> Di naatu pet narä ni chale'cä xquejtu lo Xtradä. ToMoisés ni chale'c xquejtu, luxh rujntu xhigab lagajc xleini gacnä\_j la'tu.

<sup>46</sup> Paru la'tu nililajzpacktu xtidx toMoisés, dxejc niliiza lajztu xtidxä sa'csi xcuentä bacuaa toMoisés lo reguijtz.

<sup>47</sup> Palga ditu chalilajz nani bacuaani lo reguijtz, ¿xho chalilajztu rediidx nani caniä lojtu, ä?

## 6

### *Bayaan Jesús gai mil nigui*

(Mt. 14:13-21; Mr. 6:30-44; Lc. 9:10-17)

<sup>1</sup> Che gulujx gujc recosre, dxejc sää Jesús stelaad nezro' nisdoo xten Galilee, nani rniizareni nisdoo xten Tiberias.

<sup>2</sup> Sanajl xhidajl bej\_nni sa'csi rhuiireni remilagwr ni rujnni lo rebenracxhuu.

<sup>3</sup> Dxejcti huä'p Jesús yejc te dajn, ro'c gurenäjni rexpej\_npacni.

<sup>4</sup> Niluxh ameer gac lanij pascw xten rexpej\_n Israel, cheni rudeedreni xquixhtios lo Dios xcuent dxej ni biriireni Egipto.

<sup>5</sup> Cheni guläs Jesús lojni, bahuiini siääd xhidalduxh bej\_n, siäädreni nez lojni, dxejcti räjpni loj Felipe:

—¿Caro guisiinu yätxtiil te gau rebej\_nre?

<sup>6</sup> Dxejc räjpzani si'c te don xhi xhigab gun Felipe, luxh laani anajnni xho gunni.

<sup>7</sup> Räjp Felipe lojni:

—Di tio'p gayuu beex yätxtiil gal te gaureni tlagaj.

<sup>8</sup> Tej rexpej\_npacni ni laa Andrés, bejtz Simón Pedr, räjp lojni:

<sup>9</sup> —Ree suga' te biuux ca' gaii yätxtiil con tio'p bäjl, ¿xhixh saj\_l ni'c gau reben\_xhidajlre?

<sup>10</sup> Dxejcti räjp Jesús:

—Colyejtz loj rebej\_nre cuereni.

Yuduxh guixa' ro'c. Dxejcti gurej reniguii. Si'cti gaii mil najc reniguii.

<sup>11</sup> Dxejcti cua' Jesús yätxtiilga, badeedni xquixhtios lo Dios, gudisni yätxtiilga lo rexpej\_npacni. Dxejcti rexpej\_npacni gudisrenini loj rebej\_n nani sobga'. Sigajcza gudisreni rebäj\_l si'ctisni r\_lajzreni gaureni.

<sup>12</sup> Che gulujx gudajwreni, gudxaj xque'reni, dxejcti räjp Jesús loj rexpej\_npacni:

—Colgutie' guiraa reyätxtilbiujy nani bia'n te xhet nitdi.

<sup>13</sup> Batie'tireni reyätxtilbiujy, guläsreni tzubitio'p dixim\_yätxtilbiujy nani bia'n lo gaii yätxtiilga nani gula' gudajwreni.

<sup>14</sup> Che bahuii rebej\_nga resean, remilagwr nani bej\_n Jesús, dxejc räjpreni:

—Guluiipacni, laa dee ni najc niguii ni rni\_xtidx Dios nani cabäáznu jiääd lo guedxliuj.

15 Sas che gucbee Jesús cayujnreni xhigab jiädnaazrenini te niujnreni gacni reii te guinibeeni lojreni, biriini ro'c, xtebni gubisacni nen dajn.

*Gusaj Jesús lo nisdoo*  
(Mt. 14:22-27; Mr. 6:45-52)

16 Che gojl guxhijn, bidzujn rexpejn pacni lo nisdoo.

17 Biu'reni nen te barcw te tedreni lo nisdoo nez guedx Capernaum. Abicäy lo yuj niluxh gajd Jesús guibi' lojreni te cháäni.

18 Gusloj cayäjs nisdoo xcuent te beduxh nani cabi'.

19 Ni'cni che gusajreni si'cti gaii o xho'p kilómetro, bahuiireni siäd dzungajxh Jesús lo barcw, lo nisdoo siädsajni. Bidxebduxhreni.

20 Luxh laani räjpni lojreni:

—Naräni. Na'c guidxejbtu.

21 Dxejcru cuäjbreni biu'ni nen barcw. Dxejcti bidzungajczeni stelaad lo yuj cadro sääreni.

*Caguuil rebejn Jesús*

22 Che bara yääl, rebejn nani bia'n stelaad ro' nisdoo, bahuiireni asanä rexpejn pacni barcwbäz nani suga' ro'c, niluxh di Jesús nij, xtebsireni sääreni.

23 Luxh bidzungajc sgaii barcw nani birii guedx Tiberias, te lajt ni tre' gajxh cadro gudajwreni yätxtiil che gulujx badeed Jesús xquixtios lo Dad.

24 Che bahuii rebejn ruti Jesús ro'c, niclaza rexpejn ni, biu'reni nen rebarcw, sääreni guedx Capernaum satilireni Jesús.

*Jesús najc yätxtiil xten yäl nabajn*

25 Che bidxälreni Jesús stelaad ro' nisdoo, räjpreni lojni:

—Mastr, ¿guc bidzujn lu ree?

26 Badzu' Jesús diidxre, räjpni lojreni:

—Rniliä, rniliäpac lojtu, caguuiltu narä sa'csi gudajwtu, gudxaj xque'tu, et sa'csi bahuüiditu remilagwr nani benä.

27 Na'c guntu dzuun ganax par yälrajw nani rnitloj. Coļyejn dzuun par yälrajw nani di nitloj, ni runiidx yäl nabajn par tejpas. Yalrajwre suniidx Xi'n Niguii, sa'csi loj rebejn baluii Xtadni, Diospac, laani najc Xi'npacni.

28 Dxejcti räjpreni:

—¿Xhini'c jiennu te gac jienpacnu dzuun ni rlaiz Dios?

29 Räjp Jesús lojreni:

—Dee najc ni rlaiz Dios guntu: chalilajztu xtidx narä, nani baxhalni.

30 Räjpreni lojni:

—¿Xhi seen gunlu te guihuiinu xcäl rnibeelu te cholilajznu xtiidxlu? ¿Xhi dzuun rujnlu?

31 Retoxtdnu gudajwreni yätxtiil ni laa mana loj reyubijdz si'cni caj loj reguijtz: “Badeedni yätxtiil ni biajb xhaguibaa gudajwreni.”

32 Räjpza Jesús:

—Rniliä, rniliäpac lojtu, xhet toMoisésdi ni badeed yätxtiil ni biajb xhaguibaa. Xtadä ni suniidx yätxtiil nani siäd pac xhaguibaa.

33 Sa'csi yätxtiil xten Dios najc bejn ni siäd xhaguibaa, niluxh laani rudeedni yäl nabajn par tejpas loj reben guedxliuj.

34 Räjpreni:

—Dad, baniidx yätxtiilga loonu.

35 Dxejcti räjp Jesús lojreni:

—Narä nacä yätxtiil xten yäl**na**bajñ nani riäjł jïääd; chutis ni jïääd loä diruni guiliaan, niluxh chutis ni rililajz xtidxä diruni jiojł par tejpas.

<sup>36</sup> Aguniä lojtu, la'tu ditu chalilajz, luxh abahuiitu loä.

<sup>37</sup> Guiraa renani abaniidx Xtaďä loä, siäädni loä, niluxh chutis ni jïääd loä dina cuälazäni.

<sup>38</sup> Sa'csi narä siälä xhaguibaali te gunä si'c ni rłajz Xtaďä, xhet si'cdi ni rłazädi.

<sup>39</sup> Dee najc ni rłajz Xtaďä nani baxhał narä: na'c nit nicla tej renani baniidxn loä, te guspañsacä guiragajcreni che gał dxej lult ni riäjł jïääd.

<sup>40</sup> Scree rłajz nani baxhał narä: guiraa renani fii lo Xi'n Dios, näj chalilajzreni xtiidxn, xca'reni yäl**na**bajñ par tejpas niluxh narä suspañsacäreni che gał dxej lult ni riäjł jïääd.

<sup>41</sup> Rediidxre bejn gusloj casiejy rexpeljñ Israel xcuent Jesús sa'csi räjpmi: “Narä nacä yätxtiil ni biäjł xhaguibaa.”

<sup>42</sup> Dxejcti räjpmi:

—¿La et Jesúsdi, xi'n José dee, ä? Nuure numbeenu xtaďni, xnanni, ¿xhoxh rniini xhaguibaa biäjłni?

<sup>43</sup> Dxejc räjpm Jesús lojreni:

—Na'c rusieinäj sa'tu.

<sup>44</sup> Rut rajcdi riääd loä palga di Xtaďä ni baxhał narä jïädñani loä, te guspañsacäreni che gał dxej lult ni riäjł jïääd.

<sup>45</sup> Loj reguijz ni bacuaa redade' ni gunii xtidx Dios caj scree: “Suliii Dios guiraareni.” Ni'cni guiraa reni rucuađiajg xtidx Xtaďä, reni rsieed lojni, reni'c ni jïääd loä.

<sup>46</sup> 'Dinä guiniä yu' chu abahuii lo Dios; tejtis ni abahuii lojni: nani baxhał Dios, ni'ctis abahuii lojni.

<sup>47</sup> Rniliä lojtu che rniä: nani chalilajz xtidxä, ni'c rajp yäl**na**bajñ par tejpas.

<sup>48</sup> Narä nacä yätxtiil nani ruedeđ yäl**na**bajñ.

<sup>49</sup> Retoxtađtu gudajw mana ni bastejb Dios lo reyubijdz, dxejcti gujtzarenı.

<sup>50</sup> Dee najc yätxtiil ni siääd xhaguibaa, te chutis ni gau yätxtiilga dini guet.

<sup>51</sup> Narä nacä yätxtiilbajñ ni siääd xhaguibaa. Palga yu' chu gau yätxtiilre, sibajñni par tejpas. Yätxtiil nani runidxä narä te xca' rebeñ guedxliuı yäl**na**bajñ najc lagajc bältiehxä.

<sup>52</sup> Dxejcti gusloj casiejy rexpeljñ Israel räjpmi:

—¿Xho gac guniidx dee bältiejxhni guidaauunu, ä?

<sup>53</sup> Räjpm Jesús:

—Rniliä, rniliäpac lojtu, palga ditu gau bältiejxh Xi'n Dios ni gujc Niguii, palga dizatu yä xtiejñni, digacdi ga'ptu yäl**na**bajñ.

<sup>54</sup> Nani gau bältiehxä, nani yäza xtienä, ni'c rajp yäl**na**bajñ par tejpas, niluxh suspañsacäreni che gał redxej lult.

<sup>55</sup> Sa'csi bältiehxä najc te yälrausa'cpac, xtienä najcza te yälräsä'cpac.

<sup>56</sup> Nani gau bältiehxä, nani yäza xtienä, ni'c yu'pac con narä, luxh narä yu'äza con laani.

<sup>57</sup> Xtaďä ni baxhał narä rajp yäl**na**bajñ par tejpas. Narä nabañä xcuent laani. Sigajcza nani rajw narä, sibajñzani xcuent narä.

<sup>58</sup> Dee najc yätxtiil nani biääd xhaguibaali; dini gac si'c mana ni gudajw xtađtu dxejc empac gujtrenı, sa'csi nani gau yätxtiilre sibajñni par tejpas.

<sup>59</sup> Recosre baluii Jesús neñ te guidobäz lał ni guyu'ni guedx Capernaum.

*Diidx xten yäl**na**bajñ par tejpas*

60 Che biejn diajgreni si'c, xhidajl rexpejn<sub>pacni</sub> räjp:

—Naganduxh najc rextiidxni. ¿Chu laa nani gac cuadiajgni?

61 Dxejcti gucbee Jesús cagusiejyreni xcuent rediidxga, dxejc gunabdiidxni räjpni:

—¿La rusieed rediidxre la'tu, ä?

62 ¿Xhicha guntu paru fiitu chä'p Xi'n Dios ni gujc Niguui cadro guyu'ni galoo?

63 Sprit xten Dios najc ni rudeed yäl<sub>nabajn</sub>; bältiejxhni xhet rujndini gaan. Rediidx nani guniä lojtu najc didxlii xcuent recos xten Sprit, luxh rediidxga rudeed yäl<sub>nabajn</sub> par tejpas.

64 Luxh lałtis yu' lojtu reni di chalilajz.

Sa'csi Jesús nancheeni galooli chu reni'c di chalilajz, anajnzani chuni'c guto'ni, guteedni laani ladz<sub>naa</sub> reben<sub>dojl</sub>.

65 Dxejcti räjpni:

—Ni'cni rniä lojtu, nicla tej rut sajcdi jiääd loä palga di Xtaďä jiäd<sub>näni</sub> loä.

66 Lagajc dxejc gusloj cabicaj xhidajl rebejn ni agujc xchej gusanäj Jesús, dirureni nisianäj Jesús.

67 Dxejcti räjp Jesús loj guidzubitio'p rexpejn<sub>pacni</sub>:

—¿La nägajcza la'tu rlaįztu jiitu, ä?

68 Badzu' Simón Pedr diidxre, räjpni:

—Daď, ¿chuloj chonnu? Luj rajplu diidx ni rudeed yäl<sub>nabajn</sub> par tejpas.

69 Nuure abiolilaaznu, anajnnu najclu Crist Xi'n Dios nani nabajn.

70 Badzu' Jesús diidxre, räjpni:

—¿La et lagajc narädi guleä guitzubitio'ptu? Luxh teјtu najc be<sub>ndxab</sub>.

71 Diidxga guniini xcuent Judas Iscariote, xi'n Simón, sa'csi Judas najc ni guto'ni mase nadxaagni lo guitzubitio'p rexpejn<sub>pac</sub> Jesús.

## 7

### *Di rebeјtz Jesús chalilajz*

1 Che guјcti recosre, cansaj Jesús nez reyuj xten Galilee, di rlaįzni jia'nni nez reguedx Judea sa'csi rlaįz reben<sub>ro'c</sub> ju'ni.

2 Luxh ameer gał lanij xten cose'ch xten guidoguiјd, te relanij xten rexpejn Israel.

3 Ni'c räjp rebeјtz Jesús loјni:

—Na'c jia'nl<sub>u</sub> ree. Huiј Judea te näјza rexpejn<sub>pac</sub>lu fii redzunro nani rujnl<sub>u</sub>.

4 Sa'csi rut rujndi xtz<sub>uunni</sub> xhiga'tz palga rlaįzni gacbee bejn<sub>xhi</sub> dzuun rujnni, te gumbee bejn<sub>ni</sub>. Palga rujn<sub>pac</sub>lu redzuunre, baluüini lo guiraa reben<sub>guedxliuj</sub>.

5 Guniireni si'c loјni sa'csi nicla rebeјtzni di chalilajz xtiidxni.

6 Dxejcti räjp Jesús loјreni:

—Gajd xhorä guidzuj<sub>n</sub>, niluxh par la'tu xhitis or<sub>najc</sub> hueen.

7 Di gacdi guidxe'ch reben<sub>guedxliuj</sub> loјtu, luxh rdxe'chreni loä sa'csi narä rniłiä xcuentreni: dzunguiјdx najc xtz<sub>uunreni</sub>.

8 La'tu cołchäj lanij; narä dina cha'a lanijga sa'csi gajd xhorä gał.

9 Che gulujx guniini si'c loјreni bia'ntini nez Galilee.

### *Huiј Jesús lanij xten retabernaculos*

10 Dxejcti che asää rebeјtzni lanij, dxejc näјza laani sääni lanij, luxh dini nusäbdiidx, si'c xhiga'tz sääni.

11 Dxejcti caguil rexpejn Israelni lo lanijga, räjpreni:

—¿Concha niguiiga?

<sup>12</sup> Lo rebejn xhidaalga yu' xhidajl bejn ni cagusiejyreni xcuentni. Yu'reni räjp: “Hueen najcni”, per sgaiireni räjp: “Dini gac hueen. Cagusgueeni rebenguejdx.”

<sup>13</sup> Nicla tejreni xhet casäbdiidxireni xhini'c caniiireni. Direni guinii dip sa'csi rdxejbreni rexpejn Israel nani rnibee.

<sup>14</sup> Agurojl lanij, che biu' Jesús neñ guidoro. Dxejcti gusloj caguluini.

<sup>15</sup> Dxejcti rdxeloy rexpejn Israel nani rnibee, räjpreni:

—¿Xho najn dee guiraloj, niluxh dini nisieed xleii toMoisés?

<sup>16</sup> Badzu' Jesús diidxre, räjpni:

—Yälrlulii nani caluiyä et xtenädini, xten nani baxhaļ naräni.

<sup>17</sup> Palga yu' chu rlajz gun nani rlajz Dios, sacbeeni la xten Dios najc reyälrlulii xtenä, o la lagajcsi narä rbää diidx ni caguluia.

<sup>18</sup> Nani rusule'ni diidx nani lagajc laani rbääni, ni'c rniini diidxga te guilia'p rebejn xpala'nani, luxh nani rguuil chä'p xpala'n nani baxhaļni, ni'c ni rni diidxlii, xheti yälrusguee neñ lastooni.

<sup>19</sup> ¿La di toMoisés nuniidx leii lojtu, ä? Niluxh nicla tejtu di gusoob xtidx leiiga. ¿Xhicuent rlajztu ju'ttu narä, pes?

<sup>20</sup> Badzu' rebeñ xhidajlga diidxre, räjpreni:

—¿Xprip bendxab yu' lastoolu! ¿Chuni'c rlajz ju'tlu?

<sup>21</sup> Badzu' Jesús diidxre lojreni, räjpni:

—Tejtis dzuun benä con xcälrnibeä, dxejc guiraatu cadxelojtu sa'csi benäni dxej ni rusilajztu.

<sup>22</sup> Ni'cni baniidx toMoisés lojtu yälru'tu bee, luxh etlaadini guläxtejnini, agac guläxtej retoxtadgoldootuni. La'tu rusäl'tu bee rebiuux mase najcni dxej nani rusilajztu.

<sup>23</sup> Mbaj pes, palga rajc rusäl'tu bee bejn te dxej nani rusilajztu didi nit xleii Moisés, ¿xhicuent rdxe'chtu loä sa'csi basiacäpac te bejn te dxej nani rusilajztu, ä?

<sup>24</sup> Na'c rujntu yäl'guxhtis si'tctis ni rlajztu. Colyejn yäl'guxhtis con yäl'guxhtis xten Dios.

### *Rusule' Jesús casiädni*

<sup>25</sup> Dxejcti gusloj gaii bejn Jerusalén cayujn yäl'gunabdiidx, räjpreni:

—¿La etlaadi dee ni caguilreni te ju'trenini, ä?

<sup>26</sup> Ani asuga', caniini nez loj guiraa rebenguejdx, niluxh rut rudxojdini. ¿Xhaa ahuililajz reguxhtis, regubier laani najcpacni Crist, ä?

<sup>27</sup> Niluxh nuure nadoncheenu caro siäd niguiire, niluxh che jiäd Crist, rut gacbeedi caro siädni.

<sup>28</sup> Caguluini Jesús neñ guidoo che biejn diajgni rediidxre, dxejc dipduxh guniini, räjpni:

—La'tu numbeetu narä, najntu caro siälä; luxh dina niälä lagajcsi narä; nani baxhaļ narä guliipac nabajñni, luxh la'tu ditu gumbeeni.

<sup>29</sup> Luxh narä numbeäni, sa'csi lojni biriä, laani baxhaļzani narä.

<sup>30</sup> Dxejc rlajzreni niniaazrenini, niluxh rut gunaazdini, sa'csi gajd xhorni gal.

<sup>31</sup> Xhidajl bejn lo rebeñ xhidajlga huililajz xtiidxni, dxejcti räjpreni:

—Cheni jiäd Crist, ¿xhixh sujnruni milagwr loj nani rujn dee, ä?

### *Ruxhaļ refarisee guixhajz guiniaaz Jesús te jiäuni*

<sup>32</sup> Che biejn diajg refarisee xhi canii rebejn xcuent Jesús, laareni nájza rebixhojz nani rnibee lo rebixhojz baxha|reni guixhajg te guiniaazreni Jesús te jiáuuni.

<sup>33</sup> Sas rájp Jesús lojreni:

—Bale'si dxej su'á lojtu, dxejcti guibi'á loj nani baxha| nará.

<sup>34</sup> Siguiltu nará, niluxh ditu guidxál nará, sa'csi cadro cha'á digacdi jiáádtu.

<sup>35</sup> Ni'c gunii rexpejn Israel lo sa'reni; rájpreni:

—¿Cacharo chááni ni'c di gacdi guidxálnuni? ¿Xhaa sijni loj rexpejn Israel nani nare'ch nez lajdx regriegos te guluini regriegos?

<sup>36</sup> ¿Xhi sáloj diidxre nani guniini loonu: “Siguiltu nará, niluxh ditu guidxál nará, sa'csi cadro cha'á di gacdi jiáádtu”?

### *Regueu nisnabajn*

<sup>37</sup> Lult dxe lanij, ni najc dxero, gusulii Jesús dipduxh guniini, rájprni:

—Palga yu' chu cayojl, sujiáádni loá te yáni.

<sup>38</sup> Nani chalilajz xtidxá si'cni caj lo rexquijtz Dios nen lastoolini siliejn nisnabajn.

<sup>39</sup> Rediidxre guniini xcuent Sprit Dxaan nani churu jiádlájz nen lastoo reni rililajz xtiidxni, sa'csi gajd Sprit Dxaan jiáád, sa'csi gajd Jesús guibansac lo reben|gut.

### *Gucgala' rebejn*

<sup>40</sup> Lo reben xhidajlga yu' reni biejn diajgreni rediidxga, dxejc rájpreni:

—Guliipacni, dade're najc laapac ni siáád, si'c ni rnii xtidx Dios.

<sup>41</sup> Yu'zarení rájp:

—Dade're najc Crist ni cabááznu.

Yu'za sgaii ni rájp:

—Gurniálojtu jiáád Crist nez Galilee.

<sup>42</sup> Ni loj rexquijtz Dios caj riájlpac gac Crist te rexagdoo torei David, jiáádzani guedx Belén, lagajc guejdx cadro siáád torei David.

<sup>43</sup> Dxejcti gucgala' rebejn xcuent Jesús.

<sup>44</sup> Yu'reni rlajz chááni pres luxh rut biajxdí gunaazni.

### *Di reguxhtis chalilajz biáád Crist*

<sup>45</sup> Gubi' reguixhajg xten guidoo loj rebixhojzro nájza refarisee. Dxejcti gunabdiidxreni loj reguixhajg, rájpreni:

—¿Xhicuent ditu niádnáni?

<sup>46</sup> Badzu' reguixhajg diidxre, rájpreni:

—¡Gajd|pac te bejn guinii si'cni rnii bejn|ga!

<sup>47</sup> Dxejc rájp refarisee:

—¿La náj la'tu abasgueeni, á?

<sup>48</sup> ¿Xhixh loj regubier o loj refarisee yu' chu tej ni ahuililajz xtiidxni, á?

<sup>49</sup> Reben xhidajlre ni di gan xleii toMoisés, reni'c agunijtpac.

<sup>50</sup> Nicodem, nani huij lojni te guxhijj, najc te refarisee. Laani rájprni lojreni:

<sup>51</sup> —Lo xleiiu caj: digacdi guntu yálguxhtis te bejn palga gajd|tu gucuadi-agxgaa xtiidxni, te don xhi bejn|ni.

<sup>52</sup> Badzu'reni diidxre rájpreni lojni:

—¿La nájza luj siáádlu Galilee, á? Bi|sa'c xhi caj lo xquijtz Dios, suhuilu nicla tej niguii nani rnii xtidx Dios di jiáád nez Galilee.

### *Gunaa nani biga' carálguijxh con te niguii*

<sup>53</sup> Dxejc cade tejreni sii rolizreni.

## 8

<sup>1</sup> Dxejcti huij Jesús nez dan Oliib.

<sup>2</sup> Rsilru gubi'ni, bui'ni nen guidoo. Luxh sanuutis siäd guiraa reben\_guejdx lojni. Dxejc ro'c gurejni, gusloj caguluiinireni.

<sup>3</sup> Dxejcti biäd refarisee näjza reben najn, biädnäreni te gunaa nani biga' carälguijxh con te niguii. Basujrenini galäii reni suga' ro'c.

<sup>4</sup> Räjpreni loj Jesús:

—Mastr, gunaare biganäj te niguii carälguijxhreni, niluxh yu' chäälni.

<sup>5</sup> Loj leii xten Moisés caj guicuaanu guij yejc sa' gunaaga te guetni. Luj çhicha naalu?

<sup>6</sup> Si'c räjpreni lojni te gaxäjsi gunijtni te diidx te gac cue'creni xquejni. Niluxh Jesús basajbtisni lojni lo yuj, gusloj cagucuaani lo yuj con bicuenaani.

<sup>7</sup> Dxejc sanuutisreni canabdiidxreni, huisutini, räjpreni:

—Nani yu' lojtu ni xhettipac xtojlni, ni'c ganiddoo sugucuaani guij yejc gunaare.

<sup>8</sup> Basabsac lojni lo yuj sanuutis cagucuaani con bicuenaani lo yuj.

<sup>9</sup> Luxh laareni che biejn diajgreni diidxga, sa'csi yu' xtojlni, gusloj biriireni tebgajreni, ganid ni najc bengolru, dxejcti ni najc huinru. Dxejcti bianxteb Jesús näjza gunaa ni suga' galäiireni.

<sup>10</sup> Dxejc gusulii Jesús, luxh sa'csi rutru lojdi bahuiini, xtebtis gunaaga, räjpreni lojni:

—Gunaa, çcon reni cabe'c xquejlu? çLa rut bacuaquijdiru luj, ä?

<sup>11</sup> Räjpreni Gunaaga:

—Nicla tejreni, Dad.

Dxejcti räjpreni Jesús lojni:

—Niclaza narä dina gucuaquiäru luj. Huij, na'cru gunlu dojl.

### *Jesús najc bianij xten guedxliuj*

<sup>12</sup> Gunii Jesús lo rebejn stehualt, räjpreni lojreni:

—Narä nacä bianij xten guedxliuj; nani jiädnajl narä dini sa lo yäl\_nacä\_jy, sica'ni bianij ni rudeedpac yäl\_nabajn.

<sup>13</sup> Dxejcti räjpreni refarisee lojni:

—Luj canilul diidx lagajcsi xcuentlu. Xhet sajcdi sa' diidxga.

<sup>14</sup> Badzu' Jesús diidxre, räjpreni lojreni:

—Masque lagajc narä rniä diidx xcuentä, sajç xtidxä, guliipacni, sa'csi ananä caro siälä, ananäza caro cha'ä. Niluxh la'tu ditu gan caro siälä, niclaza caro cha'ä.

<sup>15</sup> La'tu rujntu yäl\_guxhtis si'c najctis rexhigab xten ben\_guedxliuj. Narä rut lojdi runä yäl\_guxhtis.

<sup>16</sup> Palga gunä yäl\_guxhtis, yäl\_guxhtis xtenä laaca najcni, sa'csi et xtebädi runä yäl\_guxhtis, sa'csi narä näj Xtaädä ni baxha\_l narä rien\_nuni.

<sup>17</sup> Luxh lo xleiitu caj diidxre: “Che rniü tio'p bejn tejsi diidx, didxliini, colchalilajzni.”

<sup>18</sup> Narä rniiläpac diidx lagajc xcuentä, dxejcti Xtaädä nani baxha\_l narä rniiläzani diidx xcuentä.

<sup>19</sup> Räjpreni loj Jesús:

—çCaro yu' xtaädä?

Räjpreni Jesús lojreni:

—Ditu gumbee nicla narä, niclaza Xtaädä; paru niembeetu narä, niem-beezatu Xtaädä.

<sup>20</sup> Rediidxre gunii Jesús cadre re' gojn, la<sub>l</sub> ni caguluiini nen guidoro niluxh rut gunaazdini sa'csi gajd xho<sub>r</sub>ni guidzujn.

*Cadre cha'ä, la'tu digacdi jiaädtu*

<sup>21</sup> Gunisac Jesús lojreni, räjpni:

—Narä sia'ä, luxh la'tu siguiiltu narä, niluxh loj xtojltu sejtto. Cadre cha'ä di gacdi jiaädtu.

<sup>22</sup> Räjp rexpejn Israel loj resa'reni:

—¿Xhaa sugu'tni lagajc laani, ni'cni najni di gacdi chonnu cadre chaäni?

<sup>23</sup> Räjp Jesús lojreni:

—La'tu najctu ben lo yuj. Narä nacä ben ni siääd jiaa. La'tu najctu ben guedxliujre. Luxh narä dina gacätis ben guedxliujre.

<sup>24</sup> Ni'cni guniä lojtu, sejtto lo xtojltu sa'csi palga ditu chalilajz nacä chu nacä, sejtpectu lo xtojltu.

<sup>25</sup> Dxejcti räjpreni lojni:

—¿Chuxh najclu?

Dxejcti badzu' Jesús diidxre lojreni, räjpni:

—¿Xhini'c guniä lojtu galooli?

<sup>26</sup> Xhidajl diidx rlazä guiniä, xhidajlza yälguxhtis rlazä gunä xcuenttu sa'csi ditu chalilajz, per nani baxha<sub>l</sub> narä najc ben guliipac; nani biejn diagä guniini, rediidxga rniä loj reben guedxliuj.

<sup>27</sup> Luxh laareni direni niacbee la xcuent Dad Dios ni caniini.

<sup>28</sup> Ni'cni räjp Jesús lojreni:

—Cheni guiliästu Xi'n Niguii jiaa, dxejc sacbeetu laa narä ni baxha<sub>l</sub>ni, luxh xhetliidi runä lagajcsi xcuentä. Si'cni baluii Dad narä, si'ctis rniä.

<sup>29</sup> Nani baxha<sub>l</sub> narä suganäjni narä. Gajd Dad gusanxteb narä, sa'csi runätis ganax redzuun nani rchagljazni.

<sup>30</sup> La<sub>l</sub> ni caniini si'c, xhidajlreni huililajz xtiidxni.

*Rexi'n Dios con remos xten dojl*

<sup>31</sup> Dxejcti räjp Jesús lo rexpejn Israel nani huililajzga:

—Palga la'tu sutijptu, guzoobtu xtidxä, dxejc guliipac najctu xpenä.

<sup>32</sup> Sumbeezatu nani najc didxguli, niluxh didx guliiga sus<sub>l</sub>aa la'tu lo xtojltu.

<sup>33</sup> Räjpreni lojni:

—Rexagdo to Abraham najctu, rut chu lojdi gudo'nu si'c mos. ¿Xho mood naalu “si<sub>l</sub>iaatu”?

<sup>34</sup> Räjp Jesús:

—Riniliä, rniliäpac lojtu, chutis ni rujn dojl najc mos xten dojl.

<sup>35</sup> Nani najc mos, dini jia'n rolijz xlamni guideb guibaj<sub>n</sub>ni, niluxh nani najc xi'n lamga, ni'c sii sia'n rolijz xtadni guideb guibaj<sub>n</sub>ni.

<sup>36</sup> Ni'cni, palga rus<sub>l</sub>aa xi'nni la'tu lo dojl, dxejcsii apac gulaatu.

<sup>37</sup> Ananä najctu xagdo to Abraham, luxh la'tu rlanjtu ju'ttu narä sa'csi di xtidxä jiu' lo xcäriejntu.

<sup>38</sup> Narä rniä nani abahuiä con Xtaä; luxh la'tu rujntu nani biejnza diajgtu lo xtadtu.

<sup>39</sup> Badzu'reni diidxre, räjpreni lojni:

—Xtadnu najc to Abraham.

Dxejc räjp Jesús lojreni:

—Palga la'tu najcpectu xi'n to Abraham, sujntu sa' dzuun ni bejn to Abraham.



<sup>40</sup> Luxh naj rlanjtu ju'ttu narä, sa'csi rniliä rediidx nani baluui Dios loä. ¡Di toAbraham niujn si'c!

<sup>41</sup> La'tu rujntu xtzuun xtadtu.

Dxejc räjpreni lojni:

—Nuure dinu gac xi'n chälbejn̄di; nuure tejtis xtadnu yu', laani najc Dios.

<sup>42</sup> Dxejcti räjp Jesús:

—Paru guliini najc xtadtu Dios, ninälajztu narä sa'csi loj Dios biriä siälä ree. Xhet lagajcsi xcuentä siälädi; Dios baxhal narä.

<sup>43</sup> ¿Xhicuent ditu gacbee rediidx ni rniä lojtu? Sa'csi di rlanjtu gucuadiajgtu rextidä.

<sup>44</sup> Xtadtu najc beñdab. La'tu najctu xi'nni, rlanjtu guntu nani rlanjtisni guntu. Xtadtu galooli najcni te ni rugu't, dini suu xlaad didxlii, sa'csi xheti didxlii neñ lastooni. Che rniini didx-xhii, si'c rniini sa'csi si'cpac najcni, sa'csi najcni beñ didx-xhii, najczani xtad didx-xhii.

<sup>45</sup> Niluxh narä rniä didxlii, ni'c ditu chalilajz xtidä.

<sup>46</sup> ¿Chu tejtü sajç guluii te dojl̄ ni benä? Narä rniä didxlii. ¿Xhicuent ditu chalilajz xtidä, ä?

<sup>47</sup> Nani najc xpejn̄ Dios, ni'c rucuardiajg xtidx Dios. Sa'csi la'tu ditu gac xpejn̄ Dios, ni'cni ditu gucuadiajg xtidä.

### *Ansde toAbraham, agac nabajn̄ Crist*

<sup>48</sup> Dxejcti badzu' rexpejn̄ Israel diidxre, räjpreni lojni:

—Laaca rniinu luj najclu te bejn̄ ni siääd Samaria, beñdab yu' lastoolu.

<sup>49</sup> Räjp Jesús lojreni:

—Xhet beñdabdi yu' lastoä. Nani runätis rliä'pä xpala'n Xtadä, luxh la'tu alga rbälaztu narä.

<sup>50</sup> Luxh narä dina quilä chu guiliä'p xpala'nä, yu' chu rguuil guiliä'p bejn̄ xpala'nä, niluxh laani rujnni yalguxhtis.

<sup>51</sup> Rniliäpac lojtu, nani riu, nani rusooob xtidä, dipacni guet.

<sup>52</sup> Dxejcti räjp rexpejn̄ Israel lojni:

—Naj agucbeepacnu yu' beñdab lastoolu. ToAbraham näjza reniguii nani gunii xtidx Dios, guiraareni agujt. Luxh luj rniilu: “Nani riu, nani ruzoob xtidä, dipacni guet.”

<sup>53</sup> ¿Xhixh sajrculo lo toxtadnu Abraham, ä? Ni laani gujtni, gujtza reniguii ni gunii xtidx Dios. ¿Chuxh rchalolu najclu?

<sup>54</sup> Badzu' Jesús diidxre, räjpni lojreni:

—Palga lagajc narä rliä'pä xpala'nä, xhet sajcdi xpala'nä. Per nani rliä'p xpala'nä najc Xtadä, lagajcza Xtadä ni rniitu najc Xtiostu.

<sup>55</sup> Niluxh la'tu ditu gumbeäni. Narä numbeäni. Paru guiniä dina gumbeäni, sacä te beñ didx-xhii si'c najctu la'tu. Niluxh dee, numbeäpacni, luxh riuä ni rniini, rusobä xtiidxni.

<sup>56</sup> ToAbraham toxtadgoldootu, bibalajzni sa'csi nuhuiini dxej nani jialä, niluxh bahuiinini dxejc bibalazduxhni.

<sup>57</sup> Dxejcti räjp rexpejn̄ Israel lojni:

—Nicla gajdlu chu tiubituu ijz, ¿xho naalu abahuiilu lo toAbraham?

<sup>58</sup> Räjp Jesús lojreni:

—Rniliäpac lojtu, che gajdli guibajn̄ toAbraham, agac nabañä narä.

<sup>59</sup> Dxejcti cua'reni guij te nucuaareni yejc Jesús, per di Jesús niga', biriini neñ guidoro, gudejdn̄i galäiireni. Sä'tini.

## 9

*Basiajc Jesús te bejn ni natiä'p balojni che gojllini*

1 Che cadejd Jesús te lajt, bahuiini sobga' te bejn ni che gojlli bejnğa agajc natiä'p balojni.

2 Dxejc gunabdiidx rexpejn pacni lojni, räjpreni:

—Mastr, ¿chuni'c bejn dojl, la bejnre o la xcuzajnni, ni'c natiä'p balojni che gojlni, ä?

3 Räj p Jesús:

—Niä laani, niäza xcuzajnni di niujn dojl. Si'c gojlni te xcuent ni sajç bejnre suhii bejn xho najc xtzuun Dios.

4 Nanab gunä xtzuun nani baxhañ narä ñaj ni najc rdxee, sa'csi çeni guidzujñ guxhijñ rut gacdi gun dzuun.

5 Lañi yu'ä lo rebejn guedxliuj, nacä xpianij guedxliuj.

6 Che gulujx guniini si'c, batiobxhejnni lo yuj, bejnii bajñ con xhejnni, gudääbnini con bicueñaani lo rebaloj lotiä'pğa.

7 Dxejcti räjpni:

—Huij, huitiib lojlu neñ nis ni laa Siloé. Laj nisga sälojza “baxhañni”.

Dxejcti huijni. Huitiibni lojni. Che gubi'ni, aruhuiini.

8 Dxejcti rexpisñ lotiä'pğa, ñaj renani galoo bahuiireni natiä'p lojni, räjpreni:

—¿La et laadi dee ni rbej te rutie'ni gojn, ä?

9 Yu'reni räjp:

—Laanini.

Yu'zareni räjp:

—Et laadini, rujnsi lojni si'c.

Laani räjpni:

—Laa naräni.

10 Räjpreni lojni:

—¿Xho mood arien balojlu?

11 Dxejcti räjp dade'ga nani gujc lotiä'p:

—Dade' ni laa Jesús bejn bajñ, gudääbnini baloä, dxejcti najni: “Huitiib lojlu neñ te nis ni laa Siloé”, dxejcti che huitibä loä, lagajc dxejc bien loä.

12 Dxejcti räjpreni lojni:

—¿Con dade'ga ñaj?

Räjpti bejnğa:

—Dina ganä.

*Reben farisee bejn yälgunabdiidx lo dad lotiä'p nani biajc lojni*

13 Huiñareni nani gujc lotiä'pğa nez loj refarisee.

14 Luxh sa'csi najcni dxej ni rusilajzreni che bejn Jesús bajñ ni gudääbni loj lotiä'pğa te biajc balojni,

15 gunabdiidx sac refarisee loj dade' nani biajc balojni, xho mood arien balojni ñaj.

Laani räjpni lojreni:

—Bajñ gudääbni loä, dxejc gudibä loä, ñaj aruhuiä.

16 Dxejc yu' refarisee ni räjp:

—Di dade' ni bejn dee gac xpejn Dios, sa'csi dini jiu dxej ni rusilajz xpejn Israel.

Yu'zareni räjp:

—¿Xho gac gunni sa' remilagwrga paru najcni beñ dojl?

Ni'cni gula' sa'reni, gujcreni tio'p gala'.

<sup>17</sup> Dxejcti gunabdidxsacreni lo ni gujc lotiä'p:

—Luj a', çxhi rniilu xcuent nani basiajc balojlu?

Dxejc räjp dade'ga:

—Narä rniä najcni te bejn nani rniü xtidx Dios.

<sup>18</sup> Luxh rexpejn Israel naaddireni chalii lajzreni gujcpacni te lotiä'p ni abien balojni, dxejcti gurejdxreni xcuzajn dade' ni gujc lotiä'pga.

<sup>19</sup> Dxejcti gunabdiidxreni lojreni, räjpreni:

—çLaa xi'ntu dee nani najtu cheni gojllini natiä'p lojni? çXhoxh arien lojni naj?

<sup>20</sup> Badzu' rexcuzajnni diidxre, räjpreni:

—Nadonnu laa xi'nnuni, luxh che gojlni natiä'p lojni.

<sup>21</sup> Niluxh dinu guidon naj xho mood arien lojni, dizanu guidon chu basiajc balojni. Colguiniabdiidx lojni, anajcni bengool, lagajc laani sajç guiniini xhi gusajcni.

<sup>22</sup> Si'c gunii xcuzajnni sa'csi rdxejbreni rexpejn Israel, sa'csi agac bia'nreni diidx sibääreni, dirureni gusaan jiu' neñ guidoo chutis te bejn ni naa Jesús najc Crist nani abiääd.

<sup>23</sup> Ni'cni räjp rexcuzajnni:

—Anajcni bi'n ni ayu' xcâriejnini. Lojni colguiniabdiidx.

<sup>24</sup> Dxejcti guredxsacreni nani gujc lotiä'pga, räjpreni lojni:

—Gulá'p xpala'n Gueb Dios. Nuure nadonnu beñ dojl najc dade'ga.

<sup>25</sup> Dxejcti badzu' dade'ga diidxre, räjpni:

—Dina ganä la najcni beñ dojl o la dini gac. Tejtis nanä: gucä lotiä'p, luxh naj arien balaö.

<sup>26</sup> Stehuält gunabdiidxreni, räjpreni lojni:

—çXho bennäjni luj? çXho bejnini basiajcni balojlu?

<sup>27</sup> Badzu' dade'ga diidxre, räjpni:

—Ni aguniä guira'ti lojtu, luxh la'tu ditu jiu xtidxä. çXhicuent rlanjtu guinisacäni? çXhixh näj la'tu rlanjtu gactu xpejn pacni, ä?

<sup>28</sup> Dxejc gudilnäjrenini, räjpreni:

—Luj najclu xpejnini, per nuure najcnu xpejn toMoisés.

<sup>29</sup> Anadonnu guninäj Dios toMoisés, niluxh dade're dinu guidon casiäädni.

<sup>30</sup> Dxejcti räjp dade' lojreni:

—Dee najc te cos ni guidxeloj bejn: la'tu ditu gan casiäädni, iniluxh laani basiajcni balaö!

<sup>31</sup> Nadoncheenu di Dios cuadiajg xtidx reben dojl; palga yu' chu rajn Dios, ni rusoobza xtiidxni, rucuardiajg Dios xtidx sa' bejn ga.

<sup>32</sup> Che guslojli guedxliuj gajd diajgnu jiejn xcuent te bejn nani rusiajc baloj te beñ lotiä'p nani natiä'p lojni cheni gojllini.

<sup>33</sup> Palga xhet lo Diosdi siääd dade're, xhet sajcdi gunni.

<sup>34</sup> Badzu'reni diidxre räjpreni lojni:

—Luj, lo dojlpac gojllu, çxho jädluulu nuure?

Dxejcti guläärenini neñ guidoro, barilaagwrenini.

<sup>35</sup> Biejn diajg Jesús guläärenini neñ guidoro, che bidxälnini, räjpni lojni:

—çLa rililajzlu xtidx ni najc Xi'n Dios ni gujc Niguii, ä?

<sup>36</sup> Badzu'ni diidxre, räjpni:

—çChuni'c najcni, Dad, te chalilazä xtiidxni?

<sup>37</sup> Räjp Jesús:

—Abahuulu lojni, lagajcza laani caninäjlu naj.

<sup>38</sup> Dxejcti räjpni:

—Rililazä Dad.

Dxejcti bazuxhijbni te gojñnini.

<sup>39</sup> Räjp Jesús:

—Par yälguxhtis biälä lo guedxliujre, te fii renani di lojni jien, niluxh reni rien lojni sajcreni lotiä'p.

<sup>40</sup> Refarisee nani suganäjreni, che biejn diajgreni diidxre, räjpreni:

—¿Xhixh najczanu beñ lotiä'p, ä?

<sup>41</sup> Räjp Jesús:

—Paru najctu lotiä'p, rut gucuaquijditu xtojltu, ñaj sa'csi rniitu rien lojtu, sicaquijtu rextojltu.

## 10

### *Jesús najc te baxtorsa'c*

<sup>1</sup> 'Rniliä, rniliäpac lojtu, nani di jiu' ro' gurajl xte rexiil, alga richu'ni stelaad, rä'pni cuä' gurajl, ni'c najcni te gubaan.

<sup>2</sup> Nani riu' nez ro' gurajl xten rexiil, laani najc xpaxtoorreni.

<sup>3</sup> Che guidzujñ baxtoor, ruxhal nani rcanäj ro lä', te jiu'ni. Rexiilga numbeereni xse' baxtoor, dxejctiru laani rbejdxni rexiilga, tebgaj xiilga yu' lajni, rinäzanireni cadro naga' guixasa'c.

<sup>4</sup> Che rii rexiilga neñ gurajl, sanä baxtoorgareni, luxh numbee rexiilga xse'ni, ni'c rsianäjreni baxtoorga.

<sup>5</sup> Luxh dipacreni chanä te baxtoor nani direni gumbee, ruxuñreni lojni sa'csi direni gumbee xse' garenca bejn.

<sup>6</sup> Bij Jesús rediidxga lojreni, niluxh direni niacbee xhi säloj ni guniini.

<sup>7</sup> Dxejcti gunisac Jesús diidx lojreni; räjpni:

—Rniliä, rniliäpac lojtu, narä nacä si'c roxlä' xcurajl rexiil.

<sup>8</sup> Guiraa reni abiääd galoo, najcreni ganax gubaan luxh di rexiil nucuadi-ajg xse'ni.

<sup>9</sup> Narä nacä si'c rolä' xten gurajl, nani jiu' nejzga, silaani loj xtojlni, siu'ni, siriini te guidxälni guixasa'c gauni.

<sup>10</sup> 'Ni najc gubaan riäädtsini te cuanni, te ju'tni, te guxhinzani, niluxh narä siälä te ga'ptu yäl'nabansa'c, yäl'nabajñ par tejpas.

<sup>11</sup> Narä nacä baxtorsa'c; luxh baxtorsa'c sudeed lagajc xcäl'nabajñni xcuent rexiilni.

<sup>12</sup> Niluxh te mos ni rajxh, di gac baxtoorpac, ni xhet xtendini najc rexiil, che rhuini siääd te cuyo't, ruxuñni, li rbälazni rexiil. Dxejc rniaaz cuyo't rexiil, rutie'chzani rexiil.

<sup>13</sup> Mosga ruxuñ sa'csi najcni mostis, luxh dini jiu xhi rsiajc rexiil.

<sup>14</sup> 'Narä nacä baxtorsa'c; numbeä reni najcpac rexilä; rexilä numbeezareni narä

<sup>15</sup> sigajc numbee Xtaädä narä, sigajc numbeäza Xtaädä; luxh sudeä xcäl'nabañä xcuent rexiilga.

<sup>16</sup> Rapäza ste cuaa xiil, ni di gac xten gurajlre; näjza laareni nanab chaxiä, te gusbodijagreni xtidxä, te guidxagsa' guiro'p cuaareni, gacreni tejtis gurajl, tejtisza baxtoor.

<sup>17</sup> 'Narä siguixäza xcäl'nabañä, guetä, te dxejcru siliässacä xcäl'nabañä, guibañsacä, ni'cni sanälajz Xtaädä narä.

18 Rut sajcdi ju't narä, lagajc narä gudedä xcäl'nabañä, guetä. Rapä yälrnibee te gudedä xcäl'nabañä, guetä, rapäza yälrnibee te xcasacä xcäl'nabañä te guibañsacä, sa'csi dee najc yälrnibee ni baniidx Xtaďä loä.

19 Xcuent rediidxre gula' sa' rexpejn Israel, gujcreni tio'p gala'.

20 Xhidajlreni canii:

—¿Xhicuent riutuni? ¿La ditu gan te beñdxab yu' lastooni? Yejcni rajc. Xhigac rcuadiajgtu xtiidxni.

21 Dxejc ste cuaareni:

—Dini gac. Di rediidxre gac xtidx te beñdxab. ¿Xhixh sajc rusiajc beñdxab baloj relotia'p, ä?

### *Rdx'e'ch rebejn loj Jesucrist*

22 Lagajc neñ redxejga gujc lanij xten xquidoo rexpejn Israel guedx Jerusalén.

23 Najcni bäi najl. Biu' Jesús guidoro, sasajni nez neñ cordoor ni laa xten Salomón.

24 Gubig rexpejn Israel guideb gabi Jesús, räjpreni lojni:

—¿Gucli gucua'tzlu loonu chu najclu? Palga luj najclu Crist ni cabäaznu jiaäd, guiniliini loonu tejpas.

25 Dxejc badzu' Jesús diidxre, räjpni lojreni:

—Aguniä lojtu si'c, niluxh ditu nililajz. Redzuun nani runä xcuent xcälrnibee Xtaďä, huenliisi ruluilojreni chuni'c nacä.

26 La'tu ditu chalilajz sa'csi ditu gac rexilä.

27 Rexilä numbee xse'ä, luxh narä numbeäzareni, riädnajlzareni narä.

28 Narä rudedä yäl'nabajñ par tejpas loj rexilä, luxh direni nitloj par tejpas. Rutza laadi nani sajc gudzucajreni ladzñaä.

29 Xtaďä baniidxreni loä, laani najcni guroobru, nadipru loj guiraareni. Rut laadi nani sajc gudzucajreni ladzñaä Xtaďä.

30 Narä näjza Xtaďä najcnu tejsi.

31 Dxejc gulässac rexpejn Israel guij, te nucuaareni yejc Jesús.

32 Dxejcti räjp Jesús lojreni:

—Xhidajl dzuun xten Xtaďä abaluiä lojtu, ¿lo redzuunga, xhi tej dzuun rujn gucuaatu guij yecä?

33 Dxejcti räjp rexpejn Israel lojni:

—Xcuent redzuun ni rujnlu dinu gucuaa guijlu. Sa'csi guniyajlu, ni'c nucuaanu guij yejclu. Beñ guedxliujlu, luxh najlu najclu tejsi con Dios.

34 Badzu' Jesús diidxre, räjpni lojreni:

—¿La et loj xleiiditu caj rediidxre: “Narä rniä, la'tu najc redios”?

35 Nancheenu digacdi guidxaa xquijtz Dios. Palga gulalajni redios rebejn nani bejn yälguhctis loj rexpejn Israel, dxejc

36 naj ¿Xhicuent guniitu loä: “Caniyajlu Dios”, sa'csi guniä lojtu narä nacä Xi'n Dios? Ni gule Dios narä, baxhañni narä lo guedxliujre.

37 Palga dina gunä redzuun xten Xtaďä, na'c chalilajztu rextidxä.

38 Luxh palga runnäni, mascä ditu chalilajz xtidxä, colchalilajz ni ruluui reyälmilagwr nani runä, te gacbeetu par tejpas, Xtaďä yunäj narä, narä yunäza laani.

39 Che rlaizreni niniaazrenini stehuält, laani biriini ladzñaareni.

40 Dxejcti sääni, gubisacni nez stelaad gueu Jordán, nejzga huijia'nni, cadre gusloj batiobnis Juan.

41 Xhidajl bejn bidzujñ lojni ro'c, räjpreni:

—Di Juan niujn nicla tej yälmilagwr luxh guiraa rediidx ni gunii Juan xcuent dade're najc didxliipac.

<sup>42</sup> Xhidalduxhrene huililajz xtiidxni ro'c.

## 11

### *Gujt Larz*

<sup>1</sup> Yu' te dade' ni cayacxhuu ni laa Larz. Rbäjzni guedx Betania, lajdxza rebisiajnni Marii näjza Mart.

<sup>2</sup> Mariire, bisiajn Larz, najc nane' ni basäl setnejxh ni' Jesús, batiaazani ni'ni con xquidxejcní.

<sup>3</sup> Ni'cni baxhal guiro'p bäjltre diidx loj Jesús, räjpreni lojni:

—Dad, xamiigwlu nani sanälajzlu cayacxhuu.

<sup>4</sup> Che biejn diajg Jesús rediidxga, räjpmi:

—Di yälracxhuure ju'tni, sa'csi yälracxhuure najc te guluulojni xcälrnibee Dios. Te guluulojza yälracxhuure xcälrnibee Xi'n Dios.

<sup>5</sup> Sanälajz Jesús Mart, bäjlni, näjza Larz,

<sup>6</sup> che räjpreni lojni cayacxhuu Larz, bia'nni stio'p dxej cadro yu'ni.

<sup>7</sup> Dxejcti räjpmi loj rexpeljpacni:

—Colcho', chonnu stehuält región Judea.

<sup>8</sup> Räjpmi rexpeljpmi lojni:

—Mastr, gajd gac xchej rlajz rexpelj Israel ni rnibee nucuaa guij yejclu te nugu'treni luj, luxh naj rlajzlu chäsaclu ro'c.

<sup>9</sup> Dxejcti räjpmi Jesús lojreni:

—¿La xhet tzubutio'p ordi yu' lo tebdxej, ä? Palga sa bejn rdxee, dini jiajb sa'csi ruhuini lo bianij nani yu' lo guedxliujre.

<sup>10</sup> Palga chasajni guxhijn, siliaro'ni, sa'csi xheti bianijga.

<sup>11</sup> Dxejcti räjpmi Jesús lojreni:

—Nagayejs xamigwä Larz. Cha'a te chacuänäni.

<sup>12</sup> Dxejcti räjpmi rexpeljpacni lojni:

—Dad, palga agudiesni, pet siajcní.

<sup>13</sup> Jesús canii lojreni agujt Larz, niluxh rexpeljpacni bejn xhigab caniini xcuent yälrejs xten bacaltis.

<sup>14</sup> Ni'cni guniliipac Jesús räjpmi lojreni:

—Agujt Larz.

<sup>15</sup> Rbalazä sa'csi rutinu ro'c, te chalilajztu xtiidxä. Colcho' te chohuiinuni.

<sup>16</sup> Dxejcti Tomás ni rniizareni “cua'ch”, räjpmi loj resa'ni:

—Colcho' te guetnāzanuni.

### *Jesús najc yälrbansac lo yälgujt*

<sup>17</sup> Che bidzujn Jesús lo guejdxga, agujc tajp dxej biga'tz Larz.

<sup>18</sup> Guedx Betania tre' gajxh lo guedx Jerusalén, si'cti tio'p garol kilómetro.

<sup>19</sup> Xhidajl rexpelj Israel abidzujn, siädhuiireni Mart, näjza Marii, te di gachuin lajzreni sa'csi gujt bisiajnreni.

<sup>20</sup> Che guchee Mart abidzujn Jesús, biriini huichaglojnini; niluxh Marii bia'n rolizreni.

<sup>21</sup> Dxejcti räjpmi Mart lo Jesús:

—Dad, paru suga'lu ree, di bisianä niejt.

<sup>22</sup> Narä nanä suniidx Dios guiraa nani guiniablu lojni.

<sup>23</sup> Jesús räjpmi lojni:

—Sibansac bisiajnlu.

24 Rāj̄p Mart lojni:

—Acananā sibansacni che guidzuj̄n dxej ni guibansac bejn loj rebengut dxej lult che gun Dios yālguxhtis.

25 Dxejc rāj̄p Jesús lojni:

—Narā nacā yāl̄ruspansac bejn loj rebengut, nājza yāl̄nabajn par tejpas. Nani rililajz rextidxā, masā agujtni, sibansacni.

26 Chutis tej bejn ni nabajn ni chalilajz xtidxā, dini nitloj par tejpas, ¿riliiga lajzluni, ä?

27 Dxejcti rāj̄p Mart lojni:

—Rililazāni, Dad. Ahuililazā luj najclu Crist, Xi'n Dios nani bia'n diidx guxhaḷ Dios lo guedxliujre.

### *Biin Jesús cuā' xpaal Larz*

28 Che guluux gunii Mart, huitejdxni bājlni Marii, xhiga'tz rāj̄pni lojni:

—Abidzuj̄n Mastr. Cabejdxzani luj.

29 Che biejn diajg Marii rediidxga, huisugajcni, sahuuini Jesús.

30 Gajd Jesús jiu' guejdxga, laḷtis suga'ni cadro bidxaagni Mart.

31 Rexpejn̄ Israel nani biādcuenāj̄ Marii, ni cahuii didi gac-huin lajzni, che bahuiireni huisu Marii, sääni, nājza laareni huirinajlreni Marii, naareni pet lo baa sayoonni.

32 Ni'cni che bidzuj̄n Marii cadro suga' Jesús, bazuxhijbni lojni, rāj̄pni:

—Dad, paru suga'lu ree, di bisianā niejt.

33 Che bahuii Jesús cayoon Marii, nājza rexpejn̄ Israel ni siādnajl̄ Marii, gac-huin lastooni, biāād te rsliajz lastooni.

34 Dxejcti rāj̄pni lojreni:

—¿Caro bacua'tztuni?

Rāj̄preni lojni:

—Dad, gudaa ree te filu.

35 Dxejcti biin Jesús.

36 Ni'cni cayāj̄p rexpejn̄ Israel:

—Colhuii, lacti sanāljznini.

37 Yu'zareni rāj̄p:

—Dade're basiaj̄c beḷ lotiä'p. ¿Xha di niajcdi nusiaj̄cni bejn̄re te di niejtni, ä?

### *Gubansac Larz*

38 Guc-huinduxh lastoo Jesús, gubigni lo baa. Baaga najc si'c te biliäā, suga' te guiro ni rusäuureni ro'ni.

39 Dxejcti rāj̄p Jesús lojreni:

—Colgudzucāj̄ guijga.

Mart, ni najc bisiaj̄n bengutga, rāj̄pni lojni:

—Dad, pet acaladxuudxni, sa'csi agujc tajp dxej gujtni.

40 Dxejc rāj̄p Jesús lojni:

—¿Et rniä lojlu, palga rililajztu, suhuiilu xcäl̄rnibee Dios, ä?

41 Dxejcti badzucāj̄reni guijga. Gulās Jesús lojni xhaguibaa, rāj̄pni loj Xtdadni:

—Xtdadā, runidxā xquixtios lojlu sa'csi abiejn diajglu xtidxā.

42 Narā nanā guliica rucua diajglu xtidxā, luxh naj caniāni xcuent rebejn̄ ni tre' ree, te chalilajzreni luj baxhaḷlu narā.

43 Che guluj̄x guniini rediidxga, guredxa'ni rāj̄pni:

—¡Larz! ¡Gudaa ree!

<sup>44</sup> Dxejc birii bengutga neñ biliää. Naliib reñaani, reni'ni, niäuu te baii lojni. Dxejcti räjp Jesús lojreni:

—Colguslaani, colgusaan jiini.

*Bachaagreni diidx xho guiniaazreni Jesús  
(Mt. 26:1-5; Mr. 14:1-2; Lc. 22:1-2)*

<sup>45</sup> Xcuent dzunrore huillilajz rextidx Jesús xhidajl rexpejn Israel nani huinajl Marii, che bahuiireni xhi bejn Jesús.

<sup>46</sup> Yu' reni huihuii loj rexpejn Israel ni laa farisee, bijreni diidx xhi bejn Jesús.

<sup>47</sup> Dxejcti refariseega, näjza rebixhojz ni rnibee, bire'reni bidxagsa'reni lo Junt Suprem, räjpzaren:

—¿Xho jiennu? Niguiire cayujn xhidajl milagwr.

<sup>48</sup> Palga guisaannuni si'c, guiralii bejn sililajz xtiidxni, sinajlrenini. Dxejcti jiääd reben roman ni rnibee, gudzucajreni xcälrnibeenu, sudzujlaren lajdxnu.

<sup>49</sup> Dxejc Caifás, bixhojzro ni riäjł gunibeeni lo rebixhojz ijzga, räjpni lojreni:

—La'tu xhetliidi najnditu.

<sup>50</sup> Ditu gun xhigab laaca guet tejtis bejn xcuent guideb guejdx, didi nitloj guideb lajdxnu.

<sup>51</sup> Niluxh Caifás dini ninii diidxre xcuentcani. Sa'csi ijzga rnibeenu lo rebixhojz, lagajc Dios badeed diidxga guniini. Ni'c gunixgaani guet Jesús xcuent nación xten rexpejn Israel.

<sup>52</sup> Luxh xhet ganaxtis xcuent nacionga, näjza te guire' guiraa rexpejn Dios nani nare'ch loj guideb guedxliujre.

<sup>53</sup> Ni'cni dxejlga bachaag rebejnğa diidx te don xho gunreni gugu'treni Jesús.

<sup>54</sup> Ni'cni diru Jesús nisij nez loj rexpejn Israel. Biriini región Judea, huijni te lajt gajxh nez lo reyubijdz, lo te guejdx ni laa Efraim. Ro'c biannäjni rexpejn pacni.

<sup>55</sup> Guxii dxejc cayäädx guidzujn lanij ni laa pascw ni rujn rexpejn Israel. Xhidalduxh rebenguejdx huij guedx Jerusalén te gusiareni lastooreni, te gac gunreni lanij xten pascw.

<sup>56</sup> Cansajreni caguuilreni Jesús; che yu'zaren neñ guidoro, canabdiidx lo sa'reni, räjpreni:

—¿Xhi najtu? ¿La siäädni lanijre o laa dini jiääd, ä?

<sup>57</sup> Refarisee näjza rebixhojz ni rnibee loj rebixhojz, agunibeereni palga yu' chu najn caro yu' Jesús, chaye'tzni lojreni te guiniaazrenini.

## 12

*Gudääb te gunaa se't ni' Jesús  
(Mt. 26:6-13; Mr. 14:3-9)*

<sup>1</sup> Che riäädx xho'p dxej gal lanij pascw, huij Jesús guedx Betania cadre rbäjz Larz nani baspañsac Jesús loj rebengut.

<sup>2</sup> Ro'c bejnreni te xchej te gau Jesús. Mart bateed xchejga, näjza Larz sobganäj Jesús näjza rexpejn pacni lo mex.

<sup>3</sup> Dxejcti bidzunnäj Marii si'cti garol litr se't ni rlianexhduxh si'c nard. Sacduxh se'tga. Dxejcti gudääbni se'tga lo reni' Jesús, baspijdzni ni'ni con xquidxejcn. Guideb neñ yu'ga gulanejxh se'tga.



4 Dxejcti räj̄p Judas Iscariot, xi'n Simón, ni najc te rexpejn̄pac Jesús, lagajc ni abejn xhigab guto'ni Jesús, räj̄pni:

5 —¿Xhicuent di se'tre nido' choñ gayuu denar te nidis meelga loj reben̄proob? (Choñ gayuuga najc si'cti ni xca'te ni guuii paru gunni dzuun tzubiteb b̄aii.)

6 Gunini si'c, xhet sa'csi riadini reproob, per sa'csi laani najcni te gubaan, luxh laani ca'ni bols cadro ruchee meel, luxh rb̄ääni meel lojga te rca'nini.

7 Ni'cni räj̄p Jesús lojni:

—Na'c gudxoynluni; subasälxgaanini, che gajd guidzuj̄n dxej nani guiga'tzä.

8 Dxej-yääl yu' reben̄proob lojtu, luxh narä dina chuä lojtu xchej.

### *Laareni r̄lajzreni nugu'tzareni Larz*

9 Dxejc che guchee xhidajl xpejn̄ Israel yu' Jesús rolijz Larz ni gubañsac lo reben̄gut, bidzuj̄nreni, xhet xcuentis Jesús. Biädreni te fiizareni loj Larz nani baspañsacni lo reben̄gut.

10 Dxejcti rebixhojz ni nr̄ibee bachaagzareni diidx te ju'tzareni Larz,

11 sa'csi xhidajl rexpejn̄ Israel salilajzreni xtidx Jesús sa'csi bahuiireni gubañsac Larz.

### *Biu' Jesús guedx Jerusalén*

(Mt. 21:1-11; Mr. 11:1-11; Lc. 19:28-40)

12 Che bara yääl, rebejn̄ xhidajl ni bidzuj̄n lanij biejn diajgreni asiäddzuj̄n Jesús guedx Jerusalén,

13 dxejcti batiu'reni naa reyagzijn, biriireni neñ guejdx, sachaglojrenini. Guredxa'reni, räj̄preni lo Jesús:

—¡Colguiliä'p xpala'n Dios! ¡Chicbaa nani siädä xcuent Dad nani najc reii lo rexpejn̄ Israel!

14 Bidxäl Jesús te burbäz, gubijbnini, si'cni caj lo reguijtz:

15 Na'c guidxejbtu, bejn̄ ni rb̄äjz neñ guedx Siön.

¡Colhuii! Reii xtentu asiädä, bijbni dejtz te burbäz.

16 Di rexpejn̄pacni niachee recosga che gujcreni, niluxh che gubañsacni loj reben̄gut, dxejc banaj lajzreni recos nani caj lo guijtz xcuentni, näjza guiraa recos ni bejn rebejn̄ lo Jesús te guzojb rediidxga.

17 Reben̄ xhidajl ni suganäjni che gurejdxni Larz te biriini neñ baa che baspañsacnini lo reben̄gut, bijzareni diidx xcuent guiraa ni bahuiireni.

18 Ni'cni biädchagloj reben̄ xhidajlgani, sa'csi abiejn diajgreni laani bejn̄ni milagwrre.

19 Ni'cni räj̄p refarisee lo sa'reni:

—Aruhuiitu xhet sajcdi jieñnu. ¡Colhuii! Empac sanajl guideb guedxliujni.

### *Riädtil regriegw Jesús*

20 Yu' gaii bengriegw nadxaag lo rebejn̄ ni biädted lanij guedx Jerusalén.

21 Rebejn̄re bidzuj̄n loj Felipe nani siädä guedx Betsaida xten Galilee, gusloj gunabreni lojni, räj̄preni:

—Dad, rlaaznu guihuiinu lo Jesús.

22 Biädä Felipe, räj̄pni loj Andrés, dxejcti guiro'preni huiye'tzreni lo Jesús.

23 Dxejcti räj̄p Jesús lojreni:

—Abidzuj̄n or ni ch̄ä'p xpala'n Xi'n Dios ni gujc Niguui.

24 Rniliäpac lojtu, palga di te xob binij jiajb lo yuj, neñ xhurc cadro cueni, te rianxtebni, guetni, dini guiliejn. Luxh palga guetni, siliejn̄ni, rajcza te nisro lojni, rajc xhidajl xob binij.

25 Nani sanälajz xcäl'nabajñni, sunijtnini, luxh nani rbälaz xcäl'nabajñni lo guedxliujre, sica'ni yäl'nabajñ par tejpas.

26 Palga yu' chu tej ni rlajz chu loä, sujiädnajlni xnezyuä, te cadro yu'ä, ro'cza cuääz ni ru' loä. Palga yu' chu gun xtzunä, siliä'pza Xtadä xpala'nni.

### *Rnixgaa Jesús guetni*

27 Räjpzani:

—Naj cayac-huin lastoä. ¿Xhichani'cza gäpä lo Xtadä? ¿La siniä: Dad, gucnäj narä te di tedä or ni siääd? Ni te tedäpac orga biälä lo guedxliujre.

28 Xtadä, bejn si'cni riäjł gac te guiliä'p bejn xpala'nlu.

Dxejcti xhaguibaali biejn te xse' te ni räjp:

—Agulä'pä xpala'nä, siliä'pä xpala'nä stehuält.

29 Ni'cni lo rebejn ni tre' ro'c, ni biejn diajgreni se'ga, yu' reni räjp:

—Lascanu gunii te guzii.

Guyu'zareni räjp:

—Te xangł Dios ni gunii lojni.

30 Dxejc räjp Jesús lojreni:

—Et xcuentädi gunii xse' ni gunii, xcuenttis la'tu guniini.

31 Naj abiääd xcälğuxhtis Dios lo guedxliuj. Naj sibicaj xcälrnibee nani rnibee lo guedxliujre.

32 Naj, che guiliäsreni narä jiaa lo guedxliuj, te galä ro'c, sutie'ä guiraa bejn loä.

33 Rediidxre gunii Jesús te canixgaani xho guetni.

34 Räj p rebejn lojni:

—Nuure biejn diajgnu bilreni lo leii, Crist ni jiaäd sibajñ par tejpas. ¿Xho mood rniilu, nanab chäs Xi'n Dios ni gujc Niguii jiaa lo guedxliuj? ¿Chuxhni'c najc Xi'n Dios ni gujc Niguii ni ruzä'tlu?

35 Dxejcti räjp Jesús lojreni:

—Stera'tsi yu' bianij lojtu. Col'saj lał ni rajptu bianijga, te di guiniaaz yälxcäjy la'tu, sa'csi ni rsiaj loj nacäjy, dini gan caro chääni.

36 Lał ni rajptu bianij, colchalilajz bianijga te gactu rexi'n bianij.

Gunii Jesús rediidxga lojreni, dxejcti biunejzni ro'c, bicuatızlojni.

### *Xhicuent di rexepejn Israel nililajz xtidx Jesús*

37 Xhidajł remilagwr bejn Jesús nez loj rexepejn Israel, niluxh direni nililajz xtidxni, gulälazreni nani baxhał Dios lojreni.

38 Ni'cni guzojb diidx nani gunii Isaiäs, ni gunii xtidx Dios galoro, räjpni:

Dad, ¿chuni'c huililajz xtiidxlu?

¿Chuloj baluiilu xcälrnibeduxhlu, ä?

39 Ni'cni di niajcdi nililajzreni, sa'csi guniiza Isaiäs, räjpni:

40 Abascäjy ni lojreni,

abennajdni lastooreni,

te di rebalojreni fii,

te di lastooreni gacbee,

te di gusiejch lajzreni,

te di gusiäcäreni.

41 Rediidxre gunii Isaiäs, sa'csi bahuiini xcälrdimbicha' Jesús xhaguibaa, dxejc guniini xcuentni.

42 Dxejcti gaii rebejn ni rnibee huililajz xtiidxni che räjpni abaxhał Diosni, niluxh bidxejbreni rebejn farisee, ni'c direni nicäj p ahuililajzreni, te di gurilaagwreni laareni, gudxojnreni jiu'reni nen guidoo.

<sup>43</sup> Sa'csi rdxaglajzrurenì guiliä'p rebejn xpala'nrenì luxh guxiiru rljazrenì guiliä'p Dios xpala'nrenì.

*Xtidx Jesús sigubee rebejn*

<sup>44</sup> Dxejcti gudidxa' Jesús:

—Nani chalilajz xtidxä, et ganaxdi ni caniä rililajzni, näjza xtidx Xtäädä nani baxhaḷ narä rililajzni.

<sup>45</sup> Nani ruhuii loä, ruhuiizani loj ni baxhaḷ narä.

<sup>46</sup> Narä biälä si'c bajl lo guedxliujre, te guiraa renani chalilajz xtidxä, dirurenì chu lo yäl'cäjy.

<sup>47</sup> Nani riendiajg xtidxä, luxh dinì gusoob rediidxga, dina gunä yäl'guxhtis lojni, sa'csi dina niälä te gunä yäl'guxhtis rebenguedxliuj, biälä te guslää reben'guedxliuj lo dojl.

<sup>48</sup> Nani rbälaz narä, ni di gusoob xtidxä, yu' chu gun yäl'guxhtis xtojlni; lagajc rediidx nani guniä gun yäl'guxhtis xtojlni che gal lult dxej.

<sup>49</sup> Sa'csi narä dina niädniä lagajc xcuentä, lagajc Dad ni baxhaḷ narä, lagajc laani gunibeenì xhini'c guiniä, xhini'c guluiä.

<sup>50</sup> Luxh nancheä gunibeenì chu yäl'nabajn par tejpas. Ni'cni rediidx nani rniä, rniärenì si'cpacni gunii Xtäädäni loä.

## 13

*Jesús gudiibni ni' rexpejn'pacni*

<sup>1</sup> Che gajd gal dxe lanij ni laa pascw, najn Jesús asiäddzungenajx xor'ni, or ni jiunejzni lo guedxliujre te chääni lo Xtäädni. Luxh sa'csi agajc sanälajzni rexpejn'pacni nani yu' lo guedxliujre, sinälajznanirenì par tejpas.

<sup>2</sup> Ni'cni lal ni cayauxchejrenì biu' bendxab nen lastoo Judas Iscariote, xi'n Simón, te guto'ni Jesús.

<sup>3</sup> Sa'csi agucbee Jesús abateed Xtäädni guira'ti ladzñaani, gucbeezani loj Dios birini, lo Dios guibi'zani,

<sup>4</sup> ni'c huisu Jesús lo xchejga, gulääni xhablojiaani, gudojbni te tuäii, batejb-nini xque'ni.

<sup>5</sup> Dxejcti cua'ni nis nen te chaa, guslojni gudiibni ni' rexpejn'pacni, baspijdzni ni'reni con tuäiiga.

<sup>6</sup> Che bidzujjni loj Simón Pedr, räjp Pedr lojni:

—Dad, ¿xhixh luj siguiiblu ni'ä?

<sup>7</sup> Dxejc räjp Jesús lojni:

—Nani cayunä dilu gacbeeni naj, guixee-huijdx sacbeeluni.

<sup>8</sup> Räjp Pedr lojni:

—jDipaclu quuib ni'ä!

Räjp Jesús lojni:

—Palga dina quibä ni'lu, digacdiru gaclu xpenä.

<sup>9</sup> Räjp Pedr lojni:

—Dad, na'c quuiblu ni'ätis näjza naä näjza yecä gudiib.

<sup>10</sup> Räjp Jesús lojni:

—Nani agojz di guiquin gazsacni; ni'tisni guidiib, sa'csi naya guidebni; nayazatu, per xhet guiraaditu naya.

<sup>11</sup> Sa'csi anajnni chu guto'ni, ni'cni guniini: “Xhet guiraaditu naya.”

<sup>12</sup> Ni'cni che gulujx gudiibni ni' rexpejn'ni, gotsacni xhajbni, guresacni lo mex, räjpni:

—¿La najntu xhini'c benä lojtu, ä?

13 La'tu rniitu narä, Mastr näjza Dad. Luxh laaca rniitu sa'csi nacäni.

14 Mbaj, palga narä ni nacä Dad, nacäza Mastr, gudibä ni'tu, la'tu sigajcza riäjl quibtu ni' resa'tu.

15 Sa'csi abaluiä lojtu xho gacni, te chanuu guntu sigajc ni benä lojtu.

16 Rniliä, rniliäpac lojtu, di te mos gac beñroru lo xlamni; diza te ni rij xmandaad bejn gac beñroru loj nani baxhalni.

17 Palga najntu recosre, chicbaazatu palga si'c guntu.

18 'Dina guiniä diidxre lo guiraatu. Numbeä reni aguleä, niluxh nanab soob xtidx Dios ni caj lo rexquijtzn. Scree najc rediidxga: "Nani rajw xcuxtilä, ni'c agubiréni, agulälazni narä."

19 Ni'cni agunixgaäni, che gajdni gac, te che gacni chalilajztu nacä chu rniä nacä.

20 Rniliä, rniliäpac lojtu, nani riu xtidx nani ruxhalä, riuazani xtidxä; luxh nani riu xtidxä, riuazani xtidx nani baxhal narä.

### *Räjp Jesús chuni'c guto'ni*

(Mt. 26:20-25; Mr. 14:17-21; Lc. 22:21-23)

21 Che gulujx gunii Jesús rediidxre, gac-huinduxh lastooni, dxejc guniliini: —Rniliä, rniliäpac lojtu, tejtü suto' narä.

22 Dxejc gusloj cadxeloj rexpejnni lo sa'reni, di jien chuchani'c cagusä'tni.

23 Tej rexpejnni nani sanälajzruni sobga' cuä'ni.

24 Dxejcti bejn Simón Pedr seen lojni te guiniabdiidxni loj Jesús chu xcuent caniiini.

25 Dxejc nani sobga' cuä'ni, gubigruni loj Jesús, gunabdiidxni lojni, räjpni:

—Dad, ¿chuni'c rusä'tlu?

26 Dxejcti räjp Jesús lojni:

—Guhuadxä te la' yätxtiil. Loj nani gudedäni, ni'c najcni.

Dxejcti bahuajdxni tla' yätxtiil, badeednini loj Judas Iscariote, xi'n Simón.

27 Che gulujx gudajw Judas yätxtiilga, biu' beñdxab lastooni. Dxejcti räjp Jesús lojni:

—Ni rlajzlu gunlu, bejngani.

28 Nicla tej reni sobga' lo mex direni niacbee xhicuent räjpni lojni si'c.

29 Sa'csi Judas ca' bols meel, gaiireni bejn xhigab pet guniini si'c sa'csi yu' xhi chasiini par lanij, o pet yu' xhi gudeedni loj reben ni xhet rajpdi.

30 Che gudajw Judas yätxtiilga, birigajcni, luxh abiu' guxhijn.

### *Didxcoob ni gunibee Jesús*

31 Dxejcti che abirii Judas lojreni, räjp Jesús lojreni:

—Naj sienloj xcälrnibee Xi'n Dios ni gujc Niguui, luxh lojni sienloj xcälrnibee Dios.

32 Palga suluiloj Xi'n Dios ni gujc Niguui xcälrnibee Dios, dxejc suluilojza Dios xcälrnibee Xi'n Dios ni gujc Niguui, luxh siojb gunnini.

33 Rexi'nä nani sanälazä, diru gac xchej chunää la'tu. La'tu siguiiltu narä, per si'cni räpä lo rexpejn Israel si'cza rniä lojtu naj: Di gacdi jäädü cadro cha'a.

34 Te didxcoob rnibeä guntu: Colchanälajz sa'tu. Sigajc ni sanälazä la'tu, sigajcza colchanälajz sa'tu.

35 Palga rinälajz sa'tu, si'c sacbee guiraa beñguedxliuj najcpactu rexpeñä.

### *Xhini'c gun Pedr loj Jesús*

(Mt. 26:31-35; Mr. 14:27-31; Lc. 22:31-34)

36 Dxejcti räjp Simón Pedr loj Jesús:

—Dad, ¿caro chäälu?

Räjp Jesús lojni:

—Cadro cha'ä digacdi jiädnaļlu narä nāj; niluxh sidzujņ dxej jiäädļu ro'c.

<sup>37</sup> Räjp Pedr lojni:

—Dad, ¿xhicuent digacdi jiälä nāj? Palga rquiin guetä xcuentlu, suguetä.

<sup>38</sup> Räjp Jesús lojni:

—¿La guliilu guetlu xcuentä, ä? Rniliäpac loļlu, nicla gajd guidgāi cuedxa' choņ huält, säjblu dilu gumbee najrä.

## 14

### *Jesús najc nezyuj lo Dad*

<sup>1</sup> Dxejcti räjp Jesucrist lojreni:

—Na'c chutu yärsia'. Rililajztu xtidx Dios, colchalilajzta xtidxä.

<sup>2</sup> Yu' xhidalduxh yu' cadro rbäjz Xtaä. Palga xhet si'cdi najcni, dizana niniä lojtu si'c. Sia'ä chasucheä reyu' par la'tu.

<sup>3</sup> Luxh palga chasucheä cadro cuääztu, che guluxäni, sibusacä, te chanäätu ro'c, te cadro yu'ä, ro'cza chutu.

<sup>4</sup> La'tu anajntu caro cha'ä, anajnzatu nezyuj ni chäätu.

<sup>5</sup> Dxejcti räjp Tomás loj Jesús:

—Dad, dinu guidon caro chäälü, ¿xho guidonnu nezyujga, ä?

<sup>6</sup> Räjp Jesús lojni:

—Narä nacä didxliipac, nacäza yäl nabajņ. Por narätis sajc chää beņ cadro rbäjz Xtaä.

<sup>7</sup> Palga la'tu niembeetu chuni'c nacä, niembeezatu Xtaä. Luxh najli abiembeepactuni sa'csi acahuiitu lojni.

<sup>8</sup> Räjp Felipe loj Jesús:

—Dad, basaan guihuiinu loj Xtaälu; ni'ctis rlaaznu.

<sup>9</sup> Dxejcti räjp Jesús lojni:

—Felipe, ¿la gajdļu gumbee narä, luxh lacti xchej yu'ä lojtu, ä? Nani ruhui loä, abahuiinu lo Xtaä. ¿Xhicuent rniablu fiilu lo Xtaä, ä?

<sup>10</sup> ¿La dilu chalilajz najrä yunää Xtaä, luxh Xtaä yunäjzani narä, ä? Rediidx nani rniä dina guiniäni lagajc xcuentä, sa'csi Xtaä ni yunäj narä laani rujn lagajc rextzuunni.

<sup>11</sup> Colchalilajz xtidxä, che rniä narä yunää Xtaä, luxh Xtaä yunäj narä. O palga ditu chalilajzni sa'csi najcni xtidxä, colchalilajzni sa'csi abahuiitu rextzuun ni runä.

<sup>12</sup> Rniliäpac lojtu, nani chalilajz xtidxä, sajc gunni redzuun nani runä, luxh sujnni dzunroru sa'csi sia'a cadro yu' Xtaä.

<sup>13</sup> Luxh guiraa ni guiniablu lo Xtaä xcuentä, narä sunäni, te guluiloä xcälrnibee Xtaä.

<sup>14</sup> Narä sunä xhitis ni guiniabtu por laä.

### *Ria'n diidx guxhaļ Jesús Sprit Dxan*

<sup>15</sup> Räjpszani:

—Palga sanälajztu narä, susoobtu xtidxä.

<sup>16</sup> Dxejc siniabä lo Xtaä, te guniidxni stee nani gacnäjtu te chunäjni la'tu par tejpas.

<sup>17</sup> Nalajznu, Xpriet Dxan xten Dios, ni rnili. Di gacdi xca' rebeņ guedxliujni, sa'csi direni fii lojni, niclaza gumbeerenini. Niluxh la'tu numbeetuni sa'csi yunäjni la'tu, yu'ni neņ lastootu.

<sup>18</sup> Dina gusanbisiäbä la'tu; sibusacä jiädhuiä la'tu.

<sup>19</sup> Diru gac xchej, dxejc diru reben guedxliuj fii loä, niluxh la'tu suhuiitu loä. Sa'csi nabañä, la'tu nabajñzatu.

<sup>20</sup> Neñ redxejga, dxejc sacheetu yunää Xtaä, la'tu yunäjtu narä, luxh narä yunääza la'tu.

<sup>21</sup> Nani numbee Xtaä, nani rusoobza xtidxä, ni'c ruluiini sanälajzpacni narä. Luxh Xtaä sinälajzza nani sanälajz narä, näjza narä chanälazä bejnğa, luxh suluiloä lagajc narä lojreni.

<sup>22</sup> Dxejcti räjp Judas (xhet Iscariótedi) lojni:

—Dad, çhini'c gunlu te guluilojlu lojtisnu, xhet näjdi loj reben guedxluijdi, ä?

<sup>23</sup> Dxejcti räjp Jesús lojni:

—Nani sanälajz narä, ni'c riu xtidxä. Ni'c chanälajz Xtaä, dxejc jio-pläznäänuni guiro'pnu Xtaä.

<sup>24</sup> Nani di chanälajz narä, dini jiu xtidxä. Luxh rediidx nani biejn diajgtu, et xtidxadini; xtidx Xtaäni ni baxhal narä.

<sup>25</sup> 'Caniä guiraa rediidxre lojtu lañi yu'ä lojtu,

<sup>26</sup> per Sprit Dxan xten Dios nani jädyacnäjtu, nani guxhal Xtaä xcuentä, laani suluini lojtu guira'ti, näjza susnajni lajztu guiraa rediidx nani aguniä lojtu.

<sup>27</sup> Yälrbecdxilajz rusa'nä lojtu, xcälrbecdxilazä runidxä lojtu, et si'cdini runidx guedxluijdi najc nani runidxä lojtu. Na'c chutu yärsia', na'cza guidxejbtu.

<sup>28</sup> Abiejn diajgtu ni guniä lojtu: Sia'ä luxh siälsacä lojtu. Paru ninälajzfactu narä, sibalajztu xcuentä che guniä sia'ä lo Xtaä, sa'csi Xtaä najc benroru loä.

<sup>29</sup> Scree agunixgaäni lojtu, te che soobni, dxejcru chalilajztu xtidxä.

<sup>30</sup> 'Diruna guiniduxhä lojtu, sa'csi asiääd nani rnibee loj guedxliujre, luxh digacdi guinibeeni narä;

<sup>31</sup> riäj] gac recosre te gachee reben guedxliuj sanälazä Xtaä, rusobäza xtidx Xtaä, runä nani guinibeeni. Colchastie, colcho' jjunejznu ree.

## 15

### *Jesús najc si'c te yaguub*

<sup>1</sup> Răpzani:

—Narä nacä si'c te yaguub. Xtaä najc si'c nani rusuj yajgga.

<sup>2</sup> Rebejn najc si'c reña yajgga. Guiraa reña yajgga nani xhet cajdi lojni rutiugnini. Luxh guiraa reña yajgga ni caj ninejxh lojni, rusianini te xcajru ninejxh lojreni.

<sup>3</sup> La'tu anajctu benñaya xcuent rediidx nani aguniä lojtu.

<sup>4</sup> Colguibannäj narä, sigajc ni nabañnä la'tu. Digacdi xcaj ninejxh lo te ñaa yajg palga agurujgni lo yaguub. Sigajcza la'tu, palga guibicajtu loä, di gacdi guntu xtzunä.

<sup>5</sup> 'Narä nacä si'c yaguub. La'tu najctu si'c reña yajgga. Nani riannäj narä, naräza riannäni, ni'c sajç runduxhni xtzunä, sa'csi che guibicajni loä, xhet sajcdi gunni.

<sup>6</sup> Nani di chupac loä, sibicajni si'c reña yajg nani rdin sa'csi xhetru rcajdi lojni, dxejcti rbijdzni, rusäl bejnreni lo däj te checni.

<sup>7</sup> 'Palga chupactu loä, palgaza chupac xtidxä lastootu, colñab nani rla-jztistu, luxh narä sunidxäpacni.

<sup>8</sup> Che gunpactu xtzun Dios, dxejc fii bejn najcpactu xpenä, siliä'p bejn xpala'n Xtaä, Dios.

<sup>9</sup> Si'cpacni sanälajz Xtadä narä, sigajcza sanälazä la'tu. Cołchanuu lo xcälrinälazä.

<sup>10</sup> Palga jituu rextidxä, sinuutu lo xcälrinälazä, sigajc ni abasobä xtidx Xtadä, luxh rinuä lo xcälrinälajz Xtadä.

<sup>11</sup> Rniä rediidxre lojtu te guibalaznäjtu narä, te si'c guibalazduxhpactu.

<sup>12</sup> Dee najc diidx ni rnibeä guntu: cołchanälajz sa'tu si'cni sanälazätu.

<sup>13</sup> Xheti te yälsanälajz ni guroobru lo yälsanälajzre, gudeed te bejn xcäl nabajni, guetni lacuaa resa'ni.

<sup>14</sup> La'tu najctu resa'ä palga gusoobtu diidx nani guinibeä guntu.

<sup>15</sup> Diruna cuälää “mos” la'tu, sa'csi di remos gan xhi rujn xlamreni. Luxh narä agulälää la'tu “rexamigwä”, sa'csi guira'ti rediidx ni biejn diagä lo Xtadä aguniäza rediidxga lojtu.

<sup>16</sup> Et la'ditu gule narä, narä guleä la'tu. Guleä la'tu te guntu xtzun Xtadä, te na'cza nitloj dzuunga. Te guira'tiza nani guiniabtu lo Xtadä por laä, ni'cza guiniidxni lojtu.

<sup>17</sup> Dee rnibeä guntu: cołchanälajz sa'tu.

### *Rbälaz rebejn guedxliuj Jesús näjza rexejñni*

<sup>18</sup> Palga cuälaz reben guedxliuj la'tu, anajntu agulälazxgaareni narä.

<sup>19</sup> Paru najctu bejn guedxliujre, sinälajzreni la'tu. Per ditu gac bejn guedxliuj, sa'csi narä guleä la'tu te jiutu xtidx Xtadä, ni'cni rbälaz reben guedxliuj la'tu.

<sup>20</sup> Cołsnaj lajztu diidx nani guniä lojtu, 'di te mos gac bejnroru lo xlamni'. Palga basacsireni narä, susacsízareni la'tu. Palga rusoobreni xtidxä, suoobzareni xtiidxtu.

<sup>21</sup> Guiraa recosre sunnäjreni la'tu xcentä sa'csi direni gumbee nani baxhal narä.

<sup>22</sup> Paru dina niädniä lojreni direni niujn dojl xten xcälrdxechlajzreni loä, per naj di gacdi guiniireni direni gacbee yu' xtojreni.

<sup>23</sup> Nani rbälaz narä, rbälazzani Xtadä.

<sup>24</sup> Palga dina niunä nez lojreni remilagwrru, sa' nani rutru rajcdi rujn, direni niajp dojlga, sa'csi abahuiireni redzuunga, ni'c agulälazreni narä, näjza Xtadä.

<sup>25</sup> Bejnreni si'c te guzobj diidx nani cuaj lo guijt agujc xchero: “Gulälazreni narä, luxh xhetlidi benä.”

<sup>26</sup> Che jiäd nani gacnäj la'tu, laani sinii xcuentä, chu nacä. Laani najc Sprit ni yu' lo Xtadä, siniini didxlii. Narä suxhaläni lojtu; lo Xtadä guiriini jiädni lojtu.

<sup>27</sup> Näjza la'tu siniitu diidx xcuentä, chu nacä, sa'csi guyu'tu loä cheni gusloäli cagusule'ä diidxga.

## 16

<sup>1</sup> Rediidxre nrixgä lojtu, te didi yu' xhi gun jiajbtu te gunijttu lo xtidxä.

<sup>2</sup> Sidzujn dxej sibääreni la'tu dirureni gusaan jiu'tu nejn guidoro. Sidzujn or chutis ju't tejtü, suchaloni cayacnäjni Dios.

<sup>3</sup> Guiraa recosre sujnreni sa'csi direni gumbeepac Xtadä, niclaza narä.

<sup>4</sup> Agunixgä rediidxre lojtu, te che guidzujn orga sinaj lajztu xcuent rediidx ni guniä lojtu.

### *Redzuun ni rujn Sprit Dxan xten Dios*

'Dina niniä rediidxre lojtu che gusloä cagusule'ä diidx, sa'csi suganää la'tu.

<sup>5</sup> Naj agojl guibi'ä loj nani baxhal narä, luxh nicla tejtü di guiniabdiidx: “¿Caro chäälü?”

<sup>6</sup> Dxejc sa'csi aguniä recosre lojtu, ni'c cayac-huin lastootu.

<sup>7</sup> Luxh rniliäpac lojtu, hueenru par la'tu cha'ä. Palga dina cha'ä, di gacdi jääd lojtu nani racnäj. Niluxh palga cha'ä, suxhaläni lojtu.

<sup>8</sup> Luxh laani, che jäädni lo guedxliujre, susanijni xcäriejn rebejn te gacbeereni xcuent dojl, näjza xcuent xcäl'nabannaya Dios, näjza xcuent yäl'guxhtis xten Dios.

<sup>9</sup> Guluiizani xcuent dojl lojreni sa'csi direni chalilajz xtidxä.

<sup>10</sup> Guluiini xcäl'nabannaya Dios lojreni sa'csi sibusacä lo Xtradä, luxh dirutu fii loä.

<sup>11</sup> Guluiini xcuent yäl'guxhtis xten Dios lojreni sa'csi abejn Dios yäl'guxhtis loj bendxab nani rnibee lo guedxliujre.

<sup>12</sup> Yu' xhidajlru diidx rläzä guiniä lojtu, niluxh digacdi gacbeeturenä naj.

<sup>13</sup> Che jääd Sprit xten didxlii xten Dios, laani susanijni xcäriejntu te gacbeetu guiraa redidxgulii, sa'csi dini guinii diidx xcuentcani, siniitisini ganax rediidx nani gudeed Dios lojni te guiniini. Siniizani xcuent recos nani churu gac.

<sup>14</sup> Laani siliä'pni xpala'nä sa'csi sica'ni xhixtenä, suluiinini lojtu.

<sup>15</sup> Guiraa ni räjp Xtradä najc xtenä, ni'cni rniä suluiini xhixtenä lojtu.

### *Xcäl'rac-huin lajztu sibixloj ni yäl'rbalajz*

<sup>16</sup> 'Sbale'si dxej, dxejc dirutu fii loä; dxejctiru sgaii dxej suhuisactu loä sa'csi narä sia'a lo Xtradä.

<sup>17</sup> Dxejcti räjp rexpejn'pacni lo sa'reni:

—¿Xhini'c caniini loonu? Sbale'si dxej, dxejc dirutu fii loä, dxejctiru sgaii dxej suhuisactu loä, näjza: sa'csi sia'a lo Xtradä.

<sup>18</sup> Ni'cni cayäjpreni lo sa'reni: ¿Xhi dee rniini, "sbale'si dxej"? Dinu gacbee xhini'c caniini.

<sup>19</sup> Gucbee Jesús xhini'c rläjzreni guiniabdiidxreni lojni, dxejcti räjpni lojreni:

—Canabdiidx lo sa'tu xhi säloj nani guniä che guniä, sbale'si dxej, dxejc dirutu fii loä; dxejcu sbale'si dxej, suhuisactu loä.

<sup>20</sup> Rniliäpac lojtu, la'tu soontu, niluxh reben guedxliujre sibalazduxhrene. Sac-huinduxh lastootu niluxh yäl'rac-huinre sibixhlojni yäl'rbalajz.

<sup>21</sup> Te gunaa che gaal xi'nni, rdejdnä trabajw, dxejcti che aguyu' xi'nni, riäl lajzni gudejdnä trabajw, dxejc arbaa lajzni gojl xi'nni te nigui lo guedxliujre.

<sup>22</sup> Ni'cni, sigajcza rac-huin lastootu naj, dxejcti che jäadhuisacätu, dxejc sii sibalajztu nen lastootu, luxh rut gacdi gudzucajdi yäl'rbalajzga.

<sup>23</sup> Nen redxejga xhetiru xhi yäl'guiniabdiidxdi guntu loä. Rniliäpac lojtu, nani guiniabtu lo xtradä xcuentä, laani suniidxnini lojtu.

<sup>24</sup> Naj xhet canabditu xcuentä. Cojnabni, te xca'tuni, te guibalajztu.

### *Jesús, nani abejn gaan lo guedxliujre*

<sup>25</sup> 'Aguniä guiralaj lojtu con cuent ni ruluii, niluxh sidzujn dxej che diruna guiniä cuent ni ruluii lojtu. Siniä didxguyasi lojtu xcuent Xtradä.

<sup>26</sup> Nen redxejga guiniabtu por laä. Luxh dizana guiniä siniabä narä lo Xtradä par la'tu,

<sup>27</sup> sa'csi lagajcza Xtradä sanälajzni la'tu, sa'csi la'tu sanälajztu narä, luxh ahuililajzatu loj Dios biriä biälä lo guedxliuj.

<sup>28</sup> Biriä lo Xtradä xhaguibaa, biälä lo guedxliujre, siunezäza lo guedxliujre, sibusacä lo Xtradä xhaguibaa.

<sup>29</sup> Räjp rexpejn'pacni lojni:



—Naj sii caniilu guyasi, dini gac si'c redidx-xhiga'tz xten cuent ni ruluii.

<sup>30</sup> Naj sii gucbeenu racbeelu guira'ti rexhicos, xhetru nanabdi guiniabdi-idxrunu lojlu; ni'cni ahuililajznu biriilu lo Dios ni yu' xhaguibaa.

<sup>31</sup> Räjƿ Jesús lojreni:

—¿La rililajzpacku naj, ä?

<sup>32</sup> Asiäddzungajxh teb or luxh ala bidzujƿ orƿa, che guire'chtu, cade tejtƿ xnez-xnejztu, te gusanxtebtu narä, luxh dina jianxtebä sa'csi Xtadä suganäj narä.

<sup>33</sup> Aguniä rediidxre lojtu te cuedxi lastootu lo guedxliujre xcuentä. Lo guedxliujre sidejdpactu trabajw, colgusutijƿ lastootu sa'csi narä abenä gaan loj guedxliujre.

## 17

### *Gunab Jesús lo Dios xcuent rexpejnƿacni*

<sup>1</sup> Che gulujx guniini loj rexpejnƿacni rediidxga, guläsni lojni xhaguibaa, räjƿni lo Dios:

—Xtadä, abidzujƿ or; gulä'p xpala'n xi'nlu te guiliä'pza xi'nlu xpala'nlu,

<sup>2</sup> sigajc ni badeedlu lojni yälrmibee loj guiraa reben guedxliuj, te gac gudeedni yäl nabajƿ par tejpas lo guiraa renani badeedlu lojni.

<sup>3</sup> Redee rajƿ yäl nabajƿ par tejpas; numbeereni luj ni najc tejtis GuebDios, näjza narä Jesucrist nani baxhal lu lo guedxliujre.

<sup>4</sup> 'Narä gulä'pä xpala'nlu lo guedxliujre, abaluxä dzuun nani baniidxlu gunä ree.

<sup>5</sup> Naj Xtadä, gulä'p xpala'nä con luj, con bala'n, con yälrdimbicha' ni gopä galooli che gajdli guirixtiej guedxliuj.

<sup>6</sup> 'Loj rebejn nani baniidxlu loä, ni gulelu lo reben guedxliujre, loj reni'c abasule'ä, abaluiä chu najclu. Xtenpaclu najcreni, baniidxlureni loä, luxh rapdz'tzreni xtiidxlu.

<sup>7</sup> Naj agucbeereni guiraa rediidx ni guniä lojreni lojpaclu siädni.

<sup>8</sup> Sa'csi rediidx nani baniidxlu loä, aguniä rediidxga lojreni, luxh ahuililajzreni rediidxga, agucbeepacreni lojlu biriä, ahuililajzreni lujpac baxhal narä.

<sup>9</sup> 'Narä rniabä xcuentreni, dina guiniabä xcuent reben guedxliujre, ganaxtis xcuent renani abaniidxlu loä, sa'csi laareni najcreni xpejn lu.

<sup>10</sup> Guiralii ni najc xtenä, najczani xtenlu. Guira'tiza ni najc xtenlu najczani xtenä. Agulä'pzareni xpala'nä.

<sup>11</sup> 'Narä diruna jia'nä lo guedxliujre, laareni sia'nruren lo guedxliujre. Luxh narä siälä lojlu. Xtadä ni najc Dxanro, gucnäj renani baniidxlu loä con xtiidxlu, nani baniidxlu loä te gunreni tejsi xhigab sigajcni riennu nurnu tejsi xhigab.

<sup>12</sup> Che guyunääreni lo guedxliujre, gucnää con xtiidxlu guiraa renani baniidxlu loä, luxh nicla tejtreni di ninitloj, xtebtis nani gunijƿ te gusojb ni caj lo xtid Dios.

<sup>13</sup> 'Luxh naj sibusacä lojlu. Caniä rediidxre la l ni yu'ä lo guedxliujre, sa'csi rlazä guibaa lajzreni si'c ni rbaa lazä.

<sup>14</sup> Abasule'ä xtiidxlu lojreni, luxh rebejn guedxliuj rdxe'chreni lojreni sa'csi direni gac bejn guedxliujre sigajc ni dizana gacä bejn guedxliujre.

<sup>15</sup> Dina guiniabä cuääluren lo guedxliujre, rniabä gudzucajluren loj bendxab.

<sup>16</sup> Direni gac bejn guedxliuj, sigajc ni dizana gacä narä bejn guedxliuj.

<sup>17</sup> Basyareni con xtiidxlu, sa'csi xtiidxlu najc didxguliipac.

<sup>18</sup> Sigajc ni baxhallu narä lo guedxliujre, sigajcza ruxhaļäreni te chääreni guideb guedxliuj.

<sup>19</sup> Xcuentreni rudedä lagajc narä, te näj laareni gacnayareni con xtidxguli-  
ipaclu.

<sup>20</sup> Dina guiniabä xcuent laatisreni, rniabäza xcuent guiraa renani churu  
challajz xtidxä ni gusule'reni.

<sup>21</sup> Rlazä gun guiraareni tejsi xhigab, sigajc ni rujnlu, Xtadä, si'c runäza;  
te sigajc ni yu'äza con luj, sigajcza churenä con nuurnu, te gacbee reben  
guedxliuj luj baxhallu narä.

<sup>22</sup> Yälrnibee ni baniidxlu loä, lagajc yälrnibeega badedä lojreni te gunreni  
tejsi xhigab, si'cni riennu tejsi xhigab.

<sup>23</sup> Narä cayunnääreni dzuun, luj cayunnäjlu narä dzuun, te jiennu tejsi  
dzuun, te gacbee rebejn guedxliuj luj baxhallu narä, luxh sanälajzlurenä si'cni  
sanälajzzalu narä.

<sup>24</sup> Xtadä, guiraa renani baniidxlu loä, rlazäza churenä cadro chuä xh-  
aguibaa, te fiireni xcälrnibeä nani baniidxlu, sa'csi huinälajzlu narä galooli  
che gajdli guirixtiej guedxliujre.

<sup>25</sup> Xtadä ni rujn cosa'ctis, di rebejn guedxliuj gumbeelu, luxh narä num-  
beälu, luxh redee agucbeezareni luj baxhallu narä.

<sup>26</sup> Aräpä lojreni chu najclu; säpäzaru lojreni te chu yäl'sanälajz sa' ni rajplu  
par narä neñ lastooreni, te cuäzäza neñ lastooreni.

## 18

### *Xho gunaazreni Jesús*

(Mt. 26:47-56; Mr. 14:43-50; Lc. 22:47-53)

<sup>1</sup> Che gulujx gunii Jesús rediidxga, huinäni rexpejn pacni dejtz gueu Cedrón.  
Ro'c yu' xhiroob yuj cadro sojb guiraloj reyajg. Ro'c biu' Jesús näjza rex-  
pejn pacni.

<sup>2</sup> Anajn Judas, nani guto' Jesús, caro rij Jesús con rexpejn pacni sa'csi si'csi-  
si'c rdxaag sa'reni ro'c.

<sup>3</sup> Dxejcti Judas, che biääd lojni te cuaa soldad roman, näj rebixhojz ni  
rnibee, näjza refarisee, huinätinireni ro'c, ca'reni balguejd näjza lintern, näjza  
spaad näjza lans.

<sup>4</sup> Ni'cni Jesús, sa'csi ananxgaani xhini'c sacni, gubigni lojreni, räjpni lojreni:

—¿Chu rguuiltu?

<sup>5</sup> Räjpreni lojni:

—Jesús nani siääd guedx Nazare't.

Räjp Jesús lojreni:

—Laa naräni.

Näjza Judas ni bato'ni suganäjnireni.

<sup>6</sup> Che gunii Jesús lojreni: “Laa naräni”, biäxhanreni, biajbreni lo yuj.

<sup>7</sup> Dxejcti gunabdidxsac Jesús lojreni:

—¿Chu rguuiltu?

Dxejc räjpzarenä stehuält:

—Jesús nani siääd guedx Nazare't.

<sup>8</sup> Räjp Jesús lojreni:

—Aguniä lojtu, laa naräni. Palga narä rguuiltu, colgusaan jii redee.

<sup>9</sup> Guniini rediidxga te gusojb rediidx nani guniini che räjpni: “Loj guiraa ni  
baniidxlu, nicla tejni di ninijt.”

<sup>10</sup> Dxejcti Simón Pedr, sa'csi ca'ni te spaad, guläänini, batiuugni diag ladbee xten xmos bixhojzroga. Laj mosga najc Malco.

<sup>11</sup> Dxejcti räjp Jesús lo Pedr:

—Guluchee spaad xtenlu neñ xpaguinni. ¿La dina tedä trabajwduxh nani agunibee Xtadä tedä, ä?

*Jesús nez loj bixhojzro*

*(Mt. 26:57-58; Mr. 14:53-54; Lc. 22:54)*

<sup>12</sup> Dxejcti resoldaadga näjza comandant, näjza reguxhtis ni rnibee rexpejn Israel, gunaazreni Jesús baliibrenini.

<sup>13</sup> Dxejcti ganid huiinärenini lo Anás, sa'csi najcni xtadsueegr Caifás, luxh ijzga biäjł najc Caifás bixhojzro ni rnibee lo rebixhojz.

<sup>14</sup> Caifás najc nani balijdx rexpejn Israel nanab guet te niguii xcuent rebenguejdxga.

*Cadro gunii Pedr dini gumbée Jesús*

*(Mt. 26:69-70; Mr. 14:66-68; Lc. 22:55-57)*

<sup>15</sup> Simón Pedr näjza stee xpejn pacni huinajł dejtž Jesús. Luxh numbee bixhojzro bejnğa, biunäjzani Jesús lo xle' bixhojzro.

<sup>16</sup> Bia'nti Pedr rolä'ga. Dxejc birii xpejn pac Jesús nani numbee bixhojzroga, guniini lo nani cayajp rolä'ga, te biu' Pedr nez lo le'ga.

<sup>17</sup> Dxejcti räjp mos gunaa ni rcanäj rolä', räjpni lo Pedr:

—¿La et näjdi luj najclu te xpejn pac Jesús, ä?

Räjp Pedr loj gunaaga:

—¡Xho gacäni!

<sup>18</sup> Dxejcti sa'csi cayacnalduxh, caguse'creni boo te cagucha'lajzreni. Näjza Pedr suganäjreni, cagucha'lajzni ro guibooga.

*Bixhojzro cayujn yälğunabdiidx lo Jesús*

*(Mt. 26:59-66; Mr. 14:55-64; Lc. 22:66-71)*

<sup>19</sup> Dxejcti gusloj cayujn bixhojzro yälğunabdiidx loj Jesús xcuent chuni'c najc rexpejn pacni näjza xcuent xhini'c ruluini.

<sup>20</sup> Dxejcti räjp Jesús lojni:

—Narä xhet xhiga'tzdi guniä rextidxä, guniäni lo guiraa rebejn guedxliuj. Basule'ä diidx neñ rexquidobäztu näjza neñ guidoro cadro re' guiraa rexpejn Israel, nicla tej diidx dina ninixhiga'tzädi.

<sup>21</sup> ¿Xhicuent cayujnlu yälğunabdiidxga loä? Gunabdiidx loj renani biejn diajg xhini'c guniä lojreni. Laareni najnreni xhini'c guniä.

<sup>22</sup> Che gulujx gunii Jesús rediidxre, te rexpejn bixhojzroga huääz loj Jesús, räjpni lojni:

—¿La si'c rudzu' bejn diidx loj bixhojzro, ä?

<sup>23</sup> Dxejcti räjp Jesús lojni:

—Palga xhet laadi guniä, baluii narä xhi diidxga najc xhet laadi, niluxh palga laaca najc ni guniä, ¿xhicuent huääzlu loä?

<sup>24</sup> Dxejcti guideb naliibni baxhał Anásni lo bixhojzro lo ni laa Caifás.

*Gunisac Pedr dini gumbée Jesús*

*(Mt. 26:71-75; Mr. 14:69-72; Lc. 22:58-62)*

<sup>25</sup> Sugasijc Pedr ro' guiboo, cagucha'lajzni, che räjpreni lojni:

—¿La et näjdi luj najclu te xpejn pac niguiiga, ä?

Badzu'ni diidxga räjpni:

—¡Xho gacäni!

<sup>26</sup> Dxejcti te xmos bixhojzroga, sa'csi sa'ni najc mos ni batiu' Pedr diajgni, räjpmi lojni:

—¿La et lujdi ni bahuiä neñ huert con laani, ä?

<sup>27</sup> Dxejcti räjpm Pedr stehuält:

—Nicla gumbeäni.

Cuantis guniini si'c, guredxagajc te guidgaii.

*Jesús nez loj Pila't*

(Mt. 27:1-2, 11-14; Mr. 15:1-5; Lc. 23:1-5)

<sup>28</sup> Dxejc birinäjreni Jesús rolizj Caifás, huinärenini rolizj gubernadoor cadro laaza Pretorio, niluxh direni niu' ro'c sa'csi ameer guiliejn gubijdx, te di gacdxuudxreni dxejc di gacdi gaureni lani pascw.

<sup>29</sup> Ni'cni birii Pila't lojreni räjpmi lojreni:

—¿Xhi yälquij xten niguiire siädle'ctu loä?

<sup>30</sup> Dxejcti räjpmi lojni:

—Paru di niguiire niajc te beñ latsiaj, dinu niopnäni ladzñaa guejblu.

<sup>31</sup> Räjpm Pila't lojreni:

—Cołchanäni, cołhuui xho gunnäjtuni yälguixhtis con lagajc xleiiu.

Dxejc räjpm rexpejn Israel lojni:

—Di xleiiu gusaan ju'tnu te bejn.

<sup>32</sup> Gunireni si'c te guzojbe diidx nani gunii Jesús xcuent xho guetni.

<sup>33</sup> Ni'cni biusac Pila't neñ Pretorio, gurejdxni Jesús räjpmi lojni:

—¿La luj najclu reii xten rexpejn Israel, ä?

<sup>34</sup> Dxejcti räjpm Jesús lojni:

—¿La lagajc luj rniilu si'c, ä? O ¿laa yu' chureni'c naj lojlu si'c?

<sup>35</sup> Dxejcti räjpm Pila't lojni:

—¿Xhixh näj narä nacä te xpejn Israel? Lagajc rebeñ lajdxlu näjza rebixhojz bateedlu ladzñaa. ¿Xhi bejnlu?

<sup>36</sup> Dxejcti räjpm Jesús lojni:

—Xcälrnibeä dini gac yälrnibee sa' ni yu' guedxliujre. Paru najc xcälrnibeä te yälrnibee sa' ni yu' guedxliujre, ala cagucuaa rexpenä te di tedä ladzñaa rexpejn nani rnibee Israel. Naj di xcälrnibeä gac yälrnibee sa' ni yu' lo guedxliujre.

<sup>37</sup> Ni'cni räjpm Pila't lojni:

—¿Reii najclu, ä?

Räjpm Jesús lojni:

—Laaca najlu nacä reii. Par ni'cpac golä, par ni'cpacza biälä lo guedxliujre, partis gusule'ä didxliipac. Guiraa renani najn didxlii, reni'c rucua diajgreni xtidxä.

<sup>38</sup> Räjpm Pila't lojni:

—¿Xhini'c najc didxlii?

Che guniini si'c gunisacni loj rexpejn Israel:

—Dina guidxälä nicla tej xtojñ bejnre.

<sup>39</sup> Niluxh la'tu rajptu te costumbr, casob lani pascw, ruslaanu te bejn ni yu' neñ latzguuib. ¿Xhi najtu? ¿La rlanjtu guslaä ni najc reii xten rexpejn Israel, ä?

<sup>40</sup> Dxejcti guiragajcreni guredxa', räjpmi:

—¡Na'c guslaalu niguiiga! ¡Baslaa Barrabás!

Niluxh Barrabás najc te gubaan.

## 19

<sup>1</sup> Ni'cni gunibee Pila't gudijnreni Jesús con duu ni yu' guechguuib lojni.

<sup>2</sup> Bejn resoldaad te coronguejch, bazalrenini yejc Jesús. Dxejcti bahua-jcwrenini te ladmoraad.

<sup>3</sup> Dxejcti gusloj gubigreni lojni, te räjpreni lojni:

—¡Gubajñ par tejpas Reii xten rexpejn Israel!

Dxejc huääzreni lojni.

<sup>4</sup> Dxejcti birisac Pila't, räjpni lojreni:

—¡Colhuii! Acabääni nez lojtu, te gacbeetu dina guidxäl nicla tej xtojñi.

<sup>5</sup> Dxejcti birii Jesús nez lojreni, yu' coronguejch yejcní, najcwzani lad-moraadga. Dxejcti räjp Pila't lojreni:

—¡Colhuii! ¡Aree niguiire!

<sup>6</sup> Ni'cni, che bahuíi rebixhojzro näjza rexquixhajgreni lojni, guredxa'reni, räjpreni:

—¡Colgucuaani lo cruzj! ¡Colgucuaani lo cruzj!

Räjp Pila't lojreni:

—Lagajc la'tu colchanäni te gucuaatuni lo cruzj. Per narä dina guidxälä nicla tej xtojñi.

<sup>7</sup> Dxejcti räjp rexpejn Israel lo Pila't:

—Nuurnu rajpnu te leii, luxh xcuent leiiiga, nanab guetni sa'csi najni najcni Xi'n Dios.

<sup>8</sup> Che biejn diajg Pila't rediidxga, bidxejbruni,

<sup>9</sup> biusacni neñ Pretorio, räjpni loj Jesús:

—¿Caro siäädlu?

Per xhet räjpdi Jesús lojni.

<sup>10</sup> Dxejcti räjp Pila't lojni:

—¿La dilu guiniíi loä? ¿La dilu gan narä rapä yälrnibee te gucuaálu lo cruzj, rapäza yälrnibee te guslaálu, ä?

<sup>11</sup> Räjp Jesús lojni:

—Xhetliidi yälrnibee niajplu loä paru dilu nica'ni xhaguibaali. Ni'cni bejn nani bato' narä lojlu rapduxhruni dojl loj ni rajplu.

<sup>12</sup> Ni'cni gudiil Pila't xho nuslaani Jesús, niluxh rexpejn Israel rbedxaduxhruni, räjpreni:

—Palga luj guslaaluni, dilu gac xamiigw reii César, sa'csi chutis ni rnii najcni reii, najcni xcontraar César.

<sup>13</sup> Che biejn diajg Pila't rediidxre, gulääni Jesús, dxejcti gurej Pila't lo yagxhiil cadro rujñni yälguxhtis, cadro laa Litóstroros con didx-griegw sälojni naga' guisa'c, con didx-hebreo laani Gabata.

<sup>14</sup> Najcni dxej vispr lani pascw, si'cti läidxej, dxejcti räjpni loj rexpejn Israel:

—Colhuii, aree xreiitu.

<sup>15</sup> Ni'cni guredxa'reni räjpreni:

—¡Suguetni! ¡Suguetni! ¡Bacuaani lo cruzj!

Dxejcti räjp Pila't lojreni:

—¿La sucuaä xreiitu lo cruzj, ä?

Dxejcti räjp rebixhojz ni rnibee lojni:

—Rutru reiidi rajpnu, Césartis najc xreiinu.

<sup>16</sup> Ni'cni bateed Pila't Jesús lojreni te chacuaarenini lo cruzj.

*Che bacuaarenini lo cruzj*

*(Mt. 27:32-44; Mr. 15:21-32; Lc. 23:26-43)*

<sup>17</sup> Dxejcti cua'reni Jesús, biriini ro'c guideb nuuni xcruzjni, cheni bidzujñireni te lajt ni laa lajt xten Calabeer, con didx hebreo laani Gólgota.

18 Ro'c bacuaarenini lo cruju. Bacuaazareni tio'p niguii lo stio'p cruju, tevgani te laad cuä' Jesús.

19 Dxejc bacuaa Pila't diidx ni cháä yejc xcrujzni; rediidxga najc scree: "Jesús, beñ Nazare't, Reii xten rexpejn Israel."

20 Xhidajl beñ bil diidx ni caj yejc xcrujzni, sa'csi lajt cadro bacuaarenini lo cruju najc gajxh ro' guejdxga, luxh didx hebreo, diidx griegw, nájza didx latin bacuaareni rediidxga.

21 Dxejcti räjp rebixhojzro xten rexpejn Israel loj Pila't:

—Na'c nucuaalu: "Reii xten rexpejn Israelni", laacaru nacuaalu: "Laani najni, najcni reii xten rexpejn Israel".

22 Dxejcti räjp Pila't lojreni:

—Nani abacuaä, abacuaä. Si'c jia'nni.

23 Dxejcti resoldaad, che gulujx bacuaareni Jesús lo cruju, cua'reni rehx-ablojiaani bejnrenini tajp la', te cade tejreni cua'reni te la'ni. Luxh yu' stee xhajbni ni laa tunica, nadijbni, guejnni hasta lo yuj guc-cheeni.

24 Ni'cni räjpreni lo sa'reni:

—Na'c guitiäznni; do'o guidzujtnu te daad lojni, te don chu xten gacni.

Si'c bejnreni te gusojb xtiidx Dios cadro caj scree: "Batiäjsreni xhablojiaä; yejca xhabä ni bia'n gudzujtreni daad."

Ni'cni bejn resoldaad recosre.

25 Niluxh cuä' xcruju Jesús suga' xnanni, con bäjl xnanni, ni laa Marii cháäl Cleofas, nájza Marii Magdalen.

26 Che bahuii Jesús loj xnanni, dxejc bahuiizani loj xpejn pacni nani sanälazduxhni, räjp Jesús loj xnanni:

—Nan, ¡bahuii, aro'c xi'nlul

27 Dxejcti räjp Jesús loj xpejn pacni nani sanälazduxhni:

—¡Bahuii, aro'c xnanlu!

Ni'cni dxejcti sinä nani najc xpejn pacni xnan Jesús rolijz pacni.

### *Xho gujt Jesús*

(Mt. 27:45-56; Mr. 15:33-41; Lc. 23:44-49)

28 Ni'cni, sa'csi najn Jesús alagujc guiraa recos ni nanab gac te soob rextidx Dios, räjpni:

—Cayolä nis.

29 Ro'c suga' te guejs vinagr, nenga bahuajdxreni te esponj dxejc bacuaarenini lo te yajg ni laa hisopo, guläsreni esponjga batzugrenini ro'ni.

30 Che gulujx gu' Jesús vinagra, räjpni:

—Agulujxni.

Dxejcti basajb yejcti, baslaani xaimni.

### *Xhi bejn te soldaad lo Jesús*

31 Dxejga najc dxe vispr xte lani pascw, che ru' mandaad par lanijga. Rexpejn Israel di rlaizreni nia'n rebejn ga lo recruju, sa'csi dxe sabdga najc dxej ni rusilajzreni. Ni'cni gunabreni lo Pila't guxhala ni chu qui'ch ni'reni te guetreni, te jäjtreni loj recruju.

32 Dxejcti bidzujn resoldaad, gudi'chreni guiro'p ni' nani caj te laad, sigajca bennäjreni tee ni caj ste laadga.

33 Che gubigreni lo Jesús, bahuiireni alagujtni, direni nigui'ch ni'ni.

34 Tej soldaadga baqui'tzni te lans ro' xcustiini, dxejc bixe' rejn nájza nis.

35 Lagajc narä Juan bahuiä recosga, ni'cni caniä rediidxre, luxh diidxga guliipacni. Lagajc narä nanä didxguliipac caniä, te chaliiza lajztu xcuentni.

<sup>36</sup> Sa'csi si'c gujc guira'ti, te guzojb xtidx Dios cadro caj: "Nicla tej xtuzjtni di guech."

<sup>37</sup> Sigajcza lo stee guijtjz caj diidxre: "Sidxelojreni loj nani biguijtz te lans."

### *Huicua'tzreni Jesús*

(Mt. 27:57-61; Mr. 15:42-47; Lc. 23:50-56)

<sup>38</sup> Che gulujx recosga, dxejcti huij José, te beñ Arimatea, nacxhiga'tzni te xpejn Jesús, sa'csi rdxejbni rexpejn Israel, ni'c huijni loj Pila't, gunabni loj Pila't te laani guiliätni Jesús lo cruzj. Cuäjbza Pila't, dxejc biääd José gulätni Jesús, sanätini togoolda.

<sup>39</sup> Näjza Nicodem biääd dxejc, nani galoo huininäj Jesús te guxhijn. Biädnäni si'cti tiuu kil te dänejxh ni najc si'c yaal ni laa mirra näjza áloes.

<sup>40</sup> Dxejcti cua'reni Jesús batejbrenini te la' lad lino, basälzarenini däjga ni laa mirra con áloes, sa'csi si'c najc xcostumbr rexpejn Israel che rucua'tzreni te togoal.

<sup>41</sup> Gajxh cadro cuaj Jesús lo cruzj, yu' te huert, neñ huertga yu' te bacoob si'c te biliää, cadro nicla tej bejn gajd guiga'tz.

<sup>42</sup> Sa'csi abidzujñ dxej vispr lani pascw xten rexpejn Israel, luxh gajxh suga' biliääga, nenga gudixhreni Jesús; si'c biga'tztini.

## 20

### *Gubansac Jesús loj rebengut*

(Mt. 28:1-10; Mr. 16:1-8; Lc. 24:1-12)

<sup>1</sup> Primer dxej xten xmaanga, cäjyru, gajd lo guedxliuj jianij che huij Marii Magdalen lo baaga. Che bidzujñni ro' baaga, bahuiini agubicaaj guij ni suga' ro' baaga.

<sup>2</sup> Dxejcti ruxuñni gubi'ni te huiye'tzni lo Simón Pedr näjza lo stee xpejn pac Jesús ni sanälazduxhni, räjpni lojreni:

—Ahuilääreni Dad neñ baa, luxh dinu guidon caro sanärenini.

<sup>3</sup> Dxejc biriguxuñ Pedr näjza stee bejn ga, huijreni nez lo baa.

<sup>4</sup> Ruxuñ guiro'preni. Niluxh stee bejn ga ruxuñduxhruni loj Pedr. Laani ganid bidzujñni lo baaga.

<sup>5</sup> Dxejcti guretänni te bahuiini neñ ba-biliääga. Bahuiini te laad naga' relajdtis nani bidejb Jesús, luxh dini niu' neñ baaga.

<sup>6</sup> Dxejc bidzujñgajc Pedr, biugajcni neñ baaga, bahuiini naga' relajdga te laad.

<sup>7</sup> Bahuiizani lajd ni guyu' yejcn, ni'c nie'tni saru, naga'ni te laad.

<sup>8</sup> Dxejcti biu' stee bejn ga nani bidzujñ ganid. Che bahuiini neñ baaga, huililajzni gubansac Jesús.

<sup>9</sup> Sa'csi gajdreni gacbee ni caj lo reguijtz, cadro caj nanab guibansacni loj rebengut.

<sup>10</sup> Dxejc gubisac guiro'p rexpejn pacni rolizreni.

### *Baluiloj Jesús loj Marii Magdalen*

(Mr. 16:9-11)

<sup>11</sup> Laltis suga' Marii cuä' baaga, cayoouni. Ni'cni lañ ni cayoouni, basajb lojni te bahuiini neñ baaga.

<sup>12</sup> Dxejcti bahuiini lo tio'p xangl Dios, najcwreni ladnolbäj, sobga'reni, tejni nez cadro gojt yejc Jesús, steeni nez cadro gojt ni'ni.

<sup>13</sup> Dxejcti räjpreni lojni:

—Nane', ¿xhicuent roonlu?

Räjpni lojreni:

—Sa'csi sanäreni Dad, luxh dina ganä caro huisa'nrenini.

14 Che gulujx guniini si'c, gubiréni, dxejc bahuuini loj Jesús suga' ro'c, niluxh dini niembee Jesús.

15 Dxejc räjp Jesús lojni:

—Nane', ¿xhicient roonlu? ¿Chu rguillu?

Marii bejn xhigab laa dade' ni rcanäj huertga, ni'c räjpni lojni:

—Dad, palga luj sanäluni, gunii caro gudixhluni te guiliäsáni te chanääni.

16 Dxejcti räjp Jesús lojni:

—¡Marii!

Dxejc gubiré Marii, räjpni neñ xtidx hebreo:

—¡Raboni!

(Sälöj diidxga “Mastr”.)

17 Dxejcti räjp Jesús lojni:

—Na'c guiniaazlu narä sa'csi gadna cha'a lo Xtadä xhaguibaa. Huij loj re-tetzä, huiye'tz lojreni, cha'a lo Xtadä, näjza Xtadtu, loj Xtiozä näjza Xtiooztu.

18 Dxejcti huij Marii Magdalen, bidzujñni loj rexpejñpacni badeedni didx-coob, räjpni:

—Abahuiä lo Dad Jesús.

Räjpzani lojreni guiraa recos ni gunii Jesús lojni.

### *Baluiloj Jesús loj rexpejñpacni*

(Mt. 28:16-20; Mr. 16:14-18; Lc. 24:36-49)

19 Che gojl gudxej, najcni dumingw, primer dxej xten xmaan, abiäudzu'tz ro lä' ro' yu' cadre tre' rexpejñpacni, sa'csi rdxejbreni rexpejñ Israel. Chela bidzujñ Jesús, guzujni nez galäiireni, räjpni lojreni:

—Suchu yälrbexi lastootu.

20 Che guniini si'c, baluigajcni reñaani lojreni näjza cuä' xcustiini. Ni'cni bibaduxhlajz rexpejñpacni che bahuireni lo Dad Jesús.

21 Dxejc räjp Jesús lojreni stehuält:

—Suchu yälrbexi lastootu. Si'c ni baxhal Xtadä narä, si'cza ruxhalä la'tu.

22 Che gulujx guniini rediidxga, balejbni yejcreni, räjpni, lojreni:

—Suguibajñ Sprit Dxañ xten Dios neñ lastootu.

23 Rextojl rebejñ nani siäl'lajztu, sibicajreni. Rextojl rebejñ nani ditu jiallajz, siannäjreni redojla.

### *Tomás bahuü lo Jesús ni gubañsac*

24 Tomás, ni laaza Didimo, najcni te retzubitio'p xpejñpac Jesús. Rutini che biäd Jesús loj rexpejñpacni.

25 Dxejcti räjp rexpejñpacni lojni:

—Abihuüinu loj Jesús, agubañsacni loj rebengut.

Dxejcti laani räjpni lojreni:

—Palga dina fiä loj reñaani cadre caj seen xten reclaab, palga dina guqui'tzä bicuenaä cadre guyu' claabga, guqui'tzäza ñaa cadre bixal cuä'ni, di lazä chalii gubañsacni loj rebengut.

26 Che gudejd xhujñ dxej, tresac rexpejñpacni neñ yu', nadxaagza Tomás lojreni. Niäudzu'tz yu'ga, luxh chela gucbeereni abidzujñ Jesús, guzujni galäiireni, räjpni lojreni:

—Suchu yälrbexi lastootu.

27 Dxejcti räjpni loj Tomás:



—Baqui'tz bicuenaalu ree loj patnaä, basälza naalu cuä'äre, na'c ractio'p lajzlu, huililajzpac gubansacä loj rebengut.

<sup>28</sup> Dxejcti räjp Tomás lojni:

—jXtadä, Xtioozä!

<sup>29</sup> Dxejcti räjp Jesús lojni:

—Sa'csi abahuilu loä, Tomás, huililajzlu. Chicbaa renani mase direni fii, rililajzreni xtidxä.

### *Xhicuent bacuaani reguijtzre*

<sup>30</sup> Xhidalroduxhru dzuun bejn Jesús nez loj rexpejnpacni, nani di nicaj lo guijt.

<sup>31</sup> Redzuunre nani bejn Jesús nani cuaj lo guijtze cuajni te chalilajztu diidxre: Jesús najc Crist, nani cabäjz rebejn jääd, Xi'n Dios. Luxh che chalilajz te bejn xtiidxni, sajpni yäl'nabajn par tejpas.

## 21

### *Jesús baluilojni lo gajdz xpejnpacni*

<sup>1</sup> Dxejcti baluiloj Jesús loj rexpejnni ro' nisdoo ni laa Tiberias. Scree baluilojni lojreni.

<sup>2</sup> Nadxaag sa' rebejnre: Simón Pedr, Tomás ni laaza Didimo, näjza Natanael, nani siääd Canä xten Galilee, rexi'n Zebedeo, näjza stio'p rexpejnpacni.

<sup>3</sup> Dxejcti räjp Simón Pedr loj resa'ni:

—Chanazä bäj.

Räjpreni lojni:

—Näjza nuure chonnu.

Dxejcti sääreni, huä'preni nen te barcw. Guideb guxhijnga xhet bäjldi gunaazreni.

<sup>4</sup> Che acayanij loj guedxliuj, suga' Jesús ro' nisdoo, di rexpejnni niem-beeni.

<sup>5</sup> Ni'cni räjp Jesús lojreni:

—Rexi'nä, ¿la xhet bäjldi rajptu, ä?

Räjpreni lojni:

—Xhet rajpdinu.

<sup>6</sup> Dxejcti räjpni lojreni:

—Colgusäl xquijxhtu ladbee xten barcwga, te ro'c siniaaztuni.

Dxejcti bacuaareni guijxhga ladbee xten barcwga, dxejcti ameer diniajcdi nibääreni guijxhga ro'c sa'csi gudxadotzu'tzni bäj.

<sup>7</sup> Dxejcti bejn nani sanälazduxh Jesús, räjp loj Pedr:

—Laa Dad Jesús.

Che biejn diajg Simón Pedr laa Dad Jesús, gotgajcni xhablojaani sa'csi ladxhagjiättis najcwni sa'csi canaazni bäj, dxejcti gutiäjsni lo nisdoo.

<sup>8</sup> Sgaü rexpejnpacni biädnäreni rebarcwga sa'csi ameer guidzujnreni ro' nisdoo, si'cti tegayuu metrtis cayäädx. Siädnäzaren guijxh guidxa rebäj.

<sup>9</sup> Che bidzujnreni ro' nisdoo, bahuiireni re' guiboo, ro'c dzuub te bäj näjza yätxtiil cague'.

<sup>10</sup> Dxejcti räjp Jesús lojreni:

—Coltanä gaü bäj nani entis gunaaztu.

<sup>11</sup> Dxejcti huij Simón Pedr, gulääni guijxhga, guidxani bälro. Guyu' si'cti te gayuu garol con choñ bäj nen guijxhga, niluxh dini niräsyä' mase guyu' xhidalduxh bäj nenni.

12 Dxejcti räjp Jesús lojreni:

—Coltaa te gauxharejntu.

Nicla tej rexpejn̄pacni dini niabdiidx lojni: “¿Chu luj?” sa'csi anajnreni laa Jesúsni.

13 Dxejcti cua' Jesús yätxtiil, badeedni lojreni, sigajcza rebäjil.

14 Dee najc ni riojn̄ huält baluillojni loj rexpejn̄pacni, che gubansacni loj rebengut.

*Jesús rniñäj Simón Pedr*

15 Che gulujx gudajwreni, räjp Jesús loj Simón Pedr:

—Simón xi'n Jonás, ¿la sanälajzrulu narä loj chu stee, ä?

Räjpni lojni:

—O'n, Dad, luj najnlu sanälazä luj.

Räjp Jesús lojni:

—Gojp rexilä'ä.

16 Räpsacni lojni ni rojp huält:

—Simón, xi'n Jonás, ¿la sanälajzlu narä, ä?

Räjpni lojni:

—O'n, Dad. Luj najnlu sanälazä luj.

Räjpni lojni:

—Gojp rexilä.

17 Räpsacni lojni ni riojn̄ huält:

—Simón xi'n Jonás, ¿la sanälajzlu narä?

Guc-huin lastoo Simón Pedr sa'csi gunabdiidx Jesús lojni choñ huält: “¿La sanälajzlu narä?” Dxejcti räjp Simón lojni:

—Dad, luj najnlu guira'ti. Luj najnlu sanälazä luj.

Räjp Jesús lojni:

—Gojp rexilä.

18 Rniliäpac lojlu, che gujclu bi'nru, lagajc luj rajcwlu xhajblu, rijlu cadrotis rlanjzlu. Che anajclu bengool, susgaatislu ñaalu te gushuajcw ste'ca bejn xhajblu, te chanäreni luj cadro di rlanjzlu.

19 Luxh diidxga gunii Jesús te cagusule'ni xho gugu'treni Pedr te guiliä'pni xpala'n Dios. Che gulujx guniini si'c, räjpni loj Pedr:

—Gudanajl narä.

20 Che gubiré Pedr, bahuiini loj stee xpejn̄ni, nani sanälajzru Jesús, siädnajlni dejtreni. Lagajc bejn̄re ni gurej cuä' Jesús lo lult xchej, ni räjpza loj Jesús: “Dad, ¿chuni'c najc nani guto'lu?”

21 Ni'cni, che bahuii Pedr lojni, räjpni loj Jesús:

—Dad, deea', ¿xhi gun dee?

22 Dxejcti räjp Jesús lojni:

—Palga rlazä jia'n̄ni che guibisacäli loj guedxliujre, ¿xhixh najcni? Basaanni. Luj gudanajl narä.

23 Ni'cni bire'ch diidx lagajc loj resa'ni, di bejn̄ga guet. Di Jesús niäjb lojni dini guet, alga räjpni: “palga rlazä jia'n̄ni loj guedxliujre che guibisacäli lo guedxliujre, ¿xhixh najcni?”

24 Luxh bejn̄ga najc narä, xpejn̄ Jesús nani bahuiioj guiraa recosre, nani bacuaazareni. Anadonnu didxliipac najc recos nani rniini.

25 Yu'ru xhidalduxh dzuun ni bejn̄ Jesús. Palga gucuaanu guiralii redzuun ni bejn̄ Jesús, nicla lo guedxliujre di gal̄ chu reguijtz cadro xcajni.

## Redzuun Rexejn Dios

### *Siäd Sprit Dxan xten Dios te cuääzni neñ lastootu*

<sup>1</sup> Xamigwä Teófilo, abacuaä lojlu xcuent guiraa recos nani bejn Jesucrist näjza nani baluii Jesucrist, che guslojlini,

<sup>2</sup> hasta dxejli ni huäjsni xhaguibaa. Gunibexgaani xhini'c gun renani guleni gac xpejnpacni. Sprit Dxan xten Dios baluii Jesucrist xhi guiniini lojreni.

<sup>3</sup> Gudejd Jesucrist trabajwduxh, dxejcti gujtñi. Dxejc gubansacni lo rebengut, baluilojni lo rexejnpacni. Tiuu dxej baluilojni loj rexejnpacni balti huält te gacheereni agubansacni. Guniizani lojreni xcuent xcälrnibee Dios.

<sup>4</sup> Che gudejd tiuu dxejga, batojp Jesucrist rexejnpacni, gunibeeni na'c guiriireni guedx Jerusalén, cuääzreni jiäd Sprit Dxan xten Dios nani aguniipac Dios jiäd. Räjñi:

—Dee abiejn diajgtu guniä lojtu.

<sup>5</sup> Juan batiobnis con nis, luxh naj guxii dxej cayääd dxejcro siäd Sprit Dxan xten Dios te cuääzni neñ lastootu. Si'c guirobnistu —räjñi.

### *Huäjs Jesucrist siini xhaguibaa*

<sup>6</sup> Lagajc dxejc che abidojpreni loj Jesucrist, gunabdiidxreni lojni:

—¿La naj gudedsaclu yälrnibee lo rexejn Israel, ä?

<sup>7</sup> Dxejcti räjñ Jesucrist loj rexejnpacni:

—Di riäjñ gacheetu xcuent redxej näjza retiempani abasobxgaa Dios con xcälrnibeeni.

<sup>8</sup> La'tu sica'tu yälrnibee che abiäd Sprit Dxan xten Dios neñ lastootu. Dxejc chatie'chtu xtidxä näjza rextzunä neñ guedx Jerusalén, neñ guiraa reguedx Judea, neñ guiraa reguedx Samaria, näjza neñ guideb guedxliuj —räjñi.

<sup>9</sup> Gulujxtis gunii Jesucrist rediidxga, luxh lañni cahuii rebejn lojni huäjsni xhaguibaa, sa'csi gurejdx Diosni. Dxejc biäd te za, biu'ni neñ zaga. Ro'cti diru rebejn nuhuii lojni.

<sup>10</sup> Lañni cadxelodxi rebejn xhaguibaa cadre gunitloj Jesucrist, tiop angl xten Dios ni najcw ladnol suga' gajxh cadre suga'reni.

<sup>11</sup> Dxejc räjñ reangl loj rebejn:

—¿Xhi rajctu beñ Galilee? ¿Xhicuent cadxelotju xhaguibaa? Abahuiitu xho huäjs Jesucrist siini xhaguibaa. Lagajc si'c guibisacni —räjñi.

### *Gulereni Matías ni najc apostcoob*

<sup>12</sup> Dxejc birii rebejn yejc dajne' ni laa Dan Oliib, siireni guedx Jerusalén. Dan Oliib suga' gajxh Jerusalén. Gusajrenini si'cni rnii leii sajç sareni dxej ni rusilajzreni.

<sup>13</sup> Che biu'reni Jerusalén, bidzujñreni ro' yu' cadre rbäzlaareni. Yu'ga najc jiaa yejc stee yu'. Ro'c rbäzlaa Pedr näjza Jacob, Juan, Andrés, Felipe, Tomás, Bartolomé, Mateo, Jacob xi'n Alfeo, Simón nani laaza Zelote, näjza Judas bejtç Jacob.

<sup>14</sup> Ro'c yu' guiraareni näjza regunaa näjza Marii xnan Jesucrist näjza rebetzhuin Jesucrist. Cabejdx, canabreni loj Dios; tejsi najc xhigab xten guiraareni.

<sup>15</sup> Nadxagsa' te gayuu gajñ bejn. Dxejcti huisulii Pedr galäiireni, räjñi loj rebejn:

16 —Caniä lojtu, resa'ä, nanabpac soob xtidx Sprit Dxan xten Dios ni bacuaa toDavid lo guijtz xcuent Judas, nani bato' Jesucrist loj renani gunaazni.

17 Gujç Judas sa'nu, bejnzani lagajç dzuun ni biennu.

18 Cua' Judas meel ni badeedreni lojni che bato'ni Jesucrist. Che gulujç bejnni dzunguijdx ni bejnni, badeedsacni meel lojreni. Gusiireni te la' yuj. Dxejcti lagajç Judas basäl duu guejnni, guzäbnajlmi lo bej, gujtni. Gusaguijni, dxejcti biräjs xque'ni birii guiraa reziini.

19 Che biejn diajç rebejn Jerusalén si'c, gulälajreni yujre Acéldama, ni säloj yurejn.

20 Neñ guijtz ni laa Salmos abacuaa toDavid rediidxre:

Sujianxteb rolijzni;

na'c cuääzru bejn rolijzni;

näjza:

Suxca'za ste'ca niguii xtzuunni.

21 Naj nanab cuenu stee niguii —räjp Pedr—. Nanab gacni tej ni gusanäj nuunu guideb redxej ni guyunäj Jesucrist nuunu,

22 dxejli ni gusloj batiobnis Juan hasta dxej ni huäjs Jesucrist xhaguibaa. Te gacnä j niguiire nuunu gusule'nu diidx gubansacpac Jesucrist lo rebeñgut.

23 Dxejç gulääreni tiop niguii lojreni, tejni laa José Barsabás ni rbälajreni Justo, steeni laa Matías.

24 Gurejdx, gunabreni lo Dios, räjpreni:

—Dad, Dios, ni racbee lastoo guiraa rebejn, baluii loonu con ni najç niguii ni agulelu loj guiro'p niguiire,

25 te jiu'ni lo dzuun näjza lo yälapost ni basa'n Judas cheni sääni garenca nejz —räjpreni.

26 Dxejcti gudzujtreni daad te gulereni lo guiro'preni. Che biajb daad, gulereni Matías. Dxejç bigabnä j Matías stzubiteeb reapost te gujçreni tzubitio'p apost.

## 2

### *Biääd Sprit Dxan xten Dios*

1 Che bidzujñ dxej ni rajç lanij xten Pentecostés, tre' guiraareni tejsi lajt neñ te yu',

2 chela gusloj cayubej xhaguibaa si'c te beroduxh, bachajni guideb neñ yu' cadre suga'reni.

3 Dxejç bahuiireni astoo carechxteb xhidajl bale' casanij rebajlga yejç te jga reni sojb ro'c.

4 Biu'ti Sprit Dxan xten Dios neñ lastoo guiragajçreni. Dxejç gusloj canireni garen-garen didxsaj si'ctisni badeed Sprit Dxan xten Dios guiniireni.

5 Neñ redxejga, xhidajl rexpejn Israel ni sasanä jpac xtidx Dios bidzujñ guedx Jerusalén. Xhidajl lajt biriireni siädreni.

6 Che biejn diajçreni guyubej beduxhga, bidojp rebeñ xhidaalga, bachaag sa'reni. Rdxeloduxh rebeñ xhidaalga sa'csi cayejn diajçreni canii reapost xtidxsajpac cade tejreni.

7 Cadxelojreni räjpreni:

—jBahuiilaare! ¿La et beñ Galileedi renani canii, ä?

8 ¿Xhoxh riejn diajçnu caniiireni xtiidxpacnu si'ctis ni rniinu laadxnu, ä?

9 Najcnu beŋ nacióŋ Partia, beŋ nacióŋ Media, beŋ región Elam, beŋ Mesopotamia, beŋ Judea, beŋ estad Capadocia, beŋ región Ponto, nájza beŋ Asia.

10 Najczanu beŋ distrit Frigia, beŋ estad Panfilia, beŋ nacióŋ Egipto, nájza beŋ ni siáad stelaad Cirene, te estad neŋ Africa. Loj rebejn ni siáad Roma yu' reni najc xpejn Israel, yu'za reni bazuxhijb lo Dios sa'csi rililaljreni si'cni rililajz rexpejn Israel.

11 Yu'za beŋ Creta. Yu'za beŋ nacióŋ Arabia. Guiragajcnu riejn diajgnu caniireni xtiidxpacnu si'ctis ni rniinu laadxnu. Caniireni loonu xcuent recosroduxh ni cayujn Dios.

12 Bidxeloduxh rebeŋ xhidaalga, dijiejn xhi xhigab gunreni. Rájpreni lo sa'reni:

—¿Xhi säloj dee?

13 Dxejcti guyu' rebejn ni baxhiznájreni, rájpreni:

—Agusojz redee.

### *Gunii Pedr loj rebejn*

14 Dxejcti gusulii Pedr nájza tzubiteeb sa'ni, guredxa'ni guniini lo rebeŋ xhidaalga:

—Guejbtu, rexpejn Israel, nani rbájz distrit Judea nájza guedx Jerusalén. Colcuadiajg diidx nani guiniä.

15 Xhet sojzdinu si'cni cayujntu xhigab. Rsilru naj, entis gojl rcagaa.

16 Dxejc scree gunii Joel che guniini xtidx Dios agujc xchero.

17 Rájþ Dios:

Sidzujŋ dxej che guxhalä Xsprit Dxaŋä cuääzni neŋ lastoo guiraa rebejn. Rexingaantu nájza rexindxa'ptu sinii xtidxä xcuent recos ni gajd gac.

Rexi'ntu sinixcaŋ,

rextadgoldootu suluiloj bacal recos nani guluiä lojreni.

18 Guxhalä Xsprit Dxaŋä loj guiraa reni siädnaŋl narä.

Siniireni rediidx ni gudedä lojreni xcuent recos nani gajd gac.

19 Suluiä lojtu balti senro xhaguibaa nájza lo guedxliuj.

Resenro ni gac najc rejn con guiboo, luxh guxh sire' si'c te za.

20 Sicäy loj gubijdx, sajc bäii si'c rejn.

Sajc guiraa recosre,

dxejcru sidzujŋ dxeduxh che jiälsacä narä, Dios.

21 Dxejc guiraa rebejn nani cueedx guiniab gacnäŋ Diosreni, reni'c siliaa lo dojl.

22 Rájþ Pedr lojreni:

—Rexpejn Israel, colcuadiajg xtidxä. Dios baluii Jesucrist, beŋ Nazare't, lojtu por recosro, remilagwr, reseen nani bejnne nez lojtu. Lagajc Dios badeed yälrnibee loj Jesucrist te bejnne redzunroga. La'tu nancheetu dee.

23 Galooli ananchee Dios xhi guntu loj Jesucrist Xi'nni. Basaanza Dios bateedu Jesucrist ladzŋaa rebeŋguijdx te bacuaareni Jesucrist lo cruzj te bagu'trenini.

24 Baspaŋsac Dios Jesucrist, basŋaa Diosni ladzŋaa yälgujt, sa'csi di niajcdi nica' yälgujtni par tejpas, sa'csi laani rnibee lo yälgujt.

25 Che gubaŋsac Jesucrist, guzobj diidx ni bacuaa David lo guijtzc xcuent Jesucrist. Rájþ David lo Dios:

Guira dxej ruhuiä lojlu, Dios.

Suga'lu xladbeä cayacnäjlü narä te di guidxejb lastoä.

26 Ni'cni bibalajz lastoä, guniäza lojlu lacti rbaa lazá.

Rbalazä sa'csi suhuiilu narä che guetä.

<sup>27</sup> Dizalu gusaan jia'n xaimä neñ baa.  
Dizalu gusaan gudx tiejxh xi'ñlu nani sanälajzlu.

<sup>28</sup> Abaluuilu loä xho guibanä par tejpas.  
Sibalazduxhä sa'csi guibannä luj,  
si'c räjp David xcuent Jesucrist.

<sup>29</sup> Räjp Pedr:

—Guyasi guiniä lojtu agujc xchero gujt David. Aguyutzu'tzni neñ baa. Sajc guihuiinu baa cadro biga'tz David.

<sup>30</sup> Gunii David xtidx Dios. Che nabajñli David bia'n diidx gudeed Dios te xajgni ni guirilaj Crist, luxh laani gacni reii si'cni gujc David.

<sup>31</sup> Sa'csi baluixgaa Dios recosre lo David, ni'c räjp David sibansac Crist lo rebengut sa'csi di Dios gusaan jia'n xaimni neñ baa, dizani gusaan gudx tiejxhni.

<sup>32</sup> Guläs Dios Jesucrist lo rebengut. Nuure bahuiloonuni, najcnu testiigw gubansacni lo rebengut.

<sup>33</sup> Gurejdx Dios Jesucrist. Naj nabajñ Jesucrist xhaguibaa, nabejni xladbee Dios ro'c canibeeni. Badeed Dios Xsprit Dxanni loj Jesucrist si'cni bia'n diidx. Naj abaxhal Jesucrist Sprit Dxan lo guedxliuj. Jesucrist cayujñ guira'ti nani cahuiitu, nani cayejñ diajgtu nadxej.

<sup>34</sup> Di David nij xhaguibaa, sa'csi lagajc David räjp:

Gunii Dios lo Dad nani rnibee loä: “Gurej xladbeä

<sup>35</sup> che guidzujñli dxej gudzugä guiraa reni rdxe'ch lojlu te gacbeereni luj rnibeelu guira'ti.”

<sup>36</sup> Rñiliäpac lojtu —räjp Pedr—. La'tu bacuaatu Jesús lo crujz. Ni'cni, colgacbee, guiraatu xpen Israel, abejñ Dios gac Jesúsre Dad nani rnibee loonu.

<sup>37</sup> Che biejn diajgrenti laareni bacuaareni Jesús lo crujz, guc-huinduxh lajzreni. Räjpreni lo Pedr näjza lo reapost ni suga' ro'c:

—Aiilu, resa'nu, çxhini'c jiennu ñaj?

<sup>38</sup> Dxejcti räjp Pedr lojreni:

—Colgusiech lajztu, colguirobnisza, sa'csi ni'c najc te seen rlanjtu chanajltu Jesucrist, te si'c jia xtojltu. Dxejc suniidx Dios Sprit Dxan cuääz neñ lastootu.

<sup>39</sup> Si'c rlanj Dios guniidx Xsprit Dxanni lojtu näjza loj rexi'ntu, näjza lo rebejn ni rbäjz zijtru, näjza loj guiragajc rebejn nani cueedxni —si'c gunii Pedr lo rexpejn Israel.

<sup>40</sup> Dxejcrun gunii Pedr xhidajlru diidx, balijdxni rebejn:

—Colguirri loj rebeñ latsiaj ni re' lo guedxliuj ñaj, te laatu lo dojl.

<sup>41</sup> Xhidajlreni huililajz rediidxga. Dxejcti gurobisreni sa'csi huililajzreni xtidx Dios. Lagajc dxejga huililajz si'cti choñ miñ bejn.

<sup>42</sup> Sanuutis rusoobreni diidx ni baluii reapost, bibalazduxhreni sa'csi bidxaag sa'reni con rexpejn Jesucrist, gudaunäj sa'reni si'c gudaunäj Jesucrist rexpejn pacni, bidojpreni tejsi lajt te guniireni lo Dios.

### *Xho gubajñ rexpejn Jesucrist galoo*

<sup>43</sup> Bidxeloduxh guiraa rebejn luxh bejn reapost redzunro, remilagwr.

<sup>44</sup> Bichaag sa' renani huililajz xtidx Dios. Bachagsa'reni xhixtenreni te tejsi gojpreni guiraa xhixtenreni.

<sup>45</sup> Bato'reni xhixtenreni, dxejcti badeedreni meel lo sa'reni si'ctis ni caquiin chutis tejreni.

<sup>46</sup> Guixe-guixe bidojpreni neñ guidoro xten Israel. Tejsi najc rexhiga-breni. Gudaunäj sa'reni rolijz cadetejreni, guiraareni bibalaznäduxh sa'reni.

<sup>47</sup> Gulä'preni xpala'n Dios. Guiraa rebejn gunii rexpejn Jesucrist najc bensa'c. Guixe-guixee batie' Dios xhidajlru bejn nani rililajz xtiidxni, badzucajni rextoljreni, dxejc bachaagreni lo rexpejn Jesucrist.

### 3

#### *Biajc niguii nani racxhuu ni'ni*

<sup>1</sup> Guyu' te dxej säa Pedr näjza Juan nez loj guidoro si'cti rcachon gudxej.

<sup>2</sup> Guyu' te niguii nani racxhuu ni'ni, digacdi sani che gojllini. Guixe-guixee rile'c bejn niguiiga ro' puertroga xten guidoro. Puertroga laa Sacru'. Ro'c rbejni rniabni gojn lojreni riu' guidoo.

<sup>3</sup> Che bahuiini agojl jiu' Pedr näjza Juan nen guidoroga, gunabni te gojn lojreni.

<sup>4</sup> Dxejcti bahuii Pedr näjza Juan lojni. Räjp Pedr lojni:

—jBahuii loonu!

<sup>5</sup> Che biejn diajg niguiiga xtidx Pedr, bahuiini lojreni sa'csi naani sudeedreni meel lojni.

<sup>6</sup> Räjp Pedr lojni:

—Xhetliidi meeldi rapä, nani rapätis sunidxä lojlu. Xcuent xcälrnibee Jesucrist, beñ Nazare't, rniä lojlu: ¡Gusulii! ¡Gusaj! —räjpmi.

<sup>7</sup> Dxejcti gunaaz Pedr naani, guläsnini. Biligajc ni'ni, gusutijp ni'ni.

<sup>8</sup> Huisuyälni, gusajni. Biunäjni Pedr näjza Juan nen guidoro. Rsiajni, rtiäsnini, calä'pni xpala'n Dios.

<sup>9</sup> Bahuii xhidajl bejn lojni nen guidoro, rsiajni, calä'pzani xpala'n Dios.

<sup>10</sup> Biembeereni laa niguii ni rbej ro' puertro xten guidoro, rniabni gojn. Guiraareni bidxeloduxhrene bahuiireni xhi gusajc niguii ni gucxhuu ni'ni.

#### *Baluii Pedr xtidx Dios nen cordoor xten guidoro*

<sup>11</sup> Ro' guidoroga yu' te cordoor ni laa Cordoor xten Salomón. Ro'c suga' Pedr näjza Juan, naztzu'tz niguiiga naareni. Ruxun guiraa rebejn bidzujn nen cordoorga. Bidxelojreni sa'csi arsiaj niguii ni gucxhuu ni'ni.

<sup>12</sup> Che bahuii Pedr lo rebejn räjpni lojreni:

—¿Xhicuent rdxeloy guejbtu, rexpejn Israel? Pet naatu nuure basiajcnu ni' niguiire. Xhet nuudire basiajcnu ni'ni. Xcuent xcälrnibee Jesucrist biajc ni' niguiire.

<sup>13</sup> Xtiooznu, ni najc Xtiooz toxtadgoldoonu Abram, toxtadgoldoonu Isaac, näjza toxtadgoldoonu Jacob, lagajc Diosga abadeed yälrnibee loj Xi'nni Jesús. Niluxh la'tu bateedtuni ladznaa reguxhtis. Che rlaiz Pila't ni rnibee nuslaa Jesucrist, ditu nicäjb niriini, alga guniyajtuni nez loj Pila't.

<sup>14</sup> Niluxh la'tu baro'ntu Xi'n Dxan xten Dios nani rujn ganax dzunsa'c. Alga gunabtu birii te niguii nani bagu't bejn.

<sup>15</sup> Jesucrist ruedeed yäl'nabajn, luxh la'tu gunabtu bacuaareni Jesucrist lo cruiz. Gulässac Dios Jesucrist lo rebengut. Bahuiloonu nabajn Jesucrist, najcnu testiigw gubansac Jesucrist lo rebengut.

<sup>16</sup> Cahuiitu loj niguiire nani gucxhuu ni'ni, luxh rumbeetuni. Xcälrnibee Jesucrist abasiajcnu niguiire, sa'csi huillilajzni. Sa'csi huillilajznu xtidx Jesucrist, ni'c biajcnu te najcni si'cni rhuuituni naj.

<sup>17</sup> Rexpejn Israel, narä nanä di'tu niacbee, diza rexcuxhtistu niacbee laa Xindxan xten Dios ni bacuaatu lo cruiz.

<sup>18</sup> Scree gujc te guzojb xtidx Dios ni cuaj lo guijtuz aguic xchero. Diidxre bacuaa reniguii ni gunii xtidx Dios, Crist xten Dios sidejd trabajwduxh.

<sup>19</sup> Ni'cni colsiechljajztu, colguibi' loj Dios te guibicaj xtojltu. Dxejc susiäluyj Dios lastootu, sujnni gac nacoob guira'ti, si'cni bia'n diidx gacni.

<sup>20</sup> Lojtu suxhalza Dios Jesucrist nani rnibee, nani aguleni galooli.

<sup>21</sup> Naj nungäj] jia'n Jesucrist xhaguibaa dxejli guscoob Dios guiralii recos si'cni bia'n diidx gac, si'cni gunii Dios lo reniguii nani gunii xtiidxni lo retoxtadgoldootu agujc xchero.

<sup>22</sup> Scree gunii toMoisés lo retoxtadgoldoonu, räjpni: "Xtadnu Dios suxhal te niguii sa' narä nani cueni lo resa'tu. Siniini xtidx Dios. Colgusobdiajg guiralii diidx nani guiniini lojtu.

<sup>23</sup> Renani di gusoob rextiidxni, sinitlojreni, direni gac rexpejn Dios."

<sup>24</sup> Räjpza Pedr:

—Sigajcza agunii guiralii reniguii nani gunii xtidx Dios. Si'c agunixgaa toSamuel, näjza guiraa reniguii ni siädnajlni, xcuent recos ni cayajc nen redxejre.

<sup>25</sup> La'tu najc xajg reniguii ni gunii xtidx Dios. La'tu biannäjtu diidx nani gunii Dios loj retoxtadgoldoonu. Bia'n diidx, räjp Dios loj toxtadgoldoonu Abram: "Jiädjiajl te xajglu ni gupalazduxh reben guedxliuj, sa'csi suslaanireni lo dojl."

<sup>26</sup> Dxejcti ganiddoo lojtu baxhal Dios Jesucrist te guibaa lajztu che gusiejch lajztu, te na'cru guntu dojl —räjp Pedr.

## 4

### *Baluu Pedr näj Juan xtidx Dios loj reguxhtis*

<sup>1</sup> La] ni caniireni lo rebejn, ro'c bidzujn rebixhojz xten Israel näjza nani rnibee lo resoldaad xten guidoro näjza resaduceos.

<sup>2</sup> Bidxe'chduxhrenei sa'csi cagulijdxrenei rebejn, cayäjpreni:

—Sibañsac rebejn lo rebengut sa'csi gubañsac Jesucrist lo rebengut.

<sup>3</sup> Gunaaz reguxhtisrenei, biäureni sa'csi agudxej luxh abiäu jusgaad. Nen latzguiib barareni yääl.

<sup>4</sup> Xhidaj] reni biejn diajg xtiidxrenei huililajz xtidx Dios. Si'cti gaii mil niguii huililajz xtidx Dios.

<sup>5</sup> Che bara yääl, bachaag sa' guiraa rebengool, renani rnibee guedx Jerusalén, näjza rebejn ni ruluii lei,

<sup>6</sup> näjza Anás ni rnibee guiraa rebixhojz, näjza xpagojzni ni laa Caifás, näjza Juan, näjza Alejandro, näjza guiraa reniguii ni najc sa' rebixhozro ni rnibee.

<sup>7</sup> Gunibeereni biäd Pedr näjza Juan gusuj galäiireni te gunabdiidxrenei lojreni:

—¿Chu xcälrnibee rajptu? ¿Chu laj basä'ttu te basiajctu niguiire?

<sup>8</sup> Dxejcti sa'csi cayu Pedr diidx ni canii Sprit Dxan xten Dios nen lastooni, räjpni lojreni:

—Caniä lo guejbtu, reguxhtis näjza rebengool xten rexpejn Israel,

<sup>9</sup> palga canabdiidxtu xhucuent gucnäjnu niguii nani gucxhoo ni'ni, palga canabdiidxtu xho basiajcnu niguiiga,

<sup>10</sup> gusule'nu xcuent dee te gacheetu te gacheeza guiraa rexpejn Israel. Xtidx Jesucrist najc yälrnibeduxh. Diidxga abasiajc ni' niguiire, xhet rajcdini suga'ni nez lojtu. La'tu abacuaatu Jesucrist lo cruzj, niluxh Dios guläsni lo rebengut.

<sup>11</sup> Di'tu ninälajz xtidx Jesucrist. Laani najc si'c te guij nani rbäcajtut che runcheetu te yu'. Per Dios abejn najc Jesucrist si'c guij nani maazru nacsac, nani guyu' squiin xte yu'.



<sup>12</sup> Xtebtis Jesucrist ruslaa bejn lo dojl, ruti stee bejn lo guedxliuj nani baxhal Dios te guslaani bejn lo dojl —si'c räjp Pedr.

<sup>13</sup> Che biejn diajgreni xtidx Pedr, bidxelojreni sa'csi di Pedr näjza Juan guidxejb, dizareni guitujy. Dxejcti räjp rebixhojz ni sajcru lo sa'reni:

—Direni ganduxh guijtz, bejntisreni.

Dxejcti gucbeereni gusanäj redee Jesucrist, lojni bisieedreni.

<sup>14</sup> Bahuiiza rebixhojz lo niguii ni abiajc ni'ni, suganäjni guiro'preni. Ro'cti xhetru gujcdi gunii rebixhojz sa'csi laaca bejnreni.

<sup>15</sup> Dxejcti gunibee rebixhojz birii guidxojnreni telaad te bij rebixhojz diidx ensilaareni.

<sup>16</sup> Räjpreni lo sa'reni:

—¿Xhi jiennäanu reniguiire? Guiraa reben Jerusalén anajn xcuent dzunroduxhre ni cayujnreni. Digacdi gucuatzlaaznuni.

<sup>17</sup> Per te di guire'ch xtidx Jesucrist ste'ca guejdx, do'o gulijdxnu guidxojnreni te na'c guiniirureni xtidx Jesucrist ste'ca guejdx.

<sup>18</sup> Huixisac rebixhojzreni. Dxejcti räjpreni lojreni:

—Na'c guluirutu xtidx Jesucrist, na'cru guiniitu xtiidxni.

<sup>19</sup> Dxejc gunii Pedr näjza Juan, räjpreni lojreni:

—¿Colguinii loonu chu xtiidx sajcru guicudiaagnu? ¿Xtiidx la'tu, o xtiidx Dios?

<sup>20</sup> Digacdi gusaunu ro'nu. Nanappac gusule'nu diidx xcuent recos nani abahuiinu näjza rediidx ni abiejn diajgnu.

<sup>21</sup> Balidxsac rebixhojzreni te na'cru guiniireni xtidx Jesucrist. Dxejc baslaa rebixhojz guiro'preni, sa'csi xhetru niajcdi niujnreni lo Pedr näjza Juan, sa'csi canii rebejn bejnreni te dzunsa'c. Xhidajl rebejn gulä'pza xpala'n Dios sa'csi bahuiireni xhini'c gujc ro'c.

<sup>22</sup> Sa'csi niguii ni basiajcreni xcuent yälmilagwr agudejdni tiuu ijz.

### *Guredx-gunab rexpejn Jesucrist lo Dios*

<sup>23</sup> Che baslaa rebixhojz guiro'preni, gubi'reni lo sa'reni ni najc rexpejn Jesucrist. Bijreni diidx guiraa ni gunii reguxhtis xten rebixhojz näjza reben\_gool lojreni.

<sup>24</sup> Che biejn diaj rexpejn Jesucrist xtiidxreni, tejtis xhigab bejnreni guredx-gunabreni lo Dios, räjpreni:

—Xtadnu Dios, nani benchee xhaguibaa näjza guedxliuj näjza nisdoo näjza guira'ti ni yu' lojreni, nenreni,

<sup>25</sup> nani bejn basoob toDavid xtidx Sprit Dxaan te bacuaani xtiidxlu, räjpni:

¿Xhicuent guyuduxh reben guedxliuj yärsia'?

¿Xhicuent bejn rexpejn Israel xhigab ni xhet sajcdi?

<sup>26</sup> Bidxagsa' rereii lo guedxliuj näjza reguxhtis xten reguejdx te gudxojnreni xtzun Dios näjza xten Dad Crist nani baxhal Dios, si'c gunii toDavid.

<sup>27</sup> Aguzojb diidxre, sa'csi lo guejdxre bidxagsa' Herodes näjza Poncio Pila't näjza rexpejn Israel näjza rebenzijt nani di gac xpejn Israel. Bidxehnäjreni Xi'nlu nani najc Crist ni baxhalu.

<sup>28</sup> Naj abejnreni dzunguijdx si'cni galooli guniilu gac.

<sup>29</sup> Naj Guejblu Xtiosnu, bahuii xho cagusacsireni nuure, gucnäj nuure te gutiplaaznu, te na'c guidxeebnu guiniinu xtiidxlu, sa'csi najcnu rexpejnu.

<sup>30</sup> Baniidx xcälrnibeelu loonu te guisiajcnu rebejn, te jienzanu redzunro, remilagwr con xcälrnibee Xi'ndxanlu Jesucrist.

<sup>31</sup> Che gulujx gurejdxreni lo Dios, gusloj canibsejz yu' cadre tre'reni, cayac si'c te xu. Dxejcti biáäd Sprit Dxi xten Dios basutijpruni lastooreni. Dxejc dirureni nidxejb guniireni xtidx Dios.

*Rudeedreni xhixtenreni lo sa'reni*

<sup>32</sup> Guiraa renani huililajz xtidx Dios, tejsi xhigab bejnreni. Rut chu tejdireni bejn guinibxteb xhixtenni: bachaagreni sa' rehxixtenreni te xca' guiraareni nani rquiinreni.

<sup>33</sup> Gucnäj Dios reapost, gusutzu'tzreni bijreni diidx bahuilojreni loj Jesucrist che gubansacni lo rebengut. Gucnäj Dios guiraa rexpejn Jesucrist, luxh gopduxh reben guejdx respe'treni.

<sup>34</sup> Ni'cla tejreni di niáädx xhixtenni sa'csi renani gojp xyujni, rolizjni, bato'renini, dxejcti biändäreni xcuentni,

<sup>35</sup> badeedreni meelga lo reapost. Dxejcti gudis reapost meelga lo guiraa renani rquiinni.

<sup>36</sup> Guyu' te niguii ni laa José. Lajdxni najc Chipre, ni re' lo nisdoo. Najcni sa' rexfamil levita. Reapost gulälajni Bernabé (ni säloj xtiidxreni bejn ni rbecdxi lajz sa'ni).

<sup>37</sup> Scree gulälajrenini sa'csi bato'ni te la' yuj xtenni, dxejcti badeedni meel ni cua'ni lo reapost.

## 5

*Ananías näj chäälni rujn dojl*

<sup>1</sup> Guyu' stee niguii ni laa Ananías. Chäälni laa Safira. Bato'reni te la' yuj.

<sup>2</sup> Niguiire biannäjni gala' meel, dxejc gala' meelga badeedni lo reapost si'c guiraa xcuent yujga luxh chäälni nanchee xhi cayujjni.

<sup>3</sup> Dxejcti räjp Pedr lojni:

—Ananías, ¿xhicuent rusoblu xtidx Satanás ni rnibee lo rebendxab, ä? ¿Xhicuent rlajzlu gusgueelu Sprit Dxi xten Dios? Biannäjlu gaii meel ni cua'lu che bato'lu te la' yuj.

<sup>4</sup> Che gajdlu guto' yujga, xtenluni. Che bato'lu yujga, ¿la xhet xtendilu meel ni cua'lu? ¿Xhicuent bejnlu xhigab nen lastoolu gunlu dee? Loj Dios guniilu didx-xhii, xhet loodinu.

<sup>5</sup> Che biejn diajg Ananías xtidx Pedr, biajbni lo yuj, gujtni. Bidxebduxh rebejn che biejn diajgreni xhi gusajcni.

<sup>6</sup> Sas gubig gaii bi'n batejbrejreni Ananías nen lajd. Dxejcti sanärenini huicua'tzrenini nen baa.

<sup>7</sup> Pet agujc choj or gujtni chela bidzujn chääl Ananías. Dini gan agujt chäälni.

<sup>8</sup> Räjp Pedr lojni:

—Gunii, ¿la bato'tu xyujtu si'cni naj chäällu huijni, ä?

Räjp Safira lojni:

—O'n, si'c huijni.

<sup>9</sup> Dxejcti räjp Pedr lojni:

—¿Xhicuent bejnlu tejsi xhigabguijdx con chäällu? ¿Xhicuent rlajztu gusgueetu Sprit Dxi xten Dios? Ro lä' siääd renani huicua'tz chäällu. Naj näjza luj chacua'tzreni nen baa.

<sup>10</sup> Si'ctis biajb Safira, gutgajczani. Dxejcti bidzujn rebi'n, bahuiireni agujtni. Dxejcti guläsrenini, biriireni huicuatgajczrenini cuä' baa cadre biga'tz chäälni.

11 Bidxebduxh guiraa rexpejn Jesucrist, nájza guiraa rebejn nani biejn diajgni recosre.

*Bejn reapost xhidajl redzunro, remilagwr*

12 Xhidajl redzunro, remilagwr bejn reapost nez loj rebenguejdx. Nadxaag sa' rexpejn Jesucrist, caguchaagreni diidx neñ cordoor ni laa Salomón.

13 Guyu' xhidajl bejn ni di nuchaag lo rexpejn Jesucrist sa'csi bidxebreni cuchaagreni lojreni. Rebenguejdxga gulápduxhrene xpala'n rexpejn Jesucrist.

14 Nen redxejga xhidalduxh rebejn huililajz xtidx Jesucrist, niguii sigajc gunaa.

15 Dxejcti gulääreni lo nezyuj rebejn nani cayacxhuu. Siädnä rebejn benracxhuu naga' lo da', te gaxäjsi ted xpalaa Pedr yejcreni che ted Pedr ro'c, te si'c jiajcreni.

16 Guedx Jerusalén bidzujñ xhidajl rebejn ni siäd ste'ca guejdx. Biädnäreni rebejn ni cayacxhuu nájza balti bejn ni yu' bendxab neñ lastooreni. Con xcälrnibee Jesucrist basiajc reapost reben racxhuu, gulääzareni rebendxab neñ lastoo balti bejn.

*Gudejd reapost trabajw*

17 Dxejcti bidxechlajz bixhojz ni rnibee, nájza reniguii ni laa saducee, sa'csi calä'p rebenguejdx xpala'n reapost sa'csi basiajcreni reben racxhuu.

18 Gunaazreni reapost. Basäurenini neñ latzguiib.

19 Niluxh yäälga, biäd te angl xten Dios, baxhalni ro' latzguiibga. Dxejcti gulääni reapost neñ latzguiib. Räjpmi lojreni:

20 — Colchäj guidoro. Ro'c colguinii lo rebejn xho gac guibannäjreni Dios par tejpas.

21 Che biejn diajgreni si'c, rsildooru biu'reni neñ guidoro, ro'c baluiireni xtidx Dios lo rebejn.

Dxejc bixhojz nani rnibee, nájza rebengool, bachagsa'reni gurejdxreni guiraa reguxhtis xten guidoo, nájza guiraa reguxhtis xten rexpejn Israel. Dxejcti gunibeereni jiädnä reguixhajg reapost nani biäu neñ ladtguiib.

22 Che bidzujñ reguixhajg latzguiib, bahuii reguixhajg neñ latzguiibga, niluxh rut yu'di neñ latzguiib. Che gubi'reni biädnäreni diidx, räjpreni loj reguxhtis:

23 — Che bidzunnu latzguiib, niäudzu'tz ro' latzguiib luxh resoldaad ni cayajp ro' latzguiib suga' guiro'p laad. Che baxhalnu ro' latzguiib, rut yu'di neñ latzguiib.

24 Che biejn diajg bixhojz ni rnibee, nájza capitán nani rnibee resoldaad xten guidoro, nájza rebixhojz, ben tio'p lajzreni, räjpmi lo sa'reni:

— ¿Xhini'c gujc? ¿Xhoni gac naj? — räjpreni.

25 Dxejcti bidzujñ te niguii, räjpmi lojreni:

— Reniguii ni basäutu neñ latzguiib, areni suga' neñ guidoro, luxh caguluiireni rebejn — räjpmi.

26 Dxejcti sanä capitán xten resoldaad rexcuxhtis guidoro te biädnäreni reapost, luxh direni nusacsí reapost sa'csi rdxebreni nucuaarení guij yejcreni.

27 Che bidzunñajreni reapost, räjpreni suurení nez loj reguxhtis xten Israel, sas gunii bixhojz ni rnibee,

28 räjpmi loj reapost:

— ¿Et agunibeenu lojtu na'cru guiniitu xtidx Jesucrist? Xhoxh naj cagutie'chtu rediidxga lo guiraa rebejn neñ guedx Jerusalén. La'tu rlaiztu cuaquijtu nuure bagu'tnu Jesucrist.

<sup>29</sup> Dxejc räjp Pedr näjza reapost lojreni:

—Nanabpac gusoobnu xtidx Dios, lacuaa gusoobnu xtidx bejn.

<sup>30</sup> Bagu'ttu Jesucrist che bacuaatuni lo crujz. Niluxh Xtios xtagdoldoonu guläsni lo rebengut.

<sup>31</sup> Naj agule'c Diosni xladbeeni cadro rnibeeni, abadeedza Dios yälrnibee loj Jesucrist te guslaani nuure, te si'c rlanjni guibicaj xtojł guiraa rexpejn Israel nani gusiechłajzreni.

<sup>32</sup> Bahuiloonu xhi bejn Dios. Ni'c cagusule'nu. Nadoncheenu Sprit Dxi xten Dios cayacnäj nuure te gusule'nu rediidxre. Badeed Dios Sprit Dxi xtenni lo guiraa renani susoob xtiidxi.

<sup>33</sup> Che bejn diaj reguxhtis rediidxga, bidxechduxhrene, rlanjreni nugu'treni reapost.

<sup>34</sup> Dxejcti huisulii te niguii ni laa Gamaliel, nani najc te farisee nani ruluii leii xten Israel, rebejn rapduxh respe't dade'ga. Gunibee Gamaliel guirii reapost nen yu'ga.

<sup>35</sup> Dxejcti räjp Gamaliel lo rebixhojz:

—Guejbtu rexpejn Israel, colyensa'c xhigab xhini'c rlanjtu gunnäjtu reniguii.

<sup>36</sup> Colzaa lajztu gajd gac xchej guyu' tej ni laa Teudas, räjpni rnibeduxhni. Dxejcti huinajł tajp gayuu bejn. Che bagu'trenini, bire'ch guiraa rexpejn, xhetru bejndireni.

<sup>37</sup> Nen ijj ni guyu' cens, biriiza Judas ni siääd Galilee. Dxejcti gurejdxni xhidajł bejn ni huinajłni. Bagu'tza bejn, dxejcti bire'chza guiraa reni huinajłni.

<sup>38</sup> Naj rniä, colguibicaj, colgusaan reniguii, rexpejn Jesús. Palga guejbcareni cayunreni dzuunre, xtebcani sinitlojni.

<sup>39</sup> Palga xtzuan Dios ni cayunreni, digacdi guscuaäznu dzuunga, sa'csi guidilnu guidxe'ch Gueb Dios loonu.

<sup>40</sup> Bichagłajz rebixhojz xtiidx Gamaliel. Gurejdxreni reapost, dxejcti gudijnreni reapost, gunibeereni loj reapost na'cru guiniireni xtidx Jesús. Dxejcti baslaarenini.

<sup>41</sup> Biriitireni nez loj rebixhojz. Cabaduxh lajzreni sa'csi gujcti gudejdreni trabajw xcuent Jesucrist.

<sup>42</sup> Guixe-guixee laltis baluiireni xtidx Jesucrist nen guidoro näjza roliljz bejn. Cagusule'reni diidx lo rexpejn Israel:

—Jesús najc Crist nani cabäätzu jiaäd.

## 6

### *Gulereni reniguii ni gudeed yäxtiil lo rexpejn Jesucrist*

<sup>1</sup> Nen redxejga, xhidarlo gujcti rexpejn Jesucrist. Niluxh gusloj camojm rexpejn Jesucrist nani rnii didx griegw. Räjpreni:

—Xhet laadi cayun rebejn ni rnii didx hebreo. Rebiuud nani rnii didx hebreo rca'ru loj rexpiuudnu. Rebiuud ni rnii didx hebreo rca'ru xhi gaureni che rguisreni xhi gau rebiuud guixe-guixee.

<sup>2</sup> Dxejcti batie' guitzubitio'p reapost guiraa rexpejn Jesucrist, räjpreni lo guiraarenini:

—Et laadi guisaannu guluiinu xtidx Dios te quisnu xhi gau rebiuud.

<sup>3</sup> Ni'c nanab cuetu lo resa'tu gajtz niguii nani najntu najc be'nsa'c, nani rbäjz Sprit Dxi xten Dios nen lastooreni, nani yu' xcäriejnreni. Reniguii quis xhi gaureni.

<sup>4</sup> Te si'c sajc chanuutis guiniabnu lo Dios, guiluizanu xtidx Dios lo rebejn.

<sup>5</sup> Guirali rebejnğa bidxaglazreni diidxga. Dxejcti gulereni Esteban, te niguii ni rilajzpac xtidx Dios, rbäjzza Sprit Dxan xten Dios neñ lastooni. Gulezareni Felipe, Prócoro, Nicanor, Timón, Parmenas; gulezareni Nicolás nani siäd guedx Antioquía. Nicolás najc te proselite, nalajznu, dini gac xpejn Israel, per basoobni xleii toMoisés che gajdni chalilajz xtidx Jesucrist.

<sup>6</sup> Sas biädnä rexpejn Jesús guigajz niguiiga lo reapost. Dxejcti guredx-gunab reapost lo Dios xcuent reniguiiga, batzuubreni naareni yejc reniguiiga si'c te seen abiu'reni lo xtzunreni.

<sup>7</sup> Birechduxh xtidx Dios. Xhidajl beñ Jerusalén huililajz xtidx Dios, näjza xhidajl bixhojz.

### *Gunaazreni Esteban sanärenini lo rebixhojz nani rnibee*

<sup>8</sup> Gucnäduxh Dios Esteban, bejnni redzunro, remilagwr nez lo rebejn.

<sup>9</sup> Dxejc rebeñ guidoo ni laa Libertados gusloj cadilnä Esteban. Lojreni nadxaag beñ Cirene, näjza beñ Alejandria, näjza gaii beñ Cilicia, näjza sgaii beñ ni siäd reguedx Asia.

<sup>10</sup> Reniguiire di niajcdi nuzejcreni diidx lo Esteban, sa'csi nasin<sub>u</sub>duxhni, luxh cayacnä Sprit Dxan xten Diosni.

<sup>11</sup> Dxejcti baquilreni sgaii niguii ni di gac xpejn Jesús, te räjpreni:

—Biejn diaagnu caniyaj Esteban toMoisés näjza Dios.

<sup>12</sup> Scree gujc bache'chreni rebejn näjza rebejn ni ruluii leii näjza rebeñgool. Dxejcti bachagsa'reni, gunaazreni Esteban. Huinärenini lo reguxhtis xten Israel.

<sup>13</sup> Dxejcti biädnäreni reniguii nani baquilreni te guniireni didx-xhii. Räjp reniguiire:

—Entis rniyaj Esteban leii xten toMoisés näjza guidodxanre.

<sup>14</sup> Abiejnza diaagnu gunii Esteban: “Jesús nazareno sutzuñ guidoro, suchaazani leii nani baniidx toMoisés loonu.”

<sup>15</sup> Dxejcti guiraa rebejn ni sobga' ro'c bahuiireni lo Esteban, bahuiireni rujn lojni si'c rujn loj te angl xten Dios.

## 7

### *Diidx ni basule' Esteban lo rebixhojz*

<sup>1</sup> Dxejcti räjp te bixhojz nani rnibee lo Esteban:

—¿La gulii si'c guniilu, ä?

<sup>2</sup> Räjp Esteban lojreni:

—Colgucuaiajg rextidxä, guejbtu dad, näjza resa'ä. Xtioznu ni sacduxh, ni rnibee, baluiioj lo toxtadgoldoonu Abram che guläjzni Mesopotamia, che gajdni chaläjz neñ guedx Harán.

<sup>3</sup> Räjp Dios loj toAbram: “Birii lajdxtu, basa'n guiraa resa'lu. Huij cadrotis guluiä lojlu”

<sup>4</sup> —räjp Esteban—. Dxejcti birii toAbram lajdx reCaldeos. Huiläjzni guedx Harán. Che gujt xtadni, biädnä Dios toAbram nez ree, cadre rbääznu naj.

<sup>5</sup> Di Dios nuzalajz nicla tla' yuj cadre suu te ni' toAbram. Niluxh räjp Dios sudeedni yujga lo rexajg toAbram, jiannäjreni yujga che guet toAbram. Niluxh nicla gajd xi'n toAbram chu dxejc.

<sup>6</sup> Stee huält räjp Dios lo toAbram: “Rexi'nlu, rexagdoolu, siläjzreni si'c beñzajt. Ladxbejn gacreni mos, ro'c susacsí bejnreni si'cti tajp gayuu ijz.”

<sup>7</sup> Răjp Dios: “Narä sunä castiıgw rebejn ni gusacsıreni che najczeni mos. Narä cuää rexagdoolu ro’c, te ree guzuxhijbreni loä neñ guejdxre”, si’c răjp Dios

<sup>8</sup> —răjpa Esteban—. Dxejcti si’c bia’n Dios diidx con toAbram, gunibee Dios gutiuug Abram lagajc laani, te chuni bee; ni’c najc te seen xten diidx ni bia’n Dios con Abram. Guyu’ te xi’n toAbram, ni laa Isaac. Che guyu’ni xhujñ dxej, basälza toAbram beegani si’c te seenza. Sigajcza bennäj Isaac xi’nñi Jacob. Sigajcza bennäj Jacob guitzubitio’p rexi’nñi nani najc rexpengoldoo xpen Israel.

<sup>9</sup> Răjp Esteban:

—Guitzubiteb rexi’n Jacob guyu’ te yälrudxojn lo bejtzreni José. Dxejc batoreni José lo te beñ Egipto. Dxejc Dios goptzu’tz José.

<sup>10</sup> Che biejñ José trabajwduxh, gucñäj Diosni. Badeed Dios yälñasinıduxh lojni. Bejn Dios bichagljaz rei Faraón José. Badeed rei Faraón gujçni gubernadoor xten Egipto. Gunibeeza José guira’ti xhixten reiiga.

<sup>11</sup> Răjpa Esteban:

—Che bidzujñ dxej gujc te gubijn, guiraa neñ reguedx Egipto näjza guiraa neñ reguedx Canaán, trabajwduxh cadejd guiraa rebejn. Xhet guyu’di xhi niajw retoxtadgoldoonu.

<sup>12</sup> Che biejñ diajg xtadgoldoonu Jacob yu’ xhi gaureni neñ reguejdx xten Egipto, ro’c baxhalñ rexi’nñi, bica’reñi xhi gaureni te huält.

<sup>13</sup> Che huijreni stehuält, dxejc bazäbdiidx José lojreni laani najc bejtzreni. Biembeeza Faraón resa’ José.

<sup>14</sup> Dxejcti baxhalñ José diidx jääd xtadni Jacob, näjza guiraa resa’ni, cuääzreni Egipto. Najc rebejnğa si’cti gayonbitzubigai bejn.

<sup>15</sup> Si’c gujc te huij Jacob guedx Egipto. Ro’c guläjzni, ro’c gujtni. Ro’c gujtza retoxtadgoldoonu.

<sup>16</sup> Dxejcti huiñäreni rextzujtreni loj Siquem te biga’tzsaçreni neñ baa nani gusii toxtadgolnu Abram lo rexi’n Hamor neñ guedx Siquem.

<sup>17</sup> Răjp Esteban:

—Che bidzungajxh dxej, si’c diidx ni bia’n Dios con toxtadgoldoonu Abram, bidalduxh rexpengoldoonu neñ guedx Egipto.

<sup>18</sup> Dxejcti guyu’ te xreii Egipto ni di gan guiraa redzusa’c nani bejn toxtadgoldoonu José.

<sup>19</sup> Reiiga basgueeni rexpengoldoonu, basacsıneni, trabajwduxh bateedni rexpengoldoonu. Gunibee reiiga basälreni guiraa rebäz niguii te di laareni, te guetreni.

<sup>20</sup> Neñ redxejga, gojl Moisés. Che gujc Moisés báz, te báz daani, saru rujñ lojni, huiñälajz Diosni. Gułaani choñ bäii rolizjni.

<sup>21</sup> Dxejc huisälrenini, te guzobj xtidx Faraón. Dxejc lagajc xindxa’p Faraón bidxälñi Moisés, cua’nini baslaanini si’c xi’nñi.

<sup>22</sup> Bisieed Moisés guiraa ni najñ rebeñ Egipto. Gunisa’cni diidx, bensa’cni dzuun.

<sup>23</sup> Răjp Esteban:

—Che guyu’ni tiuu ijz, banaj lajzni resa’ni ni najc xpejn Israel, huijni cadro rbäjzreni.

<sup>24</sup> Dxejc bahuini casacsı te beñ Egipto te beñ sa’ni. Sas bagu’tni beñ Egipto.

<sup>25</sup> Bejn Moisés xhigab pet sacbee resa’ni cayacñäj Diosni te guslaani rexpeljñni. Luxh di resa’ni niacbee si’c.

<sup>26</sup> Che bara yääl, bahuii Moisés cadilnäj sa'reni tiop xpen Israel. Räjþ Moisés lojreni: “Colcuedxi, Dad. Lagajc sa'tu cadilnäjtu. ¿Xhicuent rdijltu?” si'c gunii Moisés, te na'cru tilnäj sa'reni.

<sup>27</sup> Dxejcti nani cayunniälajzga, balanaani Moisés, räjþni loj Moisés: “¿Chu baniidx yälrmibee lojlu te jiädnibeelu nuure?”

<sup>28</sup> ¿La rlaizlu ju'tlu narä si'c bagu'tlu beñ Egipto naii?” —räjþni—.

<sup>29</sup> Che biejn diajg Moisés rediidxga, baxunni, huijni zijt. Huiläzsjicni guedx Madián. Ro'c bachnaani, guyu' tiop xingaanni.

<sup>30</sup> Räjþza Esteban:

—Che gudejd tiuu ijz, bidzujñ te dxej cansajni nez lo reyubijdz ni naga' guideb gabi dajn ni laa Sinaí. Ro'c bahuiini te bajl neñ te yaguejch. Neñ bajlga baluiloj angl xten Dios lo Moisés.

<sup>31</sup> Bidxeloduxh Moisés che bahuiini si'c. Dxejcti gubigni te rlaizni nuhuisa'cni yajgga. Dxejc biejn diajgni gunii Dios, räjþni lo Moisés:

<sup>32</sup> “Narä nacä Xtios rextadgoldoolu, narä nacä Dios xten Abram, nájza xten Isaac nájza xten Jacob.” Dxejcti gucsez Moisés sa'csi bidxebduxhni, diruni nuhuisa'c yajgga.

<sup>33</sup> Dxejcti räjþ Dios lojni: “Gulää xcura'chlu. Yuj cadro suga'lu najc dxan, sa'csi narä yu'ä ree.

<sup>34</sup> Abahuiä xho cagusacsí reben Egipto rexpänä. Abiejn diagä xho roonreni. Naj abiälä te gusläá rexpänä. Gudaa naj, suxhalälu cháalu Egipto.”

<sup>35</sup> Räjþ Esteban:

—Dios badeed yälrmibee lo Moisés nani baze' retoxtadgoldoonu che räjþreni: “¿Chu baniidx yälrmibee lojlu te jiädnibeelu nuure?” Baxhal Dios Moisés te guinibeeni xpejn Dios, gucnájza Dios Moisés basläáni rexpejnñi neñ naciön Egipto si'c gunii angl xten Dios che baluilojni lo Moisés neñ yaguejchga.

<sup>36</sup> Gulää Moisés rebejnğa. Ganiddoo bejn Moisés redzunro, yälrdxeloj neñ naciön Egipto nájza ro' nisdoo ni laa niso xniaa. Tiuu ijz cuansaj retoxtadgoldoonu neñ yubijdzroga, ro'c bejnza Moisés redzunro, remilagwr.

<sup>37</sup> Lagajc Moisésre gunii xtidx Dios che räjþni loj rexpejn Israel: “Sibe Dios lo rexajgtu te niguii ni najc sigac narä. Siniini xtidx Dios. Colgusoob xtiidxni.”

<sup>38</sup> Lagajc Moisés guyunäj rebejn neñ yubidzro. Xangl Dios guninäj Moisés neñ dajn xten Sinaí. Dxejcti badeed Moisés rediidx ni gunibee Dios lo retoxtadgoldoonu. Laareni basa'nreni diidxga loonu.

<sup>39</sup> Räjþ Esteban:

—Niluxh di retoxtadgoldoonu nusoob rextidx Moisés. Di rlaizreni guinibee Moisésreni. Canaduxhlaizreni naciön Egipto.

<sup>40</sup> Che sää Moisés dajn Sinaí, räjþreni loj Aarón bejtz Moisés: “Benchee banäjþ gac xtiooznu, te nidreni loonu, te chanajlnuren. Chu gan con Moisésre ni baluii nezyuj che gulääni nuure guejdx reEgipto.”

<sup>41</sup> Sas bencheereni te banäjþ ni najc si'c te gonbáz. Dxejcti bagu'treni guidxaa te badeedreni rejnga lo banäjþ te bazuxhijbreni lojni. Bibalazduxhreni sa'csi abencheereni banäjþga.

<sup>42</sup> Dxejcti gubicaj Dios loj rexpejn Israel sa'csi bejnreni si'c. Basaan Dios gojnreni gubijdx, nájza bäii, nájza rebal xhaguibaa. Gujñi si'cni caj lo guijtz ni bejn reniguii nani bacuaa rextidx Dios. Räjþ Dios:

La'tu beñ Israel, cheni cuansajtu tiuu ijz nez lo reyubijdz, ¿la par narä bagu'ttu guidxaa, ä?

¿La loä baniidxtu xtiejnreni, ä?

<sup>43</sup> Xho gacni si'c, räjp Dios.

Cuansanäjtu te yu' najcw guijs cadro chu te banäjb.

Nenga guyu' banäjb ni laa Moloc, nani najtu najc xtiostu.

Gojn̄zatu balbäze' xten xtiostu ni laa Remfán.

Redios ni bencheetistu reni'c gojntu.

Ni'cni sibää la'tu ree guxhaä la'tu stelaad guedx Babilonia.

<sup>44</sup> Guniiru Esteban, räjpni lojreni:

—Neñ reyubijdz gojp retoxtdagldoonu te yu' najcwni guijs. Gujnci xquidooreni. Ro'c guninäjnreni Dios. Benchee retoxtdagldoonu yu' najcw guijsda si'cni gunibee Dios che baluiini lo Moisés xhoni gacni.

<sup>45</sup> Che gujt Moisés, Josué gunibee lacuaa toMoisés, huinäni retoxtdagldoonu nación Canaán. Batzujlreni yuro ni najcw guijs te näj ni'c huinäreni Canaán. Gulää Dios rebejn ni guläjz neñ reguedx Canaán. Dxejcti bia'n retoxtdagldoonu neñ reguejdxga. Bazuxhijbreni lo Dios neñ yuguijs ni najc xquidooreni che gojli xtiemp reii David.

<sup>46</sup> Huinäälajz Dios David. Räjp David lo Dios: “Rlazä gunä te guidoo par guejblu, Dios xten nuure, rexpejn Israel.”

<sup>47</sup> Dxejcti di Dios nusoob xtidx David. Alga Salomón, xi'n David, ni'c benchee xquidoro Dios.

<sup>48</sup> Naj di Dios guiquini te yu' nani runchee bejn. Scree bacuaa te niguii nani gunii xtidx Dios. Räjp Dios:

<sup>49</sup> Si'c najc te yagxhilsa'c cadro rnibee reii, si'c najc xhaguibaa cadro rbeä.

Si'c te bancw cadro rsiuj ni' reii, si'c najc guedxliuj nani bencheä.

Dina guiquinä guncheetu te xyu'ä.

Dina guiquinä te lajt cadro gusilazä, räjp Dios.

<sup>50</sup> ¿La et naädi benchee guiraa nani ruhuiitu?, räjp Dios.

<sup>51</sup> Räjp Esteban lojreni:

—Te beñ nadduxh najctu. Ditu jiu xtidx Dios. Niäu lastootu, niäuza diajgtu. Di'tu chanälajz xtzuum Sprit Dxan xten Dios, dizani cuääz neñ lastootu. Si'c bejn retoxtdagldootu, si'cza rujntu.

<sup>52</sup> Basacsí retoxtdagldootu guiralii reniguii nani gunii xtidx Dios. Nicla tejni direni niu. Bagu't retoxtdagldootu guiraa reniguii nani gunii siääd te niguidxan xten Dios. Naj abiääd niguidxanga, Jesucrist laani, luxh la'tu huinäatuni lo guxhtis te gunibeetu gujtni.

<sup>53</sup> La'tu biannäjtu leii nani gunii reangl xten Dios loj Moisés, luxh la'tu ditu nucuadiajg rediidxga.

### *Bagu'treni Esteban*

<sup>54</sup> Che biejn diajgreni rextidx Esteban, bidxe'chduxhreni, rauya' läjreni sa'csi rdxe'chreni lo Esteban.

<sup>55</sup> Rbäjz Sprit Dxan xten Dios neñ lastoo Esteban, ni'cni bahuitzu'tzni xhaguibaa, ro'c bahuiini yälrdimbichasejz xten Dios. Bahuiizani suga' Jesucrist xladbee Dios.

<sup>56</sup> Räjp Esteban lojreni:

—Colhuilaa. Narä cahüä xhaguibaa cadro yu' Dios, ruhuiäza loj Xi'n Dios nani gujc Niguii; ani suga' xladbee Dios.

<sup>57</sup> Guredxaduxhreni basäuzareni diajgreni. Dxejcti baxunreni bixa'treni yejc Esteban.



<sup>58</sup> Dxejc gudobyujrenini, gulääreni Esteban neñ guejdxga. Ro'c bacuaareni guij yejc Esteban. Che cagucuaareni guij yejçni, gulälajreni xhajbreni; te niguii ni laa Saulo biannäj xhajbreni.

<sup>59</sup> Lañ ni cagucuaareni guij yejçni, gunii Esteban loj Jesucrist räjpni:  
—Guejblu, Dad Jesucrist, cua' narä.

<sup>60</sup> Dxejcti biajb Esteban, bazuxhijbni, guredxa'ni räjpni:  
—Dad Jesucrist, na'c gudzuublu dojlre yejc rebejnre, na'c gucuaquijlureni. Gulujxsi guniini si'c, gujtni.

## 8

### *Saulo basacsí rexpejn Jesucrist*

<sup>1</sup> Rbaduxh lajz Saulo bagu'treni Esteban.

Lagajc dxejga gusloj gudejd rexpejn Jesucrist trabajwduxh neñ guedx Jerusalén. Dxejcti bire'ch rexpejn Jesucrist. Biunejzreni ro'c sääreni nez guiraa reguedx Judea näjza nez guiraa reguedx Samaria. Xtebtis reapost bia'n Jerusalén, direni nire'ch.

<sup>2</sup> Reniguii nani sanälajz Dios huicua'tz Esteban. Cayonduxhreni sa'csi riareni gujt Esteban.

<sup>3</sup> Biäädza Saulo, guixe-guixee basacsíni rebejn nani huililajz xtidx Dios. Biu'ni rolizreni, gunaazni reniguii näjza regunaa te basäunireni neñ latzgüiib.

### *Basule' rexpejn Jesucrist xtidx Dios nez región Samaria*

<sup>4</sup> Che bire'ch rebejn nani huililajz xtidx Dios, basule'reni xtidx Dios nez cadrotis sääreni.

<sup>5</sup> Tej rebejnğa laa Felipe. Siini nez te guedx Samaria. Ro'c basule'ni xtidx Dios. Räjpni:

—Jesús najc Crist nani cabäjztu jääd.

<sup>6</sup> Ro'c bachagsa' rebejn bacuadiajgreni rextidx Felipe, bahuiizareni redzunro, remilagwr nani bejn Felipe.

<sup>7</sup> Gaii bejn yu' bendxab neñ lastooreni. Che gunibee Felipe guirii rebenxab lastoo rebejnğa, guredxa' rebenxabga, dxejcti biriireni neñ lastoo rebejnğa. Yu'za xhidajl bejn nani digacdiru guiniib, yu'za reni rajc ni'reni, ñaareni. Con xcälrnibee Jesucrist basiajc Felipe guiraa rebejnğa.

<sup>8</sup> Sa'csi gujc si'c, bibalazduxh guiraa rebejn neñ guejdxga.

<sup>9</sup> Guyu' te niguii ni laa Simón neñ guejdxga. Bisieedni bejnni xhidajl redzuun yälbidxaa, basgueeni rebengejdxga. Bidxeloduxh rebengejdx lojni. Räjpni lo rebejn rutru chu stee bejn ni najc maazru benro lojni.

<sup>10</sup> Luxh guiraa rebejn, rebiuux, rebenğool, rebenrajp, rebenproob bacuadiajgreni xtidx bidxaaga, räjpreni:

—Laani rajpni yälrnibee xten Dios.

<sup>11</sup> Xchero basgueeni rebejn, bidxelojreni rextzunyälbidxaani. Guiraa rebejn huililajz xtiidxni.

<sup>12</sup> Dxejcti baluii Felipe xcuent xcälrnibee Dios, näjza xcuent Jesucrist. Xhidajl rebengejdxga huililajz rediidx nani gunii Felipe. Dxejcti birobnisreni, niguii näjza gunaa.

<sup>13</sup> Nägajcza Simón huililajz rediidxga dxejc gurobniszani. Dxejc gyunäj Simón Felipe. Che bahuii Simón lo redzunro, remilagwr nani cayujn Felipe, bidxeloduxh Simón.

<sup>14</sup> Che biejn diajg reapost ni yu' guedx Jerusalén huililajz reben Samaria xtidx Dios, baxhalreni Pedr näjza Juan ro'c.

<sup>15</sup> Che bidzujñ guiro'preni guejdxga, gunabreni lo Dios xcuent rebejn ni huililajzga te gudeed Dios Sprit Dxi xteni lojreni,

<sup>16</sup> sa'csi gajd Sprit Dxi xten Dios jädläjz neñ lastooreni. Che huililajzreni, guobnistisreni te gucbee rebejn chuni'c najc rexpejn Jesucrist.

<sup>17</sup> Dxejc batzuub Pedr näjza Juan ñaareni yejc teja renani ahuililajz xtidx Dios, dxejc badeed Dios Sprit Dxi xteni biädläjzni neñ lastooreni.

<sup>18</sup> Che bahuii Simón biädläjz Sprit Dxi xten Dios lastoo rebejn ni batzuub reapost ñaani yejcreni, rlajz Simón nudeedni meel loj reapost,

<sup>19</sup> räjpni lojreni:

—Colguniidx yälrbnee loä te si'cza gudzubä ñää yejc rebejn, te jiu' Sprit Dxi xten Dios neñ lastooreni.

<sup>20</sup> Dxejcti räjp Pedr lojni:

—jSunitloj xmeellu con luj! Xho gunlu xhigab siilu Sprit Dxi xten Dios nani rudedxlia' Dios.

<sup>21</sup> Digacdi gunlu dzuun ni riennu, sa'csi xhet laadi najc lastoolu nez loj Dios; yu' dojl neñ lastoolu.

<sup>22</sup> Basie'ch lajzlu, badzucäj rexhigab guiidx xtenlu. Guredx-gunab lo Dios, top susiäjł lajz Dios xtojllu ni bejnlu neñ lastoolu.

<sup>23</sup> Naj narä nanä ruguilazduxhlu, luxh runduxhlu xhigabguiidx.

<sup>24</sup> Dxejcti räjp Simón lo guiro'preni:

—Colñab loj Dios xcuentä te na'c sacä si'cni caniitu.

<sup>25</sup> Che gulujxti bijreni diidx xcuent ni bahuiløjreni bejn Jesucrist, che gulujx basule'reni xtidx Jesucrist loj reben Samaria, gubisacreni Jerusalén.

### *Felipe näjza te dade' ni siääd nación Etiopía*

<sup>26</sup> Dxejcti biääd te xangl Dios, räjpni lo Felipe:

—Huij lo nezyuj ni rii guedx Jerusalén, ni rij nez guedx Gaza. Nezyujga rdejd lo reyubijdz.

<sup>27</sup> Sä'ti Felipe. Che bidzujñni lo nezyujga, bidxaagni te dade' ni siääd nación Etiopía. Najcni te eunuco, najczani xcuxhtis reina Candace. Laani rgucheeni guiraa xmeel reinaga. Biääd dade'ga guedx Jerusalén te sagajñni Dios.

<sup>28</sup> Siädbisacni lajdxni. Sobga'ni neñ te gare't saruduxh, cayolni xtidx Isaías, nani bacuaa xtidx Dios agujc xchero.

<sup>29</sup> Dxejcti räjp angl xten Dios lo Felipe:

—Gubig cuä' gare'tga, guninäj dade'ga.

<sup>30</sup> Che gubig Felipe cuä' gare'tga, biejn diajgni cayol dade'ga rextidx Isaías. Dxejcti räjp Felipe lojni:

—¿La racbeelu ni caj lo guiitz nani cayollu, ä?

<sup>31</sup> Dxejcti räjp dade'ga lojni:

—¿Xho gacheäni palga rut gusule'dini loä?

Sas räjp dade'ga lo Felipe chä'pni neñ gare'tga.

<sup>32</sup> Cadro cayol dade'ga neñ guiitz ni caj xtidx Dios rnii scree:

Di xiil cuedxa' che rinä bejnni cadro guetni;

dxitis raa xiil che ruhuajrenini.

Si'c te xiil najc niguiire,

xhet rniidini mase rusacsíduxhrenini.

<sup>33</sup> Basacsíduxhrenini.

Reguxhtis ni niujñ yälguxhtisni xhet laliidi bejnreni.

Xhet si'cti nunyäjł gunreni.

¿Xho guiniinu yu' xpejnñi?

Ni abagu'trenini. Diruni guibajñ lo guedxliuj.

<sup>34</sup> Dxejcti gunabdiidx beñ Etiopía, räjpnj lo Felipe:

—Gunilaa loä, chuni'c ruzä't niguui nani bacuaa reguijtzre, ¿la ruzä'tni lagajc laani o la ruzä'tni ste'ca bejn, ä?

<sup>35</sup> Gusloj basule' Felipe rediidx nani abıl dade'ga. Dxejcti basule'ni rediidx xcuent Jesucrist.

<sup>36</sup> Lał ni sääreni lo nezyuj, bidzujñreni te lajt cadre yu' nis. Dxejc räjpnj dade'ga lo Felipe:

—ıBahuii, ree yu' nis! ¿Xhi rudxojn tiobnisä?

<sup>37</sup> Dxejc räjpnj Felipe lojni:

—Palga rililajzlu xtidx Dios neñ lastoolu, sajc tiobnislu.

Dxejc räjpnj dade'ga lo Felipe:

—Rililazä Jesús najc Crist Xi'n Dios.

<sup>38</sup> Dxejc gunibee dade'ga gusudxi gare't, sas biäjt guiro'preni, biu'reni neñ nis, ro'c batiobnis Felipe dade'ga.

<sup>39</sup> Che biriireni neñ nis, huinä Sprit Dxan xten Dios Felipe ste'ca lajt. Dxejc diru dade'ga nuhuii lo Felipe. Sä'ti dade'ga lajdxni, cabalazduxhni.

<sup>40</sup> Dxejcti chela guebee Felipe abidzujñni guedx Azoto. Baluizani xtidx Dios neñ guiraa reguejdx che bidzujñlini guedx Cesarea.

## 9

### *Huililajz Saulo rextidx Jesucrist*

*(Hch. 22:6-16; 26:12-18)*

<sup>1</sup> Laltis cagusacsı Saulo rexpejn Jesucrist. Rlajzni ju'tni guiraareni, ni'c huijni lo bixhojz nani rnibee,

<sup>2</sup> gunabni gac te guijtz chanäni lo reguidoo neñ guedx Damasco te palga guidxälni reni najc xpejn Jesucrist neñ reguidooga, niguui sigac gunaa, guliibnireni, jädnänireni guedx Jerusalén te jäüreni.

<sup>3</sup> Lał sasajni lo nezyuj, asiäddzũgajxhni guedx Damasco, basaniya' te bal xhaguibaa, basanijni guideb gabi cadre siädsaj Saulo.

<sup>4</sup> Dxejc biajbni lo yuj, biejn diajgni te xse' bejn nani canii lojni:

—Saulo, Saulo, ¿xhicuent rusacsılu narä, näjza rexpeña?

<sup>5</sup> Räjpnj Saulo lojni:

—¿Chuluj Dad?

Räjpnj lo Saulo:

—Narä nacä Jesucrist, nani cagusacsıduxhlu. Niluxh lagajc luj cadejdlu trabajw si'c rajc te gon ni rucuanı' yejc caru'ch.

<sup>6</sup> Bidxebduxh Saulo, racsejsni räjpnj:

—Dad, ¿xhini'c rlajzlu gunä?

Dxejc räjpnj Jesús loj Saulo:

—Huistie, biu' guedx Damasco. Ro'c suluii te niguui xhini'c gunlu.

<sup>7</sup> Rebejn ni siädnä Saulo sugadxireni, bidxejbreni sa'csi biejn diajgreni te xse' bejn, luxh rut lojdi bahüireni.

<sup>8</sup> Che huistie Saulo lo yuj, baxhalni lojni, niluxh di lojni jien. Dxejc gunaazreni naani, sanärenini guedx Damasco.

<sup>9</sup> Ro'c guyu'ni choñ dxej, natiä'p balojni, dini niä', dizani niajw.

<sup>10</sup> Guedx Damasco rbäjz te xpejn Jesucrist ni laa Ananías. Baluiloj Jesucrist loj Ananías lo te bacał, räjpnj Jesucrist lojni:

—Ananías.

Dxejc räjpnj Ananías lojni:

—Anaree Dad.

11 Räj̄p Jesucrist lojni:

—Huistie te chäälu lo nezyuj ni laa Ladbee cad rbäjz Judas. Ro'c guiniabdi-dxlu con te niguii ni laa Saulo, ben Tarso. Cabejdx, canabni loä naj.

12 Lo bacal abahuiini siäd te niguii ni laa Ananías te gutzuubni naani yejcnj te fiini stehuält.

13 Dxejcti räj̄p Ananías lojni:

—Dad, abiejn diagä xho basacsí niguiiga rexpejnlu nen guedx Jerusalén.

14 Luxh rebixhojz ni rnibee abadeed guijt̄z lojni te guiniaazni ree guiraa rebejn nani rbedx-rniab lojlu, chanänireni jäüreni.

15 Dxejcti räj̄p Jesucrist lojni:

—Huij, narä aguleäni te gunni xtzunä. Suluiini xtidxä loj rebenzijt nani digac xpen Israel, näjza loj reni rnibee renacion, näjza loj rexpejn Israel.

16 Narä suluiä lo Saulo trabajwduxh ni tedni te jäädnajl̄ni narä.

17 Dxejcti säa Ananías, bidzuj̄n̄ni ro yu' cadro rbäzlaa Saulo. Batzuubni naani yejc Saulo. Dxejcti räj̄p Ananías loj Saulo:

—Betzä Saulo, Jesucrist ni rnibee, nani baluiloj lojlu lo nezyuj cheni siädälu, lagajc laani baxhal̄ni narä te fiilu stehuält, te jäädläjz̄za Sprit Dxan xten Dios nen lastoolu.

18 Lagajc dxejc bitejb si'c xmelbäj̄l yec baloj Saulo, biacgajc balojni, bahuisa'cni stehuält. Dxejc huistieni, gurobnisgajcni.

19 Dxejc gudajwni, guc nadaanni stehuält. Xchej guyunäj Saulo rexpejn Jesucrist nen guedx Damasco.

### *Gusloj basule' Saulo xtidx Dios nen guedx Damasco*

20 Dxejcti gusloj basule' Saulo xtidx Dios nen reguidoo xten rexpejn Israel, räj̄pni:

—Jesucrist najc Xi'n Dios nani gujc Niguii.

21 Che biejn diajgreni xtiidxn̄i, bidxelojreni, räj̄p lo sa'reni:

—¿La xhet laadi niguiire ni rusäu rexpejn Jesucrist nen latzguib guedx Jerusalén, ä? Lagajc̄za dee bidzuj̄n̄ ree te guliibni rexpejn Jesucrist te chanänireni guedx Jerusalén lo rebixhojz.

22 Dxejcti gusutzu'tz Saulo guniini xtidx Dios. Basacaj̄n̄ni rexpejn Israel nani rbäjz Damasco sa'csi basule'pacni Jesús najc Crist nani rnibee.

### *Baxun Saulo guedx Damasco*

23 Che gudejd xhidajl dxej, bachagsa' rexpejn Israel te nugu'treni Saulo.

24 Dxejcti guchee Saulo xhi xhigab bejnreni. Dxej, yääl cabäjzreni Saulo ro' guiraa renezyuj ni rdzuj̄n̄ guejdxga te ju'trenini.

25 Dxejcti che gojl̄ te yääl basäl̄ rexpejn Jesucrist Saulo nen te dximro, basiäjtreni dxijmga nez ro' te padeer ni dejd gabi guejdxga. Basiäjtrenini nez dejt̄z padeerga, te si'c baxun̄ni guejdxga.

### *Bidzuj̄n̄ Saulo guedx Jerusalén*

26 Che bidzuj̄n̄ Saulo guedx Jerusalén, r̄lajz̄ni nuchaagni loj reni rililajz̄ xtidx Jesucrist, niluxh guiraareni bidxj̄brenini sa'csi direni gan ahuililajz̄ni xtidx Dios.

27 Dxejcti huiinä Bernabéni lo reapost, bijni diidx xcuent Saulo. Räj̄p Bernabé lojreni:

—Baluiloj Jesucrist lo Saulo loj nezyuj. Guninäj Xtioznu Saulo loj nezyuj, ni'cni gusutzu'tz Saulo basule'ni xtidx Jesucrist guedx Damasco.

28 Dxejc bia'n Saulo guedx Jerusalén, bidxaagni lo rexpejn Jesucrist.

<sup>29</sup> Dxejcti gusutzu'tz Saulo gusloj bijni xtidx Jesucrist lo rebejn. Dxejcti gudilnäj Saulo rexpejn Israel nani rnii didx griegw. Laareni rdxechduxhrenei, rlanjrenei nugu'treni Saulo sa'csi direni nichagljajz xtidx Jesucrist.

<sup>30</sup> Che gucbee rexpejn Jesucrist si'c, huinäreni Saulo guedx Cesarea, ro'c gulääreni Saulo, baxhalrenini guedx Tarso.

<sup>31</sup> Dxejc guredxi lajz guiraa renani huililajz xtidx Dios neñ reguedx Judea, neñ reguedx Galilee, näjza neñ reguedx Samaria, sa'csi diru Saulo nusacsı rexpejn Jesucrist, luxh guc xhidajlrureni. Basoobreni xtidx Jesucrist, bisieedrureni rextiidxni, gucnäjza Sprit Dxan xten Diosreni.

### *Biajc Eneas*

<sup>32</sup> Che gusloj sahuıi Pedr guiraa renani huililajz xtidx Dios, huihuiizani rexpejn Jesucrist nani yu' guedx Lida.

<sup>33</sup> Ro'c bidxälhi te niguii ni laa Eneas. Agujc xhujn ıjz naga' niguiiga cayacxhuuni. Abixu'ñ tiejxhni, digacdiru guiliini.

<sup>34</sup> Dxejcti räjp Pedr lo Eneas:

—Eneas, cagusiajc Jesucrist guejblu. Huistie, guläs xta'lu.

Lagajc dxejc biajcnı, huıstietini.

<sup>35</sup> Guiraa rebejn ni rbäjz guedx Lida, näjza rebeñ ni rbäjz guedx Sarón, bahuiireni abiajc niguii ni cayacxhuu. Dxejc xhidajlrureni neñ reguejdxga huililajz xtidx Dios.

### *Gubansac Dorcas*

<sup>36</sup> Neñ guedx Jope yu' te gunaa ni laa Tabita; rniizarenini Dorcas con xtidx griegw. Gunaaga huililajz xtidx Dios, rudeedzani xhi rquiin rebenproob, najczani huenduxh loj chutis bejn.

<sup>37</sup> Gucxhuu gunaaga, dxejc gujtni. Che gulujx bahuajz rebejn togoolga, huitixhrenei neñ te yu' ni najc jıaa yejc sa'ni.

<sup>38</sup> Sa'csi gajxh guedx Jope tre' guedx Lida, luxh biejn diajg rexpejn Jesucrist ro'c yu' Pedr, baxhalreni tiop dade' saxii Pedr. Räjp redade'ga loj Pedr:

—Bejn huen salu chonnu Jope nanajga.

<sup>39</sup> Dxejc sanägajc Pedr redade'ga. Che bidzujnrenei, huinäreni Pedr neñ yu' cadro naga' togunaaga. Ro'c cayonduxh guiraa regunabiıud, baluiireni lo Pedr guiraa rexhajbreni nani benchee Dorcas, ni badeed Dorcas lojreni che nabajnni.

<sup>40</sup> Dxejcti gunıbee Pedr birii guirareni neñ yu'. Dxejc bazuxhıjbni, guredxgunabni loj Dios. Dxejc gubiréni bahuıini loj togoolga, räjpni:

—Tabita, huistie.

Dxejcti baxhal gunaaga balojni; che bahuıini loj Pedr, gurejni.

<sup>41</sup> Dxejc gunaaz Pedr ñaani, basuliinini, dxejcti gurejdx Pedr regunabiıud näjza sgaıı reni najc rexpejn Jesucrist. Baluiini gunaaga lojreni te bahuıilorenı agubansacni.

<sup>42</sup> Gucbegajc rebeñ guedx Jope xhini'c gujc, dxejcti xhidajl rebejnğa huililajz xtidx Jesucrist.

<sup>43</sup> Xchejza guyu' Pedr ro'c, guläjzni rolıjz dade' ni laa Simón, nani ruscoodz guıjđ.

## 10

### *Pedr con Cornel*

<sup>1</sup> Guedx Cesarea guyu' te niguii ni laa Cornel. Rnıbeeni te gayuu resoldaad lo te cuaa ni laa Italiano. Cornel najc beñzıjt, dini gac beñ Israel.

<sup>2</sup> Bensacduxh najc Cornel, nájza guiraa resa'ni, sacruduxh rusoobreni xtidx Dios. Rudeedni gojn lo reben proob xten Israel. Guixe-guixee rbejdx, rniabni lo Dios.

<sup>3</sup> Te dxej, si'cti rcachoṅ gudxej, si'c lo bcalaḷ bahuiini loj xangl Dios, rájpmi loj Cornel:

—¿Conlu Cornel?

<sup>4</sup> Che bahuii Cornel xangl Dios, bidxejbni, bidxelojmi, rájpmi lojmi:

—¿Xhini'c, Dad?

Dxejcti rájp angl xten Dios lojmi:

—Che rniilu lo Dios, riejn diajg Dios xtiidxlu, che rudeedlu meel lo reben proob, ruhuii Dios ni rujnlu, ni'cni rnalajz Dios luj.

<sup>5</sup> Naj baxhaḷ tiop niguii cháá guedx Jope te chaxiireni Simón Pedr.

<sup>6</sup> Rbájpmi rolijz te dade' ni laa Simón nani ruscoodz guijd. Rolijz Simón sojb gajxh ro' nisdoo. Simón Pedr gusule' xhini'c nanab gunlu.

<sup>7</sup> Che sii angl xten Dios, gule Cornel tiop mos xtenni nájza te xsoldaadni nani sanälajz Dios.

<sup>8</sup> Dxejc bij Cornel diidx lojreni xcuent ni gusajcni, dxejc baxhaḷni redade'ga guedx Jope.

<sup>9</sup> Che bara yääl, sääreni lo nezyuj. Asiäddzungajxhrene guedx Jope, pet si'cti läidxejmi. Lagajc orga huä'p Pedr yecyu' te guininäjmi Guejb Dios.

<sup>10</sup> Calanduxh Pedr, rlajzmi gauni. Laḷ ni cayujnreni xhi gauxhuejmi, gusloj canixcalmi.

<sup>11</sup> Bahuiini bixal xhaguibaa, bahuiizani biäjti te bariadro nani naliib guidap xi'ni. Siädjiätchäiimi gajxh nez loj Pedr.

<sup>12</sup> Neṅ bariaadga yu' guiraa reman ni yu' lo guedxliuj nani rsianäj guidap ni'ni, nájza renani rxeeb si'c bäl, nájza renani rutajt.

<sup>13</sup> Gunii Dios lo Pedr, rájpmi lojmi:

—Pedr, huisu te ju'tlu man gaulu.

<sup>14</sup> Dxejc rájp Pedr lojmi:

—Na'c Dad. Nunc gauä sa' remandxuudxga, abia'a dina gauä reman nani rniil xleilu najc mandxuudx.

<sup>15</sup> Gunisac Dios loj Pedr, rájpmi:

—Na'cru guiniilu nacdXuudx reman nani abasia.

<sup>16</sup> Che gujc choṅ huält gujc si'c, huä'psac bariaadga xhaguibaa.

<sup>17</sup> Laḷ ni cayujn Pedr xhigab xhichani'c säloj nani bahuiini, bidzujṅ reniguii ni baxhaḷ Cornel ro' yu'ga, sa'csi agunabdiidxreni caro rbájz Simón nani ruscoodz guijd.

<sup>18</sup> Che bidzujṅreni rolä'ga canabdiidxreni la ro'c rbájz te dade' ni laa Simón Pedr.

<sup>19</sup> Laḷ ni cayujn Pedr xhigab xcuent ni bahuiini, gunii Sprit Dxaṅ xten Dios lojmi, rájpmi:

—Bahuii, choṅ dade' caguiillu.

<sup>20</sup> Biäjti yejc yu're te jinälureni. Na'c gunlu xhi stee xhigab, sa'csi lagajc narä baxhaḷäreni lojlu.

<sup>21</sup> Dxejcti biäjti Pedr jiaaga, bidzujṅmi cadro suga' redade'ga, rájpmi lojreni:

—Narä nacä ni caguiiltu. ¿Xhi siäädttu?

<sup>22</sup> Rájpmi reniguiiga lo Pedr:

—Cornel, nani rniibee te gayuu soldaad, te bensac'c, te bejn ni rajṅ Dios, te bejn ni sanälajz rexpejn Israel, laani baxhaḷ nuure lojlu, sa'csi rájpmi angl xten Dios lojmi, jiojxiinu luj te jiejn diajgnu xtiidxlu.

<sup>23</sup> Dxejcti gurejdx Pedr rebejn̄ga, biu'reni neñ yu'. Ro'c bia'nreni te guxhijn̄. Che bara yääl, Pedr näjza sgaai beñ Jope ni najc xpejn̄ Jesucrist, sanä redade' ni baxhal̄ Cornel.

<sup>24</sup> Che bara yääl, bidzujñreni guedx Cesarea. Abatojp Cornel resa'ni näjza rexamigwni rolizni. Cabäjzreni guidzujñ Pedr.

<sup>25</sup> Che bidzujñ Pedr ro yu', huichagloj Cornelni, bazuxhijbni lo Pedr.

<sup>26</sup> Dxejc gunaaz Pedr ñaani, guläsnini, räjpni lojni:

—Huisulii, sa'csi narä nacä te niguiitis sigajc najclu.

<sup>27</sup> Cayuiireni diidx, biu'reni neñ yu'. Che biu'ni bahuii Pedr nadxagsa' rebejn̄ neñ yu'.

<sup>28</sup> Räjp Pedr lojreni:

—Anajntu xhi caj lo leii xten rexpejn̄ Israel: digacdi guchaag te xpejn̄ Israel loj benzijt nani digac xpejn̄ Israel, digacdiza jiu'ni rolizreni. Niluxh agunii Dios loä lo te bacal, te gacbeä digacdiru jiuä releiire. Abaluii Dios narä sajç guchagsa'ä chutis bejn̄.

<sup>29</sup> Ni'cni, che gurejdxtu narä biälgacä. Naj rniabdidxä, ¿xhicuent gurejdxtu narä?

<sup>30</sup> Dxejcti räjp Cornel loj Pedr:

—Gudajp dxej si'cti rcachon gudxej, cabedx-canabä lo Dios rolizä chela baluiloj te niguii najcw te ladnol ni rdimbicha'.

<sup>31</sup> Najni loä: “Cornel, che rbedx-rniabl̄u lo Dios, riejn̄ diajg Dios xtiidxlu, che rudeedlu meel lo rebeñ proob, racbee Dios, di lajzni jiäl̄ luj.

<sup>32</sup> Ni'cni naj baxhal̄ tiop dade' chää guedx Jope te chaxiireni Simón Pedr nani rbäzlaa roliz Simón ni ruscoodz guiid. Rolizjni sojb gajxh ro' nisdoo. Che guidzujñni, laani gusule'ni xtidx Dios lojtu.”

<sup>33</sup> Dxejc baxhalä chu biädxiilu. Xquixtiostelu biäädlu. Naj anadxagsa'nu ree nez loj Dios te jiejn̄ diajgnu rextidx Dios ni baniidxni lojlu guiniilu loonu.

### *Basule' Pedr xtidx Dios roliz Cornel*

<sup>34</sup> Dxejcti räjp Pedr lojreni:

—Naj gubeliä tebloj rinälajz Dios guiraa bejn̄; rebenzijt sigajc rexpejn̄ Israel.

<sup>35</sup> Niluxh rinälajz Dios chutis beñ guedxliuj nani ruzuxhijb lojni, nani rusooob rextiidxni, nani laaca nabajñ.

<sup>36</sup> Badeed Dios xtiidxni loj rexpejn̄ Israel, basule' Dios biääd Jesucrist te gac chanäläaznu Dios te cuedxilajznu, sa'csi Jesucrist rnibee guideb guedxliuj.

<sup>37</sup> Che gulujx baluii Juan ni rutiobnis xcuent yälrobnis, dxejc gusloj basule' Jesucrist xtidx Dios nez reguedx Galilee. La'tu najntu xho bire'ch xtidx Jesucrist guideb nez neñ reguedx Judea.

<sup>38</sup> Nancheetu xho badeed Dios yälrnibee loj Jesucrist, beñ Nazare't. Badeedza Dios Sprit Dxan xtenni te cuääzni neñ lastooni. Nancheetu xho bejn̄ni redzunro, remilagwr, basiajçni rebejn̄ nani caguteed beñdxab traba-jwduxh. Redzunroga bejn̄ni sa'csi bennäj Diosni dzuun.

<sup>39</sup> Bahuiloonu guiraa redzuun ni bejn̄ Jesucrist neñ reguedx Israel näjza guedx Jerusalén. Bacuaa rexpejn̄ Israel Jesucrist lo cruzj, ro'c gujtñi.

<sup>40</sup> Dxejcti che biojn̄ dxej, guläs Dios Jesucrist lo rebengut, gubansacni, badeed Dios yälrnibee lojni te gujc biädluiloj Jesucrist loonu.

<sup>41</sup> Di Jesucrist nuluiloj loj chutis bejn̄. Lojtis renani agule Dios gutie'ch diidx gubansac Jesucrist lo rebengut, loj reni'c baluilojni. Nuure nadxagnu loj reni'c gule Dios. Bidaunänuni, bidunnäänuni che gubansacni lo rebengut.

<sup>42</sup> Baxhal̄ni nuure chatie'chnu diidx loj guiraa rebejn, chosule'pacnu Dios gule Jesucrist te gacni juejz xte rebejbajn nājza xte rebengut.

<sup>43</sup> Galooli bacuaa renani gunii xtidx Dios lo guijtz, rājpreni: “Guiraa rebejn ni chaliłajz xtidx Jesucrist sudzucaj Dios xtojłreni.”

*Biādlajz Sprit Dxiān xten Dios neñ lastoo rebenzijt*

<sup>44</sup> Lal ni canii Pedr rediidxga, biādlajz Sprit Dxiān xten Dios neñ lastoo renani huililajz xtiidxni.

<sup>45</sup> Bidxeloj guiraa rexepejn Israel nani huinā Pedr sa'csi biādlajz Sprit Dxiān xten Dios neñ lastoo renani najc benzijt.

<sup>46</sup> Gucheerēni biu' Sprit Dxiān xten Dios lastoo rebenzijt sa'csi bejn Sprit Dxiān guniireni stee didxsaj nani gajdreni guisieed, calā'pzareni xpala'n Dios.

<sup>47</sup> Dxejcti rājpedr lo rexamiigwni:

—Chu laa ni gudxojn yālrobnis lo rebejnre, ni sigajc biādlajz Sprit Dxiān xten Dios neñ lastoonu, abiādlajzni neñ lastoo rebejnre.

<sup>48</sup> Dxejcti gunibee Pedr gurobnisreni te gacbee bejn najcreni xpejn Jesucrist. Dxejcti gunabreni loj Pedr jia'nni ro'c tiop-choñ dxej.

## 11

*Basule' Pedr xho biādlajz Sprit Dxiān xten Dios lastoo rebenzijt lo rexepejn Jesucrist neñ guedx Jerusalēn*

<sup>1</sup> Reapost, nājza renani huililajz xtidx Jesucrist neñ reguedx Judea, biejn diajgreni huililajz rebenzijt ni digac xpejn Israel xtidx Dios.

<sup>2</sup> Che bidzujn Pedr guedx Jerusalēn, rexepejn Israel nani rłajz chu guiraa rexepejn Jesucrist bee si'cni bejn toAbram, gudilnājreni Pedr.

<sup>3</sup> Rājpreni lo Pedr:

—¿Xhicuent biu'lu rolijz benzijt nani xhet yu'di bee si'c nuure? ¿Xhicuent gudaunājłreni, ā?

<sup>4</sup> Dxejcti basule' Pedr diidx xho gujc huijni loj rebenzijt:

<sup>5</sup> —Yu'ā guedx Jope. Cabedx-canabā lo Dios, dxejc si'c gunixcalā, bahuiā bixal xhaguibaa, siādjiājt te bariadro, naliib guidap xi'ni. Siādjiātchāiini nez loā.

<sup>6</sup> Che bahuisa'cā, neñga yu' guiraloj reman ni yu' lo guedxliuj nani rsianāj guidap ni'ni, renani rbājz neñ dajn, renani rxeeb si'c bāl, nājza renani rutajł.

<sup>7</sup> Dxejcti biejn diagā naj Dios loā: “Pedr, huisu. Bagu't man gaulu.”

<sup>8</sup> Dxejcti rāpā: “Digacdini Dad. Nicla tej gadna gauā te man nani rniī leii xtenlu najc mandxuudx.”

<sup>9</sup> Dxejc gunisac Dios loā: “Na'cru guiniilu nacdXuudx recos nani abasia Dios.”

<sup>10</sup> Che gujc choñ huāłt gunii Dios si'c, huā'psac bariaadga xhaguibaa.

<sup>11</sup> Lagajc orga bidzujn choñ dade' ro yu' cadro yu'ā. Guedx Cesarea biriireni, biādxiiireni narā.

<sup>12</sup> Dxejc gunii Sprit Dxiān xten Dios loā: “Huinā reniguiire. Na'c gun tiop lajzlu.” Dxejcti huināā xho'p beñ Jope, dade' nani rililajz xtidx Jesucrist. Che bidzunū guedx Cesarea, biu'nu rolijz Cornel.

<sup>13</sup> Basule' Cornel diidx loonu xho baluiloj te angl xten Dios lojni lagajc raliizni. Rājpedr angl xten Dios lojni: “Baxhal̄ tiop dade' chāā guedx Jope te chaxiireni Simón ni rniireni Pedr.

<sup>14</sup> Laani siniini xtidx Jesucrist te gacheelu con resa'lu xhini'c nanab gunlu te guslaa Dios la'tu lo rextojłtu.”



<sup>15</sup> Che gusloj cagusule'ä xtidx Dios lojreni, biu' Sprit Dxan xten Dios neñ lastooreni si'c biu'ni lastoonu galooli.

<sup>16</sup> Dxejcti banaj lazä rextidx Dad Jesucrist che najni: “Juan abatiobnis con nistis, biädla narä suxhalä Sprit Dxan xten Dios te cuääzni neñ lastootu.”

<sup>17</sup> Dxejc räjpza Pedr:

—Palga badeed Dios Sprit Dxan xtenni lojreni si'c baniidxni Sprit Dxan xtenni loonu che huililajznu xtidx Jesucrist, ¿chu narä? te niäpä lo Dios: “Na'c gudeedlu Sprit Dxan xtenlu lojreni.”

<sup>18</sup> Che biejn diajg reben Jerusalén rediidxga, biäuu ro'reni, dirureni ni-dilnä j Pedr. Alga gulä'preni xpala'n Dios, räjpreni:

—Näjza rebenzijt nani digac rexpejn Israel abasaan Dios gusiechljazreni te guibanäjreni Dios par tejpas.

### *Rexpejn Jesucrist ni yu' guedx Antioquía*

<sup>19</sup> Che gujt Esteban bire'ch renani huililajz rextidx Jesucrist. Bire'chreni lo yuj Chipre ni re' lo nisdoo, lo reguedx Fenicia, näjza lo guedx Antioquía sa'csi cadejdreni trabajwduxh. Basule'reni rextidx Jesucrist lojtis rexpejn Israel.

<sup>20</sup> Lojreni nadxaag gaii ben Chipre, näjza gaii ben Cirene. Redee bidzujn guedx Antioquía. Ro'c gusloj caniireni lo benzijt nani rnii didx griegw. Basule'reni lo rebenzijtga guiraa xcuent Jesucrist.

<sup>21</sup> Gucnä j Diosreni caniireni xtiidxni. Xhidajl rebejn ga huililajz xtidx Jesucrist, basoobreni xtiidxni.

<sup>22</sup> Che biejn diajg rexpejn Jesucrist ni yu' guedx Jerusalén rililajzreni, baxhalreni Bernabé guedx Antioquía.

<sup>23</sup> Che bidzujn Bernabé guedx Antioquía, bibalazduxhni che bahuiini xho cayunnäj Dios rebejn ga. Dxejcti balijdx Bernabéreni: gutijp lajzreni gusoobreni xtiidxtis Jesucrist.

<sup>24</sup> Bensa'c najc Bernabé. Rililazduxhni xtidx Jesucrist. Racnä jduxh Sprit Dxan xten Diosni. Xhidajl rebejn huililajz xtidx Jesucrist guejdxga.

<sup>25</sup> Che birii Bernabé guejdxga, huijni guedx Tarso satiilni Saulo.

<sup>26</sup> Che bidxälni Saulo, huinänini guedx Antioquía. Ro'c bia'nreni tebijz, bachagsa'reni renani huililajz te baluiireni xtidx Jesucrist lo xhidalduxh bejn. Ganid benguejdxga gulälaj “Cristianos” renani rililajz xtidx Jesucrist.

<sup>27</sup> Neñ redxejga birii gaii dade' nani rnii xtidx Dios. Guedx Jerusalén biriireni, bidzujnreni guedx Antioquía.

<sup>28</sup> Huisulii te dade'ga ni laa Agabo. Gucnä j Sprit Dxan xten Diosni te guniini siäd te gubijn guideb guedxliuj. Luxh gujc gubijnga neñ reijz ni gunibee rei Claudio ni sajru.

<sup>29</sup> Dxejcti rexpejn Jesucrist ni rbäjz guedx Antioquía bejn xhigab cade tejreni gudeed meel chää lo rexpejn Jesucrist ni rbäjz neñ reguedx Judea.

<sup>30</sup> Batojpreni meel, baxhalrenini lo reben gool ni rnibee rexpejn Jesucrist ro'c. Saulo näjza Bernabé huinä meelga che huijreni Judea.

## 12

### *Gujt Jacob, biäu Pedr neñ latzguib*

<sup>1</sup> Neñ redxejga, trabajwduxh bateed rei Herodes gaii rexpejn Jesucrist.

<sup>2</sup> Gunibeeni gujt Jacob betz Juan, biru' guejnni.

<sup>3</sup> Che bahuii Herodes bibalazduxh rexpejn Israel sa'csi bagu'tni Jacob, gunibeeni gunazgajczeni Pedr. Dee gujc neñ redxe lanij che rajwreni yätxtiil ni di saguij.

<sup>4</sup> Che gunaazreni Pedr, biäuni nen latzguiib. Gunibee Herodes biääd tajp cuaa soldaad cuanäjreni ro' latzguiib. Tapgaj soldaad cuanäj ro' latzguiibga cade xho'p or. Bejn Herodes xhigab cuääni Pedr te guetni nez loj rexpejn Israel che ted lanij.

<sup>5</sup> Yu'ti Pedr nen latzguiib, dxejcti durtis cabejdx, canab rexpejn Jesucrist lo Dios xcuent Pedr.

### *Gulää Dios Pedr nen latzguiib*

<sup>6</sup> Bidzujnti dxe bispr dxej ni rlanj Herodes nibää Pedr nez loj rexpejn Israel. Yääga nagayejs Pedr galäi tiop soldaad. Caden naliib guiro'p naa Pedr. Stiop soldaad canäj ro' latzguiib.

<sup>7</sup> Chela baluiloj te angl xten Dios, bianij te bajl nani basanij nen latzguiib. Dxejcti gunaazni xhajcw Pedr, basniibnini te gubajnni. Räjjni lo Pedr:

—Basquejnga, huistie.

Dxejcti bixec recaden, bitejbreni naa Pedr.

<sup>8</sup> Räj p xangl Dios lo Pedr:

—Gojt xhajblu, baläj xcura'chlu.

Si'c bejn Pedr, dxej räj xangl Dios lo Pedr:

—Gojt xhablajzlu, gudanajl narä —räjjni.

<sup>9</sup> Biriitini latzguiib sanajlni angl xten Dios. Niluxh dini gun xhigab guliipac nani bejn xangl Dios. Bejnini xhigab pet canixcalni.

<sup>10</sup> Gudejdreni nez loj te soldaad, gudedgajcreni nezloj steeni, dxej bidzujnreni ro' puertguiib xten latzguiib nani caj lo nezyuj ni rdejd galäi guejdxga. Xtebca bixal puertroga, biriireni gusajreni tebezyuj. Dxejcti te squin gunitloj xangl Dios. Xtebtis Pedr sasaj lo nezyuj.

<sup>11</sup> Dxejcti si'cni gubajñ Pedr, bejnini xhigab:

—Naj sii nanä baxhal Dios te xanglni baslaa narä ladznaa Herodes te digacdi gun rexpejn Israel nani rlanjreni gunnäjreni narä.

<sup>12</sup> Che gucbee Pedr xhi gusajcni, huijni rolizj Marii, xnan Juan ni rniireni Marcw. Ro'c nadxagsa' xhidajl rexpejn Jesucrist, cabedx-canabreni lo Dios xcuent Pedr.

<sup>13</sup> Cagusejz Pedr rolä', dxejc gubig te dxa'p ni laa Rode, bacuadiajgni ro lä'.

<sup>14</sup> Che biembee Rode xse' Pedr, sa'csi bibalazduxhni, biallajzni nuxhalni ro lä'. Alga baxunni biusacni nen yu', räjjni lojreni:

—Pedr suga' ro lä'.

<sup>15</sup> Dxejcti räjpreni lo Rode:

—Yeyclu cayajc.

Dxejcti duurtis gunii dxape'ga suga' Pedr ro lä'. Dxejcti räjpreni loj Rode:

—Xho gacni Pedr. Pet biejn diajglu gunii xangl Dios ni rcanäj Pedr.

<sup>16</sup> Dxejcti laltis cagusejz Pedr ro lä'. Che baxhalreni ro lä' bidxeloduxhreni bahuiireni lo Pedr.

<sup>17</sup> Dxejcti bazääb Pedr naani te na'cru jieyreni. Dxejcti bij Pedr diidx xho baxhal Dios ro' latzguiib. Dxejcti räjjni:

—Colchaye'tz lo Jacoob näjza lo rexpejn Jesucrist guiraa ni gusacä nayääl.

Dxejcti birii Pedr ro'c, huijni ste'ca lajt.

<sup>18</sup> Che bara yääl, rsldooru, bieiduxh resoldaad sa'csi direni gan xho gujc birii Pedr nen latzguiib.

<sup>19</sup> Gunibee Herodes huitiilreni Pedr, gunabdiidxzani lo resoldaad xho gujc birii Pedr, dxejcti gunibeeni gujt resoldaad ni cuanäj latzguiib che birii Pedr. Dxejcti birii Herodes reguedx Judea, xchej huijia'nni guedx Cesarea.

<sup>20</sup> Bachechduxh rebeñ Tiro nájza rebeñ Sidón Herodes, ni'cni diruni gusaan guto' rebeñ nez cadro rnibeeni xhi gau rebeñ Tiro nájza rebeñ Sidón. Ni'c biáad xhidajlreni te guiniabreni jiájł lajzni, te na'cru guidxe'ch Herodes lojreni. Abenxgaareni xamiigwreni Blasto, mos ni yu' lo reii Herodes, mos ni sajcu lo guiraa rexmos Herodes. Gunináj Blasto Herodes xcuentreni te na'cru guidxehnáj Herodes rebeñga.

<sup>21</sup> Basoobtini te dxej te guininájniireni. Dxejga gojt Herodes xhajn reiiini, gurejni lo xyacxhił reiiini. Dxejcti gosloj caniini didxsa'c loj rebeñga.

<sup>22</sup> Guredxa' rebeñ räjpreni lojni:

—Huenduxh najc diidxre. Guejblu najc te dios, xhet xtiidxi niguii najc diidxre.

<sup>23</sup> Lagajc dxej biáad te angl xten Dios, bejnni gosloj cayacxhuu Herodes, gudajw rebisiujg Herodes, gujtni sa'csi basaanni gunii rebeñ najcni te dios, sa'csi dini niliä'p xpala'n Dios.

<sup>24</sup> Xhidajł beñ bieñ diajgni xtidx Dios, huililajzreni xtidx Dios.

<sup>25</sup> Che gulujx badeed Bernabé nájza Saulo meel ni batojp rebeñ Antioquía lo rebeñgool, biriireni guedx Jerusalén. Sanäreni Juan ni rniireni Marcw lo guedx Antioquía.

## 13

### *Gule Sprit Dxan xten Dios Bernabé nájza Saulo*

<sup>1</sup> Lo rexpejn Jesucrist ni rdxaag sa' guedx Antioquía guyu' gaii niguii ni gunii xtidx Dios, nájza gaii niguii ni rusule' xtidx Dios loj guiraa rexpejn Jesucrist. Loj redee nadxaag Bernabé, náj Simón ni rniireni Negr; náj Lucio, beñ Cirene; náj Manaén ni gulanáj reii Herodes gujcti sa'csi bejtzni; nájza Saulo.

<sup>2</sup> Bidzujñ te dxej cagucua'nreni lał ni cabedx-canabreni lo Dios, dxej räj Sprit Dxan xten Dios lojreni:

—Cołcue Bernabé nájza Saulo te gunreni dzuun ni rlazä gunreni.

<sup>3</sup> Che gulujx bacua'nreni, che gulujxza guredx-gunabreni lo Dios, batzubenreni naareni yejc guiro'preni, te si'c baxhałreni Bernabé nájza Saulo te guluireni xtidx Dios ste'ca lajt.

### *Guro'preni baluii xtidx Dios lo rebeñ Chipre*

<sup>4</sup> Baxhał Sprit Dxan xten Dios Saulo nájza Bernabé guedx Seleucia. Ro'c biu'reni nen barcw, sääreni nez yuj ni tre' galäi nisdoo, ni laa Chipre.

<sup>5</sup> Che bidzujñreni Chipre, biu'reni guedx Salamina. Ro'c basule'reni xtidx Dios nen guiraa rexquidoo rexpejn Israel. Náj Marcw gucnäjreni.

<sup>6</sup> Che cuansajreni guideb yuj Chipre, bidzujñreni guedx Pafos. Ro'c bidxaagreni te niguii ni laa Barjesús. Najcni te bidxaa, najczani te xpejn Israel. Cagusgueeni rebeñ guejdxga, räjpnini xtidx Dios caniini, niluxh dini gac xtidx Dios.

<sup>7</sup> Bidxaare nu'ch lo rexpejn Sergio Paulo, nani najc gubernadoor xten Chipre. Nasinduxh Sergio Paulo. Gurejdxni Bernabé nájza Saulo, sa'csi rłajzni jiejn diajgni xtidx Dios.

<sup>8</sup> Dxejcti Barjesús, ni laaza Elimas, bidxagdijłni guiro'preni sa'csi di rłajzni chalilajz Sergio Paulo xtidx Dios.

<sup>9</sup> Saulo, nani laaza Pabl, bahuitzu'tz loj Barjesús. Batijp Sprit Dxan xten Dios lastoo Pabl, räjpnini loj Barjesús:

10 —Rusgueduxhlu rebejn, najclu benlatsiaj, benguidxduxhlu, najclu xi'n Satanás, bendxab ni rnibee. Rdxehnájzalu guiraa recossa'c xten Dios. ¿Guc cuääz guxhiidlu xtidxlii Jesucrist te di chalilajz bejn xtidx Jesucrist?

11 Naj siääd xcastiigw Dios yejclu. Xhidajl dxej sicäy lojlu, xhetliidi filu —räjp Pabl.

Gujcsi räjpni si'c, bicäigajc lojni. Dxejctiru cuansajni caguuilni chu guiniaaz naani guluiini canejz chääni.

12 Che bahuii Sergio Paulo xhi gusajcni, huililajzni xtidx Dios, sa'csi bidxeloduxhni xcuent xcäl'ruluii Dios.

*Bidzujn Pabl näjza Bernabé guedx Antioquía xten distrit Pisidia*

13 Che baluux Pabl näjza resa'ni xtuunreni guedx Pafos, biu'reni nen barcw, gudejdreni lo nisdoo, sääreni guedx Perge nen estad Panfilia. Che bidzujnreni guejdxga, gubisac Juan, ni rniireni Marcw, Jerusalén.

14 Dxejcti birinäj Pabl resa'ni guedx Perge, sääreni guedx Antioquía nen distrit Pisidia. Dxejc te dxe sabd, dxej ni rusilajz rexpejn Israel, biu'reni nen xquidoo rexpejn Israel, ro'c gurejreni.

15 Che gulujx bil te dade' reguijtz xten Dios ni laa leii näjza reprofet, baxhal reguxhtis xten guidoo chu huigajjnreni, räjpreni lo Pabl näjza Bernabé:

—La'tu sa'nu, palga rajptu te diidx ni gulijdx rebejnre, colguiniini.

16 Dxejc huisulii Pabl, guläsni naani bejnni seen lo rebejn te cuadiajgreni xtiidxni. Räjp Pabl lojreni:

—Colcuadiajg, la'tu rexpejn Israel, guiraatu ni rajn Dios.

17 Galooli gule Xtios rexpejn Israel retoxtadgoldoonu. Luxh che guläjzreni nación Egipto, bidalduxh retoxtadgoldoonu. Gucnäjduxh Diosreni bejnni remilagwr; te guläänireni guedx Egipto.

18 Tiuu ijz guläjzreni lo reyubijdz. Xhidajl huält direni nusoob xtidx Dios, niluxh empac gucnäjza Diosreni.

19 Guyu' gajtz nación guläjz nen reyuj ni laa Canaán. Dios bejn gunitloj reguejdxre, te gudisni reyujga loj retoxtadgoldoonu.

20 Dxejcti badeed Dios reniguii ni gujc juejz, gunibeereni rebejn. Tajp gayugarol ijz gunibeereni rexpejn Israel. Samuel nani gunii xtidx Dios gujc lult juejz.

21 Dxejcti gunab rexpejn Israel te reii lo Dios te guinibee reiiga lojreni. Badeedti Dios Saúl xi'n Cis, sa' toBenjamín. Gunibeeni tiuu ijz.

22 Che badzucaj Dios Saúl, badeedni gunibee to'reii David. Räjp Dios: “Agucbeä David xi'n Isai rujn tejsi xhigab con narä. Susoobni xtidxä sujnni guiralii ni rlazä gac.”

23 Räjpza Pabl:

—Galooli bia'n diidx lo rexagdoo David guxhal Dios te bejn ni gudzucaj xtojlnu, ni guslaa nuure lo dojl. Naj aguzojb diidxga. Jesucrist najc bejnğa, rudzucajni xtojlnu, ruslaani nuure lo dojl.

24 Che gusloj cagulijdx Juan rebejn, baluiini nanabpac gusiechlaz rexpejn Israel, tiobnisreni te jia xtojlni.

25 Niluxh guxii riäädx guluux Juan dzuun ni badeed Dios gunni che räjpni lo rebejn: “¿Chu rujntu xhigab nacä narä? Dina gacä Crist nani bia'n diidx guxhal Dios. Colhuii, detzä siääd tej ni sacduxhru loä; nicla gac surloä te cuää xcura'chni.”

26 Räjpza Pabl:

—Rniä lojtu sa'ä, rexagdo toAbram, näjza lo chutis ni rajn Dios, loonu baxhal Dios xtiidxni ni rusule' xho rudzucaj Jesucrist xtojlnu, xho ruslaani nuunu lo dojl.

<sup>27</sup> Rebejn Jerusalén, näjza renani rnibeereni, direni niembee Jesucrist nani rnibee, dizareni niacbee diidx xcuent Dios nani bacuaa reniguii ni gunii xtidx Dios agujc xchero, luxh rolreni xtidx Diosga gasob sabd. Niluxh che bagu'treni Jesucrist, guzobj xtidx Dios ni caj lo guijtza.

<sup>28</sup> Baliidxreni Pila't ju'tni Jesucrist, luxh xhet bejndini te guetni.

<sup>29</sup> Che bagujc guiraa ni caj lo guijtzc xcuent Jesucrist, gulätreni Jesucrist lo cruzj, bacua'tzrenini neñ baa cuä' te guilaj.

<sup>30</sup> Dxejcti guläs Dios Jesucrist lo rebengut.

<sup>31</sup> Balti huält baluiloj Jesucrist lo rexamigwni nani biädnajlmi nez rexyuj Galilee, renani biädnajlzani nez guedx Jerusalén. Bahuilojreni gubansac Jesucrist lo rebengut, te naj rusule'reni diidx xcuent Jesucrist.

<sup>32</sup> Naj siopnänu xtidx Diosre lojtu te guibalajztu. Agujc xchero bia'n Dios diidxre con retoxtaggoldoonu.

<sup>33</sup> Guläs Dios Jesucrist te huile' diidxga par nuure, rexagdooreni. Agujc xchero gunii Dios te diidx ni caj neñ Salmo ni bacuaa toDavid. Lo Salmo ni rojp räjp Dios: “Luj najclu xi'nä. Nadxej guleälu te guinibeelu.”

<sup>34</sup> Räjpza Pabl:

—Dxejcru stee lajt caj xcuent ni guläs Diosni lo rebengut te nuncru guetni. Scree bacuaa te niguii, räjp Dios: “Sunidxä recossa'c lojlu si'c ni bia'nä diidx con toDavid.”

<sup>35</sup> Ni'cni bacuaaza toDavid neñ stee Salmo ni gunii Dios, guniini: “Dipaclu gusaan gudx tiejxh Xi'nlu nani sanälajzlu.”

<sup>36</sup> Che gulujx gunibee toDavid lo retoxtaggoldoonu, si'cni badeed Dios gunni, dxejc gujtni. Biga'tznäjni retoxtaggoldooni. Niluxh guyujdx tiejxh toDavid.

<sup>37</sup> Niluxh guläs Dios Jesucrist lo rebengut, ni'c di tiejxhni niujdx.

<sup>38</sup> Ni'cni colyacbee, la'tu resa'ä, Jesucristre, bejn ni caniä xcuentni, laani rudzucajni rextojlnu.

<sup>39</sup> Chutis ni rililajz xtidx Jesucrist ruslaa Jesucristni loj guiraa rextojlni nani digacdi guibicaj mascä rusoobni guiralii ni caj lo leii xten toMoisés.

<sup>40</sup> Colsusin te na'c sajctu recos ni caj lo guijtzc ni bacuaa te niguii nani bacuaa xtidx Dios:

<sup>41</sup> Colhuilaa, la'tu ni ruxhiznäj xtidxä colguidxeloj, colnitloj, sa'csi naj ni nabajntu sunä te dzunro, te milagwr nez lojtu, niluxh dipac lajztu chalii, mascä jääd chu gusule'pacni lojtu.

<sup>42</sup> Gulujxti xtidx Pabl, biunejz rebejn. Che birinäj Pabl Bernabé biädni rebejnre lojreni, räjpreni:

—Jiädsactu ste xmaan te gusule'rutu rediidxre loonu.

<sup>43</sup> Che care'ch rebejnğa, xhidajl rexpejn Israel, näjza xhidajl rebenzajt nani rusoob xtidx Dios si'c rujn rexpejn Israel, birinajlreni Pabl näjza Bernabé. Dxejc balijdxreni rebejn ni siädnajlreni, räjpreni lojreni chanuutis chalilajzreni didxlii xcuent Jesucrist.

<sup>44</sup> Che gojlti stee sabd, dxej ni rusilajz rexpejn Israel, xhidalduxh rebenuejdx bire' te gucudiajgreni gunii Pabl xtidx Dios.

<sup>45</sup> Che bahuii rexpejn Israel guiraa rebejn ni bire', bidxechlajzreni, gucnadareni. Dxejc gusloj cadxagdi]l rexpejn Israel Pabl. Che rmiini te diidx,

laareni rniireni “didxxhiini”. Caniyazareni Pabl nájza Bernabé, caguereni lojreni.

<sup>46</sup> Luxh di Pabl niclaza Bernabé nidxejb. Gusutijptisreni, rájpreni lo rebejn: —Nungäjł ganid lojtu guiniinu xtidx Dios, sa'csi la'tu najctu rexpejn Israel. Niluxh ditu chalilajz xtidx Dios, lagajc la'tu caniiu digacdi guibannájtu Dios par tejas. Ni'c sibiré loonu, te guiniinu xtidx Dios lo rebenzajt ni digac xpejn Israel.

<sup>47</sup> Sa'csi si'c agunibee Xtiosnu. Scree caj xtidx Dios lo guijt: Suxhalātu te guluiulu rextidxā lo rebenzajt ni digac xpejn Israel, te chalilajz rebejnğa xtidxā, te laareni lo xtojłreni, cadrotis yu'reni lo guedxliuj, rájř Dios.

<sup>48</sup> Che biejn diajg rebenzajt rediidxre, bibalazduxhreni, gulā'preni xpala'n xtidx Dios. Renani gule Dios galooli huililajz xtidx Dios. Xhidajł najcreni.

<sup>49</sup> Bire'ch xtidx Dios guideb nez reguejdxga.

<sup>50</sup> Dxejc rexpejn Israel balijdx regunaa ni sajcro, nájza reniguii ni sajcro neñ guedx Antioquía, te bidxechnājreni Pabl nájza Bernabé, barilaagwreni Pabl nájza Bernabé te biunejzreni guedx Antioquía.

<sup>51</sup> Dxejcti Pabl nájza Bernabé gubijb guxhuj ni'reni si'c te seen te gacbee rebejn xhet laadi bejnreni. Sā'tireni guedx Iconio.

<sup>52</sup> Baspaa Dios lajz rexpejn Jesucrist guedx Antioquía xten Pisidia. Bazuti-pja Sprit Dxan xten Dios lastooreni.

## 14

### *Guyu' Pabl náj Bernabé guedx Iconio*

<sup>1</sup> Che bidzujł Pabl nájza Bernabé guedx Iconio, biu'reni xquidoo rexpejn Israel. Basule'reni xtidx Dios lo rexpejn Israel nájza lo rebenzajt. Xhidajł rebejnğa huililajz xtidx Dios.

<sup>2</sup> Niluxh sgaii rexpejn Israel nani di chalilajz xtidx Jesucrist balijdx rebenzajt te bidxechnājreni rebejn nani huililajz xtidx Jesucrist.

<sup>3</sup> Ni'cni bia'n Pabl nájza Bernabé lo guejdxga balti dxej. Gusutz'u'tz guiro'preni guniireni xtidx Jesucrist. Badeed Dios bejnreni redzunro, remi-lagwr xcuent xcälřnibee Dios te bahuui bejn cayacnāj Diosreni.

<sup>4</sup> Guyu' tiop cuaa bejn neñ guejdxga. Gala' guejdxga huililajz xtidx Dios nani gunii Pabl nájza Bernabé,

<sup>5</sup> dxejc sgala' guejdxga bacuadiajg xtidx rexpejn Israel. Dxejc bire' te cuaa rexpejn Israel, nájza benzajt, nájza reguxhtis, rłajzreni nidxagdijłreni reapost, rłajzzareni nucuaareni guij yejc Pabl nájza Bernabé.

<sup>6</sup> Dxejc gucbeereni xhi rłajzreni gunreni, ni'c baxunreni ro'c huijreni nez reguedx Licaonia, ro'c bidzujłreni guedx Listra, guedx Derbe, nájza reguejdx ni re' nejzga.

<sup>7</sup> Che bidzujłreni ro'c, cadrotis huijreni basule'reni xtidx Dios.

<sup>8</sup> Guedx Listra guyu' te niguii ni digacdi sa, che gojłłini racxhuu ni'ni.

<sup>9</sup> Cagucuadiajg niguiiga xtidx Pabl. Che bahuui Pabl lojni, gucbee Pabl rililajz niguiiga xtidx Dios, rililajzzani sajç gusiajç Diosni.

<sup>10</sup> Dxejcti dip gunii Pabl lojni, rájřpni:

—įHuisulii!

Dxejcti huisuyäl'ni, gusajni.

<sup>11</sup> Che bahuui rexpejn Licaonia xhi bejn Pabl, lagajc xtiidxreni guniireni, rájřreni lo sa'reni:

—;Redios abiädluiloj loonu si'c niguii!

<sup>12</sup> Gulälajreni Bernabé Júpiter, si'c laa tej rextiosreni. Dxejcti Pabl gulälajreni Mercurio, si'c laa stee rextiosreni, sa'csi laani rniiruni lo guiro'preni.

<sup>13</sup> Dxejcti te bixhojz xten xquidoo Júpiter cua' tiop gon najl guii guejnreni. Biädnäni rögonga ro' xquidoo Júpiter ni suga' ro' guejdxga. Rebejn näjza bixhojz rläjzreni nugu'treni regon te ganreni Bernabé näjza Pabl si'c rajnreni rextiosreni.

<sup>14</sup> Che biejn diajg reapost xhi cayajc, batiäjsreni tla' xhajbreni si'c te seen direni guichaglazj xhi cayujn rebejnğa. Ruxunreni bidzujnreni lo rebejn, räjpreni lo rebejn:

<sup>15</sup> —Coľcuadiajg xtiidxnu. ¿Xhicuent cayujn guebju recosre? Ni lagajc sabejntu najcnu, lagajc bejn guedxliuj najcnu. Rusule'nu xtidx Dios lojtu te lacuaa ruzuxhijbtu lo redios ni runchee bejn, guzuxhijbtu lo Gueb Dios ni nabajn par tejpas, ni benchee xhaguibaa näjza guedxliuj, näjza nisdoo, näjza guiralii ni yu' lojreni, nenreni,

<sup>16</sup> Galoo basaan Diosga gun rebejn guedxliuj si'ctis ni rläjzreni.

<sup>17</sup> Huen najc Dios, rudeedni nisguij, rudeedni rajc xhi rajw rebejn, rdxaj xque'reni, rbaa lajzreni. Ni'cni riembepacnu yu' Dios.

<sup>18</sup> Xhidajl diidx guniireni te chäii bejnreni gaan guredxi rebejn, sa'csi rläjzpac rebejn nugu'treni regon.

<sup>19</sup> Dxejcti bidzujn gaii xpejn Israel siädreni guedx Antioquia näjza guedx Iconio. Baquillreni rebejn Lистра te gucuaareni guij yejc Pabl. Bacuaareni guij yejc Pabl, gudobxhajxhrenini guläärenini ro' guejdxga, sa'csi naareni agujtni.

<sup>20</sup> Dxejc laľ ni suga' rexpejn Jesucrist guideb gabi cadro naga' Pabl, huistieni, biusacni guejdxga. Che bara yääl, huinäni Bernabé sääreni guedx Derbe.

<sup>21</sup> Che bidzujnreni guejdxga, basule'reni rextidx Dios lo rebejnğa. Xhidajlreni huililajz xtidx Dios. Dxejc gubi'reni, biu'reni guedx Lистра, näjza guedx Iconio, näjza guedx Antioquia.

<sup>22</sup> Balijdxreni rebejn nani huililajz xtidx Dios, gucnäjreni rebejnğa te batiplajz rebejnğa, räjpreni lo rexpejn Jesucrist:

—Coľsnaj lajztu xtidx Dios. Susacsí rebejn la'tu, sidejdtu trabajw te jiu'tu cadro rñibee Dios.

<sup>23</sup> Dxejcti gule reapost gaii dade' ni najc bengool te fiireni rexquidoo xpejn Jesucrist. Che gulujx bacua'nreni, laľ ni guredx-gunabreni lo Dios, basadiidxreni rebejn, räjpreni: “Gacnäj Jesucrist la'tu ni huililajz xtiidxni.”

### *Gubisac guiro'preni guedx Antioquia xten Siria*

<sup>24</sup> Che gudejd Pabl näjza Bernabé distrit Pisidia, bidzujnreni estad Panfilia.

<sup>25</sup> Basule'reni xtidx Dios lo reben Perge, dxejcti biriireni ro'c sääreni guedx Atalia.

<sup>26</sup> Che bidzujnreni guejdxga, biu'reni nen barcw, gudejdreni lo nisdoo te bidzujnreni stee guejdx ni laaza Antioquia. Ni'c najc guejdx ni biriireni che sääreni. Lo guejdxre yu' rexpejn Jesucrist ni gunab lo Dios xcuentreni, gacnäj Diosreni, baxhaľreni Pabl näjza Bernabé chasule'reni xtidx Dios nen guiraa reguejdx. Naj abaluux Pabl näjza Bernabé dzuunga.

<sup>27</sup> Che bidzujnreni guejdxga, bachagsa' rexpejn Jesucrist. Dxejcti bijreni diidx lo rebejnğa guira'ti ni bennäj Dios laareni, näjza xho badeed Dios huililajz rebenzajt nani digac rexpejn Israel.

<sup>28</sup> Xchej biannäjreni rexpejn Jesucrist ro'c.

## 15

*Bidxagsa'zareni nen guedx Jerusalén*

<sup>1</sup> Nen redxejga bidzujñ gaaí dade' ni siääd nez Judea, caguluiireni rexpejn Jesucrist, räjpreni lojreni:

—Palga ditu gusäl bee si'c gunibee toMoisés, di Dios guslaatu lo xtojltu.

<sup>2</sup> Che biejn diajg Pabl näjza Bernabé rediidxga, bidxagdijñreni redade'ga. Dxejc gule rexpejn Jesucrist Pabl näjza Bernabé näjza sgaaí rexpejn Jesucrist cháäreni guedx Jerusalén te guininäjreni reapost näjza rebengool te guidon xho gac xcuent beega.

<sup>3</sup> Huisunejz rexpejn Jesucrist ni najc beñ Antioquía Pabl näjza rebejn ni sanäjreni, sääreni guedx Jerusalén. Gudejdreni reguedx Fenicia, näjza reguedx Samaria. Cadrotis gudejdreni bijreni diidx lo rexpejn Jesucrist ahuililajz rebenzijt xtidx Dios. Bibalazduxh rexpejn Jesucrist che biejn diajgreni rediidxga.

<sup>4</sup> Che bidzujñreni guedx Jerusalén, huichagloj rexpejn Jesucristreni. Dxejcti bij Pabl näjza Bernabé diidx lo reapost, lo rebengool nani rnibee rexpejn Jesucrist, näjza lo rexpejn Jesucrist, guiraa redzunro nani cayunnäj Diosreni.

<sup>5</sup> Dxejc huisulii gaaí refarisee ni ahuililajz xtidx Dios, räjpreni lojreni:

—Che chalilajz rebenzijt xtidx Dios, nanab chureni bee, nanabza gusoo-bre ni leii xten toMoisés.

<sup>6</sup> Dxejcti bachagsa' reapost näjza rebengool nani rnibee rexpejn Jesucrist, te don xho gunreni.

<sup>7</sup> Huisulii Pedr, räjpni lojreni:

—Guejbtu, resa'ä, anajntu xho bejn Dios gubalti iijz. Gule Dios narä lo guiraanu te gusule'ä xtidx Dios loj rebenzijt, te chalilajzreni xtidx Dios.

<sup>8</sup> Luxh Dios, nani numbechee lastoo guiralii bejn, badeed seen huililajzpac rebenzijt xtiidxni. Badeed Dios Sprit Dxan xtenni lojreni si'c te seen te gacbee bejn najcreni xpejñni. Sigac baniidxni Sprit Dxan xtenni loonu galoo, si'cza badeednini lo rebenzijt.

<sup>9</sup> Sigajc rinälajz Dios nuunu, sigajcza rinälajzni rebenzijt. Che huililajz rebenzijt xtiidxni, basia Dios lastooreni.

<sup>10</sup> Naj ¿xhicuent rusieedtu Dios, ä? Di niajcdi nisianäj retoxtadnu releiiga, digacdiza chosanäjnu releiiga naj. ¿Xhicuent rlaiztu chasanäj rebenzijt releiiga?

<sup>11</sup> Xhet si'cti gacni sa'csi Dios ruslaa nuure lo xtojlnu che rililajznu xtidx Jesucrist, luxh si'cza ruslaani rebenzijt lo dojl che rililajzreni xtidx Jesucrist —räjp Pedr.

<sup>12</sup> Che gulujx gunii Pedr, dxitis gurej rebejn, bacuadiajgreni xtidx Bernabé, xtidx Pabl. Guiro'preni bijreni diidx xho cayujñ Dios redzunro, remilagwr nez lo rebenzijt.

<sup>13</sup> Che gulujx gunii guiro'preni, xhet guniidi rebejn. Jacobbtis räjp lojreni:

—Sa'ä, colcuadiajg xtidxä.

<sup>14</sup> Agunii Simón ni rniireni Pedr lojtu xho ganiddoo baxhal Dios laani lo rebenzijt te gurejdx Dios rexpejñni ni nadxaag lo rebenzijt.

<sup>15</sup> Luxh si'cza caj lo guiitz. Agujc xcheroduxh bacuaa reniguii nani gunii xtidx Dios, che räjpni:

<sup>16</sup> Sidzujñ dxej ni guibisacä.

Sunä guzuxhijb guiraa rebejn nez loä si'c bazuxhijb rexpejn Israel che gubajñ toDavid.

Si'c gunä,



17 te jiädgajñ rebejn narä te gacä Xtiosreni,  
 näjza guiraa rebenzijt nani najc rexpenä jiädgajñ narä,  
 18 si'c räjp Dios nani galooli baluiloj guiraa redzuunre.

19 Dxejcti räjp Jacob lojreni:

—Dee najc xhigab ni runä. Na'cru gusieednu rebenzijt ni cagusiechla-  
 jzreni, renani salilajz xtidx Dios.

20 Gucuaanu te guijt, jie'tznu lo rebenzijt: Na'c gaureni xhi cos ni basuj  
 bejn loj rebanäjb, sa'csi dinu chalilajz xcuent rebanäjb. Na'cza guesnäjreni  
 bejn ni di gac chäälni, na'cza gaureni bääl nani gurerejn, na'cza gaureni rejn.

21 Dee gucuaanu te di guche'chreni xpejn Israel sa'csi neñ guiraa reguejdx  
 galooli yu' rexpejn Israel nani rol leii xten toMoisés gasob sabd —räjp Jacob.

22 Che biejn diajg reapost näjza rebeñgool nani rnibee, näjza guiraa rexpejn  
 Jesucrist xtidx Jacob, bichagljazreni xtiidxni. Dxejcti gulereni tiop sa'reni  
 chanä Pabl näjza Bernabé guedx Antioquia. Gulereni Judas ni rniireni  
 Barsabás näjza Silas. Guiro'preni najc bejn ni sajcru loj rexpejn Jesucrist.

23 Dxejcti bejnreni guijt huinäreni. Bacuaareni rediidxre:

“Nuure reapost, näjza rebeñgool ni rnibee, näjza rexpejn xquidoo Jesucrist  
 ruxhañnu xtixtios lojtu, resa'nu nani rbäjz guedx Antioquia näjza estad Siria  
 näjza estad Cilicia.

24 Rucuaanu guijtze sa'csi biejn diaagnu birii gaii resa'nu ree biädsieedreni  
 la'tu con xtiidxreni, cayu'tu yärsia' sa'csi najreni lojtu nanab chutu bee si'c  
 gunibee toMoisés, guibajnzatu si'c rnii leii xten toMoisés. Xhet nuudinu  
 gunibeenu jiädniireni si'c.

25 Ni'cni biennu xhigab guxhañnu lojtu tiop dade' ni gulenu loj resa'nu te  
 chanäreni Bernabé näjza Pabl, nani sanälaaznu.

26 Agajc balti huält rljazreni nugu'treni Bernabé näjza Pabl, luxh direni  
 guidxejb gusule'reni xtidx Jesucrist.

27 Naj ruxhañnu Judas näjza Silas lojtu. Laareni susule'za guiraa rediidxre  
 lojtu.

28 Tejsi najc xhigabnu con Sprit Dxan xten Dios. Di rlaaznu gutaalrunu leii  
 ni chasanäjt. Releiiitis nani nanab rusoobnu rucuaanu lojtu.

29 Na'c gautu xhicos ni basuj bejn lo rebanäjb, sa'csi dirunu chalilaaz  
 xcuent rebanäjb. Na'cru gautu rejn, na'cza gautu bääl nani gurerejn, na'cza  
 guesnäjt nani digac chäältu. Palga gusoobtu recosre, laaca cayujntu. Sacrü  
 guibajntu. Sujiannäjt Dios.”

30 Dxejcti basadiidx rexpejn Jesucrist Judas näjza Silas huinäreni Pabl näjza  
 Bernabé guedx Antioquia. Che bidzujñreni ro'c batojpreni guiraa rebejn nani  
 huililajz xtidx Dios te bilreni guijtza lojreni.

31 Che biejn diajg rexpenzjt Jesucrist diidx ni caj lo guijtza, bibalaz-  
 duxhrene sa'csi gulecdxi diidxga lastooreni.

32 Dxejcti basule' Judas näjza Silas xtidx Dios lojreni, sa'csi rudeed Dios  
 xtiidxni loj guiro'preni. Xhidajl diidx guniireni te balijdxreni rexpejn  
 Jesucrist. Lacti gulecdxi rediidx ni guniireni lastoo guiraa rexpejn Jesucrist.

33 Ro'c bia'nreni xchej, dxejcru cuäjb rexpejn Jesucrist gubi'reni te gudee-  
 dreni xtixtios loj reni baxhañreni.

34 Dxejc Silas bejn xhigab jia'nni ro'c.

35 Luxh Pabl näjza Bernabé bia'n guedx Antioquia. Guiro'preni baluii,  
 basule'reni xtidx Dios loj rebejn. Guyu'za sgaii dade' ni gucnäjreni.

*Huihuisac Pabl rexpejn Jesucrist neñ guiraa reguejdx*

<sup>36</sup> Che gudejd xhidajl dxej, räjp Pabl lo Bernabé:  
—Do'o guibi' lo guiraa reguejdx cadro basule'nu rextidx Dios te chohuiinu don xho yu' rexpejn Jesucrist.

<sup>37</sup> Niluxh Bernabé rlanj chanäreni Juan ni laa Marcw.

<sup>38</sup> Naaddi Pabl chääni, sa'csi birii Marcw lojreni che guyu'reni nez Panfilia, diruni nisanäj Pabl näjza Bernabé.

<sup>39</sup> Dxej gudildiidxreni. Gubicajtireni lo sa'reni. Ni'c sanä Bernabé Marcw, biu'reni neñ barcw, sääreni Chipre ni re' galäii nisdoo.

<sup>40</sup> Dxejcti Pabl gule Silas te sanänini. Badeed rexpejn Jesucrist xtixtios lojreni, räjpreni gacnäj Diosreni.

<sup>41</sup> Lal ni sasajreni gudejdreni guiraa reguedx Siria näjza guiraa reguedx Cilicia, ro'c gucnäjreni guiraa rexpejn Jesucrist, basule'rurenit xtidx Jesucrist lojreni.

## 16

### *Huinä Timoteu Pabl näj Silas*

<sup>1</sup> Bidzunsac Pabl näjza Silas reguedx Derbe näjza Listra. Ro'c bidxaagreni te xpeñ Jesucrist ni laa Timoteu. Xnanni najc beñ Israel ni huililajz xtidx Jesucrist. Xtadni najc beñ griegw.

<sup>2</sup> Didxsa'ctis rni rexpeñ Jesucrist ni yu' Listra näjza Iconio xcuent Timoteu.

<sup>3</sup> Rlanj Pabl chanäreni Timoteu. Dxejcti basäl Pabl bee Timoteu te gujcti si'c xpeñ Israel, te xhet naadi rexpejn Israel, sa'csi guiraareni nanchee xtad Timoteu najc beñ griegw.

<sup>4</sup> Che bidzujñreni cade tej reguejdx, basule'reni xtidx reapost näjza re-bengool nani rnibee xpeñ Jesucrist guedx Jeurusalén, te gusoob rexpejn Jesucrist diidx ni bacuaareni lo guijtzt.

<sup>5</sup> Bazutijp xtidx Dios lastoo renani huililajz xtidx Jesucrist. Guixe-guixee xhidajlrü beñ huililajz xtidx Dios xcuent Jesucrist.

### *Lo te bacal gunii te niguii lo Pabl*

<sup>6</sup> Che gudejdreni distrit Frigia, näjza estad Galacia, di Sprit Dxañ xten Dios nusaan nusule'reni xtidx Jesucrist neñ reguedx Asia.

<sup>7</sup> Bidzujñtirenigajxh estad Misia. Dxejc rlanjreni nijreni estad Bitinia, niluxh di Sprit Dxañ xten Dios nusaan nijreni ro'c.

<sup>8</sup> Ni'c gudejdtirenistelaad estad Misia, bidzujñreniguedx Troas.

<sup>9</sup> Te yääl si'c lo te bacal bahuii Pabl suga' te beñ Macedonia. Canabduxh niguiiga lo Pabl, räjpni:

—Gudaa ladxä, estad Macedonia, te gacnäjlu nuunu.

<sup>10</sup> Che bara yääl ni gunixcañ Pabl, gudilgajcnu te barcw te chonnu estad Macedonia, sa'csi gubeenu Dios najc nani caguxhal nuure te guluini xtiidxni lo rebeñ Macedonia. Narä, Lucas, ni cagucuaä rediidxre, gusanää Pabl näjza Silas.

### *Che guyu' Pabl con Silas guedx Filipos*

<sup>11</sup> Biu'tinu neñ barcw ro' guedx Troas. Bidzujñnu Samotracia, te yuj ni re' neñ nisdoo. Che bara yääl bidzujñnu guedx Neápolis. Ro'c biriinu neñ barcw,

<sup>12</sup> bionnu guedx Filipos, guejdx nani sajcrü lo estad Macedonia. Guedx romanni. Ro'c bia'nnu tiop chon dxej.

<sup>13</sup> Che gojl sabd, dxej ni rusilajz rexpejn Israel, biriinu guejdxga bionnu ro' te gueuu, sa'csi biennu xhigab ro'c jääd rexpejn Israel te guininäjreni Dios. Ro'c gurejnu, guniinu lo renane' nani bire' ro'c.

14 Lojreni nadxaag te nane' ni laa Lidia, te benzijit ni digac xpejn Israel. Guedx Tiatira siäädni. Ruto'ni ladmuraad ni sacduxh. Rajn gunaaga Dios si'c rajn rexpejn Israelni. Bacuadiajgni xtidx Jesucrist ni cagusule' Pabl. Gucnäj Dios nane'ga te huililajzni xtiidxni.

15 Birobnisni, näjza guiraa reni rbäjz rolizjni. Dxejc guniini loonu:

—Palga ruhuiitu guläa rililazä xtidx Dios, coltaa rolizä te ro'c cuäätzu.

Lacti gunab nane'ga nuunu, ni'c huijia'nnu rolizjni.

16 Te dxej cheni sionnu cadro rrinäj bejn Dios, bidxaagnu te dxa'p nani yu' te bendxab neñ lastooni. Rajp rexpaxhuaanni melduxh sa'csi rusule' dxa'pga recos ni gajd gac.

17 Birinajl dxa'pga Pabl näjza nuure. Rbedxa' dxape'ga, räjpni:

—Reniguiire najc xmos Dios nani rnibee guideb guedxliuj. Ruluiireni loonu xho laanu lo xtojlnu —räjp dxape're.

18 Balti dxej birinajl dxape'ga nuure, entis caniini rediidxga lo rebejn. Lacti basieed dxape'ga Pabl, ni'c gubiréni, räjpni lo bendxab ni yu' neñ lastoo dxape'ga:

—Xcuent xcälrnibee Jesucrist rniä lojlu: “Birii neñ lastoo dxape'ga.”

Lagajc dxej birii bendxab neñ lastoo dxape'ga.

19 Che bahuii rexpaxhuaan dxape'ga diru dxape'ga gun gaan melro, gu-naazreni Pabl näjza Silas. Dxejcti gudobxhaxhreni guiro'preni nez roguui cadro suga' reguxhtis.

20 Che bidzunnäjreni Pabl näjza Silas lo reguxhtis, räjp rexpaxhuaanni lo reguxhtis:

—Reniguiire najc xpejn Israel. Cayujnreni bieju lo guejdxre.

21 Caguluiireni garenca leii nani digacdi gusoobnu sa'csi najcnu ben roman.

22 Dxejcti bidxehnäj rebejn Pabl näjza Silas. Gunibee rejuejz gulääreni xhajn Pabl, näjza xhajn Silas, te batiäjlni baar guideb tiejxh guiro'preni.

23 Che gulujx gudinduxhreni Pabl näjza Silas, biäuren neñ latzguiib. Dxejcti räjp reguxhtis lo reguixhajc:

—Colgapdzu'tzreni, di gusaantu guiriireni.

24 Basäl guixhajgreni neñ latzguiib. Guyu' ni'reni neñ te baräjd ni sojb gueed te di guxunreni.

25 Garolyääl guninäj Pabl näjza Silas Dios, gusloj cayolreni dij ni rliä'p xpala'n Dios. Biejn diajg guiraa rebejn ni yu' neñ latzguiib cayolreni.

26 Chela gujc te xuduxh, basniib guideb latzguiibga. Bixal guiraa repuert, birucya' guiraa recaden, bixal ro' rebaräjd cadro naaz ni'reni.

27 Che gubajn guixhajc ni canäj latzguiib, bahuiini naxhal latzguiib, gulääni spaad xtenni, te rlajzni nugu'tni lagajc laani, sa'csi naani abadxun reni niäu neñ latzguiib.

28 Dxejc guredxa' Pabl, räjpni lo guixhajgga:

—Na'c gunlu si'c. Bahuii, guiraliinu suga'nu ree.

29 Dxejc gunibee guixhajc biääd te bajl te biu'ni neñ latzguiib. Racsejsni biäädni bazuxhijbni nez loj Pabl näjza nez loj Silas.

30 Dxejcti gulää guixhajgreni neñ latzguiib. Gunabdiidxni räjpni lojreni:

—¡Colguinii, dade'! ¿Xhini'c nanab gunä te guslaa Dios narä lo dojl?

31 Räjp Pabl näjza Silas lo guixhajc:

—Huililajztis xtidx Dios xcuent Jesucrist, luj näjza guiraa reni yu' rolizlu, te guslaa Diostu lo dojl.

<sup>32</sup> Basule' Pabl nájza Silas rextidx Dios lojni nájza loj guiraa rebejn ni yu' rolijzni.

<sup>33</sup> Lagajc dxejc, garol yáäl, huinä guixhajgreni gudiibni dejtzeni cadro batiuug baarreni. Dxejcti batiobnisreni guixhajg nájza guiraa reni yu' rolijzni.

<sup>34</sup> Dxejc huinä guixhajgreni rolijzni, ro'c badeedni xhi gudajwreni. Laani nájza guiraa reni yu' rolijzni bibalazduxhreni sa'csi huililajzreni xtidx Dios.

<sup>35</sup> Che bara yáäl, baxhaļ reguxhtis stiop guixhajg rájpmi lo guixhajg nani cuanäj latzguiib:

—Baslaa reniguiiga.

<sup>36</sup> Dxejcti huiye'tz guixhajgga lo Pabl, rájpmi:

—Anaj reguxhtis guslaātu. Naj colchäj, gacnäį Dios la'tu, saru cháātu.

<sup>37</sup> Niluxh rájp Pabl loj reguixhajg:

—Nuure najczanu beņ roman. Batiäjłreni baar detznu nez loj guiraa rebejn. Nicla niniabdiidxreni la yu' xhi doļł biennu. Basäurenı nuure neņ latzguiib. Leii xten roman di gusaan gac rebeņ roman si'c. Luxh najrlajzrenı guslaarenı nuure xhiga'tz. įDinu guiriı si'c! Lagajc laarenı sujiädsläärenı nuunu.

<sup>38</sup> Che huiye'tz reguixhajg diidxga lo reguxhtis, bidxebduxhreni che biejn diajgreni beņ roman najc Pabl nájza Silas.

<sup>39</sup> Dxejcti biäd reguxhtis, guläärenı Pabl nájza Silas, gunabrenı jiajłłajzrenı. Gunabduxhrenı lo Pabl nájza Silas; rájpmi:

—Coljiunejz guejdxre.

<sup>40</sup> Che biriirenı neņ latzguiib, huijrenı rolijz Lidia. Balijdxrenı rexpejn Jesucrist, gulecdxirenı lajz rexpejn Jesucrist. Dxejc biunejzrenı guejdxga.

## 17

### *Cadxechduxh guiraa rebeņ Tesalónica*

<sup>1</sup> Che gudejdrenı reguedx Anfıpolis, nájza guedx Apolonia, bidzujņrenı guedx Tesalónica cadro yu' te xquidoo rexpejn Israel.

<sup>2</sup> Ro'c basule' Pabl xtidx Dios si'c ni rujnpacni. Choņ sabd, dxej ni rusilajz rexpejn Israel, basule'ni xtidx Dios lojrenı.

<sup>3</sup> Basule' Pabl xtidx Dios ni caj lo guijtż ni bacuaa reniguii ni gunii xtidx Dios galooli. Caj lo guijtżga: “Nanab ted Crist trabajwduxh, guetni, niluxh sibansacni lo rebeņgut.”

Dxejc rájp Pabl lojrenı:

—Ruiä lojtu diidx xcuent Jesús; lagajc Jesúsre najc Crist —rájpmi.

<sup>4</sup> Yu' rexpejn Israel huililajz xtidx Dios, gusanäjrenı Pabl nájza Silas. Nájza xhidalduxh beņ griegw nani rajņ Dios nájza xhidajł reguna griegw ni sajcro huililajz xtiidxni.

<sup>5</sup> Luxh yu' rexpejn Israel ni di chalilajz, ni bidxechlajz. Batie'reni gaii beņploj, beņlatsiaj, bejņrenı bieje nez galäii. Biu'reni rolijz Jasón caguuilrenı Pabl nájza Silas te cuäärenı guiro'prenı nez lo rebejn.

<sup>6</sup> Niluxh che direni nidxäl Pabl nájza Silas, alga Jasón guläärenı nájza gaii renanı rililajz xtidx Dios, sanäärenı redee lo reguxhtis, cabedxa'reni:

—Reniguiire ni abejņ bieiduxh guideb guedxliuj abidzujņrenı laadxnu,

<sup>7</sup> luxh badeed Jasón rolijzni jia'nrenı. Direni gusoob leii xten César, najrenı yu' stee reiı ni laa Jesús.

<sup>8</sup> Che biejn diajg reguxhtis nájza rebejn diidxre, guyu'reni yärsia'.

<sup>9</sup> Cua' reguxhtis meel lo Jasón nájza lo reexamigwni. Rájþ reguxhtis sudedsacreni meelga che jii Pabl nájza Silas, jiunejzreni lo guejdxga. Dxejcti baslaareni Jasón nájza reexamigwni.

### *Che guyu' Pabl con Silas guedx Berea*

<sup>10</sup> Che biu' guxhijn, baxhalgajc rexpejn Jesucrist Pabl nájza Silas ste guejdx ni laa Berea. Che bidzujnreni guejdxga, biugajczeni xquidoo rexpejn Israel.

<sup>11</sup> Hueenru najc reben Berea loj reben Tesalónica, sa'csi rbaali lajzreni bacuadiajgzeni xtidx Pabl ni guniini xcuent Jesucrist. Guixe-guixee bilreni guiitz cadro caj xtidx Dios te gucbeereni la gulií rextidx Pabl.

<sup>12</sup> Xhidajl rexpejn Israel nájza xhidajl beñ griegw ni sajcrú, gunaa sigajc niguii, huililajz xtidx Dios.

<sup>13</sup> Che gucbee rexpejn Israel ni rbájz guedx Tesalónica cagului Pabl xtidx Dios guedx Berea, biáádreni guedx Berea. Che bidzujnreni lo guejdxga bejnreni biey ro'c.

<sup>14</sup> Dxejcti baxhal rexpejn Jesucrist Pabl, huijni ro' nisdoo. Niluxh Silas nájza Timoteu bia'n guedx Berea.

<sup>15</sup> Dxejcti rebejn ni gusanáj Pabl huiñanini guedx Atenas. Ro'c ráþþ Pabl lo rebejn ni biáádnáni gudeedreni diidx lo Silas nájza Timoteu jiáádgajczeni lojni. Dxejcti rebejn ni saná Pabl gubisac guedx Berea.

### *Guyu' Pabl guedx Atenas*

<sup>16</sup> Laí ni gulájz Pabl guedx Atenas, guyuduxhni yársia' sa'csi bahuiini rajn guiraa rebejn rebanájþ nani runchee lagajc bejn.

<sup>17</sup> Ni'c neñ xquidooreni gudilídiidx Pabl rexpejn Israel nájza rebenzijt ni rajn Dios si'c rajn rexpejn Israelni. Guixe-guixee gudilídiidxni chutis bejn ni re' lo guii.

<sup>18</sup> Dxejcti biáád gaii bejn lojni. Yu' reni roíduxh guiitz ni bacuaa epicúreos, yu'za renani roíduxh guiitz ni bacuaa estoicos, gudilídiidxreni Pabl. Yu' reni ráþþ lo sa'reni:

—¿Xhicha guinii bejnre loonu? Entis naxhal ro'ni.

Yu'zarení ráþþ lo sa'reni:

—Pet calá'pni xpala'n tiop dioscoob.

Si'c guniireni sa'csi biejn diajgzeni bazá't Pabl “Jesús” nájza “Resurreccion”, ni sáloj yálgubansac lo rebengut.

<sup>19</sup> Dxejcti gunaazreni Pabl sanäreneni nez dajn ni laa Areópago. Ro'c yu' si'c te jusgaad. Rájþreni lo Pabl:

—Rlaaznu gacbeenu xhi diidx ruluiilu,

<sup>20</sup> sa'csi ruyjlu diidx nani dinu jiabee. Ni'cni bejn huen, basule' diidxre loonu te gacbeenu xhi sálojreni —ráþþreni.

<sup>21</sup> Reben Atenas nájza rebenzijt ni yu' ro'c ruteedreni redxey rniireni didxcoob lo sa'reni, o rucudiajgzeni didxcoob. Ni'cpac rchaglajzreni.

<sup>22</sup> Galáii Areópago huisulii Pabl, ráþþni lojreni:

—Colcuadiajg guejbtu, beñ Atenas. Abahuiá xho raníduxhtu xhidajl banájþ.

<sup>23</sup> Che siádsaá lo guejdxre, bahuiá lo rexpanájbtu. Bahuiáza loj te piáán cadro caj rediidxre: “Dios ni dinu jiembee.” Nará raná Diosga. Rumbleá Diosga nani rajntu mase ditu gumbeeni. Susule'á xtiidxni lojtu.

<sup>24</sup> Rájþ Pabl:

—Diosre benchee guedxliuj nájza guiralii ni yu' lo guedxliuj, sa'csi rnibeeni xhaguibaa nájza guedxliuj. Di Diosre cuááz lo piáán niclaza neñ reguidoo ni runchee bejn.

<sup>25</sup> Diza Diosre guiquin chu gacnäjni sa'csi lagajc Diosre rudeed yäl'nabajn, yäl'nadaan, näjza guiralii nani rquiin reben guedxliuj.

<sup>26</sup> Räj pabl:

—Guiralii reben guedxliuj najc rexagdoo tejsi gunaa näjza tejsi niguii. Desde galooli gunibee Diosga bal ijz chu renacion, näjza cati gunibee renacionga.

<sup>27</sup> Benchee Dios guiraa reben guedxliuj te quilreni Dios te chalilajzreni xtiidxni. Luxh suga' Dios gajxh cadetejnu,

<sup>28</sup> sa'csi Dios rujn nabajñnu lo guedxliuj, runiidxni rsiaanu lo guedxliuj, runiidxzani rdajlru xcäl'nabannu lo guedxliuj. Laaca bacuaa rexpennajntu: “Najcnu xi'n Dios, sa'csi benchee Diosnu.”

<sup>29</sup> Ni'cni, sa'csi najcnu xi'n Dios, di nungäl jiennu xhigab najc Dios si'c rebanäj b ni nac-chee pla't, o guij, o yajg si'ctis ni runchee bejn rexpänäjbtu.

<sup>30</sup> Nen redxej ni di bejn niembee Dios, diza Dios niujn castiügwreni. Niluxh naj gunibee Dios gusiechlazj guiraa rebejn,

<sup>31</sup> sa'csi abasoobni te dxej cheni gac Jesús juejz lo guiraa reben guedxliuj. Agule Diosni gacni juejz, sa'csi rumbechee Jesucrist chu najc benguijdx, chuzä najc beñsa'c. Rñilii Jesucrist rediidx ni najc guliitis. Guläs Dios Jesucrist, baspañsacnini lo rebeñgut, te gacbeenu rajp Jesucrist yäl'nibee lo guiraa recos.

<sup>32</sup> Che biejn diajg rebeñga gubansac Jesucrist lo rebeñgut yu' reni baxhiznä j xtiidxni. Yu'za reni räjp:

—Sucuadijgrunu xcuent ni rusule'lu.

<sup>33</sup> Dxejcti birii pabl lojreni.

<sup>34</sup> Yu'za reni huinajlni, huililajzreni xtidx Dios. Lojreni nadxaag te dade' ni laa Dionisio ni najc te juejz lo Areópago; näjza te nane' ni laa Dámaris. Guyu'za sgaii bejn ni huililajz.

## 18

### *Guyu' Pabl guedx Corinto*

<sup>1</sup> Biriiti pabl guedx Atenas, huijni guedx Corinto.

<sup>2</sup> Ro'c bidxaagni te dade' ni najc beñ Israel, ni laani Aquila. Ponto najc lajdxni. Biädgajni ro'c, biriini Roma, sa'csi gunibee rei Claudio guirii guiraa rexpelj Israel guedx Roma. Birinä j Aquila Priscila chäälni. Biriireni Italia, biädäreni guedx Corinto. Bihuii Pablreni,

<sup>3</sup> sa'csi lagajc dzuun ni rujnreni rujnzani. Tejsi lajt guläjzreni te bejn jionreni tejsi dzuun. Runcheereni yuguijd.

<sup>4</sup> Gasob sabd, dxej ni rusilajz rexpelj Israel, basule' pabl xtidx Dios nen xquidoo rexpelj Israel. Rlajzni chalilajz rexpelj Israel näjza beñ griegw ni digac xpejn Israel diidx ni rniini xcuent Jesucrist.

<sup>5</sup> Dxejcti birii Silas näjza Timoteu Macedonia. Che bidzujñreni guedx Corinto, gusloj rusule'tis pabl xtidx Dios guixe-guixee, guniliini lo rexpelj Israel:

—Jesús najc Crist ni runloj rexpeljntu guxhal Dios.

<sup>6</sup> Dxejcti bidxehnäj rexpelj Israelni, guniyajzreni xtiidxni. Dxejcti gubijb pabl xhajbni si'c te seen diruni jiureni, caguro'nnireni. Räjzani lo rexpelj Israel:

—Lagajc la'tu rajptu dojl nittu lo Dios. Xhet dojldi rapä narä. Aguniä xtidx Jesucrist lojtu. Naj lo rebejn nani di gac beñ Israel gusule'ä xtidx Jesucrist —räjpni.

<sup>7</sup> Dxejcti biriini lojreni, huijni rolizj Justo, te bejn ni rajn Dios si'c rajn rexpejn Israelni. Rolizjni sojb cuä' xquidoo rexpejn Israel.

<sup>8</sup> Crisp, ni rnibee xquidoo Israel, huililajz xtidx Jesucrist. Huililajzza guiraa reni rbäjz rolizjni. Xhidajlza bejn Corinto huililajz xtidx Jesucrist, dxejcti birobnisreni.

<sup>9</sup> Gojl te yääl gunii Dios lo te bacał, räjpni lo Pabl:

—Na'c guidxejblu. Guniitis, na'c gusaulu ro'lu,

<sup>10</sup> sa'csi narä suganää luj. Rut gacdi gun latsiajlu. Aguleä xhidalduxh bejn lo guejdxre te gacreni xpenä —räjp Dios.

<sup>11</sup> Ni'c bia'n Pabl ro'c tebizgarol. Baluiini xtidx Dios lojreni.

<sup>12</sup> Che gujc Galion gubernadoor xten Acaya, tejsi xhigab bejn rexpejn Israel bidojpreni te gunaazreni Pabl. Sanäreni Pabl jusgaad cadro yu' Galion.

<sup>13</sup> Räjpreni lo Galion:

—Niguiire caguluui rebejn ganreni Dios garenca mood, xhet si'cti ni caj lo kleiinu —räjpreni.

<sup>14</sup> Agojl ninii Pabl, che räjp Galion lo rexpejn Israel:

—Palga gulanni o bagu'tni te bejn, dxejc yu' xtojlni te gucuadiagä xtiidxtu.

<sup>15</sup> Per la'tu cadxe'chtu xcuent diidx, xcuent laj bejn, xcuent ni caj lo leii xtentu. Gubernadoor narä, xho gucuadiagä diidxga. Lagajc la'tu colchahuii xho guntu yälguxhtis —räjp Galion.

<sup>16</sup> Gunibee Galion barilaagw resoldaad rexpejn Israel.

<sup>17</sup> Dxejc gunaaz reGriegw Sóstenes nani rnibee xquidoo rexpejn Israel. Batiäjlni baar dejtz Sóstenes nez ro' jusgaad xten Galion. Niluxh nicla niu Galionreni.

### *Chon huält huihuii Pabl rexpejn Jesucrist*

<sup>18</sup> Bia'nti Pabl Corinto xchej. Dxejc badeed Pabl xtixtios lo rebejn nani huililaz xtidx Jesucrist, biriini ro'c. Sanäni Priscila näjza Aquila, biu'reni nen barcw te siireni nez estad Siria. Dxejc ganid gudejdreni guedx Cencrea, cadro bahuj Pabl yejcti si'c te seen yu' xhi diidx bia'nni con Dios.

<sup>19</sup> Che bidzujnreni guedx Éfeso, basa'n Pabl Priscila näjza Aquila ro'c. Biu' Pabl xquidoo rexpejn Israel, ro'c bachaagni diidx con rexpejn Israel.

<sup>20</sup> Dxejcti che gunabreni jia'n Pabl ro'c xchej, naaddini jia'nni.

<sup>21</sup> Badeedni xtixtios, räjpni lojreni:

—Nungäjlpac chatedä laniro guedx Jerusalén. Siälsacä ree palga gusaan Dios jiaä.

Biusacni nen barcw, biriini guedx Éfeso.

<sup>22</sup> Che bidzujnreni guedx Cesarea, biriini nen barcw, huijni guedx Jerusalén. Che bidzujnreni, guniini xchan lo reapost näjza lo rexpejn Jesucrist. Dxejc huijni guedx Antioquia xten Siria.

<sup>23</sup> Che gudejd balti dxej, biriini guejdxga, gudejdni guideb estad Galacia näjza guideb distrit Frigia. Nen cade tej reguejdxga, balijdxni rexpejn Jesucrist te gutijpru lajzreni.

### *Baluii Apolos xtidx Dios nen guedx Éfeso*

<sup>24</sup> Nen redxejga, te dade' ni laa Apolos bidzujn guedx Éfeso. Najcti xpejn Israel, gojlni guedx Alejandria xten Egipto. Lacti rajc rnisa'cni, nanduxhzani xtidx Dios.

<sup>25</sup> Nanduxhni xtidx Dios xcuent Jesucrist. Laaca basule'ni xtidx Dios, guideb xcäl'nabajnreni rinälajzni Dios. Niluxh xcuent Jesucrist najntisni yälrobnis xten Juan.

<sup>26</sup> Nicla nidxejb Apolos gusloj caniini nen guidoo xten rexpejn Israel. Che biejn diajg Priscila najza Aquila xtiidxni, huinärenini rolizjreni. Ro'c basule'rueni xtidx Dios nani gajdni gan.

<sup>27</sup> Dxejc, sa'csi abejen Apolos xhigab chääni reguejdx ni tre' nez Acaya, bacuaa rexpejn Jesucrist guijtz lo rexpejn Jesucrist ni yu' nen reguejdxga te gacnajreni Apolos. Gucnäduhx Apolos rebejn nani badeed Dios huililajz xtidx Dios nen reguejdxga,

<sup>28</sup> sa'csi gunilii Apolos nez loj guiraa rebejn xhet laadi rnii rexpejn Israel. Di niajcdi nuzejc rexpejn Israel diidx lo Apolos sa'csi ganax con xtidx Dios ni bacuaa reniguii ni gunii xtidx Dios galoo basule'ni: "Jesús najc Crist nani cayunlojtu guxhal Dios."

## 19

### *Guyu' Pabl guedx Éfeso*

<sup>1</sup> Laĵ ni guyu' Apolos guedx Corinto, huij Pabl xhidajl reguejdx nen región Asia, dxejcti bidzujni guedx Éfeso cadro bidxaagni gaii bejn nani huililajz xtidx Dios.

<sup>2</sup> Gunabdiidx Pabl lojreni:

—Che huililajztu xtidx Dios, ĉla biädlajz Sprit Dxaan xten Dios nen lastootu, ä?

Räjpreni lojni:

—Nicla gajd diajgnu jiejn la yu' te Sprit Dxaan xten Dios.

<sup>3</sup> Räjp Pabl lojreni:

—ĉXho birobnistu, pues?

Räjpreni lojni:

—Birobnisnu si'cni baluii Juan tiobnis bejn.

<sup>4</sup> Dxejcti räjp Pabl lojreni:

—Guliica bastiobnis Juan che basiejch lajz rebejn xtojĵreni. Räjpza Juan lo rebejn: "Colchalilajz xtidx bejn ni siääd detzä." Bejn ni basä'tni najc Jesucrist —räjp Pabl.

<sup>5</sup> Che biejn diajgreni rextidx Pabl birobnisreni te gacbee rebejn najczeni xpejn Jesucrist.

<sup>6</sup> Che batzuub Pabl naani yejcreni, biu' Sprit Dxaan xten Dios nen lastooreni. Dxejc gusloj caniireni garen-garen didxsaj. Guslojza caniireni diidx ni badeed Dios lojreni.

<sup>7</sup> Si'c tzubitio'p dade' gusajc si'c.

<sup>8</sup> Si'c choñ bäii, guixe-guixee gunii Pabl rextidx Dios, basule'ni xcuent xcäl'mibee Dios loj rebejn nen xquidoo rexpejn Israel. Dini nidxejb guniini loj rebejn.

<sup>9</sup> Dxejc guyu' reni gucnajd, dirureni nililajz xtidx Dios. Che gusloj caniya-jreni xtidx Dios lo rebejn, biunejz Pabl ro'c sanäni rexpejni ni rililajz xtidx Jesucrist. Sanä Pablreni te bidxagsa'reni ro scueel xten mastr Tiranno. Ro'c bidxagsa'reni te guixe-guixee basule' Pabl xtidx Dios lojreni.

<sup>10</sup> Tiop ijz bejn Pabl si'c, ni'c guiraa rebejn ni rbäjz Asia biejn diajgreni xtidx Dios. Rexpejn Israel sigajc reben griegw biejn diajgreni xtidx Dios.

<sup>11</sup> Gucnäj Dios Pabl bejn ni xhidajl dzunro, remilagwr.

<sup>12</sup> Ni'cni biääd bejn ca'reni baii, ca'reni tla' lajd te guxheebreni relajdga lo Pabl. Dxejcti rinäreni relajdga lo rebejn ni racxhuu, luxh riacgajc rebejn ni racxhuuga, rigajza rebendxab lastoo renani yu' bendxab.

<sup>13</sup> Dxejcti guyu' gaii bejn Israel nani entis rcansaj, direni cuääz tejsi guejdx. Najczeni bejn ni rbää bendxab lastoo rebejn. Bejn redee xhigabcoob, naareni



cuääreni bendxab xcuent laj Jesucrist, ni'cni räjpreni lo renani yu' bendxab nen lastooni:

—Xcuent xcälrnibee Jesucrist nani rului Pabl rnibeenu guirilu nen lastoo bejnga —räjpreni.

<sup>14</sup> Guyu' gajdz xi'n Esceva, te beñ Israel, nani sajcru lo rebixhojz. Rujn redee dzuun rbääreni rebendxab nen lastoo rebejn.

<sup>15</sup> Che gunii rexi'n Esceva loj bendxabga si'c, räjp bendxab ni yu' nen lastoo bejnga lojreni:

—Rumbeä Jesucrist, rumbeäza Pabl. ¿La'tu, chu la'tu? Dina gumbleä la'tu.

<sup>16</sup> Dxejcti bixa't niguii nani yu' bendxab nen lastooni yejc rexi'n Esceva, gudinduxhni nani, basälta'nireni, batiäjsni xhajbreni. Dxejcti baxunreni birireni nen yu'ga, bidxälgujdxzaren biräsya' xhajbreni.

<sup>17</sup> Dxejcti guiraa reben Éfeso, rexpejn Israel sigajc beñ griegw, gucbee xho bennäj bendxab reniguiiga. Bidxebduxh rebejnnga, luxh huä'p xpala'n Jesucrist.

<sup>18</sup> Xhidalduxh reni huililajz xtidx Dios biääd lo rexpejn Jesucrist. Cacäjpreni guiraa recos xhet laadi nani rujnreni.

<sup>19</sup> Xhidajl reni najc bidxaa biädnä reguijtz cadro caj yäl'najn xten rebidxaa. Dxejcti base'creni reguijtzga nez loj guiraa rebejn. Bejnreni cuent lacti meel saj reguijtzga. Sajcreni tiubitzuu mül melpla't.

<sup>20</sup> Xhidalduxh rebejn huililajz xtidx Dios. Batijp Dios lastoo rexpejn ni. Gulä'p guiraareni xpala'n Dios.

<sup>21</sup> Che gulujx recosre, bejn Pabl xhigab chääni guedx Jerusalén, niluxh tedxgaani reguejdx ni re' nez Macedonia näjza Acaya, bejnzeni xhigab, naani:

—Che ahua'a Jerusalén, nanabza cha'a guedx Roma.

<sup>22</sup> Ni'cni baxhal Pabl Timoteu näjza Erasto, tio'p renani racnäjni, huijreni Macedonia, luxh laani bia'nni Asia.

### *Bidxechduxh reben Éfeso*

<sup>23</sup> Nen redxejga, guyuduxh rebejn yärsia' sa'csi baluii Pabl xtidx Dios. Direni nichagljaz care'ch xtidx Dios.

<sup>24</sup> Te dade' ni laa Demetrio runchee ni'ch pla't xten banäjb ni laa Diana, ni najc banäjb xten guejdxga. Demetrio näjza guiraa replateer ni rujn ni'ch xten Diana runduxhreni gaan meel ro'c.

<sup>25</sup> Gurejdx Demetrio guiraa replateer ni rujn reni'chga, räjpni lojreni:

—Colcuadiajg, la'tu resa'ä: najntu rbäänu melro lo dzuun ni riennu.

<sup>26</sup> Abahuiitu niguiire ni laa Pabl. Abiejnza diajgtu xtiidxni. Räjpni lo rebejn: “Xhet diosdi najc reni racchee con naa bejn.” Guedx Éfeso näjza guideb nación Asia cagusejchni lajz bejn, xhidalduxh bejn salilajz xtiidxni.

<sup>27</sup> Ni'c ries nitloj xtzuunnu palga diru bejn sii ni'ch ni riencheenu. Luxh riesza diru bejn jädgajñ Diana nen xquidoro Diana. Naj reben Asia, näjza guiraa reben guedxliuj randuxh Diana, banäjb ni sajcru, niluxh palga diru rebejn gan Diana, pet sinitlojni —räjpni.

<sup>28</sup> Che biejn diajg replateer xtiidxni, bidxe'chduxhreni, guredxa'reni räjpreni:

—Sacduxh Diana xtios reben Éfeso.

<sup>29</sup> Guideb guejdx guyu' bieje. Dxejcti ruxunreni bidxagsa'reni lo yuj cadro rajc rexjuntreni. Gunaazreni Gayo näjza Aristarco, beñ Macedonia ni rinajl Pabl.

<sup>30</sup> Rlajz Pabl niu'ni cadro bidxagsa' rebejn, niluxh di rexpejn Jesucrist nusaanni.

<sup>31</sup> Gaii guxhtis ni rnibee Asia, sa'csi najcreni xamijgw Pabl, baxhəreni diidx lo Pabl, rəjpreni:

—Na'c chāālu cadro nadxagsa' rebejnə —rəjpreni.

<sup>32</sup> Lo rebejn ni re'ga, yu' reni rbedxa' tej diidx, sgaiireni rbedxa' garenca diidx. Te bieiduxh cayajc. Xhidalduxh rebejnə nicla gan xhicuent bidxagsa'reni.

<sup>33</sup> Dxejcti gulāā rexpejn Israel te dade' ni laa Alejandro lo reben xhidaalga, te guiniini lo rebejn. Dxejcti basāābni naani lo rebejn te gac dxi rebejn. Rlajz Alejandro guiniini xcuent rexpejn Israel loj guiraa rebejn, te di guidxe'chreni lo rexpejn Israel.

<sup>34</sup> Niluxh che guchee rebejn najc Alejandro bejn Israel, tiop or guredxaduxhreni, rəjpreni:

—Sacduxh Diana xtios reben Ēfeso.

<sup>35</sup> Dxejcti biāād secretaar xten guejdxga lo rebejn, gunibeeni guc dxi rebejn, te rəjprni lojreni:

—Colcuadiaj, la'tu bejn Ēfeso, caguidxəjl te bejn guedxliuj ni di gacbee reben guedx Ēfeso rajnpac Diana, nani xhaguibaali bitejb lo guedxliuj.

<sup>36</sup> Sa'csi rediidxre najc guli, nungəjl cuedxitu, na'c guntu recos guijdxre.

<sup>37</sup> ǂXhicuent gunaaztu reniguii ni siādnātu ree? Direni gac gubaan ni rbajn recos guido, dizareni ninijaj xtiosnu.

<sup>38</sup> Naj palga rlajz Demetrio nājza rebejn ni najc plateer chale'c quej, naxhal jusgaad, suga' reguxhtis. Ro'c suchale'creni xquejreni.

<sup>39</sup> Niluxh palga yu' xhi stee, nanab gac te junt xte rebenguejdx si'c ni caj lo xleiinu.

<sup>40</sup> Ries jii xquejnu lo gubier, naareni bidojprnu te guidxagdilu gubier. ǂDxejca'? ǂXhi jie'tznu xcuent ni bidxagsa'nu ree?

Dxejcti rəjprni:

—Agojl, coljiunejz.

<sup>41</sup> Che gunii secretaar si'c, bire'ch rebejn, biunejzreni ro'c.

## 20

### *Huihuisac Pabl rexpejn Jesucrist ni yu' Macedonia nājza Grecia*

<sup>1</sup> Che bire'ch rebejn, gurejdx Pabl rexpejn Jesucrist biāād lojni, te balidjdnireni. Badeedni xtixtios lojreni. Sə'tini nez reguedx Macedonia.

<sup>2</sup> Guiraa reguejdxga cadro gudejdni, balijdxni rexpejn Jesucrist, balse'runi xtidx Dios lojreni. Dxejc sāāni reguedx Grecia.

<sup>3</sup> Che bidzujni Grecia, bia'nni ro'c chon bāii. Dxejcti niu' Pabl nejn barcw te nijni reguejdx Siria. Niluxh che biejn diajgni cabāz-xhiga'tz rexpejn Israelni te guiniaazrenini, gunaazni nezyuj, gubi'ni nez Macedonia.

<sup>4</sup> Huināni Sópater, xi'n Pirios, te bejn guedx Berea; nāj Aristarco nājza Secondo, bejn guedx Tesalónica; nāj Gayo, bejn guedx Derbe; nāj Timoteu; nāj Tiquico nājza Trófimo, bejn Asia.

<sup>5</sup> Guiraa redee gunijd loonu, huiləjzreni nuure guedx Troas.

<sup>6</sup> Guedx Filipos bidxaag Pabl narə, Lucas. Ro'c gudejdnu lanij xten rexpejn Israel che rajwreni yətxtiil ni di saguij. Biriitinu guejdxga, biu'nu nejn barcw te sonnu nez guedx Troas. Gaii dxej gusaanu nejn barcw, dxejc bidzujnu guedx Troas. Ro'c bia'nnu gajdz dxej.

### *Baluu Pabl xhidalduxh xtidx Dios lo rexpejn Jesucrist guedx Troas*

<sup>7</sup> Che gojl dumingw, primer dxej xman, bidxagsa'nu te bidaunu yätxtiil si'c gudaunäj Jesucrist rexpejn pacni galoo che gajdni guet. Abejn Pabl xhigab guira yääl guiriini guejdxga. Che biu' guxhijñ, gusloj cagusuleduxh Pabl xtidx Dios, huinuuni si'cti garolyäälli.

<sup>8</sup> Yu' cadre bidxagsa'nu najc jiaa yejc stiop yu'. Xhidalduxh balgandeel cagusanij ro'c.

<sup>9</sup> Sobga' te bi'n ni laa Eutico ro' te bentaan. Lañ ni cagusuleduxh Pabl xtidx Dios lo rebejn, gunaaz bacal bi'nga, gudiejsni, bitejbni lo yuj desde yu' ni riojn pis. Che huiläsrenini, agujtni.

<sup>10</sup> Dxejcti biäjñ Pabl lo yuj cadre bitejb bi'nga. Bazuxhijb Pabl cadre naga' bi'nga, gudäznini. Dxejcti räjp Pabl lojreni:

—Na'c chutu yärsia'. Agubañsacni. Baspajñ Diosni.

<sup>11</sup> Dxejcti huäpsac Pabl lo yujiaaga. Ro'c bidaunu yätxtiil si'c gudaunäj Jesucrist rexpejn pacni galoo che gajdni guet. Gunii Pabl lojreni xchejru, che bianijli lo guedxliuj. Dxejc biunejzni.

<sup>12</sup> Xhetliiduru rajcni bi'nga nani gubañsac, nani guläs Pabl. Bibalazduxhreni, huisa'nrenini rolizni.

### *Biu'nu neñ barcw, bionnu guedx Mileto*

<sup>13</sup> Gunijdnu lo Pabl. Biu'nu neñ barcw, sonnu guedx Asón, te ro'c guidxaagnu Pabl, sa'csi abejñ Pabl xhigab ni'ni jiini guejdxga, ro'cli jiu'ni neñ barcw.

<sup>14</sup> Che bidxaag Pabl nuunu guedx Asón, biu'ni neñ barcw, sonnu lo nisdoo te bidzunnu guedx Mitilene.

<sup>15</sup> Neñ barcw biriinu ro'c. Che bara yääl, gudejdn yuj ni re' lo nisdoo ni laa Quío. Che bara stee yääl, bidzunnu guedx Samos. Guedx Trogilio basilaaznu. Che bara stee yääl, bidzunnu guedx Mileto.

<sup>16</sup> Di rlanj Pabl jiu'nu guedx Éfeso, diza rlanjni chunu Asía xchej, sa'csi riojb lajzni guidzunnu guedx Jerusalén te ro'c tedni redxe lanj ni laa Pentecostés.

### *Guedx Mileto guninäj Pabl reni rnibee xpejn Jesucrist ni yu' guedx Éfeso*

<sup>17</sup> Che guyu'nu guedx Mileto, baxhañ Pabl diidx lo rexpejn Jesucrist ni yu' guedx Éfeso, gurejdxni reni rnibee.

<sup>18</sup> Che bidzujñreni lo guejdxga, räjp Pabl lojreni:

—Lagajc la'tu najntu xho nabañä nez lojtu, dxejli ni bidzunä, nabañnä Dios.

<sup>19</sup> La'tu najntu xho runä xtzuum Jesucrist guixe-guixee, guideb xcälñadipä. Dina niliä'p ä xpala'nä. Najntu xho ronä che di bejn chalilajz xtidx Jesucrist. Che rlanj rexpejn Israel nugu't narä, gudedä trabajwduxh.

<sup>20</sup> La'tu najntu xho baluiä lojtu guiralii rextidx Dios ni najc huen par la'tu. Che nadxagsa'tu baluiä xtidx Dios lojtu, näjza rolizj cade tejt u huiluiä xtidx Dios lojtu.

<sup>21</sup> Basule'ä xtidx Dios lo rexpejn Israel näjza lo rebenzajt ni di gac xpejn Israel. Räpä lojreni nanab gusiechlajzreni, gusa'nreni xtojñreni, nanab chalilajzreni xtidx Jesucrist te gudzucaj Dios xtojñreni.

<sup>22</sup> Naj cadedä te laad guejdx xtentu, sia'ä guedx Jerusalén, sa'csi caguxhañ Sprit Dxan xten Dios narä cha'ä guedx Jerusalén. Dina ganä xhi sacä ro'c.

<sup>23</sup> Niluxh nanä cade tej reguejdx cadre rdedä rñii Sprit Dxan xten Dios loä sidedä trabajwduxh, siäüä neñ latzguib guedx Jerusalén.

<sup>24</sup> Niluxh dina guidxebä, dizana chanälazduxhä xcälñabañätis, te guluxä dzuun nani baniidx Jesucrist gunä. Lo dzuun ni baniidx Jesucrist nanab

chaye'tzä lo guiraa rebejn sibicaj xtojłreni palga chalilajzreni xtidx Dios xcuent Jesucrist —räjp Pabl.

<sup>25</sup> Räjzani:

—Naj agucbeä dirutu fisac loä, la'tu nani basule'ä xcälrnibee Dios lojtu.

<sup>26</sup> Rniliäpac lojtu, xhet dojłdi rapä palga yu' te bejn ni di chalilajz xtidx Dios, ni di Dios gudzucaj xtojłni.

<sup>27</sup> Xhetliidi biäädxdı loj rextidx Dios ni basule'ä lojtu. Dina nucua'tzä nicla tej xtiidxnı xcuent xho rłajz Dios guibañnu.

<sup>28</sup> Colga'p lagajc la'tu si'c ra'p baxhtoor xiil, si'c colga'p guiraa rebejn nani rililajz xtidx Dios sa'csi Sprit Dıan xten Dios abaniidx dzuunga guntu, ni'cni abixe' xtięjn Jesucrist lo cruzj te gac gudzucaj Dios xtojłreni.

<sup>29</sup> Anancheä che rutdiru narä, siääd bejn nani rłajz chalilajztu ste'ca diidx, na'c chalilajztu niclaza jıutu rebejnğa. Rusgweetisreni la'tu. Sutie'chreni la'tu lo sa'tu si'c rutie'ch cuyo't rexiił.

<sup>30</sup> Su'za lagajc sa'tu ni guinii didx-xhii lojtu te gunreni gusaan rexpejn Jesucrist xtidx Dios, te chanajłreni redee ni rusguee.

<sup>31</sup> Colhuii te di gusgueereni la'tu. Di jıäl-lajztu choñ ijz, dxej yääl basule'ä xtidx Dios, ronäli balidxätu, sa'csi sanälazätu.

<sup>32</sup> Räjzpa Pabl:

—Asia'are, rusa'nätu ladznaa Dios, gacnäj Dios la'tu. Sutijp xtidx Dios lastootu, te xca'tu guiraa ni bia'n diidx guniıdł Dios lojtu, näjza loj guiraa ni abejn Dios beñsa'c, nani najc xpejnı.

<sup>33</sup> Dina niniabä meel, niclaza xhabä che baluiä xtidx Jesucrist lojtu.

<sup>34</sup> Anajntu lagajc narä benä dzuun con ñää te bio' xhi gudaunää reexam-igwä.

<sup>35</sup> Si'c benä te flojtu xho guntu dzuun te gacnäjtu sa'tu ni xhet rajpdi, te guinaj lajztu xtidx Jesucrist che najni: “Huenru guideednu lo bejn quela xcaxliä'nu xhi cos” —räjpnı.

<sup>36</sup> Che gulujx gunii Pabl rediidxga, bazuxhibnäjni rebejnğa, guredx-gunabni lo Dios.

<sup>37</sup> Dxejcti ronduxh guiraareni gudäözreni guejn Pabl, bachagro'renini.

<sup>38</sup> Guc-huınduxh lajzreni dxejc sa'csi räjp Pabl dirureni fisac lojni. Dxejcti huisa'nrenini lo barcw.

## 21

### *Huij Pabl guedx Jerusalén*

<sup>1</sup> Che basa'ntinu rexpejn Jesucrist ro'c, biu'nu neñ barcw, sionnu te lii nejz lo yuj ni laa Cos, ni tre' lo nisdoo. Che bara yääl, biđzıñnu lo xyuj Rodas ni tre'za lo nisdoo. Ro'c biriinu sionnu neñ barcw nez guedx Pátara.

<sup>2</sup> Che biđzıñnu ro' guejdxga, biđxälnu te barcw ni sää nez reguedx Fenicia. Dxejc biu'nu neñ barcwga te chonnu ro'c.

<sup>3</sup> Bahuiinu lo yuj Chipre ni tre' lo nisdoo, xładbäjcwnu tre' yujga, bideednu te laad. Siontinu nez Siria, ro'c biđzıñnu guedx Tiro cadro gule'creni cargw ni nuu barcwga.

<sup>4</sup> Ro'c biđxälnu rexpejn Jesucrist. Biannäurenı gajdz dxej. Baluii Sprit Dıan xten Diosreni te guniıreni lo Pabl, räjpreni:

—Na'c chäälü guedx Jerusalén.

<sup>5</sup> Che baza' gajdz dxej, biunejznu guejdxga. Dxejc guzaj reniguii, regu-naa, näjza rexi'nreni biriinu guejdxga. Ro' nisdoo bazuxhibnu te guredx-gunabnu lo Dios.

<sup>6</sup> Che abazadiidxnu sa'nu, nuure biu'nu neṅ barcw, biädla laareni gu-bisacreni rolizreni.

<sup>7</sup> Biriitinu guedx Tiro. Che bidzunnu ro' guedx Tolemada, gulujx xpiajnu biäjtnu neṅ barcw. Dxejc biohuiinu rexpejn Jesucrist ni yu' guejdxga, biännänureni tejtis yääl.

<sup>8</sup> Che bara yääl, biriinu guejdxga, sonnu guedx Cesarea. Che bidzunnu guejdxga, bionnu roliz Felipe, te dade' ni rusule' xtidx Dios lo bejn. Felipe gujc tej lo gajdz nigui nani gudis xhi gudajw rexpen Jesucrist nani xhet rajpd guedx Jerusalén. Rolizni huijia'nnu.

<sup>9</sup> Yu' tadj xindxapxteb Felipe. Dios badeed diidx guiniireni lo bejn.

<sup>10</sup> Xhidajl dxej guläjznu roliz Felipe. Laḷ ni dxunnu ro'c, bidzujn te nigui ni laa Agabo, biriini nez Judea. Ruzanij Dios xcäriejni te guiniini xtidx Dios.

<sup>11</sup> Che bidzujn loonu, cua' Agabo xsindoor Pabl, baliibni lagajc reni'ni näjza reṅaani, najni loonu:

—Anaj Sprit Dxan xten Dios: “Scree suliib rexpejn Israel ni yu' guedx Jerusalén nigui ni najc xtenni sindoore te gutedrenini ladzṅaa rebenzijt.”

<sup>12</sup> Che biejn diaagnu rediidxga, nuure näjza rebeṅ ro'c, gunabduxhnu lo Pabl na'c chääni guedx Jerusalén.

<sup>13</sup> Dxejc naj Pabl loonu:

—¿Xhicuent roontu? ¿Xhicuent runhuiintu lazá? Xhet najcdi jäüä neṅ latzguiib, xhet najcdi palga nungälä guetä guedx Jerusalén xcuent Jesucrist —räjp Pabl.

<sup>14</sup> Che naaddi Pabl gusiechlajzni, xhetru guniidiinu lojni. Räjptisnu lojni:

—Sugac nani rläjztis Dios.

<sup>15</sup> Che gudejd redxejga, bilucheenu rexhixtennu, biriinu guejdxga, son-tinu guedx Jerusalén.

<sup>16</sup> Gaii rexpejn Jesucrist ni najc beṅ Cesarea huisa'n nuure guedx Jerusalén. Ro'c huinäreni nuure roliz te dade' ni laa Mnasón, beṅ Chipre, yuj ni tre' lo nisdo. Laani galooli huililajzni xtidx Dios. Huijia'nnu rolizni, ro'c gulääznu.

### *Huihui Pabl Jacob*

<sup>17</sup> Che bidzunnu guedx Jerusalén, bibalazduxh rexpejn Jesucrist sa'csi siopnu ro'c.

<sup>18</sup> Che bara yääl huinänu Pabl lo Jacob näjza lo renani rnibee guidoo xten rexpejn Jesucrist.

<sup>19</sup> Dxejc gudääz Pablreni, bijni diidx xcuent tebgaj redzuun nani badeed Dios bejnni che guyunäjni rebenzijt nani di gac xpejn Israel, te biejn diajgreni xtidx Dios.

<sup>20</sup> Che biejn diajgreni xtidx Pabl, gulä'preni xpala'n Dios, räjpzaren lo Pabl: —Guejblu, sa'nu, anajnlulacti xhidalduxh xpejn Israel yu' nani rililajz xtidx Jesucrist luxh rapdaduxhrene leii xten toMoisés.

<sup>21</sup> Abiejn diajg rebejnre xcuentlu. Abiejn diajgreni garenca ruluiilu guiraa rexpejn Israel nani rbäjz neṅ reguejdx xten rebenzijt, ruliidxluren ni'c gusälreni bee rexi'nreni, na'cza chazanäjrruni rexcostumbrnu.

<sup>22</sup> ¿Xhini'c jiennu? Siejn diajgreni abidzujnlu ree, dxejc suchagsa'reni te jäädreni lojlu.

<sup>23</sup> Naj gunlu nani guiniinu lojlu. Yu' tadj resa'nu ree nani basa'nreni diidx lo Dios.

<sup>24</sup> Huinäreni, näjza luj bejn si'ctis gunreni si'c ni caj lo leii xten toMoisés, te gaclu naya nez lo Dios. Luj quixlu guiraa ni banijtreni, te che abasa'tu

guiraa ni nanab gac sajc guigaj yejctu si'c te seen te gacbee guiraa rebejn abasoobtu leii. Dxejcti gan guiraa rebejn didx-xhii najc rediidx ni bejn diajgreni xcuentlu. Te gacbeereni laaca rusooblu xleii toMoisés.

<sup>25</sup> Biädla rebenzijt nani huililajz xtidx Jesucrist, xhet najcdi, sa'csi abacuaanu lojreni, rie'tznu lojreni: na'c gautu recos nani gule'c bejn si'c gojn loj banäjb, na'c gautu rejn, niclaza bääl nani gurerejn, na'c guesnäjtu nani di gac chäältu.

### *Gunaaz rexpejn Israel Pabl*

<sup>26</sup> Che bara yääl, huinä Pabl guidap niguiiga, bejnreni si'c caj lo xleii toMoisés, biu'reni neñ xquidoo rexpejn Israel te huiye'tzreni lo bixhojz nen guidoo xhi dxej jiädnä teygareni te man te ju't rebixhojz remanga lo Dios.

<sup>27</sup> Si'c nanab gunreni gajdz dxej. Che ameer guiza' redxejga, bahuii rexpejn Israel ni siäd Asia lo Pabl neñ guidoroga. Gunaazreni Pabl, dxejcti gusloj cayujnreni biejj,

<sup>28</sup> guredxa'reni räjpreni:

—¡Coltaa xpejn Israel! ¡Coltaa te gacnäjtu nuure! ¡Bahuilaa! Niguiire najc nani rniyaj rexpejn Israel cadrotis rijni. Rulijdxni bejn te di chazanäjruren xleii toMoisés, riye'tzni lo bejn xhet sajcdi xquidoronure. Colhuilaa xho siädnäni ree beñ griegw, benzijt ni di gac xpejn Israel, te gundxuudxni xquidoronu —räjpreni.

<sup>29</sup> Si'c caniireni sa'csi te huält bahuiireni sanä Pabl Trótimos lo nezyuj. Trótimos najc te benzijt ni siäd guedx Éfeso. Naj cayujnreni xhigab laa niguiiga ni siädnä Pabl neñ xquidoro rexpejn Israel.

<sup>30</sup> Guideb guejdxga guyu' yärsia', bire' benguixhuj, bixa'treni yejc Pabl, gunaazrenini, gudobxhaxhreni Pabl, gulägajc renini neñ guidoroga. Biägajc ruertro xten guidoro.

<sup>31</sup> Lañ ni cayujnreni xhigab ju'trenini, yu' chu huiye'tz lo nani rnibee resoldaad ni caya'p guejdxga, räjpreni:

—Cayajc te bieiduxh neñ guejdxre.

<sup>32</sup> Guredxgajc comandant resoldaad näjza gaii capitán, ruxunreni bidzujnreni cadro tre' rebejn. Che bahuii rebejn lo comandant näjza resoldaad, guläjz caguijnreni Pabl.

<sup>33</sup> Dxejcti gubig comandant lo Pabl, gunibeeni baliib resoldaad ñaa Pabl con tiop cadenguuib. Dxejcti gunabdiidxni lo Pabl, räjpni:

—¿Chu luj? ¿Xhini'c bejnlu?

<sup>34</sup> Lo rebeñ xhidaalga yu' rexpejn Israel ni guredxa' tej diidx, yu'za reni guredxa' ste'ca diidx. Di comandant niujn gan niacbeen xhicuent cayajc biejj sa'csi cabedxa' guiraa rebejn. Dxejc gunibeeni chanä resoldaad Pabl cadro rbäjzreni.

<sup>35</sup> Che bidzunäj resoldaad Pabl ro' scaleer ni caj ro'c, biireni Pabl te bejnreni gan biunäjreni Pabl, sa'csi nialazduxh rebejn rlaizreni nugu'treni Pabl.

<sup>36</sup> Siädnañl guiraa rebejn Pabl, rbedxa'reni:

—Colgugu'tni.

<sup>37</sup> Che agojñ jiu' Pabl neñ yuro xten resoldaad, räjpni lo comandant con diidx griegw:

—Rlazä guiniä tiop diidx lo guejblu.

Räjp comandant lo Pabl:

—¡An rniilu xtidxsaä!

<sup>38</sup> An dilu gac niguii ni siääd naciön Egipto, nani gudiñäj gubier, nani huinä lo reyubijdz tajp mil niguii nani rugu't bejn.

<sup>39</sup> Dxejc räjp Pabl lojni:

—Narä nacä te beñ Israel, te beñ Tarso xten Cilicia. Sacduxh guejdxga lo reguedx Cilicia. Canabä gun guejblu te hueen, gusaan guejblu guiniä lo rebejnre.

<sup>40</sup> Dxejc cuäjb comandant guinii Pabl lo rebejn. Lal ni suga'ni lo scaleer basäab Pabl naani lo rebejn te gucdxireni. Che aguredxi rebejn, gusloj Pabl canii lojreni didxsaj hebreo, räjpni:

## 22

<sup>1</sup> —Guejbtu beñgool, guejbtu resa'ä, näjza la'tu dade'. Gucudiajgtu rextidä —räjpni.

<sup>2</sup> Che biejn diajgreni caniini didx hebreo, dxidujru guzuj rebejn. Räjp Pabl lojreni:

<sup>3</sup> —Narä nacä te xpejn Israel. Guedx Tarso xten Cilicia golä. Reepac gulaä. Lo Gamaliel bisiedä guijt. Baluisa'cni narä guiragajc releii xten retoxtadgoldoonu. Guideb xtipä basobä ni gunibee Dios. Gucä si'cpac ni najctu naj.

<sup>4</sup> Dxejcti bidxechduxhä loj renani huililajz xtidx Jesucrist, bagu'täzaren. Balibä xhidajl bejn, niguii näjza gunaa, con cadenguiib. Basäuäreni neñ latzguiib.

<sup>5</sup> Bixhojz ni sajcrü näjza guiraa rebengool ni sajcrü neñ xquidootu, saj guinii xhini'c benä. Laaren i baniidxreni guijt loä. Ni'c huinää lo rexpejn Israel ni yu' guedx Damasco, cadre hua'a te niniazä rebejn nani huililajz xtidx Jesucrist. Benä xhigab jädnääreni guedx Jerusalén te jäüreni neñ latzguiib, te gusacsireni rebejnğa.

### *Gunii Pabl xho huililajzni xtidx Jesucrist*

*(Hch. 9:1-19; 26:12-18)*

<sup>6</sup> Räjpzani:

—Dxejc hua'a guedx Damasco. Läidxejti ameer guidzunä guejdxga, chela bazanij te balro guideb gabi narä. Xhaguibaali siääd bajlğa.

<sup>7</sup> Biabrlöä lo yuj, dxejc biejn diagä te se' ni canii loä, najni: “Saulo, Saulo, ¿xhicient rusacsilu narä näjza rexpenä?” najni.

<sup>8</sup> Dxejcti räpä lojni: “¿Chuluj, Dad?” Najni loä: “Narä nacä Jesucrist ni siääd Nasare't, nani cagusacsiduxhlu.”

<sup>9</sup> Rebejn ni sanää bahuiloj bajlğa, bidxeljbrei, niluxh di diajgreni niejn xse' nani gunii loä.

<sup>10</sup> Räpä lojni: “Dad, ¿xhini'c gunä?” Dxejcti najni loä: “Huistie, huij guedx Damasco. Ro'c siniie te dade' lojlu guiraa ni guinibeä gunlu.”

<sup>11</sup> Bastujxh bajlğa loä, diru loä nien, ni'cni gunaaz resa'ä naä, sontinu guedx Damasco.

<sup>12</sup> Räjp Pabl:

—Guejdxga guläjz te niguii ni laa Ananías. Rusoobni guiraa releii xten toMoisés. Guiraa rexpejn Israel rni nadalajz lo dade'ğa. Biääd Ananías loä.

<sup>13</sup> Cuä'ä guzujni najni loä: “¡Saulo, betzä, bahuisac!” Lagajc dxejc biajc loä, bahuiä lojni.

<sup>14</sup> Naj Ananías loä: “Xtios retoxtadgoldoonu agulelu. Gule Dios luj te jiejn diajglu rediidx ni rlanjzi gunlu, te filojlu Jesucrist, Xindxan Dios, te jiejnza diajglu rextiidxpac Jesucrist.

15 Loj guiraa bejn susule'lu guiraa ni bahuilu nájza nani biejn diajglu.

16 ¿Xhicuent sojbtislu ro'c? Basquejn, huistie te tiobnislu. Huililajz xtidx Jesucrist, gurejdx lo Dios te gudzucajni rextojllu.”

*Gunii Pabl xhicuent baluini xtidx Dios lo rebenzijt*

17 'Che gubi'ä guedx Jerusalén, biu'ä neñ guidoro xten rexpejn Israel te guredx-gunabä lo Dios. Laḷ ni cabedx-canabä lo Dios, astoo gunixcalä,

18 dxejc bahuiä lo Jesucrist. Najni loä: “Basquejn, birii guedx Jerusalén sa'csi di rebejn chalilajz xtidxä ni gusule'lu lojreni.”

19 Narä räpäza lojni: “Dad, najnreni xho biu'ä guiraa reguidoo, gunazä guiraa rebejn nani huililajz xtiidxlu, gudinduxhäreni, basäuäreni neñ latzgüiib.

20 Che bacuaareni guij yejc Esteban nani gunii xtiidxlu, ro'c guzuä, cuäbä bejnreni si'c. Go'pä xhajb xten renani bagu't Esteban laḷ ni bacuaareni guij.”

21 Dxejcti naj Jesucrist loä: “Huij. Suxhalä luj zitduxh. Chäälü lo guiraa rebenzijt ni di gac xpejn Israel.”

*Bia'n Pabl neñ rolijzro xten resoldaad*

22 Bacuadiajg guiraa rebejn laḷ ni gunii Pabl rediidxga, dxejcti guredxa'reni, räjpreni:

—Coḷgu't niguiiga. Di nunyäjḷ guibajnruni.

23 Sanuutis cabedxa'reni. Gulääreni xcamangwreni, cacuaazareni yuyoḷ jiaa.

24 Dxejcti gunibee comandant lo resoldaad, räjpni:

—Coḷchanä Pabl neñ yuro xtenu. Ro'c coḷquiin Pabl te guiniini didxgulii, te gacbeenu xhicuent rbedxaduxh rebejn lojni.

25 Sanätireni Pabl. Entis baliibreni ni', naa Pabl con duguijd te niguijnrenini che gunabdiidx Pabl lo capitán, räjpni:

—¿La rajc rguijntu te beñ roman che gajdtu gacbee xhi dojl bejnne, ä? Et si'cti caj lo xleilü.

26 Che biejn diajg capitán xtiidxni, bidxejbni, huijni lo comandant, räjpni lojni:

—Coḷnati xhi gunnäjlu dade're, sa'csi najcni beñ roman.

27 Biädguxun comandant lo Pabl, räjpni:

—¿La gullii najclu beñ roman, ä?

Räjp Pabl lojni:

—Guliini.

28 Dxejcti räjp comandant:

—Narä badedä xhiroob meel te nacä beñ roman.

Dxejcti räjp Pabl lojni:

—Narä che goḷäli nacä beñ roman.

29 Che biejn diajg resoldaad nani niguijn Pabl si'c, baslagajcreni reduguijd ni naliib ni', naani. Che biejnza diajg comandant najc Pabl beñ roman, bidxejbni sa'csi gunibeeni biliib Pabl.

*Basule' Pabl diidx xcuentni lo rebixhojz nani rnibee rexpejn Israel*

30 Che bara yääl, rḷajz comandant gacbeeni xhicuent rḷajz rexpejn Israel ju't Pabl. Ni'c gunibeeni jääd rebixhojz ni sajcro nájza reguxhtis xten guidoro. Dxejcti biädnäni Pabl, bazujnini nez loj guiraa rebejn ni bire' ro'c.

## 23

1 Rdxelodzu'tz Pabl lo rebejn ni tre' ro'c laḷ ni räjpni lojreni:



—Narä gusule'ä tiop diidx lo guejbtu, beñ Israel, sa'ä. Guideb ni nabañä ruzobä xtidx Dios. Di lastoä guidxejb nez lo Dios —räjp Pabl.

<sup>2</sup> Che biejn diajg Ananías, bixhojz ni sajcru, xtidx Pabl, bidxecheduxhni, gunibeeni lo renani suga' gajxh lo Pabl ca'preni ro' Pabl.

<sup>3</sup> RäjP Pabl lo Ananías:

—Sigajcza ca'p Dios ro'lu, benguidx. Ro'c sobga'lu te gunlu yälguختis si'cni caj lo leii. ¿Xhicuent rujnlu nani rnii leiiga di nungäjġ gun bejn? ¿Xhicuent gunibeelu guda'preni ro'ä? —räjp Pabl.

<sup>4</sup> Reni suga' cuä' Pabl räjP lo Pabl:

—¿La dilu gacbee laa bixhojz ni sajcru xten Dios? Na'c guiniyajluni.

<sup>5</sup> Dxejcti räjP Pabl lojreni:

—Rexamigwä, dina niacbeä caniä lo bixhojz ni sajcru, sa'csi nanä agunii Dios: “Na'c guiniyajlu reni rnibee xpejnlu.” Si'c caj lo guijtZ ni bacuaa reni gunii xtidx Dios.

<sup>6</sup> Gucbee Pabl tiop cuaa najc reni tre' ro'c. Yu' reni najc beñ saducee, yu'za reni najc beñ farisee. Dxejc guredxa' Pabl räjPni lojreni:

—Sa'ä, narä nacä te beñ farisee, xi'nza te beñ farisee narä. Rililazä sibansac bejn lo rebengut, ni'c cabe'creni xquejä ree.

<sup>7</sup> Entis guniini si'c lojreni, chela gusloj caniireni lo sa'reni. Tiop cuaa gujcreni, gala' refarisee, sgala' resaducee.

<sup>8</sup> Di lajz resaducee chalii sibansac rebengut, dizareni chalilajz yu' rexangl Dios, dizareni chalilajz yu' aim xten bejn. Niluxh refarisee rililajz guiraa rediidxga.

<sup>9</sup> Guyu' te bieiro. Dxejcti huisulii gaii farisee nani najn leii, gusloj caniduxhrene, räjPreni:

—Di niguiire gac benguidx. Palga gunii te angl xten Dios o te togool lojni, alga Dios tilnäjnü, dxejc sidxechnäj Diosnu.

<sup>10</sup> Che gusloj cabedxaduxhrene lo sa'reni, bidxejb comandant, andi ju'treni Pabl, caxha'treni yejcn. Dxejcti gunibeeni biäjt resoldaad cadro suga' Pabl. Guideb xtijpreni gulääreni Pabl galäii rebejnğa huinäsacrenini neñ yuro xtenreni.

<sup>11</sup> Che biu' guxhijn, baluiloj Jesucrist lo Pabl, guzujni cuä'ni, räjPni lojni:

—Batijp lajzlu, na'c guidxejb, Pabl. Si'cni basule'lu xtidxä guedx Jerusalén, sigajcza nanab gusule'lu xtidxä guedx Roma.

### *Rexpejn Israel bejn xhigab nugu'treni Pabl*

<sup>12</sup> Che bara yääl, bachagsa' gaii xpejn Israel, bejnreni xhigab nugu'treni Pabl. RäjPreni lo sa'reni:

—Na'c guidaunu, na'cza guidunnu nis che guigu'tlinu Pabl —räjPreni.

<sup>13</sup> Si'cti tiuu niguii bia'n diidxga.

<sup>14</sup> Bidzujnreni lo rebixhojz näjza rebengool, räjPreni lojreni:

—Abia'nnu diidx, xhet guidaudinu, xhetza guidaudinu palga dinu guigutx-gaa Pabl —räjPreni—.

<sup>15</sup> Naj la'tu näjza guiraa rebengool ni rnibee rexpejn Israel, colguxhaġ diidx lo comandant te guixee jiädnäni Pabl lojtu. Coljejn si'c ni rlanjtu jiejnru diajtu diidx xcuent Pabl. Che jiädnä comandant Pabl ree, nuure sugu'tnuni lo nezuy che gajdni guidzujn ree —räjp reniguiiga.

<sup>16</sup> Niluxh biejn diajg xi'n bisiajn Pabl cabäzxhiga'tz reniguiiga te ju'treni Pabl, huijni royuro xten resoldaad. Che bidzujn, biu'ni räjPni lo Pabl rediidx ni biejn diajgn.

<sup>17</sup> Dxejcti gurejdx Pabl te capitán, räjPni lojni:

—Huinälaa bi'nre lo comandant te gäbni te diidx lojni.

<sup>18</sup> Huinäti capitán bi'nga lo comandant, räjpni lo comandant:

—Pabl, nani niäu neñ yuro xten resoldaad, gunab loä jiädnälaä bi'nre lo guejblu te guiniini te diidx lo guejblu —räjpni.

<sup>19</sup> Dxejc gunaaz comandant naa bi'nre, huinäni te laad cadro rut jiejni diajñ xtiidxreni, dxejc räjpni lojni:

—¿Xhini'c rlanjlu guiniilu loä?

<sup>20</sup> Dxejc bazejñ diidx, räjpni loj comandant:

—Abia'n te cuaa xpejn Israel diidx siniabreni lo guejblu jiädnä guejblu Pabl ro jusgaad guixee. Sujnsireni si'c ni rlanj jiejnru diajgreni diidx xcuent Pabl.

<sup>21</sup> Na'c chalilajz guejblu xtiidxreni. Tiu niguii sibäzxhiga'tz cuä' nezyuj te ju'treni Pabl. Abia'nreni diidx direni gau, dizareni yä palga direni jutxga Pabl. Naj cabäjtisreni guxhaļ guejblu diidx sinä guejblu Pabl ro jusgaad.

<sup>22</sup> Che biejn diajg comandant diidxga, basaanni sii bi'nga rolizni, räpxgaani lojni:

—Rut lojdipac gäblu guniilu diidxre loä.

### *Huij Pabl lo Pels ni najc gubernadoor*

<sup>23</sup> Dxejcti gurejdx comandant tiop capitán, räjpni lojreni:

—Colgutojp tiop gayuu soldaad, chää guedx Cesarea näjza gayonbitzoo soldaad ni bijb cabaii, näjza tiop gayuu soldaad ni ca' spaad. Rcgaa guxhijn guiriireni ree.

<sup>24</sup> Colquil tiop cabaii cuib Pabl te xhet gacdi Pabl cheni chanätuni lo gubernador Pels —räjpni.

<sup>25</sup> Dxejcti bejn comandant te guijt chanäreni lo gubernadoor.

<sup>26</sup> Loj guijtza rni scree: “Gubernador Pels, nani sacduxh. Narä, Claudio Lisias, ruxhalä xtiixios lo guejblu.

<sup>27</sup> Rediidxre rucuaä lo guejblu. Gunaaz rexpejn Israel niguiire, luxh paru dina nidzunga'cä con resoldaad, nugu'trenini. Che guceä najcni beñ roman, guläänuni ro'c.

<sup>28</sup> Rlazä niacheä xhi quej rbe'creni, ni'c huanääni lo junt xten rexpejn Israel ni rnibee guidoro.

<sup>29</sup> Dxejc guceä requej ni rbe'creni najc ganax xcuent leii xtenreni, niluxh xhet bejndini te nungäļ guetni, niclazä nanab jiäuni neñ latzguiib.

<sup>30</sup> Che baxhalreni diidx loä cabäzxhiga'tz rexpejn Israelni te ju'treni dade're, baxhalga'cäni lo guejblu. Agunibeäza jiädle'c rexpejn Israelre xquejreni lo guejblu. Ni'ttis rniä lo guejblu”, si'c caj lo guijt ni bejn comandant.

<sup>31</sup> Che biu' guxhijn, huixii resoldaad Pabl sanärenini guedx Antípatris si'cni gunibee comandant gunreni.

<sup>32</sup> Che bara yääl, gubi' resoldaad nani guzaj ni'reni. Resoldaad ni bijb cabaii guzanäj Pabl guedx Cesarea.

<sup>33</sup> Che bidzujñ redee Cesarea, badeedreni xquijt comandant lo gubernadoor, huinäzarenini Pabl lojni te biembeenini.

<sup>34</sup> Che gulujx bilni guijtza, gunabdiidxni lo Pabl:

—¿Caro siäädlu?

Che guceeni siääd Pabl Cilicia,

<sup>35</sup> räjpni lo Pabl:

—Guidzujñsi rexpejn Israel ni cadxehnäj luj, sucuadiaggacä xtiidxlu —räjp gubernadoor.

Gunibeeni ga'p resoldaadni neñ yuro xten Herodes.

## 24

*Gunii Pabl xtiidxni lo Pels*

<sup>1</sup> Gudejdti gaii dxej, dxej bidzujn Ananías, bixhojz ni sajcrú, nájza gaii rebengool xten guidoro, nájza te dade' ni laa Tértulo ni gunii xcuentreni. Gusloj cabe'cni xquej Pabl lo gubernadoor.

<sup>2</sup> Che biädnäreni Pabl, gusloj Tértulo cabe'c xquej Pabl lo gubernadoor. Räjpní lo gubernadoor:

—Xquixtioste guejblu dxiduxh nabañnu. Cayacnäduxh guejblu laadxnu con redzunsacdúxh ni cayujn guejblu.

<sup>3</sup> Xquixtiosduxh guejblu, gubernadoor Pels, xcuent guiraa redzunsac'ni ni rujn guejblu guiraa nejz.

<sup>4</sup> Luxh na'cru gusieednu guejblu, gucuardiaglaa guejblu tiop diidx.

<sup>5</sup> Agucbeenu xho najc niguiire. Benguidxduxhni. Cadrotis řijní rujnni bieje y lo rexpejn Israel. Laani rnibee te cuaa ni laa nasaren, nalajznu rebejn nani rililajz xtidx Jesucrist ni biäd guedx Nasare't.

<sup>6</sup> Rlajzlini nuxhiñni xquidoronu, ni'c gunaaznuni. Niennu te junt te lagajc nuure niennu yälguxhtisni si'cni caj lo xquijznu.

<sup>7</sup> Niluxh bidzujn comandant Lisias nájza resoldaad. Diptis badzucajreni niguiiga ladznaanu.

<sup>8</sup> Laani gunibeeni lo guejblu jiäd reni rbe'c xquejni. Naj lagajc guejblu sajc guiniabdiidx lojni te gacbee guejblu gulií guiraa requej nani rbe'cnu xcuentni —räjp Tértulo.

<sup>9</sup> Dxejcti guiraa rexpejn Israel ni suga' ro'c räjpní guliica xtidx Tértulo.

<sup>10</sup> Dxejcti bejn gubernadoor seen lo Pabl te guiniini. Baze'c Pabl diidx, räjpní lojni:

—Rbaaliza lazä guze'cä diidx lo guejblu, sa'csi anana agujc xchero lacti huen rujn guejblu yälguxhtis nacióñ Israelre —räjp Pabl—.

<sup>11</sup> Gutzbitio'p dxejtis bidzunä guedx Jerusalén te saganä Dios. Najn rebejn xhi dxej biu'ä Jerusalén, guyasi guniidxreni diidx.

<sup>12</sup> Nicla tej dina nichagdilä bejn nen guidoro. Nicla tej dina niunä bieje nen reguidobáz, nicla ro nezyuj.

<sup>13</sup> Agule'creni quej xtenä lo guejblu, niluxh nicla tej redzuunga dina niunä. Di gacdi guluipacreni lo guejblu gulií najc xtiidxreni.

<sup>14</sup> Rniliápac lo guejblu: Rañä Xtios retoxtadgoldoonu. Jesucrist baluii xho gansa'cnu Dios. Rililazä rextiidxni. Xhidalduxh rexpejn Israel rniyaj xho basule' Jesucrist gan bejn Dios. Ruzobä guiraa li releii xten to Moisés. Rililazä guiraa rextidx Dios ni bacuaa reni gunii xtidx Dios.

<sup>15</sup> Rililazä xtidx Dios si'c rililazza rebejnre xtidx Dios. Si'c ni najnreni, si'cza nanä sidzujn te dxej che guibañsac rebengut, rebenguidx sigajc rebsa'c.

<sup>16</sup> Ni'cni racbeä laaca nabañä guiraa dxej, di lastoä guidxejb, nicla nez loj bejn niclaza nez loj Dios, sa'csi rut rajcđi guiliäs dixhii xcuentä.

<sup>17</sup> Räjpní Pabl:

—Agujc xchej yu'ä zijt, lajdx garenca bejn, naj gubinää meel ni baxhal reben nejzga te gudedäni lo rebejn ni xhet rajpđi. Biädnääza gojn xtenä gudedäni lo Dios.

<sup>18</sup> Ni'c sanää guidoro. Ro'c bidxäjł rexpejn Israel ni siädä Asia narä. Agucnayaä si'c ni rnibee xleiinu. Xhet beñxidajłđi suganää, xhetza bieyjđi cayunä.

19 ¿Con rebejn̄ga naj? Te cue'creni quej lo guejblu palga yu' xhini'c rdx-echñäjreni narä.

20 O guiniiza redee palga yu' xhini'c et laadi benä che suga'ä nez loj junt xten guiraa rebixhojz ni rnibee näjza rebengool lo guedx Jerusalén —räjp Pabl—.

21 Tejtis diidx guniä che suga'ä galäiireni, guredxa'a räpä lojreni: sa'csi rililazä sibansac guiraa rebejn̄ lo rebengut, ni'c biädnätu narä lo rebejn̄re —si'c guniä lojreni.

22 Che biejn diajg Pels xtidx Pabl näjza sa'csi najne'ni xcuent diidx nani baluii Jesucrist, basoobni stee dxej guidxagsac sa'reni räjpni lojreni:

—Che jiäädli comandant Lisias dxejc gunä yälguxhtis —räjp Pels.

23 Dxejcti gule Pels te capitán ni rnibee te gayuu resoldaad ga'p Pabl. Niluxh räjpni lojni gusaanni gun Pabl nani rlanjtsini gunni. Na'cza gudxojjni jiääd rexamigwni te fiireni lojni.

24 Che gudejd balti dxej, gubi' Pels, biädnäni chääl̄ni Drusila. Drusila najc beñ Israel. Dxejc gurejdx Pels Pabl te gusule'ru Pabl xtidx Jesucrist.

25 Gunii Pabl xho nanab guibansa'c bejn̄ nez loj Dios si'c ni gunibee Dios guibajn̄ bejn̄. Nanabza gacbee bejn̄ na'c gun bejn̄ cos guijdx, sa'csi sidzujñ dxej gac Dios juejz loj guiraa rebejn̄ te fiini xhi bejn̄reni. Racslesi Pels tant bidxejbni biejn diajgni diidxga. Räjpni lo Pabl:

—Huij naj. Sibedxsacälu che latä stee —räjp Pels.

26 Naa Pels sudeed Pabl meel lojni te guslaanini, ni'c masru guet-guejt gurejdxnini te guninäjnini.

27 Si'c gudejd tiop ijz. Dxejc birii Pels gubernadoor. Dxejcti biu' Porcio Festo, gujçni gubernadorcoob. Niluxh Pels rlanjz chanälajz rexpejn̄ Israelni, ni'c basa'nni niäusijc Pabl.

## 25

### *Gunii Pabl xtiidxni lo Festo*

1 Che biu' Festo gujçni gubernadorcoob xten reguejdxga, bia'nni guedx Cesarea choñ dxej. Dxejc biriini ro'c sääni guedx Jerusalén.

2 Che bidzujñni guejdxga, rebixhojz nani rnibee näjza reniguii ni sajçru lo rexpejn̄ Israel biääd lo Festo. Gusloj cabe'creni xquej Pabl lojni. Gunabduxhreni lo Festo

3 sa'csi rlanjzreni gunni te huen laareni, guinibeeni jiädnäreni Pabl guedx Jerusalén. Si'c gunabreni, sa'csi abenxgaareni xhigab cuäzchiga'tzreni te ju'treni Pabl lo nezyuj.

4 Dxejcti räjp Festo lojreni:

—Suniau Pabl guedx Cesarea. Di gaclaa guibi'ä guedx Cesarea.

5 Suchää reniguii ni sajçru lo sa'tu guedx Cesarea, te ro'c cue'creni xquej Pabl loä, don la yu' xhi dzunguijdx bejn̄ni —räjpni.

6 Che gudejd si'cti tzuu dxej, gubi' Festo guedx Cesarea. Che bara yääl, gurejni lo yagxhil xten gubernadoor, gunibeeni biääd Pabl lojni.

7 Che bidzujñ Pabl lojni, biääd rexpejn̄ Israel nani biääd guedx Jerusalén ro'c. Guzujreni guideb gabi Pabl. Gule'creni xhidalduxh xquej Pabl, luxh di nijacdi nuluiireni guliipac xtiidxreni.

8 Dxejcti räjp Pabl lojreni:

—Niçla tej latsiaj dina niunä, dina niunä latsiaj loj leii xtenuu, dizana niunä latsiaj lo guidoro ni sojb guedx Jerusalén, dizana niunä latsiaj loj xgubier César.

<sup>9</sup> Dxejcti Festo, sa'csi rlanjzni guiliäsni xpala'nni loj rexpejn Israel, räjpni lo Pabl:

—¿La sisiajlu guedx Jerusalén te cue'c rexpejn Israel xquejlu ro'c nezloä, ä?

<sup>10</sup> Dxejcti räjp Pabl lojni:

—Naj suga'a loj guejblu, ni gule reii César. Guejblu rnibee guiraa reguedjdxre. Ree nungäjł cue'creni xquejä lo guejblu, xhet guedx Jerusaléni. Ananchee guejblu xhet latsiajdi benä lo rexpejn Israel.

<sup>11</sup> Palga nacä te benguijdx, o palga yu' xhi latsiajdi benä te nungäjł guetä, xho dina xcäbä guetä. Palga xhet latsiajdi benä nani canii rexpejn Israel benä, dxejc rutliidi sajč guteed narä ladznaareni. Suchale'creni xquejä lo César nani najc reii xten reben roman —räjp Pabl.

<sup>12</sup> Che guninäy Festo reguxhtis xten xquidoro rexpejn Israel, räjpni lo Pabl:

—Luj gunablu chäälü loj reii César. Mbaj. Sijlu lo reii César —räjp Festo.

### *Huixiireni Pabl huinärenini lo reii Agripa*

<sup>13</sup> Che gudejd balti dxej, bidzujñ reii Agripa näjza chäälni Berenice guedx Cesarea. Biädhuiireni gubernadoor Festo.

<sup>14</sup> Che guyu'reni ro'c xchej, bij Festo diidx lo Agripa xcuent Pabl. Räjp Festo lojni:

—Ree niäusijc te niguii ni laa Pabl ni basa'n Pels.

<sup>15</sup> Che guyu'ä guedx Jerusalén, rebixhojz ni rnibee näjza rebengool xten rexpejn Israel gule'c xquejni loä. Rlanjzreni guinibeä guetni.

<sup>16</sup> Rápä lojreni: “Di leii xten naciön roman gusaan guet te bejn palga di bejn jiädxgaa te guiniireni nez lojpacni xhi bejn niguiiga, te guzejcza niguiiga diidx xcuent requej, te guiniini la guliireni.”

<sup>17</sup> Ni'cni che biääd rexpejn Israelga lo guejdxre, che bara yääl guregacä lo yagxhil xten gubernadoor. Dxejc gunibeä huixiireni Pabl guzuj nez loä.

<sup>18</sup> Benä xhigab pet yu' xhi cosro bejnñi. Luxh che gusloj cabe'creni xquejni, gubegacä xhet latsiarodi bejn Pabl.

<sup>19</sup> Alga cadilñäjrenini xcuent xleiireni, xcostumbrenni. Guniizareni xcuent te niguii ni laa Jesucrist. Agujñni, niluxh canii Pabl gubansacni lo rebengut.

<sup>20</sup> Guxii nanä xcuent sa' diidxre, ni'cni gunabdidxä lo Pabl top sicäjbni chanääni guedx Jerusalén te ro'c cue'c rexpejn Israel xquejni.

<sup>21</sup> Dxejc che gunii Pabl lojpac reii César chale'c rexpejn Israel xquejni, ni'c gunibeä jiäusijcni lał ni gac guxhaläni lo César —räjp Festo.

<sup>22</sup> Dxejcti räjp Agripa lo Festo:

—Narä rlazäza jiejn diagä xtidx niguiiga —räjp Agripa.

Dxejcti räjp Festo lojni:

—Guixee gucuadiajglu xtiidxni —räjpni.

<sup>23</sup> Che bara yääl, biääd Agripa näjza Berenice, luxh sucheduxhreni. Näjza recapitán ni sajczru näjza rebejn ni sajczru lo guejdxga biu'reni nen yuro xten Festo. Dxejc gunibee Festo biääd Pabl.

<sup>24</sup> Dxejcti räjp Festo lo guiraa reni re' nen yuro:

—Reii Agripa näjza guiraa rebejn ni tre' ree, colcuadiajg. Colhuii lo niguiire. Reni rnibee xpejn Israel guedx Jerusalén näjza guejdxre agule'c xquejni loä, canabduxhreni guetni.

<sup>25</sup> Niluxh narä rchaloä xhet bejndini te nungäjł guinibeä guetni. Luxh lagajc laani gunabni chääni te gac César juejz lojni, ni'c runä xhigab guxhaläni lojni.

<sup>26</sup> Naj dina ganä xhini'c gucuaä lo guijtz te guxhaläni lo César ni rnibee narä. Ni'c biädnääh niguiire nez lo guiraatu, ganid nez loj guejblu, rei Agripa, filaa guejblu te gaxäjsi che aguiniini xtiidxnü lo guiraanu, sidxälä xhi diidx gucuaä lo guijtz ni chää lo César.

<sup>27</sup> Narä runä xhigab di nungäjl guxhalä niguiire ni niäu latzguiib lo César palga di gacdi gusule'ä xhi quej xcuentni cabe'c rexpejn Israel loä.

## 26

### *Gunii Pabl rextiidxnü lo rei Agripa*

<sup>1</sup> Dxejcti räjp Agripa lo Pabl:

—Gunilaa xtiidxlu loonu.

Dxejcti guläs Pabl naani, gusloj cagusule'ni diidx lojreni. Räjpni:

<sup>2</sup> —Reii Agripa, rbalazduxhä sa'csi sajc gusule'ä diidx lo guejblu, sa'csi naj suga'cä diidx xcuent guiraa requej ni gule'c rexpejn Israel.

<sup>3</sup> Sa'csi guejblu nanduxh xcuent guiraa releii xten rexpejn Israel. Najnza guejblu xhicuent rdxagdijl sa'reni. Ni'c rniabduxhä na'c jieed guejblu gucuaadiaglaa guejblu guiraa rextidxä.

<sup>4</sup> Räjpza Pabl:

—Guiraa rexpejn Israel nanchee xho nacä che gucäli biuux guedx Jerusalén. Galooli najc guedx Jerusalén ladxä.

<sup>5</sup> Galooliza numbeereni narä, malaii guicäjpreni gucä te farisee nani bazobduxhru xleii nu si'cni rililajznu.

<sup>6</sup> Naj suga'a ree, rlaizreni jäüa sa'csi rililazä diidx nani bia'n Dios con rextadgoldoonu.

<sup>7</sup> Guitzubitiop cuaa rexpejn Israel huililajz siliäs Dios guiraa rebengut te guibañsacreni. Ni'cni bazuxhijbreni lo Dios dxej-yääl. Naj rniliä lo guejblu rei Agripa, sa'csi rililazä siliäs Dios guiraa rebengut te guibañsacreni, ni'cni rlaizreni gusaureni narä.

<sup>8</sup> Palga abejn Dios xhigab guiliäsni guiraa rebengut te guibañsacreni, ¿xhicuent di lajztu chalii xtidx Dios?

<sup>9</sup> Räjpza Pabl:

—Narä benäza xhigab galoo nanabpac guidxe'chä loj rexpejn Jesucrist ni siäd Nazare't, ni'c batedäreni trabajwduxh basäuäreni neñ latzguiib.

<sup>10</sup> Guiraa recosre benäza guedx Jerusalén. Baniidx rebixhojz ni rnibee guijtz loä te basäuä rexpejn Jesucrist neñ latzguiib. Che biäuren neñ latzguiib, narä gule'cä xquejreni te gujtreni.

<sup>11</sup> Balti huält basacsiduxhäreni lagajc neñ reguidobäz te niniyajreni Jesucrist. Luxh basacsiduxhäreni, hua'a guideb nez reguedxzijt te ro'c huisacsä rexpejn Jesucrist.

*(Hch. 9:1-19; 22:6-16)*

<sup>12</sup> Räjpza Pabl:

—Ni'c sa'a nez guedx Damasco, ca'a guijtz ni baniidx rebixhojz ni rnibee.

<sup>13</sup> Rniliä lo guejblu, rei, si'cti läidxej, bahuiä te bajl ni siäd xhaguibaali. Rsanijruni loj gubijdx. Basanijni guideb gabi cadro suga'a näjza reni sanä.

<sup>14</sup> Che biabrloonu lo yuj, bejn diagä xse' te ni canii loä con didx hebreo: “Saulo, Saulo, ¿xhicuent rusacsilu narä näjza rexpeñä? Che rusacsilu narä, lagajc luj rdejdlu trabajw, si'c te gon ni rucuanii' yejc garu'ch.”

<sup>15</sup> Dxejcti räpä lojni: “¿Chu luj Dad?” Dxejc najni loä: “Narä nacä Jesucrist nani cagusacsiduxhlu.

<sup>16</sup> Huistie, gusulii. Narä baluiloä lojlu sa'csi rlazä gaclu te xpenä. Aguleälu te gusule'lu lo rebejn guiraa ni bahuilu nadxej, näjza guiraa recos ni churu guluia lojlu.

<sup>17</sup> Naj suxhalälu loj rexpejn Israel näjza lo rebenzjijt nani di gac xpejn Israel. Che gusacsí rexpejn Israel näjza rebenzjijt luj, sacnäduxhälu, te di ju'treni luj.

<sup>18</sup> Gacnää lastooreni te che jiejn diajgreni xtidxä, chalilajzrenini, diru xcäriejnreni gac nayääl, sianij xcäriejnreni. Dxejc dirureni gusoob xtidx Bendxab ni rnibee rebendxab, sa'csi susoobreni xtidx Dios. Che chalilajzreni rextidxä, sudzucäj Dios xtojlneni. Dxejcti suchaag Diosreni loj renani anajc benñaya sa'csi basoobreni xtidx Dios, huililajzreni xtidxä.”

<sup>19</sup> Räjpa Pabl:

—Ni'cni rniliä lo guejblu, reii Agripa, cayunä si'cni naj Jesucrist löä gunä che baluilojni löä.

<sup>20</sup> Gunixgaä xtiidxni lo reben Damasco. Röpä lojreni: “Colgusiechlazj, colgusoob xtidx Dios. Colyujn dzunsa'c te gacbee rebejn abasiechlazjtu, arusoobtu xtidx Dios.” Si'cza guniä lo reben Jerusalén, näjza lo rebejn ni yu' reguedx Judea, näjza lo rebenzjijt ni di gac xpejn Israel.

<sup>21</sup> Sa'csi benä si'c, gunaaz rexpejn Israel narä nen guidoro, rlazjreni nugu'treni narä.

<sup>22</sup> Naj racnäj Dios narä, naj sanuutis cagusule'ä rediidxga lo guiraatis bejn. Loj rebejn ni xhet rajpdi sigajc loj rebejn ni rapduxh. Rusule'ätis nani caj lo guijt nani bacuaa toMoisés näjza guiraa reniguii nani gunii xtidx Dios. Laareni galooli guniireni xcuent xhini'c gac naj.

<sup>23</sup> Najreni sidejd Crist trabajwduxh, sugu'trenini. Niluxh sa'csi ganiddoo laani guibansacni lo rebenjut, ganiddooza laani suluiini loj rexpejn Israel näjza loj guiraa rebenzjijt guliipac xtidx Dios, sibansac bejn lo rebenjut, si'c ni guniini galooli.

### *Di Agripa nililajz xtidx Jesucrist*

<sup>24</sup> Laḷ ni canii Pabl rediidxga lojreni, dip gunii Festo, räjjni lo Pabl:

—Pabl, yejclu cayajc. Pet sa'csi nanduxhlu guijt ni'c cayajc yejclu.

<sup>25</sup> Dxejcti räjp Pabl lojni:

—Rniliä lo guejblu dad gubernador Festo, xhet rajcdi yecä. Ganax didxlii caniä.

<sup>26</sup> Ree suga' reii Agripa. Laani nancheeni guiraa rediidxre, ni'c guyasi caniä rediidxre lojni, dizana guidxebä sa'csi anajnni gullii guiraa ni gujc, sa'csi xhet xhiga'tzdi gujcreni.

<sup>27</sup> Guejblu reii Agripa, ḷla rililajz guejblu xtidx reniguii nani bacuaa xtidx Dios, ä? Nancheä rililajz guejblu diidxga —räjp Pabl.

<sup>28</sup> Dxejcti räjp Agripa lo Pabl:

—Tuche'nsi riäädx gunlu gan chalilazä xtidx Jesucrist te gacä xpen Dios.

<sup>29</sup> Räjp Pabl lojni:

—Xhet najcdi palga guxii o xhidajl cayäädx, narä canabä guniidx Dios chalilajz guejblu xtiidxni si'c rililazä xtiidxni, nägajcza guiraa reni cacuadiajg xtidxä te gactu si'c nacä, niluxh xhet näjdi resa' cadeñre —räjp Pabl.

<sup>30</sup> Dxejcti huisu Agripa, Festo, Berenice, näjza rebejn ni sobganäjreni.

<sup>31</sup> Che gubigreni stelaad, räjpreni lo sa'reni:

—Niguiire xhet bejndini te guetni, xhetza bejndini te jääuni.

<sup>32</sup> Dxejcti räjp Agripa lo Festo:

—Paru dini niniab chääni lo César, sajc nuslaanuni.

## 27

*Biri Pabl säa nez guedx Roma*

<sup>1</sup> Basoobtireni dxej ni niu'nu neñ barcw te chonnu Italia. Dxejc bateedreni Pabl näjza sgaii bejn nani niäuzä lo capitán ni laa Julio. Rnibee Julio te gayuu soldaad, najcreni te cuaa ni laa Augusto.

<sup>2</sup> Näjza te dade' ni laa Aristarco guzaj, siädni guedx Tesalónica xten Macedonia. Biu'nu neñ barcw ro' guedx Cesarea. Barcwga siäd guedx Adramitio. Biriitinu, najc xhigab teednu nez reguejdx nani yu' ro' nisdoo lo reyuj xten Asia.

<sup>3</sup> Che bara yääl guläzj barcw ro' guedx Sidón. Huenduxh gujc Julio con Pabl, basaanni bihüii Pabl rexamigwni ni yu' guejdxga te bahuiireni Pabl, badeedreni xhi rquiinni.

<sup>4</sup> Che säasac barcw lo nisdoo, bideednu stelaad Chipre, yuj ni tre' lo nisdoo, sa'csi säab te beduxh, ni'c naga' Chipre xladbäjägwnu, te guxiiru rda' bej loonu.

<sup>5</sup> Che sonnu neñ barcw, bideednu xnisdoo reguedx Cilicia näjza xnisdoo reguedx Panfilia, te bidzunnu ro' guedx Mira xten Licia.

<sup>6</sup> Ro'c bidxäj capitán xten resoldaad stee barcw ni siäd guedx Alejandría. Agojl chää barcwga Italia. Bateedtini guiraanu lo barcwga.

<sup>7</sup> Balti dxej chäigaj sonnu lo nisdoo. Trabajwduxh bidzunnu lo nisdoo ro' guedx Gnido, sa'csi entis cabi' beduxh nez cadro sonnu. Ni'c trabajwduxh bideednu xladbäjägw yuj Creta ni tre' lo nisdoo xladbeenu. Gudejdnu guedx Salmón.

<sup>8</sup> Dxejcti chäiduxh sonnu neñ barcw lo nisdoo nez cuä' yu Creta; si'ttis gujc bidzunnu te lajt ro' nisdoo ni laa Buenos Puertos cadro guxii säab bej. Gajxh ro'c tre' guedx Lasea.

<sup>9</sup> Agujc balti dxej cayaclaanu, luxh agudejdza dxej ni rucua'n rexejn Israel, guxii riäädx chaa ijz. Rebäire di bejn chää neñ barcw sa'csi yuduxh riesgw lo nisdoo, ni'c balijdx Pabl rebejn,

<sup>10</sup> räjpni lojreni:

—Rexamigwä, runxgää bis guejbtu, palga chonnu neñ barcw chanuunu xnejznu, sajce te liädxduxh. Sinitloj cargw, sibijxh barcw, luxh silo' xhidajl bejn, —räjpni.

<sup>11</sup> Niluxh di capitán xten resoldaad niu xtidx Pabl. Biuruni xtidx nani rusaj barcw näjza xtidx baxhuaan xten barcw.

<sup>12</sup> Luxh sa'csi lajtga dini gajc huen tedreni rebäii nalduxh, bejnreni xhigab hueenru guiriinu ro'c te chonnu guedx Fenice ni tre'za lo yu Creta, sa'csi di bej guibiduxh ro'c. Hueenru ro'c guilääznu ted rebäinajl, räjpreni.

<sup>13</sup> Ni'c che gusloj cabi' te bebäz nez lad sur, naareni pet xhet najcdi guiriinu lo nisdoo con barcw. Dxejc baslaareni barcw, sontinu ro' nisdoo gajxh cuä' Creta.

<sup>14</sup> Niluxh di niacclaa gusloj te nisguipeduxh birii nez redajn xten Creta.

<sup>15</sup> Gunaaz bejga barcw, diru gacdi gusajrenini. Basa'ntireni sanä bejga barcw cadrotis rlajzni.

<sup>16</sup> Siädgobiuj barcw te canuu. Che bidzunnu stelaad te yuje' ni tre' lo nisdoo ni laa Claudia, guxiiru cabi' beduxhga. Dxejcli bejnreni gaan guläsreni canuu neñ barcw.

<sup>17</sup> Che basälnu canuu neñ barcw, cua'reni gaii duro te baliibreni barcwro, bateedreni gaii duu xque' barcw te na'c guibiñi. Cadxejbreni te di chachu' barcw lo yujxh ni laa Sirte ni yu' neñ nisdoo. Ni'c guläjtreni ladro ni rniaaz bej te rusajni barcw, gudixhreni lajdga neñ barcw. Sanäti beduxhga barcw cadrotis rlajzni.



18 Che bara yääl caguscua' beduxh barcw lo nisdoo. Sas basälreni che'n cargw lo nisdoo te bicharu barcw.

19 Ni riojn dxej, lagajc laareni basälreni lo nisdoo guiraa xtrast barcw.

20 Che agujc balti dxej niäu lo gubijdx, diza rebale' niën xhaguibaa sa'csi laltis cayajb nisguipeduxhga, biennu xhigab guiraanu sejtnu.

21 Xchero rut rlanjdi gau. Dxejc gusuj Pabl galäii rebejn räjpni lojreni:

—Rexamigwä, paru nucuadiajg guejbtu xtidxä, na'c niriitu xyuj Creta, di läädxre niajc, dizanu nidejd trabajwduxhre.

22 Niluxh colcuedxci lastootu. Niclatej bejn ni siääd lo barcw di guet. Barcwtis sinitloj.

23 Nacä te xpejn Dios, runä xhitis ni rnibeeni gunä. Nayääl biädsuj te xangl Dios cuä'ä,

24 najni loä: “Na'c guidxejblu Pabl. Nanabpac chääl lo reii César. ¡Bahuilaa! Abasalajz Dioslu reni siädnälu; nicla tej reni yu' neñ barcwre di guet”, najni loä.

25 Ni'cni caniä lo guejbtu, na'c guidxejbtu. Narä rililazä xtidx Dios. Rililazä sisiojb xtidx Dios si'c ni naj xangl Dios loä.

26 Niluxh yu' cadre chalaj barcw lo yujxh neñ nisdoo gajxh lo te yuje' ni tre' neñ nisdoo —räjp Pabl.

27 Si'cti tiop xman balanaa beduxhga barcw nezre, nezrec lo nisdoo ni laa Adria. Pet garol yääl ni bejn reniguii ni ruzaj barcw xhigab abidzujn barcw gajxh lo yuj,

28 ni'c bastejbreni te guiib lo duu xhajñ nisdoo, te barexhreni ro'c, dxejc gucbeereni najc nisdoo jäät si'cti galbitzubixho'p metr. Che guzaj barcw stelabäze', bastebsacreni guiib con duu xajn nisdoo, dxejc gucbeereni ro'c najc nisdoo jäät si'cti galbigajdz metr.

29 Dxejc bidxejbreni te di chalaj barcw yejc reguij. Bacuaatireni tajp guibro si'c guench ni naliib te caden te ru'reni neñ yujxh te ruscuääzreni barcw, te jia'nni tejsi lajt. Dxejc rlanjreni malaii jianijga lo guedxliuj.

30 Dxejcti gulät remos canuu lo nisdoo cayujnsireni si'cni chastejbreni stee guench guiib lo nisdoo, niluxh rlanjreni guxunreni guidon la sajc guidzujnreni ro' nisdoo.

31 Dxejcti räjp Pabl lo capitán näjza lo resoldaad:

—Palga di redee jia'n neñ barcw, di gacdi guslaatu xcälñabajntu —räjpni.

32 Dxejcti batiugya' resoldaad duu ni naaz canuu te bitejbni lo nisdoo, sanäti nisdoo canuuga.

33 Che gusloj cayani, gunibee Pabl, räjpni lojreni:

—Nadxej rajc tiop xman gajdntu gues, gajdzatu gau.

34 Naj coltajw te gac guixoobtu lo nisdoo. Na'c guntu xhigab guettu, nicla tej xquidxejcti di nitloj.

35 Che gulujx gunii Pabl si'c, cua'ni yätxtiil, badeedni xquixtios lo Dios nez loj guiraareni. Dxejc gula'nini, gusloj cayajwnini.

36 Dxejc bibaa-lajzreni, näjza laareni gusloj cayajwreni.

37 Nuunu najcnu tiop gayuu gayonbitzubixho'p bejn ni yu' neñ barcwga.

38 Che agujc gudajwreni, basälreni triuu lo nisdoo te bicharu barcw.

39 Che bianisac, direni niembee yujga, niluxh bahuiireni cadre rdzujn te gueubäz ro' nisdoo cadre yu' xhiroob yujxh ro' nisdoo. Rlanjreni nusi'reni barcw ro'c.

40 Dxejcti baslaareni guidap guench guiib ni naaz barcw, bia'nreni guideb caden neñ nisdoo, baxheczareni yajg ni ruzaj barcw, guläszareni ladro nez delant barcw te balanaa bej barcw. Badzuréreni barcw sääreni nez ro' nisdoo.

<sup>41</sup> Sas biu'reni te lajt cadro rdxagsa' tiop cuaa nis. Ro'c huilaj yejc barcw nen yujxh nen nisdoo, digacdiru guiniibni. Dxejcti gusloj cabijl dejtz barcw sa'csi sanuutis caguijn nisdoo detz barcw.

<sup>42</sup> Dxejcti rljaz resoldaad nugu't repres te di guixoobreni lo nis guxuñreni.

<sup>43</sup> Niluxh di rljaz capitán xten resoldaad guet Pabl, ni'c dini nusaan nugu't resoldaad repres. Gunibee capitán ganiddoo renani rajc rxoob lo nis guitiäjs lo nisdoo te guidzujñreni lo yujxh.

<sup>44</sup> Dxejcti birinajl rebejn ni digacdi guixoob lo nis, naazreni barajd o te la' yajg ni gula' detz barcw. Si'c gujc bidzujñ guiragajc rebejn lo yujxh ro' nisdoo. Nadaanreni bidzujñreni lo yujxhga.

## 28

### *Bidzujñ Pabl lo yuj ni laa Malta ni re' lo nisdoo*

<sup>1</sup> Che bidzujñnu lo yuj ni tre' lo nisdoo, biembeenu yujga najc ni laa Malta.

<sup>2</sup> Gucnäj rebejn ro'c nuure, gule'creni guiboo bahuiireni nuure sa'csi cayacnałduxh, cayajbza nisguij.

<sup>3</sup> Ca' Pabl te dääz yajg, sale'cnini lo guiboo, chela biriyäl te bäl nialajz nen yajgga. Saa gudauya'ni ñaa Pabl.

<sup>4</sup> Che bahuii reben Malta li najl bäl nialajzga cayauya' ñaa Pabl, gusloj cayajbreni lo sa'reni:

—Pet rugu'tni bejn ni'c mase bejn ni gaan lo nisdoo siguijñni xtojñni, sejtñi ñaj.

<sup>5</sup> Gubijb Pabl ñaani dxejcti bitejb bälga lo guiboo. Xhet gujcdi ñaa Pabl.

<sup>6</sup> Dxejc reben ro'c cabäjz fiireni la sisiägüij ñaa Pabl o laa sejtñi. Xchero bidxelojreni. Che bahuiireni xhet gujcdini, gusloj bejnreni ste'ca xhigab, räjpreni lo sa'reni:

—Pet dios najcni.

<sup>7</sup> Gajxh ro'c naga' xyuj te dade' ni laa Publio ni najc xcubernadoor Malta. Biojia'nnu rolizñi choñ dxej. Huenduxh gujc dade'ga, baniidxni guiraa ni biquiinnu.

<sup>8</sup> Naga' xtad Publio cayacxhuuni, yu'ni xliaa, cayajczani yobrejn. Huihui Pablñi. Guredx-gunab Pabl lo Dios, dxejc batzuub Pabl ñaani yejcnì, basiac-gajcnini.

<sup>9</sup> Che gucbee reben guejdxxga abasiajcnì ben racxhuuga, bidzunñajreni ben racxhuu lo Pabl, basiajc Pabl guiraareni.

<sup>10</sup> Ni'c banidx-xliaareni xhidalduxh xhicos, luxh che biriinu ro'c, banidxreni guiraliì recos ni biquiinnu nen barcw.

### *Bidzujñ Pabl guedx Roma*

<sup>11</sup> Agujc choñ bäi yu'nu ro'c che biu'nu nen te barcw ni siääd Alejandría. Lagajc ro'c bateed barcwga rebäinajl che rsiäb beduxh. Yejc barcwga caj tiop figuur xten tiop biuux ni laa Cástor näjza Pólux, rexingancua'ch dios ni laa Zeus.

<sup>12</sup> Biriinu Malta sonnu nen barcw nez guedx Siracusa. Ro'c bia'nnu choñ dxej.

<sup>13</sup> Dxejcti biusacnu nen barcw, sonnu lo nisdoo cheni bidzunñinu guejdx ni laa Regio. Che bara yääl, gubi' te bej biriì lad sur. Biusacnu nen barcw. Bara yääl bidzunñu guedx Puteoli.

<sup>14</sup> Ro'c bidxaagnu gaii xpejn Jesucrist. Najreni loonu:

—Coljiannäj nuunu —najreni.

Bia'nnu ro'c gajdz dxej. Dxej biriinu guejdxga, ni'nu sonnu nez guedx Roma.

<sup>15</sup> Che gucbee rexpejn Jesucrist ni yu' guedx Roma siopsaanu nez Roma, biäädreni guedx Foro de Apio näjza stee guejdx ni laa Tres Tabernas, ro'c bidxaagreni nuure. Che bahuii Pabl lojreni, guzutijp lastooni, badeedni xquixtios lo Dios.

<sup>16</sup> Che biu'nu guedx Roma, bateed capitán repres ladznaa comandant, niluxh basaanni cualaa Pabl te yu' cadro cuääzni. Tejtis soldaad biannäj Pabl.

### *Baluii Pabl xtidx Dios lo reben Roma*

<sup>17</sup> Che gudejd choñ dxej, gurejdx Pabl reni rnibee lo rexpejn Israel. Che bidxaag sa'reni cadro yu' Pabl, räjpni lojreni:

—Guejbtu rexamigwä, resa'ä, xhetliidi nani xhet laadi benä lo rexpejn Israel, dizana nibälazä xleii toMoisés. Niluxh basäureni narä nen latzguiib guedx Jerusalén, dxejcti bateedreni narä ladznaa reroman.

<sup>18</sup> Che biejn diajgreni xtidxä, rlanj reguxhtis roman nuslaa narä sa'csi xhet benädi te nugu'treni narä.

<sup>19</sup> Niluxh naaddi rexpejn Israel guslaareni narä, gunabätis lojpac reii César jiädle'creni quej ni cabe'creni xcuentä. Niluxh narä xhet xquejdi rexpejn Israel cue'cä.

<sup>20</sup> Ni'cni guredxä la'tu te fiä lojtu, te guininää la'tu, sa'csi rililazä lagajc si'c rililajz xpejn Israel sibansac rebengut, ni'c nalibä cadenre.

<sup>21</sup> Dxejcti räjpreni lojni:

—Nicla tej guijtjz gajd reguxhtis xten reguedx Judea guxhal loonu xcuentlu, gajdza rexpejnu ni bidzujñ ree jiädsan diidx xhet laadi bejnlu.

<sup>22</sup> Rlanjnu jiejn diajgnu xtiidxlu, don xhi naalu, sa'csi racbeenu xhidajl lajt rniyajreni redidxcoob xten Jesucrist —räjpreni.

<sup>23</sup> Guletireni te dxej guidxagsa'reni. Che bidzujñ dxejga, bidxagsa' xhidalduxh bejn nen yu' cadro rbäjz Pabl. Guideb dxej basule' Pabl xtidx Dios lojreni. Basule'ni xho rnibee Dios lojreni. Con rediidx ni caj lo xleii toMoisés näjza diidx ni bacuaa reniguii nani gunii xtidx Dios basule'ni Jesús najc Crist nani galooli cabäjz reben Israel jiäd.

<sup>24</sup> Yu' reni huililajz xtidx Pabl, yu'za reni di nililajz xtiidxni.

<sup>25</sup> Sa'csi di niajcdi niujnreni tejsi xhigab gusloj siireni. Ganiddoo räjp Pabl lojreni:

—Guliica naj toIsaías che badeed Sprit Dyan xten Dios rediidxre guniini, räjpni lo rextadgoldoonu:

<sup>26</sup> Huij, gunii lo rebejnre, scree gojz lojreni:

Siejn diajgtu xtidxä, niluxh ditu gacbeeni.

Suhuiitu nani runä luxh ditu gumbee xhini'c ruhuiitu.

<sup>27</sup> Agucnajd lastoo rebejnre sa'csi di rlanjreni chalilajzreni xtidxä.

Direni cuadiajg xtidxä sa'csi di rlanjreni jiejn diajgreni diidx ni guliipac.

Rusäuzareni balojreni te di fireni, te di lajzreni chalii.

Ni'cni direni gusiechljazreni te gusaan gunneni dojl te gudzucaj Dios xtojlni.

<sup>28</sup> Räjp Pabl lojreni:

—Colgacbee. Najli sisiule' xtidx Dios lo rebenzijt ni di gac xpejn Israel te gusiech lajzreni, te gudzucaj Dios xtojlni. Rniliäpac lojtu, sililajzreni rextidx Dios.

<sup>29</sup> Che guluix gunii Pabl rediidxga lojreni, ensilaareni gusloj cadxagdijl sa'reni laj ni säareni.

<sup>30</sup> Tiop ijz guläjz Pabl guejdxga neñ yu' ni cualaani. Biuni guiralii rebejn ni biääd rolijzni.

<sup>31</sup> Lo guiraa rebejnğa basule'ni xho rnibee Dios lojreni. Bijzani diidx xcuent redzuun nani bejn Jesucrist. Di lastooni nidxejb, rutza badxojndi guniini.

## Guijtz Nani Bacuaa Pabl Lo Rebeņ Roman

### *Rucuaa Pabl lo rebeņ guidoo nen guedx Roma*

<sup>1</sup> Narā, Pabl, nacā te xmos Jesucrist, laani gule narā te gusule'ā xtidx Dios loj rebeņ.

<sup>2</sup> Agujc xchero bia'n Dios diidx loj renani basule' xtiidxni, suniidxni diidxre loonu, luxh diidx ni bia'n Dios caj lo guiijt xten reprofe'tga.

<sup>3</sup> Rediidx ni rusule'ā najc xcuent Jesucrist, Xi'n Dios, ni najc xagdoō torei David xcuent tiejxhni.

<sup>4</sup> Xcuent Xsprit Dxaan Dad Jesucrist, najcni Xi'npac Dios. Badeed Dios yālrnibee lojni, ni'cni gubaņsacni lo rebengut.

<sup>5</sup> Laani gucnājni narā, guleni narā te gusule'ā xtiidxni te guzobdiajgtu, te chalilajz rebeņ ni rej guideb guedxliuj xtiidxni.

<sup>6</sup> Luxh nadxaagtu loj rebeņ ni guleni te chalilajzreni xtiidxni.

<sup>7</sup> Ruxhalā guijtze lojtu ni yu' guedx Roma, guiraatu ni sanāljaz Dios ni bibeetu gactu beņdxan. Gacnāj Dios ni najc Xtdanu nājza Dad Jesucrist la'tu, guscuecdxireni lajztu.

### *Rlazj Pabl chāā guedx Roma*

<sup>8</sup> Ganidtoo rudedā xquixtios loj Dios con laj Jesucrist xcuent guiraatu, sa'csi guideb guedxliuj ruju beņ diidx xcuent xcālrililajztu.

<sup>9</sup> Lagajc Dios anajn xho rniabā guet-guejt xcuent la'tu lojni. Narā runā xtzuum Dios guideb lastoā, rusule'ā diidx xcuent Xi'nni Jesucrist.

<sup>10</sup> Sanuutis canabā lojni, top sajc jādhuiā lojtu si'cni rlazā gunā agujc xchejli.

<sup>11</sup> Sa'csi rlazduxhā fiā lojtu, te gacnāātu, te gulidxā la'tu xhi te xtidx Dios te sudzu'tzrutu lo xtiidxni.

<sup>12</sup> Nalajznu, te gustioobnu lajz sa'nu xcālrililajz xtidx Dios xten sa'nu.

<sup>13</sup> Rebetzā rlazā gacheetu balti huālt benā xhigab jādhuiā lojtu, luxh gajd gacdi jālā. Rlazā jādhuiā lojtu te chalilajz xhidajlru beņ xtidx Dios sigajcni salilajzreni guiralajt cadro hua'a loj rebeņ ni di gac xpen Israel.

<sup>14</sup> Nungājlpac gusule'ā xtidx Dios loj rebeņ nani rni garen-garen didxsaj, sigajc loj rebeņ griegw, loj renani nayāāl, sigajc loj rebeņ najn.

<sup>15</sup> Rbaali lazā suga'a naj, te gusule' xtidx Dios nājza lojtu ni yu' guedx Roma.

### *Xcālrnibee xtidx Dios*

<sup>16</sup> Sa'csi dina guituiā xcuent xtidx Dios, sa'csi najcni yālrnibee xten Dios te guslaani lo dojl chutis beņ nani rlazj chalilajz xtiidxni, ganidtoo reni najc rexpeņ Israel, dxejcti nājza rebeņ ni di gac xpen Israel.

<sup>17</sup> Sa'csi xtidx Dios rusule' xho nanab chalilajz te beņ te gacni te beņsa'c nez lo Dios sa'csi huililajzni xtiidxni. Lo xtidx Dios caj scree: "Palga rililajz te beņ xtidx Dios, najcni te beņnaya nez lo Dios, nabannājni Dios xcuent xcālrililajzni."

### *Rextojl beņ*

<sup>18</sup> Xcālrdx'e'ch Dios nani yu' xhaguibaa siajbni yejc rebeņ nani gun dojl, nani rlazj gun cosguijdx, nani di gusaan guisieed sabeņreni didxguli.

<sup>19</sup> Sa'csi anancheereni nani sajc gan beņ xcuent Dios, ni'cni najnreni rajpreni dojl, sa'csi ruluipac Dios na'c gunreni dojl.

<sup>20</sup> Cheni birixtiejli guedxliuj, recos nani di gacdi fii beņ xcuent Dios, si'c xcālrnibeeni ni najc par tejpas, si'c xtujxh xtenni, huenliisi ruzeņreni sa'csi

ruluilojreni recos ni ružen nani benchee Dios. Guiraa reni'c ruluiloj najcni Gueb Dios ni rajp yälrbibee par tejpas, ni'c di gacdi guiniireni loj Dios direni niembee xhini'c rlaž Dios gunreni.

21 Ni'cni, mase biembeereni Dios, direni niliä'p xpala'nni te ganreni Gueb Dios, dizareni nudeed xquixtis lojni. Alga guyalajz gujcreni, bicäy xcariejnreni, naareni hueen najc gunreni si'ctis ni jiajz yejcreni, si'cni rsia' lajzreni nen lastooreni.

22 Caniireni nanduxhreni, per direni gan, nayäälreni.

23 Gulälazreni xcälrdimbicha' Dios ni najc tejsi par tejpas, te bazuxhijbreni nez loj rebanäjb ni benchee naareni, ni najc guiraa ni rujn lojni si'c rujn lo te niguii ni rnitloj, näjza guiraa ni najc si'c reman ni rutajt, näjza guiraa ni najc si'c reman ni yu' tajp ni'ni, näjza ni najc si'c rebäjł.

24 Ni'cni gulälaz Diosreni, basaanni gunreni si'ctis ni rlažzreni. Bejnreni dojl con resa'reni.

25 Sa'csi ahuililajzreni didx-xhii lacuaa nililajzreni xtidxlii Dios, ruzuxhijbreni nez loj recos ni benchee Dios, lacuaa guzuxhijbreni loj Dios nani benchee guiraa rexhicos, Dios nacle' par tejpas. Sugacni si'c.

26 Ni'cni gulälaz Diosreni, subia'nreni lo xcälłatsiajreni, lo yälxtujy xtenreni. Diru regunaa guesnäj niguii, lagajc sagunaareni resnäjreni.

27 Sigajcza reniguii gulälaz regunaa, rujnreni dojl con lagajc saniguiireni. Luxh lagajc laareni siguijzreni latsiaj ni rujnreni.

28 Luxh sa'csi di rlažzreni jiureni Dios, basaanti Dios suyu' cosguijdxitis xcariejnreni, te chanuutisreni lo xcälłatsiajreni, rujnreni recos ni xhet laadi.

29 Guidxareni dojl, näjza cosguijdx, näj yälruguilajz xhixten sa'reni; rugu'treni bejn, rujnreni yälrsiäblajz, rucuanäjreni resa'reni, rusgueereni sa'reni, rdxechnäjreni sa'reni, rniizareni didxxhii.

30 Rniyaj sa'reni, rdxe'chreni lo Dios, guyalajzreni, dipacreni guitujy, rliä'preni lagajc xpala'nreni, entis latsiacooob rbäxtiejreni, guyalajzreni lo xcuzajznreni,

31 nadduxhreni, xheti xcariejnreni, xhet sajcdi xtiidxreni ni ria'nreni lo sabejnreni, direni chanälajz sa'reni si'cni nungäjł gacni, dizareni gulasajz sa'reni.

32 Luxh mase agucbeereni gun Dios yälguxhtis lojreni, najnzareni nungäjł guetpac renani rujn recosre, nicla jiureni, rujnreni guiraa recosguijdxre, luxh rbaali lajzreni richunäjreni rebejn ni rujnza recosguijdxga.

## 2

### *Dios rujn yälguxhtis con didxgultipac*

1 Ni'cni, ħcanejz chäätu, la'tu beñguedxliuj? Chutis luj ni rgubeelu sabejnlu, lagajc si'c cubeezareni luj, lagajc xcuent ni'c sajclu yälguxhtis, sa'csi luj rgubeelu sabejnlu, lagajcza luj rujnlu lagajc dojlga.

2 Nancheenu sujn Dios yälguxhtissa'c loj renani rujn sa' dojlga.

3 Beñ guedxliuj ni rgubee loj renani rujn dojl, luxh sigajcza rujnlu, ħla rujnlu xhigab sidedcaj gun Dios yälguxhtis lojlu xcuent xtojlł, ä?

4 O ħla rbälazlu ni rujn Dios, najcni huenduxh, lacti guroob najc xcälłulasajzni, rapduxhzani pasens? ħLa dilu gan dee najc ni gacnäjlz gusiech-lajzlu te guibicajlu lo dojl, ä?

5 Luxh sa'csi nadduxhlu, di lastoolu guigoodz te gusiech-lajzlu, cagutajllu yälguxhtis ni gaclu che guidzujñ dxej ni gun Dios yälguxhtis loj reben guedxliuj,

<sup>6</sup> siguijx Dios loj tejgatu xcuent dzuun nani bejn tejgatu.

<sup>7</sup> Loj rebejn nani rlanjztsireni guibansa'c, ni gusoob xtiidxni, sudeed Dios yalnabajn par tejpas sa'csi gudiilreni xhaniduj nájza go'preni xpala'nreni loj Dios, rlanjzreni guibajñreni loj Dios par tejpas.

<sup>8</sup> Luxh sidxe'ch Dios, sidxe'chduxhni loj renani sanälajz lagajc laareni, nani di jiu xtidxguliini, alga rusoobreni reyällatsiaj, redidxguijdx.

<sup>9</sup> Guiraa reben guedxliuj ni rujn dojl sidejd trabajwduxh nájza sac-huin lastooreni; ganid rexpen Israel, dxejcti nájza reben griegw.

<sup>10</sup> Loj guiraa rebejn nani rujn cos-hueen, sudeed Dios xhaniduj, nájza bala'n, nájza yälrbecdx lastooreni, ganid rexpen Israel, dxejcti nájza reben griegw.

<sup>11</sup> Sa'csi tebloj najc guiraasi rebejn nez loj Dios.

<sup>12</sup> Guiraa rebejn nani bejn dojl, luxh direni niembee xleii Dios, sinitloreni sin leiiga; guiraa reni biembee xleii Dios, lagajc con leiiga sujñ Dios yälguhtisireni xcuent xtojñreni.

<sup>13</sup> Xhet ganaxdi renani rucudiajgtis xleii Moisés najc beñnaya nez loj Dios; rebejn ni rusoobpac rexleii toMoisés, reni'c najc beñnaya loj Dios.

<sup>14</sup> Yu' xhidal bejn ni di gumbee xleii toMoisés, dizareni gac rexpen Israel, rujñreni recos ni caj lo leii. Najñreni xhini'c najc cos sa'c. Ni'cni lagajc xcäriejnreni najc si'c leii par laareni.

<sup>15</sup> Recossa'c ni rujñreni ruluiloj nezyusa'c ni yu' lastooreni. Xcäriejnreni ruluiloj xhini'c loj guiraa nani rujñreni najc cos sa'c, xhini'c najc dojl.

<sup>16</sup> Guiraa recosre sajc che guidzujñ dxej ni gun Dios yälguhtis guiraa rehxigabxhiga'tz ni yu' lastoo rebejn. Jesucrist gac juejz lojreni, dxejc sisiojb guiraa rediidx ni cagusule'ä lojtu.

### *Rexpen Israel náj xleii toMoisés*

<sup>17</sup> Luj ni laalu xpen Israel, ni rniilu sanäpaclu xleii toMoisés, rmiduxhlu najclu xpen Dios,

<sup>18</sup> rniilu nancheezalu xhini'c rlanj Dios gunlu, anajnzalu xhini'c najc hueenru sa'csi bisiedsa'c paclu leii.

<sup>19</sup> Rchalolu sajc guluiilu nezyusa'c lo rebejn nani najc si'c lotiä'p, sajc guzanijlu xcäriejn reni nacäy xcäriejnreni.

<sup>20</sup> Rchalolu najclu maestr lo renani nayääl, najczalu maestr lo rebieuux, sa'csi nansa'clu leii, luxh lojni caj guiraa yälñajn nájza guiraa didxguliipac.

<sup>21</sup> Ni'cni rniä lojlu, luj ni caguseed xtee bejn, ¿xhicuent dilu guseed lagajc luj? Luj ni rusule'lu diidx na'c cuan bejn, ¿xhicuent rbajnlu?

<sup>22</sup> Luj nani rniilu na'c guesnäjni te ni di gac chäälñi, ¿la resnäjlu nani di gac chäällu, ä? Rdx'e'chlu xcuent rebanäjb, ¿xhicuent rbäälñu xhicos neñ xquidoo rebanäjb, ä?

<sup>23</sup> Luj rlanjzlu chä'p xpala'nlu sa'csi najñlu leii, ¿la rusanxtujyju Dios sa'csi dilu gusoob xtidx leiiga, ä?

<sup>24</sup> Bahuii xho rebejn nani di gac xpen Israel rniyajreni Dios sa'csi la'tu ditu gusoob xtiidxni, rujntu dojl, sigajc ni caj lo xtidx Dios.

<sup>25</sup> Palga la'tu chutu bee si'cni caj lo leiiga, palga gusoobtu guiraa diidx ni caj lo leii, laaca. Luxh palga ditu gusoob guiraliipac xtidx leiiga, xlia'si guyu'tu bee, sa'csi rujntu dojl.

<sup>26</sup> Ni'cni palga te bejn ni di chu beega, luxh rusoobni guiraliipac xtidx leiiga, ¿la di gacdi guchaagni cuent najcni si'c te nani yu' beega, ä?

27 Bejn nani di chu beega, luxh rililajzni guiraliipac xtidx leiiga, sujnni yälguxhtis la'tu sa'csi mase yu'tu beega, luxh nanduxhtu leiiga, difu gusoob xtidx leiiga, alga rujntu dojl.

28 Sa'csi xhet guiraadi rebejn ni yu' beega najc rexpejn Israel, luxh di beega ni ru' bejn gun gusoobpac bejn xtidx leiiga.

29 Najcpac te xpen Israel nani najcni nen lastooni, nani yu' bee lastooni, rusoobpacni xtidx Dios xcuent Sprit xtenni, dini gunni sa'csi najctisni costumbr. Dios ni siliä'p xpala'nni, xhet bejndi.

### 3

1 ¿Xhini'c sacnäj te bejn najcni te rexpen Israel, ä? O ¿xhi sajc chuni beega?

2 ¡Empac sacduxhni! Ganidtoo, sa'csi loj rexpen Israel badeed Dios xtiidxni.

3 Mase yu' renani di nililajz diidxga, ¿la ni'cni xhet sajcdi diidx ni bia'n Dios loj rexpejn, ä?

4 ¡Xho gacni si'c! Diostis najc guliipac, guiralii bejn rusguee. Scree caj lo xtidx Dios:

Lagajc xtiidxlu suluui laaca rujnlu,

te che gaclu yälguxhtis,

nicla tej xtojllu di guidxäjl.

5 Palga xcällatsiajnu ruluiiru najc Dios huenduxh, ¿xhini'c guiniinu dxejc? Palga gun Dios yälguxhtis nurnu, dxejc tednu trabajwduxh, ¿la rujnni latsiaj loonu, ä? (Caniä si'c te bejn guedxliuj naj.)

6 ¡Xho gacni si'c! Paru najcni si'c, ¿xho mood gun Dios yälguxhtis loj rebejn guedxliuj?

7 Paru redidx-xhii ni rniä riliä'pru xpala'n Dios näjza xtidxliini, ¿xhicuent gunni yälguxhtis narä si'c te bendojl?

8 Yu'za bejn ni canii didx-xhii, najreni cayäjpnu lo rebejn: “Colyejn cosguijdx te guilulojni recoshuen.” Per rebejn ni canii si'c sidzujn dxej gacreni yälguxhtis.

#### *Guiraanu najcnu bendojl*

9 ¿Dxejca'? ¿La najcnu benhuenduxhru lojreni, ä? Dini gac; tebloj abile'cnu yälquij xten rexpen Israel con rebejn ni di gac xpen Israel, sa'csi guiraareni yu'reni lo dojl.

10 Si'cni caj lo guijtz:

Ruti te bensä'c, nicla tejni.

11 Ruti te bejn ni rachee, ruti chu tej nani rguuil Dios.

12 Guiragajcreni abirii lo xnejz Dios, teblojsi xhet sajcdireni.

Ruti chu tej ni rujn cossa'c, nicla tejni.

13 Ro'reni rii ganax didxguijdx,

najcni si'c te baa ni naxal,

rusgueerene con lujdxreni,

didxlatiaj rii ro'reni najcni si'c benen ni yu' ro' te bälñialajz.

14 Ro'reni entis cague,

entis canii didxrdxe'ch lo sa'reni.

15 Ni'reni ruxunli saxhe' xtiejn sa'reni.

16 Cadrotis rijreni rujnreni latsiaj,

ruteedreni sa'reni trabajw.

17 Direni gumbee nezuyj ni ruscuedxilajz.



18 Ni claza guidxelojreni Dios.

19 Racbeenu najc rediidx nani caj lo xleii Dios par rebejn ni rnibee leii lojreni, te jiäuu ro' guiralii rebejn, te guiraa reben guedxliuj gacbeereni yu' xtojreni nez loj Dios.

20 Sa'csi mase gusoob bejn guira'ti diidx ni caj lo leii, di leiiga gudzucaj xtoj bejnga, sa'csi leiiga najc nani guluii dojl ni yu' nen lastooni.

### *Ruslaa Dios lo dojl xcuent yälirililaj xtiidxni*

21 Naj ruluii Dios stee mood guibicaj xtojlnu, nani di gac mood ni caj lo xleii to Moisés. Luxh galooli gusloj canii Dios xcuent nezyujre, cajni lo reguijtz xten leii näjza lo reguijtz ni bejn rebejn nani gunii xtidx Dios galoo.

22 Stee mood najc scree: Chutis ni chalilajz xtidx Jesucrist, sajc naya lastooni nez loj Dios; si'c sajc garaliiza nani salilajz, sa'csi tebloj najcnu nez lojni.

23 Sa'csi guiralii rebejn guedxliuj abanijt lo Dios, direni guiga' guidzujreni lo xnezyuj Dios.

24 Niluxh balaslajz Dios nuunu, banidxxlia'ni loonu yäl nabannaya nez loj Dios sa'csi Jesucristis gudijx yäl guxhtis xten dojl che baxhe'ni xtiejn ni lo cruzj te badzucaj ni xtojlnu.

25 Baxhal Dios xi'nni, Jesucrist, te cuajni lo cruzj nez loj rebejn te si'c gudi-jxni guiraa rextoj chutis bejn ni rililajz xtidx Dios xcuent xtiejn Jesucrist. Si'c bejn Dios te guluiini xho guibannaya bejn lojni. Galoo gojptis Dios pasens rebejn, dini niujn yäl guxhtis rextojreni,

26 sa'csi acanajn Dios guc gunni yäl guxhtis redojlga, te si'c guluiini xcäl nayani nez loj guiraa rebejn, te Diospac gunnaya nez lojni chutis ni rililajz xtidx Jesucrist.

27 Ni'cni ¿con yäl nara? ¿Con yäl bindaan? ¿Xhet sajdini! ¿Xhi leii rudzucaj xtojlnu? ¿La leii najc ni rni jienno dzunsa'c, ä? ¿Dini gac si'c! Yu' tejtis leii ni rudzucaj dojl, nani rni chalilajztis bejn xtidx Jesucrist.

28 Dxejc sajc guiniä lojtu chutis bejn sajc gac naya nez loj Dios sa'csi rililajzni xtidx Jesucrist, xhet sa'csi rujni redzunsa'c ni caj lo leii.

29 ¿La najc Dios Xtiooztis rexpen Israel, ä? ¿La dini gac näjza Dios xten rebejn ni di gac xpen Israel? ¿Xho dini gac! Najcni Dios xten guiroc cuaa bejn.

30 Ruti chu stee Dios, sigtajs Dios yu'. Ruslaani lo dojl rebejn ni guyu' bee sa'csi huililajzreni xtiidxni, sigajcza ruslaani lo dojl rebejn ni xhet beedi guyu' sa'csi huililajzaren xtiidxni.

31 ¿La rudzucajnu leii sa'csi rililajznu, ä? Ajndi. ¿Xho gacni si'c! Alga basoobnu xtidx leiiga che huililajznu xtidx Jesucrist.

## 4

### *Xcälirililajz to Abram*

1 ¿Xhini'c sajc guiniinu xcuent toxtadgoldoonu, Abram?

2 Paru ni ajc to Abram ben naya nez loj Dios por redzuun ni bejn ni, pet sajc guibalazduxhni, per xhet nez lojdi Dios.

3 ¿Xhini'c caj lo xtidx Dios? Caj rediidxre:

Huililajz to Abram xtidx Dios, ni'c bachaag Dios cuent najcni te ben naya nez lojni.

4 Meel nani rca' te bejn ni rujn te dzuun, meelga najc ni riäj l xca'ni, xhet rcaxlia'dinini.

<sup>5</sup> Luxh nani rililajztis xtidx Dios ni ruslaa bejn lo dojl, lacuaa naani yu' xhi dzuun sajc gunni te guibicaj xtojlni, bejnga najc te bejnaya nez loj Dios, sa'csi huililajzni xtiidxni.

<sup>6</sup> Sigajcza naj toDavid, chicbaa bejn nani ruchaag Dios cuent najcni te bejnaya luxh di niqiiin niujnni redzuun ni caj lo leii. Räjpnj:

<sup>7</sup> Chicbaa renani abaslaa Dios lo xtojlni, renani abiäuu loj xtojlni.

<sup>8</sup> Chicbaa bejn nani diru Dios gun cuent xtojlni.

<sup>9</sup> ¿La sajc guiniini chicbaa rebejntis nani guyu' bee, ä? ¿La et näjdiza renani di niu' bee, ä? Sa'csi rniinu: "ToAbram gujc te bejnaya nez loj Dios sa'csi huililajzni xtidx Dios."

<sup>10</sup> Guc bidxaag cuent najcni te bejnaya nez loj Dios ¿che gajdni chu bee, ä? O ¿Laa che guyu'ni bee? Bidxaagpac xcuentni che gajdni chu bee.

<sup>11</sup> Dxejcti guyu'ni bee si'c te seen xten yäl'naya sa'csi huililajzni xtidx Dios che gajdlini chu bee te gacni xtdad guiraa renani rililajz laj ni xhet beedi yu'reni, te näjza laareni guidxaag cuent najcni bejnaya nez loj Dios,

<sup>12</sup> te gaczani xtdad guiraa renani yu' bee ni huililajzza xtidx Dios si'c huililajz toAbram cheni gajdni chu bee.

### *Diidx ni bia'n Dios rsiojb xcuent yäl'rililajz*

<sup>13</sup> Bia'n Dios diidx loj toAbram näjza loj rexagdooni, xca'ni guedxliujre si'c yäl'nasa'c xtenni. Xhet sa'csi gusoobni xtidx leii xca'nini, sica'nini sa'csi najc toAbram te bejnaya nez loj Dios sa'csi huililajzni xtidx Dios.

<sup>14</sup> Sa'csi paru renani rusoob xtidx leiiga najc nani xca' yäl'nasa'cga, xlia'si chalilajz bejn xtidx Jesucrist, luxh xhetza sajcdi diidx nani bia'n Dios loj toAbram.

<sup>15</sup> Che yu' te leii, luxh yu' chu di gusoobni, dxejcd rdx'e'ch Dios loj bejn. Cadro xheti leii, xhetiza xtojlni.

<sup>16</sup> Ni'cni balaslajz Dios nuunu, te sudzu'tz diidx ni bia'nini loj toAbram, te guiraa rexagdooni ni rililajz sica' yäl'nasa'c, xhet xtebtis renani sasanäj xleii toMoisés, nägajcza renani rililajz xtidx Dios si'c huililajz toAbram, nani najc xtdad guiraanu nani chalilajz xtidx Dios.

<sup>17</sup> Si'cza caj lo xtidx Dios, caj rediidxre: "Abenä gaclu xtdad xhidat renación." Si'c bia'n Dios diidx loj toAbram, Gueb Dios nani gudeed yäl'nabajn loj rebengut, nani rni xcuent recos nani gajd gac ascanu ala najcni.

<sup>18</sup> Anajz toAbram naganduxh soob diidx ni bia'n Dios con laani, luxh laani empac huililajzni, ni'c gujcnj xtdad xhidajl nación, te gusojb xtidx Dios ni guniini che räjpnj: "Scree gac xhidajl rexagdoolu."

<sup>19</sup> Di toAbram nunijt xcäl'rililajzni, mase ayu'ni tegayuu ijz, najnni anajcni bengool, luxh sigajcza Sara abengool diru xi'nreni chu.

<sup>20</sup> Dini niun-tio'p lajzni xcuent rediidx nani bia'n Dios con laani, alga gusutijpruni huililajzni xtiidxni, gulä'pni xpala'n Dios, badeedni xquixtios lojni.

<sup>21</sup> Anajnni rajp Dios yäl'rimbee te gunni guiralii nani bia'n diidx gunni.

<sup>22</sup> Ni'c bachaag Dios cuent najcni te bejnaya nez lojni sa'csi huililajzni xtidx Dios.

<sup>23</sup> Xhet xtebtisdi xcuent toAbram cuaj rediidxre: "Bidxaag cuent najcni te bejnaya nez loj Dios sa'csi huililajzni xtidx Dios",

<sup>24</sup> näjza xcuentnu cuajni, sa'csi che chalilaaazu xtiidx nani baspanasac Xtdad Jesucrist loj rebengut, sidxaag cuent najcni bejnaya nez loj Dios.

<sup>25</sup> Bacuaareni Jesucrist lo cruzj te gudijxni rextojl<sup>nu</sup> nez loj Dios, luxh gubansacni lo rebengut, te gac gacnu be<sup>n</sup>naya nez loj Dios.

## 5

### *Xhi rsiajc bejn che najcreni be<sup>n</sup>naya nez loj Dios*

<sup>1</sup> Ni<sup>'</sup>cni che rililajznu xtidx Dios rudzucaj Jesucrist xtoj<sup>l</sup><sup>nu</sup> rajcnu be<sup>n</sup>naya nez loj Dios, ni<sup>'</sup>cni ruscuecdxini lajznu.

<sup>2</sup> Sa<sup>'</sup>csi gujt Jesucrist, sa<sup>'</sup>csi gubansacni lo rebengut xcuent nuurnu, che rililajznu xtidx Dios xcuent Jesucrist, rulaslajz Dios nuurnu, ni<sup>'</sup>cni rbalajznu, rajpnu ya<sup>l</sup> nabajn, su<sup>'</sup>pacnu lo xcäl<sup>r</sup>dimbicha<sup>'</sup> Dios.

<sup>3</sup> Luxh xhet ni<sup>'</sup>ctis, sajcza guibalaaznu che tednu trabajw, sa<sup>'</sup>csi najnnu trabajwga sujn jia<sup>'</sup>pnu pasens.

<sup>4</sup> Luxh che rajpnu pasens rajcnu te benguyajlru; che anajczanu benguyajl, rililazsa<sup>'</sup>crunu.

<sup>5</sup> Luxh ya<sup>l</sup> rililazsa<sup>'</sup>cnu dini gusanxtujy, sa<sup>'</sup>csi ya<sup>l</sup> sanälajz ni rajp Dios ruchaj lastoonu sa<sup>'</sup>csi nen lastoonu rbäjz Xsprit Dxa<sup>n</sup> xten Dios ni baniid<sup>x</sup>ni loonu.

<sup>6</sup> La<sup>l</sup> ni xhetliidi sajcdi jienu lagajc xcuentnu te guibicaj xtoj<sup>l</sup><sup>nu</sup>, che basa<sup>'</sup> dxej biäd Jesucrist te gujtni lo cruzj xcuent rebendoj<sup>l</sup>.

<sup>7</sup> Gulliipacni, naganduxh guidxäl<sup>n</sup>i te bejn ni xcäjb guet lacuaa te bejn ni laaca rujnni. Per sidxäjl te bejn ni xcäjb guet lacuaa te be<sup>n</sup>sa<sup>'</sup>c.

<sup>8</sup> Luxh Dios baluiloj xcäl<sup>r</sup>inälajzni xcuent nuurnu sa<sup>'</sup>csi la<sup>l</sup> ni yugajcnu lo dojl, gujt Jesucrist lo cruzj xcuentnu.

<sup>9</sup> Aticaxh naj ni najcnu be<sup>n</sup>naya nez loj Dios sa<sup>'</sup>csi baxhe<sup>'</sup>ni xtiejn<sup>n</sup>i te gubicaj xtoj<sup>l</sup><sup>nu</sup>, naj sidedcaj gacnu xcäl<sup>r</sup>guxhtis Dios.

<sup>10</sup> Palga la<sup>l</sup> ni rdxe<sup>'</sup>chnu lo Dios, basiäl<sup>n</sup>i lajzni xcuentnu sa<sup>'</sup>csi gujt Xi<sup>'</sup>nni lo cruzj, naj ni abiäl<sup>j</sup> lajzni, suslaani nuure lo dojl sa<sup>'</sup>csi gubansac Xi<sup>'</sup>nni loj rebengut.

<sup>11</sup> Luxh xhet ni<sup>'</sup>ctis, sibalaznäjnu Dios xcuent Dad Jesucrist, sa<sup>'</sup>csi xcuentni ara<sup>'</sup>pnu ya<sup>l</sup> rbedxi lajzni nez loj Dios.

### *Adán con Dad Jesucrist*

<sup>12</sup> Ni<sup>'</sup>cni, xcuent tejtis niguii biu<sup>'</sup> dojl lo guedxliuj, luxh xcuent dojl biädza ya<sup>l</sup>lgujt, gudejdti ya<sup>l</sup>lgujt loj guiraa rebejn, sa<sup>'</sup>csi guiraa rebejn bejnreni dojl.

<sup>13</sup> Cheni gajd xleii toMoisés chu lo guedxliujre, alabejn rebejn dojl, per di niajcdi nucuaquijn rebejn sa<sup>'</sup>csi xheti leii.

<sup>14</sup> Luxh empac gujt rebejn nen redxej ni gubajn toAdán hasta redxej ni gubajn toMoisés, mase direni niujn lagajc dojl nani bejn toAdán; luxh rululoj yu<sup>'</sup> chu stee bejn nungäjl jiäd.

<sup>15</sup> Luxh nani runid<sup>x</sup>-xlia<sup>'</sup> Dios dini gac si<sup>'</sup>c najc xtoj<sup>l</sup> toAdán. Dini gac si<sup>'</sup>c sa<sup>'</sup>csi palga xcuent dojl ni bejn toAdán, gujt xhidalduxh bejn, cuantimaaz naj sunid<sup>x</sup>-xlia<sup>'</sup> Dios ya<sup>l</sup> nabajn par tejpas loonu por xcäl<sup>r</sup>rulaslajz Dios, nägajc por xcäl<sup>r</sup>rulaslajz Dad nani laa Jesucrist.

<sup>16</sup> Luxh nani runid<sup>x</sup>-xlia<sup>'</sup> Dios loonu dini gac si<sup>'</sup>c ya<sup>l</sup> runijt ni biäd loonu xcuent dojl ni bejn toAdán; sa<sup>'</sup>csi xcuent tejtis dojlga biäd ya<sup>l</sup>lguxhtis xten Dios, sa<sup>'</sup>csi guiraliiza rebejn guedxliujre yu<sup>'</sup> lo dojl, per xcuent nani banid<sup>x</sup>-xlia<sup>'</sup> Dios, nalajznu, gujt Xi<sup>'</sup>nni Jesucrist lo cruzj, ni<sup>'</sup>c gujc sa<sup>'</sup>csi yuduxhtej dojl, te xcuent ni bejn Jesucrist saj<sup>c</sup> gac bejn be<sup>n</sup>naya nez loj Dios.

<sup>17</sup> Palga xcuent dojl ni bejn tejsi bejnga gunibee ya<sup>l</sup>lgujt lo guiraa bejn, cuantimaaz lo ya<sup>l</sup> nabajn par tejpas sinibee guiraa reni rca<sup>'</sup> xcäl<sup>r</sup>rulaslajz Jesucrist näjza renani rcaxlia<sup>'</sup> lojni ya<sup>l</sup> racnaya nez loj Dios.

<sup>18</sup> Ni'cni sigajc ni biääd yälguxhtis lo guiraa reben guedxliuj xcuent dojl ni bejn tejsi niguii, sigajcza sa'csi basoob stee niguii xtidx Dios, xhidal bejn gujc beñnaya nez loj Dios, cua'reni yäl'nabajn par tejpas.

<sup>19</sup> Nalajznu sigajc ni banijt xhidalduhx bejn nez loj Dios xcuent tej niguii ni di nusoob xtidx Dios, sigajcza xhidalduhx bejn sajc beñnaya nez loj Dios xcuent tej niguii ni basoob xtiidx Dios.

<sup>20</sup> Ni'cni badeed Dios xleii toMoisés, te guzenru dojl. Niluxh cadre guyuduxh dojl, ro'c nanabza chuduxhru xcäl'rulaslazduhx Dios,

<sup>21</sup> te sigajc ni gunibee dojl guyu' yälgujt, sigajcza guinibeeru xcäl'rulaslajz Dios te jia'cnu beñnaya nez loj Dios, te xca'nu yäl'nabajn par tejpas xcuent Xi'nni, Dad Jesucrist.

## 6

### *Agujtnu lo dojl per nabannäjnu Jesucrist*

<sup>1</sup> ¿Xhini'c guiniinu, naj? ¿La sajc guidxunrunu lo dojl te tioobru xcäl'rulaslajz Dios, ä?

<sup>2</sup> ¿Gurniälojtu gacni si'c! Nuurnu najcnu si'c te bengut lo dojl sa'csi rililajznu xtidx Dios; ¿xhohx gac guibajnrunu lo dojl?

<sup>3</sup> ¿La ditu gan, che gurobnisnu con laj Jesucrist, najcni si'c ni näjza nuurnu gujtnu si'c ni gujt Jesucrist?

<sup>4</sup> Sa'csi che gurobnisnu bigatznäjnuni si'c lo yälgujt, te sigajcni huäjs Jesucrist lo yälgujt xcuent xcäl'rnibee Dios, sigajcza näj nuurnu sajc guidxunnu lo te yäl'nabañcoob.

<sup>5</sup> Sa'csi palga gujcnu tejsi con laani lo xcäl'gujtni che birobnisnu, sigajcza sajcnu tejsi con laani lo yäl'nabañsac lo rebengut.

<sup>6</sup> Ni'cni xcärienbiejwnu cuaj lo cruz con laani, te badzucajni rextojlnu, te di gacdiru guinibee dojl loonu.

<sup>7</sup> Sa'csi nani agujt, di gacdiru guinibee dojl lojni.

<sup>8</sup> Palga nuurnu agujtnu con Jesucrist, rililaaznu sibañsaczanu con laani.

<sup>9</sup> Sa'csi nadonpacnu gubañsac Jesucrist loj rebengut, ni'c diruni guet, diru yälgujt ga'p yäl'rnibee lojni.

<sup>10</sup> Che gujt Jesucrist, gujtni xcuent dojl, luxh diru gacdi guinibee dojl laani par tejpas; naj ni gubañsacni, nabajn ni nez loj Dios.

<sup>11</sup> Ni'cni la'tu colguchaag cuent najctu si'c te bengut lo dojl, luxh nez loj Dios, colguchaag cuent nabannäjtu Jesucrist.

<sup>12</sup> Ni'cni na'c gusaantu guinibee dojl tiejxhtu te guntu si'ctis ni rlaiz tiejxhtu.

<sup>13</sup> Na'cruza gusaantu jiajb guideb lagaa tiejxhtu lo dojl te guntu cosguijdx. Maazru hueen colgudeed tiejxhtu lo Dios si'c te bejn nani gubañsac lo rebengut, näjza colgudeed guideb lagaa tiejxhtu te guntu recoshueen si'c ni rlaiz Dios guntu.

<sup>14</sup> Sa'csi diru dojl guinibee lojtu, sa'csi dirutu chu loj xleii toMoisés, sa'csi yu'tu lo xcäl'rulaslajz Dios.

### *La'tu najc si'c remos*

<sup>15</sup> ¿Xho gacni naj? ¿La sajc jienrunu dojl naj ni dirunu chu lo leii sa'csi yu'nu lo xcäl'rulaslajz Dios, ä? ¿Xho gacni si'c!

<sup>16</sup> La'tu nansa'ctu palga yu'tu si'c te mos loj te lam te gusobdiajgtu xtiidxni, najcpactu xmos bejn nani rusoobtu xtiidxni. Ni'cni, palga gusoobtu xtidx

dojl, ni'c najc xlamtu, ni'c siädnä yälgujt lojtu. Palga gusoobtu xtidx Dios, ni'c najc xlamtu. Dxejc sajctu beɲnaya nez loj Dios.

<sup>17</sup> Xquixtios lo Dios, galoo gujctu xmos dojl, per naj guideb lastootu basobdiajgtu xtidxcoob Dios, huililajztu xtiidxni ni basule'nu lojtu.

<sup>18</sup> Luxh agulaatu lo dojl, biädjiajctu xmos Dios lo dzunsa'c.

<sup>19</sup> Narä cagusule'ä diidx con sa' didx guyasire sa'csi gajdtu gacbesa'c xho najc xnezyuj Dios. Che gujctu xmos dojl, guideb lagaatu bejntu dojl, bejntu latsiaj, luxh ni'c satajltis latsiaj ni bejntu. Naj ni najctu xmos Dios lo dzunsa'c, guideb lagaatu colyejnru dzunsa'c, te si'c sidajlrü dzunsa'c ni guntu sa'csi najctu beɲnaya nez loj Dios.

<sup>20</sup> Sa'csi che gujctu xmos dojl, di rextidx Dios guinibee la'tu.

<sup>21</sup> Naja', xhini'c bejntu gaan che gujctu xmos dojl, bejntu recos ni rtuinäjtu naj? Ni xnezyuj recosga rdzujñ loj yälgujttis.

<sup>22</sup> Per naj, sa'csi agulaatu lo dojl, abiu'tu najctu xmos Dios, sujntu sajctu beɲnaya nez loj Dios, luxh xnezyuj recoscoobre rdzujñ lo yälnabaɲñaj Dios par tejjpas.

<sup>23</sup> Xcälrajx xten dojl najc yälgujt, per nani runidx-xlia' Dios najc xcälnabaɲñaj Dios par tejjpas xcuent ni bejn Jesucrist xtdanu.

## 7

### *Yälrului ni rudeed yälguchnaa*

<sup>1</sup> Caniä lojtu ni najñ xleii toMoisés. ¿La ditu gan, resa'ä, xleii toMoisés rnibee loj te bejn guideb nabajñni lo guedxlijre?

<sup>2</sup> Najcni si'c te gunaa nani bachnaa te niguii. Nanabpac cuäznäjni chäälni guideb nabajñni. Si'c rnibee leiiga. Palga guet chäälni, diru gacdi guinibee leiiga lojni xcuent chäälni.

<sup>3</sup> Ni'cni, lañ ni nabajñ chäälni gunaaga, palga cuäznäj gunaaga ste'ca niguii, cayujñni dojl sirilajni gunaguijdx. Palga agujt chäälni gunaaga, agulaani lo leiiga, sajç guchnaani stee niguii, xhet dojldi cayujñni, dizani guirilaj gunaguijdx.

<sup>4</sup> Ni'cni la'tu, rebetzä, sigajcza agulaatu lo leiiga, sa'csi najcni si'cni gujctu si'c bengut lo leiï che gujt Jesucrist lo cruiz, te naj sajç jiu'tu lo ste'ca bejn, loj lagajc Jesucrist nani gubansac loj rebeɲgut te sajç jiennu redzunsa'c ni rlaiz Dios jiennu.

<sup>5</sup> Sa'csi lañ ni gubajñnu lo yälnabaɲbiejwga, lagajc rediidx nani rnii leiiga di gacdi gun bejn, lagajc recosga rlaiz gun tiejxhnu, luxh si'c sozaatisnu lo xnezyuj yälgujt.

<sup>6</sup> Naj abiriinu lo leiiga, sa'csi agujtnu lo leiiga nani guinibee loonu galoo. Naj con xpriicoob ni yu' neñ lastoonu yu'nu lo Dios, xhet con xcärienbiejwdi ni gojpnü che nanab gusoobpacnu leiï.

### *Redojl nani yu' tiexhä*

<sup>7</sup> ¿Xhixhni'c guiniinu naj? ¿La dojl najc leiï, ä? ¿Xho gacni si'c! Palga dina niembeä xhi caj lo leiiga, dizana niacheä cayunä dojl. Dina niacheä cayunä dojl che rlazä xca'a xhixten ste'ca bejn palga dina niolä lo leiï rediidxre: "Na'c chuguij lajzlu rehxixten bejn."

<sup>8</sup> Ni'cni lagajc diidx ni caj lo leiiga bejn guyuguij lazä rehxixten bejn sa'csi nancheä najcni dojl. Paru xheti leiï, xhetiza dojl, agujtni.

<sup>9</sup> Galoo gubana xhet leiidi nanä, luxh che biääd diidx ni rnibee leiï, gucheä xhini'c najc dojl, dxejc banitä lo Dios, si'c ni gutä.

10 Luxh baxhaļ Dios leiiga loonu te jiuāni, te xca'ä yäl**na**bajñ, luxh alga bazeñni benä doļļ, banitä nez loj Dios, gutāti dxejc.

11 Con leiiga, basguae doļļ narä, bejnñi narä si'c te beñgut nez loj Dios.

12 Ni'cni, leii najc dxan, näjza rediidx ni caj lo leiiga najc dxan; hueen najcni, didxgullii najcni.

13 ¿Dxejca'? ¿La nani najc te coshueen huiñä narä lo yälgujt, ä? ¡Xho gacni si'c! Doļļ najc ni huiñä narä lo yälgujt. Te si'c xcuent leiiga ni nasa'c, jienlojni doļļpac najc doļļ sa'csi bagu'tni narä con te coshueen, te lagajc rediidx ni caj lo leiiga jienloj lacti latsiaj najc doļļ.

14 Sa'csi nadonnu leiiga najc xtidx Dios, luxh narä nacä te beñ guedxliujre, nacä xmospac doļļ.

15 Sa'csi dina gacbeä xhini'c runä. Dina gunä recos nani rlazä gunä, alga cayunä latsiaj nani dipacna rlazä gunä.

16 Naj palga narä runä latsiaj nani dipacna rlazä gunä, lagajcza ni'c ruluii hueença najc leii.

17 Naj, diruni gac narä ni cayujñ latsiaj, sa'csi yu' doļļ neñ lastoä, ni'c ni cayujñ runä latsiaj.

18 Sa'csi narä nanä neñ lastoä, nalajznu lo tiexhä, xhetliidi cossa'c di yu'; sa'csi rlazä gunä cossa'c, per dina gacdi pä te gunäpac recossa'cga.

19 Sa'csi dina gunä redzunsä'c nani rlazä gunä, alga latsiaj nani diru rlazä gunä, ni'c runä.

20 Ni'cni palga runä latsiaj nani diru rlazä gunä, xhet narädi runäni, doļļ ni yu' tiexhä, ni'c ni cayujñ runä latsiaj.

21 Ni'cni narä, nani rlazä gunä redzunsä'c, rdxälä leiire: yu'pa doļļ tiexhä.

22 Sa'csi neñ lastoä, rlazäpac gusobä diidx xten xleii Dios.

23 Luxh ruhuiä garenca leii yu' guideb lagaa tiexhä, ruchagdijñni leii ni yu' xcärienä, ruteedzani narä ladzñaa xleii doļļ nani yu' guideb lagaa tiexhä.

24 ¡Proobza narä! ¿Chuni'c guslaa tiexhä ni nungäjļ guet xcuent doļļ?

25 ¡Xquixtios loj Dios sa'csi Dad Jesucrist sajc guslaa nuurnu lo doļļ! Ni'cni con xcärienä rusobä xtiidx Dios, yu'ä lo xleii Dios, niluxh tiexhä rlazj gusoob xtiidx doļļ, chuni lo xleii doļļ.

## 8

### *Yäl**na**bajñ ni najc xcuent Sprit Dxan xten Dios*

1 Ni'cni naj rut rajc di rbe'c xcälquij renani ahuililajz xtidx Jesucrist, renani diru jiu gunreni latsiaj ni rlazj gun tiejxhreni, alga riurureni rujñreni ni rnibee Sprit Dxan xten Dios ni rbäjz neñ lastooreni.

2 Sa'csi leii xten Sprit Dxan xten Dios ni ruedeed yäl**na**bajñ xcuent Jesucrist, abaslaani narä lo yäl**na**ibee xten xleii doļļ näjza yälgujt.

3 Sa'csi nani di niajcdi niujñ leibiejw, sa'csi dini niajcdi nadip lo re-ben**na**guedxliuj te gacreni ben**na**yaya nez loj Dios, ni'c bejn Dios che baxhaļni Xi'nñi Jesucrist, si'c te beñ guedxliujre xcuent doļļ, te bejnñi yäl**na**guxhtis lo doļļ ni rnibee tiejxh bejn.

4 Te si'c gac xcäl**na**guxhtis xten leibiejw lo tiejxh nuurnu, renani dirunu gusoob nani rlazj gun tiejxhnu, sa'csi naj rbajñnu si'c ni rnibee Sprit Dxan xten Dios ni yu' neñ lastoonu.

5 Sa'csi renani rusoohtis nani rlazj gun tiejxhreni, rujñtisreni xhigab xcuent redoļļga, luxh renani rusooob xtidx Sprit Dxan xten Dios rujñtisreni xhigab xcuent nani rlazj Dios gunreni.

<sup>6</sup> Sa'csi renani yu'tis yejcreni nani rlaꝓ gun tiejxhrene, sejtreni, sinijtreni; luxh renani yu'tis yejcreni nani rniꝓ Sprit Dxan Dios, reni'c sibeꝓdxi laꝓzreni, sica'reni yaꝓnabaꝓn lo Dios par teꝓpas.

<sup>7</sup> Te xcaꝓrieꝓn nani riutis ni rlaꝓ gun tiejxh beꝓn rdxe'ch Dios loꝓni sa'csi dini gusoob xleii Dios, luxh nicla gac gunnii.

<sup>8</sup> Renani nabaꝓntis te gunreni latsiaꝓ ni rlaꝓ gun tiejxhrene di Dios guibal-aznaꝓreni.

<sup>9</sup> Luxh la'tu dirutu gun si'ctis ni rlaꝓ gun tiejxhtu, ni'cni rujntu si'c ni rlaꝓ Sprit Dxan xten Dios guntu, palga rbajaꝓni neꝓ lastootu. Palga yu' chu teꝓtu ni di Sprit Dxan cuaꝓz neꝓ lastooni, di ni'c gac xpeꝓni.

<sup>10</sup> Palga rbajaꝓ Jesucrist neꝓ lastootu, agujt tiejxhtu xcuent doꝓl, xpirttu nabaꝓn sa'csi anaꝓctu beꝓnaya nez loꝓ Dios.

<sup>11</sup> Luxh palga neꝓ lastootu rbajaꝓ Sprit xten nani baspaꝓsac Jesucrist loꝓ rebengut, lagajc nani baspaꝓsac Jesucrist lo rebengut suspaꝓsac tiejxhnu ni nabaꝓn lo guedxliuꝓre xcuent Xpirtini nani yu' neꝓ lastoonu.

<sup>12</sup> Ni'cni rebetzä, najcnu beꝓn ni cuaꝓ di'n, xhet loꝓdi tiejxhnu te jiennu si'c ni rlaꝓ gun tiejxhnu.

<sup>13</sup> Sa'csi palga cayujntu si'c ni rlaꝓztis gun tiejxhtu, seꝓtpactu. Palga nabaꝓntu xcuent Sprit Dxan xten Dios ni rbajaꝓ neꝓ lastootu, sibaꝓnajaꝓtu Dios par teꝓpas.

<sup>14</sup> Sa'csi guiraa renani ruluiꝓ Sprit Dxan xten Dios guiraa reni'c najc rexi'n Dios.

<sup>15</sup> Naj ditu nica' te sprit xten te mos te chusactu lo yaꝓrdxeꝓb, alga cua'tu sprit xten ni najc si'c te bisiäꝓb ni cua' beꝓn si'c xi'npacni, naj najcnu xi'nni, ni'cni saꝓc gaꝓnu loꝓni: "Gueꝓblu, Xtaꝓä."

<sup>16</sup> Sa'csi lagajc Sprit Dxan xten Dios ruluiꝓ loꝓ xpirtnu, najcꝓacnu xi'n Dios.

<sup>17</sup> Luxh palga najcnu rexi'nni, sica'zanu yaꝓlnasa'c lo Dios, teꝓsi yaꝓlnasa'c con Dad Jesucrist, palga guliini tednu lagajc trabajw ni gudeꝓdni xcuent xtiidxni, te teꝓsiza siliä'p xpaꝓa'nnu con laani.

<sup>18</sup> Sa'csi naraꝓ runä xhigab retrabajw ni cadeꝓdnu neꝓ redxeꝓre, digacdi gun tebloonureni con yaꝓrdimbicha' nani churu guihuiinu.

<sup>19</sup> Sa'csi guiraa recos nani benchee Dios lo guedxliuꝓre, cabajaꝓzreni, yuduxhrene gaan fiireni dxeꝓ che gululoꝓ Dios chuni'c najc rexi'nni.

<sup>20</sup> Guiraa recos ni guleꝓctieꝓ Dios lo guedxliuꝓre, xlia'si guꝓcreni, xhet sa'csi si'c rlaꝓzdi recosga, per sa'csi si'c beꝓn Dios, ni cabajaꝓztis

<sup>21</sup> guslaapacni guiraa recos ni bencheeni lo guedxliuꝓre lo xcaꝓrnibee yaꝓgujt, yaꝓrnitloꝓ, te dxeꝓc saꝓc jiu'ni lo yaꝓrbedxi xten xcaꝓrdimbicha' xten rexi'n Dios.

<sup>22</sup> Guiraa recos ni guleꝓctieꝓ Dios lo guedxliuꝓre entis roonreni, guira dxeꝓ rdeꝓdreni trabajw, si'c rdeꝓd te gunaa trabajw che rajl xi'nni.

<sup>23</sup> Luxh xhet nani tre'tis lo guedxliuꝓdi, najza nuunu ni yu' Sprit Dxan xten Dios neꝓ lastoonu, roonzanu cabäꝓznu dxeꝓ cheni xca' Dios nuure si'c rexi'nni, cheni guscoobzani tiejxhnu.

<sup>24</sup> Sa'csi xcaꝓrililaaznu ni rbäꝓznu, ni'c beꝓn guꝓaanu luxh yaꝓrbajaꝓ ni guyasi rien, di ni'c gac yaꝓrbajaꝓ, sa'csi ꝓchu laa ni cuaꝓz xcuent te cos ni ala bahuini?

<sup>25</sup> Palga cabäꝓznu xcuent te cos ni gajdnu guihuii, rbaali laaznu, rsi-udzu'tznu rbajaꝓnu guihuiinu gacni.

<sup>26</sup> Sigajcza racnaꝓ Sprit Dxan xten Dios nuure cadro xheti yaꝓrutijꝓ laaznu sa'csi nicla guidonnu xho mood riäꝓ guiniab beꝓn lo Dios. Luxh lagajc Sprit Dxan ni yu' lastoonu rniabni lo Dios xcuent nuure con yaꝓrbedxneꝓ nani nicla gajd beꝓn gaꝓ con diidx xho najcni.

<sup>27</sup> Dios, nani rula'tz lastoonu, nanchee xhini'c rniab Sprit Dxi xtenni xcuent nuurnu, sa'csi rniabni si'cpac ni rlanj Dios guiniabnu xcuent rexpejpac Dios.

### *Siennu gaanpac loj guira'ti*

<sup>28</sup> Nadoncheenu guira'ti ni rsiaj rebejn ni sanälajz Dios, reni agule Dios te gunreni xtuunni rsiajrenini te gun Dios gac recosga par xcäl'nasa'creni.

<sup>29</sup> Sa'csi renani biembee Dios galooli, reni'c gule Dios cheni gajdli guirixtiej guedxliujre, te gacreni si'c ni najc Xi'nni; te gacza Xi'nni ganid loj guiraa ni najc famil xten Dios.

<sup>30</sup> Renani guleni galooli, reni'c gurejdxni; renani gurejdxni, bejnzani najcreni bejnaya nez loj Dios; renani bejnni najcreni bejnaya nez loj Dios, gulä'pzani xpala'nreni.

<sup>31</sup> ¿Xhixhni'c guiniinu xcuent dee? Palga yu' Dios xlaadnu, ¿chuxh ni'c najc ni gun gaan loonu?

<sup>32</sup> Dios nani di nudxojn Xi'nni, nani cuäjb cuaj Xi'nni lo cruz te gujtni, te gudijxni xcuent xtojlnu, ¿xho dini guniidx loonu xcuent Xi'nni guira'ti nani rquiinnu, ä?

<sup>33</sup> ¿Chuni'c sajc cue'c xhi xcälquij reni agule Dios nez lo Dios, ä? Ni lagajc Dios najc nani rnii najcnu bejnaya nez lojni.

<sup>34</sup> ¿Chuni'c najc nani cue'c xhi xcälquijnu nez lo Dios? Jesucrist najc nani gujt por nuure, luxh et ni'ctis. Laani guban'saczani loj rebejngujt, luxh naj sobga'ni xladbee Dios cadro rnibeeni; laazani cabejdx canabni lo Dios xcuentnu.

<sup>35</sup> ¿Chuni'c sajc gudzucaj nuurnu lo yäl'sanälajz xten Jesucrist: trabajw, o yäl'xliajs, o yäl'rusacsí, o yäl'rliaan, o yäl'xhabääl, o yäl'rdxejb, o te spaad, ä? Nicla tejni.

<sup>36</sup> Si'c ni caj lo gujtz ni caj xtidx Dios:

Xcuentlu, sa'csi najcnu xpejnu caye'tnu guixe-guixee.

Ruchaagreni cuent najcnu si'c xiil ni aguro' te ju't bejnni.

<sup>37</sup> Luxh loj guiraa recosre, sujnpacnu gaan xcuent nani sanälajz nuure, sa'csi sacnäjpacni nuure.

<sup>38</sup> Sa'csi anancheä nicla yäl'gajt, niclza yäl'nabajn, nicla rexangl Dios, niclaza renani rnibee, nicla recos ni yu' naj, niclaza recos nani churu gac, niclaza yäl'milaagwr,

<sup>39</sup> nicla jiaroduxh, niclaza jäjtpac, niclaza xhitis cos ni guc-chee, nicla tej redee di gacdi gudzucaj nuurnu lo xcäl'sanälajz Dios, yäl'sanälajz ni rajpza Dad, Jesucrist.

## 9

### *Dios agule reben Israel*

<sup>1</sup> Caniä didxguliipac lojtu sa'csi rililazä xtidx Jesucrist. Dina guiniä didx-xhii. Sprit Dxi xten Dios caguluii xcärienä laaca rniä;

<sup>2</sup> cayac-huinuxh lastoä, sanuutis yäl'xliajsga.

<sup>3</sup> Sa'csi narä rlazä malaii sajc lagajc narä nitloä lo Dios te sajc gacnää resa'ä lo guedxliujre, rexpejn Israel.

<sup>4</sup> Sa'csi laareni najc xagdoo toIsrael, luxh laareni nungäj l gacreni si'c xi'npac Dios. Gubanäj Diosreni. Bia'n Dios didx con laareni. Basa'n Dios xleii Moisés lojreni. Bazuxhjbreni nez lo Dios nen guidoo. Sica'reni reyäl'nasa'c xten Dios palga jiureni xtiidxni.



<sup>5</sup> Laareni najc rexagdoo xten toxtadgoldoonu ni gubajn agujc xhero. Jesucrist gujca xagdoo xten toIsrael che gojlni si'c te ben guedxliuj. Laani najczani Dios loj guiraanu. Suchä'p xpala'nni par tejpas. Sugacni si'c.

<sup>6</sup> Luxh dini gac si'cni abanijt xtidx Dios nani bia'nni loj toIsrael. Sa'csi xhet guiraadi rebejn ni najc xagdoo toIsrael najc xpejn'pac Israel.

<sup>7</sup> Diza guiraa reni najc rexagdoo toAbram gac xi'nguliipacni sa'csi räjp Dios lo toAbram: "Rexagdodoolu nani guigab najc reni gac xagdoo Isaac."

<sup>8</sup> Ni'cni xhet guiraadi rexagdoo toAbram najc rexi'n Dios, xtebtis renani chalilajz xtiidxni, reni'c najc xi'nni.

<sup>9</sup> Sa'csi bia'n Dios diidx loj toAbram: "Stebijz, lagajc bäiire guibisacä, te dxejc chu te xi'n Sara."

<sup>10</sup> Xhet diidxtisga gunii Dios. Guniizani lo toRebeca, che nuxi'nni cua'ch, xi'n chääl'ni, toxtadgoolnu Isaac.

<sup>11</sup> Ni'cni ansde gaal rexi'nni, ansde niujnreni te dzunsa'c o te dzunguijdx, te soobpac xtidx Dios xcuent chuni'c cueni lo guiro'p rebäzre, xhet sa'csi bejndireni dzunsa'c, per sa'csi agule Diosni,

<sup>12</sup> ni'c räjp Dios lo toRebeca: "Xingangaloolu gac xmos xinhuinlu."

<sup>13</sup> Si'cza caj lo guijtz rediidxre: "Sanälazä Jacoob, niluxh bidxehnää Esaú."

<sup>14</sup> ¿Xhini'c guiniinu naj? ¿Xhet laadi rujn Dios, ä? ¿Xho gacni si'c!

<sup>15</sup> Sa'csi räjp Dios loj toMoisés: "Sulaslazä chutis bejn nani rlazä gulaslazä, sacnää chutis bejn nani rlazä gacnää."

<sup>16</sup> Ni'cni dini gac xcuent ni rlajz rebejn gac, dizani gac xcuent nani rujn rebejn. Rajctisni si'c rlajz Dios nani rulaslajz bejn.

<sup>17</sup> Ni'cni caj lo guijtz xten Dios che gunii Dios xcuent Faraón: "Narä benä gujclu reii xten Egipto te gululoj xcälrnibeä, te guiliä'p bejn xpala'nä guideb guedxliujre."

<sup>18</sup> Rulaslajzni rebejn nani rlajztisni, runnadipzani lastoo bejn nani rla-ztisni.

<sup>19</sup> Naj la'tu siniitu loä: "¿Xhicuent rucuaquijni bejn? ¿Chuni'c sajz sudzu'tz nez loj nani rlajzni gac, ä?"

<sup>20</sup> ¿Chuxh luj, bejn guedxliuj, te jieinäjlu Dios? Xhixh säjb te gues loj nani bencheeni: "¿Xhicuent bejnlu narä scree?"

<sup>21</sup> Gurniälojlu. Bejn nani runchee guejs, ¿la di gacdi gunni si'ctisni rlajzni con bajnga, ä? ¿La di gacdi guncheeni te guessa'c nägajca te guesyuj ni xhet sirbdi con lagajc bajnga?

<sup>22</sup> ¿Xhiru najc, palga Dios rlajzni gululoj ni xho rujnni yälguxhtis, näjza rlajzni gululoj ni xcälrnibeeni, gopnäjni pasens renani nungäjl gac yälguxhtis, te nitlojzareni, ä?

<sup>23</sup> Bejni si'c te gululoj ni lacti sajz xcälrndimbicha'ni loj renani galooli guleni chú lojni lo xcälrndimbicha'ni.

<sup>24</sup> Lagajc nuurnu najcnu reni aguleni; xhet xtebtis loj rexpén Israel guleni nuurnu, näjza loj rebejn ni di gac rexpén Israel guleni nuurnu.

<sup>25</sup> Cajza lo guijtz ni bacuaa Oseas: Renani di gac xpenä, reni'c cuälää "xpenä". Luxh nani dina ninälazä, sinälazäni.

<sup>26</sup> Dxejcti lagajc cadro räjpreni lojreni:

"Ditu gac rexpénä", lagajc ro'c säjpreni lojreni:

"La'tu najctu xi'n Dios ni nabajn par tejpas."

<sup>27</sup> Cajza lo guijtz ni bacuaa Isaías: "Mase najc xhidajl rexpén Israel si'c najc yujxh ni tre' ro' nisdoo, guxii gac reni laa lo dojl.

28 Sa'csi susoobpac Dad, Dios xtiidxni xcuent xcäl\_guxhtis reben\_guedxliuj, luxh siojbza gunnini."

29 Guniiza Isaías, xcuent nani churu gac, bacuaani:

Palga di Dios ni yu' xhaguibaa nusa'n gaii xagdoos reben\_guedxliuj, niajcnu si'c gujc Sodoma näjza Gomorra, reguejdx ni gunitloj.

### *Xtidx Dios näj rexpén Israel*

30 ¿Xhini'c sajc guiniinu naj? Rebejn nani di gac xpen Israel, direni niguuil xho gacreni beñnaya nez loj Dios, niluxh agujcreni beñnaya nez loj Dios sa'csi huililajzreni xtidx Jesucrist.

31 Luxh rexpén Israel, mase sanuutisreni lo xleii Moisés ni ruluui xho gac bejn beñnaya nez loj Dios, banijtreni, direni niujn gaan nusoobreni guideb leiiga.

32 ¿Xhicuent gujcnu si'c? Sa'csi direni nililajz xtidx Dios, alga rlanjreni guntisreni dzuun xten leii, naareni si'c gacreni beñnaya nez loj Dios. Ni'cni gulaj ni'reni lo guij ni rutienta' bejn, nalajznu direni nililajz xtidx Dios xcuent Jesucrist.

33 Si'cza bacuaa Isaías, räjpni:

Aguleä te bejn lo guedx Siön ni gac si'c te guij cadro rtiäj\_l ni' bejn, te guij ni rusäl'ta' bejn.

Chutis tej nani chalilajz xtiidxni, dini jianxtujy.

## 10

1 Rebetzä, rladuxhä chalilajz rexpénä xtidx Dios. Rniabduxhä lo Dios te guslaanireni lo xtoj\_lreni.

2 Narä rniäpac nancheä ruzuxhijb rexpén Israel lo Dios, niluxh direni gumbesa'c xhini'c rlanj Dios gunreni.

3 Sa'csi direni niacbee xcuent xho rajc te bejn te beñnaya nez loj Dios, ni'c rlanjreni gunreni dzuun si'c ni caj lo leii te gacreni beñnaya nez loj Dios, ni'cza direni nusoob xtidx Dios te gacreni beñnaya nez lojni.

4 Abasoob Jesucrist xtidx Leii, ni'cni che chalilajz bejn xtidx Jesucrist, anajcreni beñnaya nez loj Dios.

5 ToMoisés bacuaa rediidxre: "Chutis ni rlanj gac beñnaya nez loj Dios sa'csi rusoobni xtidx leii, nanab gusobsa'cpacni diidxga guideb nabajjni lo guedxliujre."

6 Xcäl\_nayareni nez loj Dios sa'csi rililajzreni xtidx Jesucrist, rnii scree: "Na'c guiniitu nen lastootu, ¿chuni'c chä'p xhaguibaa?" nalajznu, te jädnäsacni Jesucrist loj guedxliuj.

7 Na'cza gäbni: "¿Chuni'c jäjt gabijl?" (nalajznu te chaxiini Jesucrist loj rebengut).

8 ¿Xhini'c rniini naj? Rniini: "Diidxga suga' gajxh ro'tu, nen lastootu." Nalajznu, diidx xcuent yäl\_rililaaaz nani cagusule'nu lojtu.

9 Rniinu lojtu, palga guiniitu con ro'tu, Jesucrist najc Dad loonu, palga chalilajztu baspañsac Dios Jesucrist loj rebengut, suslaani la'tu lo dojl.

10 Sa'csi con lastooni rililajz biniet xtiidxni, ni'c rajcni beñnaya nez loj Dios; luxh che rcäjpza biniet con ro'ni, Jesucrist rñibee loonu, ruslaa Diosni lo dojl.

11 Sa'csi rnii xtidx Dios scree: "Chutis ni rililajz xtidx Dad Jesucrist, dini jianxtujy."

12 Sa'csi guiraa rebejn najc tebloj nez lojni, rexpén Israel sigajc rebenzajt, sa'csi lagajc laani najcni Dad lo guiraareni, rulaslazduxhni guiraa renani rbedx-rniab lojni.

<sup>13</sup> Lo xtidx Dios caj rediidxre: “Chutis ni rbedx-rniab lo Dad, siliaani lo xtojlni palga rililajzni xtidx Dios.”

<sup>14</sup> ¿Xho gac guiniabreni lo Dad, palga direni chalilajz xtiidxni? ¿Xho gacza challajzreni xtiidxni, palga gajd diajgreni jiejn xtiidxni? ¿Luxh xho jiejn diajgreni xtiidxni palga rut rusule'di diidxga lojreni, ä?

<sup>15</sup> Luxh ¿xhoza gusule'reni diidxga palga rut guxhaldireni? Si'cni caj lo guijtz: “Chipza saru najc ni' renani riädnä diidx xcuent cossa'c, yälrbecdx lajz rebejn.”

<sup>16</sup> Xhet guiraadireni rusoob xtiidxni, sa'csi guniiza toIsaías: “Dad, ¿chuni'c chalilajz xtiidxnu?”

<sup>17</sup> Rililajz bejn xtidx Dios che rucudiajgreni diidxga; rucudiajgzareni che yu' chu rusule' xtidx Jesucrist.

<sup>18</sup> Naj arniä: Gajdpac diajgreni jiejn xtiidxni, o ¿la babiejn diajgreni, ä? Pues abiejn diajgreni, sa'csi lo xtidx Dios caj scree:

Abire'ch xse'reni guideb guedxliuj,  
abidzujnza rextiidxreni lo guiraa reguejdx ni tre' lo guedxliujre.

<sup>19</sup> Rniäza: Dipac rexpən Israel niacbee, o ¿la gucbeereni, ä? Galooli gunii toMoisés rediidxre:

Sunä gudxoijntu xcuent rebejn ni di gac te guejdx,  
con te guejdx nani di gacbee suche'chä la'tu.

<sup>20</sup> Diza toIsaías nidxejb guniini rediidxre:  
Renani di niguiil narä, bidxäjł narä,  
baluiloäza loj renani di niniabdiidx narä.

<sup>21</sup> Guniiza toIsaías xcuent rexpən Israel:  
Desde galooli, dxej-yääl basgää naä lo rebejnğa te niurenı xtidxä,  
luxh najcreni bejn ni di gusoob diidx, rutzu'reni didxnaj.

## 11

### *Rexpən Israel nani gulaa lo dojl*

<sup>1</sup> Arniä: ¿La agulälaz Dios rexpən Israel, ä? ¿Xho gacni si'c! Ni lagajc narä nacä te xpen Israel, te xagdoo toAbram, nadxagä lo resa' toBenjamin.

<sup>2</sup> Di Dios nibälaz rexpəjnı, xpen Israel nani guleni galooli che gajdli guirixtiej guedxliuj. O ¿la dilu gacbee xhi caj lo xtidx Dios cadro rniı xcuent Elías, xho gunabduxh Elías didxnaj lo Dios xcuent rexpən Israel, ä? Räjpnı scree:

<sup>3</sup> “Dad, abagu'treni guiraa reniguii nani gunii xtiidxlu, abatzujłreni rexquidoolu, xtebtis narä bia'nä, luxh naj rłajzreni ju'treni narä.”

<sup>4</sup> Luxh, ¿xhini'c räjpnı Dios lojni? Räjpnı: “Abalucheä gajdz mił bejn nani gajd guzuxhıbj nez loj Baal.”

<sup>5</sup> Si'cza naj, abia'n te chinae' rexpən Israel nani agule Dios xcuent xcälrulasłajzni.

<sup>6</sup> Dxejc palga rusłani nuure lo dojl xcuent xcälrulasłajzni diruni gac sa'csi yu' xhi dzuun biennu te nusłani nuure lo dojl. Paru si'c najcni diru xcälrulasłajz Dios gac yälrulasłajz.

<sup>7</sup> ¿Dxejca'? Di rexpən Israel nidxäl nani caguiilreni, luxh rebejn nani agule Dios, ni'c bidxälni, luxh ste cuaareni, aguyalajzreni.

<sup>8</sup> Gujcnı si'c caj lo xtidx Dios:  
Bascäy Dios xcäriejnreni, näjza balojni di jien,  
lo dxe najlı di diajgreni jiejn.

<sup>9</sup> Guniiza toDavid, scree caj lo xtidx Dios:  
Sugun xmex lanijreni jıajbreni,

te gac guiga'reni,  
 sugacni si'c guij ni rulani' bejn, te gacreni yälguxhtis.  
 10 Suguscäy Dios balojreni te na'c fisa'creni,  
 suje't dejtzeni, sutedreni trabajwduxh par tejpas.

*Yärluslaa lo dojl xten bejn ni di gac xpen Israel*

11 Naj rniabdidxä: ¿La białj rexpən Israel te gunijtreni par tejpas, ä? ;Xho gacni si'c! Sa'csi białj rexpejn Israel, ni'cni gojl biäd yärluslaa lo dojl lo bejn ni di gac xpen Israel, te si'c guisiäblajz lajz rexpən Israel laareni lo dojl.

12 Palga xcuent dojl ni bejn xpen Israel gojp reben guedxliuj xcäl'nasa'c Dios, palga xcuent yärlunijt xten rexpən Israel guyu' xcäl'nasa'c Dios par rebejn ni di gac xpen Israel, aticaxh chu xcäl'nasa'creni che gusoob xpen Israel xtidx Dios.

13 Naj caniä lojtu ni najc bejn ni di gac xpejn Israel. Gule Dios narä te gusule'a xtiidxni lojtu, ni'cni caläpä xpala'n xtzunä,

14 te don xho gunä te guisiäblajz reben ladxä ni najc xpen Israel, te si'c chalilajzreni xtidx Jesucrist.

15 Palga gulecdxireni lajz reben guedxliuj con Dios sa'csi gulälaz rexpən Israel xtidx Jesucrist, aticaxh che chalilajz rexpən Israel rextidx Jesucrist, sibansac renani najc si'c bengut.

16 Palga tla' cojb najc hueen, guideb cojbga najc hueen. Sigajcza najc te yaj; palga xlobaani najc hueen, guidebni najc hueen.

17 Rexpən Israel najcreni si'c te yajg oliib; palga gutiuugreni te naa yajgga, dxejc ro'c guquidreni naa ste'ca yajg te guibajni con xtiejn yajg oliibga.

18 Ni'cni, na'c gactu gualajz lo renaapac yajgga. Colgusnaj lajztu, xhet la'ditu ni rudeed yäl'nabajn lo xlobaa yajgga, lobaaga ni runiidx yäl'nabajn lojtu.

19 Dxejc colguini: "Batiuugreni naapac yajgre, te gujc biguidä cuä' yajgga."

20 Guliipacni, biru' naapac yajgga sa'csi direni nililajz xtidx Dios luxh la'tu biguidtu cuä' yajgga sa'csi huililajztu xtiidxni. Na'c gactu gualajz, colguidxejb,

21 sa'csi palga di Dios nutedbia renaa yajgga, diza Dios gutedbia la'tu.

22 Bahuii j'lacti hueen najc Dios! Luxh lacti niälajzani; con renani banijt najcni niälajz, luxh lacti rulasajz Dios la'tu palga chanuu jiuu xtiidxni. Palga ditu jiu xtiidxni, näjza la'tu sudzucaj Dios.

23 Luxh sigajcza reni bidin, palga di chanuu cuälazreni xtiidxni sajz suquid-sac Diosreni lo yajgga.

24 Luxh la'tu najctu benzijt, najctu si'c naa te yagoliib ni xtebca gulejn nen dajn. Luxh batiuugni la'tu te baquiidni la'tu lo te yagoliib ni najc yagsa'c ni rcaduxh oliib lojni, mase xhet si'cti najc olibguijxhga, jaticaxh rexpən Israel ni banijt najc si'c naapac xten yagolibsa'cga ni bidin, palga chalilajzpacreni xtidx Dios, suquidsac Diosreni loj yajg ni najc xtenpacreni!

*Che laapac rexpən Israel lo dojl*

25 Rebetzä, rlazä gacheetu xcuent te diidx nagajn, te di naatu nanduxhtu. Dee najc didx nagajnga: yu' rexpejn Israel ni guc najd lastooreni te direni nililajz xtidx Dios, hasta guisa' redxej ni chalilajz rebenzijt xtidx Dios.

26 Dxejcti siliaapac guiraa rexpən Israel lo dojl che chalilajzreni xtidx Dios, sa'csi si'c caj lo xtidx Dios, cadro caj rediidxre:

Nani ruslaa sajz bejn guedx Siön,  
 luxh sudzucajni xtojł renani najc xagdo toJacooB.

27 Dee najc diidx ni bia'nä con laareni,  
 che gudzucä xtojłreni.

<sup>28</sup> Naj, najcreni xcontraar Dios sa'csi rdxe'chreni xcuent xtidx Jesucrist, te chalilajztu; niluxh Dios sanälajzreni sa'csi si'c abia'nni diidx con retoxtd-goldooreni.

<sup>29</sup> Sa'csi rut rajcdi rudzucaj nicla yäl'nasa'c ni rudeed Dios, niclaza yäl'rbejdx xten Dios.

<sup>30</sup> La'tu galoo ditu nusoob xitdx Dios. Naj rulaslajz Dios la'tu sa'csi gulälaz rexpén Israel xtiidxni.

<sup>31</sup> Sigajcza naj direni gusoob xtidx Dios, niluxh si'c najcni te gulaslajz Diosreni sa'csi balaslajzani la'tu.

<sup>32</sup> Dios basaan biajb guiraanu lo dojl, te si'c sajc gulaslajz Dios guiraanu.

<sup>33</sup> ¡Lacti guroob najc yäl'nasa'c xten xcäl'najn, xcäl'racbee xten Dios! Nicla tej bejn guedxliuj di gacbee guiraa rexcäl'guxhtisni, rudliidiza najn rexnezyujni.

<sup>34</sup> Si'c caj lo guijtz: “¿Chuni'c gucbee xcäriejn Dios? ¿Chuni'cza abaluiini? Rutliidi.

<sup>35</sup> O ¿chuni'c badedxgaa te xhi cos lojni, te quixsacnini lojni, ä? Rutliidi.”

<sup>36</sup> Sa'csi loj Dios siäd guira'ti, luxh laani bencheeni guira'ti par lagajcza laani. Suguilä'pnu xpala'nni par tejpas. Sugacni si'c.

## 12

### *Yäl'nabajn rliä'p xpala'n Dios*

<sup>1</sup> Ni'cni rulidxä la'tu rebetzä, sa'csi rulaslajz Dios nuure, colgudeed xcäl'nabajntu lo Dios te gac guibansa'ctu si'cni rlajz Dios. Dee najc yäl'rajnpac Dios si'c ni nungäjł gantü Dios.

<sup>2</sup> Na'c rujntu lagajc xhigab ni rujn reben guedxliuj, colguscoob rexhigabtu te guidxaapac xmoodtu te si'c guluii Dios xhini'c rlanjni guntu, nalajznu xhini'c najc hueen, xhini'c rdxagljaz Dios, xhini'cza najc laapac.

<sup>3</sup> Sa'csi balaslajz Dios narä, ni'c rusule'ä xtiidxni loj tejgatu, rniä lojtu, na'c guiliä'ptu lagajc xpala'ntu, naatu sajcrutu loj sa'tu. Coleyjn xhigabsa'c, te laaca gac xhigabtu, si'cni baniidx Dios lo tejgatu xho chalilajztu xtiidxni.

<sup>4</sup> Sa'csi sigajc najc tiejxhnu, yu' xhidäl la'ni, luxh tejgareni rujn xtzuunxtzuunreni,

<sup>5</sup> sigajcza nuure nani rililajz xtidx Jesucrist, najcnu xhidajł, najcnu si'c tejsi tiejxh lo Jesucrist, mase tejganu rujn xtzunxtzuunnu, tejsi najcnu.

<sup>6</sup> Luxh sa'csi tejganu rajpnu garen-garen dzuun xcuent yäl'rulaslajz ni baniidx Dios loonu, sujiennu rextzuunnu screeza: nani rajc rniü xtidx Jesucrist, suguiniinini, si'c ni najc xcäl'rililajzni;

<sup>7</sup> nani rajc racnäjä sa'ni, sugacnäjni; nani rajc ruluii xtidx Dios, suguluiini;

<sup>8</sup> nani rajc gulijdx resa'ni, sugulijdxnireni, nani rajc rudedxlia' xhixtenni lo sa'ni, saru sugudeedni xhixtenni; nani rajc rnibee lo sa'ni, suguinibeeni con yäl'nadolajz; nani rajc rulaslajz resa'ni, sugulaslajzni con yäl'rbalajz.

### *Xho nanab guibanu lo xnezyuj Dios*

<sup>9</sup> Colchanälajzpac resa'tu, na'c gunsitu si'cni rinälajztureni. Colcuälaz redzun-guidx, colyējntis redzunsä'c.

<sup>10</sup> Colchanälajz resa'tu si'c rinälajz bejn rebejtzn. Colguiliä'p xpala'nreni.

<sup>11</sup> Coleyjn dzunsä'c, na'c cuedxitu. Coleyjn xtzuun Jesucrist con guideb xtijtpu, guideb xcäriejntu.

<sup>12</sup> Colguibalajz sa'csi ahuililajztu xtiidxni. Colcuedcxilajztu che tedtu trabajw. Colcuedx-colnabtis lo Dios guideb nabajntu.

<sup>13</sup> Colgacnäjä rebejn nani rililajz xtidx Dios; sacru col'ni loj ni riädhuiitu.

14 Colguinii didxsa'c xcuent renani rusacsí la'tu, na'c gudzubdetureni.

15 Colguibalaznäj renani rbalajz, colyonnäj renani roon.

16 Colyejn tejtis xhigab con resa'tu, na'c gactu guyalajz, colguchaag loj reben nadolajz. Na'c guchalotu najctu beñnanduxh.

17 Na'c gudzu'tu dzunguijdx loj renani rujn dzunguijdx lojtu. Colyejn recossa'c nez loj guirasi bejn.

18 Cadrotis sajcní, dxitis colguibannäj guiraa rebejn.

19 Rebetzä, na'c guntu xhigab lagajc la'tu gudeedtu xten renani rujn dojl lojtu, sa'csi lagajc Dios gun yälguxhtis lojreni, ni'cni caj lo xquijtzni scree: "Narä gunä yälguxhtis, narä quixä lojreni si'c naj Dad, Dios."

20 Näjza: "Palga calaan nani rdxe'ch lojtu, colgudeed xhi gauni, palga cayojlni, colgudeedza xhi yäni, te si'c jianxtiujni."

21 Na'c gusaantu gun redzunguijdx gaan lojtu, colyejn gaan lo dzunguijdx con recossa'c ni rujntu.

## 13

1 Guiraatu nanab jiutu xtidx renani rnibee lojtu. Sa'csi xheti te yälrnibee nani di Dios nudeed, luxh guiraa reyälrnibee ni yu' lo guedxliujre, lagajc Dios gule'creni.

2 Ni'cni renani di gusoob xtidx renani rnibee, xtidx Dios cabälazni. Luxh renani rujn si'c, lagajc laareni xcaquijreni dojl, sujn Dios yälguxhtis lojreni.

3 Renani rnibee di guchejb renani riu xtiidxreni, ruchejbreni renani najc ben guijdx ni di jiu xtiidxreni. Palga di rlanjtu guidxejbtu reguxhtis, bejntis dzunsa'c, dxejcti guiliä'preni xpala'ntu sa'csi rujntu dzunsa'c.

4 Reguxhtis rujnreni lojtu xtzuum Dios te guibañsa'ctu. Palga guntu dzunguijdx, colguidxejb, xhet xlia'di ca'ni spaad, sa'csi najcreni nani rujn xtzuum Dios te gunreni yälguxhtis, te quixpac renani rujn dojl.

5 Ni'cni nanab jiutu rextiidxreni, xhet ganaxtis sa'csi rujnreni yälguxhtis lojtu, näjza te ga'ptu te xcäriejsa'c, te xcäriennaya.

6 Ni'cni colquijx lojreni nani riäjł xca'reni sa'csi renani rnibee najc xmos Dios, luxh ni'cpac najc xtzuumreni.

7 Colgudeed lo guiraa bejn nani riäjł xca'reni. Colquix loj renani nazääbtu; colquijx impuest loj ni riäjł xca'ni; colchanälajz renani riäjł chanälajztu; colguiliä'p xpala'n renani riäjł chä'p xpala'reni.

8 Na'c xcajlu di'n loj nicla tej bejn, di'ntis xten yälrinälajz sa'ni, sa'csi nani rinälajz xpisiñni, bejnga abasoob xleii Dios.

9 Sa'csi lo xleii Dios caj scree: "Na'c guesnäjl bejn ni di gac chäällu, na'c ju'tlu, na'c cuanlu, na'c gusgueelu, na'c chuguij lajzlu xhixten resa'lu." Luxh palga yu' xhi stee leii rsa'ni con leii ni rni: "Chanälajzlu resa'lu si'c sanälajzlu lagajc luj."

10 Nani rajp yälñanälajz, dini gun latsiaj lo resa'ni. Ni'cni yälñanälajz rusoob releii ni caj lo xtidx Dios.

11 Colyejn guiraa redee, sa'csi anajntu xho najc redxej ni nabajñnu naj, anajntu alagojl oñ guibajñnu lo bacal sa'csi abidzungenajxhru dxej che laanu nen dojl lo dxej che huililajznu.

12 Aguxhinduxh, asiädgajxh bianij. Ni'cni cuääz jiennu redzuun guijdx ni rajc lo xcäje, te jientisnu redzunsa'c ni rajc rdxee, lo bianij.

13 Guibansa'cnu si'c riäjł guibajñ rebejn rdxee, na'c guibañnu lo yälrä', niclaza lo yälbiej, na'c guidiesnäjnu bejn ni di gac chäällu, na'c ga'pnu rebis, na'c guidxagdiñnu resa'nu, na'c chuguij lajznu xhixten resa'nu.

<sup>14</sup> Ni'cni colca' xcäl\_rnibee Jesucrist te na'c guntu redojl ni rla\_jz gun tiejxhtu.

## 14

### *Na'c guiniyajtu rebejtztu*

<sup>1</sup> Colnii didxdoo lo rebejn nani di gumbesa'c xtidx Dios, na'c tilnäjtureni.

<sup>2</sup> Sa'csi yu' reni rililajz nani sa\_jc gaureni guira'ti xhi cos, niluxh nani gajd sutijp lo yäl\_rililajz, ganaxtis berduur rajwni.

<sup>3</sup> Nani rajw guira'ti, na'c guidxechnäjni nani di gau guira'ti; luxh nani di gau guira'ti, na'cza guiniyajni nani rajw sa'csi Dios aguleza bejn\_ga.

<sup>4</sup> Ç Chuxh luj te guiniyajlu lo xmos te bejn, ä? Sugäb lagajc xlamni lojni la laaca rujnni o la xhet laadi rujnni. Luxh sujnni laaca sa'csi Dad Jesucrist sujn sutijp lastooni.

<sup>5</sup> Tej bejn naa sa\_jcru tej dxej lo stee dxej, dxejc ste'ca bejn rchalo guiraa redxej najc tebloj. Xhet najc\_d, te\_jga bejn sugunpac lagajc xhigabni.

<sup>6</sup> Nani rapda te dxej, rujnnini te guiliä'pni xpala'n Dios, luxh nani di gunni, rliä'pzani xpala'n Dios sa'csi dini gapda te dxej. Luxh nani rajw guira'ti, rajwni te rliä'pni xpala'n Dios, sa'csi rüdeedzani xquixtios lo Dios; nani di gau guira'ti, nez lo Dios dini gau, rliä'pzani xpala'n Dios, rüdeedzani xquixtios lo Dios.

<sup>7</sup> Sa'csi nicla tejnu dinu guibaj\_n xcuentcanu, nicla tejzanu dinu guet xcuentcanu.

<sup>8</sup> Palga nabaannu, nabaannu xcuent Dad Jesucrist; palga guetnu, rejtzanu xcuent Dad, Jesucrist. Ni'cni palga nabaannu, o palga guetnu, la\_ltis najcnu rexpem Dad, Jesucrist.

<sup>9</sup> Ni'cni gujt Jesucrist, ni'cni guba\_n\_saczani, te sa\_jc gacni Dad xten rebe\_n\_gut, nä\_jza Dad xten rebejn nani nabaj\_n.

<sup>10</sup> Dxejc luj, ç xhicuent cubeelu bejtzlu, ä? O ç xhicuent rdxe'chlu rhuiilu lojni, ä? Ni guiragajcnu tednu nez loj Jesucrist cadro cueni te gunni yäl\_guxhtis loonu.

<sup>11</sup> Sa'csi scree caj lo xtidx Dios:

Si'tcis ni naba\_nä, rniliä\_pac lojtu, rä\_jp Dad Dios, guiraa rebe\_n\_guedxliuj suzuxhijbreni loä, luxh guiragajc ro'reni sicä\_jp narä nacä Dad Dios.

<sup>12</sup> Ni'cni guiraanu, te\_jganu sudeednu cuent loj Dios xcuent nani biennu.

### *Na'c guzällu bejtzlu*

<sup>13</sup> Ni'cni na'cru cubeenu sa'nu. Maazru hueen jiennu xhigab ne\_n lastoonu xhetliidi jiennu ni gun jia\_jb resa'nu lo dojl.

<sup>14</sup> Narä nanä, racbeä\_pac guira'ti najc hueen. Jesucrist Xtradnu baluii narä si'c. Luxh palga yu' chu tej ni rchalo dini gac hueen, par laatisni dini gac hueen.

<sup>15</sup> Palga la'tu guntu gac-huin la\_jz te sa'tu sa'csi yu' xhi rajwtu, dirutu chasanäj xnezyuj yäl\_sanälajz. Na'c gunlu gunijt te sa'lu xcuent nani rajwlu, sa'csi agujt Jesucrist xcuentni.

<sup>16</sup> Ni'cni na'c gusaanlu guiniyajreni nani najc te cos hueen par luj.

<sup>17</sup> Sa'csi xcäl\_rnibee Dios dini gac xcuent yäl\_rajw, niclaza xcuent yäl\_rä'; xcäl\_rnibee Dios najc xcuent te yäl\_naba\_nnya nez loj Dios, nä\_jza yäl\_rbedxilajz con yäl\_rbalajz xcuent Sprit Dxan xten Dios.

<sup>18</sup> Sa'csi nani rujn si'c lo xtzuun Jesucrist, bejn\_ga rchaglajz Dios, luxh rebe\_n\_guedxliuj rniiza didxsa'c xcuent sa' bejn\_ga.

<sup>19</sup> Ni'cni chanuutis guidiilnu recos nani rujn chu yälrbexilajz, näjza nani rujn racnäjnü resa'nu te tioobrureni loj xnezyuj Dios.

<sup>20</sup> Na'c guntu nit xtzuun Dios xcuent ni rajwtu. Guliicani guira'ti ni rajw bejn najc naya, niluxh palga gautu te cos nani gun jiajb bejtzlu nen dojl, ni'c najc xhet laadi.

<sup>21</sup> Hueen najc na'c gautu bääl, na'cza yätu bin, na'cza guntu jiajb sa'lu nen dojl.

<sup>22</sup> Nani rililajztu, ni'c colyajp xcuentcatu nez loj Dios. Chicbaa nani di cubee lagajc laani xcuent recos nani rniini laaca najcni.

<sup>23</sup> Luxh palga guntio'p lajz te bejn xcuent nani rajwni, sigubeeni lagajc laani, sa'csi dini gau xcuent yälirililajz, sa'csi xhitis ni di gac xcuent yälirililajz, lagajc ni'c najc dojl.

## 15

### *Huinälajz sa'lu*

<sup>1</sup> Nuurnu ni agusutijpnu lo yälirililajz nanab gacnäjnü resa'nu nani gajd chalilazsa'c. Di gacdi guibañtisnu xcuentcanu.

<sup>2</sup> Tejganu nanab chonälaznu resa'nu lo xcälñabañsa'cni te gacnäjnü chalilazrurenü.

<sup>3</sup> Sa'csi nicla Jesucrist dini nibajñ xcuentceni, luxh si'cni caj loj xtidx Dios: "Redidxyaj ni guniyajreni lojlu biajbreni yecä."

<sup>4</sup> Guiraa rediidx ni cuaj lo guijtj galooli, cuajreni te guluiireni nuurnu te ga'pnu yälsutijp näjza yälrustioblajz te gacza guibääznu lo xtidx Dios.

<sup>5</sup> Dios rusutijp lajznu, Dios rutioob lastoonu. Rniabä loj Diosga gacnäjnü guntu tejtis xhigab xten Jesucrist con resa'tu.

<sup>6</sup> Te dxejcti tejtis gac xse'tu guiliä'ptu xpala'n Dios, Xtdad Jesucrist.

### *Gusule' xtidx Dios loj rebenzijt*

<sup>7</sup> Ni'cni colca' resa'tu, renani ahuililajz xtidx Dios sigajc cua' Jesucrist nuure te guiliä'pnu xpala'n Dios.

<sup>8</sup> Sa'csi narä rniä lojtu, biädä Jesucrist te gujçni si'c te mos loj rexpen Israel te baluini xcuent didxgulli xten Dios te gusojb rediidx nani bia'n Dios loj retoxtadgoldoonu,

<sup>9</sup> näjza par rebenzijt, te guliä'preni xpala'n Dios sa'csi baluilojñi xcälñulaslajz Dios lojreni, si'c ni caj lo xtidx Dios:

Ni'cni siliä'pä xpala'nlu nez loj rebenzijt, soläza dij lojlu.

<sup>10</sup> Dxejcti stee lajt rniini:

La'tu benzijt, colguibalaznäj rexpenä rexpejn Israel.

<sup>11</sup> Stee lajt caza:

Guiraatu, rebenzijt, colguiliä'p xpala'n Dad, suguliä'pza guirali rebejn xpala'nni.

<sup>12</sup> Stee huält guniiza Isaías scree:

Siricaj te xagdoo toIsaí,

näjza te ni chäs te guinibeeni loj rebenzijt, laani cabäjz rebenzijt.

<sup>13</sup> Naj rniabä lo Dios ni rudeed yälrbälzajz, te laani gacnäj guibalajztu, cuecdxilajztu, sa'csi salilajztu, te tioobru yälrbälzajz ni rajptu sa'csi Sprit Dxan xten Dios yu' nen lastootu, luxh laani rajpni yälñibee.



14 Luxh xcuent la'tu rebetzä, anancheä nabaṅsa'ctu nasinḍuxhtu, arajcza rulijdxtu sa'tu,

15 luxh loj guijtzre bacuaä gaii didxnaj xcuent tiop-choṅ cos, te gusnaä lajztu. Runä si'c xcuent yälṛulaslajz ni baniidx Dios loä

16 te gacä xpen Jesucrist ni rusule' diidx loj rebenzijt. Ni'cni cagusulesa'cä xtidx Dios lojreni, te xca' Dios rebenzijt si'c te gojn ni rudedä, sa'csi agujreni benṅaya sa'csi rbäjz Sprit Dxan neṅ lastooreni.

17 Ni'cni xcuent Jesucrist abidxälä xhicuent guiniduxhä didxro xcuent recos ni najc xten Dios.

18 Sa'csi dina guiniä diidx xcuent xhi stee cos, ganaxtis xcuent xho gucnäj Jesucrist narä, luxh xcuent ni'c basoob rebenzijt diidx, huililajzreni xtiidxni sa'csi biejn diajgreni xtiidxni, bahuiizareni rextzuunni,

19 con yälṁmilaagwr xten redzunro, resenro, ni gujc con xcälṛnibee Sprit Dxan xten Dios. Ni'cni lo guedx Jerusalénli, näjza guideb gabi ro'c, lo guedx Ilirico, guiraa nejzga abasule'ä xtidx Jesucrist.

20 Si'cza guyu'ä ganduxh gusule'ä xtidx Dios xhet cadro ahuisule'direni xtidx Jesucrist, alga ganax cadro gajdreni gumbee Jesucrist, te na'c gunä dzuun cadro gusloj cayujn ste'ca bejṅ dzuun.

21 Te gacni si'cni caj lo guijtz:  
Renani rutliidi bij diidx xcuentni, suhuiipacreni lojni,  
luxh renani gajdpac diajgreni jiejn xtiidxni, sachbecheereni xtiidxni.

### *Rujn Pabl xhigab chääni guedx Roma*

22 Ni'cni balti huält badxojn Dios narä jiädhuiä lojtu.

23 Luxh ṅaj sa'csi abaluxä xtzunä guideb nezree, näjza sa'csi agujc balti ijz rladuxhä jiädhuiä lojtu,

24 ṅaj che cha'a España siädhuiäpac lojtu. Che tedä, jiädhuiäpac contu te ganid guibalaznää la'tu, dxejcti gacnäjtu narä te cha'a España.

25 ṅaj sia'a guedx Jerusalén te chanää xcoobr rexpejṅ Dios ni yu' ree loj rebejṅ ro'c.

26 Sa'csi rebejṅ Macedonia näjza reben Acaya rlanjpacreni guxhalṅreni te coobr loj rebenproob ni yu' lo reni huililajz xtidx Dios neṅ guedx Jerusalén.

27 Bejnreni xhigab hueen gunreni si'c, luxh guli'careni, sa'csi yu' xhi nazääbreni lojreni sa'csi rebejṅ Jerusalén najc reni baxhalṅ xtidx Jesucrist lojreni, ṅaj laaca rujnreni cayacnäjreni reben Jerusalén con xhixtenreni.

28 Ni'cni che chasa'nä meel lojreni dxejc tedä lajdxtu, jiädhuiä contu, dxejc cha'ä España.

29 Luxh ananä che jiälä lojtu, li guidxa lastoä xcälṅnasa'c xtidx Jesucrist guidzunä lojtu.

30 Rebetzä, rniabduxhä lojtu xcuent xtidx Dad Jesucrist näjza xcuent xcälṅrinälajz Sprit Dxan xten Dios, colṅguidxagsa'tu, te colṅgacnäj colṅcuedx-guiniabtu lo Dios xcuentä.

31 Colṅab lo Dios te guslaani narä loj reben Judea nani di gusoob xtiidxni te saru gun rebenḍxan ni yu' Jerusalén te xca'reni ni chanää lojreni.

32 Te cabaa lazä guidzunä lojtu, sa'csi rlanjpac Dios jiälä lojtu, te laṅni yu'ä lojtu siälyuä, susilazäza con la'tu.

33 Dios ni rbecdxilajz bejṅ gacnäj guiraatu. Sugacni si'c.

<sup>1</sup> Colgacnäj bisiajnnu Febe. Nane're bejn dzunduxh neñ guidoo ni tre' Cencrea.

<sup>2</sup> Colca'ni xcuent Dad, Jesucrist, si'cni riäjł gun bejn gacnäj renani rililajz-pac xtidx Dios. Colyacnäjni lo xhitis nani guiquiinni, sa'csi laani gucnäduxhni xhidal rebejn, năgajcza nară gucnäjni.

<sup>3</sup> Ruxhală xtixtios lo Priscila năjza lo Aquila, ni racnäj nară lo xtzuum Jesucrist.

<sup>4</sup> Laareni nicăjpreni niejtreni xcuentă, ni'c rudedă xquixtios lojreni, luxh xhet narătis, năjza guiraa rebejn ni yu' lo rexquidoo rebenzijt.

<sup>5</sup> Ruxhală xtixtios loj resa'à ni rdxagsa'reni rolijz Priscila năjza Aquila. Ruxhală xtixtios loj Epeneto, ni sanălazduxhă, ni gujc benganiđ ni huililajz xtidx Jesucrist neñ guedx Acaya.

<sup>6</sup> Ruxhală xtixtios lo Marii nani benduxh dzuun lojtu.

<sup>7</sup> Ruxhală xtixtios loj reben ladxă ni laa Andrónico năjza Junias; laareni guyunäj nară neñ latzguiib, najcreni benro loj reapost. Ganid laareni huililajz xtidx Jesucrist, dxejcti huililază.

<sup>8</sup> Ruxhală xtixtios loj Amplias, ni sanălază xcuent Jesucrist.

<sup>9</sup> Ruxhală xtixtios loj Urbano, ni runnăj nuurnu xtzuum Jesucrist. Ruxhalăza xtixtios loj Estaquis, ni sanălază.

<sup>10</sup> Ruxhalăza xtixtios loj Apeles, ni abadeed balti seen rililajzpacni xtidx Jesucrist. Ruxhalăza xtixtios loj guiraa ni tre' rolijz Aristóbulo.

<sup>11</sup> Ruxhalăza xtixtios lo Herodión ben ladxă, năjza loj resa' Narciso nani ahuililajz xtidx Jesucrist.

<sup>12</sup> Ruxhalăza xtixtios loj nan Trifena năjza nan Trifosa, guiro'preni cayujn xtzuum Jesucrist. Ruxhalăza xtixtios loj nan Pěrsida, sanălazăni, abenduxhni xtixtios loj Jesucrist.

<sup>13</sup> Ruxhalăza xtixtios lo Rufo nani agule Dios, năjza lo xnanni, sa'csi gujcti si'c xnanăza.

<sup>14</sup> Ruxhalăza xtixtios loj Asíncrito, năjza lo Flegonte, năjza lo Hermas, năjza lo Patrobas, năjza lo Hermes, năjza lo rebetză ni yunăjreni.

<sup>15</sup> Ruxhalăza xtixtios loj Filólogo, năjza lo Julia, năjza lo Nereo con bisiajnni, năjza lo Olimpas năjza guiraa rexpen Dios nani yunăjreni ro'c.

<sup>16</sup> Colye'tz xchan loj resa'tu. Guiraa rexquidoo Jesucrist ruxhal xtixtios lojtu.

<sup>17</sup> Rebetză, rniabduxhă lojtu ga'ptu cuidaad xcuent renani rujn bieje te guilia' sa' bejn, nani rlajz guntu guiraloj nani najc garenca loj yălruluii ni bisieedtu, colguibicaj lojreni,

<sup>18</sup> sa'csi sa' rebejnga direni gun xtzuum Jesucrist. Laareni rlajztisreni gunreni si'c rlajz tiejxhreni; rniireni didxdoo, diidx ni rgudxguel diajg bejn te rusgueereni lastoo rebejn nani di susin.

<sup>19</sup> Guiranejz abire'ch diidx xcuent xho rusobsacpactu xtidx Jesucrist, ni'cni rbaa lază, ni'cni rlază gactu nasinduxh xcuent recoshueen, luxh si'c băz xhet ganditu xcuent recosguijdx.

<sup>20</sup> Luxh Dios nani ruscuecdxilajz bejn siojb guta'cwni bendxab xhan ni'tu. Gacnăj Dad Jesucrist la'tu.

<sup>21</sup> Timoteu nani racnăj nară lo dzuun, ruxhal xtixtios lojtu. Lucio, Jasón, năjza Sosípater, ben ladxă, ruxhalza xtixtios lojtu.

<sup>22</sup> Najră Tercio, ni cagucuaă guijtze xcuent Pabl, ruxhalăza xtixtios lojtu xcuent Jesucrist.

<sup>23</sup> Ruxhalza Gayo xtixtios lojtu. Rbääznu rolijzni, luxh rudeedzani rolijzni guidxagsa' reben guidoo. Ruxhalza Erasto, ni najc tesoreer xten guejdxre, xtixtios lojtu, sigajcza bejtznu ni laa Cuarto.

<sup>24</sup> Gacnä; Dad Jesucrist la'tu. Sugacni si'c.

*Rediidx lult xten Pabl*

<sup>25</sup> Colguiliä'p xpala'n nani sajc gusudzu'tz la'tu loj xtiidxni nani basule'ä, näjza loj xtidx Jesucrist xcuent rehxigab ni naga'tz galooli,

<sup>26</sup> naj abaluiloj rediidxga lojtu; näjza xcuent ni bacuaa reprofte't galooli; si'c najc diidx ni bia'n Gueb Dios ni nabajñ par tejpas loj rexpejñni, agusule'ni loj guiraa reben guedxliuj, te gusoobreni diidx sa'csi rililajzreni xtiidxni,

<sup>27</sup> colguiliä'p xpala'n ni najc tejtis Dios ni nanduxh. Suguiä'pnu xpala'n Dios xcuent Jesucrist. Guiliä'pnu xpala'n Dios par tejpas. Sugacni si'c.

## Guijtz Ganid Ni Bacuaa Pabl Lo Guidoo Xten Guedx Corinto

### *Bacuaa Pabl te guijtz lo guidoo xten guedx Corinto*

<sup>1</sup> Narä Pabl nacä apost xten Jesucrist sa'csi agule Dios narä te gusule'ä xtiidxni. Narä näjza Sóstenes ni najc bejtznu lo xtidx Dios rucuaanu guijszre lojtu

<sup>2</sup> ni ahuililajz xtidx Dios, ni yu' neñ guidoo xten guedx Corinto. La'tu agule Jesucrist, abasiani lastootu sa'csi ahuililajztu xtiidxni. La'tu näjza guiraa rebejn ni ahuililajz rextidx Jesucrist loj guideb guedxliuj, najctu xpejn Dios, ni najc Dad xten guiraanu.

<sup>3</sup> Rniabnu lo Dios ni najc xtdadnu näjza lo Dad Jesucrist, gacnäjreni la'tu, guscuedxireni lajztu.

### *Abaniidx Dios xhidajl dzunsa'c xcuent Jesucrist*

<sup>4</sup> Rudedätis xquixtios lo Dios xcuentu, xcuent yäl'ulasajz xten Dios ni cua'tu xcuent Jesucrist,

<sup>5</sup> te xcuentni acua'zatu guiraa dzunsa'c, te gusule'tu xtiidxni, näjza te gachesa'ctu xtiidxni;

<sup>6</sup> sigajzca con xcäl'nabansa'ctu baluiitu huililajzpacktu xtidx Dios xcuent Crist.

<sup>7</sup> Ni'cni xhetliidi cayäädxditu loj redzunsa'c ni rniidx Dios, la\_l ni ganduxh yu'tu cabäjztu guibisac Jesucrist lo guedxliuj.

<sup>8</sup> Laani susutijpni lajztu dxejli ni guibisac Dad Jesucrist loj guedxliuj, te rutliidi gac cue'c xhi te quej xcuenttu.

<sup>9</sup> Rusoobpac Dios xtiidxni. Laani gurejdxni la'tu te jiu'tu lo xnejz Xi'nni Jesucrist ni najc Dad xtenu, te sanäjtni.

### *Rlia' sa'reni neñ guidoo*

<sup>10</sup> Rulidxä la'tu, rebetzä, xcuent Xtdad Jesucristnu, colyejn tejsi xhigab te na'c la' sa'tu, saru guibannäjtu sa'tu, colyejn tejsi xhigab, colga'p tejsi xcäriejn.

<sup>11</sup> Sa'csi agucebeä xcuenttu, betzä ni huililajz xtidx Dios. Tej resa' Cloé biädsä'n diidx loä xcuenttu, yu' yäl'rdijl lojtu.

<sup>12</sup> Rlazä guiniä scree lojtu sa'csi yu'reni rni: "Narä nacä te rexpejn Pabl", näjza: "Narä nacä te rexpejn Apolos"; näjza: "Narä nacä te rexpejn Pedr", yu'zareni rni: "Narä nacä xpejn Crist."

<sup>13</sup> ¿La rujntu xhigab nala' sa' Crist, ä? ¿La cuaj Pabl lo cruzj xcuent xtojltu, ä? o ¿La gurobnistu con laj Pabl, ä?

<sup>14</sup> Rudedä xquixtios lo Dios dina nutiobnisä nicla tejtu, xtebtis Crispo näjza Gayo,

<sup>15</sup> te rut naadi con laä batiobnisäreni.

<sup>16</sup> Abanaj lazä batiobnisä resa' Estéfanas. Di lazä guinaj la yu' chu stee batiobnisä.

<sup>17</sup> Di Crist nuxhal narä te gutiobnisä. Baxhalni narä te gusule'ä rextiidxni xcuent xho gun bejn te laareni lo dojl, xhet con didxmanduxhdi, te di gudzucaä loj dzunroduxh ni bejn Jesucrist che gujtni lo cruzj.

### *Crist najc xcäl'milaagwr näjza xcäl'najn Dios*

<sup>18</sup> Rediidx ni rniinu xcuent Jesucrist xcuent xho gujtni lo cruzj te guslaani rebejn lo dojl najcni te diidx ni xhet sajcdi lo rebejn ni canijt sa'csi direni

chalilajz xtiidxn. Luxh loj rebejn ni ruslaa Dios lo dojl najc rediidxga xcälmilaagwr Dios.

<sup>19</sup> Scree caj loj rexquijtz Dios:

Narä sutzulä yäl<sub>nasin</sub> xten reben<sub>najn</sub>,

sudzucaäza xcäl<sub>nadxällajz</sub>, xhigab rebejn ni nadxällazduxh.

<sup>20</sup> ¿Con bejn ni nanduxh? ¿Con bejn ni rucuaa, ni najc maestr? ¿Con bejn ni ruchagduxh diidx xcuent recos guedxliujre, ä? ¿La et abejndi Dios najc guiraa yäl<sub>nasin</sub> xten guedxliuj si'c nayällajz nez loj Dios, ä?

<sup>21</sup> Ni'cni loj xcäl<sub>nasin</sub> Dios, di rebejn guedxliuj niembee Dios con xcäl<sub>nasin</sub> guedxliujre, ni'c bichagljajz Dios con yäl<sub>rusule'</sub> diidx ni rniireni nayällajz, con ni'c baslaani lo dojl rebejn ni huililajz xtiidxn xcuent Crist.

<sup>22</sup> Rexpejn Israel rajzpacreni fiireni remilaagwr; rebejn griegw rguuil yäl<sub>nanduxh</sub>.

<sup>23</sup> Niluxh nuurnu rusule'nu diidx xcuent xho cuaj Jesucrist lo cruujz, niluxh loj rexpejn Israel najc diidxre si'c te guiro ni chalani' bejn, luxh loj rebenzijt xhet sajcdi rediidxre.

<sup>24</sup> Niluxh loj rebejn ni gule Dios chalilajz rediidxre, rexpejn Israel sigajc loj rebenzijt, rediidxre najczani yäl<sub>milaagwr</sub> najczani yäl<sub>nasin</sub> xten Dios.

<sup>25</sup> Sa'csi xcäl<sub>nayääl</sub> xten Dios si'c rchalo rebejn ni'c najc nasin<sub>duxhru</sub> loj xcäl<sub>nasin</sub> xten reben<sub>najn</sub> guedxliuj; luxh xcäl<sub>rnijaj</sub> xten Dios sacduxhruni loj guiraa xcäl<sub>nadaan</sub> reben<sub>najn</sub> guedxliuj.

<sup>26</sup> Col<sub>huu</sub> la'tu, betzä ni ahuuilajz xtidx Dios, xho gule Dios la'tu, col<sub>yejn</sub> xhigab guxiitu najctu ben<sub>najn</sub> nasin loj reben<sub>najn</sub> guedxliuj, guxiiza rajptu yäl<sub>rnibee</sub>, guxiizatu najctu bejn ni agojl guiga'tu bensa'c.

<sup>27</sup> Niluxh agule Dios rebejn ni xhet nanduxhdi te gusanx<sub>tujyni</sub> rebejn ni nanduxh, aguleza Dios rebejn ni guxii rnibee te gusanx<sub>tujyni</sub> rebejn ni rnibeduxh.

<sup>28</sup> Agule Dios rebejn ni di guiga' ben<sub>ro</sub>, näjza rebejn ni rut riudi, reni rut najcdi, te gusanx<sub>tujyni</sub> rebejn nani najc guiraa reni'c.

<sup>29</sup> Te nicla tej bejn digacdi guiliä'p lagajc xpala'nni nez loj Dios.

<sup>30</sup> Lagajc Dios abachaag la'tu loj Dad Jesucrist; baxhalzani Jesucrist loonu te basanijni xcäriej<sub>nnu</sub> te ga'pnu yäl<sub>nasin</sub> xten Dios, te guiba<sub>nsa'</sub>cnu nez loj Dios, te gacnaya lastoonu, näjza te quixni rextol<sub>nu</sub>.

<sup>31</sup> Si'c bejn Dios te soob xtiidxn cadro caj scree:

Ni rajz guinii didxro, suguiliä'pni xpala'n dzuun ni bejn Jesucrist.

## 2

### *Rediidx xcuent Crist ni cuaj lo cruujz*

<sup>1</sup> Ni'cni cheni biädsule'ä xtidxlii Dios lojtu, rebetzä, dina niädniä didxnajn lojtu, niclaza didxnagajn, xhet si'cti basule'ä xtidx Dios xcuent Crist.

<sup>2</sup> Cheni guyu'ä lojtu, benä xhigab dina niädniä xhi stee diidx lojtu, biädsule'ätis diidx xcuent Dad Jesucrist, ni cuaj lo cruujz.

<sup>3</sup> Bidzunä lojtu guideb rd<sub>xagä</sub>, guideb racditä sa'csi cadxebduxhä.

<sup>4</sup> Cheni basule'ä diidx lojtu, dina niniä didxro xten yäl<sub>nasin</sub> xten guedxliuj, alga guniä xtiidx yäl<sub>nasin</sub> xten Sprit Dxan xten Dios näjza xcäl<sub>rnibee</sub> Dios,

<sup>5</sup> te di gac xcäl<sub>rililajz</sub>tu xcuent yäl<sub>nasin</sub> xten guedxliujre, te gac xcäl<sub>rililajz</sub>tu xcuent yäl<sub>rnibee</sub> xten Dios.

*Rumbee bejn Dios xcuent ni ruluii Sprit Dxan xten Dios*

<sup>6</sup> Rniizanu lo sa'nu ni aguyajl lo xtidx Dios rediidx xten yäl<sup>nasin</sup> xten Dios, per te yäl<sup>nasin</sup> ni di gac xcäl<sup>nasin</sup>di guedxliuj, ni claza xten reni rnibee lo guedxliujre, sa'csi sidzujn dxej sinitlojreni.

<sup>7</sup> Niluxh che rniinu yäl<sup>nasin</sup> xten Dios, rniinu diidx ni rut racbex-tebdi, xcuent xho gac guidzunnu cadre yu' Dios xhaguibaa. Cheni gajdli gac guedxliuj, rapcheeni yäl<sup>nasin</sup>xhiga'tz xtenni. Baluiinini loonu te guibanänä<sup>nuni</sup> lo xcäl<sup>rdimbicha</sup>' xtenni.

<sup>8</sup> Nicla tej reni rnibee lo guedxliujre gajd gacbee recosre niluxh paru niacheereni, direni nucuaa lo cruzj Dad Jesucrist nani rajp xcäl<sup>rdimbichaduxh</sup>.

<sup>9</sup> Najcni si'cni caj lo rextidx Dios cadre rnii:

Recos ni gajdpac baloj bejn fii,

nani gajdpacza diajg bejn jiejn;

nani gajdpacza jiu' lo xhigab bejn, guiraa recosga abaluchee Dios par rebejn ni chanälajzni.

<sup>10</sup> Niluxh abaluii Diosreni loonu con Sprit Dxan xten Dios, sa'csi laani basule'nireni loonu. Sprit Dxan xten Dios racbesa'c guiraa rexhigab, näjza recos xhiga'tz xten Dios.

<sup>11</sup> Loj rebejn guedxliuj ¿chuni'c racbee rexhigab ni rujn bejn? Lagajc sprit xten bejn ni yu' nenäi racbee xhi xhigab cayujni. Sigajcä rut racbeedi rexhigab xten Dios; Sprit Dxantis xten Dios racbeeni.

<sup>12</sup> Luxh nuurnu dinu nica' yäl<sup>najn</sup> xten guedxliuj, alga cua'nu Sprit Dxan ni siääd lo Dios te gacbeenu rexhicos ni abasalajz Dios loonu.

<sup>13</sup> Nuurnu rniizanu xcuent recosga, xhet diidxdi ni ruluii xcäl<sup>najn</sup> guedxliujre, diidxtis ni baluii Sprit Dxan xten Dios loonu. Si'c ruluiinu rediidxga loj rebejn ni rbäjz Sprit Dxan xten Dios nen lastooreni.

<sup>14</sup> Niluxh reni di chalilajz xtidx Dios, direni gacbee rexhigab xten Sprit Dxan xten Dios, sa'csi laareni xhigabyäältis rchaloreni xcäl<sup>nasin</sup> Dios. Di gacdziza gabeereni rexhigabga, sa'csi Sprit Dxan xten Diostis rajc ruluii lo bejn rexhigab xtenni.

<sup>15</sup> Rebejn ni ahuililajz xtidx Dios, rula'tzreni guira'ti ni ruluii Sprit Dxan xten Dios lojreni. Luxh rebejn ni ahuililajz rutliidi rula'tzdireni.

<sup>16</sup> Sa'csi scree caj lo xtidx Dios: “¿Chuni'c agucbee xho najc xhigab xten Dios te gac guluiini Gueb Dios, ä?” Nicla tej bejn. Niluxh nuurnu rajpnu lo xcäriejnnu xhigab xten Crist, nalajznu racbeenu rextiidxni.

### 3

#### *Reni rujn dzuun lo Dios*

<sup>1</sup> Rebetzä, di niajcdi niniä redidxnagajn lojtu si'c ni rniä loj rebejn ni rajp yäl<sup>nasin</sup> xten Sprit Dxan xten Dios, basule'ä ganaxtis didx guyasi lojtu, sa'csi najctu bejn guedxliuj o biuxbäz ni guxii racbeeni xcuent Crist.

<sup>2</sup> Basule'ä ganax didxguyasi lojtu si'c ruede bejn le'ch lo te biuxbäz lacuaa gauni bääl. Dina niniä lojtu guiraa rextidx Dios ni nanab gacbeetu, sa'csi gajd gacdi gacbeetuni, ni claza naj gajd gacdi gacbeetuni,

<sup>3</sup> sa'csi nabansijctu si'c nabajn rebejn guedxliuj laltis runembiidtu, rdx-echlajztu lo sa'tu, ¿la ditu gacbee nacsijctu si'c bejn guedxliuj, ä? ¿La laltis nabajntu si'c nabajn rebejn guedxliuj ni di gumbee xtidx Dios, ä?

<sup>4</sup> Sa'csi cheni rnii tejni: “Narä nacä te xpejn Pabl”, dxejcti steeni rnii: “Narä nacä te xpejn Apolos”, ¿la xhet cayujnditu sigajctis ni rujn rebejn guedxliuj, ä?

<sup>5</sup> ¿Chuni'c najc Pabl? ¿Chuni'c najc Apolos? Nuurnu najctisnu xmos Dios ni basule' xtidx Dios lojtu te huililajztu, luxh cade tejnu riennu dzuun ni runiidx Dios jiennu.

<sup>6</sup> Ganid basule'ä xtidx Dios lojtu, dxejc biääd Apolos te gucnäjzani gubeerutu xtidx Dios, niluxh lagajc Dios najc ni cagusanij xcäriejntu te gachesa'ctu xtiidxn.

<sup>7</sup> Ni'cni nicla ni rusulexgaa diidx, niclaza nani racnäj racheeru bejn rediidxga xhet sajcdireni; Diostis sajc nani rusanij xcäriejn rebejn.

<sup>8</sup> Nuurnu najcnu si'c rexmos ni rujn dzuun lo yuj. Tejsi najc nani rbe'c binij najza nani rga' nis, niluxh Dios rguix tejganu dzuun nani riennu.

<sup>9</sup> Nuurnu najcnu si'c remos ni runnäj Dios dzuun. La'tu najctu si'c yuj cadro cayajc xtzun Dios, si'c te yu' ni cayunchee Dios.

<sup>10</sup> Narä nacä si'c te mastr albañil. Baniidx Dios dzuun loä, gucnäjni narä te casuä reguij lo yujre, te naj ste'ca bejn quixh basuu yejcn. Niluxh tejsa ni chanuu gun dzuun lojga, suga'pni cuidaad xho guiliäsi padeerga.

<sup>11</sup> Sa'csi di gacdi gusujreni garenca cimient loj nani najc-xgaa, ni najc Jesucrist.

<sup>12</sup> Naj palga guiliäs bejn te padeer yejc cimientga con oor, con pla't, con guij ni sacduxh, o con baräj, guixhtriuu, o balag biquii,

<sup>13</sup> sidzujn dxej sien xho najc dzuun ni bejn tejsa bejn. Sa'csi siääd fis guiboo ni guluiløj dzuunga, sa'csi lagajc guibooga guluiløj dzuunga, xho najcni.

<sup>14</sup> Palga yu' reni bejn te yusa'c yejc cimientga, luxh dini chec lo guibooga, sudeer Dios lo bejnğa ni riäjł xca'ni sa'csi bejnni yusa'c.

<sup>15</sup> Niluxh palga chec ni bejnni yejc cimientga xhet xca' dini, xcälñabajntisni di nit, luxh xtzuunni sejc.

<sup>16</sup> ¿La ditu gan la'tu najctu xquidoo Dios, luxh neñ lastootu rbäjz Sprit Dzan xten Dios, ä?

<sup>17</sup> Palga yu' chu gutiexhät xquidoo Dios, sunitloj Diosni par tejpas, sa'csi xquidoo Dios najc dxan, luxh la'tu najctu guidooga.

<sup>18</sup> Nicla tejsu na'c gusgueetu lagajc la'tu. Palga yu' chu rujn xhigab nanduxhni xcuent yälñasin xten guedxliujre, nanabpac gacni si'c te bejn ni xhet najndi te xca'ni yälñasin xten Dios te guliipac gacni te beñnaj, te beñ nasin.

<sup>19</sup> Sa'csi yälñasin xten guedxliuj xhet sajcdi nez loj Dios. Lo rexquijtz Dios caj scree: "Dios rujn rga' reni rajp yälñasin xten guedxliuj lagajc xcuent xcälñrusgueereni ni rujn lagajc xcälñadxälñajzreni."

<sup>20</sup> Ste'ca lajt caj scree: "Nanchee Dios xho najc xhigab ni rujn rebejn ni rajp xcälñasin guedxliujre, luxh xhetliidi sajcn nez loj Dios."

<sup>21</sup> Ni'cni na'c guiliä'p bejn xpala'n te bejn guedxliuj. Sa'csi loj tejsatu abaniidx Dios guira'ti rexhicos najc xtengatu,

<sup>22</sup> palga najcni Pabl, o Apolos, o Pedr, o guedxliuj, o yälñabajn, o yälğujt, o recos ni yu' naj, o recos ni churu gac, guiraareni najc xtentu.

<sup>23</sup> La'tu najctu xten Crist, luxh Crist najc Xi'n Dios.

## 4

### *Xtzuun reapost*

<sup>1</sup> Ni'cni la'tu nanab fiitu loonu si'c rexmos Dad Jesucrist ni rajp rexhigabx-higa'tz xten Dios te gusule'nureni lojtu.

<sup>2</sup> Mbaj pues, te bejn ni cahuii te dzuun nanab gusoobreni diidx, gunreni te dzunsa'c.

<sup>3</sup> Niluxh guxii runä xhigab gula'tztu narä, o gula'tz chutis guxhtis lo guedxliujre narä; nicla lagajc narä dina gunduxhä xhigab xho nacä nez loj Dios.

<sup>4</sup> Entis rbedxi xcärienä, per xhet xcuent ni'cdi sajc guiniä xheti xtolä, Dad Jesucrist najc nani rula'tz narä, rhuulojni xho nacä.

<sup>5</sup> Ni'cni la'tu na'c gucuaquijtu bejn che gajd guidzujn dxej; colcuäjz jääd Jesucrist dxejc laani sibääni lo bianij guiralii ni naga'tz lo nacäy, luxh sululojzani xhi xhigab yu' nen lastoo tejga rebejn, dxejc lo tejganu sudeed Dios ni nungäj l xca'nu.

<sup>6</sup> Rebetzä, xcälmasa'ctu caniä rediidxre lojtu. Caniä xcuent Apolos näjza narä, si'c te yälruluii te fiitu xho riennu te na'cza guntu recos ni xhet caj di lo rexquijtz Dios, te na'cza guiliä'ptu xpala'n tejtü lo resa'tu, la l ni cabälaztu steeni.

<sup>7</sup> Sa'csi çchuni'c rniij najclu beñsa'cru lo ste'ca bejn?, o çxhini'c rajplu ni di Dios nuniidx lojlu? Luxh palga cuaxlia'luni, çxhicient lagajc luj rliä'plu xpala'ntu, lascanu rut baniidxd i lojlu recos ni rajplu?

<sup>8</sup> Rujntu xhigab rajptu xhidaj l cos, naatu najctu ricwduxh, rchalotu najctu reii, dirutu guiquiin nuurnu. Malaii guliij najcpectu reii te näjzanu guinibenäjnu la'tu.

<sup>9</sup> Niluxh runä xhigab gule Dios reapost si'c rebejn ni xhet sajc di. Najcnu si'c rebejn ni gunibeereni guet. Nez loj rebejn guedxliuj näjza nez loj rexangl Dios najcnu si'c rebejn ni rdedlojtis bejn lojreni.

<sup>10</sup> Nuurnu najcnu beñnayääl xcuent Crist, niluxh la'tu rchalotu racbeduxhtu rextidx Crist. Nuurnu najcnu bejn ni xhet nadipdi, niluxh la'tu najc beñdanduxh. Rliä'p rebejn xpala'ntu, ni'c rbälazreni nuurnu.

<sup>11</sup> Cadeednu trabajwduxh naj, rliaannu, riojlno, xho rniaj xhajbnu, rdilnä j rebejn nuurnu, luxh xheti roliznu.

<sup>12</sup> Rdxaagnu riennu dzuun lagajc naanu te guidxälno xhi guidaunu. Che rguereni loonu, rniabnu lo Dios xcuentreni. Che rusacs i rebejn nuurnu, rientisnu huant.

<sup>13</sup> Che rniyajreni nuurnu, rulidxnäänureni didxdoo. Rujnreni xhigab najcnu si'c guijxh xten guedxliujre, ruhuiireni loonu si'cni xhet sajc dinu.

<sup>14</sup> Dina gucuaä rediidxre te gusanxtuiyätu. Rucuaä rediidxre te gulidxätu si'c rexi'nä ni sanälazä.

<sup>15</sup> Palga ga'ptu tzuu mi l bejn ni guluiitu rediidx xten Crist, ruti stee xtadtu; narä gacä xtadtu, ganid narä basule'ä rextidx Dios lojtu.

<sup>16</sup> Ni'cni rulidxä la'tu, colyejn si'cni ruhuiitu runä.

<sup>17</sup> Ni'cni baxhalä Timoteu lojtu, najcni si'c xi'nä ni sanälazä, ni rusoob diidx xcuent Crist. Laani susnajni lajztu xho mood nabanä lo yäl nabaj n xten Jesucrist, sigajcni ruluiä nen reguidoo guiraasi lajt.

<sup>18</sup> Yu'tu ni acayajc guyalajz, naatu pet dina guibisacä lojtu.

<sup>19</sup> Cabäzä jädhuiätu, palga si'c rlanj Dios, dxejc sacbeä chuni'c najc rebejn ni cayajc guyalajz, fiä xhipacni rujnreni, xhet xtiidxtisreni gacbeä.

<sup>20</sup> Sa'csi xcäl rniabee Dios xhet ganaxtis xcuent diidx najcni, näjza dzuun ni rujnreni rululoj xcäl rniabee Sprit Dxan xten Dios ni rajpreni.

<sup>21</sup> ÇXho rlanjzatu guidzunä lojtu, ä? ÇLa sidzunä si'c te dad ni ca' te baar te quinätu o la guidzunä yäl rinälajz näjza yäl nadolajz te gulidxätu, ä?

## 5

*Xho nanab gunnäjtu te bejn ni rujn falt lo sa'ni*



<sup>1</sup> Agucbeä yu' tejtu ni ahuililajz xtidx Dios, cua'ni si'c chäälni te gunaa ni gujc chäälni xtidx. Dee najc te dołduxh nani nicla reni di chalilajz xtidx Dios direni gun.

<sup>2</sup> Luxh la'tu gujctu gualajz lacuaa niac-huin lastootu; te bejn nani bejn dojlga, riäjł nibäätu ni nez lojtu.

<sup>3</sup> Mase ruti narä ro'c, lastoä suganäj la'tu. Alabenä xhigab xhini'c jiennäjnu bejnğa ni bejn dołduxhğa, sigajc ni niunä paru suga'ä ro'c.

<sup>4</sup> Con laj Dad Jesucrist, che abidxagsa'tu, luxh alastoä suganäj la'tu, con xcälrnibee Dad Jesucrist,

<sup>5</sup> abenä xhigab gutednu bejnğa ladznaa bendxab te ted tiejxhni trabajw, niluxh xrit gunni laani neñ dxej ni jiädsac Dad Jesucrist lo guedxliujre.

<sup>6</sup> Di guchaag guiliä'ptu xpala'ntu xcuent dzuun ni rujntu. ¿La ditu gan te dojl najc si'c tudxe'n cojb ni ruslaj, rusaguijni cojb cadre ru'chni, ä?

<sup>7</sup> Colgudzucaj cobyujxhğa, te guibajntu te yäl'nabannayacoob si'c te cobyu, sa'ni racchee yätxtiil ni xheti levaduur yejcnı par lanij xten pascw. Arajpıtu yäl'nabannaya sa'csi agujt Jesucrist sigajc gujt te xile' lo lanij pascw te badzucainı rextolnu.

<sup>8</sup> Si'c nanab jiennu lanij xten pascw con yätxtiil ni xheti levaduur yejcnı, nalajznu con yäl'guliipac neñ lastoönu, xhet yätxtiildi ni yu' cobyujxhğa yejcnı, nalajznu na'c gunlu latsiaj.

<sup>9</sup> Lo stee guijt abacuaä lojtu, na'c guchaagtu rebenı ni runnäj cosguijdx bejn ni di gac chäälni.

<sup>10</sup> Niluxh xhet caniädi xcuent rebenı guedxliuj ni rujn cosguijdx con bejn ni di gac chäälni, niclaza xcuentdi rebenı ni rchaglaztej meel, niclaza rebenı ni najc gubaan, niclaza rebenı ni riu rebanäjb. Paru si'c gacni, nanab jiunejzıtu guedxliujre.

<sup>11</sup> Niluxh narä bacuaä guijtza lojtu te na'c guchagsa'tu te bejn nani rniı ahuililajzni xtidx Dios, luxh rujnrıni cosguijdx con bejn ni di gac chäälni, o rchaglaztejni meel, o riıni rebanäjb, o rniyaj sa'ni, o rsiojzıni, o rusgueeni bejn te rca'ni xhi xtınni. Rniäza lojtu, nicla gaunäjtu sa' bejnğa.

<sup>12-13</sup> Sa'csi narä di gacdi gunä yäl'guxhtis loj rebenı ni gajd chalilajz xtidx Dios. Guntı Dios yäl'guxhtis lojreni. La'tu nungäjł guntu yäl'guxhtis loj rebenı ni ahuililajz xtidx Dios. Ni'cni colgudzucaj bendojłga lojtu.

## 6

### *Na'c chäätu loj rebendojl te gunreni yäl'guxhtis lojtu*

<sup>1</sup> Palga tejtu ni ahuililajz xtidx Dios rlajz cue'c xquej stee sa'tu, ¿xhicuent chale'ctu xquejni loj rebendojl te gunreni yäl'guxhtis lojtu? ¿xhicuent ditu guniıab yäl'guxhtis loj rebenı ni ahuililajz xtidx Dios, ä?

<sup>2</sup> ¿La ditu gan, rebenı ni ahuililajz xtidx Dios sujn yäl'guxhtis lo rebenı guedxliuj, ä? Palga la'tu sujntu yäl'guxhtis lo rebenı guedxliuj, ¿la di gacdi guntu yäl'guxhtis lo sa'tu lo recosbäz lacuaa chäätu loj rebendojl te gunreni xcäl'guxhtisreni lojtu, ä?

<sup>3</sup> ¿La ditu gan sienzanu yäl'guxhtis lo rexangl Dios, ä? ¿Aticaxh jiennu yäl'guxhtis loj recos bäre' xten sa'nu lo yäl'nabajnre!

<sup>4</sup> Palga la'tu cadilnäj sa'tu xcuent recos xten guedxliujre, ¿xho mood chäälu loj rebendojl ni rut najcđi loj xquidoötu, te naareni lojtu xhini'c guntu, ä?

<sup>5</sup> Rniä rediıdxğa lojtu te gıtuıjytu. ¿La ruti nicla tej benınasıni loj guıraatu ni sajc gun yäl'guxhtis lo resa'tu, ä?

<sup>6</sup> ¿Xhicuent rile'c te bejn ni rililajz xtidx Dios xquej bejtzni ni rililajzza, luxh rijreni nez loj reguxhtis ni di chalilajz xtidx Dios?

<sup>7</sup> Mbaj naj, guliipacni alabanijttu sa'csi yu' yälrdilnäj sa'tu; colgutijp lajztu rebejn ni rujn dojl lojtu. Maazru huen colgusaan sucua'reni xhixtentu.

<sup>8</sup> Per dee, alga lagajc la'tu runnijttu loj lagajc resa'tu, luxh rca'tu xhixten lagajc resa'tu.

<sup>9</sup> O ¿la ditu gan reben dojl dipacreni jiu' lo xcälrnibee Dios, ä? Na'c gusaantu gusgueereni la'tu; nicla te resa' dee di jiu' lo xcälrnibee Dios: guiraa reni richagtoo regunaa; guiraa reni rajn rebanäj; reni resnäj bejn ni di gac chäälni; reniguii ni rungunaa; reni najc birääx;

<sup>10</sup> reni najc gubaan; reni rsiäblajz xhixten bejn; reni rsiojz; reni rniyaj; reni rusguee bejn te rca'reni xmeel bejn. Nicla tej sa' redee di jiu' lo xcälrnibee Dios.

<sup>11</sup> Yu'zatu ni gujc si'c galoo, niluxh naj abasia Dios lastootu, naj anajctu ben'naya nez loj Dios sa'csi abiäl'lajz Dios xtojltu xcuent Jesucrist, näjza xcuent Sprit Dxaan xtenni. La'tu anajctu rexpejn.

### *Tiejxhnu najc xquidoo Dios*

<sup>12</sup> Guliini sajz gunä xhitis ni rlazä gunä, niluxh xhet guiraadini najc hueen par narä. Narä sajz gunä si'tis ni rlazä, niluxh dina gusanä guinibee nicla tej xhi cos narä.

<sup>13</sup> Guliini najc yälrajw par xque'ni, luxh xque'ni najc par yälrajw, niluxh sidzujn dxej sunitloj Dios guiro'preni. Per tiejxhnu di gac par jiennu cosguijdx con bejn ni di gac chäälnu. Tiejxhnu najc par Dios, luxh Dios najcza par tiejxhnu.

<sup>14</sup> Luxh naj lagajc Dios guläs Dad Jesucrist lo reben'gut, siliäsazani nuurnu con xcälrnibeduxhni.

<sup>15</sup> ¿La ditu gan tejpgatu najc si'c te la' tiejxh Crist sa'csi ahuililajztu rextiidxni, ä? Palga tiejxhnu najc xten Crist, ¿la sajz gudeednuni loj te gunadxab, ä? jGurniälojlu jiennu si'c!

<sup>16</sup> ¿La ditu gan cheni guchaagni te gunadxab rajcni tejtis tiejxh con laani, ä? Loj rexquijtz Dios caj: "Guirö'preni sajz si'c tejtis bejn."

<sup>17</sup> Niluxh nani rudeed lastooni lo Dios anajczani tejtis con laani sa'csi rbäjz Sprit Dxaan xten Dios nen lastooni.

<sup>18</sup> Colguibicaj lo dojl ni rujn bejn con nani di gac chäälni. Xhitis stee dojl ni rujn bejn najcni lo jiaa tiejxhni, niluxh dojl ni runnäjni bejn ni di gac chäälni najc dojl lagajc nen tiejxhni.

<sup>19</sup> O ¿la ditu gacbee tiejxhtu najc xquidoo Sprit Dxaan ni abaniidx Dios te cuääzni nen lastoonu, ä? Ni'cni di gacdi guinibeetu lagajc la'tu.

<sup>20</sup> Agudijx Jesucrist xtojlnu con xtiejn ni lo cruiz, ni'cni nanab jiennu dzunsa'c nani guiliä'p xpala'n Dios con tiejxhnu näjza Xpirtnu.

## 7

### *Yäl'rulijdx xcuent yäl'ruchnaa*

<sup>1</sup> Naj gudzu'ä diidx lojtu xcuent ni gunabdiidxtu cheni bacuaatu guijtz loä. Guliini hueen najcni na'c guchnaa te niguii.

<sup>2</sup> Niluxh sa'csi yu' xhidajl reni richunäj chutis gunaa, suga'p tejsa reniguii chäälpacni; sigajcza suga'p tejsa regunaa chäälpacni.

<sup>3</sup> Nanab niguii guchaagni chäälni che rlazj chäälni, sigajcza gunaa nanab guchaagni chäälni che ni si'c rlazj chäälni.

4 Di gunaa guinibee lagajc tiejxhni, sa'csi chäälni rnibee tiejxhni. Sigajcza di niguii guinibee lagajc tiejxhni, sa'csi chäälni rnibee tiejxhni.

5 Na'c gusuni' tejtü lo chäälni. Maazru hueen coljia'n diidx na'c guchagsa'tu te xcheje' te cuedx-guiniabtu lo Dios. Che luux cuedx-guiniabtu lo Dios, guchagsacs'a'tu te na'c guquül beidxabtu chunäjtu ste'ca bejn.

6 Rniä rediidxre lojtu te ni rlanj guchnaa sajc guchnaani, niluxh dina guiniä lojtu, nanabpac guchnaatu.

7 Narä rlazä maläii sajc gac guiraa bejn si'c ni nacä. Dios abadeed loj tejga bejn xho mood guibajni. Yu'reni sajc guibajn tej mood, yu'zareni sajc guibajn garenca mood.

8 Loj reben xteb näjza loj regunabiuud rniä, hueen najc na'c guchnaareni, gaceni si'c narä.

9 Niluxh palga di gacdi cue'cdxi lajzreni, suguchnaareni. Maazru huen guchnaareni te na'c guntisreni xhigab rlanjreni guchaagreni te niguii o te gunaa.

10 Loj rebejn ni abachnaa, rniä rediidx ni basa'n Dad Jesucrist loonu: "Na'c guro'n gunaa chäälni."

11 Niluxh palga guro'n te gunaa chäälni, na'c guchnasacni, o maazru hueen gusiäjlni diidx guibisacni lo chäälni. Sigajcza te niguii na'c guro'nni chäälni.

12 Naj rediidx ni guiniä najc xhigab xtenä, xhet diidxdi ni basa'n Jesucrist loonu. Scree rulidxä la'tu. Palga yu' te niguii ni rililajz xtidx Dios, luxh chäälni di chalilajz xtidx Dios, luxh rlanj gunaaga cuäznäjni niguiiga, na'c guro'n niguiigani.

13 Palga yu' te gunaa ni rililajz xtidx Dios, luxh di chäälni chalilajz xtidx Dios, niluxh rlanjni cuäznäjni gunaaga, na'c guro'n gunaaga chäälni.

14 Palga yu' te niguii ni di chalilajz xtidx Dios, luxh chäälni rililajz xtiidxni, palga hueen nabanäj sa'reni, hueen najc yälruchnaaga nez loj Dios. Sigajcza palga yu' te gunaa ni di chalilajz xtidx Dios luxh chäälni rililajz xtiidxni, palga hueen nabanäjsa'reni, hueen najc yälruchnaaga nez loj Dios. Palga dini gac si'c, di Dios gunle' rexi'nreni, per naj abenle' Dios rexi'nreni.

15 Palga chääł te gunaa o chääł te niguii ni di chalilajz xtidx Dios luxh rlanjni guilia' sa'ni ch chäälni ni ahuililajz xtidx Dios, sujiizani. Nani rililajz xtidx Dios diruni ga'p por cuäznäjni chäälni ni di chalilajz xtidx Dios, niluxh gurejdx Dios nuurnu te cuedcxini lajznu.

16 Sa'csi xho najnlu, gunaa, la suslaa Dios chäällu lo dojl xcuentlu, ä? O xho najnlu, niguii, la suslaa Dios chäällu lo dojl xcuentlu, ä?

17 Si'ctis ni baniidx Jesucrist lo tejganu, si'ctis ni gule Dios tejganu, si'c suguibajnnu. Si'cza rulidxä gunrenini nen guiraa reguidoo.

18 Palga tej niguii rililajz xtidx Dios, luxh yu'ni bee tiejxhni, xhet najcdini. Palga stee niguii chalilajz xtidx Dios, luxh xheti bee tiejxhni, xhet najcdizani. Sujia'nni si'cni najcni.

19 Xhet najcdi la yu'ni bee o xhet beedi yu'ni. Tejtis ni nanab gunni, gusoobni rediidx ni gunibee Dios.

20 Tejgani jia'n si'cni najcni cheni gurejdx Diosni.

21 Palga najclu te mos ni guziireni te gunlu dzuun, dxejc huililajzlu xtidx Dios, na'c chulu yärsia' xcuent ni'c. Palga sajc gudzu'lu meel lo xlamlu, badzu'zani te gaclu te bejn ni rut rnibeedi.

22 Sa'csi nani najc te mos ni guziireni te gunni dzuun che huililajzni xtidx Dios, diruni gac te mos ni bio' nez loj Jesucrist, niluxh te bejn ni rut rnibeedi che rililajzni xtidx Dios, anajcni mos ni guzii Dios, najcni xmos Dios.

<sup>23</sup> Guzii Cristtu con xtiejnii, ni'c na'c gusaantu guinibee bejn la'tu te gac guntu xtzun Dios.

<sup>24</sup> Rebetzä, colchanuu gactu si'ctis ni najctu che gurejdx Dios la'tu, palga najctu mos ni guziireni, o te bejn ni rut rnibeedi.

<sup>25</sup> Redxa'p ni gajd guchnaa, di Jesucrist ninibee xhini'c nanab gunreni. Gule Dios narä te gusule'ä xtiidxni. Naj gulidxäreni sa'csi nanä xtidx Dios, luxh racnäjzani narä.

<sup>26</sup> Runä xhigab hueen najc palga di reniguii guchnaa sa'csi siääd yälraganduxh lo guedxliujre.

<sup>27</sup> ¿La alabachnaalu, ä? Na'c guro'nlu chäällu. ¿La alabaro'nlu chäällu, ä? Na'c chaxiilu chäällu.

<sup>28</sup> Palga guchnaalu, xhet dojl di rujnlu. Palga guchnaa te dxa'p, dizani gun dojl. Niluxh reni ruchnaa sidejdreni trabajw lo yäl'nabajre. Ni'cni rniä na'c guchnaatu sa'csi di rlazä tedtu trabajw.

<sup>29</sup> Rebetzä, rlazä guiniä lojtu rediidxre: Guxiiru dxej guibajjnu lo guedxliujre, ni'cni reni abachnaa na'c gunreni xhigab xtentis yäl'ruchnaa, te gac gunreni xtzuum Dios.

<sup>30</sup> Luxh reni cayoon, nanab gunreni si'cni xhet cayoondireni; reni rbalajzreni, nanab gunreni si'cni xhet cabaadi lajzreni; reni rzii xhicos, nanab gunreni si'cni xhet rajpdireni;

<sup>31</sup> näjza reni rujn recos lo guedxliujre, nanab gunreni si'cni dini gunni, sa'csi recos ni rhuinu lo guedxliujre, alacanitlojreni.

<sup>32</sup> Narä rlazä na'c chutu yärsia'. Rebejn ni gajd guchnaa, riureni rextzuun Dios, näjza xho guspaareni lajz Dios.

<sup>33</sup> Renani abachnaa riureni recos guedxliujre te guspaani lajz chäälni,

<sup>34</sup> tiop najc xhigabni xcuent recos nani gunni. Sigajcza najc te gunaa ni abachnaa con tejni gajd guchnaa. Sa'csi te gunaa ni gajd guchnaa riuni rextzuun Dios te gacreni gunadxan nez loj Dios con tiejxhreni näjza con lastooreni. Niluxh regunaa ni abachnaa riureni recos guedxliujre, näjza xho guspaani lajz chäälni.

<sup>35</sup> Rniä rediidxre par xcäl'nasa'ctu, xhet gudxonädi la'tu, te gunrutu redzunsac, te chanälazsa'ctu Dios.

<sup>36</sup> Palga yu' chu te niguii lojtu ni rujn xhigab, maazru hueen guchnaa xindxa'pni sa'csi acayajcni gunagool, dini gun dojl, sajc gudeednini guchnaani.

<sup>37</sup> Palga steeni dini gun xhigab si'c nanab gunni, sajc gunni si'ctis ni rlanjzi palga abejnpacni xhigab neñ lastooni di xindxa'pni guchnaa, hueenza najc si'c.

<sup>38</sup> Ni'cni nani rudeed xindxa'pni guchnaa, hueen rujnni, sigajcza nani dini gudeed xindxa'pni guchnaa, laacaza rujnni.

<sup>39</sup> Te gunaa ni abachnaa, rajpni por guibanäjni chäälni guideb nabajn chäälni. Palga guet chäälni, jianxtebni stehuält, dxejc sajc guchnaani chutis niguii ni rlanjzi, palga najcni tej ni ahuililajz xtidx Dios.

<sup>40</sup> Narä rchaloä maazru guibaa lajzni palga dini guchnaa. Si'c najc xhigab ni runä, luxh riliipac lazä cayacnäj Sprit Dxaan xten Dios narä.

## 8

### *Yäl'rajw ni ruzujreni lo rebanäjb*

<sup>1</sup> Rniä lojtu xcuent reyäl'rajw ni ruzujreni lo rebanäjb. Guliini guiraanu rajpnu yäl'najn xcuent recosga. Niluxh yäl'najn rujn rajc bejn gualajz. Luxh yäl'rinälajz sa'ni, ni'c rujn racnäjnu resa'nu.

<sup>2</sup> Palga yu' chuni'c rujn xhigab nanduxhni, rusgueeni lastooni sa'csi cayäädxru gacbeeni si'c ni nanab gacbeeni.

<sup>3</sup> Palga yu' chu sanälajz Dios, Dios anumbee bejnga.

<sup>4</sup> Ni'cni, xcuent reyälrajw ni risujreni loj rebanäjb, anancheenu xhet sajcdi rebanäjb ni yu' lo guedxliuj, ruti stee Dios; tejtis ni najc Gueb Dios.

<sup>5</sup> Masque yu' reni rniireni najc "dios" xhaguibaa o loj guedxliuj, luxh yu'za xhidajl "dios" näjza xhidajl lam ni rnibee,

<sup>6</sup> per nuurnu nadonnu yu' tejtis Gueb Dios, Dad nani benchee guiraa recos, luxh lojtisni nabajnnu. Rajpnu tejtis Dad ni rnibee loonu, ni'c najc Jesucrist. Xcuent xcälrnibeeni guc-chee guiraa recos loj guedxliuj, luxh nuurnu nabajnnu xcuent Jesucrist.

<sup>7</sup> Niluxh xhet guira'ti bejn najn yu' tejtis Dios. Yu' rebejn ni ahuililajz xtidx Dios abia'reni rajnreni rebanäjb, luxh rajwzarenı reyälrajw lascanu guzujni loj banäjb sa'csi nacäyru xcäriejnreni, ni'cni et laadi ria'n lastooreni, rxhınza xcäriejnreni.

<sup>8</sup> Xhet xcuent xhi rdaudinu sajc guibansa'crunu lo xnejz Dios. Xhet najcđi palga guidaunu o palga dinu guidau.

<sup>9</sup> Colnatiro xhi rujntu te na'c guntu jiajb te bejn lo dojl nani gajd chalilazsa'c xtidx Dios.

<sup>10</sup> Palga te bejn ni gajd chalilazsa'c xtidx Dios fiini cayajwlu reyälrajw ni guzuj lo rebanäjb, luxh luj najclu te bejnaj, sa'csi dee gajd gacbesa'c rextidx Dios, ła di lajzni gac nadip te näjza laani chatajwni yälrajw ni guzuj lo rebanäjb?

<sup>11</sup> Niluxh luj, xhet dojldi cayujnlu, per bejtzlu ni gajd chalilazsa'c xtidx Dios, sixijnni, luxh najcni bejtzlu sa'csi näjza par laani gujt Dad Jesucrist lo cruzj.

<sup>12</sup> Si'cza che rujnlu dojl lo bejtzlu, runnajlu lajzreni sa'csi gajd xcäriejnreni jiansa'c, luxh si'c cayujnzalu dojl lagajc lo Crist.

<sup>13</sup> Ni'cni, palga narä runä riabsac betzä lo dojl xcuent ni rauä, hueenru dirunä gauä yälrajw ni gun jiajb betzä lo dojl stehuält.

## 9

### *Xhi sajc gun te apost*

<sup>1</sup> ła dina gacä te bejn ni rut lojdi yu'ä? ła xhet apostdi narä? Ni abahuiä lo Dad Jesucrist, abasule'ä rextiidxni lojtu, ni'c huililajztu xtiidxni. La'tu najctu xtzunä ni runä lo Dios.

<sup>2</sup> Yu' reni di gumbeeni narä si'c te apost, niluxh la'tu abiembesa'ctu narä sa'csi ahuililajztu rextidx Jesucrist ni abasule'ä lojtu. Ni'c ruluioj guliipac nacä te apost.

<sup>3</sup> Diidx ni rniä scree loj reni di chalilajz nacä apost najc scree:

<sup>4</sup> ła di riäjł xca'ä guiraa ni runiidxtu gauä näjza ni runiidxtu yä'ä?

<sup>5</sup> ła digacdiza gapä te chälä ni ahuililajz xtidx Dios dxejc chanääzani sigajc rujn guiraa reapost, näjza rebetzhuin xten Dad Jesucrist näjza Pedr?

<sup>6</sup> O ła xtebtis Bernabé näjza narä di gacđi cuääz jiennu dzuun te guidaunu lał rusule'nu xtidx Dios?

<sup>7</sup> ła chuni'c rajc soldaad luxh lagajc laani siini xhi gauni? O ła chuni'c rusuj yaguub luxh dini gau ninejxh ni rcaj lojga, ä? O ła chuni'c rajp gaii dxib, luxh dini yä le'ch ni rudeedreni, ä?

<sup>8</sup> Na'c guntu xhigab lagajc xcuentä cania rediidxre lojtu, sa'csi näj loj xleii toMoisés caj diidx xcuent recosre.

<sup>9</sup> Loj reguijtz xten xleii toMoisés caj rediidxre: "Na'c gusällu guijsxh ro' gon che cayotni yejc triuu." ła la guniitis Dios rediidxre sa'csi riuni regon, ä?

10 |Dini gac! Xcäl'nasa'cnu guniini rediidxga, sa'csi bejn ni rujn dzuun lo niaa näjza nani rusia triuu riäj| gunlojni xca'ni te yäl'nasa'c ni rajc lo xniaani.

11 La'tu najctu si'c te yuj cadro gule'cnu binij sa'csi basule'nu rextidx Dios lojtu, ¿la rujntu xhigab dzunro najc gacnäjtu nuurnu tudxene', ä?

12 Palga racnäjtu ste'ca bejn ni ruluiitu, nungäj|ru gacnäjtu nuurnu.

Niluxh gajndu guinii si'c lojtu sa'csi di rlaizdnu guidxoonu chalizsa'ctu rextidx Dios, ni'c chotipnu lajznu guiraa retrabajw ni cadeednu.

13 La'tu najntu reni rujn dzuun neñ guidoro rajwreni rebääl ni risa'nreni lo Dios, sigajcza reni rujn dzuun lo dxan cadro risa'nreni xpääl reguidxaa lo Dios, näjza laareni rajwreni rebäälga.

14 Si'cza gunibee Dad Jesucrist loj reni gusule' xtidx Dios, xca'reni xhi gaureni lagajc loj reni rillajz xtiidxnü.

15 Niluxh gajdpacna gunä si'c, xhetza caca'ädi. Dizana gucuaä rediidxre lojtu naj te guniidxtu xhi xca'a. Hueenru guetä te na'c gudzucaj te bejn yäl|balajz ni rapä xcuent dzuun ni runä lo Dios.

16 Narä dina gapä xhicuent guiliä'pä xpala'nä che rusule'ä xtidx Dios. Sa'csi si'c nanabpac gunä, sa'csi probe'za narä palga dina gusule'ä xtidx Dios.

17 Palga gunä dzuunre sa'csi rdxaglazäpac gunäni yu' xhi guniidx Dios loä. Mase runäni con yäl|rigaan, empac Dios agule narä te gusule'ä xtiidxnü.

18 ¿Xhini'c najc xcuent ni xca'ä, ä? Che gusule'ä xtidx Dios lo chutis bejn, ligaj gusule'äni, te di gusule'ä xtiidxnü te guniidx rebejn xhi guniidxreni xcuent xtzunä, mase si'c riäj| gunreni.

19 Rut xmosdi nacä, luxh lagajc narä benä xhigab gacä si'c te mos te gunä gaan chalizajz xhidajl bejn xtidx Dios.

20 Cheni yu'ä loj rexpejn Israel, runä si'cni rujnreni te gunä gaan chaliza-jreni rextidx Dios. Che rlažäza guiniä loj reni nabajn loj xleii toMoisés, dxejc runä si'c rujnreni te gunä gaan chalizajzreni rextidx Dios, niluxh diruna guibanä lo leiiga.

21 Stee lajt cadro rlažä gunä gaan reni di guibajn lo xleii toMoisés, runä si'c rujnzareni, mase empac nabanä lo xleii Dios sa'csi rusobä diidxnü basa'n Crist.

22 Cheni yu'ä loj reni guxii rililajz xtidx Dios, racäza si'c ni najczeni te gunä gaan chalizsa'creni. Narä runä sigajc rujnreni, te si'c gunä gaan chalizajz xhidajlreni xtidx Dios.

23 Runä guira'ti xcuent xtidx Dios ni rus|aa bejn lo dojl, te xca'zanu, narä näjza rebejn ni ahuililajz xtidxä, yäl|nabajn par tejpas.

24 Anajntu che ru' te lanij, che ruxuñ reniguii, guiraareni ruxuñ, niluxh tejtis ni rca' ni ruzalajzreni. Colguxuñza nez lo Dios te gunzatu gaan.

25 Guiraa reni rlaiz guxuñ rapdareni tiejxhreni te ga'p tiejxhreni yäl|nadip, yäl|nadaan. Luxh laareni ruxuñreni si'c te gunreni gaan te cos ni di gaclaa aguntlojni. Niluxh nuurnu ruxuñnu te guniidx Dios loonu nani dipac nitloj.

26 Narä dina guxuñä si'cni dina ganä caro cha'ä, dizana gucuaä si'c te bejn ni rucuanäj te balaa, o cayäätzisi lo bej.

27 Niluxh narä runä rajc tiexhä si'c xmosä te na'c gunni si'ttis ni rlaizni, te gunni nani rlaiz Dios te di cheni abasule'ä xtidx Dios loj xhidajl bejn, gusanxtuju tiexhä narä.

## 10

### *Yäl|rulijdx lo xcuent rebanäj|b*

1 Rebetzä, di rlažä jlä|lajztu ni gusajc retoxtadgoldoonu. Gusajreni xpalaä te za gudejdzareni galäii nisdoo ni laa Nisdo Xniaa.

<sup>2</sup> Gudejdreni xpalaa te za nájza gudejdreni galáii nisdoo; ni'c najc si'c te yälrobnis sa'csi sanajlreni toMoisés.

<sup>3</sup> Sigajcza guiraareni gudajw tejtis yälrajw ni baxhal Dios xhaguibaali.

<sup>4</sup> Guiraazareni gu' nis ni badeed Dios, Dios bejn birii nisga cuá' te guilaj. Luxh Xpirt Crist gusanäjreni cadrotis sääreni nez lo reyubidzroga. Luxh con xcälrnibeeni birii nis loj guilajga, Crist najc si'c guilaj ni huinäreni.

<sup>5</sup> Dios bidxechnäj xhidajlreni, ni'c xhidajlreni gujt nez lo reyubijdzga.

<sup>6</sup> Guiraa rediidxga najc te yälrulijdx loonu, te na'c guichagljaznu jiennu lagajc redojl ni bejn retoxtdagoldoonu.

<sup>7</sup> Na'cza ganu rebanäjb si'c ni bejn baltireni; acaj lo rexquijtz Dios xcuentreni: "Rebejn ni guyaa lajz gurejreni te gu'reni, gudajwreni, dxejctiru huisureni te gusloj caguijtreni."

<sup>8</sup> Na'c chunäjnu stee bejn di gac chäältu si'c bejnreni, ni'cni gujt galbichon milreni tejtis dxej.

<sup>9</sup> Na'cza guche'chnu Dios con rextojlnu si'c bejn balti rebejnnga, ni'cni gujtreni sa'csi gudauya' bälreni.

<sup>10</sup> Na'cza chamojmtu xcuent ni rujn Dios si'c ni bejn rebejnnga xcuent ni bejn Dios, ni'cni baxhal Dios angl xten yälgujt bagu't xhidajlreni.

<sup>11</sup> Guiraa redee gusajc retoxtdagoldoonu te rulijdxni nuurnu, cuajzareni lo guijtz te guluii rediidxga nuurnu xho riäjł jiennu, nuurnu ni nabajjnu nen redxej naj.

<sup>12</sup> Ni'cni chutis ni rujn xhigab nabansa'cni nez loj Dios, sudzu'tzni te di jabsacni.

<sup>13</sup> Xheti te trabajw ni cadejdtu nani gajd ted chutis bejn. Niluxh di Dios cuälaztu, dini gusaan tedrutu dzunduxh nani digacdi guntu huant, suniidx Dios yälndip yälndaan lojtu te che tedtu trabajw sidxälto xho guibicajtu lo dzunduxhga, te gutiplajztu.

<sup>14</sup> Ni'cni rniä lojtu, rebetzä nani sanälazä, colbicał yälrajn xten rebanäjb.

<sup>15</sup> Rniä lojtu si'c lo te bejn nasin, te bejnajn: colgulatzsa'c rextidxä don la laaca najceni.

<sup>16</sup> Che rdaunu xchej xten Dad Jesucrist najcni te seen nabannäänu Jesucrist. Che rdunnu nen co'p, rmaalajznu gudijx Dad Jesucrist xtiejnni xcuent xtojlnu lo cruzj. Che rdaunu yätxtiil, sälojni anajcnu tejtis xcuent tiejxhni ni badeedni cuaj lo cruzj xcuentnu.

<sup>17</sup> Sa'csi yu' tejtis yätxtiil, mase najcnu xhidajł, najcnu si'c tejsi tiejxh sa'csi tejsi yätxtiil rdaunu che rauxchejnu xchej xten Dad Jesucrist.

<sup>18</sup> ¡Bahuii xho rujn rexepejn Israel! Rajwreni xpääl reguidxaa ni rile'creni lo Dios lo dxan nen guidoo, ni'c najceni tejsi con guiraa rebejn nani rujn sigajc rujnreni.

<sup>19</sup> ¿Xhixhni'c rlazä guiniä, naj? ¿La caniä yu' xhi sajč gojn nani gule'c bejn lo banäjb, ä? O ¿la yu' xhi sajč banäjbga, ä?

<sup>20</sup> Xhet sajcdireni. Narä caniä lojtu dee: Recos nani rbe'c rebenzijt lo rebanäjb, lo rebenđxab cabe'crenini, et lojdi Dios. Luxh narä dina rlazä gactu tejsi con rebejn nani rbe'c lo rebenđxab, te di chachunäjzatu rebenđxab.

<sup>21</sup> Sa'csi digacdi yätu co'p ni rusnaj laaznu ni bejn Dad Jesucrist lo cruzj năgajcza co'p nani rudeedreni lo rebenđxab. Digacđiza guidaunu xchej xten Dad Jesucrist năgajcza xchej ni rudeedreni lo rebenđxab.

<sup>22</sup> O ¿la rłajznu guche'chnu Dad Jesucrist, ä? ¿Xhixh maazru nadipnu lojni, ä? ¡Gurniä lojtu!

*Colojejn guira'ti te chä'p xpala'n Dios*

<sup>23</sup> Guliicani, sajc jiennu xhitis ni rlanjnu jiennu, niluxh xhet guira'ti ni rlanjnu jiennu najc hueen par nuurnu. Guira'ti najc laaca, niluxh yu' reni di gacnaj gustioobnu lo xcälirililajz Dios.

<sup>24</sup> Na'c guntu xhigab quiiiltistu lagajc xcäl'nasa'ctu; maazru hueen quiiilzatu xcäl'nasa'c xpisintu.

<sup>25</sup> Coltajw xhitis bääl ni rdo' lo guii, na'c guiniabdiidxtu caro siädni te di gacnaj xcäriejntu.

<sup>26</sup> Lo xtidx Dios caj rediidxre: "Sa'csi guideb guedxliuj näjza guiraa ni tre' lo guedxliuj najc xten Dios."

<sup>27</sup> Palga jäädgajñ te bejn ni di chalilajz xtidx Dios luj jäädtaunäjlni luxh acuäjblu chäälü, huijza, gudajw xhitis ni cue'cni nez lojlu, na'c guiniabdiidxlu te di gacnaj xcäriejnlu.

<sup>28</sup> Palga yu' chu naa lojlu: "Dee najc bääl ni bile'cnu lo rebanäjñ", na'c gauluni, didi gunni gunijñ dade'ga ni gunii si'c lojlu te di gacnajza xcäriejn chutis.

<sup>29</sup> Dina guiniä xcäriejnlu, didi gunnajni xcäriejn stee dade'ga; mbaj naj, çxhicuent riäjñ gula'tzreni narä sa'csi rajc runä guira'ti porsu racnaj xcäriejn ste'ca bejn, ä?

<sup>30</sup> Palga rudedä xquixtios lo Dios nani runiidx xhi rauä, çxhicuent rniyarenä ni rauä, luxh abadedä xquixtios lo Dios?

<sup>31</sup> Ni'cni palga gautu, o palga yätu o xhitis ni rujntu, colyujñ guira'ti te chä'p xpala'n Dios.

<sup>32</sup> Na'c guche'chtu nicla rexpejn Israel niclaza rebenzijt, niclaza rexpejn xquidoo Dios.

<sup>33</sup> Sigajcza runä narä, runä guira'ti ni ruspaalajz rebejn, dina quilä xcäl'nasa'cätis, alga rguilä xcäl'nasa'c xhidalduxh bejn, te laareni lo dojl sa'csi ahuililajzreni xtidx Dios.

## 11

1 Colyejn si'cni runä narä, sigajcza narä runä si'cni rujñ Jesucrist.

### *Xho riäjñ gun regunaa neñ xquidoo Dios*

<sup>2</sup> Rliä'pä xpala'ntu sa'csi lo guira'ti rnaj lajztu narä, rnajza lajztu rediidx nani baluiä lojtu, sudzu'tztu rusoobtu rediidx sigajcni baluiäreni lojtu.

<sup>3</sup> Narä rlazä gacbeepactu Jesucrist najc nani rnibee lo niguii, dxejctiru niguii rnibee gunaa si'c rnibee Dios Jesucrist.

<sup>4</sup> Chutis te niguii ni yu' xhumbreel yejñi lañi cabedx-canabni lo Dios o lañi caguluiini xtidx Dios, laani rusanxtujyni yejñi.

<sup>5</sup> Palga yu' te gunaa ni dini gusäu xpäiini yejñi che cabedx-canabni loj Dios o che caniini xtidx Dios, rusanxtujyni yejñi sa'csi najcni sigajc najc te gunaa ni abigaj yejñi.

<sup>6</sup> Palga di te gunaa gusäu xpäiini yejñi suguigaj yejñi. Palga najcni te xtujy guigaj yejñi, sugusäuni xpäiini yejñi.

<sup>7</sup> Di guchaag gusäu te niguii yejñi sa'csi najcni si'c xtuxh Dios, näjza xcälrdimbicha' Dios. Niluxh regunaa najc si'c xcälrdimbicha' niguii.

<sup>8</sup> Sa'csi di niguii nixixtiej cuä' gunaa; gunaa najc ni birixtiej cuä' niguii.

<sup>9</sup> Xhetza xcuent gunaadi guc-chee niguii; gunaa najc ni guc-chee xcuent niguii.

<sup>10</sup> Ni'cni nanab jääu yejñ gunaa neñ guidoo si'c te seen lo rexangl Dios yu' chu rnibeereni.

<sup>11</sup> Niluxh nez lo Dios nicla niguii niclaza gunaa digacdi guibañ xtebreni.



<sup>12</sup> Sigajc galoo birixtiej gunaa cuä' niguii, sigajcza naj gunaa najc nani ruu bäz; luxh Diostis najc nani runchee guira'ti rebejn.

<sup>13</sup> Colyejn lagajc xhigabtu naj, çla laaca najcni cuedx-guiniab te gunaa lo Dios laj ni xhet niäudi yejcnj, ä?

<sup>14</sup> Loj reben guedxliuj guiraa reniguii rgaj yejcreni, sa'csi najcni te xtjuy guigaduxh xquidxejcreni.

<sup>15</sup> Niluxh regunaa hueen najc rga' xquidxejcreni te rusäuni yejcnj.

<sup>16</sup> Palga yu' chu tilidiidx xcuent rediidx nani caniä lojtu, nanab gacbeeni si'ctis riennu, si'ctisza rujnreni nen guiraa rexquidoo Dios.

### *Xho ruxhinreni xchej Dad Jesucrist*

<sup>17</sup> Rediidxre ni cagucuaä lojtu, direni guiliä'p xpala'ntu, sa'csi che rdx-agsa'tu nen xquidoo Dios, lacuaa laaca cuetu, xhet laadi rujntu.

<sup>18</sup> Rnixgaä dee: Abiejn diagä che re'tu lo xquidoo Dios, rlia'tu lo sa'tu rajctu tiop cuaa; luxh riliica lazä rediidxre.

<sup>19</sup> Pet naatu nanab guntu si'c te gacbeetu chureni'c sanälajzpac Dios, chureni'c sajrcu lo xtzuun Dios.

<sup>20</sup> Ni'cni che rdxagsa'tu, dini gac te cuetu lo xmex xchej Dad Jesucrist,

<sup>21</sup> sa'csi che agule'creni xchej lo mex, tejga bejn rlajz xcaxgaa xhi gauni, dxejc yu' reni agudxadoo xque'reni, agusojzarenj, lajni yu' stee cuaa bejn calaan, gajdreni gau.

<sup>22</sup> çXho mood? çLa xheti rolijztu cadre gac gautu, yätu, ä? O çla rbälazlu xquidoo Dios, ni'c rusanxtujylu rebejn ni xhet räjpdi, ä? çXhini'c guiniä lojtu naj? çLa naatu guiliä'pä xpala'ntu xcuent nani rujntu, ä? ;Gurniälojtu guiliä'pä xpala'ntu!

### *Xchej Dad Jesucrist*

*(Mt. 26:26-29; Mr. 14:22-25; Lc. 22:14-20)*

<sup>23</sup> Baluiloj Dad Jesucrist loä lagajc nani baluiä lojtu xcuent xho bejnni guxhijn che gudaunäjni rexpejnni te xchej xten pascw, guxhijn ni gudo'ni. Cua'ni yätxtiil,

<sup>24</sup> dxejc che abadeedni xquixtios lo Dios, gula'ni yätxtiilga, räjpni lojreni: “Colgajw, dee najc tiexhä ni gudedä guet xcuenttu. Scree guntu te guinalajztu narä.”

<sup>25</sup> Si'cza bennäjni co'p che gulujx gudajwreni, räjpni lojreni: “Ni yu' nen co'pre najc si'c xtienä; che ju'treni narä, sixe' xtienä xcuenttu, si'c te seen xten didxcoob ni gusa'n Dios loj rebejn ni aguleni. Scree guntu te guinalajztu narä.”

<sup>26</sup> Che gautu yätxtiilga, che yätu nen co'pga, ruluilosactu xhi bejn Jesucrist che gudijnxi xcuent rextojlnu lo cruzj; si'cza colyujn dxejli ni guibisacni lo guedxliujre.

### *Xho riäjlgac xchej Dad Jesucrist*

<sup>27</sup> Ni'cni rniä lojtu, chutis tejtu ni rajw yätxtiil, ni rä'za co'p xten xchej Dad Jesucrist, palga dini gusoob xtidx Dios, rujnni dojl, najcni si'cni lagajc laani bagu't Jesucrist, baxhe'zani xtiejnni.

<sup>28</sup> Niluxh sugula'tz tejgatu lagajc lastooni don la yu' xhi dojl bejnni, dxejcti sajç gauni yätxtiil, yäni co'p xten xchej Dad Jesucrist, sa'csi abaxhobdojlni.

<sup>29</sup> Chutis bejn ni gau, ni yä xchej Dad Jesucrist, luxh dini gula'tz lagajc lastooni xhicuent gauni, yäni xchej Dad Jesucrist, lagajc laani rujnni jiajb xcälnej Dios yejcnj.

<sup>30</sup> Ni'cni lacti resa'tu racxhuu, xhet nadaanreni, luxh yu'zarenj agujt.

<sup>31</sup> Ni'cni nanab fiinu xho najcnu, guiniabnu lo Dios gudzucajni rextojl̄nu te didi tednu trabajw.

<sup>32</sup> Niluxh che rdejndu trabajw, rdejdnuni te na'c tednu trabajwduxh si'c ted reben guedxliuj che gacreni yālguxhtis xten Dios.

<sup>33</sup> Ni'cni rniā lojtu, rebetzā, che guire'tu te gautu xchej, coļcuājz resa'tu.

<sup>34</sup> Palga yu' chu tejtū ni calaan, sugauni lagajc rolizjni, te di gun Dios yālguxhtis lojtu. Guiraa rexhistee cos, che jīāļā ro'c fiā don xho gacsa'cni.

## 12

### *Dzuun ni rudeed Sprit Dxan xten Dios lo tejga ni rililajz*

<sup>1</sup> Rebetzā, rlazā gacbeetu xcuent dzuun ni rudeed Sprit Dxan xten Dios lo tejganu.

<sup>2</sup> La'tu najntu che gajdtu chalilajz xtidx Dios, rajntu chutis banāj̄b ni di gacbee, ni naatis bejn̄ gaņtu.

<sup>3</sup> Ni'cni rlazā gacbeetu naj, nicla tejtū ni yu' Xsprit Dxan Dios neņ lastooni saj̄c guinii: “Xhet saj̄cđi Jesucrist.” Luxh rut raj̄cđi rniī: “Jesucrist naj̄c Dadbid baxhuaannu”, palga di Xprit Dxan Dios cuāāz neņ lastooni.

<sup>4</sup> Mbaj naj. Yu' xhidajl̄ dzuun ni rudeed Dios loj rebejn̄ ni huililajz xtiidxni, niluxh tejsi naj̄c Xsprit Dxan Dios ni rujn̄ dzuunga neņ lastoo guiragajcnu.

<sup>5</sup> Yu'za balti cuaa dzuun nani riennu, niluxh tejsi naj̄c Xtadbid baxhuaannu.

<sup>6</sup> Yu' xhidajl̄ mood raj̄c dzuun, niluxh tejsi Dios rujn̄ dzuunga lastoo guiralii bejn̄.

<sup>7</sup> Tejga bejn̄ ruluiloj garen-garen xtzuum Sprit Dxan xten Dios, niluxh guira'ti redzuunga naj̄c te gacnāj̄reni guiraanu.

<sup>8</sup> Lo tej bejn̄ rudeed Sprit Dxan yālnasiņ, lo steeni rudeed lagajc Sprit Dxanga yālnaj̄n.

<sup>9</sup> Lagajcza Sprit Dxanga rudeedzani yālrililajzro lo tejni, dxej̄c lo steeni rudeedza lagajc Sprit Dxanga yālrnibee te rusiaj̄cni yālracxhuu.

<sup>10</sup> Loj stee bejn̄ rudeedzani yālrnibee te gunni milaagw; loj stee bejn̄ rudeedni yālrriembee te saj̄c guinixgaani xcuent recos ni churu gac; lo steeni rudeedni yālnasiņ te gumbeeni chu naj̄c Sprit guliipac, nāj̄za chu naj̄c sprit ni rusguee. Lo stee bejn̄ rudeedzani guiniini garen-garen redidxsaj̄; loj stee bejn̄ rudeedzani yālracbee te raj̄c rniīni loonu xhini'c gunii bejn̄ ni rniī garen-garen redidxsaj̄.

<sup>11</sup> Niluxh tejsi naj̄c Sprit nani rujn̄ guiraa redzuunre, racnāj̄ni rujn̄ tejganu xtzuumni si'ctis ni rlazjni.

### *Guiraanu najcnu te la' tejsi tiejxh*

<sup>12</sup> Sigajc ni naj̄c tiejxhnu tejsi, mase yu' xhidajl̄ la' xtēni, tejgareni te la' tejsi tiejxh, sigajcza naj̄c rebejn̄ nani huililajz xtidx Jesucrist.

<sup>13</sup> Guiraanu, mase najcnu rexpejn̄ Israel o beņ griegw, mase najcnu mos o mastr̄; gurobnisnu con laj̄ Sprit Dxan che huililajznu xtidx Dios, te guj̄cnu si'c tejsi tiejxh, luxh tejsi Sprit Dxan xten Dios biādāj̄z neņ lastoonu.

<sup>14</sup> Sa'csi tiejxhnu dini gac tejsi la', najcni balti la'.

<sup>15</sup> Paru naa ni'nu: “Sa'csi dina gacā te naa, ni'cni dina gacā te la' tiejxhre.”  
 ζXhixh pors̄i ni'c dini gac tla' tiejxhga, ā? j̄Gurniālojlu!

<sup>16</sup> Palga diaj̄gnu naa: “Dina gacā te baloj, ni'cni dina gacā te la' tiejxhre.”  
 ζXhixh pors̄i ni'c dini gac tla' tiejxhga, ā? j̄Gurniālojlu!

<sup>17</sup> Palga guideb tiejxhni niaj̄c te baloj, ζxhi cojn̄ niejn̄ diaj̄gni? Palga guideb tiejxhni niaj̄c te diaj̄gni, ζxhi cojn̄ chuxhi'ni?

18 Mbaj naj, ni'c basoob Dios guiraa rela' te guc-chee tiejxhnu si'ctis ni rlanjni gacni.

19 Paru niajc guidebni si'c tejtis la'ni, zcho niajcpacni te tiejxhni dxejc?

20 Niluxh naj ensilaani yu' xhidajl la' te najcni tejsi tiejxhni.

21 Te balojnu di gac gäbni lo naanu: "Dina guiquinälu", niclaza bitiuycjni di gac gäbni lo ni'ni: "Dina guiquinälu."

22 Chucala lapacreni rquinnru nani ruzen lascanu xhet sajcdireni.

23 Luxh retla'ga nani rchalonu guxii sajcreni, reni'c maazru sajc. Luxh reni rtuinäanu, niguii sigajc gunaa, reni'c riapdarunu.

24 Biätla sgaii la' tiejxhnu nani rlui saruru, reni'c di guiquiin gapdanuni. Niluxh abenchee Dios tiejxhnu si'c, te gapdaru bejn retla' nani lascanu guxiiru sajc.

25 Bejn ni si'c te di chu yärdijl lo retla' tiejxhnu, te guiraa retla'ga gacnäy sa'reni.

26 Ni'cni che et laadi yu' te la' tiejxhnu guidebni ru' et laadi. Sigajcza che guiliä'pnu xpala'n te la' tiejxhnu, guideb tiejxhnu rbalajz.

27 Ni'cni guiraanu najcnu si'c tiejxh Jesucrist. Tejganu najc te la' tiejxhni.

28 Luxh abadeed Dios yälrnibee lo tejganu lo xquidooni te gunnu xtzuum-xtzuunni. Ganidtoo guleni reapost; ni rojnga guleni rebejn ni rnii xtidx Dios; ni riojnga, guleni rebejn ni ruseed; dxejcti guleni reni rujn remilagwr, reni rusiajc benracxhuu, reni racnäy, reni rnii garen-garen redidxsaj.

29 Et guiraadi rexejn Jesucrist najc apost. Et guiraadizareni rniireni xtidx Dios. Et guiraadireni rajc ruseed. Et guiraadizareni rajc rujn remilagwr.

30 Et guiraadireni rajc rusiajc rebenracxhuu. Etza guiraadireni rajc rnii garen-garen didxsaj, et guiraadireni rajc rnii xhi säloj redidxsajga.

31 Nanab guideb lastootu rlanjtu guniidx Dios reyälrnibee ni najc maazru hueen lojtu. Niluxh narä guluiä lojtu te nezyuj ni najc hueenru loj guiraareni.

## 13

### *Yälsanälajz*

1 Palga guiniä guiraloj xtidxsaj rebejn, o xtidx rexangl Dios, luxh dina chanälazä rebejn, rubejtis xtidxä si'c te tamboor o te platii.

2 Palga sajc guiniä xtidx Dios xcuent recos ni churu gac, luxh rachesa'cä guiraa recos xhiga'tz xten Dios, näjza guiralii yäl'nasiin xten guedxliujre, palga rapä yälrililazduxh te gac gäpä lo redajnre, "colguibicaj", luxh rbicajreni, niluxh xhet sanälazädi rebejn, rut nacädi.

3 Palga gudedä guiraa rexhixtenä nani rapä te gau rebejn ni xhet rajpdi; palga gudedä tiexhä te checni, luxh xhet sanälazädi rebejn, xlia'si gunä guiraa redzuunga.

4 Rebejn ni rajp yälsanälajz cabäyzreni, najczareni bensa'c, direni säblajz xhi xten sa'reni, direni guschä'p lagajc xpala'nreni, direni gac guyalajz.

5 Direni gun recos ni di guchaag, dini quuil xcäl'nasa'ctisni, dini guidxe'ch, dini jiu redojl ni rujn bejn lojni.

6 Nani rajp yälsanälajz dini guibalajz che rujn stee bejn dojl, alga rbaa lajzni che laaca rujn bejn.

7 Nani rajp yälsanälajz rujn huant xhitis cos, rililajzni hueen xcuent xhitis cos, sanuutis cabäyzni, rajc rdejdni xhitis trabajw.

8 Yälsanälajz dipacni nitloj. zLa rniireni xtidx Dios xcuent recos ni churu gac, ä? Sidzujn dxej sibäyz rediidxga. zLa rajc rnii bejn garen-garen redidxsaj,

ä? Sidzujn dxej siacdx i redidxsajga. ¿La yu' yäl'najn? Sidzujn dxej sinitloj-pacni.

<sup>9</sup> Sa'csi naj guxilii racbeenu, guxilii xtidx Dios xcuent recos ni churu gac rajc rniinu,

<sup>10</sup> niluxh che jädsac Jesucrist ni rajp guiralii yäl'najn, sinitloj xcäl'nandxucnu.

<sup>11</sup> Che gucä biuux, guniä si'c biuux, benäza xhigab si'c biuux, niluxh che bidzunä lo yäl'ngol, gunitloj rexhigab biuux ni benä galoo.

<sup>12</sup> Sa'csi naj rhuiinu si'c loj te guihuaajn ni nacäy, luxh che guibanänu Dios xhaguibaa, suhuisa'cnu si'cni ruhuii bejn che suga'ni loj sa'ni cahuiinini. Naj racbeenu re'cti rec, niluxh dxejc sacbesa'cnu si'cpacni numbee Dios nuure.

<sup>13</sup> Niluxh naj ria'n yäl'rilihajz näjza yäl'rbälzajz, näjza yäl'sanälajz. Lo guidxon redee, sajcru yäl'rinälajz.

## 14

### *Renani rnii rediidx*

<sup>1</sup> Ganiddoo colquuil yäl'rinälajz, col'nabza lo Dios te guniidxruni xhi stee dzuun, niluxh col'yejnru te xca'tu yäl'rnibesa'c te gusule'tu xtidx Dios.

<sup>2</sup> Che rnii te bejn garenca diidx ni di rebejn gacbee, rniini lo Diostis, et lojdi rebejn, sa'csi rut racbeedi xtiidxni, mase caniiini cosro, cosxhiga'tz nani ruluii Sprit Dxan xten Dios guiniini.

<sup>3</sup> Niluxh bejn ni rusule' xtidx Dios, rustioobni xcäl'rilihajz bejn ni rulijdxni, ruspaani lajz nani rac-huin lajzni.

<sup>4</sup> Che rnii te bejn garenca didxsaj ni rut racbeedi, lastootisni rustioobni, niluxh bejn nani rusule' xtidx Dios xcuent recos ni churu gac, laani rustioobruni lastoo guiraa rebejguidoo.

<sup>5</sup> Narä rlazä maläi rajc rnii guiraatu garen-garen diidx, niluxh hueenru gac gusule'tu xtidx Dios. Maazru sajc nani rajc rusule' xtidx Dios loj nani rnii garenca diidx palga di gacdi gusule'ni lo rebejn xhini'c caniiini.

<sup>6</sup> Mbaj naj betzä, che jäälä lojtu, palga guiniä garenca diidx lojtu, ¿xhi gacnäjni la'tu? Hueenru guiniliä xcuent te cos ni abaluiloj Dios loä, o xcuent te yäl'najn, o xcuent te xtidx Dios, o xcuent te yäl'rluii.

<sup>7</sup> Ni ruhuiinu xho najcza reinstrument ni rol bejn si'c te bizej, o te harp; palga di bejn golsa'creni, ¿xho jienu gacbeenu xhi dij cayol'reni, ä?

<sup>8</sup> Sigajcza lo guerr, palga direni gol' cornet dippac, ¿xho gacbeereni agojl chatij'reni, ä?

<sup>9</sup> Sigajcza la'tu, palga ditu guinisa'c didxsaj nani racbee bejn, ¿xho gunreni gacbeereni xhini'c caniiilu, ä? Xlia'si guiniilu, lo bejtis sää xtiidxlu.

<sup>10</sup> Yu' xhidalduxh didxsaj lo guedxliuj, luxh xheti tejni nani xheti xnejzni.

<sup>11</sup> Niluxh palga dina gacbeä didxsaj ni rniireni loä, nacä si'c te benzijt loj nani canii loä, sigajcza sajc nani caninäj narä.

<sup>12</sup> Ni'cni la'tu ni rrlajztu xca'tu yäl'rnibee xten Sprit Dxan te guntu xhi redzuun, col'guejs, col'nab lojni xhidajl dzuun te gacnäjtu tioobru xcäl'rilihajz rexpén guidoo.

<sup>13</sup> Ni'cni palga yu' te bejn ni rnii garenca didxsaj, suguiniabni loj Dios yäl'rnibee te gac gusule'ni diidx ni rniini lo rebejn.

<sup>14</sup> Palga cuedx-guiniabä lo Dios con te didxsaj ni dina gacbeä, lastoätis ni calä'p xpala'n Dios, niluxh xcärienä xhet cayacbeedini.

<sup>15</sup> ¿Xho ricajni dxejc? Siniab xspritä näjza xcärienä lo Dios; sol' xspritä näjza xcärienä dij.

16 Palga dini gac si'c, xsprittislu calä'p xpala'n Dios con ste'ca didxsaj, niluxh bejn nani cacuadiajg di gacdi gacnäjnilu guiliä'pni xpala'n Dios, sa'csi dini gacbee xhini'c rniilu.

17 Hueenza calä'plu xpala'n Dios, per stee bejnga dini tiob loj yälirililajz.

18 Rudedä xquixtios lo Dios maazru rajc rniä garen-garen diidx loj guira-gajctu.

19 Niluxh neñ guidoo maazru rlazä guiniä con xcärienä gaiitis diidx nani gacbeetu, nani guluu la'tu, loj tzuu mił diidx nani guiniä con xspritä ni ditu gacbee.

20 Rebetzä, na'c rujntu xhigab si'cni rujn rebiuux, xcuenttis cosguijdx nanab gacnayatu si'c biuxbäz, per colyejn xhigab si'c te bengool.

21 Scree caj lo xleii toMoisés: "Mase guiniä lo rebejn con garenca diidx näjza xtidx benzijt, nicla si'c direni gucuadiajg xtidxä", naj Dad baxhuaannu.

22 Ni'cni regaren-garen didxsaj najc si'c te seen lo renani gajd chalilajz xtidx Dios, et lojdi rebejn ni arililajz xtidx Dios. Niluxh yälrusule' xtidx Dios xcuent recos ni churu gac, ni'c najc te seen loj renani ahuililajz xtidx Dios, xhet lojdi renani gajd chalilajz xtidx Dios.

23 Palga re'tu neñ guidoo dxejcti caniitu garen-garen diidx ni rut racbeedi, dxejc guidzujñ tej ni di gan xtidx Dios, sinüni guiraatu rajc yejctu.

24 Palga re'tu neñ guidoo, dxejcti guiraatu cagusule'tu xtidx ni baniidx Dios lojtu, che jiu' tej ni di gan xtidx Dios, sacbeeni xhini'c caniitu, sacbeeni yu' xtojñni,

25 sienloj rexhigab xhiga'tz ni yu' neñ lastooni, dxejcti siabrlojni suzuxhi-jbni lo Dios, siniabni lo Dios, sinüzani guliipacni suga' Dios galäiitu.

### *Colyejn guira'ti xnez-xnejzni*

26 ¿Xho ricajni naj, betzä? Che guire'tu neñ guidoo suxca' tejpgatu tebgaj te salm, te xtidx Dios ni guluüni, te diidx ni baluiloj Dios lojni, te diidx con garenca diidx, nägajza te ni gusule' xhi säloj diidxga. Colyejn guiraa ni rujntu te tiob xcälirililajz renani ahuililajz xtidx Dios.

27 Palga yu' renani rni con garenca diidx, suguüni tio'p-choñ bejn, niluxh tebgajreni, dxejcti sugusule' steeni xhi säloj ni rni tebgajreni.

28 Palga rut rajcdi gusule' rediidxga, na'c guüniireni con garenca diidx neñ guidoo, suguüni xtebrene lo Dios.

29 Si'cza renani rusule' diidx ni rudeed Dios lojreni, suguüni tio'p-choñ bejn, niluxh tebgajreni, te cuadiajg stiop xchoñreni donnu la laaca caniireni.

30 Palga guluiloj Dios te cos loj te bejn ni sobga' cacuadiajg, sucuedxisijcni, dxejcru suguüniini.

31 Sa'csi guiraatu sajc gusule'tu tebgajtu didx ni baniidx Dios lojtu te gac guisieedtu, te tiob lastoo guiraatu lo yälirililajz.

32 Rudeed Sprit Dxan xten Dios yälñajn loj reni rusule' diidx ni rudeed Dios lojreni te acanajreni che riäj guüniireni o che riäj cuedxireni,

33 sa'csi Dios najc te Dios ni rujn guira'ti xnez-xnejzni, dini gun bieje, niluxh rbecdxini lastoo bejn neñ guiraa reguidoo xten rebejn ni ahuililajz-pac xtiidxni.

34 Sucuedxi regunaa neñ reguidoo, sa'csi di gacdi gusule' te gunaa xtidx Dios. Nanab gunreni si'c caj lo leii gunreni, gucuadiajgreni xtidx Dios ni rusule' renigui lojreni.

35 Palga rlanjreni gacbeerureni, suguüniabdiidxreni loj chäälñi che guibi'reni rolizreni, sa'csi sianxtujy gunaaga palga guüniini neñ guidoo.

36 Colgacbee et la'ditu guläxtiejditu rextidx Dios, luxh etza xtebtis lojtu biäädni.

<sup>37</sup> Palga yu' tejtü ni rchalo rajc rniini diidx ni rudeed Dios lojni, o palga rchaloni abadeed Xpirt Dxañ xten Dios te dzunro lojni, sugacbeepacni dee: guiraa rediidx ni cagucuaa lojtu, rucuaani sa'csi si'c gunibee Jesucrist gucuaani.

<sup>38</sup> Palga yu' chu tejtü ni di chalilajz rapä xcälrnibee Jesucrist, rutza jiudi xtiidxni.

<sup>39</sup> Ni'cni, rebetzä, colyeynru te gusule'tu diidx ni runiidx Dios lojtu, na'c gudxoñtu renani rniiza garenca didxsaj.

<sup>40</sup> Luxh guira'ti nani rujntu, colyensa'cni, xnejz-xnejzni.

## 15

### *Gubañsac Jesucrist lo rebengut*

<sup>1</sup> Naj rniä lojtu betzä, colgusnaj lajztu xtidx Dios ni basule'ä lojtu, nani huililajztu, loj nani sutijptu,

<sup>2</sup> näjza colgusnaj lajztu diidx xcuent ni badzucaj Dios xtojltu che huililajztu, palga sanuu sutijptu lojni, te di xlia'si huililajztu diidxga.

<sup>3</sup> Lojtu ganiddoo basule'ä rediidx ni sajcrü ni bisiedä, basule'ä xho gujt Jesucrist lo cruzj, bixe' xtejnñi te badzucajni rextojlñu, sigajc ni caj lo xtidx Dios gac.

<sup>4</sup> Basule'äza xho biga'tzni, dxejc ni rion dxej guläs Diosni, gubañsacni si'cni caj lo xtidx Dios gacni.

<sup>5</sup> Cheni gubañsacni, baluilojni lo Pedr, dxejctiru loj guitzubito'p rexpejn pacni,

<sup>6</sup> dxejcti baluilojni lo gabixh gaii gayuu bejn ni tre' tejsi lajt. Xhidajlreni nabañsajc, niluxh yu'za reni agujt.

<sup>7</sup> Dxejcti baluilojni lo Jacob, dxejctiru loj guiraa reapost.

<sup>8</sup> Dxejcti lultpac baluilojzani loä, luxh alagudejd ruluilojni lo rexpejnñi dxejc.

<sup>9</sup> Narä guxiiru sacä loj guiraa reapost, niclaza nungäj] cuälajreni narä apost sa'csi basacsiä rexpejn xquidoo Dios.

<sup>10</sup> Balaslazduxh Dios narä, ni'c narä nacä si'c ni nacä naj. Luxh et xlia'di balaslazjni narä. Narä benäru dzuun loj guiraareni, niluxh xhet narädi ni benä dzuun, sa'csi xcälrulaslajz Dios cayacnäjä narä.

<sup>11</sup> ¿Xhiru najcni palga naräni o palga laareni? Empac cagusule'nu xtidx Dios, luxh la'tu salilajztu xtiidxni.

### *Xho guibañsac rebengut*

<sup>12</sup> Mbañ naj, palga nuurnu cagusule'nu diidx xcuent ni gubañsac Crist loj rebengut, ¿xhicuent yu'tu ni rni, xheti yälrbañsac loj rebengut?

<sup>13</sup> Palga xheti yälrbañsac lo rebengut, dxejc nicla Crist di nibañsac lo rebengut.

<sup>14</sup> Luxh palga di Crist nibañsac loj rebengut, ¡xlia'si najc diidx nani basule'nu! ¡Xlia'siza najc xcälrlililajztu!

<sup>15</sup> Luxh et ni'ctis. Abiga'nu sa'csi rusgueenu rniinu baspañsac Dios Jesucrist loj rebengut, luxh dini nuspañsacni loj rebengut, palga guliini di bejn guibañsac loj rebengut.

<sup>16</sup> Niluxh palga di rebengut chäs, niclaza Crist di nibañsa'c lo rebengut.

<sup>17</sup> Luxh palga di Jesucrist nibañsac loj rebengut, xhet sajcdi xcälrlililajztu, sanuutistu loj xtojltu.

<sup>18</sup> Sigajcza agunijt rebengut nani huililajz xtidx Jesucrist.

19 Palga naj ni nabajntisnu loj guedxliujre cabääznu Jesucrist, lo guiraa reben guedxliuj nuurnu najcnu rebejn ni riäjil jiaduxhtej guiraa reni ruhuii loonu.

20 ¡Per dini gac si'c! Guliipacni gubansac Jesucrist loj rebengut. Laani guc ganiddoo loj guiraa rebengut ni gubansac, luxh laani dini niejt par tejpas.

21 Sigajcni biääd yälgujt loonu xcuent tejtis niguii, sigajcza biääd yälrbansac lo rebengut loonu xcuent tejtis niguii.

22 Sigajc xcuent te niguii ni laa Adán biääd yälgujt, sigajcza xcuent Jesucrist biääd yälrbansac loj rebengut.

23 Tejanu xcuent-xcuentnu; Jesucrist gujc ganiddoo, dxejcti guiraa reni najc rexpejni che jiädsacni lo guedxliujre, guiraareni suspansacni.

24 Che agujc ni'c, dxejcti siääd dxe lult che gudedscacni yälrbabee lo Dios Xtradni, che abadzujni guiraa reyälrbabee, guiraa reyälgujhtis, guiraa reyälmilagwr.

25 Nungäjlpac guinibee Jesucrist cheni gunli Dios gaan loj guiraa reni rdxe'ch lojni, quixhnireni detz ni'ni.

26 Lult ni rdxe'ch lojni ni gunitlojni najc yälgujt.

27 Lo xquijtz Dios caj: "Agudixhni guira'ti detz ni'ni te guinibeenireni." Che rniini si'c huenliisi gachee bejn di gacdi guinibee Jesucrist Dios, sa'csi Dios badeed lojni xhini'c guinibeeni.

28 Che acanibee Jesucrist guiraali recos, dxejcti sudeedni guideb yälrbabee loj Xtradni Dios, te xtebtis Dios guinibee guira'tipac.

29 Palga rujntu xhigab di bejn guibansac loj rebengut, ¿xhi gun rebejn nani robnis xcuent rebengut? Palga di bejn guibansac lo rebengut, ¿xhicuent rutiobnisreni la'tu xcuent rebengut?

30 ¿Xhicuentza rdxunnu lo casionduxh guira'ti or?

31 Rniliäpac lojtu, rebetzä, caläpä xpala'ntu xcuent Jesucrist Xtradnu ni cayun xtzuunni lojtu. Ni'cni guniä lojtu, guira dxej rguiilreni narä te ju'treni narä.

32 Palga benä xhigab si'c te niguii guedxliuj che bacuanää reniguii ni najc si'c man nialajz lo guedx Éfeso, ¿xhi gaan benä? Palga di bejn guibansac loj rebengut, do'o jien si'c ni caj lo guijtz: "Do'o guida, do'o guida, sa'csi guixee empac sejtnu."

33 Na'c gusaantu gusgueereni la'tu, palga sachaa glu lo benguijdx näjza luj sajclu benguijdx.

34 Basani j xcäriejnlu si'cni nanab gunlu. Bascuääz dojl ni rujnlu sa'csi yu' balti bejn ni dipac gumbee Dios. Te guitujytu ni'c rniä diidre lojtu.

### *Xho guibansac rebengut*

35 Naj yu' reni rniabdiidx: "¿Xho rbansac bejn loj rebengut? ¿Xhoza gac tiejxhrenei?"

36 ¡Chip nayäällu! Che rbe'clu te binij, di gäjil guiliejn palga di xhobga guet, nalajznu, palga dini guechduu.

37 Luxh che rbe'clu, dilu cue'c gäjlga si'cni rlaizlu gacni, alga rbe'clu xhob o triuu o ste'ca binij,

38 niluxh Dios rujn rliejnni, rustioobni gäjlga, lo tejsa gäjil rudeedni xpala-jgni o tiejxhni, si'ctis ni rlaizni.

39 Xhet guiraadi retiejxhrenei najc tebloj. Yu' bääl xten bejn, yu'za bääl xten reguidxaa, yu'za bääl xten reman xhaguibaa, yu'za bääl xten rebäjil.

40 Sigajcza yu' tiejxh rebajl xhaguibaa, tiejxh rexten guedxliujre. Niluxh yälrdimbicha' xten rebajl xhaguibaa najc tej, dxejc yälrdimbicha' guedxliuj najc ste'ca.

41 Bicha' xte gubijdx najc garen lo xten bäii, sigajcza xpicha' rebal xhaguibaa najc garen-garenza lo sa'reni.

42 Sigajcza yälrbansac loj rebengut; che guet bejn rga'tz tiejxhni luxh rujdxni, rnitlojni. Luxh che guibansacni loj rebengut, garenca gac tiejxhni, diruni gudx, anabajnni par tejpas.

43 Che rga'tzni, rujn bejn xhigab xhetru gacnäjdi tiejxhga, niluxh che guibansacni, lacti sacru, lacti sajc tiejxhga. Che rga'tzni, xhetru sajcdi gunni, luxh che guibansacni, anadipduxhni.

44 Che rga'tz tiejxhnu, najcni xten guedxliujre, luxh che chäsni najcni te tiexhcoob ni runiidx Dios. Ni'cni yu' te tiejxhni ni siääd lo guedxliuj, yu'za te tiejxhni ni siääd xhaguibaa.

45 Si'cza caj lo xtidx Dios: "Nigui galooga ni laa Adán, bejn Dios gujcnj te beñ nabajn." Niluxh Adán ni biääd lult, Jesucrist najc Sprit ni runiidx yäl'nabancob loonu.

46 Ganid najc yäl'nabajn xten guedxliujre, dxejctiru yu' te yäl'nabancob xhaguibaali.

47 Sigajcza niguii galooga najc beñ guedxliujre, niluxh ni rojp niguii ni biääd najc beñ xhaguibaali.

48 Benchee Dios Adán con yuj, najcni beñ guedxliuj. Xhaguibaali biääd Jesucrist, najcni beñ xhaguibaa.

49 Sigajcni najcnu si'c beñ guedxliujre, sigajcza sajcnu sigajc najc bejn ni yu' xhaguibaa.

50 Naj guiniä rediidxre lojtu betzä, di gac ted tiejxhnu ni najc bääl näjza rejn xhaguibaa cadro yu' Dios. Tiejxhnure nani sinitloj di gacdiza xca'ni stee tiejxh ni najc par tejpas.

51 ¡Colhuii! Rlazäza gacheetu te didx-xhiga'tz; xhet guiraadinu guet, niluxh sidxaa guiraa retiejxhnu

52 tera't bälzule', si'c cheni rdinya' guzii, che jiel lult trompe't, dxejc sibansac rebengut, säjsreni guideb tiexhcoobreni ni najc par tejpas. Luxh näjza tiejxhnu sidxaa.

53 Sa'csi tiejxhnu ni najc xten guedxliuj nanab guidxaani te ga'pnu tiejxhnu ni najc xten xhaguibaa, sa'csi tiejxhnu ni najc xten guedxliuj rejtni, niluxh tiejxhnu ni najc xten xhaguibaa di gacdi guetni, najcni par tejpas.

54 Niluxh che tiejxhnu ni najc xten guedxliuj abidxaa te ga'pnu tiejxhnu ni najc xten xhaguibaa, näjza che tiejxhnu ni sajc guet abidxaa te ga'pnu tiejxhnu ni di gacdi guet, ni najc par tejpas, dxejc sisiojb xtidx Dios ni caj scree: "Yälgujt agunitloj sa'csi bejn Jesucrist gaan lojni.

55 Yälgujt, ¿xho gac gunlu gaan naj, ä? Yälgujt, ¿Con xcäl'nayanlu naj, ä?"

56 Xcäl'nayan xten yälgujt najc dojl. Xcäl'ribee dojl najc leii.

57 Niluxh rdeednu qxuxtiös lo Dios, nani runiidx te yäl'ribee loonu te jienu gaan lo yälgujt xcent Dad Jesucrist.

58 Ni'cni rebetzä ni sanälazduxhä, colchanuutis, colsudzu'tz lo xtidx Dios, na'c guidxajgtu guntu xtzuunni, sa'csi anancheetu xhet xlia'di najc dzuun ni runiidx Dios rienu.



<sup>1</sup> Xcuent meel nani guire' par rebejtznu, colyejnni sigajcni räpä gun reben rexquidoo Galacia.

<sup>2</sup> Casob dumingw, nalajznu ganid dxej xmaan, te jgatu colcuää te meel yejc nani rujntu gaan nen te xmaan, colcucheeni, te na'c gutie'tu meel che jiälä.

<sup>3</sup> Te che guidzunä, guxhalä meelga, näjza tiop-choñ guijtz chanä chutis bejn ni cuetu chasa'nni guedx Jerusalén.

<sup>4</sup> Palga laaca cha'aza, sajczä chänäreni narä.

*Xhigab ni bejn Pabl chääni bias*

<sup>5</sup> Guidzunä lojtu che agudedä reguedx Macedonia, sa'csi sidedä nejzga galoo ni jiälä ro'c.

<sup>6</sup> Dxejcti pet siannää la'tu, pet saclaä, sidedä guiraa rebäi najl ro'c, te gacnäjtü narä che cha'a cadrotis cha'a.

<sup>7</sup> Sa'csi di rlazä jiädhuiätu te ladejtzi, rlazä jiannää la'tu xchejpac, palga gusaan Dad Jesucrist gunä si'c.

<sup>8</sup> Niluxh sia'nä guedx Éfeso, te ro'c tedä lanij ni rusnaj lajz bejn che biääd Sprit Dxan xten Dios.

<sup>9</sup> Sa'csi ro'c yu' xhidajl bejn nani rlazj guisieed xtidx Dios, niluxh ro'c yu'za xhidajl reni rdxe'ch loä.

<sup>10</sup> Palga guidzujñ Timoteu lojtu, saru colhuiini, te na'c chuni yärsia' lañ ni yunäjni la'tu, sa'csi cayujñni xtzuun Dios sigajc runä narä.

<sup>11</sup> Na'c gusaantu chu tej ni cuälazni, colcuedxi lajzni, dxejc colgusunejzni, te jiädhuiini narä ree, sa'csi ree cabääznu laani con rebejtznu.

<sup>12</sup> Niluxh xcuent bejtznu Apolos, räpäza lojni niäädpacni lojtu con rebejtznu, niluxh di rlazjpacni niäädni naj. Per siäädcani dxejtis ni gac jiäädni.

*Rextixtios lult ni ruxhalni*

<sup>13</sup> Colsusin, colsudzu'tz lo yälirilajz xten Dios, colyejn dzuun si'c niguii, colyajc bendaan.

<sup>14</sup> Xhitis ni rujntu colyejnni con yälrinälajz.

<sup>15</sup> La'tu rebetzä, anajntu xcuent rexfamil Estéfanas, nani ganid huililajz xtidx Dios nez reguedx Acaya, najntu xho racnäduxhrenei rebejtznu nani huililajz xtidx Dios ro'c. Naj rniabduxhä lojtu,

<sup>16</sup> colgusoob xtidx rebejnga, näjza xtidx guiraa rebejn ni racnäj rexpejn Dios, ni rujnza xtzuun Dios.

<sup>17</sup> Rbalazä bidzujñ Estéfanas, näjza Fortunato, näjza Acaico, sa'csi laareni bejnrenei par narä nani di niajcni niujntu sa'csi rutitu.

<sup>18</sup> Gulecdxireni lazä näjza lajztu, ni'cni, jcoljiu sa' rebejnga!

<sup>19</sup> Reben xquidoo Dios nez reguedx Asia ruxhalä xtixtios lojtu. Aquila näjza chäälni Priscila näjza rebejn ni re' rolizreni ruxhalzaren i xtixtios lojtu.

<sup>20</sup> Guiraa rebejtznu ruxhalä xtixtios lojtu. Colguinii te jgatu lo sa'tu: "Xchan, gacnäj Dios la'tu."

<sup>21</sup> Narä Pabl, ruxhalä xtixtios lojtu, lagajc narä benä relettre.

<sup>22</sup> Palga yu' chu tejtü ni di chanälajz Dad Jesucrist, sunitlojni. ¡Dad Jesucrist, gudaal!

<sup>23</sup> Gacnäj xcälrulasajz Jesucrist guiraatu.

<sup>24</sup> Yälrinälajz ni rapä xcuent Jesucrist suchunäjni la'tu. Sugacni si'c.

## Stee Guijtz Ni Bacuaa Pabl Lo Guidoo Xten Guedx Corinto

### *Ni rojp guijtz ni bacuaa Pabl lo guidoo xten guedx Corinto*

<sup>1</sup> Narä Pabl nacä apost xten Jesucrist sa'csi si'c rlaiz Dios te gusule'ä xtiidxni. Narä näjza Timoteu, ni najc bejtznu lo xtidx Dios, rucuaanu guiitzre lojtu rexpejn xquidoo Dios ni yu' guedx Corinto, näjza loj guiraa rexpejn Dios ni rbäjz nez guiraa reguedx Acaya.

<sup>2</sup> Rniabnu lo Dios ni najc Xtadnu näjza lo Dad Jesucrist, gacnäjreni la'tu, guscuecdxireni lajztu.

### *Trabajw ni gudejd Pabl*

<sup>3</sup> Guiliä'pnu xpala'n Dios Xtad Jesucrist, nani rulaslajz nuurnu, nani rus-toolajz nuunu.

<sup>4</sup> Che rdejdnu trabajw, rbecdxini laaznu te rajcza rbecdxinu lajz renani cadejd trabajw con lagajc yälrbecdxilajz ni baniidx Dios loonu.

<sup>5</sup> Sigajc ni rdedduxhnu trabajwduxh ni gudejd Jesucrist sa'csi rusule'nu xtiidxni, sigajcza rbecdxiduxh Jesucrist laaznu.

<sup>6</sup> Palga rdeednu trabajw, najcni te gustolajz la'tu, te laatu lo dojl. Palga ruscuecdxi Dios lajznu, si'c rujnni te cuedxilajztu te guntu huant che tedtu lagajc trabajw ni cadejznanu.

<sup>7</sup> Rinudzu'tz yälrunloj ni rajpnu xcuent la'tu, sa'csi nadonnu palga rdejdtu lagajc trabajw ni cadejdnu, suscuedxi Dios lajztu sigajcni ruscuedxini laaznu.

<sup>8</sup> Rebetzä, rlazä gacbeepactu lacti trabajwduxh bideednu nez reguedx Asia, tudxe'nsi dinu nien huant, sa'csi gudedcaj trabajwga, acasislinu. Trabawduxhtejni, benä xhigab sujnni gaan, sugu'tni nuurnu.

<sup>9</sup> Gulicanu, alabiennu xhigab sejt pacnu. Niluxh dee gusajcnu te bisieednu na'c chaliilajznu lagajc nuurnu, alga chaliilajznu Dios nani ruspañsac re-bengut.

<sup>10</sup> Sa'csi Dios basläa nuure lo yälgujtgä, luxh sinuutis gusläani nuurnu lo yälgujt. Salilazduxhnu Diosre susläaruni nuurnu,

<sup>11</sup> Sa'csi cayacnäjtu nuurnu, cabedx-canabtu lo Dios xcuentnu. Dxejcti palga xhidajl bejn cabedx-canab lo Dios xcuentnu, xhidajlzareni sudeed xquixtios lo Dios xcuentnu xcuent xcäl'rulaslajz Dios ni baniidxni loonu.

### *Xhicuent di Pabl nij guedx Corinto*

<sup>12</sup> Dee najc nani ruspaä laaznu: rbedxi xcäriejnnu, ni'c ruluui loonu laaca nabajnnu, con yäl'nadolajz riennu si'cni rnibee Dios; xhet sa'csi rajpnu xcäl'najn reben guedxliujdi, alga sa'csi racnäj Dios nuure. Si'cpac nabajnnu lo guedxli-ujre, luxh maazru che yu'nu lojtu.

<sup>13</sup> Cacuaanu lojtu rediidx ni sajc gojtu, ni sajc gacbeetu, luxh cabäzä sachbesa'ctu guiragajc rediidx ni gucuaä,

<sup>14</sup> Lagajc si'cni agucbeetu mase gaii xtiidxnu, cabäzä guibaa lajztu xcuent nuurnu, sigajcni guibaa lajznu xcuent la'tu nen dxej ni jääd Dad Jesucrist.

<sup>15</sup> Ni'cni ganiddoo benä xhigab niädhuiä la'tu te nibalajztu tio'p huält.

<sup>16</sup> Nalajznu, benä xhigab nidedä ro'c che sa'a reguedx Macedonia, dxejcti stehuält cheni guibi'ä Macedonia, niädhuisacä la'tu ro'c te niacnäjtu narä te nia'a Judea.

17 ¿Xhaa dina niunsa'cä xhigab che benä xhigabre? ¿La rchalotu runä xhigabä si'c te ben guedxliuj nani runtiop lajzni, nani tejsi diidx rniini "sia'ä" nägajcza "dina cha'a", ä?

18 Dios guluii lojtu guliica rniä lojtu, dinu guinii tejsi diidx "sia'ä" nägajc "dina cha'a".

19 Xi'n Dios, Jesucrist nani bisule'nu lojtu narä näjza Silvan, näjza Timoteu dini guntio'p lajzni, dini guinii tejsi diidx "sunäni" näj "dina gunäni", niluxh laani guiraa xtiidxni najc "sunäpacni".

20 Si'cza guiraa rediidx ni bia'n Dios loonu xcuent Jesucrist najcreni "sunäpacni"; näjza xcuent laani najcreni "sugacni si'c" par nuurnu, te chä'p xpala'n Dios xcuent nuurnu.

21 Dios cagusudzu'tzza nuure näjza la'tu lo xtidx Jesucrist, agulezani nuurnu te jiennu xtuuuni.

22 Abacuaazani xseenni loonu, ni'cni baniidxni Sprit Dxaan xtenni te cuääzni nen lastoonu.

23 Rbedxä loj Dios gacbeeni xhi yu' lastoä, guliipacni te diruna gutalä xcäl'najtu, ni'c dina niälsacä guedx Corinto.

24 Di r'lajznu guinibeenu xho chalilajztu, alga r'lajznu gacnäänutu lo dzuun te guibaa lajztu; guliipac agusudzu'tztu lo xcäl'r'ililajztu.

## 2

1 Niluxh lagajc xcuent xcäl'nasa'cä benä xhigab dina jiädhuisacä la'tu che cayac-huin lazä.

2 Sa'csi palga narä siädyenä gac-huin lajztu, ¿chuni'c gun guibaa lazä? La'tistu, nani benä gac-huin lajzni.

3 Ni'cni lagajc xcuent ni'c bacuaä lojtu, te che jiälä lojtu, di rebejn gunhuin lazä nani riäj'l guspaa lazä. Luxh nancheä palga narä guibaa lazä, nägajc la'tu sibaaza lajztu.

4 Che bacuaä guijtza lojtu, lacti xhigabduxh benä, binduxhä; xhet te gac-huindi lajztu, alga te gacbeetu yälsanälazduxh ni sanälazä la'tu.

### *Yäl'rusiäj'l lajz ni yu' par nani bejn falt*

5 Palga yu' chu tej ni cayujn cayac-huin lazä, xhet xtebtis lazä cayunhuinni näjza lajztu cayunhuinni guxii diidx guiniä sa'csi di r'lazä guntu xhigabduxh.

6 Alabasacsiduxh xhidajl bejn dade'ga, na'cru gusacsituni naj.

7 Naj col'siäj'l lajztu xcuent xtojlni, col'cuedxni lajzni didi gac-huinduxhetej lajzni.

8 Ni'cni rniabä lojtu, col'chanälajz bejnre si'c ni huinälajztuni galoo.

9 Bacuaxgaäza lojtu te gacbeä laa susoobtu xtidxä.

10 Naj renani jiäj'l lajztu xtojlni, näj narä siäj'l lazäni. Sigajcza narä, nani basiäj'l lazä, palga yu' xhi basiäj'l lazä, benäni xcuent xcäl'nasa'ctu, nez loj Jesucrist,

11 Te di gun beñdxab gaan nuure, sa'csi anajnu xho najc latsiaj ni rujn beñdxab.

### *Guyu' Pabl yärsia' che bidzujñni guedx Troas*

12 Che bidzunä guedx Troas, te gusule'ä xtidx Jesucrist, bejn Dad Jesucrist rutliidi badxojndi narä,

13 Niluxh guyuduxhä yärsia' sa'csi dina nidxälä Tito, bejtznu. Ni'cni basadidxgacäreni, sa'äti nez reguedx Macedonia.

### *Jesucrist rujn riennu gaan*

14 Xquixtios lo Dios nani con Jesucrist racnäy nuurnu te dipacnu gunijt, empac rujntisnu gaan, luxh con nuurnu guiraa nejz ruluilojni xhi saru najc gumbeepac bejn xtidx Dios.

15 Sa'csi najczanu si'c te guxh xten yalnejh xten Jesucrist lo Dios nez loj renani chalilajz xtidx Dios näjza nez loj rebejn nani canijt sa'csi naadireni chalilajzreni xtiidxni.

16 Loj reni di chalilajz xtiidxni, najcnu si'c te guxh ni rugu't, loj renani rililajz xtiidxni, najcnu si'c guxh xten yalnejh ni rudeed yäl'nabañcoob. ¿Chu laa ni racbee sa' recosga?

17 Sa'csi dinu gac si'c najc xhidajl bejn nani rusule' xtidx Dios te gunreni gaan meel. Nuure rusulesa'cnu xtidx Dios sa'csi rinälaazpacnu Jesucrist luxh si'c ni gunibee Dios, si'c rusule'nu, rusule'nu diidx con xcäl'racnäy Jesucrist nez loj Dios ni cahuii xhini'c riennu.

### 3

#### *Diidx nacoob ni basa'n Dios loonu*

1 Che rniinu rediidxga, ¿la rchalotu canisacnu didxsa'c lagajc xcuentnu, ä? Yu'reni ca' guijtz ni rniij najcreni bensa'c. ¿La rlaizatzu guiluüinu lojtu sa' guijtzga, o guiniabnu guntu sa' guijtzga xca'nu, ä?

2 La'tu najc si'c xquijtznu ni rniij xho najcnu. Lastoopacnu acujtu. Guiraa rebejn rajc rhuii xho huililajztu xtidx Dios sa'csi basule'nu xtiidxni lojtu.

3 Huenliisi rluiloj najctu si'c xquijtz Jesucrist, luxh nuurnu bizule'nu xtiidxni lojtu. Xhet con tintdi cuaj rediidxga, xhet lojdiza guij cuaj diidxga, Sprit Dxan xten Dios ni nabajñ bacuaa rextidx Diosga, bacuaanireni lastootu.

4 Nadoncheenu redee, ni'cni xcuent Crist dinu guidxeyb nez loj Dios.

5 Di gacdi jien xtebnu xhitis dzuun ni riennu, riennuni sa'csi laa Dios ni racnäy nuurnu.

6 Laani runiidx yäl'nadaan loonu. Nuurnu najcnu mos xten xtidxcoobni ni bia'nni con nuurnu. Luxh didxcoobga dini gac si'c xleii toMoisés ni bacuaareni lo guij, sa'csi xleiini biädnä dojl, dxejc gujtnu. Niluxh didxcoobga ni rusule'nu biädnä Sprit Dxan xten Diosni, luxh runiidxni yäl'nabañcoob loonu.

7 Leii baluii yu' xtojl bejn, riäjil guetreni. Xhidajl seen guyu' che bacuaa Dios rediidxga lo guij. Luxh di niajcdi nuhuii rexpejn Israel loj Moisés, bidxeybreni sa'csi rdimbicha' lojni, luxh sanuu cayuii yäl'rdimbicha'ga.

8 Palga si'c gujc che biäd leii, aticaxh naj su'ru xcäl'rdimbicha' xleii Sprit Dxan xten Dios, ni najc redidxcoob nani abasule'nu.

9 Palga xleii toMoisés ni baluiloj yäl'gujt xcuent dojl biädnä yäl'rdimbicha', aticaxh naj yu' xcäl'rdimbicha' xtidxcoob Dios ni rudzucaj dojl.

10 Naj dirunu fii xcäl'rdimbicha' xleii toMoisés sa'csi xtidxcoob Dios rdimbicha'ru par tejpas.

11 Palga yäl'rdimbicha' nani biuii bianisesduxhni tera't, stee yäl'rdimbicha're ni najc par tejpas sidimbichasesduxhni.

12 Luxh ni'c runiidx yäl'rbedcxi lajznu, dipacnu guidxeyb che rusule'nu xtidxcoob Dios.

13 Dinu gac si'c toMoisés, ni basäu tla' lajd lojni te di fii rexpejn Israel cayuii yäl'rdimbicha' ni guyu' lojni.

14 Niluxh bicäjy xcäriejreni; lo dxej najli che rie\_l xleii toMoisés, najcni si'cni yu' xhi lajd rusäuu lastoreni, rudxojn gacbeereni, te di chalilajzreni, xtidx Jesucristis rajc rudzucaj lajdgä.

15 Lo dxe najli che roĵreni xleii toMoisés, najcni si'cni ruscäy te lajd xcäriejnreni.

16 Lo xtidx Dios rnii scree: "Niluxh che gusiechlaz te bejn, gudzuréni nez loj Dad, sibicaj lajdgä", nalajznu sacbeeni xtidx Dios.

17 Dad Jesucrist najc Sprit luxh cadro yu' Sprit xten Dios badzucaj Diosni lo xleii toMoisés.

18 Niluxh nuure dinu gusäu lajd lojnu, didi guscäjyni xcäriejnnu. Nuure najcnu si'c te guihuajn cadro rdimbicha' xtuxh Dad Jesucrist, luxh chäi-chäi cadxaanu cayajcnu si'c najcni näjza caca'nu xcälrdimbicha' Jesucrist, sa'csi si'c cayujn Sprit Dxaan xtenni.

## 4

1 Ni'cni sa'csi agule Dios nuure te gusule'nu xtiidxni, sa'csi balaslajzani nuure, dipacnu jäxhan.

2 Ni'cni rbälaznu recos ni rajc xhiga'tz, sa'csi rusanxtujyreni. Dizanu gusguee, dizanu guchaa xtidx Dios, niluxh rniinuni si'cpacni najcni, te si'c ruhuii guiraa bejn rsiaapacnu lo xnezyuj Dios.

3 Niluxh palga yu' chu dipac gacbee rextidx Dios nani rusule'nu, najctisreni rebejn nani ala canitloj par tejpas,

4 sa'csi abascäjy bejdxab ni rnibee guedxliujre xcäriejnreni, si'cni rujnni lo rebejn nani di chalilajz xtidx Jesucrist, te na'c fiireni xcälrdimbicha' xtidx Dios ni rnii xcuent xhanij xten Jesucrist, ni najc xtujxh Dios.

5 Che rusule'nu xtidx Jesucrist, dinu guiliä'p lagajc xpala'nnu, rliä'pnu ganaxtis xpala'n Dad Jesucrist. Nuure najcnu xmostu xcuent Jesucrist.

6 Che benchee Dios guedxliuj, guniini: "Lo xcäy suguirii te bajl ni gusanij." Lagajc Diosga abasanij lastoonu te baniidxni bajl ni najc yälriembee xcälrdimbicha' Dios nez loj Jesucrist.

### *Xho guibanu con yälirilajz*

7 Nuurnu najcnu si'c te guesyuj, xhet sajcdinu, niluxh guidxanu te yälñasacduxh, ni najc xtidx Dios xcuent Jesucrist, te guiluiloj xcälñasac xten xcälrnibee Dios lacuaa xhisi te yälñadipbáz xtennu.

8 Rdeednu trabajw guira nejz, niluxh dinu gunijt yälrunloj. Mase di jieñ xho jiennu, dinu chu yärsia'.

9 Rusacsireni nuure, niluxh di Dios cuälaznu, rguijnreni nuure, dizareni ju't nuure.

10 Cadrotis rionnu rusacsireni nuure si'c basacsireni Jesucrist, te si'c neñ tiejxhnu guluilojzani yälñabansac loj rebengut xten Jesucrist.

11 Cadrotis rionnu rlazreni ju'treni nuure sa'csi rusule'nu xtidx Jesucrist te si'cza neñ tiejxhnu guluilojzani xcälñabajn Jesucrist loj reben guedxliujre.

12 Ni'cni rujn yälgujt dzuun loonu, per yälñabajn cayujn dzuun lojtu.

13 Sa'csi rajpnu lagajc xsprit xten yälirilajzga, sigajc ni caj lo xtidx Dios: "Huillilazä ni'cni basule'ä diidx." Sigajcza nuure, huillilaznu xtidx Dios, ni'cni rusule'nuni.

14 Sa'csi nadonnu lagajc nani baspansac Jesucrist loj rebengut, lagajcza laani gun guibanu con Jesucrist te gunni sunäjnu la'tu nez lojni.

15 Rsiacijnu guiraa ni rsiajcnu te xcuenti la'tu gudeedru bejn xquixtios lo Dios, te guiliä'pruzareni xpala'nni xcuent yälñulasajz ni sanuutis care'ch lo xhidajl bejn.

16 Ni'cni dinu gunijt yälrunloj, per mase tiejxhre acayujxh, guixe-guixee gastioob Dios spritnu.

17 Retrabajw ni cadeednu lo yäl<sub>rd</sub>nabaj<sub>nr</sub>e rdedgajcreni, niluxh rujnreni ga'pnu te yäl<sub>rd</sub>imbichaduxh ni gajdnu guidon, ni najc par tejpas.

18 Dinu fitis renani ruzen lo guedxliujre sa'csi sinitloj reni'c, alga cayenloonu renani di guzen, sa'csi renani di guzen najcreni par tejpas.

## 5

1 Aracbeenu tiejxhnu najc si'c te yu' xten xaimnu lo guedxliujre, sidzujn dxej sinitlojni, nalajznu sejt tiejxhnu, suniidx Dios te tiejxhnu xten xhaguibaa nani di nitloj, nalajznu dini guet par tejpas.

2 Guliicani, la<sub>lni</sub> dxunnu nen tiejxhre, rbedxnen<sub>nu</sub> rdeednu trabajw, ni'cni rrlajznu maläi<sub>i</sub> agojl guidxaa tiejxh guedxliujre te xca'nu te tiexhcoob ni siäd xhaguibaa.

3 Te si'c che acua'nuni, diruni gac si'cni suxhabääl xaimnu, sa'csi abicoob tiexhnu.

4 La<sub>lni</sub> dxunnu nen tiejxhre rbedxnen<sub>nu</sub>, rdeednu trabajw, sa'csi di rlaaznu suxhabääl xaimnu, rrlajznu gacwnu tiexhcoobnu, te tiejxhre nani cayejt, sidebnä<sub>jni</sub> tiexhcoob ni siäd xhaguibaa.

5 Nani benchee nuure parpac dee najc Dios, lagajc nani runiidx Sprit Dxan xtenni loonu si'c te seen sujnpacnini.

6 Ni'cni dinu guidxeeb, sa'csi nadonnu la<sub>lni</sub> nabaj<sub>nu</sub> lo guedxliujre, di gacdi guibaj<sub>nu</sub> xhaguibaa loj Dadga.

7 Sa'csi nabaj<sub>nu</sub> xcuent nani rililajznu, xhet xcuentdi nani rajc rhuinu.

8 Ni'cni rniä nabaj<sub>nu</sub> dinu guidxeeb, rchaloonu hueenru guisa'nu tiejxhnu lo guedxliujnure, te choläznä<sub>nu</sub> Jesucrist xhaguibaa.

9 Ni'cni tejtis najc xhigabnu, palga lo guedxliujre o xhaguibaa, rrlajztisnu jiennu renani gun guibaa lajzni.

10 Sa'csi guiraanu riälj suunu nez loj yagxhiil cadro gun Jesucrist yäl<sub>gux</sub>htis, te tejanu guica'nu xcuent nani biennu lo guedxliuj, palga dzunsa'cni, o palga dzunguijdxni.

### *Diidx xcuent yäl<sub>r</sub>becdxi lajzni*

11 Luxh sa'csi rdxejbnu (nalajznu rucuaadiaagnu xtidx) Dad Jesucrist, ruliidxnu rebejn te chalilajzreni xtiidxni. Luxh Dios najn xho nabaj<sub>nu</sub>; maläi<sub>i</sub> näjza lo xcäriejntu guluuloj xho nabaj<sub>nu</sub>.

12 Dinu guiliä'p lagajc xpala'nu lojtu stehuält, rniinu rediidxga lojtu te guibalajztu xcuentnu, te ga'ptu xhi diidx gusejctu lo rebejn ni rchagla<sub>jztis</sub> ruhu<sub>i</sub> xho rien bejn, direni gacbee xhi yu' nen lastooreni.

13 Palga najcnu si'c bejn ni rajc yejcreni, si'c najcnu par Dios, palga najcnu si'c bejn ni nasa'c xcäriej<sub>nu</sub>, najcnuni par la'tu.

14 Sa'csi sanälazduxh Jesucrist nuure, ni'c rusoobtisnu xtiidxni, sa'csi nancheenu gujt tejtis par guiraanu, ni'c najcni si'cni agujt guiraanu nez loj Dios.

15 Luxh Jesucrist gujt xcuent guiraa rebejn, te renani rililajz xtiidxni, na'cru guibaj<sub>reni</sub> xcuenttis laareni, alga guibaj<sub>npacreni</sub> xcuenttis Jesucrist nani gujt, nani gubansac xcuent laareni.

16 Ni'cni nuure dinu fii lo bejn si'cni najcreni lo guedxliujre. Galoo biembeenu Jesucrist si'cni guj<sub>cni</sub> che gubaj<sub>ni</sub> lo guedxliuj, niluxh naj et si'c<sub>ti</sub> riembeenuni.

17 Ni'cni chutis bejn, palga rililajzni xtidx Jesucrist, sujnnini te ben<sub>coob</sub>, diruni guichagla<sub>jz</sub> gunruni nani rajc lo guedxliuj, alga guichagla<sub>jz</sub>ni gunni xtzun Dios.

18 Guiraa dee siäd lo Dios, nani basiäl<sub>j</sub> lajzni xcuent Jesucrist, dxejcti baniidxni loonu rediidx xcuent xcäl<sub>rusiälj</sub> lajzni te gusule'nu rediidxga,

<sup>19</sup> nalajznu, nanab gusule'nu diidhre: Dios guyunäj Jesucrist, cagusiäjllajzni con reben guedxliuj, te xca'nireni, sa'csi diruni gudzuub xtojł reni ahuililajz xtiidxni lo xcuentreni. Dxejc gule Dios nuure te gusule'nu rediidxpacre lo rebejn.

<sup>20</sup> Ni'cni sio'pnu te guiniinu xtidx Jesucrist, najcni ascanu lagajc Dios canabduxh lojtu che rniabduxhnu lojtu, colgusiäjł lajztu, colyajc tejsi con Dios.

<sup>21</sup> Di Jesucrist niujn nicla tej dojl, niluxh sa'csi sanälajz Dios nuunu, xcuentnu bejn Dios gujc Jesucrist si'c te bendojł che gule'cni guiraa rextojł guedxliuj yejc Jesucrist che cuajni lo cruzj. Si'c gujcni te sajč ga'pnu xcäl'naya, xcäl'nasa'c Dios xcuent Jesucrist.

## 6

<sup>1</sup> Ni'cni rniabnu lojtu, jia'cnu tejsi lo xtzun Dios, na'c cuälaztu xcäl'racnäj Dios; palga guntu si'c, xlia'si cua'tuni.

<sup>2</sup> Sa'csi loj xtidx Dios caj scree:

Dxej nani riäjł gunäni, bacuadiagä xtiidxtu,  
dxej che gubicaj xtojłtu gucnäă la'tu.  
;Coljiejn! Naj najc te tiempsa'c,  
coljiejnza, naj najc dxej ni guibicaj xtojłtu.

<sup>3</sup> Na'c jiennu nicla tej ni gun guidxe'ch lajz bejn, didi guiniireni xhet laadi najc xcäl'rusule'nu.

<sup>4</sup> Niluxh lo guira'ti dzuun ni riennu, guluilojnu lo rebejn najcnu xmos Dios; gacnu nadolajz; jiennu huant che rusacsireni nuure; che rdejndu trabajw; che di jien xho jiennu;

<sup>5</sup> che rguijn'reni nuure; che rusäureni nuure neñ latzguuib; che rdejndu lo bieiduxh; che rdajł xtzunnu; che re'ch bacal yääl; che rucua'nnu;

<sup>6</sup> guluilojza najcnu xmos Dios xcuent xcäl'nabansa'cnu lo Dios; näjza xcäl'nansa'c xtidx Diosnu; näjza yälrajc nadolajz; sa'csi laaca riennu lo sa'nu; näjza sa'csi rbäjz Sprit Dxan xten Dios neñ lastoonu; näjza xcuent yälrinälajzpac bejn;

<sup>7</sup> näjza xcuent didxguliipac; näjza lo xcäl'rnibeduxh Dios; ca'zanu si'c te madxed xcäl'naya Dios, ca'nuni guropnaanu, ladbee, näjza ladbäjgw.

<sup>8</sup> Ruluilojzanu najcnu xmos Dios palga chä'p xpala'nnu, o palgaza jianxtujynu; palga guiniireni didxsa'c xcuentnu, o palgaza guiniyajreni nuunu; palga naareni najcnu beñrusguee, mase najcnu beñ ni rni didxlii.

<sup>9</sup> Palga rut rrajzdi gumbee nuunu, o palga guira'ti bejn numbee nuunu; acayejtnu, niluxh bahuii, anu anabajn; rusaan Dios rguijn'reni nuure, niluxh dinu guet;

<sup>10</sup> najcnu si'c bejn ni yu' xliajs, niluxh rbaalaznu; najcnu si'c bejn ni xhet rajpdi, luxh riennu gapduxh bejn; najcnu si'c bejn ni xhet rajpdi, niluxh rajpnu guiraloj.

<sup>11</sup> Lojtu, beñ Corinto, aguniliinu lojtu guiragajc rediidx ni yu' neñ lastoonu.

<sup>12</sup> Xhetliidi diidxdı bacua'tznu lojtu, niluxh pet cacuatł lajztu diidx ni nanab guiniitu loonu.

<sup>13</sup> Naj narä rulidxä la'tu si'c ruliidx te Dad rexi'nni: ;Colguinii loonu rediidx ni yu' neñ lastootu!

*Najcnu si'c xquidoo Dios ni nabajn*

14 Na'c guchaagtu lo rebejn nani di chalilajz xtidx Dios, sa'csi di gacdi gun-tebloytu dzuun sa'csi tejni rlanjz gun dzunsa'c, steeni rlanjz gunni dzunguijdx, çxho gac sanäj bajl xcäjy, ä?

15 O çxho gac sanäj Jesucrist beñdxab ni laa Satanäs, ä? O çxho gac sanäj te bejn nani rililajz xtidx Dios te bejn ni di chalilajz xtidx Dios, ä?

16 ÇXhixh tebloj najc xquidoo Dios con rebanäjb, ä? Ni nuunu najcnu xquidoo Dios ni nabajñ, lagajc si'cni gunii Dios galoo: Cuäzä neñ lastooreni, sisiañääzareni.

Narä sacä Xtiosreni, laareni sajcreni rexpensä.

17 Ni'cni colrui galäiireni, colguibicaj lojreni, te laad colcuääz, si'c naj Dios: Te gac xca'ätu, na'c fałtu recosdxuudx.

18 Dxejc la'tu sajctu rexinganä, rexindxa'pä, luxh narä gacä xtadtu, si'c naj Gueb Dios ni rajp guiralii yälñibee.

## 7

1 Ni'cni, la'tu ni sanälazä, sa'csi abia'n Dios diidxre loonu, do'o guisia xcäriejnnu, lastoonu näjza tiejxhnu, do'o cuäcaj guiraa rexhigabguijdx, guiraa redojl, te gac sanu lo rexnezyudxan Dios con xcälrdxejb Dios.

### *Xho basiejch lajz reben Corinto*

2 ¡Colchanälajz nuunu neñ lastootu! Xhet baxhiajdi biennu lojtu. Rut baxhiñdinu. Rutza basguedinu.

3 Dina guiniä rediidxre te cue'cä xquejtu; ni aguniä lojtu galooli, la'tu yu'tu neñ lastoonu palga tejsi guetnu, o palga tejsi guibajñrunu.

4 La'tu nadip lazä, rñiduxhä didxsa'c xcuenttu lo bejn, rbedxi lastoä, rbalazduxhä loj guiraa retrabajw ni cadeednu.

5 Ni'cni che guyu'nu reguedx Macedonia, di niajcdi nusilajznu sa'csi guiralajc cadejdnu trabajw, xcuent yälrdijl ni guyu' guideb gabinu, xcuentza yälrdxejb ni guyu' lastoonu.

6 Niluxh Dios ni racnäjb rebejn ni rac-huin lajzreni, gucnäjb nuure, sa'csi che bidzujñ Tito guredxi lastoä.

7 Luxh xhet sa'csi bidzujñtis Tito, näjza sa'csi gulecdxitu lastoo Tito, näjza sa'csi biädnäni diidx xho yu'tu, xho rlanjztu fiitu narä, xho yu' xliajz lastootu xcuent xtojltu, xho rlazduxhtu guntu si'cni guniä lojtu, ni'cni bibalasdughäru.

8 Acananä guc-huin lajztu che biltu guijtz ni bacuaä lojtu, niluxh di lazä niac-huin mase che baxhaläni guc-huin lazä, sa'csi naj nanä mase bejn guijtzga guc-huin lajztu, xhet xchejdi guc-huin lajztu.

9 Niluxh naj rbalazä, et sa'csi guc-huindi lajztu, alga sa'csi guc-huin lajztu te basiejch lajztu xcuent xtojltu, sa'csi guc-huin lajztu si'cni rlanjz Dios, te di yu' xhi gunijttu xcuent nuunu.

10 Sa'csi yälrac-huin ni ruxhal Dios loonu rujñ rusiejch lajznu, te rusläa Dios nuurnu lo dojl ni'cni rbaalazä che bejn ni si'c. Niluxh yälrac-huin xten guedxliuj dini gun gusiejch lajz rebejn rextojlreni, alga rujñni nitloj bejn tejpas.

11 La'tu bejntu huant xliajz ni baxhal Dios si'cni rchaglajz Dios gac. Naj ¡colhuii gan! ¡Lacti xhi cossa'c bejn ni par la'tu! Bejn ni bahuisa'c pactu xhini'c gujc, te gac gusulegajctu xcuentni; dxejc bejn ni bidxe'chtu, näjza bejn ni bidxejbtu, ni'cni basaantu dojlga, dxejct bejn ni rlanjzpcactu nuhuiitu loä, bejnzani guyu'tu yärsia' xcuentä, bejnzani rlanjztu guntu yälguxhtis bejn nani bejn dojlga. Guiraa redee baluiloj et la'ditu bejn dojl.



<sup>12</sup> Ni'cni, che bacuaä guijtzga, dina nucuaäni loj bejn ni bejn dojlga, niluxh bacuaä guijtzga lojtu te guiluiloj xcälrsia'tu ni rajptu xcuent narä nez loj Dios.

<sup>13</sup> Ni'cni aguredxi xcäriejnnu.

Naj aguredxi xcärienä, bibalazduxhäru xcuent xcälrbalajz Tito, sa'csi bi-coob, bisilajz xpritni xcuent guiraatu.

<sup>14</sup> Sa'csi palga yu' xhi didxsa'c ni räpä lojni xcuenttu, ditu nusanxtujy narä nez lojni. Niluxh sigajcni guniinu ganax didxguli, sigajcza najc guiraa redidxsa'c xcuenttu ni guniä loj Tito, guliipacni.

<sup>15</sup> Ni'cni maazru sanälajzni la'tu, che rnaj lajzni xho basoobtu diidx, xho bejntu cua'tuni che bidzujnnu, racsejslitu cadxejbtu.

<sup>16</sup> Naj rbaalazä sa'csi loj guira'ti la'tu nadip lazä.

## 8

### *Saru rudeedreni meel*

<sup>1</sup> Naj bejtznu, rlajznu guniinu lojtu xho badeed Dios xcälrulaslajzni lo reben Macedonia ni huililajz xtidx Dios.

<sup>2</sup> Mase gudedduxhreni trabajw, bibalajzreni, mase xhetliidi gojpreni, badeedreni meel si'c te bejn ni rajp.

<sup>3</sup> Narä caniliä lojtu, badeedreni xmeelreni si'cni gojpreni, luxh badeedreni loj ni naa bejn sajz gudeedreni.

<sup>4</sup> Gunabduxhareni loonu guisaannu gudeedreni xmeelreni te gacnäjreni rexpen Dios.

<sup>5</sup> Niluxh direni niujn si'cni biennu xhigab gunreni. Ganiddoo badeedreni lagajc laareni loj Dad Jesucrist, näjza loonu si'cni rnibee Dios gac.

<sup>6</sup> Sa'csi batie' rexpen Macedonia meel, ni'c naj räpä loj Tito chanuupacni gutie'ni meel lojtu si'cni gunii Tito lojtu galoo.

<sup>7</sup> Rujntu xhidajl dzunsa'c. Rililazsa'ctu xtidx Dios; rnisa'ctu xtidx Dios; rajptu yäl'najn; rchagljajzpacktu guntu dzuun; rinälajztu nuunu, ni'cni na'c gusaantu tedcaj gunzatu dzunsa'cre, nalajznu, gudeedtu meel.

<sup>8</sup> Dina guiniä lojtu colyujnpackni; narä rlazätis gacheetu xho rbaalajz reni ruedeed meel te gululoj don la guli sanälajzpaczatu rexpejn Dios.

<sup>9</sup> Sa'csi la'tu anumbecheetu rulaslajz Dad Jesucrist, te mase najcni ri'cw, rajpni guiraa xhixten Dios, xcuentu gujcnä si'c te bejn ni xhet rajpdi, te xcuentni ga'ptu guiraa rexhixten Dios xhaguibaa.

<sup>10</sup> Narä siniä lojtu xhi xhigab runä, par lagajc xcäl'nasa'ctu. Gudebijzli ganiid la'tu guslojtu bejntu dzunsa'cre, luxh rbaali lajztu rlajzpacktu guntuni.

<sup>11</sup> Naj colchanuu, colguluux dzuunga si'cni guslojtu cayujntuni. Naj te luux dzuunga colgudeed si'cni rajptu.

<sup>12</sup> Sa'csi palga rlajzduxh te bejn gudeed lo Dios, laaca najc gudeedni si'ctis ni rajppacni. Di Dios guiniab gudeed bejn nani dini ga'p.

<sup>13</sup> Dina guiniä gudeedtejtu te tedtu trabajw te gapduxh stee bejn, alga te gacteblojstistu.

<sup>14</sup> Nani rajprulu naj ni'c colgudeed te gusalojtu ni cayäädxreni, te stee dxej nani rajpreni laareni sajz suniidxzarenä te gusalojreni nani cayäädxtu te si'c gacni tebloj.

<sup>15</sup> Sa'csi lo xtidx Dios caj scree: "Te bejn nani batopduxh yäl'nasa'c, xhet bia'ndiru, dxejcti nani guxii batojp yäl'nasa'c, xhet biäädxdäi."

### *Tito näjza rexcompanieerni*

<sup>16</sup> Xquixtios lo Dios nani rudeed lo Tito lagajc yärsia' ni rapä narä par la'tu.

<sup>17</sup> Sa'csi cuäjbnı gunni nani gunabä lojni gunni. Luxh sa'csi rlazduxhpacni gunni xtzuun Dios, naj lagajc laani bejnıi xhıgab jıädhuiini lojtu te luux dzuunre.

<sup>18</sup> Caguxhalnu xtee bejtznu chanä Tito. Guiraa rebejnı guidoo rnii didxsa'c hueen xcuent bejnre sa'csi laaca rusule'ni xtıdx Dios.

<sup>19</sup> Ni'ctis aguleza rebejnı guidooni te chunäjni narä te gacnäjni narä lo xtzuun Dios nani cayennu te guiliä'pni xpala'n Gueb Dad Jesucrist, te guluillo-ja lacti rıajzpacni jiennu xtzuunni.

<sup>20</sup> Ni'cni rıazä jıapdaduxhnu te di chu tej ni guiniyaj nuure xcuent melrore ni chosa'nnu lo rexpejnı Dios.

<sup>21</sup> Sa'csi narä riuduxhä runä nani najc laaca, et ganax nez lojdi Jesucrist, näjza loj rebejnı.

<sup>22</sup> Con guiro'p redee, caguxhalzanu stee bejtznu, nani agujc balti huält bihuiinu xho rujnni, te bahuiipacnu rıajzpacni gınsa'cni xhidajl dzuun, luxh naj rıajzruni gınsa'cni redzuunga sa'csi nadıp lajzıi la'tu.

<sup>23</sup> Palga yu' chu guiniabdiıdx xcuent Tito, colyejtz lojni laani najc nani cayunnäj narä dzuun lojtu. Dxejcti xcuent stio'p bejtznu, laareni najcreni xquixhajg reguidoo, rliä'pzareni xpala'n Jesucrist.

<sup>24</sup> Ni'c na'c guidxejbtu che yu'tu lo rebejnı reguidoo guluiipactu loj rebejnıga xho sanälajztu, näjza redzuun ni rujntu ni'c rniinu ganax didxsa'c xcuenttu.

## 9

### *Meel par rebejtznu*

<sup>1</sup> Ni'cni dina gıcuääru lojtu xcuent dzuunre, nalajznu, yälracnäj rexpejnı Dios,

<sup>2</sup> sa'csi anancheä rıajzpacıu guntuni, luxh xcuentpac ni'c agulä'pä xpala'ntu loj rebejnı Macedonia, räpä lojreni la'tu, rebejnı Acaya, gudebijzli batie'tu meel, luxh sa'csi bejntu si'c, xhidajlza rebejnı Macedonia biniib te badeedzareni meel.

<sup>3</sup> Ni'cni abaxhalä rebejtznu lojtu, te di xlia'si gulä'pä xpala'ntu xcuent dzuunre, te acabäjzlıtu gudeedtu xmeeltu, sigajc ni agunıxgää lojtu.

<sup>4</sup> Dıdi che jıädnää rebejnı Macedonia jıophuiinu la'tu, xhet rajpdıtu, dxejı jıanxtuyä narä, näjza la'tu.

<sup>5</sup> Ni'cni benä xhıgab, nanabpac jıädıxgaa rebejtznu, jıädhuiireni la'tu, te fiireni don xho gac xcuent meelro ni galooli bia'n diıdx gudeedtu, te abatiexgaatu nani gısalajztu sa'csi rıajzpacıu gudeedıni, xhet sa'csi rniinu riäjıpac gudeedıni.

<sup>6</sup> Rniliä lojtu, nani gıxii rbe'c, gıxiiıza yälıasa'c guiliäıni, niluxh nani rbe'c xhidajl binij, xhidajlza yälıasa'c guiliäıni.

<sup>7</sup> Tejgatu colhuii don lacti sajc gudeedni, dxejı si'c sugudeedni si'cti ni rıajzıni, na'c gun tiopdı lajzıni, etza sa'csi riäjıpac gudeedıni, sa'csi Dios sanälajz bejnı ni rbaalı lajzıni rudeedni meel lojni.

<sup>8</sup> Luxh Dios sajc gıniıdxru xcälracnäjıni lojlu, te si'c guıxe-guıxee sajplu xhidajl gıraloj rexhıxtenu, te ga'plu xhıtis ni rquıınu loj gııra'tı xtzınsa'clı.

<sup>9</sup> Sa'csi lo xtıdx Dios caj scree:

Abadeduxhni loj rebejnı ni xhet rajpdı luxh redzınsa'c ni rujnni, najcreni par tejpas.

<sup>10</sup> Dios nani rudeed binij ni rbe'c nani rujn dzuun lonıaa, laani suniıdxzani yätxtıil te gııdaunu, lagajc Diosga suniıdx, sutajlza binij cue'ctı, lagajc laani sustıoobnıni te gacduxh yälıasa'c xten xtzınsa'cıtı.

11 Te si'c ga'ptu lacti yäl'nasa'c te gac gudeedzatu xhiroob. Luxh xcuent xtzuunnu, meel ni ruxhal'tu loj rexpejn Dios sujn gudedduxhrene xquixtios lo Dios.

12 Sa'csi che racnäjtu rebejtzu, dinu guideed ganaxtis ni rquii'reni, rujn-zanu rudeedru'reni xquixtios lo Dios.

13 Che racnäjtu sa'tu si'c, ruluilojtu lacti rusoo'btu xtidx Dios si'cni ahuililajz-tuni, ni'cni siliä'preni xpala'n Dios xcuent xcäl'racnäjtu, nalajznu xcuent meel ni badeedtu loj'reni, näjza loj guiraareni.

14 Dxejcti laareni sibedx-siniabzareni lo Dios xcuenttu, sinälazduxhrene la'tu sa'csi runidxduxh Dios xcäl'racnäjni lojtu.

15 xQuixtiosti Dios sa'csi baniidxni yäl'nasa'cduxh'tej loonu!

## 10

### *Yäl'rnibee ni rajp Pabl sa'csi najcni apost*

1 Lagajc narä, Pabl, rniabduxhä lojtu, con guiraa didxdoo, guiraa didxsa'c xten Crist, (narä ni nac beñnadolajz che biälä lojtu, niluxh che suga'a zijt lojtu, dxejc nacä beñnialajz).

2 Narä canabä lojtu, colguiba'nsa'c te che jiädhuiä lojtu, dina gacä nialajz dizana guiniä redidxnaj ni abenä xhigab guiniä loj gaii bejn nani rnii nabanä si'c te beñguedxliuj.

3 Guliicani najcnu beñguedxliuj, niluxh dinu gucuanäj sa'nu guiib nani rca' beñ guedxliuj che rcuaareni.

4 Sa'csi reguiib ni rca'nu te guidi'sa'nu direni gac sa' guiib ni rca' beñ guedxliuj. Nuunu rucuaanu con xcäl'rnibee Dios te riennu gaan loj guiraa rexäl'rnibee guedxliuj're.

5 Ni'cni cagutzuj'nu guiraa rexhigabguijdx'reni, näjza nani rchaloreni najc xhigabro nani rlajz'reni guiniyaj'reni yäl'rumbee Dios, luxh caca'nu guiralii rexhigabnu cagutednureni ladz'naa Jesucrist te gusoobnu rextidx Jesucrist.

6 Cabäätz'isnu te gunnu yäl'guxhtis loj chutis bejn ni dini gusoob xtidx Dios, che abasoob guiragajctu xtidx Dios.

7 La'tu cahuiitu redzuun ni rien. Palga yu' chu tejtü ni rchaloni najcni xpejn Crist, sugunsa'cni xhigab, fiini xho najc lastooni, dxejcti sugacheep-acni sigajcni ahuililajz'ni xtidx Jesucrist, sigajcza nuure ahuililajz'zanuni.

8 Sa'csi mase guiliä'päru xpala'nä xcuent yäl'rnibee ni rapä, ni baniidx Dios te gustiobä xcäl'rililajz'tu, et te guxhi'nädi la'tu, nicla si'c dina guituiä.

9 Dina rlazä guchalotu rlazä guchebä la'tu con rexquitzä.

10 Sa'csi rniireni: "Lo rexquijtzi caj didxnagajn, didxnialajz, niluxh che suga'ni laapacni, xheti xcäl'siudzu'tz'ni, luxh xho rniaj diidx ni rniini."

11 Luxh ni rii si'c, sugacheepacni dee: si'cni najcnu con rextiidxnu che rucuaanu lojtu che yu'nu zijt, sigajcza najcnu che suganäjpacnu la'tu.

12 Dinu gun xhigab najcnu tebloj loj rebejn ni runnaro lagajc laareni. Niluxh reni'c rchaloreni si'c sa'csi ruhuiireni xho najcreni cuä' stee lagajc sa'reni. Che rujn'reni si'c, nayääl xcäriejn'reni.

13 Nuure dinu gunnarotej lagajc nuurnu, niluxh riennu si'cni nungäj'l jiennu, xcuent yäl'rnibee ni baniidx Dios loonu te jiennu dzuun cadro yu'litu.

14 Ni'cni dinu nidedcaj xcäl'rnibeenu che bio'pnu lojtu, sa'csi baniidx Dios yäl'rnibee loonu ganidddo nuunu gusule'nu xtidx Jesucrist lojtu.

15 Dinu niennaro lagajc nuurnu xcuent xtzuun ste'ca bejn, ascanu lagajc nuunu biennuni. Cabääznu tioobru xcäl'rililajz'tu, te gac jienrünü dzuun lojtu, si'ctis gal' jiennuni.

<sup>16</sup> Te gacza gusule'nu xtidx Jesucrist ste'ca lajt ni ria'n zijtru lo guejdx cadro yu'tu, na'cza gunnaronu lagajc nuunu xcuent dzuun ni bejn ste'ca bejn.

<sup>17</sup> Sa'csi nani rrlajz gacnaro, suguilä'pni xpala'n Dad Jesucrist.

<sup>18</sup> Sa'csi et nani rliä'p lagajc xpala'ndini ni ria'n hueen nez loj Dios, niluxh bejn ni rliä'p Jesucrist xpala'nni, ni'cni rbalaznäj Dios.

## 11

### *Pabl näjza rebejn ni rniisi najcreni apost*

<sup>1</sup> Maläii chanunäsijctu narä laļ ni guiniä gäii didxnayäle', niluxh asanunäjtu narä.

<sup>2</sup> Randzu'ä la'tu con yälrandzu' ni baniidx Dios, sa'csi abia'n diidx gutedä la'tu ladznäa Jesucrist te xca'ni la'tu. Rlazä gactu bejnaya chäätu lojni, si'c te dxa'p che ruchñaani te bi'n, rut bahualdini.

<sup>3</sup> Niluxh rdxebä didi gusguee beñdxab la'tu si'c ni basguee bäl Eva con xcälñadxällajzni. Didi gunni guichaa xhigabtu, guibicajtu lo xtidx Jesucrist luxh naj laaca rajnpactu Jesucrist, guideb lastootu.

<sup>4</sup> Sa'csi la'tu cagutipduxh lajztu che riädni ste'ca bejn lojtu xtidx stee Jesús nani digac nani bisule'nu lojtu; o che naareni xca'tu stee sprit ni digac nani acua'tu; o che naareni chalilajztu ste'ca diidx nani najc garenca lo xtidx Dios ni ahuililajztu.

<sup>5</sup> Narä runä xhigab dina gacä bejn ni guxiiru sajz loj guiraa reapost.

<sup>6</sup> Mase di gacdi guinisa'cä, xhet yälñajndiza cayädxä; niluxh ni'c huenliisi rluijoj guiraa rediidx ni abaluiä lojtu, guiraa redzuun ni abenä ro'c.

<sup>7</sup> O ¼la benä te doļ guyu'ä lojtu si'c te beñ nadolajz, te gactu beñroru, sa'csi xhetliidi cua'ädi xcuent ni basule'ä xtidx Dios lojtu?

<sup>8</sup> Cua'ä meel ni baniidx garenca guidoo loä che guyu'ä lojtu, te benä xtzun Dios lojtu.

<sup>9</sup> Che guyu'ä lojtu guyu' xhi biquinä, niluxh xhet cua'ädi lojtu, dina nutalä xtzuntu. Sa'csi che biääd rebejtznu ni siääd Macedonia, baniidxreni guiraa ni biquinä. Loj guiraa redee dina nutalä xtzuntu, luxh si'c sinuu gunä.

<sup>10</sup> Guideb didxlii xten Jesucrist ni yu' nen lastoä, rniliä rut sajcdi gudzucaj xcuent xho yuä lojtu, ni'cni care'ch didxroga lo guiraa reguedx Acaya.

<sup>11</sup> ¼Xhicuent rniä si'c? ¼Laa sa'csi dina chanälazä la'tu, ä? ¼Xho gacni si'c! ¼Dios anajn lacti sanälazä la'tu!

<sup>12</sup> Niluxh nani rungacä, lagajc ni'c sinuu gunä, te gudxonä renani rrlajz gacnaro, renani rrlajz naa rebejn najcreni si'cpac najcnu, niluxh direni gac.

<sup>13</sup> Direni gac apost, laareni rusgueereni, rujnsireni si'c ni najcreni apost xten Jesucrist, luxh rut najcdireni.

<sup>14</sup> Luxh xho dini gac si'c, ni lagajc beñdxab ni laa Satanäs ruluiloj si'c te xangl Dios ni rdimbicha' te rusgueeni bejn.

<sup>15</sup> Ni'cni na'c guidxelojtu palga näjza rexmos beñdxab riääd, rujnsireni si'c bejn ni rujn dzunsa'c, niluxh sinitlojreni par tejpas xcuent ni rujnreni.

### *Rdejd Pabl trabajw sa'csi najcni te apost*

<sup>16</sup> Rnisacä lojtu, na'c guntu xhigab yecä cayajc, niluxh palga si'c rujntu xhigab, colgusaanza guiniä si'c te ni rajc vejcnj te guniäza didxro lagajc xcutä.

<sup>17</sup> Diidx ni rniä dina guiniäni xcuent xcälñmibee Dios, alga rniäni si'c te ni rajc vejcnj, lala redidxro ni rniä xcuent lagajc narä.

<sup>18</sup> Sa'csi lacti bejn yu' ni rniä didxro xcuent redzuun ni rujnreni lo guedxli-ujre, sigajcza siniä didxro xcuent lagajc narä.

19 Ni la'tu, sa'csi nasin<sub>du</sub>xhtu, sanunäjtu rebejn ni rajc yejcreni.

20 La'tu sanunäjtu chutis ni rnibee lojtu si'c te lam, o rusguee la'tu te rbajnereni xhi xtentu, o rujnni runxlia'tu xtzuunni o rliä'preni lagajc xpala'reni, o rga'preni lojtu.

21 Mase rtuiyā guniāni, dipac niajcdi niniā diidx lojtu te niacā si'c najc rebejnga. Niluxh loj xhitis nani runnaroreni, (canisicā si'c te beṅṅayāäl) narā sajcru gunnarōä.

22 ¿La najcreni xpejn hebreos? Sigajcza narā. ¿La najcreni xpejn Israel? Sigajcza narā. ¿La najcreni xajg toAbram? Sigajcza narā.

23 ¿La najcreni xmos Jesucrist? Narā nacāruni lojreni. Naj rniā si'c te bejn ni rajc yejci. Abenāru dzuun lojreni, agudijnrurenī narā loj ni gudijnreni laareni, abasāurureni narā neṅ latzguuib, nicla gac guigab bal huält gudijnreni narā; baltiza huält ameer nietä.

24 Gaii huält gudijn rexpejn Israel narā, tejga huält batiājlneni duguijd detzā galbitzubigaa huält.

25 Chon huält bahuajcwreni narā garo't; stee huält bacuaareni guij yecā; chon huält biāāz barcw cadro sa'ā loj nisdoo; teb dxej, teb yāäl guyu'ā lo nisdoo.

26 Huaduxhā biaj, lacti bixun riesgw xcuentā lo gueuu, xcuent regubaan, xcuent rebenlaxā, xcuentza rebenzijt. Bixunza riesgw neṅ reguedxro, nājza nez lo reyubijdz, nājza lo nisdoo, nājza xcuent rebejn ni rusguee, rniisireni najcreni bejtznu lo xtidx Jesucrist.

27 Abenduxhā dzuun, agudedduxhā trabajw, balti yāäl dina niesā, balti huält gulanā, biolā, balti huält xheti xhi niauā; agudedāza yālnalduxh; guyu' huält xhetiza xhabā.

28 Luxh xhet loj redeetis rdedā trabajw; guixe-guixee di lastoā cuedxi xcuent yārsia' ni ru'ā xcuent rebejn guidoo ni huililajz xtidx Dios.

29 Che rdxajg tejtu, nājza narā rdxagā. Palga tejtu riajb lo dojl, narā ruduxhā yārsia' xcuentni.

30 Palga nanab gunnarōä lagajc narā, sunāni xcuent rediidx nani ruluiloj xcālrdxagā.

31 Dios ni najc Xtd Jesucrist, nani riājln guiliä'p xpala'nni par tejpas, ananchee dina gusgueä la'tu.

32 Che guyu'ā guedx Damasco, gubernadoor nani guyu' ro'c, najcni xpejn reii Aretas, gunibee gojp rexcuxhtisni guejdxga te niniaazreni narā te nisāureni narā neṅ latzguuib.

33 Niluxh basiājtneni narā neṅ te dximro nez ro' te padeer ni rdejd gabi guejdxga, te si'c gulāä ladzṅaareni.

## 12

### *Dios baluüiloj lo bacal*

1 Mase riājln guiniāni, xhet gunādi gaan guiniā didxro lagajc xcuentā ni'cni rlazā chanuu diidx, guiniā xcuent rebacal nājza xcuent nani baluüiloj Dios loä.

2 Numbeä te niguii ni ahuililajz xtidx Jesucrist. Gutzudaj ijz huijni guibaa ni riojnga, dina ganā laa guideb tiejxhni huijni, o la ganax xspritni huij, Diostis najn.

3 Diostis najn la guideb tiejxhni, o ganax xpritni, niluxh nanā xho huij niguiiga,

4 gulās Diosni cadro yu'pac Dios, luxh ro'c biejn diajgni didx-xhiga'tz, didxroduxhtej, nani di gacdi guinii beṅ guedxliuj.

<sup>5</sup> Xcuent sa' niguiiga sajc guiniä didxro, didxsa'c, niluxh xcuent lagajc narä, di gacdi guiniäni; siniätis diidx ni ruluiloj xcälrdxagä.

<sup>6</sup> Mase rlazä guiniä didxro, didxsa'c xcuent lagajc narä, dini gac didx-nayääl, sa'csi guliicazani. Niluxh dina guiniäni te di guntu xhigab nacä beñroru loj ni rhuiitu runä o nani riejn diajgtu rniä.

<sup>7</sup> Baluiloj Dios xhidalduxh cosroduxh loä, niluxh te na'c gacä beñnaro, basaan Dios gusloj guyuguijdx tiexhä, si'c te guejch huääz tiexhä, ni baxhal beñdxab xten Satanäs te gusacsini narä te di gacä te beñnaro.

<sup>8</sup> Choñ huält agunabä lo Jesucrist xcuent ni'c, te guibicajni.

<sup>9</sup> Niluxh laani najni loä: "Yälracnäj ni gunidxä salduxh luj, sa'csi ruzensa'cru xcälmilagwrä che xheti yälrutiplajz te bejn." Ni'cni hueenru guiniä didxro sa'csi xhet yälrutiplazädi rapä, te guzeñ xcälrmibee Jesucrist lastoä.

<sup>10</sup> Ni'cni rbedxilazä xheti xcälrutiplazä, rbedxizalazä rniyajreni narä, näjza che caquinä guiraloj, näjza che rdedä trabajw xcuent Jesucrist, sa'csi che xheti xcälrutiplazä, dxejc runidx Dios yälñadip, yälñadaan loä.

### *Yu' Pablyärsia' xcuent guidoo ni yu' Corinto*

<sup>11</sup> Agucä si'c te beñnayääl, lagajc la'tu bejntu nacä si'c. La'tu riäjł niniitu didxro, didxsa'c xcuentä, sa'csi gajdpac biädxädi, nadxagä loj reapost ni sajcru mase rut nacädi.

<sup>12</sup> Redzuun ni benä lał ni guyu'ä lojtu, benäni si'c te ni najcpac apost, huinuutis benäni guideb nadolajz näjza reseen, näjza remilagwr.

<sup>13</sup> ¿Xhi benä lojtu te naatu runä xhigab guxiiru sajctu loj guiraa reguidoo? Nani benätis najc dee: dina nutalä xtzuuuntu, nalajznu dina niniabä niacnäjtu narä si'c guncnäj narä reguidoo ni yu' garenca lajt. ¡Colsiäjł lajztu narä dojlre!

<sup>14</sup> Naj cayunä xhigab jiädhuiätu, naj gacni choñ huält siälä. Di quilä xhixtentu, alga lagajc la'tu rguilä. Di rlazä gutalä xtzuuuntu. Di riäjł cuchee rebiuux meel par xcuzajñreni. Reguzajn ni riäjł cuchee meel par rexiñreni.

<sup>15</sup> Xhet najcdi gunitä guiraa nani rapä, näjza lagajc narä sujiuxä, te laa xaimtu lo dojl. Palga chanälazäru la'tu, ¿la guxiiru chanälajztu narä, ä?

<sup>16</sup> Niluxh mase si'c najcni, di narä nutalä xtzuuuntu. Empac yu'reni canii bagueä la'tu sa'csi nadxällazä.

<sup>17</sup> ¿Xhixh naatu cua'ä xhi xtentu sa'csi baxhalä rebejtznu lojtu, ä?

<sup>18</sup> Che baxhalä Tito, räpä lojni chanääni stee bejtznu te jiädhuiireni la'tu. ¿Xhixh cua'ni xhi xtentu, ä? Xhixh et tejsi xhigab biennu, tebloj biennu dzuun guiro'pnu che guyu'nu lojtu.

<sup>19</sup> Lałni cayoltu guiraa rediidxre, cayujntu xhigab canabnu jiäjł lajztu, niluxh xhet si'cdini. Caniinu rediidxre nez loj Dios, caniizanu con xcälracnäj Jesucrist te si'c tioobrutu lo xtidx Dios, rebetzä nani rinälazä.

<sup>20</sup> Sa'csi rdxebä andi che jiädhuiätu fiä ditu gac si'cni rlazä gactu, dxejctiru la'tu suhuiizatu dizana gacä si'cni rrlajztu gacä. Rdxebä andi yu'tu ni cadijl, ni ruguij lajzni xhixten sa'ni, ni cadxe'ch lo sa'ni, ni cala' lo sa'ni, ni caniyaj sa'ni, ni cagutajł diidx lo sa'ni; ni cayunnaro lagajc laani, ni cayujnza bieje.

<sup>21</sup> Rdxebä andi che jiädhuiätu stehuält, gusanxtujy Dios narä xcuenttu. Rdxebäza sonduxhä xcuent xhidajltu nani abanijt, bejntu dojl galoo, luxh gajdtu gusiechljaztu xcuent xtojłtu. Yu'tu ni di guibanñaya, resnäjtu bejn ni di gac chäältu, yu'za balti dojl rujntu.

<sup>1</sup> Naj gac chon huält siädhuiä la'tu. Guira'ti quej nanab cue'creni con xtidx tio'p o chon bejn ni najnpac xhi dojl bejn tejjani.

<sup>2</sup> Mase ruti narä ro'c, arnixgaä lojtu lagajc diidx ni guniä che guyu'ä lojtu ni barojp biälä lojtu, luxh rniä loj renani abejn dojl, näjza loj guiraatu, palga jialsacä, diruna gulaslazätu nicla tejtu,

<sup>3</sup> sa'csi rlanjtu fiipactu la guliï runiidx Jesucrist yälrbnee loä te guiniä xtiidxni. Luxh Jesucrist dini guisisni xcuenttu, niluxh laani rustioobruni xtiidxni neñ lastootu.

<sup>4</sup> Guliicani che cuajni lo cruzj, gucni si'c te bejn nani casis, niluxh naj nabajni sa'csi rapduxhni xcälrbnee Dios. Näjza nuure rsia'cnu si'c te bejn nani casisnäj laani niluxh nabañnäjnu laani xcuent xcälrbnee Dios ni baniidxza Dios xcuenttu.

<sup>5</sup> Colninäj lastootu lagajc la'tu, colhuii la guliipac ahuililajztu xtidx Dios; colhuisa'c xho najc lastootu. ¿La ditu gacbee rbäjz Jesucrist neñ lastootu, ä? Palga rutini, rusqueetu lastootu, ditu nililajztu xtidx Dios.

<sup>6</sup> Narä rlazä gacbeetu, dinu nusguee lastoonu, ahuililajzpacnu xtidx Dios.

<sup>7</sup> Rniabä loj Dios na'c guntu cosguijdx, xhet te guiniidi bejn didxsa'c xcuentnu, alga te la'tu guntu recossa'c, mase guiniireni et laadi cayunä narä.

<sup>8</sup> Sa'csi xhetliidi rajcdi riennu te nitloj didxguliï, xcälrbneenu najc te gusule'nu didxlii.

<sup>9</sup> Ni'cni rbaa lajznu che casisnu, niluxh la'tu nadip, nadaantu; rbejdx-rniabzanu lo Dios guiza' xcälrililajztu lo xtidx Dios.

<sup>10</sup> Rucuaä reguijtzre lojtu che gajdna jialä, te che jialä na'c tilnäätu si'cpacni nungäjil tilnäätu xcuent yälrbnee ni baniidx Dad Jesucrist loä, te gac tioobrutu lo xtidx Dios, xhet te nitditu.

<sup>11</sup> Ni'cni rbejtznu, colguibalajz, colhuii guisa' xcälrililajztu, colcuedcxi lajztu, colyennäj sa'tu tejsi xhigab, dxitis gubajñ. Dios xten yälrinälajz näjza yälrbcedxi lajz chunäj la'tu.

<sup>12</sup> Colnii: "Xchan" lo resa'tu.

<sup>13</sup> Guiraa rebejtznu nani ahuililajz ruxhal xtiixtios lojtu.

<sup>14</sup> Yälracnäj xten Dad Jesucrist, näjza yälrinälajz xten Dios, näjza yälracnäj xten Sprit Dxan chu neñ lastootu. Sugacni si'c.

## Te Guijtz Lo Reben Gálatas

### *Pabl rucuaa guijtz loj reben guidoo nez región Galacia*

<sup>1</sup> Narä, Pabl, nacä apost xten Jesucrist. Xhet rebejndi baxhal narä, xhetza bejndi gule narä. Lagajc Jesucrist näjza Xtradni Dios ni yu' xhaguibaa, nani guläs Jesucrist loj rebengut, laareni agulereni narä.

<sup>2</sup> Narä, näjza guiraa resa'nu nani yunäj narä, rucuaanu guijtzre lo reben guidoo ni yu' nez reguedx Galacia.

<sup>3</sup> Xca' guejbtu xcälracnäj Dios con xcälrbedxilajz xten Dios xtradnu näjza xten Dad Jesucrist.

<sup>4</sup> Lagajc laani cuäjbn gujtni te guslaani nuure lo dojl xten guedxliuj gujdxre, si'cni gunibee Xtradnu, Gueb-Dios.

<sup>5</sup> Chä'p xpala'n Dios par tejpas. Sugacni si'c.

### *Xhetdi xhi stee didxcoob ni sajc guslaa nuure*

<sup>6</sup> Rdxeloduxhä lacti riojb cabälaztu Dios ni gurejdx la'tu con xcälrinälajz Crist, luxh naj cagusoobtu ste'ca diidx.

<sup>7</sup> Xhetdi stee diidx ni sajc guslaa nuure lo dojl. Yu'reni rlajz gusiejchreni lajztu con ste'ca diidx, rlajzreni guchaareni xtidx Jesucrist.

<sup>8</sup> Niluxh palga jiaäd chu jiaädluii lojtu ste'ca diidx ni ruslaa bejn lo dojl, niluxh di diidxga gac si'c najc diidx nani abaluiinu lojtu, bejnga agubibdeni, chutis najcnu, mase naräni, mase te xangl Dios ni jiaäd xhaguibaali.

<sup>9</sup> Si'c ni guniä lojtu, si'c rnisacä lojtu naj: Pal yu' chu jiaädluii lojtu ste'ca diidx ni ruslaa bejn lo dojl, luxh di diidxga gac si'c najc diidx nani abaluiinu lojtu, bejnga agubibdeni.

<sup>10</sup> ¿Xhi naatu? ¿La rlazä guinisa'c bejn xcuentä o la rlazä guinisa'c Dios xcuentä, ä? ¿La rlazä guspaä lajz bejn, ä? Paru rlazä guspaä lajz bejn, digacdi gacä xmos Jesucrist.

### *Xtzun Pabl*

<sup>11</sup> Cojyabee sa'ä, diidx ni ruslaa bejn lo dojl nani abasule'ä lojtu di diidxga gac xhigab bejn guedxliuj.

<sup>12</sup> Xhet lojdi bejn guedxliujdi cua'äni, rutza baluiidini loä, niluxh lagajc Jesucrist baniidx xtiidxni loä.

<sup>13</sup> Anajntu xho gucä, xho gubanä galoo che rusobätis rexleii toMoisés. Dxejc basacsiduxhä reben guidoo ni huililajz xtidx Jesucrist, si'c benä te rlazä nitlojreni.

<sup>14</sup> Loj reni rusoob xleii toMoisés narä cagusoobäru xtiidxni, nanduxhäru loj guiraareni. Loj rebejn nani sadxagä ladxä, maazru sanälazä xcostumbr retoxtadgoldoä.

<sup>15</sup> Dios gule narä, guleni narä cheni nuuli xnanä narä, gurejdxni narä sa'csi sanälajzni narä.

<sup>16</sup> Dxejc bibalajz Dios baluilojni Xi'nni Jesucrist loä te guiniä xtiidxni xcuent xho ruslaani bejn lo dojl loj reni di gac xpejn Israel. Che gujc si'c rut lojdi huiye'tzä.

<sup>17</sup> Niclaza nia'ä guedx Jerusalén loj reni ganid gujc apost loä. Alga hua'a nez reguedx Arabia, dxejcti gubisacä guedx Damasco.

<sup>18</sup> Che agudejd si'cti choñ ijz, dxejczu hua'a guedx Jerusalén te biembeä Pedr, dxejc biannäni tzun-gubijdx.



<sup>19</sup> Niluxh dina nuhuiä loj chu stee apost ro'c. Lojtis Jacoob, betzhuin Jesucrist bahuiä.

<sup>20</sup> Rniliä nez lo Dios, dina guiniä didx-xhii, rediidx ni cacuaä najc guliipac.

<sup>21</sup> Dxejcti hua'a reguejdx xten Siria näjza Cilicia.

<sup>22</sup> Resa'nu ni yu' neñ xquidoo Crist guideb nez reguedx Judea, direni gumbee narä.

<sup>23</sup> Riejntis diajgreni: "Bejn nani basacsíduxh nuure agujc xchej, abejnga caguluuini xcuent lagajc xcälirililajz nani galoo rlajzni nunitlojni."

<sup>24</sup> Dxejc rliä'preni xpala'n Dios sa'csi huililazäza xtiidxni.

## 2

### *Bidxaag Pabl loj reapost*

<sup>1</sup> Che agudejd tzudaj ijz, dxejcru hua'a guedx Jerusalén con Bernabé, näjza Tito huinänu.

<sup>2</sup> Gunii Dios loä, gunibeeni cha'a ro'c te gusule'ä xho huililajz rebejn ni di gac xpejn Israel xtidx xcuent Jesucrist ni rusläa lo dojl. Niluxh lojtis reni rnibee guidoo basule'ä diidx, te di xlia'si benä dzuun, o te di xlia'si gunäru dzuun.

<sup>3</sup> Sanää Tito, te beñ griegw ni di gac xpejn Israel. Nicla lojni direni niäjb chuni bee si'c caj lo leii xten Moisés.

<sup>4</sup> Niluxh gaii bejn ni rujnsi si'cni najcreni sa'nu, bidxaagreni loonu te gula'tzreni xho rajnnu Dios. Rdxe'chreni sa'csi nuunu, rexpejn Jesucrist, dinu jienru si'c ni bejn retoxtadgoldoonu. Laareni rlajzreni guxhiidreni nurnu, rlajzreni gusoobnu rextiidxreni.

<sup>5</sup> Dipacnu nicäjb nucuadajgnu xtiidxreni, sa'csi rlaaznu chanuu chalilajztu xtidx Jesucrist nani rusläa bejn lo dojl.

<sup>6</sup> Niluxh reni sajc, nalajznu reni rnibee rebejn guidoo ro'c, xhet te didx-coobdi guniireni loä. (Luxh par narä xhet najcdi mase beñsajceni, sa'csi Dios runtubloj guiraa bejn.)

<sup>7</sup> Luxh bahuiireni abaniidx Dios xtidx Jesucrist loä, luxh rusule'äni loj rebenzijt te guibicaj xtojreni, sigajcni rusule' Pedr xtidx Jesucrist loj rexpen Israel nani rujnpac si'c ni caj lo leii.

<sup>8</sup> Lagajc Dios nani badeed bejn Pedr dzuun xte apost loj rexpen Israel, lagajcza Diosre baniidx gunä dzuun, te gacä apost loj rebenzijt nani di gac xpejn Israel.

<sup>9</sup> Ni'cni Jacob, Pedr, näjza Juan nani najc beñroru neñ guidoo xten Jesucrist, gubeereni laa Dios ni cayacnäjä narä. Dxejc baniidxreni naareni loä näj lo Bernabé si'c te seen rbalajzreni, te chonnu guiro'pnu loj rebenzijt. Niluxh laareni chanuureni gusule'reni loj rexpen Israel.

<sup>10</sup> Gunabtisreni loonu gacnäjnu rebejn ni xhet rajpdi, luxh ni'cza rlazä gunä.

### *Pabl gudilnäjä Pedr lo guedx Antioquia*

<sup>11</sup> Che biääd Pedr lo guedx Antioquia, gudilnääni, sa'csi abejnni dojl xhet laadi cayujni.

<sup>12</sup> Galoo gudaunäjni rebenzijt, luxh che bidzujn gaii xpejn Israel ni baxhal Jacob, dxejcti gubicajni lo rebenzijt, diruni niaunäjreni sa'csi bidxejbni rexpejn Israel ni ru' bee ni bidzujn ro'c.

<sup>13</sup> Dxejcti sigajcza bejn guiraa rexpejn Israel ni nadxaag Pedr, gujcreni sigajc Pedr, runtio'p lajzreni, naareni gusgueereni. Näjli Bernabé bejn si'c.

14 Luxh che bahuiä direni gun si'cpacni najc xtidx Jesucrist, dxejc räpä loj Pedr nez loj guiraa reben guidoo: "Palga luj najclu te xpejn Israel, luxh nabajnlu si'c rebenzijt ni digac xpejn Israel, xhet si'c di ni caj loj leii, ¿xhicuent rlanjlu guinibeelu guibajn rebenzijt si'c rexpejn Israel nani rusoob xleii toMoisés?"

*Nungäj̄l chalilajz rexpejn Israel, sigajc guiraa bejn, te guibicaj xtoj̄lreni*

15 Nuure najcnu rexpejn Israel cheni gojllinu; dinu gac beñdojl̄ si'c najc rebenzijt.

16 Anadonnu rut chu tejt̄i bejn sajc guibicaj xtoj̄lni che gunni si'cni caj lo leii, sa'csi nanab chalilajznu xtidx Jesucrist. Ni'cni biolilaznu xtidx Jesucrist te jia xtoj̄lnu sa'csi rililajznu, xhet sa'csi riennu si'cni caj loj leii. Di gacdi jia xtoj̄l bejn xcuent yäl̄rusoob xleii toMoisés.

17 Palga lāl̄ ni rlanjnu jia xtoj̄lnu xcuent xcäl̄rililajz xtidx Jesucrist, ruhuiinu cayenrunu dojl̄, la sajc guiniinu: Jesucrist rului rienrunu dojl̄, ¿ä? ¿xho gacni si'c!

18 Palga rlazä gunsacä redzuun nani abaro'nä, lagajc narä rapä dojl̄ nacä beñ dojl̄.

19 Niluxh xcuent leii, anacä si'c beñgut: digacdiru guinibee leii narä sa'csi naj nabanä lo xnejz Dios. Luxh lagajc leii bejn nacä si'c beñgut che gucbeä di gacdi gusobä guiraa ni caj lo leiiga.

20 Najcni si'cni gutnää Crist lo crujz. Naj xhet narädi ni nabanä, laa Crist ni nabajn nen lastoä. Yäl̄nabajn ni nabanä naj lo guedxliujre nabanä sa'csi rililazä xtidx Xi'n Dios nani rinälajz narä luxh gujtni te gudijxni tolä.

21 Dina cuälazä xcäl̄rulasajz Dios. Paru sajc gudzucaj leii xtoj̄l bejn te gacreni beñnaya nez loj Dios, dxejc xlia'si gujt̄ Jesucrist.

### 3

*Yäl̄rililajz rusia dojl̄*

1 ¿Chipsa nayäältu beñ Galacia! ¿Chu bascäyju te di cuadijgtu xtidx Jesucrist? Ni nez lojpectu bisule'nu diidx xho cuaj Jesucrist lo crujz.

2 Tejt̄is diidx rlazä guiniitu loä. ¿La cua'tu Sprit Dxan xten Dios sa'csi bejntu si'cni caj lo leii, ä? o ¿la sa'csi huililajztu diidx ni biejn diajgtu?

3 Chipsa nayäältu. Acua'tu Sprit Dxan xten Dios dxejcti naj rlanjtu guntu ni riajt̄bis yejct̄u guntu.

4 ¿La xlia'si gudejdtu trabajw? Chugan la gullii xlia'sini.

5 Che runiidx Dios Sprit Dxan xtenni lojtu, che rujnni milaagwr nez lojtu, ¿xho rujnnini? Dini gunni sa'csi rujntu si'cni caj lo leii, rujnnini sa'csi rililajztu xtiidxni ni riejn diajgtu.

6 Huililajz toxtadgoldoonu Abram xtidx Dios, ni'cni cua' Diosni si'c te bejn nani naya lastooni.

7 Ni'cni colyabee dee: renani rililajz xtiidx Dios najc xi'n toAbram.

8 Galooli najn Dios xcuent yäl̄rililajz susia Dios lastoo rebenzijt, ni'c räjpni lo Abram: "Guiralii reben guedxliuj sacle' xcuentlu." Diidxre cuaj lo guijt̄z ni gujc galooli, cadro caj xtidx Dios.

9 Ni'cni reni rililajz naj agucnäj Diosreni sigajc gucnäj̄ni toAbram nani huililajz.

10 Guiraa reni rlanj guibajnreni gunreni si'cni caj lo leii, agubibdereni sa'csi scree caj lo leii: "Guiraa reni digunpac si'cni caj lo regujt̄z xten leii, sucuibdereni."

11 Niluxh huenliisi rien rut nayadi nez loj Dios xcuent leii, sa'csi dee najc xtidx Dios: palga rillilajz te bejn xtidx Dios, najcni te bennaya nez lo Dios, nabanājni Dios xcuent xcāl̄rillilajzni.

12 Leii dini naa chalilajz bejn te xca'ni yāl̄nabajn. Scree caj lo leii: “Nani gunpac si'cni caj loj reguijtz xten leii, ni'c nanab guibajn lojpac leiiga.”

13 Jesucrist badzucaj nuure loj yāl̄rbibde xten leii. Laani gubibdeni xcuentnu sa'csi xtidx Dios naj: “Anabibde te bejn ni najl loj te yajg.”

14 Scree gusajc Jesucrist te gusojb diidx ni rāj̄p Dios loj toAbram, sacnājni guiraa rebenzijt; nājza te guiraanu ni chalilajznu xtidx Jesucrist xca'nu Sprit Dxan xten Dios.

### *Leii nāj diidx ni bia'n Dios loj toAbram*

15 Betzā, naj gusā'tā te diidx xcuent ben guedxliuj. Cheni rujn bejn te guijtz te jia'n diidx lo stee bejn, mase bejntis najcreni, che abacuaani lajni lo guijtzga, rut sajcdi gudzucaj guijtzga. Rutza sajcdi gucuaaru diidx lojni che anajcni.

16 Luxh anajnnu badeed Dios xtiidxni loj toAbram nājza loj xagdooni. Dini ninii “rexagdooni” si'c loj xhidajlreni, guniini lo tejtis xagdooni, luxh laani najc Jesucrist.

17 Diidx ni rlazā guiniā najc scree: Diidx nani bia'npac Dios loj toAbram gunii Diosni che cayāādx tajp gayuu galbitzūu ijz gudeedni leii lo Moisés te laani gudeednini loj rexpejn Israel. Niluxh di leiiga nuchaa diidx ni bia'n Dios loj toAbram, lātis sajcdi.

18 Paru naquiiin leii te xca' bejn erens, dxejc xhet erensdi cua' Abram lo Dios. Niluxh basa'n Dios erens lojpac Abram sa'csi bia'nni diidx lojni galooli.

19 ¿Xhicuent badeed Dios leii loj Moisés? Badeed Dios leii sa'csi benduxh rexpejn Israel dojl, te gacheereni xho najc xtoj̄lreni, lā ni jiāād nani najc xagdo toAbram. Sa'csi bia'n Dios diidx con laani sigajc con toAbram. Rexangl Dios badeed leii loj toMoisés, te laani gujc si'c te bejn ni rusiāj̄l diidx.

20 Te ni rusiāj̄l diidx xhet par tejtis bejn̄di najcni, niluxh Dios tejtis najc.

### *Xcuent leii*

21 ¿La garenca najc xleii Moisés lo diidx ni basa'n Dios loj toAbram, ā? ¿Xho gacni si'c! Paru nica'nu te leii ni rajc rudeed yāl̄nabajn, dxejc sii xcuent leiiga nica' bejn yāl̄naban̄naya.

22 Niluxh loj reguijtz xten Dios caj diidx ni rnii: Guiraa bejn niāuu nen̄ dojl, te reni chalilajz xtidx Dios si'c huililajz toAbram, reni'c xca' xcāl̄rillilajz diidx xcuent Jesucrist si'cni bia'n Dios diidx loj toAbram.

23 Che gajd xcāl̄rillilajz xcuent Jesucrist jiāād, dxejc basāuu leii nuure nen̄ dojl, cabājz̄tisnu guiricaj xcāl̄rillilajz xcuent xtidx Dios.

24 Ni'cni anajc leii si'c xmastrnu te guluini nuure nezyuj nez lo Dad Jesucrist te gusiani xtoj̄l̄nu con yāl̄rillilajz xtiidxni.

25 Niluxh naj sa'csi arajpnu yāl̄rillilajz xcuent xtiidxni, dirunu guiquiin te mastr, nalajznu leii.

26 Guiraatu najctu xi'n Dios xcuent yāl̄rillilajz xtidx Jesucrist,

27 sa'csi guiraatu ni gurobnistu loj xtidx Jesucrist, najctu rexpejn Jesucrist.

28 Naj rutiru rexpen Israel niclaza rebenzijt, niclaza mos, niclaza bejntis, niclaza niguii, niclaza gunaa, sa'csi guiraanu najcnu tebloj nez lo Jesucrist.

29 Palga najcnu xpejn Jesucrist, dxejc guliipac najcnu xi'n toAbram, dxejc sica'nu yāl̄masa'c ni abia'n diidx gudeed Dios loj Abram.

## 4

<sup>1</sup> Mbaj naj. Nani xca' yäl'nasa'c, che najcni biuux, najcni sigajc te mos, mase xtenni gac guiraa xhixten xtdadni.

<sup>2</sup> Yu' chu te bejn ruhuiini, yu'za chu rnibee xhixtenni cheni agurooblini, cheni guidzujñ dxej xca'ni ni gudeed xtdadni.

<sup>3</sup> Sigajcza nuure che gucnu si'c biuux guyu'nu gucnu mos loj releii, rnibeeni xhini'c digacdi jieñnu lo guedxliuj.

<sup>4</sup> Niluxh che bisa' dxej ni basoob Dios, baxhaļ Dios Xi'npacni. Xi'n te gunaa gojñni, loj rexpejn Israelza biädjiäjñni, basoobni leii xten toMoisés.

<sup>5</sup> Si'c gujc te xcasacni reni rusoobpac leii, te xca'ni nuure gacnu si'c te xpisiäjñni.

<sup>6</sup> Luxh sa'csi anajctu xi'nni, ni'c baxhaļ Dios Sprit xten Xi'nni te cuääzni neñ lastoonu. Laani rniini lo Dios xcuentnu: "Guejblu, Xtdanu."

<sup>7</sup> Ni'c dirunu gac mos, sa'csi anajcnu xi'nni. Luxh palga najcnu xi'nni, suniidxza Dios yäl'nasa'c loonu xcuent Dad Jesucrist.

### *Rulijdxni na'c gacsac bejn mos*

<sup>8</sup> Che gajdtu gumbee Dios najctu mos xten rebanäjñ ni rajntu si'c Dios luxh dipacreni gac Dios.

<sup>9</sup> Luxh naj anumbeetu Dios o naj anumbee Dios la'tu, xho chachusactu loj redzuun ni guyu'tu galoo che gujctu mos xten rebanäjñb.

<sup>10</sup> Cayutistu redxej, rebäii, retieimp, reijz.

<sup>11</sup> Naj rdxebä andi xlia'si gudedä trabajw baluiätu.

<sup>12</sup> Rniabduxhä lojtu betzä, colyajc si'c narä, sa'csi narä ahuililazä xtidx Jesucrist sigajc la'tu. Xhetza xhi dzunguijdxdi bejntu loä che guyu'ä lojtu.

<sup>13</sup> La'tu anajntu galoo che basule'ä diidx xcuent Jesucrist lojtu, benäni sa'csi racxhuu tiexhä.

<sup>14</sup> Dizatu nuze' niclaza nibälajztu narä xcuent yäl'racxhuu ni rajc tiexhä, alga si'c te xangl Dios, si'c lagajc Jesucrist cua'tu narä.

<sup>15</sup> ¿Con yäl'rbalajz xtentu ni gojptu dxejc? Niluxh rniä lojtu, paru nijc nibäätu balojtu, nuniidxtuni loä dxejc, si'c niujntu.

<sup>16</sup> Naj ¿la rdxe'chtu loä sa'csi caniä didxlii lojtu, ä?

<sup>17</sup> Naj yu' gaii bejn nani rujñsi si'cni sanäreni leii rujñsireni si'cni rinälajzreni la'tu. Niluxh rlajzreni gudzucajreni la'tu te gusaantu xtidxä, te chanajltu laareni, te jiutu xtiidxreni.

<sup>18</sup> Laaca chanälajz bejn sa'ni, niluxh na'c gusgueeni, na'cza che suganääsi la'tu chanälajztu narä.

<sup>19</sup> Rexi'nä, xcuent la'tu cadedä trabajwduxh si'c te gunaa ni rajl xpäzni, luxh sinuu sidedä trabajw cheni arbäjzpacli Jesucrist neñ lastootu.

<sup>20</sup> Maläii gac jiälä lojtu lagajc naj te gac guiniä xhi stee diidx. Niluxh naj zijt yu'ä, dina gacheä xhi xhigab gunä xcuenttu.

### *Diidx xcuent Agar näj Sara*

<sup>21</sup> Colguini loä, la'tu ni rrajz gun si'cni caj lo leii, ¿la ditu gachee, la di diajgtu jieñ xhini'c caj lo leii, ä?

<sup>22</sup> ¿Coljieñ! Scree caj loj leii: guyu' tio'p xi'n toAbram. Tejni najc xi'n gunaa ni najc xmos Sara. Steeni najc xi'n chäälpacni.

<sup>23</sup> Niluxh xi'n xmosni gojl sa'csi lagajc laani bejnñi xhigab si'c chu xi'nni. Luxh xi'n chäälpacni gojl sa'csi si'c bia'n Dios diidx loj Abram.

<sup>24</sup> Diidx xcuent regunaare najc si'c diidx ni ruluii. Regunaare najc si'c tio'p diidx ni bia'n Dios. Agar najc mos, mosga najc si'c diidx ni bia'n Dios con Moisés lo dan Sinái. Rexi'n mosga guyu' te gacreni mos lo leii.

<sup>25</sup> Agar najc si'c dan Sinái nez lo reguejdx xten Arabia. Luxh guedx Jerusalén najc si'c dan Sinái, sa'csi naj ro'c najc cadre re' rexpex Israel con rexi'nreni, sanäreni leii.

<sup>26</sup> Niluxh di guedx Jerusalén ni yu' guibaa gac si'c mos, luxh nuurnu najcnu xi'nni.

<sup>27</sup> Scree caj loj xtidx Dios:

Bibalajz, luj gunaa ni gajd xi'nlu chu,

guredxa', bibalajz,

luj ni gajdlu ted trabajw ni rdejdx gunaa che rajl xi'nni.

Sa'csi su'ru xi'n gunaa nani gulälajz cháälni quela xi'n gunaa ni gudiesnä j cháäl stee gunaaga.

<sup>28</sup> Mbaj naj, rebetzä, nuure, sigajc Isaac, najcnu xi'n toAbram nani chu si'cni bia'n Dios diidx loj toAbram.

<sup>29</sup> Che gojl xi'n gunaa ni najc mos, ni gojl sa'csi lagajc laani bejn xhigabga, bidxagdijl ni xi'n cháälpac Abram nani gojl xcuent diidx ni bia'n Dios loj Abram. Sigajcza najcni naj.

<sup>30</sup> ¿Xhi caj lo reguijtz? “Barilaagw gunamos näj xi'nni, te di xca' xi'n gunamos yäl'nasa'c xtenlu si'c ni xca' xi'n gunaa nani najc cháälpaclu.”

<sup>31</sup> Naj nuure, betzä, dinu gac si'c xi'n gunamos te chunu lo leii. Nuurnu najcnu si'c xi'n gunaa nani najc cháälpac toAbram.

## 5

### *Colguzutijp lajztu lo yäl'rililajz xtidx Dios*

<sup>1</sup> Colgusutijp lajztu lo xtidx Dios nani baniidx Jesucrist loonu sa'csi guli-pac gulää Jesucrist nuure ladzṇaa leii, badzucajni xtojṇnu che huililajznu xtiidxni, ni'cni na'cru gusiejch lajztu te gacsactu mos ladzṇaa leii.

<sup>2</sup> Narä Pabl rniä lojtu, palga la'tu chutu bee si'cni caj lo leii, dxejc xlia'si chalilajztu xtidx Jesucrist.

<sup>3</sup> Rniäza stehuält, guiraa bejn nani rlanjpac chu bee, nanab gunni si'cpac ni caj lo leii.

<sup>4</sup> Palga rlanjtu guntu redzuun ni caj lo leii te guibicaj xtojṇtu, dxejc agubi-cajtu lo Jesucrist, agubicajzatu lo xcäl'racnä j Dios.

<sup>5</sup> Niluxh nuure xcuentpac Sprit Dxan xten Dios rililajznu gudijx Jesucrist xtojṇnu lo cruzj, cayenloonu jiädsacni te guniidxni yäl'baṇsa'c par tejpas loonu.

<sup>6</sup> Sa'csi loj reni rililajz xtidx Jesucrist xhet sajcdi chu bejn bee, xhetza sajcdi na'c chu bejn bee, nani saj najc chalilajz bejn xtidx Dios. Yäl'rililajzga rujn guibaṇsa'cnu te chonälajznu resa'nu.

<sup>7</sup> La'tu laaca sasajtu. ¿Chu badxojn gusoobtu xtidxlii Dios?

<sup>8</sup> Xhet Diosdi ni guletu badxojnditu.

<sup>9</sup> Anajntu tudxe'nsi cobgulaj rusaguijni yätxtiil; si'c te cobgulajga najc te niguii ni caguluiitu xtidx leii.

<sup>10</sup> Rialilazä xtidx Dad Jesucrist, ni'c nadiplazä la'tu; ananä ditu chalilajz stee diidx. Niluxh bejn ni cagusgueetu susacsí Diosni, chutis najcni.

<sup>11</sup> Narä rebetzä, paru narä caguluiä chutu bee, si'c ruluii rexpejn Israel, ¿xhi xcuent rusacsí rexpejn Israel narä? Paru si'c caguluiä, dirutu chalilajz gudijx Jesucrist xtojṇnu lo cruzj. Luxh si'cpacza rajzreni.

<sup>12</sup> Rebejn nani cagusgueetu caniireni chutu bee, jmalaiiza gutiuugreni tejpas lagajc tiejxhreni!

13 La'tu rebetzä, agurejdx Diostu loj xtiidxni te chalilajztu Jesucrist ni ruslaa bejn lo dojl. Colhuixгаа na'c xca'tistu rediidxga dxejcti guntu si'ctis ni rlanj tiejxhtu, si'ctis ni riabza yejctu. Colgacnäj sa'tu con yälrinälajz, tejni sigajc steeni.

14 Sa'csi guiraa diidx ni caj lo leii con tejtis diidxre rsiojbn: "Chanälajztu sa'tu sigajc rinälajztu lagajc la'tu."

15 Palga rdijltu, rauya'tu sa'tu, rajwtu sa'tu, jcolnatiro! Andi lagajc la'tu gunijttu sa'tu.

### *Nani rchaglajz rebejn näj yäl'nabajn ni rudeed xtidx Dios*

16 Rniä lojtu, colguibajn si'c ruluii xtidx Dios näjza Sprit Dxiän xtenni, te si'c na'c guibajntu si'ctis ni rlanj tiejxhtu, si'c ni najctis xhigabtu.

17 Sa'csi ni najc xhigab xten bejn rdxe'ch loj xhigab Sprit Dxiän xten Dios. Sigajcza xhigab xten Dios dini gac tebloj con xhigab xte bejn. Rudxojnntu loj sa'tu, ni'cni digacdi guntu dzuun ni rlanjztu guntu.

18 Luxh palga cagulijdx Sprit Dxiän la'tu, dxejc dirutu quiquiin guntu si'c ni caj lo leii.

19 Guyasi jiembee bejn xhireni'c najc redzuun ni rujn rebejn nani di gumbee xtidx Dios. Dee najc redzuunga: yäl'rusguee chääl bejn, yäl'rusguee chääl sa'reni, yäl'rusguee sa'ni che ruchaag sa' te dxa'p con te bi'n loj redolgujdx, guiraa redolgujdx ni rujn niguii con gunaa,

20 yäl'rajn rebänäjb, yäl'bidxaa ni rujn daan bejn, yäl'rdxechlajz loj sa'ni, yäl'rchagdijl sa'ni, yäl'nayedx lo sa'ni, yäl'rdxecha', yäl'riu lagajctis laani, yäl'rlia' lo sa'ni, yäl'rchaag lo te cuaa bejn. Najza sa' dzunguijdxre rujnreni:

21 yäl'rdxe'ch lajz, yäl'rugut sa'ni, yäl'rsiojz, yäl'rauxha't, näjza guiraa dojl sa' redee. Sigajc ni balidxä la'tu xhi dxejga rulidxä la'tu naj. Nani rujn sa' redojlre direni jiu' loj xcäl'rnibee Dios xhaguibaa.

22 Niluxh xtzuum Sprit Dxiän xten Dios najc yäl'rinälajz sa'ni, yäl'rbalajz lastooni, yäl'rbedxi lajzni, yäl'rbecdxi lajz sa'ni, yäl'najc bensa'c lo chutis bejn, yäl'nagodzajz, yäl'rililajz,

23 yäl'nadolajz, yäl'rnibee lastooni lo ni rlanj gun tiejxhni. Xheti te leii ni rudxojn gun bejn sa' redzuunre.

24 Niluxh renani ahuililajz xtidx Jesucrist, abatjo'nreni guiraa redolgujdx ni rlanj gun tiejxhni.

25 Palga rbäjz Sprit Dxiän nen lastoonu, do'o guibajn si'c rnibee Sprit Dxiän guibajnnu.

26 Na'c guiliä'pnu lagajc xpala'nnu, na'c guidxech lajznu lo sa'nu, na'c gunembiidnu sa'nu.

## 6

### *Colgacnäj sa'tu*

1 Sa'ä, palga chu tejtu ni abiajb nen dojl, lagajc la'tu nani aracheetu xtidx Dios colgulijdx bejnga, colgacnäjni te guiriini nen dojl. Colni lojni nadolajz, nasinlajztu lagajc la'tu didi che guidon nägajcza la'tu jiajbtu nen dojl.

2 Colhuii xhi rquini resa'tu, colgacnäjreni te si'c gusoobtu guiraa rediidx ni najc leii xten Jesucrist.

3 Sa'csi nani rujn xhigab sacduxhni, yu'za chu najcni, niluxh rut najcdini, rusgueeni lagajcsi laani.

<sup>4</sup> Tejgatu colcubee xho najc xtzuumtu te fiitu la laaca najcni, dxejcti sajç guiliä'ptu lagajc xpala'ntu. Dxejc ditu guiquin chu stee bejn guiliä'p xpala'ntu.

<sup>5</sup> Sa'csi tejsa bejn susule'ni diidx lo Dios xhini'c bejnni.

<sup>6</sup> Nani casieed xtidx Dios nanab gacnäj bejn nani ruluiini, gudeedni tudxe'n xhixtenni loj nani ruluiini.

<sup>7</sup> Na'c gusgueelu lagajc luj. Dios digacdi guigueeni, ni'c guira'ti dzuun ni rujn bejn lagajcza ni'c xca' bejn.

<sup>8</sup> Paru te bejn gun dzuun xcuenttis tiejxhni, dxejc che guidzujn dxej xca'ni yálnasa'c, sinifloj tiejxhni, dizani jiu' loj xcälrnibee Dios. Palga te bejn gun dzuun xcuent Sprit ni badeed Dios lojni, che gal yálnasa'c, sica'ni yálnabajn par tejpas.

<sup>9</sup> Ni'cni na'c guidxajgnu jiennu dzunsa'c te che guidzujn dxej ni xca'ni yálnasa'c, xca'zanu te yálnasa'cro.

<sup>10</sup> Ni'cni nanab laj ni sajçni, gacnäjnu chutis bejn, ganiddoo resa'nu ni ahuililajz.

### *Yälrulijdx näjsa xtixtios*

<sup>11</sup> Colhuilaa lacti reletrduxh cacuaä lojtu con naäpac.

<sup>12</sup> Guiraa reni rdxaglajz gun ni rlanjtis tiejxhni, laa reni'c ni rlanj chutu bee, tedi tedreni trabajw xcuent ni cuaj Jesucrist lo cruzj.

<sup>13</sup> Lagajc reni ru' bee direni gun si'cni caj lo leii, niluxh rlanjreni chutu bee te guibaa lajzreni sa'csi bejnreni gaan guyu' beega tiejxhtu.

<sup>14</sup> Luxh narä dilazä guibaa lo sa' recosga; rbaatis lazä sa'csi gujt Jesucrist, cuajni lo cruzj, te gudijxni rextojlnu. Ni'cni par narä xhetru xhi cos-guijdxdi yu' lo guedxliujre, diruna guichaglazä gunä redolguijdx xten guedxliujre.

<sup>15</sup> Che ahuililajz te bejn xtidx Jesucrist, xhetru sajçdi chu bejn bee, xhetza sajçdi na'c chu bejn bee. Nani sajçtis najc gacni si'c te bejccoob lo xtidx Jesucrist.

<sup>16</sup> Guiraa renani nabajn si'cni ruluii xtidx Jesucrist sibedxi lajzreni xcuent xcälrulaslajz Dios. Näjsa rexpen Israel nani ahuililajz xtidx Jesucrist sibedxi lajzreni.

<sup>17</sup> Na'cru guche'chtu narä sa'csi redib ni yu' tiexhä najc si'c te seen narä anacä te xmos Jesucrist.

<sup>18</sup> Rebetzä, gacnäj Dad Jesucrist guiragajctu con Sprit Dxan xtenni. Sugacni si'c.

## Te Guijtz Lo Rebeņ Efesios

### *Bacuaa Pabl lo rebeņ guidoo neņ guedx Éfeso*

<sup>1</sup> Narā, Pabl, nacā apost xten Jesucrist sa'csi si'c rļajz Dios. Cacuaā guijtzre loj rebeņ nani huililajz xtiidxni, loj reni rujn si'cpac rniini neņ guedx Éfeso.

<sup>2</sup> Xca'tu yālracnāj, yālrbexi lajz xten Xtadnu Dios, nājza xten Dad Jesucrist.

### *Rusule' Pabl xtidx Jesucrist*

<sup>3</sup> Rliā'pnu xpala'n Dios, Dad nāj Xtad Jesucrist. Dios racnāj nuure, xcuent Crist runiidxni guiraa reyālracnāj xca' lastoonu, astoo yu'lanu xhaguibaa.

<sup>4</sup> Laani gule nuure, che gajdli guirixtiej guedxliujre, te gacnu xpejņni, te guibanņayanu nez lojni con yālriņāļajz.

<sup>5</sup> Sigajcza anungājļ xca'ni nuure te gacnu si'c xi'ņpacni sa'csi abiāād Jesucrist te guslaani nuure neņ doļ, si'c ni gunibee Dios sa'csi balaslajzni nuure.

<sup>6</sup> Gucnāj Dios nuure te guiliā'pnu xpala'n Dios, sa'csi lagajc laani acua'ni nuure, abejņni nuure tejsi con xi'ņni ni sanāļajzni.

<sup>7</sup> Laani baslaani nuure neņ doļ xcuent xtiejņni, laani badzucajni xtoļņnu xcuent xcālruslasļajzni

<sup>8</sup> nani banidxduxhni loonu. Guideb yālņajn, guideb xcāriejņ

<sup>9</sup> basule'ni loonu xhigab xhiga'tzni xcuent redzuun ni rļajzni gunni, xhigabza ni bejņni galooli.

<sup>10</sup> Luxh sidzujņ dxej sisiojbpac xhigab ni bejņ Dios. Che guidzujņ dxejga sutojņ Dios guiraali, sudeedni guinibee Jesucrist guira'ti ni yu' xhaguibaa, sigajc recos ni yu' lo guedxliuj.

<sup>11</sup> Arajpnu te xcālņasa'c Jesucrist, sa'csi galooli bejņ Dios xhigab guniidxni yālņasa'cga. Lagajc Dios benchee guira'ti ni yu', luxh rujņpacni nani abejņni xhigab najc laaca gunni

<sup>12</sup> te guiliā'p bejņ xpala'n xcālriņbeeni xcuentnu, nani ganiddoo biolilaaznu xtidx Jesucrist.

<sup>13</sup> Nājza la'tu, che biejņ diajgtu redidx gulii, rediidx ni ruslaa bejņ lo doļ, dxejc huililajztu xtidx Jesucrist, dxejc gujczatu tejsi con laani. Dxejc cua'tu Sprit Dxaņ xten Dios, ni'c najc si'c seen ahuililajztu, si'cni bia'n Dios diidx.

<sup>14</sup> Baniidx Dios Sprit Dxaņ xtenni te cuāāzni neņ lastoonu, te ni'c najc seen xca'nu yālņasa'c nani guniidx Dios che abaluuxni xtzuunni, nalajznu guslaani guiraa rexpejņni te guiliā'preni xpala'ņni lo xcālriņbeeni.

### *Rniab Pabl gudeed Dios yālņajn loj renani ahuililajz*

<sup>15</sup> Ni'cni nājza narā, sa'csi abiejņ diagā xho rililajztu xtidx Dad Jesucrist nājza xho sanāļajztu guiraa rexpejņ Jesucrist,

<sup>16</sup> dina gusanā gudedā xquixtios lo Dios xcuent la'tu. Rnaduxh lazā la'tu che rniabā lo Dios.

<sup>17</sup> Rniabā lo Xtios Dad Jesucrist, xtadni ni rņibee xhaguibaa, guniidxni lojtu te yālņanduxh, te yālriņulioļ recos xhiga'tz te gacbeduxhrutu xcuent Gueb Dios.

<sup>18</sup> Rniabāza lo Dios jianij xcāriejntu te gabeetu xhini'c najc speranz xten yālracrejdxtu lo xtiidxni, te gabeetu lacti saru, lacti sajc yālņasa'c ni gudeed Dios lo Jesucrist nājza loj rexpejņni,



<sup>19</sup> te gacbeezatu lacti gurobduxh najc yälrnibee nani rajpni nez loonu nani ahuililajz xtiidxni. Guiraa redee ruluüi lacti nadip najc yälrnibee xten Dios.

<sup>20</sup> Lagajc yälrnibeere bejn dzuun par Jesucrist. Con yälrnibeere baspajñ Dios Jesucrist lo rebengut, te gurejni xladbee Dios cadre rnibeeni xhaguibaa.

<sup>21</sup> Maazru sajñi lo chutis gubier, lo chutis yälrnibee, lo xhitis yälñadip, lo chutis ni rnibee; maazru sajñi lo chutis nani abibee te guinibee, sigajc naj, sigajc neñ redxej ni churu jiaäd.

<sup>22</sup> Niluxh badeed Dios guira'tini ladzñaä Jesucrist, laazani bejn bibee Jesucrist gunibeeni lo guiraa xhixten xquidooni.

<sup>23</sup> Reben guidoore najc si'c tiejxh xten Jesucrist, luxh sigajc rudeed Dios guiraliü loj Jesucrist, sigajcza rudeed Jesucrist guiraliü loj rebejn ni najc xquidooni.

## 2

### *Ruslaa Dios nurnu sa'csi rinälajzni nurnu*

<sup>1</sup> Laani baniidxni yälñabajñ lojtu che najctu si'c bengut nez loj Dios sa'csi rujntu dojl.

<sup>2</sup> Galoo gubajntu lo dojl, entis lo xnez guedxliujre guzajtu, biutu xtidx bendxab nani rnibee guedxliujre. Sprit xtenni rujñ dzuun neñ lastoo rexi'nni nani di gucuaadijg xtidx Dios.

<sup>3</sup> Luxh galoo, näj nuure nadxaagñu lojreni, biennu si'c ni rlajz tiejxhnu. Dxejc biennu si'ctisni rlajz tiejxhnu, si'ctisni biajb xhigabnu. Nungäjñ guidxe'ch Dios loonu, sigajc bidxe'chni loj guiraa reben guedxliuj.

<sup>4</sup> Niluxh balaslajz Dios nuure. Con xcälñsanälazduxhni huinälajzni nuure.

<sup>5</sup> Mase anajcnu bengut lo dojl, laani baniidxni yälñabajñ loonu. Rajpnu yälñabajñre con Jesucrist. Sa'csi balaslajzni nuure baslaani nuure neñ dojl.

<sup>6</sup> Baspansacni nuure con Jesucrist; sigajcza bejnñi cuenäjñu Jesucrist xhaguibaa,

<sup>7</sup> te neñ redxej ni churu jiaäd, guluilojni lacti sajñ xcälñasa'c xten yälñulasajzni, ni'c sanälajzni nuure, najcni huenduxh loonu por Jesucrist.

<sup>8</sup> Sa'csi rulasajz Dios nuure, ni'c baslaani nuure neñ dojl che huililajznu xtiidxni. Luxh et sa'csi yu' xhi biennu; dee najc nani banidx-xlia' Dios loonu.

<sup>9</sup> Xhet xcuent xhi dzunsa'c di ni biennu, te di chu tejtu gac nayedxlajzdi.

<sup>10</sup> Dios najc ni benchee nuure. Sigajcza con Jesucrist bejnñi gacnu bejn ni rujñ dzunsa'c nani galooli agunibee Dios jienpacnu.

### *Yälrbexilajz ni rajpnu por Jesucrist*

<sup>11</sup> Ni'c colñaj lajztu xho gujctu galoo. Ditu ni ajc rexpejn Israel. Rniireni la'tu 'benzajt' sa'csi ditu chu bee si'c ru' rexpejn Israel. Sa'csi lagajc con ñaareni rusälreni bee.

<sup>12</sup> Dxejc suga'tu ditu gumbee Jesucrist. Zijt yu'tu loj rexpejn Israel, najctu benzajt. Nicla gumbeetu rediidx ni bia'n Dios loj rexpejn Israel. Ditu niunloj guslaa Dios la'tu lo dojl, dizatu niembee Gueb Dios lo guedxliujre.

<sup>13</sup> Niluxh naj ayu'tu lo Jesucrist, la'tu ni guyu' zijt lo Dios galoo. Naj agubigtu lo Dios sa'csi abia xtojñtu con xtiejn Jesucrist.

<sup>14</sup> Jesucrist najc ni rbecdxi lajznu. Laani bejn gujc rexpejn Israel tejsi con rebenzajt. Laani badzucajni redzuun xten leii te gujc rexpejn Israel tejsi con rebenzajt.

<sup>15</sup> Lagajc con tiejxh Jesucrist ni gojl lo cruzj banijtni redzuun xten leii nani bejn bidxe'ch rexpejn Israel lo rebenzajt. Lagajc laani bejnñi bidxagsa'reni te

gujcreni tejsi che huililajzreni xtiidxni, gujcreni te beņcoob. Dxejc gulecdxini lajznireni.

<sup>16</sup> Con yālgujt ni gujtni lo crujz badzu'ni guiro'preni lo Dios te gujcreni tejsi. Si'c gulājz rdxechnāj sa'reni.

<sup>17</sup> Cajza lo guijtjz rediidxre:

Biāādni te basule'ni xho ga'p rebejn yālrbexi lajz rebejn ni suga' zijt lo Dios nājza reni suga' gajxh lo Dios.

<sup>18</sup> Laani bejn sajz jiu' guiro'p cuaa bejn lo Dios con tejsi xhigab, nājza tejsi Sprit.

<sup>19</sup> Ni'cni dirutu gac benzijz, bejn ni rut numbeedi. Anajctu tejsi con rexpejnni, najczatu sa' rexpejn Dios.

<sup>20</sup> La'tu najctu si'c te yuro. La'tu najctu si'c padeer xten yu'ga. Reapost nājza reprofet najc si'c cheni birixtiej yu'ga. Jesucrist najc si'c guiro ni gusuj squiin yu'ga, guij ni sajczu, sa'csi Jesucrist rnibee.

<sup>21</sup> Cayunsa'c Dios yu'ga, cayajc yu'ga con la'tu, caroobni te gacni xquidodxan Jesucrist.

<sup>22</sup> Sigajza la'tu nājza rexpejn Israel ni huililajz najctu tejsi con Jesucrist. Cagustioobtu guidooaga te neņni cuāāz Sprit Dxan xten Dios.

### 3

#### *Pabl nungājz chanā xtiidx Dios lo rebenzijz*

<sup>1</sup> Ni'cni yu'ā neņ latzguuib, narā, Pabl sa'csi cagusule'ā Jesucrist, te jiādnaā xtiidxni lojtu, najctu benzijz.

<sup>2</sup> Pet abejn diajgtu lacti hueen najc Dios baniidxni dzuunre loā, jiādnaā xtiidxni lojtu.

<sup>3</sup> Dios baluiini xhigab-xhiga'tzni loā (si'cni bacuaā lojtu galoo).

<sup>4</sup> Che goļtu guijtza, sabeetu cati ananā rexhigabxhiga'tz xten Jesucrist.

<sup>5</sup> Xhigab-xhiga'tzre di bejn niembeee galoo, niluxh nāj Sprit Dxan xten Dios abaluiinini loj reapost nājza loj reprofet.

<sup>6</sup> Dee najc xhigab-xhiga'tzga: por rediidx xcuent Jesucrist ni ruslaa bejn neņ doļz rujn Dios gac reni najc benzijz tejsi con reni najc xpen Israel, guidxaag sa'reni, gacreni tejsi bejn. Guiro'preni xca' yālnasa'c si'c bia'n Dios diidx.

<sup>7</sup> Narā nacā te apost xten dzuun ni baniidxni, por xcālruulasajz Dios ni cuaxliā'ā. Dios baniidx dzuunre loā con xcālrbidexhni.

<sup>8</sup> Luxh masā guxiiru sacā lo guiraa rexpejnni, loā baniidxni xcālracnājni te lo rebenzijz gusule'ā xtiidxni, nalajznu redidxcoob xcuent xcālnasa'c Jesucrist,

<sup>9</sup> te gusule'ā lo guiraa bejn rexhigabxhiga'tz nani bacua'tz Dios lojnu galooli. Dios benchee guiralii ni yu'.

<sup>10</sup> Si'c gujc te nāj jien guiralii yālnanduxh xten Dios. Reni najc xpejn pacni neņ xquidooni guluui yālnajnre lo rexangl Dios, loj reni rnibee xhaguibaa.

<sup>11</sup> Galooli bejn Dios xhigabre par tejpas, ni'cni biāād xtadnu Jesucrist te guzobj xhigab ni bejn Dios.

<sup>12</sup> Con Jesucrist dinu guidxejb guibignu, guiniabnu lo Dios sa'csi ahuililajznu xtiidxni.

<sup>13</sup> Na'c gac-huin lajztu sa'csi cadedā trabajw xcuenttu. Colguibalajz; dee najc xcālnasa'ctu.

#### *Xcālsanāļz Jesucrist*

<sup>14</sup> Ni'cni ruzuxhibā nez loj Xtad Dad Jesucrist

<sup>15</sup> nani badeed lajni lo guiraa reni yu' xhaguibaa näjza reni yu' lo guedxliuj,  
<sup>16</sup> rniabä loj Dad xhaguibaa gutijpni lastootu con yälrnibee xcuent Sprit Dxi an xtenni, sa'csi yuduxh xcäl'nasa'cni lo xcälrdimbicha'ni xhaguibaa.

<sup>17</sup> Rniabäza lo Dios te jäädläjz Jesucrist nen lastootu sa'csi ahuililajztu. Te che agusudzu'tztu, agusutijptu lo yälrinälajz

<sup>18</sup> dxejc sajc gacbeetu sigajc guiraa rexpejn pacni lacti gulajg, lactiza siool, lacti jäät, lactiza jiaa najc yäl'sanälajz xten Jesucrist.

<sup>19</sup> Te gumbeezatu xcäl'sanälajz Jesucrist ni najc gurobduxhtej, digacdi guichalonuni. Te chaza lastootu, näjza xcäriejntu con guiraa rexäl'nasa'c Dios.

<sup>20</sup> Dios rnibeduxh. Sajc gunidduxhruni loj xhitis ni rniabnu lojni, loj recos ni riennu xhigab. Con Sprit Dxi an ni rujn dzuun nen lastoonu suniidxni reyäl'nasa'c.

<sup>21</sup> Loj Diosre coldeed xquixtios. Colguiliä'p xpala'nni nen guidoo xcuent Dad Jesucrist guira dxej, par tejpas. Sugacni si'c.

## 4

### *Por Sprit Dxi an nadxaag sa'nu*

<sup>1</sup> Narä yu'ä lojtis Jesucrist te rsule'ätis xtiidxni. Ni'cni rniabä lojtu, guibajntu si'cni nungäj, si'cni bejnzatu xhigab cheni gurejdxni la'tu.

<sup>2</sup> Colguibajn con yäl'nalasajz, näjza yäl'nadolajz, colcuedxni lajztu. Colyujn huant resa'tu con yälrinälajz sa'ni.

<sup>3</sup> Colhuui te guidxaag sa'tu gactu tejsi con Sprit Dxi an ni ruscuedxilajztu.

<sup>4</sup> Si'c tejsi tiejxh najcnu loj Jesucrist, tejsiza najc xhigabnu con laani, tejsiza najc yälrunloj ni rajptu xcuent diidx nani gurejdxu.

<sup>5</sup> Rajptu tejsi Dad, tejsi yälrililajz, tejsi yälrbonis,

<sup>6</sup> tejsi Dios, tejsi Xdad guiraanu nani rnibee guira'ti lo guiraanu.

<sup>7</sup> Lo tejganu abaniidxni dzuun si'ctis bejn Jesucrist xhigab guniidxni lo tejganu.

<sup>8</sup> Ni'cni caj lo reguijtz:

Che huä'pni xhaguibaa, cadro rnibeeni,  
 abejnni gaan loj guiraa yälrnibee,  
 dxejcti badeedni dzuun lo rexpejn ni lo guedxliuj.

<sup>9</sup> ¿Xhi säloj cadro caj, "huä'pni"? Dee säloj ganid biäjtni maazru jäät lo guedxliuj.

<sup>10</sup> Lagajc nani biäjtgä, lagajc laani huä'pni jiaaru lo guiraa rexhaguibaa te sajc guinibeeni guibaa näjza guedxliuj.

<sup>11</sup> Lagajc laani badeedni xtzuum tejegareni. Yu'reni badeedni gac apost, yu'reni badeedni gac profe't, gaiireni badeedni gusule' xho rusläa xtiidxni bejn lo dojl, sgaiireni badeedni gac si'c ni ga'p reben guidoo, sgaiireni badeedni guluii rexpejn ni.

<sup>12</sup> Guiraa redee badeedni te guluiireni rexpejn Jesucrist, te gunreni dzuun te gustajlreni rebejn ni gac xquidoo Jesucrist.

<sup>13</sup> Nungäj gac dzuunre che guidzujnli dxej ni nadxaag-sa'nu guiraanu loj yälrililajz, che guidzujnli dxej riembesa'cnu Xi'n Dios, dxejc anajcnu benguyajl lo xtiidxni, si'c te ni aguroob loj xcälrnibee Jesucrist.

<sup>14</sup> Dirunu gac si'c rebuiux ni tera'tsi rusiejch lajzni, rucuaiajgreni xtidx chutis bejn, mase xhitis diidx ruluiini. Dxejc rajjreni lo redidx-xhii xten bejn nani rusguee, nani cabäjzti gusguee bejn.

<sup>15</sup> Maazru hueen chonuunu loj redidxlii xten Jesucrist con yälrinälajz te tiobnu lo guiraa recos xten nani rnibee, lagajc Jesucrist.

16 Loj Jesucrist nazdu'tz guiraa rexpejñni, te si'cni nazdu'tzsa'reni sääreni, najcreni tejsi loj tiejxh Jesucrist, racnäjä sa'reni segun xhi dzuun rujn teygareni, casieedrueni te cayajc xhidajlru rebejnğa con yäl-sanälajz.

### *Te yäl'nabancoob con Jesucrist*

17 Laa ni'cni rniä rniabäza con laj Dad Jesucrist na'cru guibajntu si'c nabajn rebejn nani di gumbec Dios. Laareni rujn si'ctis ni riabj yejcreni.

18 Nayääl xcäriejnreni, direni ga'p xcäl'nabajn Dios sa'csi nadduxh lastooreni.

19 Redee che gucnajd xcäriejnreni gusloj bejnreni guiraloj yälrtujy, guiraa redojl ni di nungäjł gunreni.

20 Niluxh la'tu xhet si'cdi bisieedtu loj Jesucrist.

21 Palga abiejn diajgtu xtiidxni, niluxh abaluini lojtu didxlii ni siädnä Jesucrist,

22 colgusaan yäl'nabanyujxh ni gojptu: Lo yäl'nabanyujxhga rujn bejn si'ctis ni rlanjni. Dxejcti si'c runijtni la'tu lo Dios.

23 Colgusiejch lajztu, colgusia xcäriejntu,

24 te gactu beñcoob nani bejn Dios, colchanuu te yäl'nabansa'c, te yäl'nabanya xten xtidxliini.

25 Colguřo'n diidx-xhii, colnii didxlii lo resa'tu sa'csi tejsi najcnu guiraanu.

26 Che guidxe'chtu, na'c guntu dojl. Na'c gusaant chu xcälrdxe'chtu guideb dxej che chääzli gubijdx.

27 Na'c gusaantu jiu' beñdxab neñ lastootu.

28 Nani rilajn, na'cru cuanni. Laaca gunni dzuun con naani te gunni te dzunsa'c nani gudeed meel lojni te gac gacnäzani rebejn nani xhet rajpdi.

29 Na'c gusaantu guirii nicla tej didxgujdx ro'tu. Colnii ganax didxsa'c te gacnäjni guisieed reni rucua diajgt xtiidxtu.

30 Na'c guntu gac-huin lajz Sprit Dxan xten Dios. Laani najc te seen xten Dios najctu xpejn Dios, ni'c rbäjzni neñ lastootu che guidzujñli dxej ni chäätu lo Dios.

31 Colguřo'n yäl'nabandxuudx xtentü, näj yälrdxe'ch, näj yälrdxagdijł sa'ni, näj yälrbexa', näj yälrgue. Colguibicaj lo guiraa redojlga, na'c gactu bengujdx.

32 Nungäjł gactu huen loj resa'tu, colgulasajz resa'tu, colsiäjł lajztu con resa'tu ni rujn dojl lojtu si'c rsiäjł Dios lajzni rextojłtu xcuent Dad Jesucrist.

## 5

### *Xho nanab guibajn rexi'n Dios*

1 Colguibajn si'c nabajn Dios, sa'csi najctu xi'nni nani sanälajzni.

2 Colchasanäj yäl-sanälajz sigajcni huinälajz Jesucrist nuure cheni badeedni lagajc laani lo Dios, cuajni lo cruzj, gujtni. Laani gujcn si'c gojn, gujczani yälrbibyaal ni bidxagajz Dios.

3 Nicla gusä'ttu yälrguee chääł bejn, nicla redojl dxuudx, niclaza yäl-sanälaztej xhixtentisni. Nicla gusä'ttuni lo sa'tu, sa'csi xhet si'cdi nungäjł gun bejn ni naban-naya.

4 Sigajcza colcuälaz diidx ni rujn xtujy, näjza didxnajd, näjza didxnaj nani digac laaca. Colgudeedtis xquixtios lo Dios.

5 La'tu anajntu nicla tej ni rusguee chälbejn, nicla tej beñdxuudx, nicla tej ni sanälaztej xhixtentisni, nicla renani rajñ rebanäjb, nicla tej reni'c di xca' yäl'nasa'c loj Jesucrist, dizareni jiu' lo xcälrnibee Jesucrist, xcälrnibee Dios.

6 Na'c gusaantu gusguee bejn la'tu con diidx ni xhet sajcdi sa'csi xcuent redzuunga riäd xcälrdxe'ch Dios loj rebejn ni di gusoob xtiidxni.

7 Na'c guntu sigajc rujnreni.

8 Galoo nacäjyitis xcäriejntu gubajntu, luxh naj abasanij Jesucrist xcäriejntu. Colguibajñ si'c nungäjļ guibajñ nani abianij xcäriejnmi.

9 Sa'csi nani abianij xcäriejnmi rujn dzunsa'c, rniini didxgulii.

10 Colguisieed xhini'c rchagļajz Dios.

11 Na'c guntu redzundxuudx nani rujn reni nacäy xcäriejnreni, coltilnäj reni rujn sa' dzunguijdxga.

12 Sa'csi te xtuỹli najc jjeinu diidx xcuent xtuunreni ni runxhiga'tzreni.

13 Niluxh guiraa sa' redzuunre ni rdilñajnu, huenliisi sien xhi najcreni, suzeņni lo xpianij Jesucrist. Sa'csi guira'ti ni ruzeņ najc nianij.

14 Ni'cni caj loj reguijtz, rājį Dios:

Gubajñ, huistie ļuj ni rejslu.

įHuistie lo doļļ, ļuj ni naga'lu lo doļļ si'c bengut,

te gusanij Jesucrist xcäriejnlu!

15 Colñhiii, colsin, na'c guibajntu si'c te bejñ nani di gachee, colguibajñ si'c bejñ nani yu' xcäriejnmi.

16 Coltedsa'c redxej sa'csi neņ redxejre ganax cosguijdx rujn bejñ.

17 Ni'cni na'c guibajntu si'c rebejñ nani di gachee, colyacnasiņ, te gacheetu xhini'c najc ni rļajz Dad xhaguibaa guntu.

18 Lacuaa yātu nejp nani runijį bejñ, colgapchee Sprit Dxan xten Dios neņ lastootu.

19 Colñii loj resa'tu rediidx nani gunii rebejñ tiemp gulä'preni xpala'n Dios, colyeļza redij xten Dios, con reyälriel colguiliä'p xpala'n Dios neņ lastootu.

20 Di jiaļ ļajztu gudeedtu xquixtios lo Dios xtdadnu con ļajį Dad Jesucrist.

### *Xho guibannäj sa' rexpejñ Jesucrist*

21 Sa'csi rajntu Jesucrist, colgusoob xtidx sa'tu.

22 Lojtu, regunaa ni abachņaa, rniä scree: Colgusoob xtidx chäältu si'c rusoozbatu xtidx Dad Jesucrist.

23 Sa'csi niguii rñibee gunaa si'cni rñibee Jesucrist xquidooni, niluxh laazani ruslaani rexpejñ guidooni lo redoļļ, najcreni si'c tiejxhni.

24 Ni'cni, sigajc rusooob reben guidooga nani rñibee Jesucrist gunreni, sigajcza nungäjļ gusoob regunaa ni abachņaa nani guinibeetis chäälreni gunreni.

25 Lojtu, reniguii ni abachņaa rniä scree: Colchanälajz chäältu sigajc ni huinälajz Jesucrist rexpeņ guidooni, badeedni lagajc tiejxhni loj Dios cheni cuajni lo cruzį por laareni

26 te basiani xtoļļ rexpejñ guidooni, te gujcreni te beņcoob, abidiib las-tooreni con xtiidxni si'c rdiib te cos con nis

27 te che xca'ni rexpeņ guidooni, najcreni te guidoo ni sajczu, te guidoo nani xheti xtoļļni, te guidoo nani sugadzu'tz, te guidoo xhet xhi riäädxdı, najcni te guidoya, xheti xhi xtoļļdini.

28 Sigajcza, te niguii nani abachņaa nungäjļ chanälajz chäälni sigajc sanälajzni lagajc tiejxhni. Nani sanälajz chäälni sanälajz lagajc laani.

29 Ruti chu te bejñ ni rbälaz tiejxhni; alga rajpni tiejxhni ruyaanni tiejxhni sigajc rajį Jesucrist rexpeņ guidooni.

30 Najczanu tejsi loj tiejxh Jesucrist, loj xpäälni, loj rextzujtni.

31 "Ni'cni che guchņaa te niguii rusa'nni xtdadni, xnanni, te xca'ni gunaa, te gac guiro'preni si'c tejsi bääl, si'c tejsi bejñ."

<sup>32</sup> Dee najc te diidx xhiga'tzduxh; li te “¿chuj?” najcni. Niluxh narä rniä xcuent Jesucrist con rexpenguídooni.

<sup>33</sup> Niluxh nanabpac chanälajz tejgatu chäältu sigajc sanälajztu tiejxhtu. Dxejcti gunaa ga'pzani xpala'n chäälni.

## 6

<sup>1</sup> Lojtu biuux, rniä scree: Colgucua diajg xtidx Jesucrist, colgusoob xtidx xtadtu sa'csi ni'c sajc nez loj Dios.

<sup>2</sup> Colga'p xpala'n xtadtu, xnantu, sa'csi ni'c najc didx galoo xten leii nani runiidx xhi xca'tu palga gusoobtu diidxga;

<sup>3</sup> “Te saruduxh guibajntu xchero lo guedxliujre.”

<sup>4</sup> La'tu, Dad ni najc guzajn, na'c guntu guidxe'ch rexi'ntu lojtu. Colguslaareni con yälñaj, colgulijdxeni con xtidx Jesucrist.

<sup>5</sup> La'tu ni najc mos, colgusoob xtidx xlamtu lo guedxliujre, colcuadiajg xtiidxni, xhet xhi steedi xhigabdi guntu nen lastootu. Colyejn xtzuunni si'cni najc xtzuun Jesucrist.

<sup>6</sup> Colyejn xtzuunni, niluxh xhet che suga'tisreni, cahuiireni, parsi jiansa'ctu lojreni. Maazru hueen guntu dzuun si'c xmos Jesucrist; colyejn guira'ti si'cni rujntu xtzuunpactu; si'cni rlajz Dios.

<sup>7</sup> Colyujn xtzuunni guideb lastootu si'c xmos Jesucrist, et si'c di xmos ben guedxliuj.

<sup>8</sup> Anajntu dzunsa'c ni gun tejgatu, lagajcza xcuent ni'c xca'tu loj Dad Jesucrist, mase najctu mos o mase rutlojdi yu'tu.

<sup>9</sup> Lojtu, relam, rniä scree: Sigajcza colyujn lojreni. Colgusaan yälrusacsí, sa'csi anajntu yu' xlamtu xhaguibaa, luxh tebloj najc guiraa rebejn nez lojni.

### *Nani gacw rexpejn Jesucrist lo guerr*

<sup>10</sup> Didx lult ni rniä, sa'ä, najc scree: Colsutijp lo xcälracnäy Jesucrist, colsudzu'tz lo xcälñadix xcälñabeeeni.

<sup>11</sup> Colgajcw xhabguuib xten Dios te gac sudzu'tztu lo reyälrusguee xten bendxab.

<sup>12</sup> Sa'csi xhet ben guedxliujtis cadiñäjnu. Cadiñäjzanu reguxhtis xte yälcäjy, näjza reyälñabee, rebejn nani rnibee loj reyälcäjyre, näjza rexangl bendxab nani rnibee bej xten guedxliujre.

<sup>13</sup> Ni'cni colca'ñ guideb lad-guuib xten Dios nani runiidxni loonu te gac sudzu'tznu nen dxej ni guideednu trabajwduxh, te che agudejdni, laltis sisiudzu'tznu.

<sup>14</sup> Colsudzu'tz pues. Xque'tu colguliib sindoor-guuib ni najc xtidx Jesucrist, colgajcw gamangw-guuib ni najc rextzunsa'c xten Dios ni rujntu.

<sup>15</sup> Colcuuaa gurach-guuib ni'tu (ni'c najc xtidx Jesucrist ni ruscuecdxi lajztu).

<sup>16</sup> Colca' escud-guuib ni najc yälñililajz te con yälñililajz xtidx Dios di bendxab gun gaan gusguee la'tu con rextidx-xhiini.

<sup>17</sup> Colca' yälñililajz xten Dios lo dojl si'c te xhumbrel-guuib chu yejctu; colca'za lans xten Sprit Dxan xten Dios ni najc xtidx Dios.

<sup>18</sup> Colñab lo Dios guiraa dxej; colñab lojni con Sprit Dxan xtenni; colsusintis; na'c jeedtu guiniabtu lo Dios xcuent guiraa xpejnñi.

<sup>19</sup> Colñabza lo Dios por narä te guuiidx Dios diidx cheni gal guiniä, te na'c guidxebä guiniä che guluiä didx-xhiga'tz xten yälñililajz bejn lo dojl.

<sup>20</sup> Xcuent rediidxga ni yu'ä nen latzguuib, caduä con caden. Ni'cni colñab lo Dios te na'c guidxebä guiniä rediidxga si'cpacni säbyälj guiniäni.

*Lult xtixtios*

<sup>21</sup> Niluxh te gacheetu xho sasaj rextzunä, nägajcza xho yu'ä narä, Tíquico, sa'nu ni sanälajznu, ni runsa'cza xtzun Dad Jesucrist, siääd lojtu te gusule'ni diidx.

<sup>22</sup> Laapacni ruxhalä lojtu, te gacheetu xho yu'nu, te si'c guscuedxini lajztu.

<sup>23</sup> Rniabä yälrbexilajz par resa'nu, näjza yälrlilajz con yälšanälajz xten Dios Xtadnu näjza xten Dad Jesucrist.

<sup>24</sup> Gacnäj Dios guiraa reni di gusguee, reni sanälajzpac Dad Jesucrist. Sugacni si'c.

## Te Guijtz Lo Reben Filipos

*Latzguiib yu' Pabl bacuaani loj rebenquidoo xten guedx Filipos*

<sup>1</sup> Pabl nájza Timoteu, nani najc rexmos Jesucrist, rucuaanu guijtzre lo guiraa rexpejn Jesucrist nani rbájz guedx Filipos, loj rebejn nani ruluii xtidx Dios nen reguidoo nájza loj rediaconos.

<sup>2</sup> Gacnáj Dios la'tu con yälrbedxi-lajz xten Xtdadnu nájza xten Dad Jesucrist.

*Rniab Pabl lo Dios xcuent rebejn nani rililajz*

<sup>3</sup> Che rnaj lazä la'tu, rudedä xquixtios lo Dios.

<sup>4</sup> Che rniabä lo Dios, rbaa lazä rniabä lo Dios xcuent la'tu,

<sup>5</sup> sa'csi abidxaag sa'nu lo xtidx Jesucrist che guslojli huililajztu hasta najli.

<sup>6</sup> Anancheä Dios nani gusloj cayunsa'c dzuun nen lastootu, lagajc laani suluxsa'c dzuunga dxejli ni jiäd Jesucrist.

<sup>7</sup> ¿Xhiru xhigab nungäj! gunä? Ni rapä la'tu nen lastoä sa'csi cayacnäjtu narä nen latzguiib luxh rsiudzu'tztu riye'tztu lo bejn, guliü najc rediidx nani rusule'ä xcuent Jesucrist nájza la'tu rusule'tu rediidxga.

<sup>8</sup> Dios nanchee xho rbannäätu, xho sanälazä guiraatu lo xcäl'sanälajz Jesucrist.

<sup>9</sup> Rniabä lo Dios te tiobru xcäl'rinälajztu náj xcäl'najntu nägajc churu xcäriejn guiraatu,

<sup>10</sup> te cuetu nani najc dzunsa'c te si'c guiban nayatu, te na'c ga'ptu nicla tej dojl cheni jiäd Jesucrist.

<sup>11</sup> Te guidxa lastootu yäl'nasa'c xten te yäl'nabansa'c ni runiidx Jesucrist, te guspaa lajztu Dios, guliü'ptu xpala'nni.

*Jesucrist najc xcäl'nabanä*

<sup>12</sup> Rlazä gacheetu betzá: guiraa nani gusacä ni'c cayacnäj guire'chru xtidx Jesucrist.

<sup>13</sup> Ni'c guiraa rebejn, renani yu' jusgaad sigajc renani yu' garenca lajt, anajnreni niäuä latzguiib xcuent Crist.

<sup>14</sup> Xhidajlru resa'nu cheni gucheereni yu'ä latzguiib, gusudzu'tzru lajzreni, direni nidxejb, guniirureni xtidx Dios.

<sup>15</sup> Guliica yu' reni rusule' xtidx Jesucrist sa'csi rdxe'ch lajzreni, rdxe'chzarenü loä. Yu'za reni rusule' xtidx Jesucrist sa'csi laaca najc xhigabreni.

<sup>16</sup> Yu'reni rusule' xtidx Jesucrist sa'csi rdxe'chreni, xhet sa'csi laaca najc xhigabreni, alga rujnreni xhigab gustioobrurenü trabajw nani tedä nen latzguiib.

<sup>17</sup> Niluxh yu' reni rusule' rediidxga sa'csi sanälajzreni Jesucrist. Anajnreni yu'ä latzguiibre te gusule'äru guliipac najc xtidx Jesucrist.

<sup>18</sup> Niluxh ¿xhiru najcni? Palga rujnsireni laaca o palga guliipac laaca najc xhigabreni rusule'reni xtidx Crist; rbaa lazä sa'csi care'ch xtiidxni niluxh sibaaru lazä.

<sup>19</sup> Ananä laaca guiriä loj guiraa recosre sa'csi canabtu lo Dios xcuentä. Luxh xcäl'racnäj Sprit xten Jesucrist

<sup>20</sup> rujn runloä, rbäzäza dina jianxtuiä. Ni'cni dina guidxebä guiniä, si'cni runäpac, sigajcza runä naj te gac guiliä'pä xpala'n Jesucrist con tiexhä palga guibanä o palga guetä.



21 Sa'csi palga guibañä, su'ä lo Jesucrist; luxh palga guetä sunäru gaan.

22 Palga guibañäru lo guedxliujre, sajrcu gunä xtzuun Dad Jesucrist, ni'cni dina gacheä xhinic cueä xca'ä.

23 Nagajn najcni par narä cueä lo guiro'preni. Te lajt runä xhigab: malaii guetä te cha'a cadro yu' Jesucrist sa'csi ni'c najc hueenru par narä.

24 Niluxh stee lajt nancheä nungäj] guibañäru lo guedxliujre xcuent la'tu.

25 Niluxh narä racbeäpac siannäaru la'tu, su'äru lojtu te chanuurutu lo xtidx Jesucrist, te guibalajztu lo yälirilajz,

26 te guibalajzrutu xcuentä loj Jesucrist che guibisacä lojtu stehuält.

27 Colhuiitis guibajntu si'cpac ni rni xtidx Jesucrist, te palga jädhuiätu o palga ruti narä, jiejn diagä sugadzu'tztu, rujntu tejsi xhigab, nadxaag sa'tu rujntu tejsi dzuun con yälirilajz xten xtidx Jesucrist.

28 Na'c guidxjebditu renani rdxe'ch lojtu. Laareni huenliisi rusen agu-nijtreni ni'c rdxe'chreni, ni'cni la'tu huenliisi rusen agulaatu nen dojl si'c baniidx Dios, ni'cni ditu guidxe'ch.

29 Sa'csi lojtu abaniidx Jesucrist chalilajztu xtiidxni. Niluxh xhet ni'ctis; nägajzca tedtu trabajw xcuent laani.

30 Cadejdtu lagajc trabajw ni cahuiitu gudedä luxh naj riejn diajgtu caded-sicä trabajwga.

## 2

### *Xcälinalaslajz näjza xcälgurobduxh Jesucrist*

1 ¿La ruspaa Jesucrist lajztu? ¿La racnäj xcälrinälajztu la'tu? ¿La yu' Sprit Dyan xtenni con la'tu? ¿La yu' xcälšanälajzni näj xcälruulasajzni lastootu?

2 Palga yu'ni, colguspaa lazä, colyejn tejsi xhigab con narä, colga'p lagajc yälšanälajzga, colguidxaag sa'tu, colyejn tejsi xhigab.

3 Na'c guntu nicla tej dzuun sa'csi cayutu lagajc la'tu, na'cza guntu dzuun te chä'p xpala'ntu. Colyejn xtzuuuntu con yälinalaslajz, colhuii loj sa'tu si'c benroru lojtu.

4 Na'c jiu chu tejtü lagajctis xhixtenni, coljiu tejgatu xhixten sa'ni.

5 Colga'p lagajc sa' xhigab nani gojpa Jesucrist

6 nani mase najcni sigajc Dios, dini niniazdzu'tz xcälrmibee Dios,

7 alga basa'nni te laad yälrmibee nani rajpni con Xtdni Dios te gujcn mos cheni gojlni lo guedxliujre. Gujcn si'ctis te bejn.

8 Che gujcn si'ctis ben guedxliuj, gujcn ben nadolajz, ben nasobdiidx. Basoobni xtidx Dios, gujtni lo cruzj, luxh yälrejt lo cruzj najc te yälrtuiduxh.

9 Ni'cni baspañsac Diosni, gule'cni Crist te lajt ni najc jiaaru, badeedza Dios sajrcu lajni lo laj guiraa relaj ni rusä't bejn.

10 Luxh che jiejn diajgreni laj Jesucrist, suzuxhijb guiraa reni yu' xh-aguibaa, guiraa reni yu' lo guedxliuj, näjza guiraa reni yu' nez nen yuj.

11 Te guiraareni gacheepac, guiniizareni: "Jesucrist najc Dad", te si'c chä'pduxh xpala'n Xtdnu Dios.

### *Rexpejn Jesucrist najc si'c bajl ni rusanij lo guedxliuj*

12 Ni'cni, resa'ä ni sanälazä, sigajcni rusoobtu xtidxä cheni suganää la'tu, sigajzca colgusoob xtidxä naj ni yu'ä zijt, colhuii tejgatu xho gac laatu nen dojl, colyajc bejn ni rusoob diidx con yälrdxejb.

13 Sa'csi Dios najc ni rujn dzuun nen lastootu te rajc rujntu xhigabsa'c, dxejc racnäjzani la'tu te rajc rujntu si'cni rlanjni.

14 Loj guira'ti ni rujntu, na'c gusmojmütu, na'cza guntu tiop lajztu,

<sup>15</sup> te rut gucuaquijditu, te gactu bejn ni ruchaag chutis bejn, gactu xi'n Dios, bejn nani xhet xtojldini yu' laj ni tre'tu loj rebenguijdx ni rujn redzunduudx. Nez lojreni gactu si'c te bajl ni rdimbicha' si'c rebalxhaguibaa che nacäjy,

<sup>16</sup> sa'csi arapdzu'tztu xtidx yäl'nabajn ni runiidx Crist neñ lastootu te guspaatu lazä dxej cheni jääd Jesucrist, sa'csi xhet xlia'di gujc xtzunä, xhetza xlia'di cayunä dzuun naj.

<sup>17</sup> Mase lagajc xtienä guixe' te guiza' te gojn ni xca' Dios xcuent xcälrililajztu, rbaa lazä, sibalaznääza la'tu.

<sup>18</sup> Sigajcza colguibaa lajztu, colguibalaznäj narä.

### *Timoteu con Epafrodito*

<sup>19</sup> Nez loj Dad Jesucrist cayunloä guxhalgacä Timoteu lojtu te näjza narä guibaa lazä che agucebeä xho yu'tu nejzga.

<sup>20</sup> Sa'csi rutru rapädi nani rujn tejsi xhigab, tej ni guliipac gun dzuun, jiupacni la'tu.

<sup>21</sup> Guiraa rebejnre rujntis xtzuuncareni, direni jiu gunreni xtzuun Jesucrist.

<sup>22</sup> Niluxh la'tu anajntu xho rujn Timoteu; si'c racnäj te bi'n xtdadni, si'cza racnäjni narä lo xtidx Jesucrist.

<sup>23</sup> Ni'cni rlazä guxhaläni te jädhuiini la'tu, fixgaäsi don xho sasaj xcuentä ree.

<sup>24</sup> Cabäzä nez lo Dad Jesucrist don la näjza narä sajl jädhuiagätu.

<sup>25</sup> Niluxh rchaloä nanabpac guxhalä bejtznu Epafrodito ni najc sa'ä loj dzuun, loj retrabajw ni cadejdnu. Lagajc la'tu baxhaltuni te jiuni narä, fini xhini'c rquinä.

<sup>26</sup> Laani rladzuxhni fini lojtu, lacti cayu'ni yärsia' sa'csi gucbeetu guxhuuni.

<sup>27</sup> Guliica gucxhuuni cuentro, ameer niejtni, niluxh Dios balaslajzni laani, luxh xhet laatisni, balaslajzzani narä te di nidedäru loj yäl'nahuinlajz ni yu'ä ree.

<sup>28</sup> Ni'cni rlazä guxhalgacäni te guibalajztu che fisactu lojni, näjza te na'cru gac-huinlazä xcuent la'tu.

<sup>29</sup> Colca'ni con yälrbalajz si'c bejtztu lo xtidx Dios, sigajcza colyejn reni najc sigajc laani.

<sup>30</sup> Xcuent xtzuun Jesucrist ameer niejtni, dini niu xcäl'nabajntisni te bejnri redzuun nani di niajcdi niujntu lagajc la'tu xcuentä.

## 3

### *Te yäl'nabansa'cpac*

<sup>1</sup> Naj rebetzä, colguibalajz nez lo Dad Jesucrist. Xhet najcdi gucasacä lagajc rediidx nani abacuaä lojtu, sa'csi sacnäjni la'tu.

<sup>2</sup> Colnati renani najc si'c bä'cw. Colnatiza rebejn nani rujn dzun guiidx. Colnatiza reni ru' bee tiejxhtisreni luxh xlia'si rujnreni si'c.

<sup>3</sup> Renani guliipac yu' bee najc nuure nani ahuililajz xtidx Dios, rienzanu xtzuunni si'cni rlazni sa'csi ayu' Sprit Dxan xtenni neñ lastoonu. Rbalaaznu sa'csi najcnu xpejn Dad Jesucrist, xhet xcuentdi redzuun ni rujn tiejxhnu.

<sup>4</sup> Narä sajca guibalazä xcuent ni rujn tiexhä. Palga yu' chu tej ni rbalajz, narä rbalazäru

<sup>5</sup> sa'csi guyu'ä bee che guyu'ä xhujn gubijdx; narä nacä te rexpejn Israel; narä nacä tej rexpejn toBenjamín, nacä te hebreo, luxh xtdä najc te beñ hebreo; xcuent leii nacä te farisee.

<sup>6</sup> Basobduxhä guiralii rextidx Dios ni caj lo leii ni'cni basacsiduxhä rexpēn Jesucrist; xcuent yäl'nabansa'c xten leii, xhetliidi xtolä yu'; basobdzu'tzä xtidx leii.

<sup>7</sup> Niluxh naj rediidx nani galoo benä xhigab sacduxh, naj xhet sajcdini sa'csi sanälazä Jesucrist.

<sup>8</sup> Niluxh maazru runä: runä xhigab xhet sajcdi guiraa nani rapä, sa'csi maazru sacduxh yäl'riembeē Jesucrist ni najc Dad xtenä. Xcuent Jesucrist gulälazä guira'ti, guira'ti najc si'c guixbiujy nez loä te gunä gaan Jesucrist,

<sup>9</sup> te chu'ä lojni, xhet xcuentdi xcäl'nabansa'cä ni najc xcuent leii, alga xcuent yäl'nabansa'c ni najc xcuent xcäl'rilihajz Jesucrist, yäl'nabansa'c ni najc xten Dios xcuent yäl'rilihajz.

<sup>10</sup> Ni'cni rlazä gumbeäru Jesucrist loj yäl'rnibee ni rajpni sa'csi huistie gubansa'cni sacni loj rebengut, te gumbeäru retrabajwduxh ni gudejđni, te ganä xho gunä ni rlahz Dios si'c gucbee Jesucrist, bejnzani ni rlahz Dios che gujtni.

<sup>11</sup> Te gac guidzunä lo yäl'guibansac loj rebengut te xca'ä yäl'nabajn par tejpas lo Dios.

<sup>12</sup> Dizana guiniä “abenä gaan” o “anacä beñsa'c”, alga sanuätis te gunä gaan yäl'nabajn nani cua'ä lo Jesucrist.

<sup>13</sup> La'tu rebetzä, dipacna gunä cuent alabenä gaan, niluxh tejtis nani runä, riallazä nani agudejđ, rusgää naä si'cni guiniazä nani churu gac.

<sup>14</sup> Si'cni sanuutis ruxun bejn te gunni gaan xhi guzalajzni, si'cza sanuutis cayunä dzuun nani baniidx Jesucrist loä, te che abenä gaan dzuunga sica'ä ni guzalajzni, nalajznu sibejdx Dios narä cha'a loj Jesucrist.

<sup>15</sup> Guiraanu nani ahuililajznu, nanab jiennu lagajc xhigabga, niluxh palga la'tu guntu ste'ca xhigab, rchaloä lagajc Dios sululojni lojtu xcuent ni et laadi cayujntu.

<sup>16</sup> Naj, cadrotis abidzunnu lo nani abiembeenu, sigajcza nanab guibansijcnu, chanuutis gusoobnu rediidxga; nungäjł guibajñnu loj rediidxre, jiennu tejsi xhigab.

<sup>17</sup> Rebetzä, coltanajł narä, colyejn si'c runä narä, colhuiiza rebejn nani nabajn si'c nabanä.

<sup>18</sup> Xhidajł huält aguniä lojtu, naj ronäli rnisacä lojtu, yu' xhidajł reni rdxe'ch lojtu, rniyajreni nani bejn Jesucrist che gudijxni xtojłnu lo cruzj.

<sup>19</sup> Redee che luux xnezujreni sinitlojreni, sa'csi xtioozreni najc yäl'rausa'c; luxh rbaali lajzreni rujnreni dzun xtujy; luxh riutisreni xcäl'nasa'c guedxliujre.

<sup>20</sup> Niluxh nuure, xhaguibaali najc laadxnu, luxh ro'cli cabääznu jiääd nani ruslaanu nen dojł, nalaaznu lagajc Dad Jesucrist.

<sup>21</sup> Laani suchaani tiexhnu ni rajpnu lo guedxliujre, te gac tiexhnu sigajc najc tiejxhni lo xcäl'rnibeeni. Sujñni dee con yäl'rnibeduxh ni rajpni te rnibeeni loj guirali'ti, guiraa nejz.

## 4

### *Colguibalajztis xcuent Dad Jesucrist*

<sup>1</sup> Ni'cni rniä lojtu, rebetzä nani sanälazä, lojtu ni rlazä fisacä, lojtu ni ruspaalazä, lojtu ni najc yäl'nasa'c xtenä, col'sudzu'tz loj xtidx Jesucrist.

<sup>2</sup> Rniabduxhä lo Evodia näjza lo Síntique, rulidxäreni gunreni tejsi xhigab xcuent Dad Jesucrist.

<sup>3</sup> Sigajcza rniabä lojlu betzä, ni runnäj narä dzuun, gucnäj regunaare ni bennäj narä dzuun, bideednu trabajw xcuent xtidx Jesucrist. Gucnäjza

Clemente nájza guiraa reni bennäj narä dzuun; alajreni caj neñ reguijtz xten yälñabajn par tejpas.

<sup>4</sup> Colguibalaznäjti Dad Jesucrist; stehuält rniä: colguibalajz.

<sup>5</sup> Sugabee guiraa rebejn xho najc xcälñabajntu lo xtidx Dios. Asiäddzungajxh dxej xten Dad Jesucrist.

<sup>6</sup> Na'c guidxejbtu, colñabtis lo Dad guira'ti, colgudeedza xquixtios lojni lañ ni cabedx-canabtu lojni.

<sup>7</sup> Dios guniidx xcälrbedxilazduxhni, nicla guntu xhigab lacti najc yälrbedxilajzga. Yälrbedxilajzga ga'p lastootu nájza xcäriejntu loj Dad Jesucrist.

### *Colyejn xhigabsa'*

<sup>8</sup> Mbaj naj, deetis guiniä lojtu rebetzä, sa'tis rediidxre gusaantu chu loj rexhigabtu: guiraa ni najc guliipac; guiraa rediidx ni nanab guiliä'pni xpala'ni, guira'ti nani nacsa'c; guira'ti nani naya; guira'ti nani najc saru; guira'ti nani rapsa'c xpala'n lajni; náj palga yu' xhi dzuun ni nacsa'cpac, o palga yu' xhi te diidx ni sajc guiliä'p xpala'ni, xcuent guiraa reni'c colyejn xhigab.

<sup>9</sup> Nani bisieedtu, nani cua'tu, nani biejn diajgtu, nani bahuiitu benä, ni'c guntu te Dios ni rbedcxilajz, laani jiannäjni la'tu.

### *Gojn xten refilipenses ni xca' Pabl*

<sup>10</sup> Rbaduxh lazä nez loj Dad Jesucrist sa'csi banasac lajztu gacnäjtu narä. Guliini; galooli rlaiztu niacnäjtu narä, luxh di niacijdini.

<sup>11</sup> Dinä guiniä si'c sa'csi yu' xhi cayädxä, sa'csi abisiedä guibaali lazä loj xhitis ni rapä.

<sup>12</sup> Sajc guibanä che guxii rapä; sajc guibanä che xhidaj rapä; abisiedä guibanä xhotis: sajc gauduxhä, sajczä guilianä; sajczä gapä xhidajl xhixtenä, sajczä tedä trabajw.

<sup>13</sup> Guira'tini sajczä gunä sa'csi Jesucrist racnäj narä.

<sup>14</sup> Niluxh xhet najcdi; laaca dzuun bejntu che bejntu xhigab gacnäjtu narä lañ ni cadedä trabajw.

<sup>15</sup> Gabee guejbtu, dad filipenses, che gusloj caguliä xtidx Jesucrist lojtu, cheni biriä reguedx Macedonia, nicla tej guidoo di niacnäj narä, la'tistu gucnäj narä.

<sup>16</sup> Cheni yu'äli guedx Tesalónica, baxhañtu meel loä tej-tio'p huält.

<sup>17</sup> Niluxh narä di rlazä xca'ätis xhixtentu ni guniidxtu, nani rlazä najc tioobru xcälñasa'ctu nez lo Dios xcuent dzuun ni rujntu ruxhañtu meel loä.

<sup>18</sup> Naj acua'ä guiraa ni baxhañtu, arapä xhidajl, arapduxhä sa'csi acua'ä nani biädnä Epafradito baxhañtu loä, te gojn ni rlianejxh si'c guxhyaal, te dzunsa'c ni rchaglajz Dios.

<sup>19</sup> Dios xtenä guniidx lojtu guiraa nani riäädx xca'tu, si'ctisni rajpni reyälñasa'cduxh xhaguibaa con Dad Jesucrist.

<sup>20</sup> Colguiliä'p xpala'n Dios xtadnu guixe-guixee par tejpas. Si'c gacni.

### *Lult xtixtios*

<sup>21</sup> Coldeed xtixtios lo guiraa rebejn ni abia lastooni nez loj Dad Jesucrist. Rebejtznu ni yu' ree náj narä ruxhañtu xtixtios lojtu.

<sup>22</sup> Guiraa rebeñree ni abia lastooni nez loj Dad Jesucrist ruxhañtu xtixtios, niluxh ruxhañru resa' César xtixtios lojtu.

<sup>23</sup> Suga'p xcälracnäj Dad Jesucrist lastootu. Sugacni si'c.

## Te Guijtz Lo Reben Colosas

### *Bacuaa Pabl loj reben guidoo ni yu' guedx Colosas*

<sup>1</sup> Narä, Pabl nacä te apost xten Jesucrist. Dios gule narä. Narä näjza bejtznu Timoteu

<sup>2</sup> cagucuaanu reguijtzre loj reben Colosas nani nabannaya rujnreni si'cpacni rlaiz Dios, näjza reni najc bejtznu lo xtidx Jesucrist. Xca'tu yälracnäjä näjza yälrbexilajz xten Dios xtdadnu.

### *Rniab Pabl gudeed Dios yäl'najn xtenni*

<sup>3</sup> Rdeednu xquixtios lo Dios xtdad Dad Jesucrist rniabnu lojni xcuentu guixe-guixee.

<sup>4</sup> Abiejn diajgnu xho rililajztu xtidx Dad Jesucrist, näjza xho sanälajztu rebejn ni ahuililajz xtidx Jesucrist,

<sup>5</sup> sa'csi cabäjztu xca'tu reyäl'nasa'c ni yuchee xhaguibaa par la'tu. Laa xcuent reni'c ni biejn diajgtu cheni bacuadiajgtu xtidxlii Jesucrist xcuent yäl'ruslaa lo dojl.

<sup>6</sup> Laa rediidxga ni abiääd lojtu sigajc ni bire'chni guideb lo guedxliuj, luxh cayac xhidajlru rebejn ni cayabee diidxe, asalilajzreni diidxga, sigajc guzajctu la'tu. Cheni biejn diajgtu xtidx Jesucrist, dxejc biembeezatu guli-pac najc xcäl'rulasajz Dios.

<sup>7</sup> Sigajcza bisieedtuni lo Epafras, ni sanuutis cayacnäjni nuure lo dzuun. Laani najc te bens'a'c, yu'ni lojtu cayujnpacni xtzuun Jesucrist lacuaa nuure.

<sup>8</sup> Laani abasule'ni diidx loonu xho sanälajz sa'tu sa'csi nabajñ Sprit Dxan xten Dios neñ lastootu.

<sup>9</sup> Laa ni'cni dxejli nani biejn diajgnu diidxe xcuentu, di cuäaz cabedx-canabnu lo Dios, canabnu gacheduxhtu xho rlaiz Dios guntu, guniidxni guiraa yäl'najn näjza gusanijni xcäriejntu

<sup>10</sup> te guibajntu si'cni nungäjñ guibajñ bejn ni sanajñ Dad Jesucrist, te guspaatu lajzni lo guiraa redzuun. Chanuuzatu gunrutu guiraa redzunsac näjza jianijru xcäriejntu xcuent yäl'riembe Dios.

<sup>11</sup> Tioobrutu loj xcäl'nadip, xcäl'rnibee Dios te guibaa lajztu gusutiplajztu, cue'cdxilajztu loj xhitis ni sajctu.

<sup>12</sup> Guibalajznu guideednu xquixtios loj xtdadnu Dios nani basudzu'tz nuure te xca'nu yäl'nabajn par tejpas sigajc guiraa rebejn nani ahuililajz xtiidxni yu'reni lo xpianijni.

<sup>13</sup> Laani abaslaani nuure loj xcäl'rnibee yäl'nacäjä, abateedni nuure lo xcäl'rnibee xi'nni ni sanälajzni.

<sup>14</sup> Laa xi'nni ni baslaa nuure neñ dojl cheni baxhe'ni xtiejnni, gujtñi lo cruz, dxejc gudijxni rextojñu.

### *Gubisacnu loj Dios xcuent xcäl'gajt Jesucrist*

<sup>15</sup> Rut rajcdi ruhuii lo Gueb-Dios, niluxh xi'nni najc si'cpac najc Dios; si'cpac rujn lojni. Laani guyu'ni galodoo luxh rnibeeni lo guiralii ni yu' lo guedxliuj.

<sup>16</sup> Por laani benchee Dios guiralii ni yu' xhaguibaa ni yu'za lo guedxliuj, renani ruzeñ sigajc renani di guzeñ: re'reii, näjza reni rnibee loj rexangl Dios, näjza reni rnibee loj rexangl bendxab, nägajcza reyäl'rnibee xten reguixhajg,

sigajczani loj regubier, lo reguxhtis ni rajp yälrnibee, guiraani guc-chee por laani, näjza par laani.

<sup>17</sup> Alanabajn Jesucrist galooli, che gajdli guirixtiej guedxliuj. Por laani yu' guira'ti ni yu'.

<sup>18</sup> Laani najc nani rnibee guidoo, nalajznu rebejn nani ahuuilajz xtiidxni. Laani najc ni guläxtiej guira'ti. Ganiddoo laani huäjs lo rebengut te rnibeeni. Loj guira'ti ni yu' laatisni najc nani sajc guinibee.

<sup>19</sup> Sa'csi bidxagljaz Dad Dios ga'p Jesucrist guiralii yälrnibee nani najc xten Dios,

<sup>20</sup> por lagajcza Jesucrist badzu' Dios guira'ti ni yu', guibi'reni lojni, reni yu' lo guedxliuj sigajc reni yu' xhaguibaa, sa'csi abiäj-lajzni, aguredxi lajzni sa'csi bixe' xtiejn Jesucrist lo cruzj.

<sup>21</sup> Luxh la'tu gujctu si'c benzijt lo Dios sa'csi galoo rdxe'chtu lo Dios nen lastootu xcuent redzunguijdx nani bejntu.

<sup>22</sup> Niluxh najc abiäj-lajz Dios abadzu' Jesucrist la'tu, agucnayatu gubi'tu lo Dios xcuent xtiejn Jesucrist ni baxhe'ni lo cruzj cheni gujtni. Ni'c bejnne te che suutu nez lojni, xhetiru xtojltu, xhet xhi guiniidi Dios lojtu sa'csi anayapactu.

<sup>23</sup> Niluxh riäj lchanuu sudzu'tztu, cuedxitu lo yälrlilajz. Na'c gusaantu chu gusiejch-lajztu te cuälaztu xtidx Jesucrist nani abiejn diajgtu. Rediidxga abasule'zanu loj guiraa rebejn ni re' lo guedxliujre. Luxh lagajc narä, Pabl rusule'ä diidxga sa'csi parpac ni'c gule Dios narä.

### *Dzuun guidoo najc xcuent Pabl*

<sup>24</sup> Najc rbalazä cadedä trabajw xcuenttu sa'csi retrabajw ni cadedä lagajc narä cagusa' nani cayäädx lo retrabajw xten Crist xcuent guidoo, nalajznu rebejn ni ahuuilajz xtiidxni, ni najc si'c tiejxh Jesucrist.

<sup>25</sup> Ni'c nacä te bejn ni rusule' diidx nen guidoo. Dzuunga baniidx Dios gunä par xcäl'nasa'ctu te gusule'äpac guiragajc xtidx Dios,

<sup>26</sup> te gacheenu rexhigabxhiga'tz nani najc xhiga'tz galododuxh niluxh najc abaluiini redidx-xhiga'tzre loj rexpejni.

<sup>27</sup> Lojreni bejn Dios xhigab guluiini reyäl'nasa'c xten yälrdimbicha' xten redidx-xhiga'tz ni cagusule'ni loj rebenzijt. Yälxhiga'tzre säloj Jesucrist rbäjz nen lastootu ni'c runlojtu chaläjztu lo yälrdimbicha' xten Dios.

<sup>28</sup> Rusule'nu diidx xcuent Jesucrist, ruliidxnu guiraa rebejn, guideb yäl'najn ruluinu te gusa' yäl'najn xten guiraa rebejn xcuent Jesucrist che guidzujreni nez loj Jesucrist.

<sup>29</sup> Xcuent dzuunre guideb xtipä runä dzuun con guiraa yälrnibee nani runiidx Jesucrist narä.

## 2

<sup>1</sup> Rlazä gacheetu lacti cadedä trabajw xcuentu, näjza xcuent reni yu' guedx Laodicea, näjza xcuent guiraa reni gajd gumbee narä.

<sup>2</sup> Te tioob lastoo guiraatu sa'csi abidxagsa' lastootu lo yäl'sanalajz, näjza te ga'ptu guiraa reyäl'nasa'c ni rajp bejn che rachesa'creni xtidx Dios. Te gumbeezatu guiraa redidx-xhiga'tz xten Dios xtdadnu näjza Dad Jesucrist.

<sup>3</sup> Nen lastoo Dios näjza lastoo Jesucrist naga'tz guiraa reyäl'nasa'c xten guiraa reyäl'najn, guiraa yäl'nubee.

<sup>4</sup> Dee rniä lojtu te di gusguee chu gusguee con rediidx-xhi.

<sup>5</sup> Te palga ruti narä ro'c, canaj lazä la'tu, cabaa lazä cahuiä laaca cayujntu, sugatzu'tztu loj yälrlilajz xten Jesucrist.

6 Ni'cni sigajc ni huililajztu xtidx Jesucrist, sigajcza colchasanāj Jesucrist.

7 Colsudzu'tz lo Jesucrist si'c rsiobdzu'tz xlobaa te yajg. Colsudzu'tz lo yälrlilajz xten Jesucrist si'c ni abisieedtu. Colgudedduxhru xquixtios lo Dios.

### *Yäl'nabanc'oob ni rudeed Jesucrist*

8 Colhuii, na'c gusaantu guxhiid bejn xcälrlilajztu con xtiidxtisreni näjza rediidx nani xhet sajcdi, si'c najc xtidx reben galoo, näjza si'c najc diidx xcuent xhigab xten reben guedxliuj, di rediidxga gac si'cni rlajz Jesucrist.

9 Sa'csi guiralii ni najc Dios, lagajc ni'c najc Jesucrist, niluxh yu' tiejxh Jesucrist.

10 Xhet cayäädxdidi lo yäl'nabajn xten Dios ni rajptu sa'csi najctu tejsi con Jesucrist. Laani rnibee guiraa reyäl'guxhtis, guiraa reyäl'rnibee ni yu' guira lajt.

11 Sa'csi huililajztu Jesucrist aguyu'tu bee, niluxh xhet beedi nani rusäl bejn con naareni, alga xpee Jesucrist, ni najc yäl'rusia xtoj bejn sa'csi rusaan bejn redzunguijdx, rujnreni tejsi xhigab con Jesucrist. Si'c najc xpee Jesucrist.

12 Cheni gurobnistu najcni si'cni agujttu ni'c biga'tztu con Jesucrist, najzani si'cni gubansactu con laani sa'csi huililajztu rajp Dios yäl'rnibee nani gulässac Jesucrist lo reben'gut.

13 Che najctu si'c ben'gut lo dojl, näjza sa'csi di bee niu' tiejxhtu, dxejcli baniidx Dios yäl'nabajn par teipas lojtu con Jesucrist, badzucajni guiraa rextojlnu.

14 Dios badzucaj guiraa releii nani basäuu nuure nen dojl, badzucajnini lojni, sa'csi bacuaanini lo crujz, cadre gudijx Jesucrist guiralii rextojlnu.

15 Cheni gujt Jesucrist lo crujz bejnni gaan loj reyäl'guxhtis näjza guiraa reyäl'rnibee xten ben'dxab näjza rexspritni. Basanxujynireni nez loj guiraa rebejn. Laani bejnni gaanreni cheni cuajni lo crujz.

### *Colquüil recos ni najc xten xhaguibaa*

16 Nicla tejtü na'c cubee sa'ni xcuent reyäl'rajw näjza reyäl'rä', niclaza xcuent redxe lanij näjza rexchej rebäicoob, näjza redxej ni rusilajzni.

17 Guiraa redee najc si'csi te balaa xten nani churu jääd, te guluiireni ni rujn balaaga, nalajznu ni'c najc Jesucrist.

18 Na'c gusaantu gudzucaj bejn xcäl'nasa'ctu te gunreni gactu nadolajz, te gan'tu reangl. Sa' bejn'ga richu' loj nani gajdreni fii; rchaloreni najcreni benro xcuent lagajc xhigabreni.

19 Laareni direni chanajl Jesucrist nani rnibee, nani rujn roobru tiejxhni, nalajznu rexpejnni, sa'csi lojni rca'reni ni rquiin lastooreni, te ruchaagni sa' tejpgareni si'c nadxaquiid bääl cuä' dzujt lo tiejxh bejn, te gacreni tejsi con Dios.

20 La'tu agujttu con Jesucrist, abiriitu lo rexhigab xten guedxliujre. Naj xhiciuent guibajntu sigajctis nabajn rebejn nani di gumbee xtidx Jesucrist, ä? Xhiciuent rusoobtu rediidx ni caj lo releii? Loj releii caj sa' diidxre:

21 "Di chahuallu dee, di gaulu ni'c, di canlu dec."

22 Luxh guiraa redee rnitloj che runnäjnini dzuun. Luxh guiraa sa' leiiga najc diidxtis nani ruluii bejn.

23 Guluiicani sa' releiiga rien asdoo ruluiireni yäl'nanduxh, luxh che ru-soob bejn releiiga rchaloreni rajnreni Dios, rchaloreni rac nadolajzreni, rusacsireni lagajc tiejxhreni. Niluxh xlai'si rujnreni guiraa redzuunga, sa'csi sanuutis rujnreni si'ctisni rlajz tiejxhreni.

## 3

1 Palga anabansactu con Jesucrist, colquiiil reyäl'nasa'c ni yu' xhaguibaa cadro sobga' Jesucrist xladbee Dios.

2 Colyejn xhigab xcuenttis reyäl'nasa'c ni yu' xhaguibaa, na'c guntu xhigabtis xcuent reni yu' lo guedxliuj.

3 La'tu anajctu si'c bengut loj reyäl'nasa'c ni yu' lo guedxliuj, luxh yäl'nabajn ni rajptu naj, yäl'nabajnga naga'tz con Dios xcuent Jesucrist.

4 Che guluiilosac Jesucrist ni najc xcäl'nabajntu, dxejc näjza la'tu suluiilojtu con laani lo xcälrdimbicha'ni.

*Yäl'nabanbiejw con yäl'nabancoob*

5 Colcuälaz redzunguijdx xten guedxliuj nani rujntu, yäl'rusguee gunaxteb, yäl'rujn recosdxuudx, recos ni rdxaglazj tiejxhtu, rexhigab-guijdx, yäl'rsiäb-lajz xhi xten bejn, guiraa redee rujn runijt bejn lo Dios sigajc rujn bejn che rajn bejn rebanäjb.

6 Guiraa redzuunga rujn riääd xcäl'rdxe'ch Dios yejc renani rujn sa' redzuunga.

7 Näjza la'tu bejntu sa' redzunguijdxga galoo cheni guyu'tu lo sa' yäl'nabajnga.

8 Niluxh naj näjza la'tu colgusaan recosre; nalajznu yäl'rdxe'ch, yäl'ruche'ch sa'ni, yäl'rujn latzsiaj sa'ni, yäl'rniyaj sa'ni, näjza rediidx-dxuudx ni rniitu.

9 Na'c gusgueetu resa'tu, sa'csi nanab gusaantu nani bejntu cheni guyu'tu loj redzunguijdx.

10 Colyajc te bencoob, ni guixe-guixee cayanijru xcäriejnni, te gumbesa'ctu Dios, te gactu sigajc najc Dios ni benchee benguedxliuj.

11 Lo yäl'nabancoobre rutiru benzijt, niclaza xpeñ Israel, rutiza rebejn ni ru' bee, niclaza bejn ni di chu bee; rutiza benzijt, niclaza bejn ni siääd zitduxh; rutiza mos, niclaza bejn nani di chu lo bejn, sa'csi che rililajz te bejn xtidx Jesucrist najcni tebloj con guiraa reni rililajz xtidx Jesucrist; guiraareni najc xpejn Jesucrist.

12 Naj agule Dios la'tu te gactu xpejn nani gac naya, nani sanälajzni, colguibajn con yäl'rulasajz, na'c guidxe'chtu, colyacnadoo con yäl'nadolajz, colniiza nadolajz.

13 Colyujn huant, na'c guidxe'chtu loj sa'tu, palga yu' chu sa'tu rdxe'ch loj sa'ni, colgusiäj-lajztu sigajcni basiäj-lajz Dad Jesucrist lojnu xcuent rextoljnu.

14 Che abejntu guiraa recosre, colguuilru yäl'sanälajz nani rusa' loj guiraa recosre.

15 Xcäl'rbedxilajz Dios guinibee neñ lastootu, sa'csi parpac ni'c gurejdxni la'tu, te gaczatü tejsi con rexpejn Jesucrist. Colgudeed xquixtios loj Dios.

16 Xtidx Jesucrist chuduxh neñ lastootu con guiraa yäl'najn, te guluiitu, te gulijdxtu tejsa resa'tu con redij nani gulä'p toDavid xpala'n Dios, näjza redij nani roltu, näjza redij nani rliä'p xpala'n Dios. Redijga goljnu te guideednu xquixtios lo Dios neñ lastoonu.

17 Guira'ti nani guntu, sigajc rediidx ni rniitu, sigajcza redzuun ni rujntu, colyejn guiraani con laj Dad Jesucrist, coldeed xquixtios lo Dios xtdadnu con laj Jesucrist.

*Xho nanab guibajn te famil ni najc xpejn Jesucrist*

18 Regunaa nani abachnaa, colgusoob xtidx chäältu sa'csi si'c rlanj Dad Jesucrist.

19 Reniguii nani abachnaa, colchanälajz chäältu, na'c guidxechnäjtüreni.



<sup>20</sup> Reni najc biuux, colgusoob xtidx xtadtu loj guira'ti, sa'csi si'c rchagljajz Dad Jesucrist.

<sup>21</sup> Reni najc Dad, na'c guche'chtu rexi'ntu, didi gac-huin lajzreni.

<sup>22</sup> Reni najc mos, colgcuadiajg xtidx xlamtu lo guedxliujre loj guira'ti xtzuumni. Na'c gansa'ctu dzuun che cahuiitisreni si'c rujn renani ruspaalajz bejntis. Con yalnadolajz colyejn dzuun sa'csi sanälajztu Dios.

<sup>23</sup> Guira'ti nani guntu, colyejnni guideb lastootu si'c xtzuum Dios, et si'c xtzuumdi rebejntis.

<sup>24</sup> Anajntu lo Dad Jesucrist sica'tu yalnasa'c ni najc yalnabajn par tejpas, sa'csi loj Dad Jesucrist rujntu dzuun.

<sup>25</sup> Niluxh nani rujn recosguijdx, lagajc xcuent recosguijdxga gudeed Dios lojni, sa'csi tebloj rujn Dios guiraa rebenguijdx.

## 4

<sup>1</sup> Renani najc lam, coldeed loj rexmostu nani riäjł xca'reni sa'csi anantu näjza la'tu rajptu xlamtu xhaguibaa.

<sup>2</sup> Colchanuu colnab lo Dios, colsusin che rniabtu lo Dios. Colgudeed xquixtios lo Dios.

<sup>3</sup> Colnabza lo Dios con nuure te gacnäj Dios narä gusule'ä xtidx Jesucrist, te gusule'ä redidx-xhiga'tz xten Crist. Xcuent ni'cza yu'ä neñ latzguiib.

<sup>4</sup> Colnab lo Dios te guyasi gusule'ä rediidxga si'cni riäjł guiniä.

<sup>5</sup> Colguibanšin loj rebejn nani di gumbee xtidx Jesucrist, colgusule' diidx cheni riäjł guiniitu lojreni.

<sup>6</sup> Rextiidxtu nanab gacni si'c rchagljajz Dios, saruduxhza gac xtiidxtu te gacheetu xho riäjł gudzu'tu diidx loj tejgareni.

### Lult xtixtios

<sup>7</sup> Tiquico, bejtznu ni sanälajznu, ni runsa'c dzuun, ni najc xmos Dad Jesucrist, laani gusule'ni diidx lojtu xcuent guiraa rextzunä.

<sup>8</sup> Ruxhaläni lojtu te gacheepactu xho yu'ä, te guspaani lajztu.

<sup>9</sup> Laani jädnäzani Onésimo nani najc te betznu ni sanälajznu. Laani najc tej resa'tu. Laareni gusule'zareni guira'ti nani cadeednu ree.

<sup>10</sup> Aristarco, nani yunäj narä neñ latzguiib, ruxhalni xtixtios lojtu näjza Marcw, betz prim xten Bernabé (abacuaä lojtu xcuentni, xho guntu, palga jädhuiini la'tu, sacru colhuiini).

<sup>11</sup> Näjza Jesús nani laaza Justo, ruxhal xtixtios lojtu. Laatisreni najc rexpejn Israel nani cayacnäj loj dzuun xten xcälrnibee Dios. Laareni ruspaalazä.

<sup>12</sup> Epafras, ni najc te sa'tu, ruxhal xtixtios lojtu, luxh rniabduxhni xcuenttu lo Dios te sudzu'tztu guntu guiragajc ni rlaiz Dios guntu.

<sup>13</sup> Narä rnilä xho rdzuun Epafras xcuent la'tu, näjza xcuent rebejn ni yu' guedx Laodicea, näjza guedx Hierápolis.

<sup>14</sup> Lucas, doctoor ni sanälajznu, näjza Demas ruxhalzareni xtixtios lojtu.

<sup>15</sup> Coldeed xtixtios loj rebejtznu nani yu' guedx Laodicea, näjza loj Ninfas, näjza lo rebejn nani re' rolizni.

<sup>16</sup> Cheni agulujx biltu guiitzre, colguxhalni te jielni neñ guidoo xten guedx Laodicea, dxejcti colyelza guiitz nani baxhalä lo reben guedx Laodicea.

<sup>17</sup> Colye'tz loj Arquipo: "Bahuisa'c xtzuum Dad Jesucrist nani cua'lu lojni. Bensa'c dzuunga."

<sup>18</sup> Lagajc narä Pabl rucuaä xtixtiosre con lagajc naä, con lagajc xleträ. Colgusnaj-lajztu narä yu'ä latzguiib. Gacnäj Dios la'tu. Sugacni si'c.

## Guijtz Ganid Lo Reben Tesalónica

### *Bacuaa Pabl con reexamigwni lo guidoo guedx Tesalónica*

<sup>1</sup> Narä, Pabl, näjza Silvan, näjza Timoteu cacuaanu guijtzre lojtu, resa'nu ni yu' guidoo lo guedx Tesalónica, reni yu' lo Dios Xtadnu näjza lo Dad Jesucrist. Guspaa Dios näjza Jesucrist lajztu, guscuedxizareni lajztu.

### *Xho huililajz beñ Tesalónica xtidx Dios*

<sup>2</sup> Guet-guejt rdeednu xquixtios lo Dios xcuent guiraatu, rnaduxhza laaznu la'tu cheni rbejdx rniabnu lo Dios.

<sup>3</sup> Ruzä'tnu lo Dios xtadnu xho rujntu dzuun sa'csi rililajztu xtidx Dios; näjza xho runduxhtu dzuun te racnäjtu sa'tu ni xhet rajpdi sa'csi rinälajztu Dios; näjza xho rutip lajztu cabäjztu guibi' Dad Jesucrist lo guedxliuj.

<sup>4</sup> Bejtznu, racheenu sanälajz Dios la'tu, laani aguleni la'tu.

<sup>5</sup> Sa'csi che basule'nu xtidx Dios lojtu, et ganax diidxtis gujcn, niluxh xcäl'rnibee Sprit Dyan xten Dios neñ lastootu bejn gucheepactu diidx ni najc didxlii. Nanchesact'u xho gujcnu che guyu'nu lojtu. Si'c baluiinu la'tu te guiban'sa'ctu.

<sup>6</sup> Sigajcni nabañnäjnu Dad Jesucrist sigajcza gusloj cua'tu xmoodnu, basobzatu diidx guideb xcäl'rbalajz Sprit Dyan xten Dios ni baniidxni lojtu, mase gudejdtu trabajw.

<sup>7</sup> Si'c gujc te baluiitu loj guiraa reni rililajz nez Macedonia näjza nez Acaya xho nungäj'l gac.

<sup>8</sup> Ni'c abire'ch xtidx Dios, xhet nejzdi Macedonia näjza Acayatis, bire'chza diidx guira nejz. Ro'c najnreni xho sanälajztu Dios, ni'c xhetru nanabi guiniinu lojreni.

<sup>9</sup> Alga lagajc laareni rujyreni diidx xho guyu'nu lojtu; nägajcza xho basaantu gojntu rebanäjb te rajntu Dios ni nabajnpac ni najc guliipac.

<sup>10</sup> Rujyzareni diidx xho cabäjzzatu guibisac Jesucrist lo guedxliuj. Laazani najc Xi'n Dios ni guläs Dios lo rebengut, Jesucrist ni ruslaa nuurnu lo xcäl'rdxe'ch Dios ni churu siääd.

## 2

### *Xhi bejn Pabl neñ guedx Tesalónica*

<sup>1</sup> Naj lagajc la'tu najntu, bejtznu, et xlia'di bio'pnu lojtu.

<sup>2</sup> Et najntu xho gudéreni loonu, basacsíreni nuurnu guedx Filipos. Niluxh mase gudejdnun trabajw, gusutijpnu lo Dios, xhet bidxejbtinu basule'nu xtidx Dios lojtu, mase gudejdnun trabajwduxh.

<sup>3</sup> Sa'csi dinu nulijdx la'tu con didx-xhii, niclaza didx-dxuudx, niclaza diidx ni rusguee.

<sup>4</sup> Sa'csi rsoobnu xtidx Dios basannäjni nuurnu xtiidxni, ni'c rusule'nu xtidx Dios. Dinu guinii diidx te jiansa'cnu lo bejn, rniinu diidx te jiansa'cnu lo Dios ni ruhuii lastoonu.

<sup>5</sup> Anajntu xho basule'nu xtidx Dios. Nicla tej dinu ninii xhi stee diidx ni xhet sajcdi lojtu. Dizanu nusule' xtidx Dios te xhiga'tz niennu gaan xhi nica'nu. Dios nanchee xcuent ni riennu.

<sup>6</sup> Dizanu nidiil guiliä'p bejn xpala'nnu, niclaza la'tu, niclaza chu stee bejn, mase nungäj̄l niennu niacbeetu rajpnu yäl̄rnibee sa'csi baxhaļ Jesucrist nuurnu.

<sup>7</sup> Niluxh guc nadolajznu che guyu'nu lojtu, cuanäj̄nu la'tu si'c rcanäj te nan rexpäz̄ni.

<sup>8</sup> Sa'csi huinälazduxhnu la'tu, biennu xhigab xhet ganaxdi xtidx Dios guini-idxnu lojtu, näjza lagajc xaimnu guniidxnu te guseednu la'tu xtidx Dios sa'csi sanälazduxhnu la'tu.

<sup>9</sup> Bejtznu, la'tu rnalajztu xho biennu dzuun te biennu gaan xcäl̄nabaannu. Biennu dzuun dxej-yääl, te di niednäjt̄u nuurnu laļ ni basule'nu xtidx Dios lojtu.

<sup>10</sup> Lagajc la'tu nancheetu, sigajc nanchee Dios, laaca biennu che guyu'nu lojtu: gujcnu bejn ni ran̄duxh Dios, gujcnu beñd̄xojn, gujcnu beñsa'c.

<sup>11</sup> Anajntu xho baliidxnu la'tu, xho bascuedcxnu lajztu si'c runnäj te dad rexingaanni.

<sup>12</sup> Guiraa dee biennu, te guibañsa'ctu si'c nungäj̄l gun reni najc xi'n Dios, la-gajc Dios ni gurejdx la'tu te chunäj̄tuni lo xcäl̄rnibeemi näjza lo xcäl̄rdimbicha'ni.

<sup>13</sup> Ni'cni rdedduxhnu xquixtios lo Dios sa'csi che biejn diajgtu xtidx Dios ni basule'nu lojtu, cua'tuni si'c xtidx Dios xhet si'c xtiid̄xdi beñ guedxliuj. Niluxh gulii xtidx Diosni, sa'csi rusiani lastoo renani rililajz.

<sup>14</sup> Lajznu, dxejcti bejntu lagajc si'c rujn rebejn xquidoo Dios neñ reguedx Judea reni najc xpen Jesucrist; luxh gusajctu lagajc ni gusajcreni, basacsı rebeñ lajdx̄tu la'tu. Sigajcza birinajl rexp̄en Israelreni.

<sup>15</sup> Rexp̄en Israel bagu't Dad Jesucrist, si'cza bagu'treni lagajc rexprofe'treni, renani bacuaa xtidx Dios, barilaagwzarenı nuurnu. Direni chanälajz Dios, dizareni gusaan chanajl rebejn Jesucrist.

<sup>16</sup> Che rlaznu guljidxnu reni digac rexp̄en Israel, te näjza laareni laareni lo dojļ, direni gusaan, si'ctis cagutajl̄reni xtoj̄lreni. Niluxh naj abiääd̄pac yäl̄rdxe'ch xten Dios yejcreni.

### *Rlazj Pabl nihuisacni ro'c*

<sup>17</sup> Bejtznu, mase biriinu ro'c, naj dirunu guihui lojtu, rnalazduxhnu la'tu, batijp lajznu jio'pnu ro'c, rlazduxhnu fisacnu lojtu.

<sup>18</sup> Rlaznu nio'pnu, narä, Pabl xhidal huält rlazä niälä, niluxh beñdxab di nusaan.

<sup>19</sup> Ĥhini'c najc xcäl̄rbäaznu, xcäl̄rbalajznu, xcäl̄racnaronu? Lagajc la'tu gac-tuni che suunu nez loj Jesucrist che jiädsac Dad Jesucrist.

<sup>20</sup> La'tu najc ni ruspaa lajznu ni rliä'pza xpala'nnu nez lo Dios.

## 3

<sup>1</sup> Dxejc, che dirunu nutijp lajznu, biennu xhigab bianxtebä guedx Atenas.

<sup>2</sup> Dxejc baxhaļä Timoteu, bejtznu nez loj Jesucrist, te biädhuini la'tu, sa'csi laani najcni te xpen Dios ni runnäj̄ nuurnu dzuun, rniini xtidx Jesucrist, te gascuedcxini lajztu, guzudzu'tzni xcäl̄rililajztu.

<sup>3</sup> Te nicla tejtu di guidxejb che jiääd̄ reyäl̄huin sa'csi la'tu anajntu agule Dios nuurnu ni'c sidejdnu trabajw.

<sup>4</sup> Cheni yusijcnu lojtu, rnixgaanu lojtu sidejdnu trabajw; niluxh si'cni agusojb diid̄xga naj.

<sup>5</sup> Ni'cni diruna nutiplazä, baxhaļä chu jiäd̄nä diid̄x xho najc xcäl̄rililajztu, sa'csi cadxebä andi abasguee beñdxab la'tu, luxh xlia'si biennu dzuun guyu'nu lojtu.

<sup>6</sup> Naj agubi' Timoteu, biädhuiini la'tu. Biadnäni ganax didxlii xho sanuu rililajztu xtidx Jesucrist, xho rinälajztuni, näjza sanuutis rnalajztu nuurnu, rlanjzatu fiitu loonu, sigajcza nuurnu rlanjznu fiinu lojtu.

<sup>7</sup> Ni'cni, betznu, masä riäädx xhixtenu, masä rdeednu trabajw, rbalajznu sa'csi la'tu sanuutis rililajztu xtidx Dios.

<sup>8</sup> Naj laaca rdxunnu sa'csi racbeenu sudzu'tztu nez loj xtidx Dad Jesucrist.

<sup>9</sup> Xhocha gac guideednu xquixtios lo Dios xcuent guiraatu näj xcuent yälrbalajz ni yu' lastoonu xcuent la'tu nez lo Dios.

<sup>10</sup> Dxej-yääl rniabnu lo Dios gusaanni jiophuiinu la'tu te gusa'nu guiraa rediidx ni cayäädx gacbeetu xcuent xcälrlilajztu.

<sup>11</sup> Rniabnu lo Xtadnu Dios, näjza lo Dad Jesucrist, gacnäjreni nuurnu te gac jiophuiinu la'tu.

<sup>12</sup> Rniabzanu lo Dad Jesucrist, gunni gustiobruni lastootu te ga'prutu yälrinälajz loj resa'tu näjza loj guiraa rebejn, si'cni rinälajznu la'tu,

<sup>13</sup> te gunni sudzu'tz lastootu, na'c ga'ptu dojl nez lo Xtadnu Dios, che jiääd Jesucrist näjza guiraa rexpejn ni xhaguibaali.

## 4

### *Guibajñnu si'c rchagljaz Dios*

<sup>1</sup> Naj, rebejznu, rniabduxhnu lojtu, rulijdxnu la'tu con laj Dad Jesucrist, guibajñtu si'cni baluiinu la'tu nungäjil guibajñtu te guspaatu lajz Dios, te si'c chanuutis guibañsa'ctu nez lo Dios.

<sup>2</sup> La'tu, anajntu rediidx ni baluiinu lojtu con xcälrnibee Dad Jesucrist.

<sup>3</sup> Lagajc Dios rlanjz nayatis guibañsa'ctu, na'c gun niguii dojl guesnäj gunaa ni di gac chäälni, sigajcza na'c guesnäj gunaa niguii ni di gac chäälni.

<sup>4</sup> Tejgatu gantu xho guibaññajtu chäältu nayatis näjza xpala'nni.

<sup>5</sup> Xhet si'c ni rujndi regunadxab näjza reniguii, nicla si'c ni rujn rebejn ni di gumbee Dios.

<sup>6</sup> Rut chutejditu gusguee bejtzni lo redzunguijdxre, sa'csi Dios susacsí guiraa rebejn ni rujnza redojlre, ni'cni abiniinu lojtu, agunixgaanu diidxre lojtu.

<sup>7</sup> Sa'csi Dios gurejdxni nuurnu te guibajñnu lo yälñabañnaya xtenni, xhet lo yälñabañdxuudxdi.

<sup>8</sup> Ni'cni bejn ni di gucuaiajg rediidxre, dini gac xtiidx te bejn ni dini cuadiajg, xtiidxpac Dios ni dini cuadiajg, Dios nani abaniidx Sprit Dxañ xtenni loonu.

<sup>9</sup> Ditu guiquiin gucuaäru diidx xho chanälajztu resa'tu, sa'csi lagajc Dios abaluitu xho chanälajztu resa'tu.

<sup>10</sup> Luxh rinälajztu guiraa reni rililajz, guiraa reni siääd guideb nez Macedonia. Ni'cni rniabnu lojtu bejznu, chä'pru xcälrlinälajztu.

<sup>11</sup> Colgutijp lajztu, dxitis colguibajñ, coljiu xtzuuncatu, lagajc ñaatu colyejn dzuun si'cni agunibeenu guntu.

<sup>12</sup> Te fii rebejn ni di chalilajz laaca nabañsa'ctu, nägajcza te xhet jiäädxdi xhi rquiintu.

### *Xho gac che jiädsac Jesucrist lo guedxliuj*

<sup>13</sup> Bejznu, rlanjznu gacbeetu xcuent rebeñgut te di gac-huin lajztu si'c rujn rebejn ni di chalilajz xtidx Dios.

14 Si'c ni rililajznu gujt Jesucrist, dxejc gubansacni, sigajcza rililajznu suspañsac Dios guiraa reni nagayejs neñ baa, renani huililajz xtidx Jesucrist. Luxh che guibi' Jesucrist, siädñänireni.

15 Xcuent xcälñibee Jesucrist rniä lojtu, nuurnu ni nabajñnu che jiädsac Jesucrist, dinu nid loj reni nagayejs neñ baa.

16 Sa'csi lagajc Dad Jesucrist siäjt lo guedxliujre, sibedxa'ni, siejnza xse' guixhajg ni rnibee, sibedxa'za trompet xten Dios. Dxejc sibanxgaa reni nagayejs neñ baa, reni huililajz xtidx Crist.

17 Dxejc nuure ni nabañsijcnu sidxaagnureni neñ rebäj te lo bej chacha-gloonu Dad. Si'c chonnu cholaznäjñuni par tejpas.

18 Ni'cni rniä lojtu, colcuedcxilajz sa'tu con rediidxre.

## 5

1 Niluxh xcuent redxejga, reijzga, xhet riqüinditu gucuaäni lojtu,

2 sa'csi la'tu anansa'ctu sidzujñ dxej ni jiäd Jesucrist cheni rut cayunloj-dini, sigajc che riääd te gubaan yääl.

3 Che canii bejn: "laaca dxunnu, dxunsa'cnu", chela gacbeereni acaddej-dreni trabajw si'c che rdzujñ yälñayan te gunaa che rajl xi'nni, luxh digacdi guxunreni lojni.

4 Niluxh bejtznu, di gac nayäältu te di che xhet cayunlojditu dxej xten Jesucrist, guidzunxhiga'tz dxejga si'c gubaan.

5 Sa'csi guiraatu najctu bensa'c nabajñtu lo bianij, lo rdxee, dinu gac benguijdx, dinu guibajñ lo yääl, lo yälrcäy.

6 Ni'cni di nungäjñ guidiesnu si'c rejs stecuaa bejn, ni'cni nungäjñ sunasiñnu na'cza jiennu redojl ni rlanj tiejxhnu.

7 Reni rejs, rejsreni yääl, reni rsiojz, rsiojzreni yääl.

8 Niluxh nuure nabajñnu lo rdxee, ni'cni nanab na'c jiennu si'c, riäjñ xca'nu yälrililajz näjza yälñälajz si'c rca' soldaad gamangw guuib ni rajcwni, ni rusäuu lastooni. Riäjñza guiläzdu'tznu sa'csi yälñrusläa lo dojl najc si'c xhumbrel-guib ni ru' yejc soldaad ni rusäuu yejcn.

9 Sa'csi di Dios nibe nuurnu te chonnu gabijñ, alga guleni nuurnu te xca'nu yälñabajñ ni rudeed xi'nni, Jesucrist.

10 Sa'csi gujt Jesucrist lacuaa nuurnu, te guibannäjñuni masä nabajñnu lo guedxliujre o nagayejsnu neñ baa che guibi'ni.

11 Ni'cni, colguspaa lajz sa'tu, tejtü sigajcza steetu, sigajcni cayujntu ñaj.

### *Rulijdx Pabl resa'ni*

12 Bejtznu, rniabduxhnu lojtu, colñhuiduxh reni rulüi xtidx Dios lojtu, sa'csi agule'c Dadreni te guinibeereni, te gulijdxreni la'tu.

13 Riäjñza chanälazduxhtureni xcuent dzuun ni rujñreni. Colcuedxi con resa'tu.

14 Rulijdxnu la'tu, bejtznu, colgulijdx reni najc benñatsiaj; colñsudzu'tz lajz reni guxii rbalajz lo xnez Dios; colñgacñäj reni di gumbesa'c xtidx Dios, colcuedxi lajz guiraasi bejn.

15 Colñhui di chu tejtü gunza dolñguijdx lo rebejn ni rujñ dolñguijdx. Laaca guntu ganax dzunsa'c lo sa'tu, sigajcza lo chutis bejn.

16 Colñguibalajztis guideb nabajñtu.

17 Na'c cuääz guiniitu lo Dios.

18 Mase xhitis rsiajctü, colñdeed xquixtios lo Dios, sa'csi si'c rlanj Dios gun reni rililajz Jesucrist.

19 Di cuälaztu xtidx Sprit Dxan xten Dios ni rniini neñ lastootu.

<sup>20</sup> Na'c cuälaztu xtidx reni rnii xtidx Dios xcuent nani churu gac.

<sup>21</sup> Colquiiil guiraa rediidx, coljiannäjtis rediidx ni najc didxsa'c.

<sup>22</sup> Colbicaj lo guiralii dolguijdx.

<sup>23</sup> Lagajc Dios, Dios ni rbecdxi lajztu, gusiapac lastootu, te cucheeni xaimtu, näj lastootu, näjza tiejxhtu, te na'c gunfu dojl ni di riäjł guntu te cuääztu dxej ni guibisac Dad Jesucrist.

<sup>24</sup> Dad ni gurejdx la'tu rujnza guiraa ni rniini, ni'c sujnzani guiraa redzu-unre.

*Ruzadiidxnireni*

<sup>25</sup> Bejtznu, colnab lo Dios xcuent nuurnu.

<sup>26</sup> Colgudeed xtixtios lo rebejtznu ni yu' ro'c.

<sup>27</sup> Con laj Dad Jesucrist rnibeä, gołtu guiitzre loj guiraa rebejtznu.

<sup>28</sup> Gacnäj Dad Jesucrist la'tu. Sugacni si'c.

## Guijtz Ni Rojp Lo Reben Tesalónica

*Rucuaanu guiτζzre lojtu, rexpēn Jesucrist ni rbājz guēdx Tesalónica*

<sup>1</sup> Narā Pabl, nājza Silvan nājza Timoteu, cacuaanu guiτζzre lojtu, rebejtznu ni yu' guidoo lo guēdx Tesalónica, reni yu' lo Dios Xtadnu nājza lo Dad Jesucrist.

<sup>2</sup> Gacnāj Dios Xtadnu nāj Dad Jesucrist la'tu, guscuecdxizareni lajztu.

*Gun Dios yālguxhtis loj reben DOJL che guibi' Jesucrist lo guēdxliuj*

<sup>3</sup> Bejtznu, ruedeenu xquixtios lo Dios xcuēnttu, si'c riājł jiennuni, sa'csi xcālrlilajztu siādruobru, nājza yāłrināłajz ni rajp tejgatu nājza sa'tu siādruobruni.

<sup>4</sup> Ni'cni rliā'pnu xpala'ntu neņ reguidoo xten Dios. Rbaa lajznu sa'csi rsiudzu'tztu sanuutis rililajztu xtidx Dios mase rdejdtu trabajw, rusacsı bejntu.

<sup>5</sup> Dee ruluiipac xcālguxhtis Dios najc laaca, ni'c rnii Dios riājł jiu'tu lo xcālriibeeni sa'csi cadejdtu trabajw xcuēnt yāłriibeega.

<sup>6</sup> Sa'csi rujn Dios xhigab riājłza quix reni bateedtu trabajw xtojłreni, ni'c suteedzani reni'c trabajw.

<sup>7</sup> Niluxh la'tu ni cadejdtu trabajw, sujn Dios gusilaznājtu nuure che gului-iloj Jesucrist, sirini xhaguibaa siādnājni rexangłni ni sajč, ni rnibeduxh.

<sup>8</sup> Lo te balduxh siādni, dxejč guisloj susacsıdixhni reni di gaņ Dios, dizareni gusoob xtidx Dad Jesucrist nani rudzucaj DOJL.

<sup>9</sup> Guiraareni sidejdreni trabajw, par tejpas agunijtreni, zijt chureni lo Dios, lo yāłrdimbicha' xten xcālriibeeni.

<sup>10</sup> Che jiāād Dad guiriini xhaguibaa, dxejga siliā'p rexpejnni xpala'nni, sidxelozja renani huililajz laani nājza la'tu, sa'csi huililajztu diidx ni basule'nu che guyu'nu lojtu.

<sup>11</sup> Ni'c rniabtisnu lo Dios por la'tu, rniabnu lo Dios guinaj lajzni nabajntu si'c riājł guibajņ reni guleni. Rniabzanu guniidx Dios lojtu guntu guiraa redzunsac ni rchaglajz Dios guntu, gacnājzani la'tu con xcālriibeeni te guntu redzuun ni rujntu sa'csi rililajztu.

<sup>12</sup> Te chā'p xpala'n laj Dad Jesucrist si'cni nabajntu, te laani guiliā'pzani xpala'ntu, xcuēnt yāłrināłajz xten Dios nājza Dad Jesucrist.

## 2

*Bendolduxh*

<sup>1</sup> Naj, rniabduxhnu lojtu bejtznu, xcuēnt dxej ni jiāād Jesucrist, dxej ni guidojpzanu lojni,

<sup>2</sup> na'c chugajtu yarsia'. Na'cza gusaantu guchejbreni la'tu con diidx ni ruluii te bejņ ni najc profet, nicla con diidx ni rnii stee bejņ lojtu, niclaza con diidx ni naareni lojtu caj loj te guiτζz ni naareni baxhalnu lojtu, cadro caj “dxej ni guibi' Jesucrist abidzujņ”.

<sup>3</sup> Na'c gusaantu gusguee bejņ la'tu xcuēnt rediidxre. Che gajd dxejga guidzujņ, su' bejņ ni sibāłaz xtidx Dios, dxejč suluioloj beņłatsiaduxh, xi'n nani sinitloj par tejpas.

<sup>4</sup> Bejņre siliā'p lagajč xpala'nni, sidxe'chni lo guiraa ni sanā laj Dios, nājza xhitis ni rajņ bejņ, te cueni neņ xquidoo Dios, guluiolojni si'c lagajč Gueb Dios.

<sup>5</sup> ¿La di lajztu guisaj čeni guyusicā lojtu, rniā rediidxre lojtu, ā?

<sup>6</sup> Naj la'tu anajntu xhini'c ruscuääzni, te na'c guiricajni ansde guisa' redxej xtenni.

<sup>7</sup> Te yälxhiga'tz najc dzunlatsiaj ni alacayajc lo guedxliuj, cayäädxtis guibicaj nani caguscuaäzni galäiini.

<sup>8</sup> Dxejc suluiloj beñlatsiaduxhre. Niluxh Dad Jesucrist, sugu'tnini con bero'ni, che guibi' Jesucrist lo guedxliuj xpianijni sujn nitlojni.

<sup>9</sup> Benlatsiaduxhre najc si'cpac najc beñdxab. Che guidzujñni, guidzujñni si'c te bejn nani rnibee, sujñni seen, sujñzani milagrw ni rusguee.

<sup>10</sup> Con xcällatsiaj bejnre susgueeni guiraa renani alagunijt lo Dios sa'csi direni nicäjb ninälajzreni didxlii ni nuslaareni neñ dojl.

<sup>11</sup> Ni'cni susaan Dios jääd te yälrusgueduxh te chalilajzreni didx-xhii.

<sup>12</sup> Te gabijl jii guiraa renani di nicäjb nililajz didxlii, alga bidxagajzreni yällatsiaj.

### *Reni gule Dios guirii neñ dojl*

<sup>13</sup> Niluxh nuurnu riäjł gudeedisnu xquixhtios lo Dios por la'tu, bejtznu, ni sanälajz Dad Jesucrist. Rudeednu xquixhtios sa'csi galooli gule Dios la'tu te guslaani la'tu lo dojl, xcuent Xsprit Dxanni ni rusia lastootu, näjza redidxlii ni huililajztu.

<sup>14</sup> Ni'cni che biejn diajgtu diidx ni basule'nu lojtu, gurejdx Dios la'tu, te xca'zatu xcälrdimbicha' Jesucrist.

<sup>15</sup> Naj bejtznu, colchanuu, colsudzu'tz, na'cza jäällajztu rediidx ni balijdxnu la'tu che guyu'nu ro'c, näjza rediidx ni bacuaanu lo guijtz ni baxhalnu lojtu.

<sup>16</sup> Lagajc Dad Jesucrist, näj Dios Xtadnu, ni sanälajz nuurnu, ni ruscajn lajznu par tejpas, ni baniidx xcälrbääznu racnäjni nuunu,

<sup>17</sup> guspaani lajztu, gusudzu'tzni la'tu lo guiraa redidxa'c ni guiniitu näjza redzuunsa'c ni guntu.

## 3

### *Colnab lo Dios xcuent nuurnu*

<sup>1</sup> Bejtznu, colnab lo Dios xcuent nuurnu te chanuu guire'ch xtidx Dad Jesucrist, te che gusoob bejn diidxga chä'p xpala'n diidxga, sigajcni gujñni con la'tu.

<sup>2</sup> Colnabza lo Dios xcanäjni nuurnu te di tednu ladzñaa rebenlatsiaj, rebengujdx, sa'csi xhet guiraadi bejn rajp yälirililajz.

<sup>3</sup> Dios rusoob xtiidxni, susudzu'tzni la'tu, sacnäjzani la'tu te di sactu dolgujdx.

<sup>4</sup> Abascuedxi Dios lastoonu xcuenttu sa'csi anancheenu cayujntu guira'ti nani gunibeenu guntu, luxh si'cza sinuu gusoobtu xtiidxnu.

<sup>5</sup> Canabä lo Dad Jesucrist guniidxni gabeerutu xcälrsanälajz Dios, canabäza colcuedxi lajztu si'cni bejn Crist che gudejñni trabajw.

### *Nanab jiennu dzuun*

<sup>6</sup> Bejtznu, con laj Xtdad Jesucristnu, rnibeenu guibicajtu lo chutis te sa'nu ni ricanzajtis, ni di rlanj gunni dzuun. Guibicajzatu loj reni di guibajn si'cni baluiinu riäjł guibajntu.

<sup>7</sup> La'tu anajntu xho riäjł guibajntu, chanuutu guntu si'cni riennu nuure. Najntu nuurnu dinu nicanzaj che guyu'nu lojtu sa'csi biennu dzuun.

<sup>8</sup> Dizanu nidauxlia' xcu'n chu tejtu; guiraani bidiixnu, biennu dzuun dxejyäl, te di nutaalnu xtzuum chu tejtu.



<sup>9</sup> Masä nungäjł niniabnu niacnäjtu nuurnu, dinu niniabni; alga biennu dzuun te baluiinu xho chanuutu.

<sup>10</sup> Cheni guyu'nu lojtu, gunibeenu scree guntu: Chutis ni di rlajz gun dzuun di riäjł xca ni xhi gauni.

<sup>11</sup> Ağuniireni loonu baltitu rcanzajtis, direni gun dzuun, alga rihuiireni xhi cayujn rebejn.

<sup>12</sup> Rulijdxnu rebejnre, rnibeenureni con laj Xtad Jesucristnu: colcuedxi, colyejn dzuun te gautu.

<sup>13</sup> Bejtzn, na'c guidxajgtu guntu dzunsa'c.

<sup>14</sup> Palga yu' chu tejtü di gucuadiajg xtiidxnu ni caj lo guijtze, colhuii chuni'cni te na'c guchaagtuni, te guitujyni.

<sup>15</sup> Niluxh na'c ga'ptuni si'c ni rdxe'ch lojtu, colguliidxni si'c bejtztu.

### *Rusadiidxnireni*

<sup>16</sup> Gueb Dios xten yälrbexi, guscuecdxi lajztu guixe-guixee, masä xhitis sajtu. Jiannäj Dad Jesucrist guiraatu.

<sup>17</sup> Narä, Pabl cacuaä xtixiosre con naäpac si'c runä lo guiraa rexquitzä, scree rucuaä.

<sup>18</sup> Gacnäjä Xtad Jesucrist guiragajtu. Sugacni si'c.

## Guijtz Ganid Lo Timoteu

### *Pabl rucuaa te guijtz lo Timoteu*

<sup>1</sup> Narä Pabl, nacä te apost xten Jesucrist, rucuaä guijtzre lojlu. Nacä apost sa'csi si'c gunibee Dios ni ruslaa nuurnu lo dojl näjza Dad Jesucrist nani cholääznu.

<sup>2</sup> Timoteu, luj najclu si'cpac xinganä lo yälirililajz. Xtradnu Dios näjza Xtrad Jesucristnu gacnäjl, gulaslajzreni luj, guscuedxireni lastoolu.

### *Pabl rulijdx xcuent reni ruluü diidx-xhii*

<sup>3</sup> Che sia'ä reguedx Macedonia, gunibeä jia'nlu guedx Éfeso te gulijdxlu gaii bejn te na'c guluiireni garenca diidx,

<sup>4</sup> te na'c juitejreni rexcuent reben'tiemp, te na'cza jiuduxhreni chu gujcx repengoldooreni, sa'csi di rediidxre gacnäj guiroobru lastooreni si'c rustioob yälirililajz lastoonu. Näj rnibeä si'c chanuu gulijdxlu rebejn.

<sup>5</sup> Rulijdxnu bejn te ga'preni yäl'rinälajz sa'reni. Ganid nanab gacnaya lastooreni, nanab ga'preni xhigabsa'c, nanabza chalilajzpacreni.

<sup>6</sup> Yu'reni abar'o'n rediidxre, riejtis ro'reni saniduxhreni diidx ni xhet sajcdi.

<sup>7</sup> Rlajzreni gacreni bejn ni najn leii, niluxh niclaza laareni direni gacbee xhi säloj ni rniireni, niclaza xhi säloj rediidx ni ruluiireni, räjpreni, 'didxliipac dee'.

<sup>8</sup> Anajnnu leii xten Dios najc sacduxhni, palga jiennu si'cni rniipacni.

<sup>9</sup> Najnnu di leii gac par bensa'c, najcni par reni najc benlatsiaj ni di jiu leii xten Dios, näjza reni di gusoob diidx; par reben' guiidx, näjza reben'dojl; par reni di jiu Dios, näjza reni rusguee; par reni rugu't xtradni, xnanni, näjza guiraa reni rugu't bejn;

<sup>10</sup> par reni resnäj te gunaa ni digac chäälreni, näjza reni resnäj lagajc saniguiireni; par reni rbajn bejn; reni rnii didx-xhii; reni rnii didx-xhii si'c didxle' parsi rusguee sa'reni; näjza bejn ni rujn xhitis xhi xtee dzuun ni digac dzunsa'c,

<sup>11</sup> nalajznu sa' redzunsa'c ni rulijdx xtidx Dios-le', diidx ni ruslaa lo dojl. Narä biannä diidxre.

### *Rudeedni xquixtios lo Dios sa'csi rulaslajznni*

<sup>12</sup> Rdedä xquixtios lo Dad Jesucrist ni runiidx yäl'rnibee narä sa'csi najnni nasobdidxä, ni'cni guleni narä gunä xtzuumni.

<sup>13</sup> Luxh galoo guniyaäni, birinalä xpejnni, basacsia'reni. Niluxh Dios balaslajz narä, sa'csi dina niacbeä xhini'c cayunä, sa'csi gajdna chalilazä.

<sup>14</sup> Niluxh lacti guroob gujcx yäl'racnäj xte Xtradnu, guideb yäl'irililajz, näj yäl'sanälajz ni rajp Jesucrist.

<sup>15</sup> Diidxre najc guliduxh, nanab chalilajzpacuni: Jesucrist biääd lo guedxliujre te guslaani reben' dojl; lo reben' dojl narä nacäru bendolduxh.

<sup>16</sup> Ni'cni balaslajz Dios narä, mase nacä bendolduxh lo guiraareni, te ganid con narä guluiini xho rbäjz Jesucrist te chalilajz bejn xtiidxni, te filoj reni churu chalilajz xtiidxni te ga'preni yäl'nabajn par tejpas.

<sup>17</sup> Dios najc reii, reii ni di guet, reii ni di guzen, laatisni najc Gueb Dios ni nanduxh, ni'cni colguiliä'p xpala'nni, colgajnni guideb guibajntu näjza par tejpas. Si'c gacni.

<sup>18</sup> Xi'nä, Timoteu, dee najc yäl'rulijdx ni runidxä lojlu te gucuasa'clu si'c te soldaad ni abisieed, sigajc ni gunii reprove't xcuentlu galoo.

<sup>19</sup> Di gunijtlu yäl'rililajz, bejnza xhigabsa'c, sa'csi yu'reni abarö'n xtidx Dios, ni'c abanijtreni yäl'rililajz.

<sup>20</sup> Si'c gusajc Himeneo näj Alejandro, luxh abatedäreni ladz'naa beñdxab te guisieedreni na'c guiniya'reni Dios.

## 2

### *Ruluini xho guiniabreni lo Dios*

<sup>1</sup> Rulidxälu ganiddoo cueedxlu, guiniablu lo Dios, gudeedlu xquixtios lo Dios xcuent guiraa rebejn.

<sup>2</sup> Guiniabzalu xcuent re'reii näj guiraa reni rnibee lo guedxliujre, te gac guibañdxinu, te gac chanuunu xnez Dios, te saru guibajñnu.

<sup>3</sup> Sa' yäl'rniabga najc laaca, luxh si'c rdxagljaz Dios ni rus'laa nurnu lo dojl guiniabnu lojni.

<sup>4</sup> Dios rljaz laa guiraa bejn lo dojl, rljazzani gacbeepacreni xtidxliini.

<sup>5</sup> Yu' tejtis Dios, näjza tejtisza nani rusiäj'l diidx lo Dios näjza loj reben guedxliuj. Laani najc Jesucrist ni gujczza niguii.

<sup>6</sup> Jesucrist gujt lo cruzj te gudijxni redojl xten guiraanu ni tre' lo guedxliuj. Dee gujc che gojl dxej ni gule Dios.

<sup>7</sup> Dios gule narä te gacä apost te gusule'ä xtiidxni, yäl'rililajz näjza didxlii lo reni di gac xpejn Israel. Si'c ni rljaz Jesucrist rniä didxlii, dina guiniä diidx ni rusguee.

<sup>8</sup> Ni'cni rlazä guiraatis lajt guiniab rebejn lo Dios, saru guiliäs ñaareni, gusaanreni yäl'rdxe'ch, na'c gunreni bieje.

<sup>9</sup> Si'cza regunaa, saru gacwreni xhajbreni, na'c gacreni gunaroxhi, cuedxireni. Xhet si'c di regunaa ni entis rsiucheduxh con oor o perl o ladsajc, rajc guichniil yejcn te guidxeloj bejnreni.

<sup>10</sup> Masru ruchaag gunreni si'cni rchalglajz Dios, si'c riäj'l gun guiraa regunaa ni yu' lo Dios.

<sup>11</sup> Riäj'l dxitis gucuadiajg regunaa xtidx Dios ni rusule' reniguii.

<sup>12</sup> Dina xcäbä gusule' te gunaa diidx lo guiraa rebejn, ni claza guinibeeni lo reniguii, dxitis cueni lo rebejn ni cagucuadiajg diidx nani cagusule'ni.

<sup>13</sup> Sa'csi ganid benchee Dios Adán, dxejctiru bencheeni Eva.

<sup>14</sup> Luxh et Adandi basguee beñdxab, beñdxab basguee gunaaga, dxejc biajbni neñ dojl.

<sup>15</sup> Niluxh siliaa regunaa, palga jiureni xtuunreni si'c nan, palga chanuu chalilajzreni xtidx Dios, palga chanälajzreni sa'reni, palga chutisreni lo Dios, gaczareni gunasa'c cuedxireni.

## 3

### *Xho riäj'l gac reni rnibee*

<sup>1</sup> Dee najc didx gulli: palga rljaz te niguii ga'p dzuun xten Dios, gusule'ni xtidx Dios, guinibeeni rebejn, te dzunsa'c najc ni rljazni gunni.

<sup>2</sup> Ni'cni, ni rljaz gac nani rnibee, riäj'l guibañsa'cni te na'c chu xhicuent guiniyaj rebejn. Riäj'l gacni chääl tejtis gunaa, riäj'l susiñni, gacni te beñsa'c, cuedxini, te guibañsa'cni. Riäj'lza di gudxojnni rolijzni guidzujñ bejn, nägajc riäj'l gacni te bejn ni nansa'c te guluini.

<sup>3</sup> Na'c gacni te beṅgu, nicla te ni rdxagdijl beṅ, na'cza gacni te nani rsia' lajzni ga'pni xhidajl meel, riäjł cuedxi lajzni, na'c chanälajzni meel.

<sup>4</sup> Riäjł guinibesa'cni rolizni, saru gunni te gusoob rexi'nni xtiidxni.

<sup>5</sup> Sa'csi palga di te beṅ gan xho guinibeeni lagajc rolizni, aticaxh gac ga'pni guidoo xten Dios.

<sup>6</sup> Di riäjł guinibee te beṅcoob nani entis huililajz, te di guschä'pni xpala'nni sas jiajbni lo lagajc xcälñaj Dios ni biajb beṅdxab.

<sup>7</sup> Luxh riäjłza guinii reni di chalilajz xtidx Dios laaca najcni, te na'c jianxtujyni, te na'cza jiajbni ladzṅaa beṅdxab.

### *Xho riäjł gac reni rcanäj neṅ guidoo*

<sup>8</sup> Si'cza rediaconos riäjł gacreni beṅ ni yu' xcäriejnreni, nanab gunreni si'cpac ni rniireni, na'cza soozreni, na'c xca'reni meel ni direni niunsa'c gaan.

<sup>9</sup> Riäjł gapdzu'tzni rediidx nagajn xten yälřililajz, ni'c nanab gac naya lastooreni.

<sup>10</sup> Riäjł fixgaatu xho nabajṅreni. Palga nabansa'creni, rutza gacdi gucuaquidireni, sajg gacreni diacono.

<sup>11</sup> Regunaa ni rlaiz gac diaconas riäjłza chu xcäriejnreni, na'c güireni diidx ni di guchaag, na'c soozreni, gacreni gunasa'c, cuedxireni, gunreni si'cpac ni rniireni lo guira'ti dzuun.

<sup>12</sup> Riäjł gac rediacono chääł tejtis gunaa. Riäjł guinibesa'cni rexi'nni näj guiraa reni yu' rolizni.

<sup>13</sup> Sa'csi rediaconos ni runsa'c xtuunni, sanälajz beṅreni, dizareni guidx-ejb rsudzu'tz lastooreni lo xcälřililajz xtidx Jesucrist.

### *Gurobduxh najc yälřhiga'tz xten Jesucrist*

<sup>14</sup> Cacuaä diidxre lojlu, niluxh rlazä jiädhuiğä la'tu.

<sup>15</sup> Luxh palga gaclaä, anajnlu xho riäjł guibajṅ beṅ roliz Dios, nalajznu xquidoo Gueb Dios ni nabajṅ par tejpas. Guidoore rniiasdzu'tz näjza ruluiiru didxlii xten Dios.

<sup>16</sup> Rdxeloyaduxh guiralii beṅ yälřhiga'tz xten xcälñaj Dios:

Dios biääd lo guedxliuj si'c te beṅguedxliuj,

Sprit Dxan xten Dios gunii beṅdxanni;

bahuii rexangl Dios lojni;

basule'reni xtiidxni lo rebeṅ ni di gac xpeṅ Israel;

guira lajt huililajz beṅ xtiidxni;

huäjsni lo xcälřdimbicha' Dios xhaguibaa.

## 4

### *Reni rbicaj lo xnezyuj Dios*

<sup>1</sup> Aguniipac Sprit Dxan siääd redxey che chu reni guro'n yälřililajz, sucuadi-agjreni xtidx rebeṅ ni rusguee näj xtidx rebendxab,

<sup>2</sup> nicla jiureni rniireni didx-xhii ni rusguee, sa'csi xhetiru xcäriejnreni, anajcni si'c najc cadro rudxuyje te guiblaa: xhetru racbeedini.

<sup>3</sup> Suluii rebeṅre na'c guchnaa beṅ, suluiizareni na'c gau beṅ guiraloj, niluxh Dios beṅpac redee te xca' rebeṅ ni rliilajz, ni racbeeza didxlii, te guededreni xquixtios lo Dios.

<sup>4</sup> Guiralii reni benchee Dios najc laaca, di riäjł cuälaznu xhi rca'nu che rudeednu xquixtios loj Dios.

<sup>5</sup> Sa'csi xtidx Dios näj yälřbedx-rniab lo Dios runsa'c guira'ti.

*Te ni runsa'c xtzuum Jesucrist*

<sup>6</sup> Palga susnajlu lajz rebejtznu rediidxre, sajclu te mossa'c xten Jesucrist, luxh si'c sisieedruzalu diidix xten yäl'rililajz, näj yäl'rluisa'c ni sanuulu.

<sup>7</sup> Na'c jiuulu ni rniü regunaroyeii ni xheti xtzuumni. Bisieed sudzu'tz lastoolu lo xtidix Dios.

<sup>8</sup> Guxii sajz guinibduxh bejn te gusutijpni tiejxhni. Niluxh sacduxhru cucheeni xtidix Dios nen lastooni, sa'csi racnäjni bejn lo yäl'nabajnre näjza lo yäl'nabajn ni najc par tejjpas.

<sup>9</sup> Dee najc didxlii, riäj'l chalilajz guiraatuni.

<sup>10</sup> Ni'c riennu dzuun, rdeednu trabajw, sa'csi cabäjznu Gueb Dios ni nabajn, ni ruslaa bejn lo dojl, ganiddoo renani rililajz xtiidixni.

<sup>11</sup> Sajplu guinibeelu soob rediidxre, näjza guluiulu rediidxre.

<sup>12</sup> Di gusaanlu cuälazreni luj sa'csi najclu bi'n; riäj'l gaclu te ni suu te fii guiraa reni rililazsa'cpac xho rniilu, xho nabajnlü, xho sanälajzlu sa'lu, xho rililajzlu, näjza xho rajplu xhigabsa'c.

<sup>13</sup> La'l ni guidzunä ro'c, bil' xtidix Dios lo rebejn, balijdxreni, baluiiza xtidix Dios lojreni.

<sup>14</sup> Di gusaanlu reyäl'najn ni baniidix Dios lojlu cheni basuj rebengool naareni yejclu por xtidix Dios, guniireni diidix xcuent nani churu gac.

<sup>15</sup> Guet-guejt basnaj lajzlu rediidxre, biusa'c rediidxre, te gac fii guiraareni xho sanuulu lo xtidix Dios.

<sup>16</sup> Gopdzu'tz lagajc luj näjza rediidix ni ruluiulu; guzudzu'tz lo guiraa rediidxre, te si'c laalu lo dojl, te laaza reni rucua diajg xtiidixlu.

## 5

*Xho guibañnäjnu reni rililajz*

<sup>1</sup> Na'c quidxa'lu loj te bengool; guninäjni si'c xtdadlu, balijdx rebi'n si'c bejtzlu,

<sup>2</sup> balijdx renanbengool si'c xnanlu, balijdx redxap steeb si'c rebisiajnlu con rexhigabsa'c.

<sup>3</sup> Gucnäj rebiuud ni guliipac rquin chu gacnäjreni te chu xhi gaureni.

<sup>4</sup> Niluxh palga yu' chu biuud yu' xi'nni o xajgni, suguisiedxgaareni guibañ nayareni lö xnez Dios, te quixreni di'n ni nasääbreni lo xtdareni, näj xnanreni ni baslaareni, sa'csi ni'c najc laaca, rdxagla jzza Diosni.

<sup>5</sup> Gunaa ni najcpac biuud, abia'n xtebni, ni'c rbäjztisni lo Dios, dxej-yääl rbejdx-rniabni lo Dios.

<sup>6</sup> Niluxh biuud ni nabajn cadedgustisni najc si'c te ni agujt nen dojl.

<sup>7</sup> Basule' rediidxre lojreni te rut gucuaquidireni.

<sup>8</sup> Palga yu' chutej ni di gacnäj resa'ni, lagajc reni rbäjz rolijzni, ni'c agulälaz xtidix Dios, benguijdxru najcni lo rebejn nani di chalilajz xtidix Dios.

<sup>9</sup> Di gucuaalu laj rebiuud lo gui jtz te gacnäjtuni palga gajdni chu gayojn ijz. Riäj'lza gac biuudga te gunaa ni gubañnäsa'c chäälni.

<sup>10</sup> Riäj'lza gumbee bejn ni xcuent redzunsac ni rujnni; palga baslaani rexi'nni, palga badedlaani rolijzni gues ben zijt, palga gudiibni ni' rexpejn Dios te si'c guzen xcäl'nadolajzni, palga racnäjni reni rdejz trabajw, palgaza riuni rujnni guira'ti redzunsac.

<sup>11</sup> Niluxh na'c gucuaalu laj biuud ni yu' guxiiru ijz sa'csi che guichagla jzreni te nguii, siäl'lajzreni diidix ni bia'nreni lo Jesucrist, te rla jzni guchnasareni.

12 Dxejc siu'reni nen dojl sa'csi rbälazreni rediidx ni bia'nreni che galoo bejnreni xhigab ninuureni lo xtzuun Dios.

13 Dxejc sia' lojreni xhet gundireni, rijreni rolizj bejn ricuereni. Luxh malaii ni'ctis gunreni. Niluxh rliäsazreni didxxhi, richu'reni lo xhitis, rni-izareni diidx ni di guchaag guiniireni.

14 Ni'cni rlazä rebiiud ni najc dxa'pru guchnaareni stehuält, chu xi'nreni, fisa'creni rolizjreni te na'c guiniyajreni rebejn ni rdxe'ch lojnu.

15 Sa'csi yu' gaii biuud ni alagubicaj lo xnez Dios sanajlreni ben<sub>2</sub>dxab.

16 Pal yu' tej resa'nu ni najc sa'ni te biuud, riäj<sub>1</sub>l gacnäjnini, na'c gusaanni gutajl<sub>1</sub>ni xtzuun guidoo, te si'c guidoo saj<sub>2</sub>c gacnä<sub>1</sub>j rebiiud ni rquiinpac chu gacnä<sub>1</sub>jreni.

17 Reben<sub>2</sub>gool ni rnibesa'c guidoo, riäj<sub>1</sub>l chanälajzrutureni näj gudeedrutu guiraa nani rquiinreni, si'c najc reni rusulesa'c xtidx Dios, rulid<sub>2</sub>xa'creni la'tu con xtidx Dios.

18 Sa'csi lo xtidx Dios caj scree: "Na'c gusällu guijxh ro' gon che rusiani triuu"; si'cza caj stee diidx: "Riäj<sub>1</sub>l gax bejn ni rujn dzuun."

19 Na'c cucuadiajglu xtidx tej ni rucuaquij te ben<sub>2</sub>gool palga ruti tio'p, chon testi<sub>2</sub>gw.

20 Niluxh reni sanuu rujntis dojl, riäj<sub>1</sub>l gulijdxlureni nez loj reben<sub>2</sub> guidoo, te näjza laareni guidx<sub>2</sub>ejbreni.

21 Nez loj Dios, nez loj Dad Jesucrist, nez lojza reangl ni gule Dios, rulid<sub>2</sub>x-duxhälu chanuulu lo rediidxre, na'c jiuurulu tej bejn lo sa'ni. Bejn tebloj loj guiraa rebejn.

22 Na'c gusiojb lajzlu gusujlu naalu yejc te bejn, te gacni ben<sub>2</sub> guidoo palga gajd<sub>1</sub>ni gusieed guibansa'cni lo xnez Dios sa'csi lagajc yejclu jiajb rextoj<sub>1</sub>ni. Gubicaj lo guiraa dolguijdx.

23 Na'cru yälu ganax nis. Gu'za tudxe'n bin sa'csi racxhuu xque'lu, näjza sa'csi yu'ru rexcälracxhuulu.

24 Yu' bejn ruzengajc rextoj<sub>1</sub>ni ni'c rajcni casti<sub>2</sub>gw, niluxh yu' bejn ni di xtoj<sub>1</sub>ni guzen<sub>2</sub>gajc.

25 Sigajcsa redzunsac ni rujn bejn; yu'reni ruzengajc, niluxh mase dini guzen<sub>2</sub>gajc, digacdi jianxhiga'tzni, sidzuj<sub>2</sub>n dxej suzen<sub>2</sub>ni.

## 6

1 Reni najc mos riäj<sub>1</sub>l cuadiajgreni xtidx xlam<sub>2</sub>reni, te na'c guiniyaj rebejn laj Dios niclaza xtidx Dios ni rusule'nu.

2 Palga yu' remos ni najc xlam<sub>2</sub>ni te nani rililajz, na'c cuälazreni rextiidxni sa'csi najcni bejtzni lo xcäl<sub>1</sub>rililajz Jesucrist. Riäj<sub>1</sub>l gunsa'cru<sub>2</sub>reni xtzuunni, sa'csi najc<sub>1</sub>reni sa'ni loj yäl<sub>1</sub>rililajz xten Dios, luxh sanälajzarenini. Rediidxre baluii, basule'.

### *Yäl<sub>1</sub>nabansa'c näjza te lastoo ni rbedxi*

3 Palga yu' chu ruluii garenca diidx, diidx ni digac didxsa'c, si'c najc xtidx Jesucrist, näjza xhet si'c diidxdi ni ruluii xho guibansa'c bejn,

4 bejn<sub>2</sub>ga r<sub>1</sub>lajz guiliä'p lagajc xpala'nni, niluxh xhet najndini. Si'c te yäl<sub>1</sub>guijdx yu'tis yej<sub>1</sub>cni yäl<sub>1</sub>guiniab diidx, yäl<sub>1</sub>rdi<sub>1</sub>diidx. Luxh redee rujn rdxe'ch lajzreni, rujnni rdxe'ch bejn lo sa'ni, rujnni rniyaj bejn, rujnzani di bejn guinisa'c lo sa'ni.

5 Rujnzani rdilnä<sub>2</sub>j bejn sa'ni. Guiraa redee gun bejn ni aguxhij<sub>2</sub>n xcäriejn<sub>1</sub>ni, bejn ni diru ga'p didxlii. Rchaloreni suj<sub>2</sub>nreni ganduxh xcuent rediidx ni ruluiireni. Gubicaj lo sa' bejnre.

<sup>6</sup> Niluxh yäl'nabansa'c näjza te lastoo ni rebedxi, redee sa'cduxh.

<sup>7</sup> Sa'csi xhet biopnädinu lo guedxliujre, luxh sigajcza xhet sajcdi chonänu che guetnu.

<sup>8</sup> Niluxh palga rajpnu xhi gaunu, xhi gajcwnu, con ni'c riäj'l guibalaaznu.

<sup>9</sup> Niluxh reni rlajz ga'p xhidalduxh meel, riabreni lo xhigab guijdx, rujnzareni xhidajl dzuun ni xhet sajcdi, ni rujn daan, ni rusiääz bejn lo yäl'ruhxin, lo yäl'rnitloj.

<sup>10</sup> Sa'csi yäl'rinälajzni meel najc xlobaa guiraa redzunguijdx. Yu'za bejn ni rladzuxh ga'pni meel, rusaanreni xcäl'rililajz Dios, dxejc lagajc laareni rujn rdedduxhreni trabajw.

### *Dzun-huen xten yäl'rililajz*

<sup>11</sup> Niluxh luj, bejn xten Dios, baxu'n lo guiraa dee, te chanuulu lo xcäl'xhigabsa'clu näjza yäl'nabansa'clu; te chanajllu yäl'rililajz näjza yäl'sanälajz; te chanuulu lo yäl'rbeedxi lajz näjza yäl'nadolajz.

<sup>12</sup> Benduxh dzuun xcuent yäl'rililajz Jesucrist, gunazdzu'tz yäl'nabajn ni najc par tejpas. Ni'cni gurejdx Dioslu, luxh aguniulu rililajzlu xtidx Dios nez loj xhidajl bejn, te anancheereni.

<sup>13</sup> Naj rulidxälu nez loj Dios ni rudeed yäl'nabajn lo guiraa ni yu' lo guedxliujre, näjza nez loj Jesucrist, ni basule' xtiidxni nez lo Pocio Pila't,

<sup>14</sup> rnibeä guzobsa'clu guiraa rediidx ni rniä lojlu, na'c guchaaluni, te na'c guiniyajreni luj naj niclaza cheni jääd Xtad Jesucristnu.

<sup>15</sup> Sidzujn dxejga nani agunii Dios guidzujn. Dios ni najc le' sujn scree sa'csi laatiski najc Dios, najcni reii xten rereii, rnibeezani reni rnibee.

<sup>16</sup> Laatisni dini guet, nabajn ni lo bianij cadre rut rajcdi rbig. Nicla te bejn gajd fii lojni, niclaza gac fiireni lojni. Xtebtis laani riäj'l ga'p rebejn xpala'n. Laani rajp yäl'rnibee par tejpas. Sugacni si'c.

<sup>17</sup> Balijdx reni rajp xhidajl xhixtenu lo guedxliujre, na'c guschä'preni xpala'nreni, niclaza chanälajzreni xhixtentisreni. Huenru chanälajzreni Dios ni nabajn, ni runiidx loonu guiralii xhixtenu ni rquiinnu te guibalajznu.

<sup>18</sup> Balijdxreni gunreni dzunsa'c, gundajnreni dzunsa'c, gacnäjreni reni xhet rajpdi, cuenäsa'creni sa'reni.

<sup>19</sup> Si'c ga'preni yäl'nasa'c ni guzudzu'tzreni che jääd Jesucrist, te guini-atzuz'tzreni yäl'nabajn par tejpas.

### *Rulijdxni Timoteu*

<sup>20</sup> Timoteu, cuenäz ni rniä lojlu. Na'c jiulu didxguijdx ni yu' lo guedxliujre, niclaza didx-xhii, niclaza rediidx ni rusguee, ni rbälajreni 'yäl'najn'.

<sup>21</sup> Sa'csi yu' reni sanuu yäl'najnre ni'c banijtreni lo Dios xcuent yäl'rililajz. Gacnäz Dios luj. Sugacni si'c.

## Guijtz Ni Rojþ Lo Timoteu

### *Stee guiþtz ni baxhał Pabl loj Timoteu*

<sup>1</sup> Narä Pabl, nacä apost xten Jesucrist. Dios gule narä, xcuent yälñabajñ ni gudeeð Dios loj reni yunäj Jesucrist, si'c ni bia'n diidþ.

<sup>2</sup> Cacuäë guiþtzre lojlu, Timoteu, xi'nä lo yälñililajz. Rinälazä luj. Rniabä lo Xtadnu Dios näj lo Dad Jesucrist gacnäj luj, gulaslajzreni luj, guscuecdxireni lajzlu.

### *Rusule'ni xcuent Jesucrist*

<sup>3</sup> Rnaj lazälu che rniabä lo Dios dxej-yääl. Dxej rdedä xquixtios por luj lo Dios. Naya xcärienä yu'ä lo Dios, runä xtzuunni si'c bejnza rextadgoldoä.

<sup>4</sup> Rnaj lazä xho biinlu, ñaj rlazä fiä lojlu te guibalazä.

<sup>5</sup> Rnaj lazäza yu'pac yälñililajz lastoolu si'cni guyu'ni galoo lastoo xmamlu Loida dxejru lastoo xnanlu Eunice si'cza yu' yälñililajzga lastoolu ñaj.

<sup>6</sup> Ni'cni rniä lojlu ñaj, si'cni rcanäj bejñ rodäj te di juliini, si'cza cuanäduþx reyälñajñ ni baniidþ Dios lojlu cheni basuä ñaä yejclu.

<sup>7</sup> Sa'csi di Dios nuniidþ te lastoo ni rdxejþ loonu, baniidþni te lastoo ni rsiutijþ, baniidþni te lastoo ni rinälajz, baniidþxani yuduxþ xcäriejñnu.

<sup>8</sup> Na'c guitujylu guiniilu rediidþ xten Xtad Jesucristnu, na'cza guituinäjlu narä sa'csi yu'ä neñ latzguiiþ xcuent Jesucrist. Näj luj gudejð trabajw ni siääd xcuent yälñrusule' xtidx Dios si'ctis gacnäj Dios luj.

<sup>9</sup> Dios ni gulää nurnu neñ dojl, gurejdx nurnu te guibansa'cnu lojtisni. Gurejdxni nuurnu xhet sa'csi biennu dzunsa'c, alga sa'csi si'c rlaþzni laani, sa'csi balaslajzni nuurnu xcuent Jesucrist galooli che gajdli guncheeni guedþliuj.

<sup>10</sup> Niluxþ cheni biääd Jesucrist ni badzucaj rextojlñu lo guedþliujre, baluiloj yälñulaslajzga. Jesucrist banitloj yälñmibee xten yälñgujt. Xtiiðxni, ni rusule' xho rbicaj dojl, baluii yälñabajñ, näjza yälñabajñ par teþpas.

<sup>11</sup> Dios gule narä te gacä te ni rusule' xtiidþni, te gacäza te apost, näjza te bejñ ni ruluii loj reni di gac xpejñ Israel.

<sup>12</sup> Ni'cni rdedä trabajw xcuent guiraa rediidþre. Niluxþ dina guituiyä, sa'csi narä nanä chu xtiidþ huililazä, nancheä laani sajç gapdzu'tzni dzuun ni baniidþni loä dxejli cheni guibi'ni.

<sup>13</sup> Chanuu guluiilu redidþsa'c ni banidþä lojlu. Gubajñza lo yälñililajz näj lo yälñsanälajz ni rajpnu sa'csi yu'nu lo Jesucrist.

<sup>14</sup> Cuanädu'tz reyälñajñ ni baniidþ Dios lojlu näj Sprit Dxan xtenni ni rbäjz neñ lastoonu.

<sup>15</sup> Anajñlu guiraa reni siääd reguedþ Asia gulälaz narä; lo redee nadxaag Figelo näj Hermógenes.

<sup>16</sup> Dad Jesucrist gacnäj reni yu' rolizþ Onesíforo sa'csi balti huält biädþpaani lazä, dini nitujy sa'csi yu'ä neñ latzguiiþ.

<sup>17</sup> Che bidzujñni guedþ Roma, gudiilpacni narä te bidþälñi narä.

<sup>18</sup> Dad Jesucrist gulaslajz laani che guidzujñ dxej ni guibi' Jesucrist. Luj anajñlu balti dzunsa'c bejñni che guyu'ni guedþ Éfeso.

## 2

*Te ni runsa'c xtzuun Jesucrist*



<sup>1</sup> Ni'cni xi'nä, guzutijp sa'csi rulaslajz Jesucrist luj, racnäjnlu.

<sup>2</sup> Rediidx ni abiejn diajglu guniä nez loj xhidäl bejn lagajc rediidxga guniini lo rebejn ni rililajzpac, loj rebejn ni sajz guluiiza diidxga lo stecuaa bejn.

<sup>3</sup> Batijp lajzlu tednäjlü narä trabajw si'c te soldadsa'c xten Jesucrist.

<sup>4</sup> Di te soldaad gun dzuun ni bejnne che gajdni gac soldaad. Rujnni xtzuum bejn ni guleni gacni soldaad, te si'c guspaani lajz bejnga.

<sup>5</sup> Sigajcza, ni rguijt digacdi xca'ni yäl'nasa'c palga dini quitsa'c si'c riäj quitni.

<sup>6</sup> Bejn ni rujn dzuun loniaa nanab xca'ni xcäl'nasa'cni ganidoo.

<sup>7</sup> Bejn xhigab xcuent ni rniä lojlu, dxejc sujn Dios gacbeelu guiraani.

<sup>8</sup> Basnaj lajzlu Jesucrist, te xagdo toDavid ni huäjz lo rebengut. Dee najc xtidx Dios ni rudzucaj dojl, si'c ni rusule'ä lojlu.

<sup>9</sup> Ni'cni cagutipä lazä cadedä trabajw, caduä caden si'c te bejn ni bagu't sabejnne. Niluxh digacdi xcaduu xtidx Dios.

<sup>10</sup> Ni'cni cadedä trabajwre te gacnää reni agule Dios te näjza reni'c chalilajz xtiidxni te guibajnneni lo bianij xten Jesucrist par tejpas.

<sup>11</sup> Guliiduxh najc diidxre;

palga agujtnu con laani, sibannäjzanu laani.

<sup>12</sup> Palga rdejdnü trabajw, sinibenäjzanu laani.

Palga dinu guicä'p numbeenuni, dizani guicäjp numbeeni nuurnu loj Xtadni Dios.

<sup>13</sup> Mase dinu chanuu lo xtiidxni, laani susoobni xtiidxni sa'csi digacdi cuatzlajzni diidx lagajc laani.

### *Te bejn nani abia xtzuumni*

<sup>14</sup> Basnaj lajz rebejn xcuent rediidxre, gunibee lojreni nez lo Dad Jesucrist na'c tildiixreni sa'csi sa' diidxga xhet sajcdini, ruxhüntisni reni riendiajgni.

<sup>15</sup> Batijp lajzlu te guidzujnlu lo Dios si'c te bejn ni runsa'c dzuun, xheti xhicuent guitujyju, sa'csi ruluisa'cpaclu xtidxliitis Dios.

<sup>16</sup> Gulälaz yälrniyaj näjza xhidalduxh diidx ni xhet sajcdi, sa'csi renani rucua diajg rediidxga riajbrureni lo redolgujdx.

<sup>17</sup> Luxh diidx ni ruluiireni suxhingajcni lastoo bejn si'c rxhinlajz tiejxh bejn. Ni'c casiajc Himeneo näj Fileto.

<sup>18</sup> Abanijtreni lo didxlii. Caniireni ala huäjs bejn lo rebengut. Si'c cagusiejchreni lajz gaii rebejn ni rililajz.

<sup>19</sup> Niluxh xtidx Dios rsudzu'tzni si'c te guij nani nadipduxh, luxh rajpnu diidxre si'c te seen: "Dad guibaa anumbee guiraa reni najc xpejnne"; näjza "Nanab guibicajreni lo redolgujdx, guiraa reni ahuililajz xtidx Jesucrist."

<sup>20</sup> Nen te yuro, xhet ganaxdi cos or näjza cos plat yu'. Yu'za cos yajg näj cos bajn; yu'reni najc parsi te laniro, yu'za reni rquün guixe-guixee.

<sup>21</sup> Sigajcza te bejn ni rrajz gun dzuunro xten Dios, riäj guibicajni loj redolgujdx ni xhet sajcdi. Dxejcti Dad Jesucrist sacnäjni te gunni redzunro xtenni.

<sup>22</sup> Gubicaj lo redzunguijdx ni rujn rebejn, huinuu yäl'nabansa'c, yälrililajz, yäl'sanälajz, gulecdxiza lajzlu näj reni rujn xtzuum Dios, naya lastooreni rbedx-rniabreni lo Dios.

<sup>23</sup> Na'c jiulu rediidx ni ruluii rebejn guedxliuj. Anajnlu rediidxga rujn rdilnäj rebejn sa'ni.

<sup>24</sup> Niluxh te xmos Dad guibaa di riäjł guchaagni reni rdijł; riäjł gacni beŋsa'c loj guiraatis bejn. Riäjłza guluisa'cni; riäjłza gutip lajzni che xhet laadi rujn bejn lojni.

<sup>25</sup> Guideb yälñadolajz guluiilu reni rdxe'ch loj rediidx ni ruluiilu. Cuääzlu gaxäjsi gusiejch lajzreni gun Dios gacheereni didxgulii,

<sup>26</sup> te jianij xcäriejnreni te guiriireni ladzŋaa beŋdxab, te gunreni ni rļajztis Dios.

### 3

#### *Xho gac rebejn nen redxelult*

<sup>1</sup> Nanab gacheelu nen redxelult sidzujn dxej tedtu trabajw.

<sup>2</sup> Sa'csi su' bejn ni chanälajz lagajctis laani, ni rinälajz xmeeltisni, bejn ni rniyaduxhtis, bejn ni rchagļajz chä'p xpala'ntisni, bejn ni rniyaj Dios; su' bejn ni di gusoob xtidx xtradreni, su' bejn ni di gudeed xquixtios lo Dios, su' bejn ni najc beŋguijdxctis.

<sup>3</sup> Nen redxelultga su'za bejn ni di chanälajz sa'ni, bejn ni di lajzni jiäjł, bejn ni rusgueduxh; bejn ni digacdi guscuääz dolguijdx ni rujnreni; bejn ni guyalazduxh; bejn nani ruŋo'n guira'ti dzunsa'c.

<sup>4</sup> Nen redxelultga su' bejn ni ruto' sa'reni; bejn ni di guidxejb gunreni ni riajbtis yejcreni, bejn ni rchalosi najcreni beŋsacduxh; bejn ni rchagļajzru gun nani rchagļajz tiejxhrene lacuaa chanälajzreni Dios.

<sup>5</sup> Nen redxelult su' bejn ni najc si'c beŋguidoo, ascanu rusoobreni xtidx Dios, niluxh naadireni xca'reni yälñadip näj yälrnibee xten Jesucrist ni ruchaa lastoo bejn.

Na'c guchaaglu rebejnğa,

<sup>6</sup> sa'csi loj sa' bejnre yu' reni richu' rolijz bejn, sasgueereni regunanayääl ni rujn dojl. Regunaare rinuu rujreni ni rļajztis tiejxhrene, rujnreni guiraloj.

<sup>7</sup> Rebejnre rsiedduxh didxcoob, niluxh di didxlii xten Jesucrist jiu' yejcreni.

<sup>8</sup> Sigajcni guj Janes näjza Jambres ni bidxe'ch loj Moisés, sigajcza najc rebejnre, cadxechnäjreni didxlii xten Jesucrist, najcreni bejn ni aguxhijn xcäriejnreni, luxh direni gacbee xtidx Dios, direni ga'p yälřililajz.

<sup>9</sup> Niluxh direni chanuu xchej, sa'csi huenliisi suhuii guiraa rebejn najcreni beŋguijdx. Si'cza gusajc guiro'p reni bidxe'ch loj Moisés.

#### *Pabl rnibee sudzu'tz Timoteu*

<sup>10</sup> Luj sanuutislu lo nani rusule'ä, näj xho nabaŋä, näj xhicuent runä dzuunre, lo xcälřililazä, lo xcälñadolazä, lo xcälřsanälazä, näjza xho batip lazä.

<sup>11</sup> Najnlu xho basacsireni narä gudedäza trabajw ladzŋaa rebejn nen reguejdx xten Antioquía, guedx Iconio, näjza guedx Listra. Gudedä trabajw niluxh Dios baslaa narä loj guiraa retrabajwga.

<sup>12</sup> Guliduxh guiraa reni rļajz chutis loj Jesucrist sidejdpacreni trabajw.

<sup>13</sup> Niluxh rebeguijdx näj reni rusguee, sinuutisreni redolguijdx, sinuuru gusgueereni bejn, luxh susgueeza bejn laareni.

<sup>14</sup> Luj huinuu guzudzu'tz loj ni abisieedlu, nani ahuililajzalu, luj anajnlu chuni'c baluini lojlu.

<sup>15</sup> Cheni biuuxlilu racbeelu xtidx Dios, ni ruluiilu xho guiriilu nen dojl te xca'lu yälñabajn par tejpas sa'csi řililajzlu xtidx Jesucrist.

<sup>16</sup> Guiraa rediidx xten Dios ni caj lo guijt, lagajc Dios baniidxni te xcajni lo guijt.

Guiralii xtidx Dios najc laaca te guluii nuurnu xhini'c najc didxlii, te gacheenu xhi najc didx-xhii,

te gacbeezanu xho riäjļ guibaᅇsa'cnu.

<sup>17</sup> Te susiᅇn niguii ni najc xpejᅇn Dios, te gac gunni guiraa redzunsac'c ni riäjļ gunni.

#### 4

<sup>1</sup> Rulidxälu nez lo Dios näjza nez lo Dad Jesucrist ni jiaäd si'c reii te gunni yälguxhtis loj reni nabajᅇn näjza loj reni aguᅇt; rniäza dee lojlu:

<sup>2</sup> basule' xtidx Dios, gususiᅇn lo Dios mase xhitis or. Baluii rebeᅇn doᅇl, gudilᅇnäj reni di rlaᅇz guzobdiidx xtidx Dios, balidxnäj resa'tu xtidx Dios.

<sup>3</sup> Sa'csi sidzujᅇn dxeᅇ di rebeᅇn guidxaglaᅇz gucuadiaᅇg yälrluisa'c; alga diidx ni najc lagaᅇc si'c najc xhigabreni rlaᅇzreni jiendiaᅇgreni, ni'cni siguiilreni xhidajl beᅇn ni ruluii te guisieedreni ganax ni rlaᅇzreni gucuadiaᅇgreni.

<sup>4</sup> Susäuureni diaᅇgreni te di jiendiaᅇgreni xtidxlii Dios; alga xhitis diidx gucuadiaᅇgreni.

<sup>5</sup> Niluxh luᅇ huinuutis lo xtidx Dios, batiplaᅇz yälᅇhuin, guniitis xho rudzucaj Dios rextojlreni, beᅇsa'c xtzuunlu.

<sup>6</sup> Sa'csi narä suga'ä ree te ju'treni narä, asiäddzugaᅇjxh dxeᅇ ni gueta.

<sup>7</sup> Aguluᅇx bacuaä si'c te soldaad ni huicuasa'c lo gueᅇ, aguluᅇx xnezyuä, gopdzutzä yälrlilaj.

<sup>8</sup> Naj cabäzä xca'a yälᅇnasa'c ni guniidx Dad xhaguibaa, suniidxni yälᅇnabaᅇsa'c. Dad najc jueᅇz ni runsa'c yälguxhtis. Niluxh xhet loätis guniidxni yälᅇnabaᅇsa'c. Sudeedni loj guiraa rebeᅇn ni catiplaᅇz cabäᅇzreni dxeᅇ cheni guibisac Jesucrist.

#### *Rediidx ni räᅇpni loᅇtis Timoteu*

<sup>9</sup> Basaaga laᅇzlu jiaᅇdhuigajlu narä;

<sup>10</sup> sa'csi abasa'n Demas narä. Sanälajzruni redzuun xten guedxliuᅇre, ᅇaj sääni guedx Tesalónica. Baxhaᅇlä Cresent sää lo regueᅇdx ni re' nez Galacia. Baxhaᅇlä Tito sää guedx Dalmacia.

<sup>11</sup> Xtebtis Lucas suganäj narä. Gudiil Marcw te jiaᅇdnäluni sa'csi saᅇc gacnäᅇni narä lo xtzun Dios.

<sup>12</sup> Tiquico baxhaᅇlä sää guedx Éfeso.

<sup>13</sup> Cheni jiaᅇdᅇlu, jiaᅇdnälu ca'p ni basa'nä guedx Troas roliᅇz Carpo, näᅇ rexlibrä; di jiaᅇlza laᅇzlu rexquitzä.

<sup>14</sup> Alejandro, ni najc gubetzguiib, basacsiduxhni narä. Dios quiixni sigajcni beᅇjni.

<sup>15</sup> Luᅇ bahuii te di gunni xhi gunni luᅇ sa'csi rdxeᅇchduxhni lo xtidx Dios ni rusule'nu.

<sup>16</sup> Galoo che bazecä diidx lo reguxhtis, rut gucnäjdi narä; guiraareni gulälazreni narä. Rniabä lo Dios na'c guchagcuentni nani beᅇnreni.

<sup>17</sup> Niluxh Dad ni yu' xhaguibaa gucnäj narä, baniidxni yälᅇnadip te guᅇc guniᅇ guiraa xtidx Dios te bieᅇn diaᅇg reni digac xpeᅇn Israel xtidx Dios. Luxh gucnäj Dios narä gulääni narä ladzᅇnaareni, si'c ro' te beedz.

<sup>18</sup> Suslaani narä lo xcaᅇlᅇnibeeni xhaguibaa. Loᅇni coldeed xquixtios, colgaᅇnduxhni par teᅇpas. Sugacni si'c.

#### *Rudeedni xtixtios lo rexamigwni*

<sup>19</sup> Badeed xtixtios lo Prisca näjza lo Aquila näjza loᅇ resa' Onesiforo.

<sup>20</sup> Erasto bia'n guedx Corinto, niluxh basa'nä Trófimo guedx Mileto sa'csi cayacxhuuni.

<sup>21</sup> Jiädgajlu ansde guisloj rebäinajl. Eubulo, Pudente, Lino, Claudia, näjza guiraa rebejtznu ni yu' lo Jesucrist ree, ruxhalreni xtixtios lojlu.

<sup>22</sup> Dad Jesucrist chunäj xaimlu. Dios gacnäj guiraatu. Sugacni si'c.

## Te Guijtz Lo Tito

### *Bacuaa Pabl lo Tito*

<sup>1</sup> Narä Pabl, nacä xmos Dios, apost xten Jesucrist, te gacnäá guiroobru xcälirililajz reni agule Dios, te gacbeezareni didxlii ni rusia xcäl'nabajñnu.

<sup>2</sup> Cayunlojzanu yäl'nabajñ par tejpas nani Dios, ni digacdi guinii didx-xhii, bia'nni didx guniidxni cheni gajdli guedxliuj guirixtiej.

<sup>3</sup> Niluxh che bidzujñ dxej ni agulexgaa Dios, laani baluini xtiidxni. Si'cza baniidxni xtiidxni loä te gusule äni si'c gunibee Xtiosnu ni ruslaa nurnu neñ dojl.

<sup>4</sup> Cacuaä guijtzre lojlu, Tito, xi'nä lo yäl'irililajz ni ria'pnu xcuent Jesucrist. Rniabä lo Dios Xtdnu näj lo Dad Jesucrist ni rbää nuurnu neñ dojl, gacnäjäreni luj, gulaslajzreni luj, guscuecdxizareni lajzlu.

### *Dzuun ni rujñ Tito guedx Creta*

<sup>5</sup> Che basa'nälu lo yuj ni tre' lo nisdoo, ni laa Creta, basa'nälu te guluuxlu dzuun ni di niäjdi nuluxä ro'c, näjza te cuelu rebengool loj reguidoo neñ tejga reguejdx si'cni gunibea gunlu.

<sup>6</sup> Gule bengool ni nabansa'c, te na'c guiniyaj bejñreni, nanab gacni chääl tejtis gunaa, riäj'lza chalilajz rexi'nni, na'c guibajñreni si'ctisni r'lajz tiejxhrene, jiureni xtidx xtdareni.

<sup>7</sup> Niguui ni rnibee guidoo rcanäj rexhixten Dios, ni'cni riäj'l ga'pni te yäl'nabanya. Na'c gacni te beñnajd, na'c gacni te beñnadxecha', na'c gacni bengu, na'c gacni te beñ ni rdxagdijl beñ, na'cza xca'ni meel ni dini niunsa'c gaan.

<sup>8</sup> Nanab gacni te beñ ni rudedlaa rolijzni jia'n beñ biooz, riäj'lza chanälajzni dzunsa'c, gac nasinñi. chu xcäriejñni; guibansa'cni nez lo Dios, sigajcza nez lo rebejñ, guibanñayani nez lo Dios, na'c gunni nani r'lajzti tiejxhni.

<sup>9</sup> Riäj'l chanuutisni lo didxlii ni bisieedni te gac gulidxnäjzani beñ xtidx Dios, te guzejcni diidx lo rebejñ ni rniyaj xtidx Dios.

<sup>10</sup> Yu' xhidajl benguijdx, bejñ ni rnii diidx ni xhet sajcdi, näjza xhidajl bejñ ni rnii didx-xhii ni rusguee. Näjza lo rexpñ Israel ni riuduxh leii yu' sa' bejñre.

<sup>11</sup> Sa' redee ni nanab jiäu ro'ni, sa'csi rusgueereni xhidallo sa'reni, ruluiireni ni di riäj'l guluiireni te gunreni gaan meel.

<sup>12</sup> Te niguii ni siääd lagajc lajdxreni guniini xcuent lagajc rebeñ lajdxni: "Rebejñ ni najc cretenses rñiduxhrene didx-xhii, niälajzaren. R'lajzreni gausa'creni niluxh di r'lajzreni gunreni dzuun."

<sup>13</sup> Niluxh guliini, ni'cni gudilñajreni, te chalilazsa'creni xtidx Jesucrist,

<sup>14</sup> te na'cruza gucuadijgreni rediidx ni rdxällajz rexpñ Israel, niclaza rediidx ni rnibee bejñ ni gulälaz didxlii.

<sup>15</sup> Loj renani rujñ xhigabya, guira'ti najc naya, niluxh loj reni di chalilajz, ni xhet nayadi najc xhigabreni, guira'ti nacdXuudx, xcäriejñireni nacdXuudx.

<sup>16</sup> Naj rujñsireni si'cni numbeereni Dios, niluxh ni rujñreni huenliisi ruzeñ direni nililajz, najczeni benguijdx, direni jiu xtidx Dios, digacdi gunreni nicla tej dzunsa'c.

## 2

### *Rulijdx Pabl Tito guluusa'cni rebejñ*

<sup>1</sup> Niluxh luj guniitis rediidx ni ruluusa'c.

<sup>2</sup> Baluui rebengool gac beṅya, bejṅ ni yu' xcäriejnṅni, bejṅ ni rumbee xhini'c najc dzunsa'c, xhini'c najc dzunguijdx, bejṅ ni rajpza yälirililajz, yälšanälajz, näjza ni rbecdxṅ lajzṅni.

<sup>3</sup> Sigajcza, regunagool, nanab guibajṅreni si'c te ni yusa'c lo Dios, na'c guiniireni diidx ni di riäjṅ guiniireni, na'cza soozreni. Riäjṅ guluiireni redidxsa'c

<sup>4</sup> te guluiireni regunaa dxa'p chu xcäriejnreni, chanälajzreni chäälreni näj rexi'nreni.

<sup>5</sup> Gacreni nasṅ, guibanṅayareni, xcanäsa'creni rolijzreni, gacreni beṅsa'c gusoobreni xtidx chäälreni, te rut guiniyajdi xtidx Dios.

<sup>6</sup> Sigajcza gojz lo rebṅ'n riäjṅ chu xcäriejnreni.

<sup>7</sup> Luj guzuj te fiireni xho riäjṅ gun bejṅ dzunsa'c. Che guluiilureni, saru baluui guiraa reni riäjṅ guluiilu.

<sup>8</sup> Didxsa'c gunii te rut gacdi guiniyaj diidxga, te si'c guitujz chutis ni rrajz guidx'e'ch lojtu te xhet xhi didxguijdxdi gac guiniireni xcuentlu.

<sup>9</sup> Baliidx remos te gusoobreni xtidx xlamṅreni, te gunsa'creni dzuun, na'c guzejceni diidx lo rexlamṅreni.

<sup>10</sup> Na'c cuanreni alga guibaṅsa'creni te guluii xcälṅnabajṅreni lacti sacduxh xtidx Dios ni basṅaa nuurnu neṅ dojṅ.

<sup>11</sup> Sa'csi abiääd xcälṅracnäj Dios, abiädnäni yälruṅṅaa neṅ dojṅ lo guiraa rebejṅ.

<sup>12</sup> La xcälṅracnäj Dios ni ruluii nuurnu gusa'nnu redzunguijdx, näjza dzuun xten guedxliujre te guibaṅsa'cnu, te chonälajznu Dios lo guedxliujre.

<sup>13</sup> Ruluiizani nuurnu cuääznu guidzujṅ dxej ni soob xtiidxni ni basa'nni loonu xcuent dxej che jääd Gueb Dios näj Xtaḁ Jesucristnu ni ruṅṅaa nuurnu lo dojṅ.

<sup>14</sup> Laani gujtni te guṅṅaa nuurnu lo guiraa redolguijdx, te basiani nuurnu te gacnu xpejṅni, gaczanu te bejṅ ni rdxaglaiz rujṅ dzunsa'c.

<sup>15</sup> Diidxre gunii, baliidx, basule' si'c te beṅnajṅ. Di gusaanlu cuälazreni luj.

### 3

#### *Ni riäjṅ gun reni rlilajz*

<sup>1</sup> Basnaj laiz rebejṅ gusoobreni xtiidx rebejṅ ni rnibee näjza reguxhtis, gusoobreni xtiidxreni, xcäjbzarenṅ gunreni xhitis dzunsa'c.

<sup>2</sup> Na'c guiniyajreni bejṅ, cuedxireni, gaczarenṅ bensa'c, saru gac nadolajzreni loj chutis bejṅ.

<sup>3</sup> Sa'csi galoo sigajcza xheti xcäriejṅnu, dizanu gusoob xtidx Dios; basguee bejṅ nuurnu, yu'tisnu lo guiraasi dolguijdx näjza lo ni rchaglaiztis rujṅ tiejxhnu, nabajṅtisnu lo dolguijdx, rudxonlajznu, rdxe'ch bejṅ loonu, rdxe'chzanu lo sa'nu.

<sup>4</sup> Niluxh che baluiloj xcälṅrulaslajz näjza xcälṅrinälajz Dios ni ruṅṅaa nuurnu näjza rebeṅ guedxliuj lo dojṅ.

<sup>5</sup> dxejc basṅaa Dios nuurnu lo dojṅ, xhet sa'csi yu'di xhi dzunsa'c bienu, alga sa'csi balaslajzni nuurnu. Basṅaa Dios nuurnu lo dojṅ sa'csi bidiib lastoonu, te biäjṅt xtojṅnu te najcnu beṅcoob, sa'csi bascoobza Xsprit Dxaṅ xten Dios xcäriejṅnu.

<sup>6</sup> Baniidx Dios cuääzpac Xsprit Dxanni neṅ lastoonu xcuent ni bejṅ Jesucrist ni basṅaa nuurnu,

<sup>7</sup> te sa'csi rujṅ Dios cuent najcnu beṅsa'c sa'csi abadzucajni xtojṅnu, naj sica'nu xcälṅnasa'cnu ni cabääznu, nalaaznu yälṅnabajṅ par tejpas.

<sup>8</sup> Dee ni najc guliipac, ni'cni rlazä chanuutislu guiniilu rediidxre loj rebejn, te rebejn ni rililajz xtidx Dios gunduxhrenei ganax dzunsa'c. Rediidxre najc laaca, sacduxhrenei loonu.

<sup>9</sup> Naj basaan rediidx ni najc xlia'si, rediidx ni gunii rebeñ galoo, yälrđilđiidx xcuent xleii toMoisés sa'csi guiraa rebiejyga xhet sajcdini, xhetza huendi rujnrenei.

<sup>10</sup> Palga yu' te bejn ni gun la' sa' rebeñ guidoo, gunii lojni tej o tio'p huält. Palga dini jiejn, colcuääni lojtu.

<sup>11</sup> Sa'csi anajntu sa' bejnğa abar'o'nni, agulälazni didxlii, lagajc xtojłni sujn nitni.

### *Diidx ni bacuaani lojtis Tito*

<sup>12</sup> Che guxhalä Artemas o Tiquico lojlu, gudahuiipac narä lo guedx Nicópolis. Ro'c abenä xhigab tedä rebäinajł.

<sup>13</sup> Gucnäduhx licenciaad Zenas näjza Apolos, badeed guiraa ni rquiinrenei te chanuureni xpiajrenei, te xhet jiäädxdireni.

<sup>14</sup> Suguisieedza resa'nu gunrenei dzunsa'c te gacnäjrenei che guiquiinnureni, te na'c guibajñrenei xlia'si.

### *Ruxhalni xtixtios*

<sup>15</sup> Guiraa reni yunäj narä ruxhal xtixtios lojlu. Badeedza xtixtios loj resa'nu lo yälrililajz. Dios gacnäj guiraatu. Sugacni si'c.

## Te Guijtz Lo Filemón

### *Rucuaa Pabl guijtz lo Filemón*

<sup>1</sup> Narä, Pabl, yu'ä nen latzguiib sa'csi rniä xtidx Dad Jesucrist. Narä näjza bejtznu Timoteu cagucuaanu guijtzre lojlu, Filemón, ni sanälazduxhnu sa'csi najclu sa'nu lo xtzun Dios.

<sup>2</sup> Rucuaazanu guijtzre lo Apia, bisiajnno lo yälirilajz, näj lo Arquipo ni racnäj nuurnu lo dzuunre, näjza loj rebenguidoo ni rchagsa' rolizlu.

<sup>3</sup> Dios Xtadnu näj Dad Jesucrist gacnäj la'tu, guscuedxireni lajtz.

### *Xcälsanälajz näj xcärlilajz Filemón*

<sup>4</sup> Rudedä xquixtios lo Dios xcuent luj che rniä lo Dios.

<sup>5</sup> Abiejn diagä xcuent yälirinälajz näj yälirilajz ni rajplu lo Dad Jesucrist, näjza reni yu' lo Dios.

<sup>6</sup> Rniabä lo Dios tioobru xcärlilajzlu la' ni rusule'luni, te gacbesa'creni xcuent guiraa reyäl'nasa'c ni rajplu, ni runiidx Dad Jesucrist lojlu.

<sup>7</sup> Lacti rbalazduxhä, rbedxi lazä sa'csi sanälajzlu resa'nu näjza sa'csi luj, betzä, agulecdxilu lastoo reni rililajz.

### *Pabl rniabni lo Filemón xcasacni Onésimo*

<sup>8</sup> Mase rapä xcäl'ribee Jesucrist sajc guiniä gunlu xhitis ni riäj'l gunlu,

<sup>9</sup> rniabä lojlu gunlu te dzunsa'c sa'csi narä nacä Pabl ni rinälajzlu, nacä bengool, yu'ä latzguiib xcuent Dad Jesucrist.

<sup>10</sup> Canabä xcuent Onésimo ni najc si'c xi'nä, sa'csi huililajzni xtidx Dios ni basule'ä lojni naj ni yu'ä latzguiib.

<sup>11</sup> Galoo, dini niajc bens'a'c lojlu, niluxh naj sacnäduxhni guiro'pnu.

<sup>12</sup> Ruxhalsacäni lojlu, te xcasacuni stehuält si'c ni najräni xca'lu, sa'csi siädnäni lojlu ascanu lagajc lastoä.

<sup>13</sup> Narä rlazä niannäjni narä xcuentlu, te niacnäjni narä naj ni yu'ä latzguiib sa'csi basule'ä xtidx Dios.

<sup>14</sup> Niluxh di rlazä niunä si'c palga luj dilu xcäjb gacni si'c. Dina guinia gacnäjpacu narä si'c gojn. Narä rlazä gunluni sa'csi rlazjpacu gacni si'c.

<sup>15</sup> Pet gubicaj Onésimo lojlu tio'p-choñ dxejsi. Niluxh naj xca'luni te chuni lojlu par tejpas.

<sup>16</sup> Naj xhetru si'cdi te mos chuni lojlu. Naj sajcruni loj te mos. Naj najcni si'c te betzbiidlu ni sanälajzlu. Narä sanälazduxhäni, niluxh luj riäj'l chanälajzruluni, xhet si'c chutis te bejn, alga si'c te bejtzlu lo Dad Jesucrist.

<sup>17</sup> Naj palga rumbeelu narä si'c te sa'lu, cua'ni sigajc narä.

<sup>18</sup> Palga yu' xhi bejnni lojlu o palga yu' xhi nazäabni lojlu, basa'nni lo xcuentä.

<sup>19</sup> Lagajc narä, Pabl abacuaä guijtzre con nää con xleträ, narä siguixäni. (Te na'c guiniä nazääbzalu lagajc luj loä.)

<sup>20</sup> Betzä, benläa hueenre narä si'c te ni sanälajz Dios te guspaalu lazä nez loj Dad Jesucrist.

<sup>21</sup> Bacuaä guijtzre lojlu sa'csi nancheä susooblu xtidxä, sujnzalu maazdi loj ni rniabä lojlu.

<sup>22</sup> Sigajcza basuchee te lajt cadre jia'nä, sa'csi cabäzä gudzu' Dios ni gunabtu lojni, gusaan Dios jiädhuiä la'tu.



*Ruxhalni xtixtios lojni*

<sup>23</sup> Epafras ruxhal xtixtios lojlu. Laani yunäjni narä latzguiib, sa'csi gunizani xtidx Jesucrist.

<sup>24</sup> Marcw, Aristarco, Demas, näj Lucas, ni racnäjä narä lo dzuunre, ruxhalzareni xtixtios lojlu.

<sup>25</sup> Dad Jesucrist gacnäjä la'tu. Sugacni si'c.

## Te Guijtz Nani Biääd Loj Rebeñ Hebree

### *Agunii Xi'n Dios xtidx Xtadni*

<sup>1</sup> Nen redxe galoo garen-garen mood guninäj Dios retoxtadgoldoonu. Xhidajlza huält guniini por reniguii ni bacuaa xtiidxni.

<sup>2</sup> Nen redxeje aguniini loonu por Xi'nni, lojzani badeed Dios yälriabee guncheeni guedxliujre, badeedzani guira'ti lojni.

<sup>3</sup> Laani najc xtuxh xten xcälrdimbicha' Dios, laani najczani sigajc najc Dios, laazani rapchee guira'ti con xtiidxni ni rnibee. Cheni gulujx basiani xtojlnu, gurejni xladbee Gueb Dios xhaguibaa te canibeeni.

### *Sacduxhru Xi'n Dios loj rexangl Dios*

<sup>4</sup> Ro'c gurej Xi'n Dios sa'csi sajcruni loj reangl xten Dios, sa'csi acua'nü yälriabee si'c te bejn ni riannäj xhixten Xtadni. Lajzani sajcru lo relaj rexangl Dios.

<sup>5</sup> Sa'csi Dios di niäjb loj nicla tej rexanglni: Luj najclu Xi'nä. Narä guleälu te guinibeelu.

Dizani niäjb xcuent nicla tej rexanglni:

Narä gacä xtadni, laani gacni xi'nä.

<sup>6</sup> Niluxh che biädnäni Xi'n xtebni lo guedxliuj, guniini: Guiraa rexangl xten Dios, ¡Colgan Xi'nä!

<sup>7</sup> Che gunii Dios xcuent rexanglni räjpni:

Rujnni ruxhunu rexanglni si'c bej, rujnni rbebajl rexmosni.

<sup>8</sup> Niluxh xcuent Xi'nni guniini:

Luj najc Dios.

Nabajnlu par tejpas; xcälriibeelu par tejpas najc te yälriibesa'c.

<sup>9</sup> Ahuinälajzlu xhigabsa'c, dipaclu nichagljaz xhigabguijdx, ni'cni Dios ni najc Xtioslu, baniidxru yälrbalajz lojlu quela loj resa'lu.

<sup>10</sup> Rniizani:

Luj, Dad, che guslojli bencheelu guira'ti, bencheelu cad soob guedxliuj, naazalu bencheelu reguibaa.

<sup>11</sup> Laareni sinitlojreni, niluxh luj nabajnlu par tejpas.

Guiraareni siujx si'c riujx te lajd.

<sup>12</sup> Suse'tlureni si'c rie't te la' lajd, sidxaareni si'c rdxaa te lajd.

Niluxh luj dilu guidxaa.

Lalgajctis nabajnlu, di rexijzlu ted.

<sup>13</sup> ¿Gucxha räjp Dios lo te xanglni scree, ä? Räjpni:

Gurej xladbeä te guinibeelu dxejli cheni gudzugä guiraa ni rdxe'ch lojlu ladz ni'lu.

<sup>14</sup> Guiraa rexangl Dios najc sprit, ruxhal Diosreni te chayacnäjreni rebejn ni xca' yäl'nabajn par tejpas.

## 2

### *Na'c gusaanni diidx ni ruslaani lo dojl*

<sup>1</sup> Ni'cni nanab jiunu xtidx Dios ni abiejn diajgnu, te na'c guibicajnu lo xnezuyjni.

<sup>2</sup> Anajntu aguzojb diidx ni gunii rexangl Dios nen redxe galoo. Luxh reni di nusoob diidxga bejnreni dojl, dxejc bateed Diosreni trabajw.

<sup>3</sup> ¿Xho gac guibicaj xcälñaj Dios yejnu palga dinu jiu rextidx Dios xcuent yälrusläa lo dojl, ä? Ni Dad, Jesucrist basa'n diidxga lo rexpejn̄pacni, dxejc laareni basule'reni rediidxre loonu.

<sup>4</sup> Niluxh Dios baluui najc diidxga guliipac sa'csi bejn̄ni reseen, näjza yälrdxeloduxh, näjza xhidajl remilagrw. Badeedzani Sprit Dxan xtenni loj renani ahuuilajl xtiidxn̄i te gun tejpgareni garen-garen xtzuumreni si'tis ni rlajz Dios gunreni.

*Nani guläxtiej yälrusläa bejn̄ lo dojl*

<sup>5</sup> Di Dios gudeed yälrnibee lo rexanglni te guinibeereni guedxliucoob ni cagusa'tnu naj.

<sup>6</sup> Guyu' tej ni bacuaa xtidx Dios lo guijt, räjpni:

¿Chu najc niguii, te guinalajz Dios laani?

¿Chu najc xi'n niguii te jiädhuiizalumi?

<sup>7</sup> Nagabsi dxej guxiiru sajcn̄i lo reangl xhaguibaa, dxejcti badesaclu xcälñasa'cni,

badesaclu xpala'nni,

badeedzalu yälrnibee lojni te guinibeeni guira'ti ni bencheelu.

<sup>8</sup> Badeedlu guinibeeni guiralii ni yu' lo guedxliuj.

Cheni badeed Dios guira'ti te guinibeeni, xhetliidi basa'n Dios ni digacdi guinibeeni, niluxh naj ruhuiinu gajdni guinibee guiralii ni'c.

<sup>9</sup> Alga rhuinu Jesucrist, ni bejn̄ Dios guxiiru sajcn̄i lo reangl xten Dios che guyu'ni lo guedxliuj balsi dxej. Che baluux Jesucrist xtzuumni lo guedxliuj, badeed Dios yälrdimbicha' näjza xpala'nni lojni. Sa'csi sanälajz Dios nuurnu basaanni gudejł Xi'nni trabajwduxh, gujtni lacuaa nejtnu.

<sup>10</sup> Dios benchee guiralii ni yu' lo guedxliujre, najli rnibeeza Dios guira'ti. Luxh Diosre rlajz chanäni xhidajl xi'nni xhaguibaa, ni'cni baxhal̄ Dios xi'npacni Jesucrist te guläxtiejni yälrusläa bejn̄ lo dojl che gudejdni trabajwduxh lo cruzj.

<sup>11</sup> Sa'csi Jesucrist, ni rujn chasanäj bejn̄ te yälñabanya, näjza reni risanäj yälñabanya, tejtis najc xtadreni. Ni'cni di Xi'n Dios guitujy guiniini lojreni: "betzä".

<sup>12</sup> Scree caj lo xtidx Dios:

Chasule'ä lo rebetzä xho najclu,

siliä'päza xpala'nlu lojreni.

<sup>13</sup> Räjpzani:

Sibäzä gacnäj Dios narä.

Ste lajt guniini:

Bahuii loä näjza rexi'nä ni baniidx Dios loä.

<sup>14</sup> Te famil najc tejsi bääl, tejsiza rejn̄; ni'cni che biäd Jesucrist lo guedxliuj guyu' tiejxhni näj xtiejn̄ni si'c benguedxliuj, gujtzani te gujc bejn̄ni gunijt nani rnibee yälgujt, nalajznu, bendxab.

<sup>15</sup> Te si'c baslaani guiraa reni rdxejb yälgujt, najceni si'c reni yu'tis loj xlamni guideb nabajjn̄ni, lacti rdxejbreni yälgujt.

<sup>16</sup> Guliini dini niäd te gacnäjni reangl xten Dios, biädni te gacnäjni guiralii rexaj toAbram.

<sup>17</sup> Ni'cni gujcn̄i si'cpac te bejtznu, te gac gacni te bixhojz xten Dios ni rulasajz, te bixhozsa'cza xten Dios, si'cni rlajz Dios gacni te gusläani rebejn̄ lo dojl.

<sup>18</sup> Sa'csi lagajc laani gudejdni trabajw, luxh baquiilza bendxabni niujnni dojl, ni'c naj sajcn̄i renani ruquuil bendxab gun dojl.

## 3

*Jesucrist sajcru loj Moisés*

<sup>1</sup> Ni'cni bejtzu, reni anabansa'c, sa'csi najctu reni gurejdx Dios gac xi'nni, colyemle Jesucrist ni baxhał Dios loonu. Laani najc bixhojz ni sajcru, rusule'zani xtidx Dios xcuent nani ahuililajznu.

<sup>2</sup> Laani huinuutis guyu'ni lo Dios ni guleni te gunni dzuunre. Sigajc ni bensa'c toMoisés xtzuum Dios che guyu'ni loj rexepejn Israel, sigajcza bensa'c Jesucrist dzuun che biäädni lo guedxliuj.

<sup>3</sup> Sigajc ni yu'ru xpala'n dad lo xpala'n rexi'nni, sigajcza yu'ru xpala'n Jesucrist lo xpala'n toMoisés.

<sup>4</sup> Yu' xtad guiraa refamil lo guedxliuj, niluxh gule'c Dios guiralii bejn, bencheezani guedxliuj.

<sup>5</sup> Basoob Moisés diidx si'c te mos, cuanäjni rexepejn Dios si'cni gunibee Dios gunni, te baluiini xho gac redzuun ni gajd gac dxejc, luxh naj agujc redzuunga.

<sup>6</sup> Niluxh Jesucrist basoob diidx si'c xi'npac Dios. Cuanäjni xfamil Dios. Nurnu najcnu xfamil Dios palga chanuutis sudzu'tznu lo xtiidxni, palga guibalajztisnu, palga gutiplajznu dxejli ni guibi' Jesucrist.

*Yälrusilajz xten rexepejn Dios*

<sup>7</sup> Ni'cni, si'cpac rniı Sprit Dxan xten Dios:

Naj, palga jiendiajgtu xse'ni,

<sup>8</sup> na'c gun-najdtu lastootu si'c bejn rebejn ni bidxechnäj Dios che cuansajreni lo reyubijdz.

<sup>9</sup> Ro'c bidxechnäj retoxtadgoldootu Dios sa'csi direni nililajz Dios siädnäreni, niluxh bahuiireni redzunduxh ni bejn Dios nez lojreni tiuu ijz.

<sup>10</sup> Ni'cni lał ni cadxe'ch Dios loj rebejnğa, bejn Dios xhigab:

Sujiannäjreni xhigabguijdxreni,  
dina gusanä jiu'reni xcälrusilazä.

<sup>11</sup> Ni'cni bidxe'ch Dios lojreni,  
bejn Dios te xhigabduxh,  
di rebejnğa jiu' te gusilaznäjni.

<sup>12</sup> Bejtzu, colnatiro andi chu tejtı rujn xhigabguijdx, rıajz guibicaj lo Dios, ni nabajın par tejpas, sa'csi dini chalilajz xtiidxni.

<sup>13</sup> Ni'cni colgulijdx resa'tu guixe-guixee, laga najcni nadxej; te di chu tejtı gacnajd lastooni xcuent reyälrusguee xten redojl.

<sup>14</sup> Sa'csi palga chanuunu sudzu'tznu lo xtidx Dios ni huililajznu che biem-beenuni, dxejc yu' xhi rajpnu con Jesucrist.

<sup>15</sup> Si'c caj lo guiitz:

Nadxej, palga jiendiajgtu xse' Dios,

na'c gunnajdtu lastootu si'c bejn rebejn ni bidxechnäj Dios lo reyubijdz.

<sup>16</sup> ¿Chu reni'cni bidxechnäj Dios che biendiajgreni xtiidxni? ¿La et laadi guiraa rebejn ni gulää Moisés guedx Egipto, ä?

<sup>17</sup> ¿Chuxh loj bidxe'ch Dios tiuu ijz lo reyubijdz, ä? ¿La et laadi reni biajb lo dojl, dxejc gujtreni, huijiajbreni nez loj reyubijdz, ä?

<sup>18</sup> ¿Chu loj räjpni dipacreni jiu' lo xcälrusilajzni? Loj reni di nusoob xtiidxni.

<sup>19</sup> Ni'c ruhuiinu di niajcdi niu'reni lo yälrusilajz sa'csi direni nililajz xtidx Dios.

## 4

<sup>1</sup> Ni'cni palga bia'n diidx siu'pacnu lo yälrusilajz con Dios, nanab jia'pnu lagajc nuure didi yu' chu tejnu di gun gaan jiu' lo yälrusilajzga.

<sup>2</sup> Sa'csi nuure abiejn diaagzanu diidx ni rusia dojl, sigajc biejn diajg rebejn̄ga; niluxh xlia'si biejn diajgreni diidxga sa'csi bacuadiajgrenini niluxh direni nililajzni.

<sup>3</sup> Luxh nuure ni ahuililaaznu siu'nu lo yälrusilajzga; caj lo guijt̄z gunii Dios rediidxre:

Ni'cni bidxe'chä lojreni, benä te xhigabduxh,  
di rebejn̄ga jiu' te gusilaznäjreni narä.

Mase abaluuxni xtzuumni cheni birixtiejli guedxliuj.

<sup>4</sup> Sa'csi loj stee guijt̄z caj diidx ni guniini xcuent dxej ni rusilajz bejn̄:  
Xho'p dxej bejn̄ Dios xtzuumni, dxejcti basilajzni tebdxej.

Xhet bejndini dxejga.

<sup>5</sup> Stehuält guniini:

Di rebejn̄ga jiu' te gusilaznäjreni narä.

<sup>6</sup> Niluxh yu' reni gajd jiu' loj yälrusilajzga, luxh reni biejn diajgni diidx ni rusia dojl di niu' sa'csi direni nusoob xtiidxni.

<sup>7</sup> Ni'cni basoob Dios ste dxej gac "nadxej". Gudejd xhidajl ijz che gunisac Dios xcuent yälrusilajz. Badeed Dios gunii toDavid rediidxre:

Nadxej, palga jiendiajgtu xse'ni, na'c gunnajdttu lastootu.

<sup>8</sup> Paru nudeed Josué yälrusilajzga loj rexpeñ Israel, diru Dios ninisac xcuent stee dxejre.

<sup>9</sup> Naj ria'nza te yälrusilajz par rexpeñ Dios,

<sup>10</sup> sa'csi nani riu' lo xcälrusilaznäj Dios, rusilajzzani lo xtzuumni sigajc basilajz Dios lo xtzuumni.

<sup>11</sup> Nanab chanuu gusoobnu xtiidxni te jiu'nu lo yälrusilajzga, te di chu tejnu ni gacnajd lajzni si'c ni gucnajd lajz renani di nililajz.

<sup>12</sup> Sa'csi nasesduxh xtidx Dios, yuduxhza xcälrnibee xtidx Dios. Najcni si'c te guchiil ni caduxh ro'ni, räazni nez neñ redzujt̄ näj yojb. Sigajcza xtidx Dios räaz nez cadro rlia' sa' xsprit näjza xaim bejn̄. Ruluiiza xtidx Dios rexhigab ni yu' lastoo bejn̄, näjza redzuun ni rlajz lastoo bejn̄ gun.

<sup>13</sup> Xheti xhi bencheedi Dios ni naga'tz nez lojni. Guiralii guyasi ruhuii Dios. Sajpnu gudeednu cuent lo Dios.

### *Bixhojz ni sajcru najc Jesucrist*

<sup>14</sup> Jesucrist, Xi'n Dios, najc xpixhojzpacnu ni sajcru, nani abiu' loj Dios. Ni'cni nanab chanuu sudzu'tznu chalilaaznu xtidx Dios.

<sup>15</sup> Xpixhojznu ni sajcru sajç gulaslajzni nuure te di jiajbnu lo dojl, sa'csi laani sigajcza gudejdni trabajw, baquuil ben̄dxabni te niujjni dojl, niluxh dini niujn̄ dojl.

<sup>16</sup> Riäjlpac na'c guidxeebnu cuedx-guiniabnu lo Xtiosnu ni sanälajz nuure. Na'cza guitujynu, te gulaslajzni nuure, guideb xcälracnäjni gacnäzani nuure.

## 5

<sup>1</sup> Galooli guiraa rebixhojz ni sajcru nabee lo rebejn̄. Bixhojz ni sajcru rniab lo Dios xcuent rebejn̄. Luxh lojni ruedeed rebejn̄ regon näjza reguidxaa ni gudeedni lo Dios te jiäu lo xtojlr̄eni nez lo Dios.

<sup>2</sup> Rdejdza bixhojz trabajw sigajc benguedxliuj, ni'c sajç ga'pni yäl̄nadolajz loj rebejn̄ nani nayääl näjza reni abanijt lo Dios.

<sup>3</sup> Niluxh sa'csi nájza laani rujnni dojl, nanab gudeedni guidxaa lo Dios te jiäu lo rextojlni sigajc rudeedni guidxaa lo Dios te riäu lo xtojł rebejn.

<sup>4</sup> Rut sajcdi gac bixhojz xcuentceni. Dios najc ni rbejdxni te gacni bixhojz, dxejc rudeedni xpala'nni lojni si'c badeednini lo Aarón.

<sup>5</sup> Si'cza di Jesucrist niajc bixhojz ni sajrcu xcuentceni. Dios najc nani gulälajni gacni bixhojz ni sajrcu, rájpnı lojni:

Luj najclu Xi'nä, narä guleälu nadxej te guinibeelu.

<sup>6</sup> Scree cajza lo xtidx Dios stee lajt:

Luj najclu bixhojz par tejpas sigajc gujc te niguii ni laa Melquisedec.

<sup>7</sup> Cheni gubajñ Jesucrist lo guedxliujre, gurejdx-gunabzani lo Dios, guredxa'ni biinzani lo Dios nani sajc nudzucajni lo yälgujł; Dios bacuadiajg xtiidxni sa'csi huinälajz Jesucrist Dios.

<sup>8</sup> Ni'cni Jesucrist mase najcni Xi'n Dios bisieedni basoobni diidx luxh näj ni'c gudejdni trabajw.

<sup>9</sup> Che bidzujñ dxej baluuxni guiraa redzuun ni rrajz Dios gunni, laani gujcnı nani rudeed laa bejn nani rusoob xtiidxni lo dojl par tejpas

<sup>10</sup> sa'csi Dios gulälajni bixhojz ni sajrcu, gujcnı bixhojz sigajc gujc Melquisedec.

### *Rxhunjriezgw gusa'nni xcälřirilajzni*

<sup>11</sup> Rrajznu guiniinu xhidalduxhru diidx xcuent Melquisedec, niluxh naganduxh gusule'nuni lojtu sa'csi nadyejctu, ditu gacbee.

<sup>12</sup> Agujc xchej huililajztu rediidx xcuent Jesucrist. Ariäjł gusule'tu rediidxre näj, niluxh alga rquiinrutu chu gusule' rediidxre lojtu stehuält, luxh rediidxre najc rediidx guyasi xten Dios. Agucsactu si'c báz. Rrajztu yäsactu le'ch lacuaa gautu yäjt, bääł; nalajznu, redidxnagajñ xten Dios.

<sup>13</sup> Reni najc si'c báz, rä' le'chtis, direni gumbesa'c redidxxsa'c xten Dios.

<sup>14</sup> Niluxh reben guyajł rajw yäjt. Sigajcza redidxnagajñ xten Dios najc par rebejn ni aguyajł lo xtidx Dios, renani ayu' xcäriejnıni, arumbeereni nani najc dzunsa'c, nani najcza dzungujdx.

## 6

<sup>1</sup> Nanab guisieedrunu xtidx Dios te churu xcäriejnınu. Na'c guisieedtisnu didx-guyasi xcuent Jesucrist. Na'c guluiitisnu diidx xcuent yälřusiechłajz, xcuent redzuun ni rujñ rejł bejn, näj yälřirilajz xtidx Dios.

<sup>2</sup> Na'c guluiitisnu xcuent yälřobnis, näj yälřrudzubnaa yejc bejn, näj xcuent yälřbajñsac rebengut, näj xcuent yälřguxhtis par tejpas.

<sup>3</sup> Alga do'o guisieedru xtidx Dios te churu xcäriejnınu, palga si'c guniidx Dios jiennu.

<sup>4</sup> Yu' bejn ni abianij xcäriejnıni, ni acua' reyälřnasa'c ni rudeed Dios, ni rbäjz Sprit Dxañ xten Dios neñ lastooreni,

<sup>5</sup> luxh bidxagłajzreni xtidx Dios näj yälřnıbee xten Dios ni churu jiäd.

<sup>6</sup> Palga laareni guibisacreni lo sa' yälřnabajñ ni gojpreni galoo, diru gacdi guidxaa xmodreni stehuält, sa'csi dxejc sajcnı si'c ni lagajc laareni gucuasacreni Xi'n Dios lo cruzj, nalajznu susanxtujyreni Jesucrist nez loj rebejn.

<sup>7</sup> Ben guedxliuj ni biejn diajgnı najc si'c najc yuj ni rä' nis che riajbtis nisguij. Palga yujga gudeed yälřnasa'c loj reni rujñ dzuun lojni, sunle' Dios yujga.

<sup>8</sup> Niluxh palga gudeed yujga ganax yaguejch nájza cuaan ni xhet sajcdi, xliá'sini, sujn rebejn gac nadeni te checni.

### *Diidx ni rusudzu'tz lastoonu*

<sup>9</sup> Mase rniinu scree lojtu, anajnnu huililajztu xtidx Jesucrist nájza xtiidxni ni ruslaa lo dojl.

<sup>10</sup> Sa'csi Dios najc ni rujn yálguxhtissa'c, diza lajzni jiäl ni rujntu la'tu náj yálsanälajz ni rajptu par laani che racnäjtu rebejtznu lo yälrlililajz, luxh guixee si'c rujntu.

<sup>11</sup> Naj rrlajznu tejpgatu chanuu ga'p lagajc yälrbalajzre dxe lultli, te gac guiraa ni cabäjznu.

<sup>12</sup> Rlajznu na'c gactu bejn ni rbedxitis, alga guntu sigajc bejn rebejn galoo, gopdzu'tzreni yälrlililajz ni batipduxh lajzreni, guläjzreni te cua'reni reyäl'nasa'c ni bia'n diidx gudeed Dios lojreni.

<sup>13</sup> Luxh che bia'n Dios diidx loj toxtadgoldoonu Abram, guniini por lagajc laani sa'csi ruti stee ni sajcru lojni.

<sup>14</sup> Scree gunii Dios: "Guliä sacnää luj, sunidxäza xhidajl xi'nlu."

<sup>15</sup> Cheni aguläjz Abram xchej, gusojb diidx, cua'ni nani gunii Dios lojni.

<sup>16</sup> Sa'csi cheni rniliipac bejn te diidx, rniireni diidxga por laj ste'ca bejn ni sajcru lojreni, sas che rusä'treni laj bejnğa xhetru yu'di xhi gunreni biejej.

<sup>17</sup> Rlajz Dios gacheepac rexagdoos Abram sisiojbpac diidx ni bia'nni che guniini loj Abram galooli. Sisiojbpac xtiidxni, sa'csi guniini diidx con lagajc lajni che bia'nni diidxga.

<sup>18</sup> Ni'cni naj yu' tiop diidx ni digacdi guichaa sa'csi digacdi guinii Dios didx-xhii, rusoobpacni xtiidxni, rudeedzani yälrbexilajz loj renani gubig-guxun lojni, loj reni sanuu loj yälrlililajz xtiidxni nani abaniidxni loonu por lagajc lajni.

<sup>19</sup> Laa ni'cni cabääznu ni rusudzu'tz lajznu si'c duu-guiib con ancl ni rniadzdu'tz te barcw. Si'c rusudzu'tzni lastoonu te jionnu cadro yu'ni detz ladró.

<sup>20</sup> Lagajc ro'c biu' Jesucrist xcuent nuure, te galooli baxhalni xnez Dios loonu, te gujcn bixhojzro par tejpgas si'c gujzca bixhojz nani laa Melquisedec.

## 7

### *Jesucrist najc bixhojzro si'c najc Melquisedec*

<sup>1</sup> Galoo che gujc Melquisedec reii xten guedx Salem, gujcn bixhojzro xten Gueb Dios. Che gubi' Abram che gulujx guer cadro bagu'tni rereii ni bidxe'ch lojni, huichagloj Melquisedecni, sas gunabni lo Dios te gacnäjru Dios Abram.

<sup>2</sup> Dxejcti bejn Abram tzuu cuaa guiraa ni bejnni gaan, te badeedni tej cuaani loj Melquisedec. Laj Melquisedec säloj "reii ni runsa'c yálguxhtis", dxejctiru reii xten guedx Salem sälojzani "reii xten yälrbexilajz".

<sup>3</sup> Baluiilojni lojreni, niluxh dinu gan chu najc xtadni, niclaza chu najc xnanni, niclaza chu najc resa'ni. Dizanu gan guc gojlni niclaza guc gujtni. Gujcn si'c najc Xi'n Dios. Najctiszani bixhojzro par tejpgas.

<sup>4</sup> Naj colhuui, lacti te beñsa'c, te beñro najc Melquisedec. Lojni badeed toxtadgoldoonu Abram tejpga ni sajcru lo tejpga tzuu ni bejnni gaan. Luxh Abram najc bejn ni sajcru lo rexepejnni.

<sup>5</sup> Leii xten Moisés, rnibee xca' rebixhojz ni najc xfamil Leví te cuaa lo sa'reni si'c ni badeed to Abram loj Melquisedec, mase najcreni rexagdoos Abram.

<sup>6</sup> Niluxh di Melquisedec gac xfamil Levi. Niluxh badeed Abram te cuaa xhixtenni loj Melquisedec. Dxejcti benle'ni Abram ni biannäj xtidx Dios.

<sup>7</sup> Naj rut sajcdi guinii garenca, sa'csi nani sajcrunle' yejc nani guxiiru saj.

<sup>8</sup> Naj rebixhojz ni rca' teja lo tzuu ni rajpreni, najc bejn ni rej. Niluxh rniit xtidx Dios xcuent Melquisedec ni cua' te cuaani galooli: najcni si'c te bixhojz nani nabajn par tejas.

<sup>9</sup> Ni'cni sajcu guiniinu xcuent Levi nani rca' te cuaa, lagajc laani agudijx te cuaaga che badeed Abram teja yejc tzuuga lo Melquisedec.

<sup>10</sup> Sa'csi mase gajd xi'n toAbram chu che huichagloj Melquisedecni, bati-jpni lastooni sa'csi abia'n diidx sudeed Dios xajgni. Ni'cni che agudijxni te cuaaga najcni si'cni suganäjni rexajgni.

<sup>11</sup> Rexpelj Israel cua' leii che gujc bixhojz relevitas, reni najc rexi'n toAarón. Paru niajc niujnreni nibansa'c rebejn ni huisanäj leiiga, dirureni niqiuin niäd stee bixhojz ni di gac si'c Aarón, alga si'c najc bixhojz Melquisedec najcni.

<sup>12</sup> Sa'csi cheni rdxaa te cuaa bixhojz nanab näjza leiiga guidxaa.

<sup>13</sup> Niluxh rniit xtidx Dios, Dad Jesucrist najc bejn xten garenca famil. Luxh nicla tej bixhojz gajd gac bejn xten familga.

<sup>14</sup> Huenliisi najnnu najc Dad Jesucrist te bejn xten xfamil toJudá, niluxh di Moisés ninii gac te rexpelj Judá bixhojz.

<sup>15</sup> Luxh huenliisi najc ni rniinu, sa'csi abiricaj ste bixhojz ni najc sigajc gujc Melquisedec.

<sup>16</sup> Luxh dini niajc bixhojz si'c rniit releii ni guyu' dxejc. Laani gujcnii bixhojz xcuent yälrnibee ni najc par tejas, ni rut gacdi gutzujl.

<sup>17</sup> Scree najc diidx ni gunii Dios xcuentni:

Luj najclu bixhojz par tejas si'c gujc te niguii ni laa Melquisedec.

<sup>18</sup> Dxejcti gunijl leii sa'csi xlia'si gujcnii, di niajcdi niujn bejn si'cni rniini.

<sup>19</sup> Di xleii toMoisés niujn gaan nibansa'c bejn. Naj lacuaa leiiga rajpnu te xcälirililazsa'c; ni'c rujn rbignu lo Dios.

<sup>20</sup> Dios bejn gacni bixhojz con xtidxliini, ni guniini con lagajc lajni.

<sup>21</sup> Stecuaa rebixhojz gujcreni bixhojz niluxh et con didxliidire, con laj te bejn, niluxh bixhojzre guc bixhojz con didxlii, con laj nani räjp:

Agunilii Dios diidx con lagajc lajni, niluxh dini gusiech lajni, räjpni:

“Luj najclu te bixhojzro par tejas, lagajc si'c gujc Melquisedec.”

<sup>22</sup> Ni'cni, Jesucrist najc ni rujn rile' rediidxre, luxh diidxre sajcruni loj xleii Moisés.

<sup>23</sup> Guyu' xhidalduxh stecuaa rebixhojz, sa'csi rejtreni, digacdi chanuureni gacreni bixhojz.

<sup>24</sup> Niluxh Jesucrist rajpni yäl nabajn par tejas, naj najczani bixhojz par tejas.

<sup>25</sup> Ni'c rajca ruslaani bejn lo dojl par tejas. Ruslaani guiraa renani rbig lo Dios por laani, sa'csi anabajnii par tejas te canabni lo Dios xcuent laareni.

<sup>26</sup> Jesucrist najc bixhojzro nani rquiinnu. Laani najc dxan, dini niujn dojl, agubicajni lo rebejn-dojl, huäjszani jiaaru xhaguibaa.

<sup>27</sup> Dini gac si'c stecuaa rebixhojz ni nanab ju't man guixe-guixee te guze'c bixhojzroni lo Dios te ganid jiaa lagajc xtojlni. Dxejcti sajcu gubi'ni guze'cni lo Dios xcuent xtojlni rebejn. Niluxh Jesucrist tejtis huält gudejdni trabajw, bejnini cheni cuajni lo crujz, baxhe'ni xtiejnii xcuent nuure, gujtni. Si'c gudijxni xtojlnu par tejas.



<sup>28</sup> Leii xten Moisés rusaan gac bixhojzro te bejn nani rejt, niluxh didxlii ni gunii Dios con lagajc lajni guleni tejni gac bixhojzro lagajc Xi'nni nani naya, nani nabansa'c par tejpas.

## 8

### *Jesucrist najc nani rusiäj! diidx*

<sup>1</sup> Diidx ni sajcru loj rediidx ni caniinu najc scree: bixhojz ni najc xpixhojzronu agurej xladbee Dios lo xcälrdimbicha'ni xhaguibaa.

<sup>2</sup> Nen̄ yu' ni najc dxan, nen̄ guidoo ni benchee Dios yu' bixhojzre, xhet nendi guidoo ni runchee reben̄ lo guedxliuj.

<sup>3</sup> Guiraa rebixhojz rajc ruedeedreni gojn̄ lo Dios, rajcza ju'treni guidxaa te gusejcreni lo Dios xcuent xtojlr̄eni, ni'cni nanab ga'p Jesucrist xhi guedeedni lo Dios.

<sup>4</sup> Paru suga'ni lo guedxliujre, nicla bixhojz dini niajc, sa'csi yu' bixhojz ni ruedeed regojn̄ si'c ni rnibee xleii Moisés.

<sup>5</sup> Niluxh redzuun ni rujn rebixhojzga najc si'c te balaa xten guira'ti ni yu' xhaguibaa. Najnnu najcreni balaa sa'csi baliidx Dios Moisés cheni agojl̄ gunni xquidoo Dios, räjp̄ Dios lojni: “Bahuii te gunlu guira'ti si'cpac ni baluiä lojlu lo dan Sinai!”

<sup>6</sup> Niluxh xpixhojznu Jesucrist rujn dzuun ni sajcru, sa'csi najcni nani suga' galäii xnezyuj Dios loj reben̄ guedxliuj, gusule'ni diidx ni gunii Dios cheni bejn̄ni xhigabcoob, basa'nni didxcoob loj reben̄ guedxliuj. Luxh didxcoobre sacduxhr̄uni.

<sup>7</sup> Paru niajc nusiejch leii ni badeed Dios galooli lo Moisés lajz rebejn̄, di niqiiin niujn̄ Dios ste xhigabcoob.

<sup>8</sup> Niluxh bahuii Dios xhet cayunsa'c̄di reben̄ guedxliuj, dxejc räjp̄ni: Naj rniliä sidzujn̄ redx̄ej che gunä stee xhigab, jia'n̄ stee diidx loj rexpejn̄ Israel näjza loj rexpejn̄ Judä te xca'reni didxcoob.

<sup>9</sup> Xhet si'c̄di xhigab ni benä che bia'nä diidx loj retoxtadgoldooreni nen̄ redx̄ej ni gunazä naareni te gulääreni lajdx reben̄ Egipto. Laareni direni nusooob xtidxä ni'c basa'näreni, diruna niuäreni. Si'c gunii Dad, Gueb Dios.

<sup>10</sup> Niluxh diidx nani runä xhigab rlazä jia'n̄ diidx loj rexpejn̄ Israel nen̄ redx̄ejre gac scree, räjp̄ Dad:

Sunä chu rexleiä lo xcäriejn̄reni, sucuaäza xtidxä nen̄ lastooreni. Dxejcti narä gacä Xtiosreni, laareni gac rexpenä.

<sup>11</sup> Rut chu tejd̄i guluii sa'ni, nicla bejtzni, nicla chu stee bejn̄ gäbreni, “colyembee Dad”, sa'csi alanumbee guiraareni narä, rebäz sigajc reben̄gool.

<sup>12</sup> Narä sulaslazäreni susiaä redzundxuudx ni bejn̄reni, diru lazä guizaj rextojlr̄eni, nicla latzsiaj ni bejn̄reni.

<sup>13</sup> Che bia'n̄ Dios didxcoob, diidx nani bia'nni galoo agujcni didx-biejw, luxh nani anajc didx-biejw, xhetru sajcdini.

## 9

### *Xquidoo guedxliujre näjza guidoo xhaguibaa*

<sup>1</sup> Laaca naj. Diidx ni bia'n̄ galoo badeed leii xho gunreni che rajn̄reni Dios, näjza xho gac guidoo lo guidxliujre.

<sup>2</sup> Guc-chee guidoo dxejcti gojl̄ te ladro galäiini te gujcn̄i tio'p yu'. Yu' ni najc ganid laani yudxan. Ro'c suga' candilieer, näjza mex cadro naga' yätxtiil ni aguc le'

<sup>3</sup> Ni rojpp yu'ga najc dejtz ladro, ro'c najc yudxanduxh.

<sup>4</sup> Ro'c suga' te guiib cadro ru' yaal. Najcni ganax oor. Ro'c yu'za te guijn ni laa "arco de pacto", najcwni ganax oor, sigajc dejtzni, sigajcza nenñi. Nenga yu' te bo't ganax oor. Nen bo'tga, yu' yätxtiil ni laa mana. Lagajcza nen guijnga yu' bar xten toAarón nani biga', guyu' bid lojni, nájza guij cadro bacuaa Dios xleii toMoisés.

<sup>5</sup> Yejc guijnga caj tio'p figur oor ni najc si'c xangl Dios. Laareni rujn rachee bejn suga' Dios ro'c. Lagajc redee rusäuu con rexhigareni cadro ruxhe' bixhojzro xtiejn guidxaa xcuent xtojł rebejn. Ro'cti di gacdiru guiniirunu xcuentreni naj.

<sup>6</sup> Che gulujx gusuccheereni, riu' rebixhojz si'csi si'c nen guidoo, nen yudxan te rajñreni Dios si'c gunibee Dios.

<sup>7</sup> Niluxh nen stee yu'ga ni laa yudxanduxh, ro'c rajc riu' bixhojzrotis. Xtebtisni riu'ni, luxh tejtis huält nen teb ijz, te chanäni xtiejn reguidxaa ni guedeedni te jia xtojłni nájza te jia xtojł rebejn ni najc xpejn Israel.

<sup>8</sup> Luxh guiraa reni'c ruluii Sprit Dxan xten Dios loonu, gajd yudxanduxh guxal che sugasijc yu' ganid, yu' ni laa dxan, cadro sanuu rajñreni Dios.

<sup>9</sup> Guiraa ni gujc galoo najc si'c te balaa, baluiini xho gacni naj. Regon nájza reman ni rudeedreni lo Dios direni nusansa'c xcäriejn reni rudeed gojn lo Dios, sa'csi xtiejn reman rusäutisni lo xtojł rebejn.

<sup>10</sup> Dee najc ganaxtis xhi rajwni, ni rä'ni, con yäl'robnis, o xhi stee dzuun ni rujn bejn te ria ganaxtis tiejxhrene che guidzujñli dxej cheni guchaa Dios guira'ti.

<sup>11</sup> Niluxh abiääd Jesucrist, naj laani najc bixhojzro xcuent redidxcoob ni sajrcu naj. Nacoob guidoro cadro biu' bixhojzre, nasa'cruni naj. Xhet con naadi bejn guc-cheeni. Dizani gac guidoo guedxliujre.

<sup>12</sup> Abiu' Jesucrist cadro najcpac yu' ni laa dxanduxh, niluxh xhet xtiejndi redxib, regon; ganax lagajc xtiejnñi ca'ni biu'ni yudxanduxh tejtis huält, te si'c baslaani nuure lo dojl par tejpas.

<sup>13</sup> Reni basia xtojł bejn galoo najc redee: xtiejn regon nájza redxib, náj cobdäj xten reguidxaa ni rejc nen guidodxanga; bastiojbni guiro'preni yejc reni yu' xtojłni.

<sup>14</sup> Palga basia redee xtojł bejn, aticaxh xtiejn Jesucrist sajc gusia dojl, sa'csi rajpni yäl'nabajn par tejpas. Lagajc laani badeedni xtiejnñi lo Dios. Niluxh najcni renya sa'csi dini niujn dojl, rusiazani xcäriejnñu xcuent retzuun ni xhet sajcdi, te chunu loj Dios ni nabajn par tejpas.

<sup>15</sup> Ni'cni Jesucrist najc nani suga' galäii: nez lo Dios nájza nez loj reben guedxliuj xcuent didxcoob. Yäl'gajt xten Jesucrist najc te gudzucajni xtojł reben nájza xtojł renani bejn si'cni caj lo leii, te xca' guiraa reni agurejdx Dios yäl'nabajn par tejpas, si'c bia'n diidx galooli.

<sup>16</sup> Didxcoobre najc si'c che rlajz tej bejn guinibee xho guidis xhixtenni che agojl guetni, nanab gucuaa bejnga lo te guijt xho guidisni, dxejcti gucuaani lajni. Niluxh xhet sajcdi guijtza che gajd bejnga guet.

<sup>17</sup> Xhet sajcdi guijtza che nabansijc nani bejnñi. Sajcni che agujt bejnga.

<sup>18</sup> Ni'cni che bia'n Dios diidx loj rexpejn Israel galoo, gujt te man te bixe' rejn.

<sup>19</sup> Che gulujx gunii Moisés rediidx si'c ni caj lo leii loj guiraa rexpejn Israel, bagu'tni rebisej, redxib, cua'ni rejnga nájza nis, bahuajdxni guid-xiil xniaa nájza te la' yajc balagböz, hysopo, dxejcti bastiojbni rejn yejc guijt cadro caj leii, nájza yejc rebejn.

<sup>20</sup> Dxejc guniini lojreni: “Rejnre najc seen sile'pac diidx ni abaxha| Dios lojtu.”

<sup>21</sup> Sigajcza bastiojb Moisés rejn guidoo näj guiraa renani rquiin rebixhojz che rajnreni Dios.

<sup>22</sup> Leii xten Moisés rnibee jia guiralii con rejn, palga di rejn guixe', di xtoj| bejn jia.

### *Xtiejn Jesucrist rudzucaj dojl*

<sup>23</sup> Ni'cni biquiinpac gujt remanre, bixe' xtiejn ni te basiani reni najc xpalaa reni yu' xhaguibaa, niluxh reni yu' xhaguibaa rquiin guixe' xtiejn te ni sajru.

<sup>24</sup> Di Jesucrist niu' nen guidoo ni benchee rebejn, ni najc xpalaa guidoopac xten Dios xhaguibaa. Laani biu'ni lagajc xhaguibaa, te laani suga'ni nez lojpac Dios te caniini xcuent nuure loj Dios.

<sup>25</sup> Bixhojzro xten xpen Israel biu' nen yu' ni laa dxanduxh tejtis huält nen teb ijz, ca'ni xtiejn reguidxaa. Niluxh Crist biu' xquidoopac Dios xhaguibaa tejtis huält par tejpas, luxh ca'ni lagajc xtiejn ni. Di guiquiin jiu'runi balti huält.

<sup>26</sup> Palga nanab gunni si'cni rujn rebixhojz, sajzni por niejtni te chinaduxh huält cheli birixtiej guedxliuj. Luxh naj, cheni bidzujn dxej, baluiloj Jesucrist tejtis huält, lagajc laani badeedzani xtiejn ni lo Dios cheni gujtni, cuajni lo cruzj te si'c badzucajni par tejpas xtoj| rebejn.

<sup>27</sup> Guiraa bejn nanabpac guetreni tejtis huält, dxejctiru sidejdreni yälguxhtis xten Dios.

<sup>28</sup> Sigajcza tejtis huält badeed Jesucrist xtiejn ni bixe' lo cruzj te badzucajni xtoj| xhidalduxh bejn. Luxh loj renani cabäjzni suluiilojni stehuält, xhet te gudzucajdiruni dojl, alga te gusa'ni xcäl|rus|laa renani cabäjzni.

## 10

<sup>1</sup> Sa'csi leii xten to Moisés najctis si'c te balaa xten nani siääd naj. Niluxh dini gac si'cpac redidxcoobga. Ni'cni leii, con xtiejn reguidxaa ni rxe' cazob ijz digacdi gusa'cni rebejn nani guibig lo Dios, sa'csi di xtiejn man gudzucajpac rextoj|reni.

<sup>2</sup> Paru najc nibicajpac xtoj|reni rudeed xtiejn guidxaa, aguläjz rudeedreni xtiejn guidxaa, sa'csi che gubicaj xtoj|reni, diru xcäriejnreni gumbee dojl.

<sup>3</sup> Niluxh yäl|rejt man näj yäl|rudeedreni rejn casob ijz rusnajtisreni lajzreni xcuent dojl.

<sup>4</sup> Sa'csi digacdi gudzucajpac regon näjza xtiejn redxib xtoj| bejn.

<sup>5</sup> Ni'cni che biääd Jesucrist lo guedxliuj räjpni lo Dios:

Di r|ajzlu xtiejn guidxaa niclaza regon niluxh abejnlu gacä nigui-guedxliuj.

<sup>6</sup> Dilu nichag|ajz yäl|rejc xten guidxaa niclaza yäl|rudeed rejn, niclaza gojn ni rudeed rebejn te gusiani xtoj|reni.

<sup>7</sup> Dxejc räpä: “Narä basiälä te gunä si'cni r|ajzlu Dad, Dios, (si'cni caj nen reguijtz xcuent ni sacä).”

<sup>8</sup> Che gulujx gunii Jesucrist diidxga: “Di r|ajzlu, dizalu guidxag|ajz xcäl|rejt guidxaa näjza regon niclaza xcäl|rejc guidxaa, niclaza yäl|rudeed rejn xcuent xtoj| bejn si'cni caj lo leii gun bejn.”

<sup>9</sup> Dxejcti räjpni: “Narä siälä, te gunä si'cpac ni r|ajzlu, Dad Dios.” Dxejc badzucaj Jesucrist nani gujc galoo, te gulä|xtiejni didxcoob ni bia'n Dios loonu naj.

10 Abasia Dios lastoonu sa'csi bejn Jesucrist si'c rlajz Dios cheni baxhe'ni xtiejnni lo cruzj tejtis huält par tejpas.

11 Guiraa rexpixhojz Israel rujnreni dzuun guixe-guixee te ruedeedreni lagajctis guidxaa, näjza xtiejn reman, guiraa si'ctis ni caj lo leii, niluxh reni'c digacdi gudzucaj dojl.

12 Niluxh Jesucrist tejtis huält baxhe' xtiejnni lo cruzj te badzucajni xtojl rebejn par tejpas. Naj agurejni xladbee Dios cadro rnibeeni.

13 Ro'c cabäjzni guiraa ni rdxe'ch lojni te cuereni ladzni'ni.

14 Ni'cni tejtis huält cuajni lo cruzj te basiani par tejpas guiraa renani ahuililajz xtiidxni.

15 Sigajcza rnii Sprit Dxi xten Dios loonu; najni:

16 Diidx nani jiannääreni neñ redxejre gac scree, naj Dad Dios: sucuaä rextidxä lo xcäriejnreni, susäläza xtidxä neñ lastooreni.

Dxejcti räjpni:

17 Diru lazä guizaj rextojlreni nicla rextolguixdxreni.

18 Ni'cni, cheni abia xtoj bejn, diru quiquiin gudeedreni guidxaa te jia rextojlreni.

### *Nanab guibignu lo Dios*

19 Ni'cni resa'nu, na'c guidxejbtu, sajç jiu'nu yudxanduxh cadro bixe' xtiejn Dad Jesucrist nani abadeedni lo Dios.

20 Naj yu' te nezyuj, nezsiucoob, nezyuj xten xcäl'nabancoobnu ni baxhalni che badzucajni ladroga. Ni'c säloj cheni biu'ni neñ yudxanduxh, badeedni lagajc xtiejnni lo Dios.

21 Jesucrist najc xpixhojzronu nani rnibee rexpejn Dios.

22 Ni'cni do'o guibigrunu lo Dios guideb lastosa'cnu, na'c guidxejbdinu, na'cza guituydinu. Con yäl'ririlajzpac abia lastoonu xcuent rexhigabguixdx, abidiibza tiejxnu lo nis-ya.

23 Do'o chanuu sudzu'tznu lo xtiidxni nani huililajznu, na'c guchaanu xhigabnu sa'csi susoob Dios diidx ni bia'nni loonu.

24 Naj do'o guihuii xho jiennu te gacnäj sa'nu te si'c chonälajznu sa'nu nägajcza te jiennu ganax dzunsa'c.

25 Na'c jiennu si'c rujn rebejn nani diru jiääd che rdxagsa'nu. Nanab guiliidxnu resa'nu sa'csi naj asiäddzuzngajxh dxej ni guibi' Dad Jesucrist.

26 Palga chanuu jienrunu dojl, niluxh abiejn diajgnu xtidx Jesucrist, diru gacdi guibicaj xtojlnu dxejc.

27 Dxejcsii guidxeebtisnu guilääznu yälguxhtisduxh xten Dios näj guiboo ni guze'c renani rdxe'ch loj Dios.

28 Cheni guyu' chu tej ni di niujn si'c caj lo xleii Moisés, niluxh bidxaag xtidx tio'p o choñ ni nancheepac, räjpreni dini nusoob leii, gujt bejnga, rut balaslajzdini.

29 Maazru yäl'rusacsiduxh nanab ted renani ruläj yejc Xi'n Dios cheni direni gusobdiajg xtiidxni. Alga ruo'nreni xtiejnni ni baxhe'ni lo cruzj te basianini. Rusanxtuyjzani Sprit Dxi xten Dios nani badeed didxcoob lojni.

30 Anancheenu gunii Dios: "Narä susquixä bejn; loä siguijx bejn", räjp Dios. Stehuält guniini: "Dad sujn yälguxhtis rexpejnni."

31 çCosduxh gac bejn ni jiajb ladznaa Dios nani nabajn par tejpas!

32 Niluxh col'snaj lajztu xho gujctu galoo; cheni entis cua'tu xtidx Dios, xho batip lajztu, gudejdtu trabajw sa'csi cua'tu xtidx Dios.

<sup>33</sup> Guyu' resa'tu gudéreni lojni, yu' reni basacsí la'tu nez loj rebejn. Guyu'za huált astoo gudejdzatu trabajw sa'csi cahuiitu rebejn nani basacsíreni, cadejdzareni trabajw.

<sup>34</sup> La'tu banaj lajztu renani yu' latzguiib, guideb yálrbalajz batip lajztu che cua'reni guiraa xhixtentu, sa'csi gucbeetu xhaguibaa rajptu reyálnasa'c ni sajcru, niluxh yu'ni par tejpas.

<sup>35</sup> Na'c gunijttu xcálrililajz xtidx Jesucrist, sa'csi yálrililajzga gun xca'tu yálnabajn par tejpas.

<sup>36</sup> La'tu nanab cuedxitu te che abejntu ni rlaiz Dios, dxejc xca'tu nani aguiini guniidxni.

<sup>37</sup> Sa'csi xtidx Dios ni bia'n rni:

Asiáddzungajxhpac dxej ni jiáadni,

asiáddzungajxhpac dxej ni jiáad nani siáad, dipacni gaclaa.

<sup>38</sup> Renani nabaṣa'c sibaṣṣaj yálrililajz, niluxh palga yu' chutej ni guidxejb chalilajz, dini'c gun guibaa lazä.

<sup>39</sup> Niluxh nuure dinu gac si'c reni rusaan yálrililajz te nitreni loj dojl. Nuure najcnu renani rililajz xtidx Jesucrist te laa xaimnu par tejpas.

## 11

### Yálrililajz

<sup>1</sup> ¿Xhini'c najc yálrililajz? Yálrililajz säloj cabääznu sajcpac tejni gajd gac, yu'pacza ni mase dinu fiini, najcni si'cni abahuiinuni.

<sup>2</sup> Dios huinälajz retoxtdagdoonu sa'csi huililajzreni xtiidxni.

<sup>3</sup> Sa'csi rililajznu, najznu benchee Dios reguedxliuj, bencheeni guibaa, bencheezani guiraa nani rhuinu. Con xtiidxtisni bencheeni nani dinu guihui.

<sup>4</sup> Gojpa toAbel yálrililajz badzubyaalni rexquidxaani lo Dios. Yálrbijbyaal xtenni sajcru loj yálrbibyaal xten toCaín. Ni'cni gunii Dios najc toAbel beṣa'c. Naj mase agujt Abel, sanuutis racbeenu xcuent yálrililajz ni gojpmi.

<sup>5</sup> Sigajcza gojp Enoc yálrililajz, ni'c sinä Dios Enoc xhaguibaa, guideb nabajnni, te na'c niejtni. Diru rebejn nidxälmi sa'csi asinä Diosni xhaguibaa. Luxh räjp Dios xcuentni che gajd Dios jinäni, gubaṣa'cni, baspaani lajz Dios.

<sup>6</sup> Rut chu tejdi sajc guspaa lajz Dios palga dini chalilajz, sa'csi che guibigni lojni, nanab chalilajzni yu' Dios, chalilajzani sudeed Dios xcálnasa'cni loj renani rguilni, nalajznu renani rlaiz gumbeepac Dios.

<sup>7</sup> Gojpa toNoé yálrililajz. Che räjp Dios lojni siajbpac nisguij ni gajdreni fii, huililajzni. Bejnmi si'c ni räjp Dios. Bidxejbni sa'csi najni rusoob Dios xtiidxni, ni'c bencheeni te canuduxh te di niejt rexi'nni. Sa'csi gojpmi yálrililajzga, bejnmi gubibde rebejn guedxliuj, gunijtreni sa'csi direni nülilajz xtiidxni. Dxejti cua'ni yálnabaṣa'c ni siáad xcuent yálrililajz.

<sup>8</sup> Sa'csi gojp toAbram yálrililajz, basoobni xtidx Dios che gurejdx Diosni, biriini lajdxni te huijni cadre gudeed Dios yuj lojni te cuääzni ro'c. Biriini lajdxni, mase dini gan caro cháani.

<sup>9</sup> Gojp toAbram yálrililajz, ni'c huiläjzni si'c benzijt loj reyuj ni räjp Dios gudeedni lojreni. Ro'c guläjzreni si'c lajdx benzijt. Guläjzni neṣ reyuguijd, sigajcza bejn toIsaac näjza toJacoob, sa'csi näjza lojreni räjp Dios gudeedni yujga.

<sup>10</sup> Niluxh toAbram cayunloj te guejdx nani sudzu'tz, te guejdx nani cuäxtiej Dios, nani gunchee lagajc Dios.

11 Sigajcza gojp toSara yälrlilajz te mase anajcni beᅅgool niluxh agudejd chu xi'nni, cua'ni yälrnibee xten Dios te gujcnı nan, guyu' te xi'nni, sa'csi huililajzıni susoob Dios xtiıdxni.

12 Ni'cni mase siäddzıᅅgajxh dxej ni guet toAbram, guyu' xhidalduxh xajgni. Si'c rebalxhaguıbaa näj si'c reguibäzlıle' xten yujxh ni tre' ro' nısdoo, si'c najcreni xhidalduxh, nicla gac guıgabreni.

13 Guiraa rebejnre gujt, direni nica' yuj nani räjp Dios gudeedni lojreni; niluxh sa'csi rajpreni yälrlilajz, bahuiireni lo yujga zıtro, ni'c bibalajzreni, sa'csi anajreni najcreni beᅅzıjt, cansajsıreni lo guedxlıuj.

14 Reni rniı si'c, rniııireni caguılsıjcreni cadro gac lajdxreni.

15 Paru niujnreni xhıgab lajdxreni najc guejdx cadro biriireni, pet niıajc nibısaereni ro'c.

16 Niluxh laareni rıajzreni te lajdxreni ni sajcru, nalajznu lajdx Dios xhaguıbaa, ni'c rguıılreni. Ni'cni di Dios guıtuıy gäbreni najcni Dios xtenreni, luxh alabencheeni guejdx cadro cuääzreni xhaguıbaa.

17 Gojpza toAbram yälrlilajz ni'cni cheni bateed Diosıni preeb, räjpni loj Abram gudeedni Isaac lojni lacuaa gudeedni xhiıl, cuäjbni gugu'tni xi'nni lacuaa xhiıl, luxh Dios ni najc tejtis aräjp lojni galooli:

18 "Isaac guniıdx chu xhidajl xajglu, xagdoolu."

19 Sa'csi nanchee toAbram rajp Dios yälrnibee te guspajınni rebeᅅgut. Luxh si'cza cuasacni xi'nni, ascanu loj rebeᅅgut cuasacni xi'nni.

20 Näjza toIsaac gojp yälrlilajz benle'ni toJacoob näjza toEsaú, räjpni xhini'c gun teıgareni.

21 Gojpza toJacoob yälrlilajz, che agojl guetni, benle'ni guıro'p rexi'n toJosé. Dxejcti huıstieni guzucajni yejc bastoᅅn xtenni te si'c gojınni Dios.

22 ToJosé gojp yälrlilajz. Che agojl guetni, räjpni sıriı reıpejn Israel lajdx Egipto, gunıbeezani xho gunnäjreni xtıujtni.

23 Gojp rexıuczajın Moısés yälrlilajz, ni'c cheni gojl Moısés, bacua'tzreneni choᅅn bäıı, sa'csi bahuiireni bäzdaanni. Direni niu xtiıdx reıı ni gunıbeeni, räjpni ju'treni bäz niguiı.

24 ToMoısés gojp yälrlilajz, ni'cni che aguroobni di rıajzıni nırilajni xi'n xındxap reıı xten Egipto.

25 Bejnni xhıgab tednäjıni trabajw reıpejn Dios lacuaa niujnni redzuun ni rchagıajz rujn reben Egipto, sa'csi najc reni'c dojl, luxh tera'tsi ruspaareni lajz bejn.

26 Par laani maazru sajc tedni lagajc trabajw ni gudejd Jesucrist lacuaa niıajpni reyälııasa'c xten Egipto sa'csi laani cabäjztısnı reyälııasa'c nani churu gudeed Dios lojni.

27 Gojp toMoısés yälrlilajz biriıni lajdx reEgipto, dini nıdxejb yälrdxe'ch xten reıı, huınuıtis gusudzu'tzıni si'cni najc xhıgabni, ruhuiıni loj nani di guzen, nalajznu Dios.

28 Gojp Moısés yälrlilajz bejnni lanıj xten pasıw. Gunıbeeni baroobreni rejn ro' xpuert reıpejn Israel te che ted angl xten yälgujt nicla te xıngan galoo xten reıpejn Israel di guet.

29 Gojp reıpejn Israel yälrlilajz gudejdreni galäıı nısdoo ni laa nısdoxııııaa luxh asdoo loj yubıjdz rııajreni si'c gudejdreni. Niluxh che rıajz rebejn Egipto nıdejd, gubi' nıı, dxejc gulo'reni neᅅn nıı.

30 Xıuent yälrlilajz gurebä'n paderguij xten guedx Jericó, cheni basa' gajdz dxej caded huält reıpejn Israel guejdxga.

<sup>31</sup> ToRahab, te gunaguijdx, gojpszani yälirililajz ni'c dini niejt che gujt renani di nuzobdiidx, sa'csi laani bacua'tzni gaii bejn nani sagula'tz xho najc guejdxga.

<sup>32</sup> ¿Xhiruxh guiniä? Di gal'di guiniä xcuent toGedeón, xcuent toBarac, xcuent toSansón, xcuent toJefte, xcuent toDavid, xcuent toSamuel, näjza xcuent retoprofe't.

<sup>33</sup> Guiraareni gojp yälirililajz ni'c bejnreni gaan xhidajl reguejdx, bensa'creni yälguxhtis, cua'reni xcälracnäj Dios ni bia'n diidx xca'reni, basäureni ro' rebeedz.

<sup>34</sup> Guyu'reni nen te balduxh luxh xhet gujcdireni, gojl baxun'reni te di niejtreni con spaad. Reni gujc bejrdxajg, guzutzu'tzreni gujcreni nadip-duxh, gujcreni bejnduxh lo guer, barilaagwreni resoldaad xten reni rdxe'ch lojreni.

<sup>35</sup> Guyu' regunaa ni cuasac rextogoolreni, gubansacreni lo rebengut.

Sgaiireni gujt xcuent yälrusacsí lacuaa nicäjbreni nusiech lajzreni te nuslaa bejnreni sa'csi rlajzreni xca'reni stee yäl'nabajn ni sajcu.

<sup>36</sup> Sgaiireni gudejd trabajw guniyaj bejnreni, gudinnäj bejnreni chiir, cuaduuzarení caden, guyu'zarení latzguuib.

<sup>37</sup> Guyu'za reni gujt che bacuaa bejn guj yejcreni o che gujcreni tio'p la' con sier. Guyu'za reni basacsí bejn te guro'nreni yälirililajz. Guyu'za reni gujt con spaad. Guyu' reni cuanzaj nezree nezrec, gojtreni guid-xiil näjza guid-dxib, sa'csi xhet rajpdireni luxh entis rdejdreni trabajw rusacsí bejnreni.

<sup>38</sup> Sa' rebejnnga di nungäj reben guedxliuj niääd rebejnnga lojreni. Cuanzaj rebejnnga nez lo reyubijdz cad xhet yu'di xhi gaurení nicla nis te yärení; cuanzajrení nez nen redajn, nez nen rebiliää näj nez nen guedduxh ni yu' nen yuj.

<sup>39</sup> Guiraa rebejnnga gojp yälirililajz, luxh ni'cni huä'p xpala'nreni, niluxh direni nica' ni bia'n diidx gudeed Dios lojreni,

<sup>40</sup> sa'csi bejn Dios xhigab gunni te dzunsa'c lojreni. Bejn Dios xhigab guniidxni yäl'nasa'c loonu, naj tejsi guica'nu con laarení nani bia'n diidx guniidx Dios.

## 12

### *Guihuiitisnu lo Jesucrist*

<sup>1</sup> Ni'c najcni si'cni suga'nu galäi guiraa rebejnre luxh cahuiireni xcälirililaznu. Ni'c do'o guisa'n te laad guiraa reni rusäu lo xnejznu, näjza redojl ni ruxhiid nuure lo xcäl'nabajnmu, te di jieednu chosaanu nez lo nezyuj ni sasanäanu nez cadro chonnu.

<sup>2</sup> Do'o guihuidzu'tz nez loj Dad Jesucrist nani guläxtiej, nani guluuxza xcälirililajznu. Jesucrist gudejd trabajw lo cruiz, dini nitujy gujtni lo sa' yälgujtga, sa'csi najnni cheni agudejdní trabajw, sica'ni yälrbalajz; naj agurejni xladbee Dios cadro rnibeeni.

<sup>3</sup> Colyujn xhigab la'tu xho gudejd Jesucrist ladznaa reben dojl, te na'c guidxajgtu, na'cza jieedtu laj ni cabäjtuni.

<sup>4</sup> La'tu gajd xtiejntu guixe' lo yälrucuanäj dojl.

<sup>5</sup> ¿La abiäl lajztu xho balijdx Dios la'tu si'c xi'nni, ä? Scree caj xtiidxni lo reguijtz; räjpni:

Xinä, na'c cuälazlu xcäl'naj Dad niclaza jieedlu che tilnäjni luj.

<sup>6</sup> Sa'csi si'c runnaj Dad renani sanälajzni,

rujnni ríaa guiraa renani rca'ni si'c xi'nni.

<sup>7</sup> Palga gatijp lajzlu lo xcälñaj Dios, sica'ni luj si'c xi'nni, sa'csi çhu dad di gunnaj xi'nni?

<sup>8</sup> Niluxh palga di Dios gunnaj la'tu si'cni runnajni guiraa rexi'nni, ditu gac xi'npacni, najctu xi'n redolguíjdx.

<sup>9</sup> Anajntu cheni gucnu biuux lo guedxliujre, bennaj xtadnu nuure te rsoobnu xtiídxni, te runsa'czanu si'cni ríajzni. çXhicuent dinu cuadiajg xtidx xtadnu ni yu' xhaguibaa te si'c jia'pnu yälñabajn, ä?

<sup>10</sup> Xtradnu lo guedxliujre bennajreni nuure tio'p-choñ dxej, te gac gusoobnu xtiídxni. Niluxh si'c runnaj Dios nuure te jia'pnu te yälñabanya, te gac nayazanu sigajc najcni laani.

<sup>11</sup> Guliini xhet xhi yälñajdi ni rchalonu najc laaca che rsiajcnuni, racnaj tiejxhnu niluxh ria'nnu et laadi. Niluxh guiraa renani agudejd loj yälñajga rusoob xtiídxni, rca'reni te yälñabanya ni rbecdxilajzreni.

### *Riez guze'ni xtidx Dios*

<sup>12</sup> Ni'cni colñsudzu'tz reñaatu ni abadxajg, colñsudzu'tz yecxhijbtu ni abadxajg,

<sup>13</sup> te colñquiiil nezyuj xten xtidx Jesucrist te sudzu'tz ni'tu. Na'c guibicajtu lo xnezyujni.

<sup>14</sup> Colñquiiil xho cuedxinäjtu guiraa rebejn. Colñchanä te yälñabanya, sa'csi renani di guibanyadi, digacdi fiireni loj Dad Jesucrist.

<sup>15</sup> Colñhuisa'c te di gunijp chutejtu lo xcälñacñaj Dios, colñnatiro gac chu tejtu si'c te cuanlaa ni rujn daan, sa'csi sa' bejnğa suxhiñni guiraa renani ahuililajz.

<sup>16</sup> Nicla tejtu na'c ga'p stee gunaa te laad, nungäjñ cuäznäjni chäältisni. Na'cza gactu bejn ni di jiu xtidx Dios, si'c gujc toEsaü cheni bato'ni xcälñasa'cni ni najc xtenni sa'csi najcni xingan galoo xtadni. Bato'nini te cua'ni yälrajwtis.

<sup>17</sup> Anajntu, cheni ríajzni niunle' xtadnini te nica'ni ni najc xten xingan-galooni, dini nica'ni mase guc-huin lajzni, binduxhni. Dxejcti diru niajcdi nica'nini.

<sup>18</sup> Colñnatiro, sa'csi la'tu di'tu nibig lo te dajn cadro rajc rsiaj bejn, te dajn ni galoo cayecduxh guiboo, cadro nacäjy, nacäiboo, cayajcza bedonduxh.

<sup>19</sup> Diza diajgtu niejn xse' trompet, xse' Dios si'c biendiajg rexpejn Israel agujc xchero. Luxh che biejn diajgreni rediidxga, direni nutiplajz, gunabduxhreni na'cru guiniini lojreni.

<sup>20</sup> (Sa'csi direni nutiplajz diidx ni caniini, räjpni: "Palga ted te mantis guläj xhuj dajnga, colñju'tni con guij.")

<sup>21</sup> Te yälñadxebduxh najc nani guzeñ ro'c, lagajc toMoisés räjp: "Cayacditä yälrdxejb."

<sup>22</sup> Niluxh la'tu agubigtu lo dajn xten Sión, cad najc lajdx Dios ni nabajñpac, nalajznu guedx Jerusalén ni yu' xhaguibaa cadro yu' xhidalduxh xangl Dios,

<sup>23</sup> cadro re' reni calä'p xpala'n Dios. Ro'c re'za reni najc xi'n Dios, renani acaj lajnñ xhaguibaa. Agubigzatu lo Diospac, ni najc Juejz xten guiraanu, näjza loj respřit xten rebejn nani abasia Dios te anajczeni beññasa'c.

<sup>24</sup> Agubigzanu loj Jesucrist nani suga' galäii nez loj Dios näj benguedxliuj xcuent didxcoob ni bia'n Dios, näjza lo xtiejn Jesucrist ni badeedni lo Dios xcuent nuure. Jesucrist rniab jñäjñ lajz Dios, luxh ni'c sajcru loj nani rniab xtiejn toAbel. Xtiejn toAbel rniab quix nani bagu'tni.

<sup>25</sup> Ni'c colñnatiro te di cuälaztu nani canii lojtu rextiídxni. Palga di rebejn nidedbia sa'csi gulälaz nani baluii bejn ni siääd guedxliujre, çxho jiennu tedbianu palga guilälaznu nani ruluii nani siääd xhaguibaali?



<sup>26</sup> Xse' Dios basniib guedxliuj galooli, niluxh naj rnisacni: "Ste huält susnibä xhet ganaxdi guedxliuj, susnibä näjza xhaguibaa."

<sup>27</sup> Che gunii "ste huält", ni'c säloj guibicaj renani benchee Dios ni rac rniib, te jia'n renani digacdi guiniib.

<sup>28</sup> Luxh sa'csi lajdxnu ni guniidx Dios digacdi guiniibni, do'o guideed xquixtios lo Dios xcuentni, te si'c chunu loj Dios, chonälaaznuni guideb yälrdxejb näjza yälñadolajz,

<sup>29</sup> sa'csi Xtiosnu najc si'c te balduxh ni ruse'c, ni runitlojza.

## 13

### *Xho guspaa bejn lajz Dios*

<sup>1</sup> Colchanuu lo yälrinälajz sa'ni.

<sup>2</sup> Di gusaantu guideedu rolijztu guidzujn biooz, sa'csi loj reni bejn si'c, yu'reni badeed rolijzreni bidzujn xangl Dios rolijzreni, niluxh direni ni-acee chu najcreni.

<sup>3</sup> Colsnaj lajztu reni yu' nen latzguuib, ascanu la la'tu ni yunäreni latzguuib. Colsnajza lajztu renani basacsi bejn, ascanu la la'tu ni cagusacsi'reni sa'csi näjza la'tu najctu benguedxliuj si'c najcreni.

<sup>4</sup> Colga'p xpala'n yälguचना te guiban-nayatu con chäältu sa'csi sujn Dios yälguختis rebejn ni resnäjä chäääl bejn näjza reni rusguee rebenxteb.

<sup>5</sup> Na'c chanälajztu meel, colguibalaznäjä ni rajptu, sa'csi Dios agunii: "Dipacna gusanälu, dizana cuälazälu."

<sup>6</sup> Ni'c dinu guidxeeb guiniinu:

Dad ni yu' xhaguibaa najc ni rcanäjä narä;  
dina guidxebä xhitis ni gunnäjä bejn narä.

<sup>7</sup> Colsnaj lajztu renani baluui guibansa'ctu, ni basule'za xtidx Dios lojtu; colhuui xho nabajñreni te sigajcza colchanä xcälirililajzreni.

<sup>8</sup> Sigajc gujc Jesucrist naai, sigajcza najcni nadxej, sigajcza sajcnj par tejpas.

<sup>9</sup> Na'c gusaantu gusiejchreni lajztu xcuent ste'ca yälrlului ni digac si'c najc xtidx Jesucrist. Sacduxh sudzu'tz lastoonu lo yälracnäjä ni ruluii xtidx Dios, xhet lojdi yälrajwtis. Xhet sajcdi rebejn nani rujntis xhigab xcuent yälrajw.

<sup>10</sup> Nuurnu rajpnu garenca piään, ro'c digacdi xca' rebixhojz xhi gaureni si'c ni cua'reni nen guidoguijd galoo.

<sup>11</sup> Sa'csi xpixhojzro xpejn Israel rinä xtiejn reman nen yu' ni laa dxanduxh te biäu lo dojl xten rebejn, niluxh rize'creni xpääl remanga te laad, dejtz guejdxga.

<sup>12</sup> Si'cza gujt Jesucrist te laad, dejtz guejdx, te basiani xtojl rebejn xcuent lagajc xtiejñni.

<sup>13</sup> Naj colcho' chonnu loj Jesucrist te laad dejtz guejdx te guideednu trabajw näjza yälxtujy si'cni gudejd Jesucrist.

<sup>14</sup> Sa'csi lo guedxliujre dxunlaasinu, niluxh caguuiinu laadxnu ni chu jiaädru, te ro'c guidxunnu par tejpas.

<sup>15</sup> Guideb xcälracnäjä Jesucrist do'o guideedtisnu xquixtios lo Dios si'c te gojn ni gudeednu lojni, guiliä'pnu xpala'nni näj jieñnu redij.

<sup>16</sup> Na'cza jiaälajztu guntu huen, gacnäjä sa'tu, sa'csi reni'cni najc redzuun ni rdzaglajz Dios.

<sup>17</sup> Colcuadiajg xtidx reni rnibee la'tu, sa'csi laareni rcanäjreni lastoonu, si'cza laareni sudeedreni cuent lo Dios. Colyujn guibalajzreni gunreni xtzu-unreni, na'c gac-huin lajzreni sa'csi palga gac-huin lajzreni, xhet sajcdini par la'tu.

<sup>18</sup> Colnab lo Dios xcuent nuunu, sa'csi racheenu naya xcäriejnnu, rlaaznu laaca jienu guira'ti dzuun.

<sup>19</sup> Rniä lojtu, guiniabrutu loj Dios, te gun Dios jiojb guibi'ä jiajä lojtu.

*Te didxle' näj lult xtixtios*

<sup>20</sup> Dios xten yälrbexilajz ni baspajñ Dad Jesucrist lo rebengut, Jesucrist najc baxtorduxh xten rexiił xcuent rejn ni bejn gusojb didxcoob xtenni ni najc par tejpas.

<sup>21</sup> Dios gun gactu bensa'c, bendxojn loj xhitis te guntu ni rłajzni, näj gunni loj guiraa nuure si'c ni rłajzni xcuent Jesucrist. ¡Colspaa lajz Jesucrist par tejpas! ¡Sugacni si'c!

<sup>22</sup> Resa'nu, rniabä lojtu, colcuedxı lajztu, colcuadiajg rediidx ni rulijdxre, sa'csi riojbga cacuaä te labäz guijtze lojtu.

<sup>23</sup> Colyabee abirii bejtznu Timoteu latzguiib. Palga guidzungajni ree, siädnääni jiađhuiä la'tu.

<sup>24</sup> Colgudeed xtixtios loj guiraa renani rului la'tu näj loj guiraa rebejtznu ni rililajz. Reben Italia ruxhał xtixtios lojtu.

<sup>25</sup> Gacnäj Dios guiraatu. Sugacni si'c.

## Guijtz Nani Bacuaa Santiaag

### *Santiaag rucuaa guijtz loj renani nare'ch lo guedxliuj*

<sup>1</sup> Narä Santiaag, xmos Dios näjza xten Dad Jesucrist, ruxhalä xtixtios loj guitzubitio'p cuaa rexpejn Israel ni nare'ch lo guedxliujre.

### *Yälñajn nani runiidx Dios loonu*

<sup>2</sup> Rebetzä lo xtidx Dios, colguibalazduxhtis che rsiajcturecos nani ruquiltu cuälaztu xnezyuj Dios,

<sup>3</sup> sa'csi che rsiajctureni reni'c, rsiajctureni te don la guliipac ahuililajztu xtidx Dios, dxejc rsieedrutu yälrbecdx'i lajz.

<sup>4</sup> Dxejcti yälrbecdxilajz sajc gunni xtuunni neñ lastootu, te gactu beñsa'c, bejn ni aguyajl lo xtidx Dios, nani xhet cayäädxd'i xcälñajnni.

<sup>5</sup> Palga yu' tejtü ni cayäädx xcälñajnni, suguiniabnini lo Dios, sa'csi Dios rudeedduxhni yälñajn loj guira'ti bejn, luxh dini guinii didxlaa lojni. Palga guiniab bejn, sudeedza Diosni.

<sup>6</sup> Niluxh che guiniabni, suchalilajzpacni, na'c guntio'p lajzni, sa'csi bejn ni runtio'p lajzni najc si'c bāj ni sanä bej, nezree-nezre'c sääbni.

<sup>7</sup> Nani najc si'c, na'c gunni xhigab yu' xhi xca'ni lo Dad Jesucrist.

<sup>8</sup> Sa'csi nani runtio'p lajzni, lo guiraa ni rujnni nadxej rujnni tej xhigab, guixee rujnni xte'ca xhigab, di gacdi chanuuni tejsi xhigab.

<sup>9</sup> Te sa'nu ni najc nadolajz, suguibalajzni sa'csi najcni beñro sa'csi guläs Diosni.

<sup>10</sup> sigajcza bejtznu ni yu' xhixtenni, suguibalajzni sa'csi abaluu Dios lojni najcni bejn ni xhet sajcdini, sa'csi nägajc laani sinitlojni si'c rnitloj reguii ni yu' lo cuaan ni yu' loniaa.

<sup>11</sup> Sa'csi che rliejn gubijdz näjza te belaa, li rgoļ recuaanga, li riuii reguii ni caj lojni, dxejc rtejbreñi, dxejcti agunijt xcälsacruni. Si'cza sinitloj te bejn ni yuduxh xhixtenni laļ ni yu'ni lo xnezyujni.

### *Xhi xca'ni che tedni trabajw*

<sup>12</sup> Chicbaa niguii ni rsiudzu'tz laļ ni cadejdni trabajw, sa'csi che agunii Dios didxsa'c xcuent nani bejnna sica'ni coron xten yälñabajn par tejpas ni bia'n Dios diidx gudeedni loj rebejn ni sanälajz Dios.

<sup>13</sup> Che gunijt tejtü, rujntu dojl, na'c gäbtu: "Dios bejn banitä", sa'csi di gacdi quiquill Dios te gunni cosguijdx, digacdi gunijt Dios, luxh sigajcza di gacdi gun Dios gunijt te bejn, gunni dojl.

<sup>14</sup> Niluxh tejatü runijt che rcäyjc xcäriejntu sa'csi riajb yejctü guntu cosguijdx.

<sup>15</sup> Che riajb yejctü guntu cosguijdx, runijttu rujntu dojl, luxh dojl che abejntuni, riädnäni yälgujt.

<sup>16</sup> Sa'ä ni sanälazä, na'c gusaantu gusgueerene la'tu.

<sup>17</sup> Guiraa recoshueen, guiraa recossa'c xhaguibaali siädreni loonu; Dios ruxhalreni, lagajc Dios ni benchee rebajl xhaguibaa, Dios nani di guchaa, sigajctis najcni.

<sup>18</sup> Lagajc xcuentni bejn Dios gacnu xpejn ni sa'csi huililajznu xtidxliipacni, te gacnu reben galoo loj rexpejn ni.

### *Xho nanab jiennu*

<sup>19</sup> Acanajntu recosre, sa'ä ni sanälazä. Niluxh tejgatu nanab gusquejñni te gucuadiajgni, per gaclaani te guiniini, gaclaazani te guidxe'chni,

<sup>20</sup> sa'csi xcälrdxe'ch bejn dini gun xcäl'nasa'c Dios.

<sup>21</sup> Ni'cni colcuälaz guiraa recosguijdx, guiraa recoslatsiaj ni ria'n. Guideb yälñadolajz colchalilajz xtidx Dios ni basule'nu, ni yu'pac lastootu, sa'csi ni'c najc ni sajz guslaa xaimtu lo dojl.

<sup>22</sup> Niluxh baluui lo guira'ti bejn najctu bejn ni rusoobpactu xtidx Dios, xhet bejndi ni rucuardiajgtis xtiidxni, ni rusgueeni lagajc laani.

<sup>23</sup> Sa'csi palga najc te bejn te nani rucuardiajgtis xtidx Dios, niluxh dini gusooob diidxga, najcni si'c te bejn ni ruhuii lojni loj te guihuaajn.

<sup>24</sup> Sa'csi che ruhuiini xho najcni, sägajcni, riallazgajcni xho najcni.

<sup>25</sup> Niluxh nani ruhuidzu'tz lo leisa'c, nalajznu leii nani ruslaa bejn, luxh rusobpacni leiiga, nani lacuaa jiallajzni nani riejn diajgni, rujnpacni ni caj lo leiiga, bejnga najc ni sajz yälrbalajzpac lo xhitis ni rujñni.

<sup>26</sup> Palga yu' tejtü ni rujn xhigab najcni te bejn ni randuxh Dios, niluxh di gacdi gusäuni ro'ni, guiraloj rñiini, bejnga rusguee lagajc laani, luxh xhet sajcdi yälrajn Dios xtenti.

<sup>27</sup> Yälrajn Dios ni najc guliipac, ni xhet nu'chdi lojni najc scree: chahuuiini rebisiäjb, näjza regunaa ni agujt chäälñi che yu' xhi rquiinreni, näjza na'c säblajztu guntu nani rujn reben guedxliuj ni di chalilajz xtidx Dios.

## 2

### *Nanab tebloj jiennäanu guira'ti bejn*

<sup>1</sup> Resa'ä, la'tu ahuililajztu xtidx Dad Jesucristi ni rajp guiraa yälrdimbicha', ni'c di gacdi guntu xhigab sajctu tej bejn lo sabejñni.

<sup>2</sup> Palga guidzunt te bejn xquidootu yu' niloor naani, najcwni ladsa'c, dxejcti jiu'za te bejn nani xhet rajpdi, najcwni ladyujxh, ladbeed,

<sup>3</sup> dxejcti la'tu jjuurutu nani najcw ladsa'cga, naatu: "Ree gurej lo yagx-hilsa'cre", dxejcti gäblu lo bejn ni xhet rajpdi: "Rec gusulii o gurej lo yujre",

<sup>4</sup> ¿la xhet rujnditu xhigab garenca najc tej bejn lo sa'ni, ä? Luxh dxejc acayajctu si'c juejz ni rujn xhigab guijdx.

<sup>5</sup> ¡Colgucuardiajg, betzä ni sanälazä! Agule Dios bejn nani xhet rajpdi lo guedxliujre te ga'preni yälrlilazduxh, te lo xcäl'rñibee Dios xca'reni xcäl'nasa'c ni bia'n diidx gudeed Dios loj renani sanälajzni.

<sup>6</sup> Niluxh la'tu agulälaztu rebejn nani xhet rajpdi. ¿Xhixh xhet laadi rebejn ni rajp ni rusacsitu, li rgobxhaxh'reni la'tu, rinäreni la'tu loj reguxhtis, ä?

<sup>7</sup> ¿La xhet laadi rebejn ni rajp ni rñiyaj loj Dios ni sacduxh? La'tu abirilajtu rexi'n Dios.

<sup>8</sup> Palga guliitu cagusoobtu leii xten xreinu Dios, si'cni caj lo xquijtz Dios scree: "Colchanälajz sa'tu sigajc rinälajztu lagajc la'tu", laaca rujntu.

<sup>9</sup> Niluxh palga rinälajzrutu tej cuaa bejn lo stee cuaa bejn, cayujntu dojl, luxh xleii Dios rñii najctu bejn dojl, bejn ni rbälaz leii.

<sup>10</sup> Palga yu' te bejn ni rusoob guiraa ni caj lo xleii Moisés, niluxh runijtni lo tejtis diidx ni caj lo leii, abanijtpacni, najcni si'cni dini nusoob nicla tej diidx lo guideb leiiga.

<sup>11</sup> Sa'csi lagajc Dios ni gunii: "Na'c guesnäju bejn ni di gac chäällu", lagajc laani gunizani: "Na'c ju'tlu." Palga dilu guesnäj bejn ni di gac chäällu, niluxh rugu'tlu te bejn, abanijtlu xcuent guiralii releii.

<sup>12</sup> La'tu colguini, colguibajn si'c rebejn ni gun Dios yäl'guxhtis con xtiidxni ni ruslaa bejn lo dojl.

<sup>13</sup> Sa'csi renani di gulaslajz bejn, che gun Dios yälguختisreni, dizani gulaslajz laareni. Sajcru yälruulaslajz lo yälguختis.

### *Yälirililajz näj dzuun ni rujn bejn*

<sup>14</sup> Resa'ä, çxhi sajç palga guinii te bejn: “Ahuililazä xtidx Dios”, niluxh dini gun dzuun ni riäjł gunni, ä? Sa' yälirililajzre, çla suslaanini lo dojl, ä?

<sup>15</sup> Palga yu' te bejtzu o te bisiajnnu ni dini ga'p xhajbni, luxh xhetiza xhi gauni, xhi yäni,

<sup>16</sup> luxh gäb tejtı lojni: “Sucuedxi lajzlu jiilu, suguidxa' lajzlu, suguidxaj xque'lu”, niluxh dini gudeed nani caquiinni, çxhi sajç rediidx ni räjpni lojni, ä?

<sup>17</sup> Sigajcza yälirililajz nani di guquuil bejn gunreni xtzuun Dios najç si'c te ni agujt, sa'csi dini guquuil bejn gunreni dzuun.

<sup>18</sup> Yu'za reni naa: “Luj rajplı yälirililajz, narä runä xtzuun Dios; baluii narä xcälirililajzlu xhet näjdi xtzuun Dios, dxejcti narä suluiä xcälirililazä xcuent rexztzuun Dios ni runä.”

<sup>19</sup> La'tu rililajztı yu' tejtis Dios. Laaca rujnlu, niluxh näjza rebeñdxab rililajz yu' tejtis Dios, racdijtlireni, rdxebeduxhrenini.

<sup>20</sup> ÇLa di rıajztı gacheetu, beñnayaäl? ÇLa ditı gan, yälirililajz ni di guichagnäj xtzuun Dios najç te yälirililazgut?

<sup>21</sup> Dios badzucaj xtıjł toxtadgoldoonu Abram sa'csi bejnıi si'c gunıbee Dios gunni, che badzuubni xingaanni İsa'c lo piään, nugu'tnini nez lo Dios.

<sup>22</sup> Colhııi xho tejsi junt sadxaag xcälirililajz toAbram dzuun ni bejnıi, dxejcti sa'csi bejnıi nani gunıbee Dios gunni, bejn Dios gujç xcälirililajzıni sa' yälirililajz nani rıajz Dios ga'p rexpejnıi.

<sup>23</sup> Dxejcti huile' xtidx Dios cadro çaj scree: “Abram huililajz ni räjp Dios lojni, ni'cni badzucaj Dios xtıjłni, cua' Dios Abram si'c te beñnaya.” Birilajzani “xamiıgw Dios.”

<sup>24</sup> Ni'cni ruhuııtu rca' Dios te bejn si'c beñnaya nez lojni xcuent xtzuun Dios ni rujnzani, xhet ganaxtis xcuent xcälirililajz bejnıga.

<sup>25</sup> Sigajcza gusajç toRahab, ni gujç te gunadxab. Dios badzucajza xtıjłni, bejn Dios xhıgab najçni te beñnaya sa'csi bejnıi xtzuun Dios che badeedni rolıjzıni bacua'tzloj tio'p xpejn İsrail ni gujç guıxhajç ni sagula'tz guejdxga, dxejç gucñäjıireni te sıireni ste'ca nez yuj.

<sup>26</sup> Sigajç ni di gacdi guıbajñ tiejxh bejn palga xheti sprıt, sigajcza di gacdi guıbajñ yälirililajz palga dini gun dzuun ni rnıbee Dios gunni.

## 3

### *Rediidx nani rnıi luudxnu*

<sup>1</sup> Resa'ä, na'c gac xhidajltı bejn ni ruluii xtidx Dios, sa'csi anajnnu rac yälguختisrorıu rebejn nani ruluii xtııdxni.

<sup>2</sup> Sa'csi guıragajçnu riennu xhidajł cuaa dojl. Palga yu' te bejn ni di gunıjł lo diıdx ni rnııni, laani najçni te beñsa'c, rajcza rnıbeeni guıdeb tiejxhni.

<sup>3</sup> Palga rusälnu guııb ni ru' ro' cabaiı te çhäni cadro rıajznu jııni, rnıbeezanu guıdeb xtıejxhni.

<sup>4</sup> Colhııi rebarcwro, mase sıolduxhreni, luxh rebeduxh rulanaareni, niluxh çapıtán ni rusaj barcw lo nısdoo, te guıbbáz ni çaj xhajñ barcw neñ nis, con ni'ctis rinänıni cadrotis rıajzıni.

<sup>5</sup> Sigajcza najç luudxnu, najçni te labáz tiejxhnu, luxh colhııi lacti diđxro rnııni. Najçni si'c te balbáz ni rajç ruze'c guıragajç reyaıjç ni yu' dajñ.

<sup>6</sup> Luxh luudxnu najc si'c te bajl. Rnii luudxnu guiraa redidxduudx ni rnii reben guedxliujre nani rdxe'ch lo Dios. Lo guiraa rela' ni najc tiejxhnu, laa luudxnu ni rundxuudx guideb tiejxhnu. Luudxnu ralguuj con xquiboo gabijl.

<sup>7</sup> Rebejn sajc gusiadcooreni guiraloj guidxaa, guiraa mane', guiraa bäl, guiraa man lo nisdoo, abasiadcoo bejnreni,

<sup>8</sup> per nicla tej bejn di gacdi gusiadcoo lujdxni. Dini cuedxi, guidxani cosguijdx, najcni si'c te bäl ni rauya'ni rugu'tni te bejn.

<sup>9</sup> Lagajc luudxnu rliä'pnu xpala'n Dios Xtadnu, lagajc laani rniyajnu sabejnmu ni benchee Dios sigajc najcni.

<sup>10</sup> Tejsi ro'nu rnile' lo Dios nägajcza rgue lo bejn. Rebetzä, jxhet si'c di nungäjl di gacni!

<sup>11</sup> ¿La rbää bejn nisnejxh näjza nisrop lo tejsi bisie, ä?

<sup>12</sup> Betzä, ¿la caxajsi sajc xcaj aceitun loj te yagiigw, ä? ¿O la sajc xcaj iigw lo te yaguub, ä? Sigajcza digacdi guirii nisnejxh näjza nisrop lo tejsi bisie.

### *Yälñajn ni siääd xhaguibaa*

<sup>13</sup> ¿Chuni'c lo guiraaatu yu' xcäriejnni, nanduxhni, ä? Suguluuini xho najcni xcuent xcälñabansa'cni, sugunni xtzuunni guideb yälñadolajz ni rudeed xcäriejnni.

<sup>14</sup> Niluxh palga yu' yälrdxe'ch lo sa'lu ni runnanlaa lastoolu, näjza rujnlu guira'ti parsi xcälñasa'c lagajc luj, na'c gaclu guyalajz, sa'csi ni'c najc si'c ni canilu didxrusguee xcuent xtidxlii Dios.

<sup>15</sup> Sa'csi sa' yälñajnre, xhet xhaguibaadi siäädni, alga najcni yälñajn xten guedxliujre, xten reben guedxliuj, xtenza reben dxab.

<sup>16</sup> Sa'csi cadro yu' yälrdxe'ch lo sa'ni, näj cadro rujn bejn guira'ti parsi xcälñasa'c lagajc laani, ro'c yu' bieje, yu' guiraloj latsiaj.

<sup>17</sup> Niluxh yälñajn ni ruxhal Dios, ganiddoo najcni naya, dxejcti rulecdxini xcäriejn bejn, dxejc rujnni rajc bejn nadolajz lo sa'reni, rujnzani saru runnäj bejn sa'reni, rulazlajz bejn sa'reni, rujnzareni guiraloj dzunsa'c, runle'pacreni xtiidxreni, direni guinii tej diidx laaga cayujnreni garenca dzuun.

<sup>18</sup> Renani rguuil yälrbedxi, yälrbedxi rbe'creni te xca'reni te yälñabannaya nez loj Dios si'c xcälñasa'creni.

## 4

### *Ni nabannäj guedxliuj*

<sup>1</sup> ¿Casiaäd rebieje, reyälrdxe'ch lo sa'ni ni casiajctu? ¿La direni jääd xcuent lagajc xhigab ni yu' lastootu, ä? Lagajc rexhigabga rujn bieje nen lastootu, ruscäjyreni xcäriejntu.

<sup>2</sup> La'tu rlanjtu ga'ptu nani ditu ga'p, dxejcti rugu'ttu sa'tu. Rsiäblajztu xhixten sa'tu, luxh sa'csi digacdi xca'tuni, dxejc rucuanäjtu sa'tu, rdilñäjtu sa'tu. Ditu ga'p nani rlanjtu sa'csi ditu guiniabni loj Dios.

<sup>3</sup> Rniabtuni, niluxh dini guniidxnini sa'csi xhet laadi najc xhigabtu gunabtuni, alga gunabtuni sa'csi rlanjtu gunijttuni si'cni rlanjtu.

<sup>4</sup> ¡Aii! Bejn ni di gandzu' Diostis. ¿La ditu gan bejn nani rlanj gun redzuun ni rujn reben guedxliuj, bejnga rdxe'chreni lo Dios, ä? Ni'cni palga yu' chu tejtuni ni rlanj chanuu lo ni rajc lo guedxliujre, bejnga rdxe'ch lo Dios.

<sup>5</sup> O ¿la rchalotu xlia'si caj lo xtidx Dios rediidxre: “Sprit ni baxhal Dios te cuääzni nen lastoonu, randzu'ni nuurnu sa'csi rlanjzni guinibeeni nuurnu?”

<sup>6</sup> Niluxh runiidxru Dios xcälracnäjni loonu. Ni'cni rniit xtiidxni scree: “Dios rdxechnäj renani runnaro lagajc laareni, niluxh rudeedruni xcälracnäjni lo rebennadolajz.”

<sup>7</sup> Coljiu'pac lo xnezyuj Dios. Colsudzu'tzpac te di guntu ni rlanj beñdxab, te guxunni lojtu.

<sup>8</sup> Colguibigru lo Dios te guibigzani lojtu. Beñdojl, colquiib naatu, nalajznu na'cru guntu latsiaj; colgusia lastootu, la'tu ni runtio'p lajztu.

<sup>9</sup> Sugacnaj lajztu, suchuti xliajcs, colyonduxh. Colguchaa xcälruxiustu, colca' yälhuin, colguchaa xcälrbalajztu, colca' yälroon.

<sup>10</sup> Colyajc si'c bejn ni xhetliidi sajz nez loj Dad Jesucrist, te laani guiliäzni la'tu gunni la'tu beñro.

### *Na'c guiniyajtu sa'tu*

<sup>11</sup> Rebetzä, na'c guiniyajtu resa'tu. Sa'csi renani rniyaj sa'ni o rujnni yälguختis sa'ni, reni'c rniyaj xleii Dios, rujnreni yälguختis xleii Dios luxh palga guntu si'c, dirutu gac renani rusoob xtidx Dios, alga najctu juejz xten leii.

<sup>12</sup> Tejtis najc nani runiidx leii loonu, tejtis najc juejz; najcni nani rajc rusläa bejn lo dojl, nani sajz gunitloj bejn. La'tu, çchuxh najctu te guntu yälguختis lo sa'tu, ä?

### *Dinu gan xhi gac guixee*

<sup>13</sup> Naj colcuadiajg dee, la'tu ni rniitu, nadxej o guixee chonnu te guejdx nezrec. Ro'c guideednu tebijz te guiziinu, guito'nu te jiennu gaan meel.

<sup>14</sup> Luxh nicla gantu xho gac xcäl'nabajntu guixee. Xcäl'nabajntu najc si'csi te za nani rienloj tera'tbäz, dxejcti rnitlojni.

<sup>15</sup> Hueenru guiniitu scree: “Palga rlanj Dios sibaannu, te jiennu dee o dec.”

<sup>16</sup> Niluxh si'c ni rujntu naj, rajc gualajztu rniitu didxro; luxh guiraa redixroga najc dojl.

<sup>17</sup> Ni'cni ni najn xho riäj gunni, palga dini gun si'c, rujnni dojl.

## 5

### *Rulijdxni rebejn ni yu' xhidajl xhixtenni*

<sup>1</sup> Colgucuaadiajg xtidxä, bejn ni yu' xhidajl xhixtentu. Colyoon, colcuedxa' xcuent recasionduxh ni sactu.

<sup>2</sup> Guiraa rexhixtentu nani rajptu aguxhijn, luxh rexhajbtu agudajw rebaguiidni.

<sup>3</sup> Oor näjza pla't xtentu agubibtiejnni, aguxhijnni. Lagajc dee gun gacbee Dios ditu niujn ni rlanj Dios guntu, lagajc ni'c gun chectu, nitlojtu. çXlia'si batiedajntu xhixtentu neñ redxej lultga!

<sup>4</sup> çColhuii! Ditu niguixsa'c loj reni bejn xtuuntu, ni'cni laareni cayujnreni yälquij lo Dios xcuenttu. Luxh xhadiajgli Dios xten reangl ni yu' xhaguibaa abidzujn yälquij xtentu ni cabe'c renani batie' xcäl'nasa'ctu.

<sup>5</sup> Agubansa'cpactu lo guedxliujre, bejntu lanij si'ctis ni rlanjtu, abastio'tu lastootu neñ redxej xten yälrgu't.

<sup>6</sup> Gudiiltu xho bagu'ttu rebensa'c luxh laareni dxiitis gusujreni, xhet bejndireni te na'c nugu'ttoreni.

### *Colcuääz jiädxhii Diostu*

<sup>7</sup> Resa'ä, dxitis colcuääz guidzujn dxej cheni jiääd Dad Jesucrist. Colhuii xho rujn bejn ni rbe'c binij, dxitis rbäjzni gac xcäjlni la' ni riajb nisguigaloo näjza nisguij ni riajb lult.

<sup>8</sup> Si'cza la'tu colcuäzdxi, colgustioob lastootu sa'csi asiäddzungajxh dxej ni jiaäd Dad Jesucrist.

<sup>9</sup> Resa'ä, na'c chale'ctu xquej sa'tu, didi gun Dios yälguxhtis la'tu, sa'csi asiäddzungajxh dxej che guidzujn Dios ni najc Juejz.

<sup>10</sup> Rebetzbidä, colhuii xho gudejd reniguii nani bacuaa xtidx Dios trabajw galoo, xho guläzzareni.

<sup>11</sup> Colhuii xho rniinu chicbaa renani guläzdxi lo trabajw ni gudejdreni. Abiejn diajgzatu xho bejn Job che gudejdni trabajw, anajnzatu xho guzajcni xcuent redzunsac ni bennäsac Diosni, ni ruluiloj xho riaduxh Dios bejn, rapduxhni yälruulasajz.

<sup>12</sup> Rebetzä, che ria'ntu diidx lo te bejn, gunatiro palga gusä'ttu xhaguibaa, o guedxliuj, o xhi steeni. Che naatu: "Mbaj", ni'ctisza colguinii. Che naatu: "Na'c", ni'ctisza colguinii te na'c gun Dios yälguxhtis la'tu.

<sup>13</sup> ¿La yu' tejtü ni cadejd trabajw, ä? Suguiniabni lo Dios. ¿La yu' chu tejtü ni cabalajz, ä? Sugołni dij te guilä'pni xpala'n Dios.

<sup>14</sup> ¿La yu' chu tejtü ni cayacxhuu, ä? Sucueedxni rebeḡool ni rnibee nen guidoo, te guiniabreni lo Dios xcuentni lał ni cagusälzareni se't lo cuajni con laj Jesucrist.

<sup>15</sup> Luxh palga rililajzpacreni che canabreni, siajc beḡracxhuuga, siliäs Jesucrist bejnga. Luxh palga bejnni dojl, sibicaj xtojłni.

<sup>16</sup> Ni'cni colguxhobdojl lo sa'tu, colnab lo Dios xcuent sa'tu te jiajctu. Che rniabduxh te beḡ naya lo Dios, dzunroza rujn Dios.

<sup>17</sup> Elías, te bejn ni gunii xtidx Dios agujc xchero, gujczä te bejn sigajc najcnu. Gunabdipni loj Dios te na'c jiajb nisguij, luxh di nisguij niajb lo guedxliuj choḡ ijz garol.

<sup>18</sup> Dxejc gunabsacni lo Dios, dxejc bixal xhaguibaa, biabsac nisguij, dxejcu gujc reyälḡnasa'c xtenreni lo guedxliuj.

<sup>19</sup> Rebetzä, palga yu' chu tejtü ni guibicaj lo xtidx Dios, luxh yu' chu gacnäj guibisacni lo xtidx Dios,

<sup>20</sup> sugacbee bejn nani racnäj guirii beḡdojl lo xnezyuguijdxni te guibisacni lo Dios, bejnga agucnäjni te gulaa xaimni lo yälgujt, te gubicajza guiraa xtojłni, mase xhidalduxh najc xtojłni.



## Guijtz Ganid Nani Bacuaa Pedr

### *Pedr cacuaa guijtz loj reni rililajz ni nare'ch*

<sup>1</sup> Narä Pedr, te apost xten Jesucrist, cacuaä guijtzre loj renani agule Dios gac rexejñni nani rbäjz si'c benzijt lo reguedx Ponto, Galacia, Capadocia, Asia, näjza Bitinia.

<sup>2</sup> Xtdadnu Dios gule la'tu galooli bencheeni niguii, aguleni la'tu par lagajc laani te gun Sprit Dxan xtenni xtzuumni neñ lastootu te gusoobtu xtidx Jesucrist te jia lastootu con xtiejn Jesucrist. Rniabä lo Dios gacnäduxhruni la'tu, guscuedxini lastootu lo guiraliiti.

### *Te yäl'nabajn ni cabääznu*

<sup>3</sup> Colguiliä'p xpala'n Dios ni najc Xtdad Jesucrist, Dios nani xcuent xcälrusalazduxhni bejnni gojpnu te yäl'nabañcoob sa'csi baspañsacni Jesucrist loj rebengut. Sa'csi rajpnu yäl'nabañcoob, ni'c nadippac lajznu.

<sup>4</sup> Ni'cni laani suniidxni te yäl'rusalajz ni di nitloj, ni di xhin, ni di jiuui si'c riuii rebalajg. Yäl'rusalajzga aguluchedzu'tzni xhaguibaa par la'tu,

<sup>5</sup> nani cayapdzu'tz xcäl'milaagwr xten Dios sa'csi rililajztu xtiidxni, te guluii Dios guira'ti ni rajpni par la'tu, ni arapcheeni te guluinireni lojtu che luux guedxliujre.

<sup>6</sup> Ni'cni rbalazduxhtu, mase nanab tedtu balti trabajw gaie'si dxej lo guedxliujre,

<sup>7</sup> te guzeñ xho rililajztu. Xcäl'rililajztu sajcru lo oor nani rnitloj, niluxh xcäl'rililajztu di nitloj, mase tedni lo guiboo, ni'cni sinii Dios didxsa'c, didxro, siliiä'pni xpala'ntu che guibisac Jesucrist lo guedxliujre guideb xcäl'milaagwrni, näjza xcäl'rdimbicha'ni.

<sup>8</sup> Mase gajdту fii lojni, sanälajztuni. Mase ditu fii lojni naj, ahuililajztu xtiidxni, rbalazduxhtu guideb yäl'rbalajz ni rut rajcdi rusule', sa'ni yu' xhaguibaatis,

<sup>9</sup> sa'csi xcäl'rililajztu suslaa xaimtu lo dojl, sica'tu yäl'nabajn par tejpas.

<sup>10</sup> Luxh xcuent yäl'ruslaa dojlre, rebejn nani gunii xtidx Dios agujc xchero, laareni abasulexgaareni xcuent xcäl'racnäj Diosre nani siääd lojtu. Luxh bisiedduxhrene, gunabdiidxzareni,

<sup>11</sup> te rrajzrene gachebereni chu bejn o gucpac gac nani cagusä't Sprit xten Crist ni yu' neñ lastooreni che gunixgaani xho nungäj] ted Jesucrist trabajw, dxecru xcasacni yäl'rñibee.

<sup>12</sup> Baluii Dios lojrene, di rediidxga soob neñ redxej ni nabajnrene, alga par la'tu najc rediidxga. Naj agunii rebejn ni rusule' xtidx Dios rediidxga lojtu. Abasule'reni xtidx Jesucrist sa'csi xhaguibaali baxhal Dios Sprit Dxan xtenni te cuääzni neñ lastooreni. Näjza rexangl Dios ni rbäjz xhaguibaa rrajz gacheberureni rediidxga.

### *Xcäl'nabajnayanu nez loj Dios*

<sup>13</sup> Ni'cni, colsanij xcäriejntu, colgusudzu'tz lastootu, guideb lastootu colyenloj yäl'racnäj xten Dios ni abia'n diidx xca'nu che guibisac Jesucrist lo guedxliuj.

<sup>14</sup> Gactu si'c biuux nani rusoob xtidx xtdadni. Na'cru xcäjbtu guntu redzun-guijdx ni bejntu galoo che gajdту gumbee Dios.

<sup>15</sup> Dios ni gule la'tu najc dxan. Sigajcza la'tu, loj guiralii ni rujntu colyajc beñdxan.

16 Sa'csi lo xtidx Dios caj scree: "Sajctu bendxan sa'csi narä nacä dxan."

17 Palga la'tu rniitu "Dad" lo Dios nani tebloj rujn yälguxhtis loj guiraa bejn xcuent dzuun ni bejnni, la'tu riäjł guidxejbtuni guiraa dxej ni nabansijctu lo guedxliujre.

18 Anajntu di Dios nudeed yäl'nasa'c ni rnitlojdi, si'c oor näjza pla't, te baslaani la'tu lo recostumbr ni cua'tu lo retoxtadgoldootu. Recostumbrga xhet sa'cdireni. Di Dios nudeed oor nicla pla't te baslaani la'tu,

19 badeedni rejn ni sacduxh te baslaani la'tu loj xtojłtu. Rejn si'c xtiejn te xiil ni naya, xhetpac najcdini, xtiejn lagajc Jesucrist.

20 Guliipacni che gajdli guirixtiej guedxliujre, gule Dios Jesucrist, niluxh najru, neñ redxelult che gajd guedxliujre nitloj, biädluilojni par xcäl'nasa'ctu,

21 la'tu nani rililajz xtidx Dios xcuent Jesucrist. Luxh Dios baspañsac Jesucrist loj rebengut, badeedni yäl'rnibee lojni, ni'cni ahuililajztu xtidx Dios, luxh Diostis cayenlojtu naj.

22 Naj sa'csi abasobtu xtidxliini, te si'c abasiatu lastootu te gac chanälajztu sa'tu, naj guideb lastootu col'chanälajzpac sa'tu.

23 Sa'csi acua'tu xcäl'nabancoobtu xcuent xtidx Dios ni najc par tejpas, et xcuentdi xtidx beñ guedxliuj ni rnitloj. La'tu najctu si'c cuaan ni rliejn lo bejdz ni siääd xhaguibaa, xhet lo bejdzdi ni rnitloj.

24 Galooli gunii Dios scree:

Guiraa reben guedxliuj najc si'c recuaan,  
guiraa xcäl'nasa'creni najc si'c reguii ni rcaj lo cuaan,  
recuaan rgol, lirtejbza reguii xtenni,

25 niluxh xtidx xtad Jesucristnu rsiudzu'tzni tejpas.  
Luxh diidxre najc diidx ni basule'reni lojtu.

## 2

1 Ni'cni colgusaan guiraa redzunguijdx ni yu' lo guedxliuj, na'c gusgueetu sa'tu, na'c guntiop lajztu, na'c chuguij lajztu xhixten sa'tu, na'c guiniyaj sa'tu.

2 Si'c riojł rebäznite' le'ch, si'cza colquiił xtidx Dios par sprittu. Coljiojł xtidx Dios te gustioobruni la'tu lo yäl'ruslaa lo dojł,

3 palga agucbeetu lacti hueen najc xcäl'racnäj Jesucrist.

*Crist najc si'c te guij ni nabajn*

4 Colguibig loj Jesucrist ni najc si'c te guij ni nabajn. Laani suniidx yäl'nabajn par tejpas loonu. Rebejn badzucay guijga, niluxh Dios gulenini sa'csi sacduxhni.

5 Sigajcza tejgatu najctu si'c guij ni nabajn, ni'c colgusaan xca' Dios la'tu, reguibajn, te con la'tu gunchee Dios te yu' cadro cuääz Sprit xtenni, te gactu rexpixhojz Dios, nani nayapac lastooreni. Ni'cni sa'csi najctu tejtis con Dad Jesucrist sudeedtu lo Dios guiraa xcäl'nasa'ctu con xpřit xtentu. Dee najc nani rchagłajz Dios.

6 Sa'csi galooli gunii Dios scree:

Agule'cä te bejn neñ guedx Siön, nalajznu Jerusalén,  
ni gac si'c te guisa'c, te guiro ni rsiuj squiin te yuro.  
Chutis bejn ni chalilajz xtiidxni, dini jianxtujy.

7 Lojtu ni ahuililajz xtiidxni najcni si'c te guisacduxh, niluxh loj renani gajd chalilajz xtiidxni, najcni:

Guij ni gulälaz renani cayunchee yu',  
lagajc guijga gujc guijpac ni baliib squiin xten yu'ga

8 näjza:

Te guij ni rliaj ni' bejn, ni ruzäl'ta'reni,

laareni riajbreni sa'csi direni gusoob xtidx Dios, luxh agunibexгаа Dios nitlojreni.

### *Renani gule Dios*

<sup>9</sup> La'tu najctu te cuaa bejn ni agule Dios, tejgatu najctu rebixhojz ni najc si'c reii xten Dios. La'tu najctu te beñnaya, te beñsa'c, rexpejñpacni. Aguleni la'tu te gusule'tu reyäl<sub>nasac</sub>duxh ni bejn Dios ni gurejdxu che guyu'tu lo nezyunacäjy xten guedxliujre te biu'tu lo nezyuj ni rdimbichasejz xten Dios.

<sup>10</sup> La'tu galoo rut najcđitu, niluxh naj najctu rexpejñpac Dios. Galoo gajđ Dios gulaslajztu, luxh naj abalaslajz Dios la'tu.

### *Colguibajn lo xnezyuj Dios*

<sup>11</sup> Rebetä ni sanälazä, nabajñtu lo guedxliujre si'c benzijit, ni rbäjz te laad, ni'c rniabduxhä lojtu, na'c guntu recosguijdx xten guedxliujre, ni rutijl nen lastoo bejn te cuälazreni xnezyuj Dios.

<sup>12</sup> Colguibansa'c lał ni yu'tu loj rebenzijit ni di gac xpejñ Israel te palga guiniyajreni la'tu gäbreni najctu beñlatsiaj, che fiireni redzunsac ni rujntu, siliä'ppacreni xpala'n Dios che jädsac Jesucrist te gunni yäl<sub>gux</sub>htis.

<sup>13</sup> Ni'cni, sa'csi huililajztu xtidx Jesucrist, colgusoob xtidx guiraa reni rnibeetu lo guedxliujre, si'c najc presidentro,

<sup>14</sup> regubernadoor nani ruxhäni te rujnreni yäl<sub>gux</sub>htis rebendojł näjza te guiliä'pni xpala'n reben nani laaca rujnreni.

<sup>15</sup> Sa'csi Dios rłajz guntu recossac te cuecdxitu rextidxnayääl ni rnii reni di rłajz gumbee didxlii xcuent Jesucrist.

<sup>16</sup> Colguibajn si'c bejn ni rut rnibeedi, na'cza guntu latsiaj sa'csi rut rnibeeditu, colguibajn si'c guinibee Dios.

<sup>17</sup> Ga'ptu yäl<sub>nadolajz</sub> loj guiraasi bejn. Colchanälajz sa'tu ni rililajz. Colguidxejb Dios, colguiliä'p xpala'n presidentro.

### *Gudejd Jesucrist trabajw te baluiini xho jiennu*

<sup>18</sup> La'tu ni najc mos, guideb yäl<sub>nadolajz</sub> colgusobdiajg guiraa xtidx rexlamtu, xhet ganaxdi relamsa'c ni najc nadolajz, näjza relam ni najc benguijdx.

<sup>19</sup> Sa'csi rchagłajz ruhuii Dios te bejn palga sa'csi rililajz te bejn xtidx Dios rujn bejn huanť che rdejđni trabajw luxh xhet bejđdini.

<sup>20</sup> Palga la'tu rujntu latsiaj ni'cni rusacsini la'tu, ĺxhi guntu gaan palga rujntu huanť rdejđtu trabajw? Niluxh palga la'tu rdejđtu trabajw sa'csi rujntu redzunsac, luxh rujntu huanť, ni'c najc laaca nez loj Dios.

<sup>21</sup> Te guntu si'c gurejdx Diostu, sa'csi gudejđza Jesucrist trabajw xcuenttu te guluini xho guntu che chanuutu lo xnezyujni.

<sup>22</sup> Laani dini niujn nicla tej dojł, laani dini nusguee nicla tej bejn con didxhii.

<sup>23</sup> Che guniyajreni lojni, dini nudzu' yäl<sub>rniyajga</sub>. Che cadejđni trabajw, dini nudzu' diidx niluxh bateedni lagajc laani ladz<sub>naa</sub> Dios ni rujn yäl<sub>gux</sub>htissa'c.

<sup>24</sup> Gudeed Jesucrist trabajw si'c te beñđođduxh, bacuaarenini lo cruujz te ro'c gusacsiduxh tiejxhni xcuent xtojłnu, te na'c gunrunu dojł, te guibansa'cnu lo xnezyuj Dios. Gudilguijđxreni tiejxhni te basiajđni la'tu.

<sup>25</sup> Sa'csi galoo gujctu si'c rexil ni rut rajpđi, rijreni nezree-nezrec. Niluxh naj agubisactu lo xpaxtoortu näjza nani randzu' xaimtu, Jesucrist.

## 3

*Xho nanab guibanäjtu chäältu*

1 Sigajcza la'tu, regunaa ni abachnaa, colgusoob xtidx chäältu, te mase yu' tejreni ni di chalilajz xtidx Dios, sililajzni xtidx Dios sa'csi fiini xho rujntu mase xhet rniidilu.

2 Sa'csi fiini xho riulu xtiidxni näjza xho rniilu nadolajz lojni, näjza xho nabañäsa'cluni.

3 Na'c gusucheetu ganax lo jiaatis, si'c najc guichniil yejctu, näjza biaoor ni rcaj diajgtu, guejntu, naatu, näjza ladsa'c ni najc sacru.

4 Colgusuchenäj lastootu yälñadolajz, yälrbecdxij lajz, näjza yälñanalajz, sa'csi direni nitloj, luxh sacduxhrenei nez loj Dios.

5 Galoo si'cza bejn regunaa ni gujc xpejn Dios ni huililajz xtidx Dios, basucheerenei lastooreni, basoobrenei xtidx chäälrēni.

6 Si'c gujc toSara, basobdiajgni xtidx toAbram, guniizani lo toAbram, Dad. Naj najctu si'c laani palga rujntu redzunsac'c, näjza na'c guidxejbditu.

7 Sigajcza la'tu, niguii ni abachnaa, colguibañäsa'c chäältu. Colgapdani sa'csi dini gacnadip si'c te niguii; nanab guntu si'c sa'csi näjza lojreni badeed Dios yälñabajñ par tejpas. Colejxn si'c, te gucua diajg Dios che cuedx-guiniabtu lojni.

### *Renani rdejd trabajw che laaca rujnreni*

8 Dee najc ni cania loj guiraatu, saru colguibañäj sa'tu. Colgulasajz sa'tu, colchanälajz sa'tu si'c rinälajz te niguii bejtzni. Gactu beñsa'c, beñnadolajz.

9 Na'c gudzu'tu didxguijdx che guiniireni didxguijdx lojtu, na'cza gudzu'tu didxyaj che guiniireni didxyaj lojtu. Alga gunab lo Dios gacnäjnireni, sa'csi ni'cni gule Dios la'tu, te sica'zatu reyälñasa'c ni guniidxni lojtu.

10 Sa'csi scree caj lo xtidx Dios:

Nani rchagljajz guibajñni,  
luxh rlajzzani saru tedni redxej lo guedxliujre,  
sugudxojnñi guinii ro'ni didxnaj näjza didx-xhii.

11 Guibicajni loj redzunguijdx, sugunni redzunsac'tis.

Suquiiłni yälrbecdxij te ni'c chanuuni.

12 Sa'csi ruhuii Dios rebejn ni rujn dzunsa'c,  
rucua diajgzani xtiidxreni che rniabrenei lojni.

Niluxh rudzurēni lojni, rbälazzani renani rujn latsiaj.

13 ¿Chu laa ni gun latsiaj la'tu, palga la'tu rbaali lajztu rujntu dzunsa'c?

14 Palga caxäjsi tedtu trabajw che guntu redzunsac'c. ¡Chicbaatu! Na'c guntu xhigab, niclaza guidxejbtu xcälrucejbreni.

15 Colgusaan guinibee Dad Jesucrist neñ lastootu, gususin te gudzu'tu diidx lojreni rniabdiidx lojtu xhicuent runlojtu guibi' Jesucrist. Guideb yälñadolajz saru gudzu'tu diidx.

16 Colguibañsa'c te cuedxij xcälriejntu te che guiniyajreni la'tu sa'csi nabañsa'ctu loj Crist, jianxtujy reni rniyaj la'tu.

17 Sa'csi hueenru tedtu trabajw che cayuntu te dzunsa'c, palga si'c rlajz Dios, lacuaa tedtu trabajw sa'csi cayujntu dojl.

18 Sa'csi sigajcza tejtis gujt Jesucrist xcuent rextojłnu. Xhetliidi xtojłni guyu' nez loj Dios, niluxh gudejđni trabajwduxh xcuent rebendojl. Bejnñi si'c te gac guibignu lo Dios sa'csi gujt tiejxh Jesucrist, luxh guyusac sprit xteni lo tiejxhni te gubañsacni.

19 Che gajđ xpritiñ guibisac lo tiejxhni, huij spritni basule'ni diidx loj resprit ni yu' latzguuib.

20 Respritga najc renani di nusoob xtidx Noé che basule'ni xtidx Dios lojreni. Guläjz Dios rebejnga guiraa redxej ni cayujn Noé barcwro agujc

xchero. Baslaa Dios xcäl'nabajn xhujntis bejn, xhet gujcdireni gudejdreni lo nisguiro ni biajb guideb guedxliujre.

<sup>21</sup> Che robnisnu naj, rusnaalajznu rebejnğa; yälrobnisga ruluiløj xho ruslaa Diosnu lo dojl. Et sa'csi riäjt beed lo tiejxhnu neñ nisga, alga sa'csi dxejc rni-abnu lo Dios guniidxni te xcäriensa'c, sa'csi sajc xca'nuni xcuent ni gubañsac Jesucrist lo rebengut.

<sup>22</sup> Che birii Jesucrist loj rebengut, biu'ni xhaguibaa cadro gurejni xladbee Dios te ro'c rnibeeni loj rexangl Dios, näjza loj guiraa respit ni rajc rnibee, ni yu' lo guedxliuj näjza xhaguibaa.

## 4

### *Colyejn xtzuun Dios*

<sup>1</sup> Ni'cni sa'csi agudejd Jesucrist trabajw cuajni lo cruzj xcuentnu, sigajcza la'tu riäjł guntu xhigab sidejdtu trabajw lo guedxliujre sa'csi nani agudejd trabajw, diruni gun dojl,

<sup>2</sup> te guideb nabajnni lo guedxliuj, guibajnni si'c rlanj Dios, diruni guibajn te gunni redzunguijdx xten guedxliujre.

<sup>3</sup> Sa'csi bejntu si'ctis ni rlanjtu galoo, bejntu si'c rujn rebejn ni di gumbee Dios, bejntu si'cni rlanj tiejxhtu, bejntu latsiaj, gusojztu, bejntu relaniro, gudedcaj gusojztu, luxh bejntu cosxtuiduxh bazuxhijbzatu loj rebanäbñxab.

<sup>4</sup> Dxejcti rebejn ni rujn recosga naj, rdxeløjreni sa'csi dirutu gun ni rlanjreni, ni'c rniyajreni la'tu.

<sup>5</sup> Niluxh laareni suureni nez loj Jesucrist ni agojl gun yälğuxhtis loj guiraa rebejn, rebejn ni nabajn näjza renani agujt, te gusule'reni xcuent nani bejnreni.

<sup>6</sup> Ni'cni basule' Jesucrist xtidx Dios loj reni agujt, te mase che gubajnreni lo guedxliuj gujcreni yälğuxhtis si'ctis ni rajc bejn, dxejc gujtreni, naj sprit xtenreni sinuu guibajn si'c ni rlanj Dios.

<sup>7</sup> Asiäddzungajxh dxej che guibisac Jesucrist lo guedxliujre. Ni'cni ganax laaca colyejn xhigab, colğusiñ xcäriejntu te saru cuedx-guiniabtu lo Dios.

<sup>8</sup> Niluxh ni maazru sajc najc yälñanalajz resa'tu sa'csi che rinälajztu resa'tu, riallajztu xtojł sa'tu.

<sup>9</sup> Saru gurenäj bejn ni rdzujn rolizlu, na'c jiejytu.

<sup>10</sup> Abaniidx Dios loj tejgatu te dzuun ni sajc guntu. Dzuunga colyacnäj resa'tu, te si'c guluiitu lo resa'tu laaca cayunsa'ctu guira'ti nani baniidx Dios lojtu.

<sup>11</sup> Palga tejtu najc xtzuunni guluiini xtidx Dios, suguiniini ascanu najcni xtiidxpac Dios. Palga tejtu najc xtzuunni gacnäjni sa'ni, sugunnini, guideb yälñadip yälñadaan ni rudeed Dios lojni, te guira'tis ni rajc sujñ guiliä'p xpala'n Dios xcuent Jesucrist. Sa'csi laatisni riäjł chä'p xpala'nni, laatisni riäjł guinibeeni tejpas. Sugacni si'c.

### *Xho nanab tednu trabajw*

<sup>12</sup> Rebetzä ni sanälazä, na'c guidxelojtu sa'csi cadejdtu trabajw ni najc si'c guiboo, ni siääd te gactu preeb. Na'c guntu xhigab xhichani'c casiajctu.

<sup>13</sup> Colğuibalajz sa'csi sigajc ni cadejdtu trabajw sa'ni gudejd Jesucrist, sigajcza sibalajztu che guiluløj xcälrdimbicha' Jesucrist.

<sup>14</sup> Palga rniyajreni la'tu sa'csi rililajztu xtidx Jesucrist, chicbaa la'tu, sa'csi rbäjz Xpřit Dxan xten Dios guideb xcälrdimbicha'ni neñ lastootu.

<sup>15</sup> Gunatiro, andi gusaantu ted tejtu trabajw sa'csi bagu'ttu bejn, o sa'csi gulajntu xhi xten bejn, o sa'csi bejntu latsiaj, o sa'csi huichu'ni lo xcuent sa'ni ni xhet nungäjldi gacbeeni.

<sup>16</sup> Palga yu' chu tej tedni trabajw sa'csi rililajzni xtidx Jesucrist, na'c guitujyni, alga suguiliä'pni xpala'n Dios xcuent Jesucrist.

<sup>17</sup> Abidzujn dxej che ganid rexpejn Dios ted trabajw. Luxh palga ganid nuurnu gacnu yälğuxhtis luxh ahuililaaznu xtiidxni, jxhocha gun rebejn nani di chalilajz xtidx Dios xcuent Jesucrist!

<sup>18</sup> Lo xtidx Dios caj scree:

Lacti naganlajz rliaa rebenñaya lo dojl,

çxhocha gunäjni rebejn nani di chalilajz xtidx Dios näjza rebeñdojl?

<sup>19</sup> Ni'cni, guiraatu nani cadejd trabajw xcuent xtidx Dios si'cni rlanj Dios, colgudeed xpirttu lo Dios ni di gusguee, ni bencheetu, te chanuutis guntu ni riäjł guntu.

## 5

### *Yälřulijdx loj renani ahuililajz xtidx Dios*

<sup>1</sup> Narä nacä te beñgool, bahuiä trabajw ni gudejd Jesucrist, bahuiäza xcälřdimbicha' Jesucrist ni guniidxni loonu che guibisacni lo guedxliujre. Ni'cni rulidxä la'tu ni najc rebeñgool,

<sup>2</sup> colgajp renani rililajz xtidx Dios nani rajptu fiipactu xhi rujnreni. Colga'preni si'c te bejn ni rajp xiil, colyejnmi guideb yejc, guideb lajztu. Colyejn si'c sa'csi si'c rlanj Dios guntu, na'c gunlojtu meel. Colguibalajz cayajptu rexpejn Dios.

<sup>3</sup> Na'c guinibeetu lojreni si'c rnibee te lam loj reni rujn xtzuumni, colguluiireni xho gunreni con xcälřnabañsa'clu.

<sup>4</sup> Che guibisac Jesucrist, ni rajp nuure, laani suniidxni xcuentnu, te yälřnasacduxh nani dipac nitloj.

<sup>5</sup> Sigajcza la'tu ni najc bi'n, colğusobiajg xtidx rebeñgool. Guiraatu coljiu xtidx sa'tu, colguluii sa'tu guideb nadolajz. Sa'csi:

Dios rbälaz rebejn ni runnaro lagajc laareni,

niluxh racnäjni rebejn ni najc nadolajz.

<sup>6</sup> Ni'cni guideb yälřnadolajz coljiu lo Dios sa'csi rajpni yälřrnibeduxh, te guiliä'pni xpala'ntu che gal dxej ni guibisacni.

<sup>7</sup> Colgudeed guiraa reyärsia' ni yu' lastootu lo Jesucrist te guscuedxini xcäriejntu sa'csi laani sanälajzni la'tu.

<sup>8</sup> Colğusanij xcäriejntu, colğusun sa'csi rdxe'ch beñdxab lojtu, cansaxhiga'tzni si'c te beedz nialajz, caguiliñi chu guxhiñni.

<sup>9</sup> Colğsudzu'tz nez lojni, guideb lastootu colçchalilajz xtidx Dios, sa'csi anajntu sigajcza cayunnäjni guiraa rebetznu ni nabajñ lo guedxliujre.

<sup>10</sup> Che agudejdtu trabajw tiop-choñ dxej, Dios nani rajp guiraa yälřracnäj, nani gurejdx la'tu te näjza la'tu xca'tu xcälřdimbicha'ni xcuent lagajc Jesucrist, lagajc laani sunsa'cni la'tu, bejn ni rsiudzu'tz lo xtiidxni, bejn ni nadip lajzni, bejn ni di guidxejb.

<sup>11</sup> Laani rajpni yälřrnibeduxh par tejpas, guiliä'pnu xpala'nni par tejpas. Sugacni si'c.

<sup>12</sup> Siädnä Silvan guiijtze lojtu. Runä xhigab najcni te bejn nani huililazsa'c xtidx Dios. Abacuaä bale'si diidxe lojtu te gulidxä la'tu, te guiniliä lojtu dee najc xcälřracnäjpac Dios. Colğsudzu'tz xcuent yälřracnäjre.

<sup>13</sup> REXPEJN DIOS NI RE' LO GUEDX BABILONIA RUXHAŁ XTIXTIOS LOJTU SA'CSI GULE DIOS LA'TU SIGAJC GULENI LAARENI. MARCW, NI NAJC SI'C XI'NĀ, RUXHAŁZA XTIXTIOS LOJTU.

<sup>14</sup> COLGUINII "XCHAN" LO TEJGA SA'TU RO'C.

RNIABĀ LO DIOS GUSCUECDXINI LASTOO GUIRAATU NI RILILAJZ XTIDX CRIST.

## Guijtz Ni Rojp Ni Bacuaa Pedr

### *Pedr rucuaa te guijtz loj reni ahuililajz*

<sup>1</sup> Narä nacä Simón Pedr, ni rujn xtzun Jesucrist, te apost xtenni. Rucuaä guijtzre lojtu nani rililajz xtidx Dios sigajc ni rililajznu, sa'csi bahuui Dios loonu si'c beñnaya xcuent Xtiosnu Jesucrist nani baslaa nuurnu lo dojl.

<sup>2</sup> Rniabä lo Dios gacnäduxhruni la'tu, guscuecdxiruni lastootu, te gacheerutu xtidx Dios näjza Dad Jesucrist.

### *Xho riäjl gac rexpejn Crist*

<sup>3</sup> Sa'csi xcälriñabee Dios baniidx guira'ti ni rquiinnu te guibañsa'cnu, te gacnu beñnaya nez lojni, xcuent rililajzpac xtiidxni ni nansa'cnu xcuent Jesucrist nani gurejdx nuure, nani gule nuure te xca'zanu xcälrdimbicha'ni, näjza guiraa xcälñansa'cni.

<sup>4</sup> Lagajc xcuent redee baniidxni rextidxliini, rextidxsacduxhni. Palga chalilajznu xtiidxni, sajcnu xpejnni, sajcnu beñsa'c si'c najcni sa'csi abiriinu loj redzunguidx ni chaglaz rujn rebejn ni ruxhin guedxliujre.

<sup>5</sup> Ni'cni nanab gacheenu xho nabanu lo guedxliujre. Siroobru xcälrililajztu sacnäjni la'tu te guibañsa'cnu lo Dios; luxh sa'csi nabañsa'ctu, siroobru xcälñajntu xcuent dzunsa'c näjza dzunguidx.

<sup>6</sup> Luxh palga guroob xcälñajntu xcuent dzunsa'c näjza dzunguidx saj guinibeetu tiejxhtu te na'c guntu dzunguidx. Che guinibeetu tiejxhtu, sibeñi lajztu. Che arajptu yälrbexilajz, sajctu beñsa'c, beñdxan.

<sup>7</sup> Che anajctu beñsa'c, beñdxan, sinälajztu resa'tu; che asanälajztu sa'tu, arajptu yälñanälajz sa'tu xten Jesucrist.

<sup>8</sup> Palga la'tu rusoobtu guiraa rediidxre, luxh chanuutis caroobreni neñ lastootu, ditu guibañxlia'; sujnpactu xtzun Dios, luxh rediidxre sacnäjrutu gumbeetu Dad Jesucrist.

<sup>9</sup> Sa'csi renani di ga'p rediidxre, najcni si'c te lotiä'p ni di fii, o te ni di gacdi fii zijt, ni'cni abiälajzni xho basia Dios rextojlni nani bejnni galoo.

<sup>10</sup> Ni'cni rniä lojtu rebetzä, colsejs, colguisieed xtidx Dios te gacheepactu, guluilojzatu lo bejn xho gurejdx, xho gule Dios la'tu, sa'csi laj ni chanuu gucuadiajgtu rediidxga, dipactu gunijt lo Dios.

<sup>11</sup> Palga guibajntu si'c lo guedxliujre, siu'pactu xhaguibaa cadro rñabee Dad Jesucrist par tejpas.

<sup>12</sup> Ni'cni anasuga'ä te gusnaä lajztu xcuent rediidxre, mase anajntureni, mase risutzu'tztu yälrililajz xten didxlii ni yu' neñ lastootu.

<sup>13</sup> Narä runä xhigab laaca runä che rusnaä lajztu, te gusnibä la'tu, te gusnaä lajztu. Si'cza gunä guideb ni nabañä lo guedxliujre.

<sup>14</sup> Ananä asiäddzungajxh dxej ni xca' Dios narä, sa'csi abaluu Dad Jesucrist ni'c loä.

<sup>15</sup> Ni'cni cayunduxhä dzuun naj, te che guiquinni sinaj lajztu xtidxä che agu'tä.

### *Renani bahuui loj yälñasa'c xten Crist*

<sup>16</sup> Che basule'nu lojtu xcälriñabee näj xcälrdimbicha' Dad Jesucrist, xcuent ni guibisacpacni, dinu niniitisni, dizanu nusguee la'tu, sa'csi abahuiloonu xcälrdimbicha'ni.



17 Sa'csi che badeed Dios xtdnu yäl'rnibee, yäl'rdimbicha' lojni, dxejc biejn diajgnu gunii Dios, birii xse'ni neñ te za ni gurej xhaguibaa, räjpni: "Dee najc xi'nä ni sanälazä, rbanälazduxhäni."

18 Lagajc nuure biejn diajgnu xse' Dios che guniini xhaguibaali che guyunäjnu Jesucrist lo dajn ni najc dxan.

19 Ni'cni naj guliiru rediidx ni gunii reprofte't. Ni'cni sujntu laaca palga gusobdiajglu rediidxga, sa'csi najcreni si'c te bajl ni rusanij te lajt ni nacäy, susanijreni xcäriejntu dxejli ni jääd bajl xhaguibaa. Dxejc lagajc laani susanij lastoonu.

20 Niluxh ganiddoo nanab gacheetu dee: nicla tej bejn sajc guinii laatisni sajc guinii xhi säloj xtidx Dios,

21 sa'csi nicla tej diidx ni bacuaa reprofte't dini gac diidx ni biajbtis yejcreni. Guiraliireni bacuaareni ganaxtis diidx ni badeed Xpirt Dxan Dios lojreni gucuaareni.

## 2

### *Rebejn nani rusguee (Judas 4-13)*

1 Niluxh galoo biricajza te cuaa bejn ni basguee rexpejn Israel, sigajcni siääd stee cuaa bejn ni susguee la'tu. Laareni guluixhiga'tzreni didx-xhii nani rujn rusiejxh lajz bejn xcäl'rililajzreni, sibälazreni lagajc Dad Jesucrist nani gudijx xcuent xtoj'reni. Niluxh renani rusguee, sojbj nitlojreni par tejpas.

2 Xhidajlza bejn sinaj'reni lo xcäl'nabanguijdxreni, dxejcti ni'c gun siniyaj xhidajl bejn xnezyuj xtidxlii Dios.

3 Sa'csi ruguilajzreni xmeeltu, xhixtentu, ni'c siädgusgueerene la'tu te xca'reni xhixtentu. Niluxh xcäl'guxhtisreni nani gun Dios, näjza xcäl'rnitlojreni cabäzgjajceni agujc xchero.

4 Najcni si'c sa'csi di Dios niäl'lajz rextojl rexanglni nani bejn dojl, niluxh baxhal'nireni gabijl, basäunireni neñ reguednacäy cadro cabäjzreni dxej ni gun Dios xcäl'guxhtisni.

5 Sigajcza rebejn ni guyu' galoo, banitloj Diosreni, basläa Dios xcäl'nabajn Noétis näjza sgajdzreni, sa'csi basule' Noé xtidx guluii Dios. Luxh baxhal'ni nisguiro te biädnitlojni guiraa rebejn nani di nucua diajg xtidx Dios.

6 Bejn Dios yäl'guxhtis xten guedx Sodoma näjza guedx Gomorra, base'cni reguejdxga, gujcreni cobdäj. Si'c bejn Dios te gachee bejn xho runnäj Dios rebejn ni di gusoob xtidx Dios.

7 Guläa Dios Lo't ni gujc te beñsa'c lo reguejdxga, sa'csi guc-huin lajzni xcuent relatsiaj ni bejn rebendoj'la.

8 Guideb ni guläjs Lo't, te beñsa'c, lo guejdxga, dxej, yääl guc-huin lastooni xcuent nani bahuini, nani biejn diajgni, xcuentza latsiaj ni bejnreni, sa'csi beñsa'cni.

9 Anajn Dios xho racnäjni rebeñsa'c te rbäänireni lo retrabajw ni cadej-dreni, anajnza Dios xho gusacsini rebendoj' cheni guidzujnli dxej ni gunni xcäl'guxhtisreni.

10 Guliduxhni, sujnru Dios yäl'guxhtis loj rebejn nani r'laiz gun si'ctisni r'laiz tiejxhreni, näjza renani rbälaz xcäl'rnibee Dios. Najcreni bejn ni di guidxejb, rujnreni ni riajbtis yejcreni, direni guidxejb guiniyajreni rexangl Dios ni rdimbicha'.

11 Niluxh nicla tej rexangl Dios ni rajpru yäl̄rnibee lo rebejn̄re, direni guiniyaj, cue'creni xquejreni lo Dios.

12 Luxh, rebejn̄ga najc si'c reguidxaa nani xheti xcäriejnreni, cabäjtisreni chu guiniaazreni te guetreni. Rniyajreni luxh direni gan xhini'c rniireni. Niluxh sigajc rnitloj reguidxaa, sigajcza sinitlojreni.

13 Bejn̄reni dojl̄, ni'c sinitlojreni, sidejreni yäl̄rusacsiduxh xcuent rex-tojln̄reni. Laareni rchaglajzreni guntisreni laniro rdxee. Laareni najcreni si'c te cosdxuudx o si'c te manch ni rcaj lo te ladnol, rbaali lajzreni rusgueereni la'tu la'l̄ ni cayajc lanij cayaunäjreni la'tu.

14 Digacdi fiireni loj te gunaa, li rsia' lajzreni, direni guidxajg rujnreni dojl̄, rusgueereni rebejn̄ te gunzaren dojl̄, ruluiireni lastooreni te säblajzreni meel, najcreni bejn̄ nani batzubde Dios,

15 agulälazreni nezyusa'c, abanijtreni, naj sanajlreni xnezyuj Balaam, xi'n Beor, nani huichaglajzru nani rquijx yäl̄latsiaj.

16 Niluxh gudil̄näj Diosni xcuent xtojln̄ni, bejn̄ Dios gunii te mandip si'c xse' bejn̄, te bascuääzni profe'tga, dini nusaan niujnni nani cayujnni, cayujnni si'c te bejn̄ ni rajc yejcn̄i.

17 Rebejn̄ latsiajre najc si'c te bisie cadro xheti nis, najczaren si'c rexcäjy ni sanä bej nezree nezrec che cabi' te bero. Laareni su'reni lo xcäjy par tejpas che gun Dios yäl̄guxhtis.

18 Sa'csi rniduxhreni didxro, niluxh xhet sajcdi rediidxga luxh rniireni huenduxh najc gun bejn̄ ni rlanjts tiejxhreni, con yäl̄latsiaj rusgueereni rebejn̄ nani entis birii loj reni rujn sa' dzunguijdxga.

19 Rusgueereni, rniireni rut gudxojn̄dini palga jäädnaajn̄ireni, niluxh lagajc laareni najcreni mos, sa'csi rnibee latsiajreni. Xhitis ni rnibee te bejn̄, ni'c rusäuni nen̄ latzguiib.

20 Sa'csi palga agubicaj te bejn̄ loj redzunguijdx xten guedxliuj sa'csi huililajzreni xtidx Dad Jesucrist nani rusläa rebejn̄ lo guiraa dojl̄, dxejctiru gubisacni loj xtojln̄ni, abixhidsacreni lo xtojln̄reni, nalajz najcreni si'c che gajdreni gumbee xtidx Dios.

21 Huenru direni niembee xnezyuj Dios, quela che abiembeereni nezyujga, cuälazreni didx dxan, xtidx Dios ni basule'reni lojreni.

22 Dxejcsii rsiojb diidx ni najc scree: "Rbisac te bä'cw loj xcäl̄rdzujbni. Cuch ni entis gojz richusacni lo xpajnni."

### 3

#### *Xho gac che guibisac Jesucrist*

1 Rebetzä, dee najc ni rojp gujtz ni caguxhalä lojtu; lo guiro'p gujtzre cagusnibä la'tu xcuent reyäl̄rulijdx ni gusnaj lajztu.

2 Colgusnaj lajztu rediidx ni gunii reprof'e't agujc xchero, näjza rediidx ni gunii Dad Jesucrist nani basule' reapost.

3 Ganiddoo, colgacbee dee: che asiäddzungajxh redxelult, siääd rebejn̄ ni rgubee rextidx Dios, laareni sujnreni si'ctis ni rlanj tiejxhreni.

4 Siniabdiidxreni: "¿Xhicuent gajd Jesucrist guibisac si'cni bia'n diidx? Cheni gujtli rextadgoldoonu, guira'ti sanuutis najcni si'c gujcn̄i cheni guc-cheeli guedxliujre."

5 Niluxh che rniireni si'c, rlanjpac jäällajzreni agujc xchero benchee Dios xhaguibaa xcuent xtiidxtisni, näjza guniitis Dios te si'c guc-chee guedxliuj, biriini nen̄ nis, naj tre'ni loj nisga.

<sup>6</sup> Dxejcti gunitloj guira'ti ni yu' lo guedxliujga che biajb te nisguiro, gunitlojni.

<sup>7</sup> Niluxh xhaguibaa näjza guedxliuj ni tre' naj, cayajp Diosreni xcuent xtiidxni te checreni che guidzujn dxej ni gunni yäl'guxhtis, che gunitlojni rebendojl.

<sup>8</sup> Rebetzä, na'c jiäl'lajztu, Jesucrist ruhuii tebdxexj si'c te tzugayuu ijz, rhuiizani te tzugayuu ijz si'c tebdxexj.

<sup>9</sup> Di gaclaa gusoob Dios diidx ni bia'n, si'c rujn bejn xhigab raclaani, niluxh cabecdxiru lajzni xcuent la'tu, sa'csi cabäjzni gusiejch lajztu, sa'csi di rlaizni nitloj nicla tejtü.

<sup>10</sup> Niluxh sidzujn dxej che guibisac Jesucrist lo guedxliujre si'c rdzujn te gubaan, rut gacbeedi siädni. Dxejcti sibicaj xhaguibaa, gac te bieiduxh, guira'ti sialni lo te guiboduxh, guedxliujre näjza guira'ti ni tre' lojni, guiragajcni sejcni.

<sup>11</sup> Sa'csi sinitloj guiraa redee, ni'c nanab guibanayatu lo guedxliujre, na'c guntu dojl.

<sup>12</sup> Colcuäjz dxejtis ni jiäd Dios lo guedxliuj. Dxejcti sejc xhaguibaa, sinitlojni, luxh guiralii ni yu' sialni lo guiboro.

<sup>13</sup> Niluxh abasa'n Dios diidx loonu, ni'cni cayenloonu te guibacoob, te guedxliucoob, cadre gunreni ganaxtis dzunsa'c, xhetiru dojl.

<sup>14</sup> Ni'cni rebetzä ni sanälazä, sa'csi cabääznu guiraa ni gac, colyejn huant te che guibisac Dios, sidxälni la'tu dxitis nabajntu, nabanayatu, xhetiru xtojltu.

<sup>15</sup> Colhuui xhi dzuun bejn Dad Jesucrist ni'c rajpnu yäl'ruslaa lo dojl. Sigajcza bacuaa bejtznu Pabl ni sanälajznu. Bacuaani sa'csi badeed Dios yäl'najni lojni.

<sup>16</sup> Neñ guiraa rexquijtzni bacuaani xcuent rediidxre. Yu' gaii guijtz ni bacuaani ni najc naganduxh. Luxh bejn ni guxii racbee, ni runtio'p lajzreni, reni'c ruxhiid rextiidxni, sigajc runnäjreni guiraa xtidx Dios, ni'cni sinitlojreni.

<sup>17</sup> Ni'cni rebetzä ni sanälazä, sa'csi ananxgaatu rediidxre, colnatiru didi jiajbtu ladznaa renani gusgueetu, te na'c gunijttu xcäl'rsiudzu'tztu lo xtidx Dios.

<sup>18</sup> Colgustioob xcäriejntu con yäl'racnäj näjza yäl'najni xten Dad Jesucrist nani ruslaa nuure lo dojl. Suguiliä'pnu xpala'n Dad Jesucrist, naj näjza par tejpas. Sugacni si'c.

## Guijtz Ganid Ni Bacuaa Juan

### *Xtidx Dios ni runiidx yäl nabajñ par tejpas loonu*

<sup>1</sup> Galooli che gajd Dios gun guedxliuj, agac nabajñ Jesucrist. Niluxh narä bahuiä loj Jesucrist, biejn diağä rediidx ni guniini loä, gunazä ñaani. Laani najc Diidx ni runiidx yäl nabajñ par tejpas loonu.

<sup>2</sup> Balui lojni loonu; reapost bahuiinu lojni. Ni'cni rniä lojtu, nabajñ Jesucrist par tejpas. Rniliäpac nabaññaj Jesucrist Dios. Balui Dios Jesucrist loonu.

<sup>3</sup> Caniä stehuält lojtu, bahuiinu lojni. Biejn diağnu rediidx ni guniini loonu. Xhigab xtenu najc tejtis con Dios, najza Jesucrist Xi'n Dios. Ni'cni cagusule'ä rediidxga lojtu, te tejtis xhigab jiennänu resa'nu.

<sup>4</sup> Cagucuaä rediidxre lojtu te guibalazduxhtu.

### *Dios najc Bajl*

<sup>5</sup> Naj cagusule'ä rediidx nani balui Jesucrist loonu. Dios najc bajl. Guiraa redzuun ni rujñni, ganax dzunsa'cni. Xhet yäl nacäydi yu' lo Dios.

<sup>6</sup> Palga chutis tejnu naa, tejtis najc xhigabnu con Dios, niluxh riennu redzunguijdx, rniinu didx-xhii, runijtnu dinu chasanäj xtidx Dios.

<sup>7</sup> Palga nabajñnu lo bianij si'cni nabajñ Dios lo bianij, tejtis xhigab riennu con resa'nu. Dxejc rusiaza xtiejn Jesucrist Xi'n Dios lastoonu che riennu dojl.

<sup>8</sup> Palga naanu xheti xtojñnu, rusgueenu lagajc nuunu, luxh dinu ga'p xtidx Dios neñ lastoonu.

<sup>9</sup> Palga guicäjpnü lo Dios guiraa redojl ni cayennu, siäl lajzni xtojñnu, sudzucajni rextojñnu, sa'csi laaca rujñni luxh guliü najc rextiidxni.

<sup>10</sup> Palga guinuunu dinu niujñ dojl, rniinu najc Dios si'c te bejn ni rniü didx-xhii sa'csi anaj Dios yu' xtojñnu, luxh dizanu ga'p xtidx Dios neñ lastoonu.

## 2

### *Racñaj Jesucrist nuunu nez loj Dios*

<sup>1</sup> Guejbtu, resa'ä nani huililajz xtidx Dios, cagucuaä rediidxre lojtu lo guijtz te na'c guntu dojl. Niluxh palga jiennu dojl, racñaj Jesucrist nuunu, rniinu xcuentnu lo Dios, sa'csi xheti xtojñni.

<sup>2</sup> Gujt Jesucrist xcuentnu lo crujz. Gudijxni rextojñnu lo crujz. Luxh et rextojñtisnu gudijxni. Gudijxni rextojñ guiraa rebejn ni re' lo guideb guedxliuj.

<sup>3</sup> Palga rusoobnu rextidx Dios, huenliisi rluiü riembeenu Dios.

<sup>4</sup> Cheni rniü te bejn, "narä rumbeäni", niluxh dini gusoob rextiidxni, rusgueeni resabejñni. Di lajzni nilii xtidx Dios.

<sup>5</sup> Palga rusoobnu xtidx Dios, guliipac rinälaznu Dios, ni'c najñnu nabaññajñni.

<sup>6</sup> Cheni rniinu nabaññajnu Jesucrist, nanabpac guibañsa'cnu si'c gubajñ Jesucrist lo guedxliuj.

### *Rediidxcoob*

<sup>7</sup> Guejbtu resa'ä, xhet didxcoobdi ni cagucuaä lojtu. Cagucuaä lagajc diidx ni najntu galooli che huililajzlitu rextidx Dios, nalajznu rediidx nani biejn diağtu galooli.

<sup>8</sup> Niluxh najcza rediidxre didxcoob loonu, sa'csi che huililajznu rextiidxni gusloj dirunu guibaj<sub>n</sub> lo yäl<sub>n</sub>acäy. Baluii Jesucrist redidxcoobga loonu. Guliipac najc Dios si'c bajl. Dini guibaj<sub>n</sub> lo nacäy.

<sup>9</sup> Palga chutis teju nuu, "naba<sub>nä</sub> lo nianij xten Dios", niluxh rdxe'chni lo resa'ni, lo yäl<sub>n</sub>acäy yu'ni.

<sup>10</sup> Chutis teju ni rinälajz sa'ni, nabaj<sub>n</sub>ni lo bianij xten Dios, ruj<sub>n</sub>ni dzunsa'c, dizani guichag<sub>lajz</sub> gunni dojl.

<sup>11</sup> Niluxh palga rdxe'chnu lo resa'nu, nabaj<sub>n</sub>nu lo yäl<sub>n</sub>acäy sa'csi riennu dojl, sasaanu lo yäl<sub>n</sub>acäy. Nicla gacbeenu canejz chonnu, sa'csi ruscäy bendxab balojnu.

<sup>12</sup> Cagucuaä rediidxre lo guejbtu, resa'ä ni rililajz, sa'csi abadzucaj Dios rextoj<sub>nu</sub>, sa'csi lo cruz gudi<sub>x</sub> Jesucrist rextoj<sub>nu</sub>.

<sup>13</sup> Cagucuaä rediidxre lo guejbtu, redad bengool, sa'csi huililajz<sub>tu</sub> rextid<sub>x</sub> Jesucrist, najntu laani nabaj<sub>n</sub>ni galooli näjza par tejas. Cagucuaä rediidxre lojt<sub>u</sub>, rebi'n sa'csi dirutu jiu xtid<sub>x</sub> bendxab.

Cagucuaä rediidxre lojt<sub>u</sub> rexi'nä, sa'csi rumbeetu Dios.

<sup>14</sup> Abacuaä rediidxre lo guejbtu, redad bengool, sa'csi numbeetu Jesucrist nani nabaj<sub>n</sub> galooli näjza par tejas. Abacuaä rediidxre lojt<sub>u</sub> rebi'n, sa'csi sudzu'tz<sub>tu</sub>, sa'csi yuchee xtid<sub>x</sub> Dios nen lastootu, dirutu jiu xtid<sub>x</sub> bendxab.

<sup>15</sup> Na'c guichag<sub>lajz</sub>tu guntu renani ruj<sub>n</sub> rebej<sub>n</sub> nani di chalilajz xtid<sub>x</sub> Jesucrist; na'cza chanälaz<sub>teju</sub> xhixtentu ni rajptu lo guedxliuj. Palga rinälaz<sub>teju</sub> rexhixt<sub>enni</sub> ni ra'pnu lo guedxliuj, dxej<sub>c</sub> dinu chanälajz Dios.

<sup>16</sup> Reben guedxliuj ni di chalilajz xtid<sub>x</sub> Dios rchag<sub>lajz</sub>reni ruj<sub>n</sub>reni redzunguijdxre: ruj<sub>n</sub>reni dzunguijdx nani rchag<sub>lajz</sub> tiejxh<sub>reni</sub>; ruj<sub>n</sub>reni dzunguijdx nani rchag<sub>lajz</sub> baloj<sub>reni</sub>, näjza lagajc laareni rliä'preni xpala'n<sub>reni</sub>. Niluxh guiraa reni'c najc dzun guedxliuj, xhet dzuundi ni gunibee Dios gac.

<sup>17</sup> Luxh rnitlojpac guedxliuj. Sinitlojza guiraa reni rchag<sub>lajz</sub> ruj<sub>n</sub> reben guedxliuj ni di chalilajz xtid<sub>x</sub> Dios. Niluxh palga gusoobtisnu xtid<sub>x</sub> X<sub>tadnu</sub> Dios, sibannäjn<sub>uni</sub> par tejas.

### *Didx guli näjza didx-xhi*

<sup>18</sup> Guejbtu resa'ä ni rililajz xtid<sub>x</sub> Dios, asiäddzungaj<sub>xh</sub> dxej che gululoj niguii nani rdxe'ch loj Jesucrist. Abiej<sub>n</sub> diajgtu siääd niguiiga. Naj yu' xhidaj<sub>l</sub> reniguii nani rdxechlajz lo Crist. Ni'c alaracheenu asiäddzungaj<sub>xh</sub> dxejga che gululoj niguiiga.

<sup>19</sup> Yu' xhidaj<sub>l</sub> rebej<sub>n</sub> ni rdxechlajz lo Jesucrist. Biriireni lo resa'nu. Direni nililajz xtid<sub>x</sub> Jesucrist. Palga nililajz<sub>reni</sub> xtid<sub>x</sub> Jesucrist si'c huililaaznu nuure xtid<sub>x</sub> Jesucrist, direni niri lo resa'nu. Biriireni lo resa'nu, ni'c racbeenu direni gac xpej<sub>n</sub> Jesucrist.

<sup>20</sup> Gule Dios Jesucrist. Jesucristre baniid<sub>x</sub> Sprit Dxan xten Dios loonu te gacbeenu xhini'c najc redidxliipac.

<sup>21</sup> Et sa'csi ditu gan xhi diid<sub>x</sub> najc didx guli bacuaä rediidxga lojt<sub>u</sub>. Sa'csi najntu xhi diid<sub>x</sub> najc didx guliipac, ni'c bacuaäni, te gutij<sub>p</sub> lajz<sub>tu</sub>. Palga rucuaä rediid<sub>x</sub> ni najc guli, anajntu dina gusgueä la'tu.

<sup>22</sup> Chutis ni naa di Jesús gac Crist Xi'n Dios, xhet guliidi rextiidxni. Renani rni di Jesucrist gac Xi'n Dios rdxechlajz<sub>ni</sub> lo Jesucrist. Di reni'c nililajz xtid<sub>x</sub> Dios.

<sup>23</sup> Chutis reni rni di Jesucrist gac Xi'n Dios, di reni'c gumbee x<sub>tadnu</sub> Dios. Niluxh renani rni Jesucrist najc Xi'n Dios, huililajz<sub>reni</sub> xtid<sub>x</sub> Dios, numbeezareni Dios.

<sup>24</sup> Colgusoob rediid<sub>x</sub> ni biejn diajgtu galooli che huililajz<sub>tu</sub> rextid<sub>x</sub> Dios. Palga rusoobtu rediidxga, naba<sub>nä</sub>j<sub>tu</sub> Dios näj xi'n<sub>ni</sub> Jesucrist.

<sup>25</sup> Abia'n Jesucrist diidx guniidxni yäl<sub>n</sub>abanc<sub>o</sub>ob loonu. Naj ara'pnu yäl<sub>n</sub>abaj<sub>n</sub>re, ra'pnuni par tejpas.

<sup>26</sup> Abacuaä rediidxre lojtu xcuent rebejn ni r<sub>l</sub>ajz chalilajztu rediidx ni xhet guliidi.

<sup>27</sup> Baxhal Jesucrist Sprit D<sub>x</sub>an xten Dios loonu. Rbäjz<sub>n</sub>i ne<sub>n</sub> lastoonu. Dinu guiqui<sub>n</sub> chu stee bejn guluii loonu xhi diidx najc guli<sub>i</sub>, sa'csi lagajc Sprit D<sub>x</sub>an xten Dios rulu<sub>i</sub> xtiid<sub>x</sub>ni loonu. Naj rulu<sub>i</sub>ni la'tu guiraa ni najc guli<sub>i</sub>, dini gusguee la'tu. Colguiba<sub>n</sub>näj Jesucrist; colgusoob xtid<sub>x</sub> Jesucrist si'cni rulu<sub>i</sub> Sprit D<sub>x</sub>an xten Dios lojtu.

<sup>28</sup> Naj guejbtu resa'ä, colguiba<sub>n</sub>näj Jesucrist, te che jiädsacni lo guedxliuj sisiutzu'tznu nejz lojni, dinu guitujy nejz lojni.

<sup>29</sup> Anajntu laaca najc Dios. Anajntu renani rusoob xtid<sub>x</sub> Dios sasanäjreni Dios, ni'c najcreni xi'n Dios.

### 3

#### *Rexi'n Dios*

<sup>1</sup> Bahuii xho huinä<sub>l</sub>azduxh Dios nuure, ni'c anaj Dios nuure najcnu rexi'n<sub>n</sub>i. Luxh guli<sub>i</sub> najcnu rexi'n Dios. Rebe<sub>n</sub> guedxliuj ni di chalilajz xtid<sub>x</sub> Dios, direni gumbee nuure, rexi'n Dios, sa'csi dizareni gumbee Dios ni najc x<sub>t</sub>adnu.

<sup>2</sup> Resa'ä ni rinälazä, nuunu riolilaaznu rextid<sub>x</sub> Dios, ni'cni najcnu rexi'n Dios. Dinu gacbee xho gacnu niluxh che guibisac Jesucrist loonu, suhuiinu lojni si'c ni najcni, sa'csi suchaani nuure te gacnu si'c ni najcni laani.

<sup>3</sup> Che r<sub>n</sub>aj laaznu sidzuj<sub>n</sub> dxej gac tejanu si'c ni najc Jesucrist, dxej rba<sub>n</sub>sa'cnu si'c ni gubaj<sub>n</sub> Jesucrist lo guedxliuj.

<sup>4</sup> Di rebejn ni rujn dojl gusoob leii xten Dios. Che riennu dojl, runijtnu lo leii xten Dios.

<sup>5</sup> Racbeenu Jesucrist biääd lo guedxliuj, guj<sub>c</sub>ni niguii te guj badzucajni rextoj<sub>l</sub>nu. Laani dini niuj<sub>n</sub> dojl.

<sup>6</sup> Che sasanäjnu Jesucrist, dinu gac be<sub>n</sub>guijdx. Di bejn nani rujn dojl chalilajz xtid<sub>x</sub> Jesucrist, dizani gumbeeni.

<sup>7</sup> Resa'ä, na'c chalilajztu didx-xhii ni r<sub>n</sub>ii bejn lojtu, che r<sub>n</sub>iireni cayujntu dojl. Rebejn ni rujn laaca, najczareni si'c najc Jesucrist.

<sup>8</sup> Rebejn nani rujn dojl najc xi'n be<sub>n</sub>dxab. Galodooli rujn be<sub>n</sub>dxab dojl. Ni'cni biääd Jesucrist Xi'n Dios lo guedxliuj te gudzucajni redojl nani rujn bejn xcuent be<sub>n</sub>dxab.

<sup>9</sup> Rebejn nani najc xi'n Dios direni guichag<sub>l</sub>ajz gunreni dojl, sa'csi abachaa Dios xca<sub>r</sub>iejnreni, sa'csi rbäjz Dios ne<sub>n</sub> lastooreni. Direni gun dojl, sa'csi najcreni xi'n Dios.

<sup>10</sup> Si'c riembeenu rebejn ni najc xi'n Dios, näjza rebejn ni najc rexi'n be<sub>n</sub>dxab. Chutis tejni di gun dzunsa'c, ni dini chanälajz resa'reni, dini gac xi'n Dios.

#### *Nungäj<sub>l</sub> chanälajznu resa'nu*

<sup>11</sup> Lagajc rediidxre biejn diajgtu galooli che huililajztu rextid<sub>x</sub> Dios: colchanälajz resa'tu.

<sup>12</sup> Xhet si'c di toCain nani guj xi'n be<sub>n</sub>dxab. Bejn<sub>n</sub>i dojl, bagu'tni bejt<sub>n</sub>i. ¿Xhicuent bagu'tnini? Bagu'tnini sa'csi bejn bejt<sub>n</sub>i ganax dzunsa'c, luxh toCain bejn dzunguijdx.

<sup>13</sup> Na'c guidxelojtu che guidxech<sub>l</sub>ajz rebejn lojtu.

14 Racheenu dirunu sa lo xnezyuj yälgujt, sa'csi dinu guidxechlajz loj resa'nu. Rajpnu yäl**inabajn** par tejpas sa'csi rionälaaznu resa'nu. Chutis tejni di chanälajz resa'reni canzaj lo xnezyuj yälgujt, sa'csi rdxechlajzreni lo sa'reni.

15 Chutis ni rdxechlajz lo resa'ni, najcni nejz lo Dios si'c ni abagu'tni te bejn. Najnu che rugu't te niguii te bejn dini ga'p yäl**inabajn** par tejpas.

16 Racheenu rinälajz Jesucrist nuunu, sa'csi gujtñi lacuaa nuunu lo cruzj. Sigajcza nungäj**l** gacnäjnü resa'nu, mase guetnu lacuaa guetreni.

17 Chutis tejnu ni rajp xhidaj**l** xhixtenni, luxh dini gacnä**j** nicla tejnu ni xhet rajpdi, di bejn**ga** chanälajz Dios.

18 Guejbtu resa'ä, na'c chanälaznu resa'nu con rextiidxtisnu, na'c guinitisnu rionälaznu resa'nu. Palga rionälazpacnu resa'nu, sacnä**j**nu resa'nu.

### *Sisiutz'tznu nez loj Dios*

19-20 Palga rionälaznu resa'nu, nancheenu najcnu rexi'n Dios. Palga j**aj**bnu xhigab dinu gac be**nsa'**c, dizanu gac xi'n Dios, nanab jiunu rextiidxtis Dios, na'c jiunu rexhigabnu. Dios najn rexhigabga. Niluxh Dios anaj: renani rinälaz resa'reni, reni'c najc rexi'nni.

21 Rniä lo guejbtu nani rinälazä, palga lagajc lastoonu rni**i** loonu, “cagu**sooblu** xtid**x** Dios”, sisiutijp lastoonu che rbedx-rniabnu lo Dios.

22 Xhitis ni rniabnu lo Dios, runiidxni loonu sa'csi rusoobnu xtiid**x**ni, riennu redzuun ni ruspaa lajz Dios.

23 Dee najc rediid**x** ni gunibee Dios gusoobnu: chalilaznu xtid**x** Dios, diid**x** ni rni**i** xho gujt Jesucrist lacuaa nuunu, chonälazzanu resa'nu si'cni gunibee Dios.

24 Palga rusoobnu guiraa nani gunibeeni, nabannä**j**nuni, si'cza nabannä**j**ni nuunu. Nancheenu nabannä**j** Dios nuunu, sa'csi baniid**x**ni Sprit Dxan xt**enni** te cuääz ne**n** lastoonu.

## 4

### *Scree gacheenu xhi didx najc guliipac*

1 Guejbtu renani rinälazä, na'c chalilajztu rextid**x** chutis bejn nani naa, “rniä rextid**x** Dios lojt**u**”. Ganiddoo colgula'tz rextiid**x**ni te gacheetu don chu xtid**x** canii**ni**, sa'csi xhidaj**l** bejn sinii lojt**u**, “nuunu rniinu rextid**x** Dios”, niluxh canii**sireni** si'c.

2 Scree gacheenu xhi diid**x** najc guliipac. Guiraa rebejn nani guini**i** “Jesucrist, Xi'n Dios, ni biääd lo guedxliuj si'c niguii”, reni'c cayacnä**j** Sprit Dxan xten Dios, reni'c canii xtid**x** Dios.

3 Guiraa rebejn nani di guini**i** biääd Jesucrist Xi'n Dios si'c niguii, xhet xtid**x** Diosdi rniireni. Reni'c rdxe'chreni loj Jesucrist. Abiejn diajgtu siääd te niguii ni rdxechduxh loj Jesucrist, luxh naj abidzuj**n** rextzuun niguii**ga** lo guedxliuj.

4 Guejbtu resa'ä, najcnu rexi'n Dios. Naj abiennu gaan lo rebejn ni rdxe'ch lo Jesucrist sa'csi Dios ni rbä**j**z ne**n** lastoonu abej**nni** gaan lo be**nd**xab ni nabaj**n** lo guedxliuj.

5 Rebejn ni rni**i** xhet guliidi xtid**x** Dios, rililajztisreni rediid**x** ni najc xten guedxliuj. Xhidalduxh rebejn ni re' lo guedxliuj riu rediid**x** ni xhet guliidi.

6 Nuunu najcnu xi'n Dios. Rebejn nani riemb**ee** Dios riu xtiid**x**nu. Rebejn nani di gac xi'n Dios direni jiu xtiid**x**nu. Scree gacheenu chu rebejn rni**i** didxliipac. Scree gacheezanu chu rebejn rni**i** diid**x** ni xhet guliidi.

### *Rinälajz Dios rebejn*

<sup>7</sup> Rniä lo guejbtu nani rinälazä, nanab chanälaaznu resa'nu, renani huililajz xtidx Dios, sa'csi Dios racnä j nuunu te chanälaaznu resa'nu. Palga rinälaaznu resa'nu, dxejc najcnu rexi'n Dios, luxh guli riembeenu Dios.

<sup>8</sup> Palga chutis tejnu di chanälajz resa'ni, dizani gumbee Dios, sa'csi lagajc Dios racnä j chanälaaznu Dios, racnä jzani chanälaaznu resa'nu.

<sup>9</sup> Abasule' Dios loonu lacti rinälajzni nuunu. Yu' tejtis Xi'n Dios. Abaxhałni Xi'n ni lo guedxliuj te gudijxni rextojłnu lo cruzj te si'c guibaññajnumi par tejpas.

<sup>10</sup> Si'c racbeenu rinälajzpac Dios nuunu. Galoo dinu ninälajz Dios. Niluxh Dios huinälajz nuunu, ni'c baxhałni Xi'n ni lo guedxliuj te gudijxni xtojłnu lo cruzj.

<sup>11</sup> Rniä lo guejbtu nani rinälazä, si'cni rinälajz Dios nuunu, sigajcza rrajzni chanälaaznu resa'nu.

<sup>12</sup> Nicla tej bejn gajd fii lo Dios. Niluxh palga chanälaaznu resa'nu, Dios nabajn neñ lastoonu, dxejc guli rinälaazpacnu Dios.

<sup>13</sup> Nancheenu nabaññajnu Dios, sigajcza nabaññajpac Dios nuunu, sa'csi abaxhałni Sprit Dxañ xteni cuääz neñ lastoonu.

<sup>14</sup> Narä näjza reapost abahuinu lo Jesucrist. Ciani lojtu abaxhał Xtdnu Dios Xi'n ni lo guedxliuj te guslaani rebejn lo xtojłreni.

<sup>15</sup> Chutis tejnu ni rniä "Jesucrist najc Xi'n Dios", nabaññajni Dios, nabaññajza Dios bejnga.

<sup>16</sup> Racheenu, rililaazzanu rinälajz Dios nuure. Guliduxh rinälajz Dios nuunu. Palga rinälaaznu Dios, nabaññajnu Dios, nabaññajza Dios nuunu.

<sup>17</sup> Naj sanälaaznu Dios si'cni rrajzni luxh palga chanälaaznumi guidebtis ni guibajnumi, dinu guidxejb che guidzujn dxej ni gun Jesucrist yälguxtis lo guedxliuj. Dinu guidxejb sa'csi guideb nabajnumi lo guedxliuj, nabaññajnu Dios si'c nabaññaj Jesucrist Dios.

<sup>18</sup> Palga rinälazsa'cnu Dios, dinu guidxejb, palga rinälajzpacnu di gacdi guidxeebnu. Palga guliipacnu rinälaaznu Dios, xhetliidi rdxejbdinu. Nani rdxejb, rdejdi trabajw, gajd bejnga chanälazsa'c Dios.

<sup>19</sup> Rinälaaznu Dios sa'csi ganiddoo Dios huinälajz nuunu.

<sup>20</sup> Palga chutis tejnu naa "rinälazä Dios" niluxh rdxechlajzni lo resa'nu, xhet guliidi xtiidxni. Palga dinu chanälajz sa'nu nani cahuiinu, xhixh sajç chanälaazzanu Dios nani gajdnu fii.

<sup>21</sup> Agunibee Dios, nani rinälajz Dios chanälajzni resa'ni sigajc rinälajzni Dios.

## 5

### *Riennu gaan lo guiraa redolgujdx lo guedxliuj*

<sup>1</sup> Chutis ni rililajz Jesús najc Crist nani baxhał Dios, ni'c najc Xi'n Dios. Palga rinälaaznu Xtdnu Dios, sigajcza sinälaaznu renani najc Xi'n Dios.

<sup>2</sup> Palga rinälaaznu Dios, palga rusoobzanu xtiidxni, dxejc najnumi rinälaaznu resa'nu nani najc Xi'n Dios.

<sup>3</sup> Ni'cni, palga rinälaaznu Dios, susoobnu xtiidxni. Luxh dinu guichalo nagajn gusoobnu xtiidxni.

<sup>4</sup> Chutis tejnu ni najc xi'n Dios, riennu gaan lo redojl ni re' lo guedxliuj. Riennu gaan lo redojl lo guedxliujre sa'csi huililaaznu xtidx Jesucrist.

<sup>5</sup> ¿Chuni'c cayujn gaan lo redojl lo guedxliuj, ä? Renani rililajz najc Jesucrist, Xi'n Dios, reni'c rujn gaan lo redojl lo guedxliujre.

### *Rediidx ni balui Dios loonu xcuent Jesucrist*



<sup>6</sup> Biääd Jesucrist lo guedxliujre. Birobnis Jesucrist, baxhe'zani xtiejnni lo cruzj. Xhet ganaxdi te guirobnisni biäädni, näjza te guxhe'ni xtiejnni lo cruzj che biäädni. Sprit Dxi xten Dios canii rediidxre. Guliipac rextiidxni.

<sup>7</sup> Yu' chon ni baluiloj xhaguibaa. Rniireni xcuent Jesucrist tejsi diidx. Tejni najc Dios, steeni najc nani laa Diidx, steeni najc Sprit Dxi xten Dios.

<sup>8</sup> Sigajcza yu' chon ni baluiloj lo guedxliuj. Rniireni xcuent Jesucrist tejsi diidx. Tejni najc Sprit Dxi xten Dios. Steeni najc che birobnis Jesucrist, steeni najc che baxhe' Jesucrist xtiejnni lo cruzj che gujtni.

<sup>9</sup> Palga rililaaznu xtidx rebejn ni rbäjz lo guedxliuj, nungäj chhalilaazrunu xtidx Dios. Rediidx nani rnii jion reni baluiloj tejsi diidx najcreni con nani rnii Dios xcuent Jesucrist Xi'n Dios.

<sup>10</sup> Palga rililaaznu xtidx Jesucrist Xi'n Dios, rnii Dios xcuent Jesucrist nen lastoonu. Chutis tejni ni di chhalilajz xtidx Dios, rujnni najc Dios si'c tej ni rusguee sa'csi dini chhalilajz xtidx Dios ni rniini xcuent Jesucrist.

<sup>11</sup> Scree najc rediidx ni rnii Dios. Abaniidx Dios loonu yäl'nabajn par tejpas. Yäl'nabajnga biädnä Xi'nni, Jesucrist.

<sup>12</sup> Palga nabañnäjnu Xi'nni, rajpnu yäl'nabajn par tejpas. Palga dinu guibañnäj Xi'nni, dinu ga'p yäl'nabajn par tejpas.

### *Xtixtios con diidx ni rulijdx*

<sup>13</sup> Abacuaä rediidxre lojtu ni rililajz rextidx Jesucrist te gacheepactu rajptu yäl'nabajn par tejpas.

<sup>14</sup> Ni'cni dinu guidxejb che guiniinu lo Dios, sa'csi riu Dios xtiidxnu palga tejsi najc xhigabnu con Dios che rniabnu lojni.

<sup>15</sup> Luxh palga najnnu riu Dios nuunu che rniinu lojni, sigajcza najnnu suniidxni nani rniabnu lojni.

<sup>16</sup> Palga tejni fii tej resa'nu cayujn dojl, niluxh riuruni xtidx Dios, nuunu rajpnu por guiniabnu lo Dios xcuent laani, te gudeed Dios yäl'nabajn lojni. Niluxh yu' te dojroduxh. Chutis te bejn ni gun dojlga, di Dios gudeed lo bejnga yäl'nabajn par tejpas. Dizana guiniä guiniabtu lo Dios xcuent bejn ni rujn dojroga.

<sup>17</sup> Guiraa redzunguidx nani rujn rebejn najc dojl. Niluxh yu' redojl nani di gun gunijt bejn lo Dios par tejpas palga jiu bejn xtidx Dios.

<sup>18</sup> Racbeenu guiraanu nani najc xi'n Dios di rlaaznu jienu dojl. Racnäj Jesucrist nuunu te di bendxab gun gaan nuunu, te dizanu gusoob xtidx bendxab.

<sup>19</sup> Nancheenu nuure najcnu xi'n Dios, niluxh guiraa rebejn nani riutis rextzun guedxliuj cagusoobreni xtidx bendxab.

<sup>20</sup> Najnnu biääd Jesucrist Xi'n Dios lo guedxliuj. Baluini nuunu rextidx Dios te jiembeenu Dios, nani najcpac Dios guli. Nabañnäjnu Dios ni najc guli, sa'csi nabañnäjnu Jesucrist. Laani najc Dios ni najc guli. Caguniidxni loonu yäl'nabajn par tejpas.

<sup>21</sup> Resa'ä, na'c guzuxhijbtu lo rebanäjb ni xhet guliidi. Sugacni si'c.

## Guijtz Ni Rojp Ni Bacuaa Juan

### *Diidx gullii nájza yálrinálaaznu resa'nu*

<sup>1</sup> Narä nacä bengool. Cagucuaä guijtzre lojlu nane' nani agule Dios, nájza loj rexi'nlu. Rinälazäpac la'tu luxh xhet xtebädi; nájza guiraa reni rililajz xtidx Dios sanälajztu.

<sup>2</sup> Nuure rinálaaznu la'tu sa'csi yuchee nen lastoonu rediidx nani najc gullii, luxh dilajznu jiäl rediidxre.

<sup>3</sup> Xtadnu Dios, nájza Jesucrist Xi'nni, gacnäy nuunu, jiareni nuunu, guscuecdxi lajznu con xcäl'najn didxlii nájza yálrinälajz.

<sup>4</sup> Bibalazduxhä che gucbeä yu' rexi'nlu ni rusoob xtidx Dios si'c gunibee Dios loonu gusoobnuni.

<sup>5</sup> Nane' ni gule Dios, diidx nani rniabä gusoob guejblu naj dini gac didx-coob, niluxh lagajc diidx ni biejn diaagnu galooli, che huililaazlinu xtidx Jesucrist. Lagajc dee najc nani gunibee Dios loonu: nungäjlpac chanálaaznu resa'nu.

<sup>6</sup> Sinálaaznu resa'nu palga cagusoobnu xtidx Dios. Dee najc xtidx Dios ni biejn diaagnu galooli, che huililaazlinu xtidx Jesucrist: chanálaaznu resa'nu.

### *Rebejn ni rnii garenca diidx ni xhet guliidi*

<sup>7</sup> Balti bejn birii loonu, naj cagusgueereni xhidajl bejn ni re' lo guedxliuj. Caniireni di Jesucrist ni ajc niguii che biäädni lo guedxliuj. Sa' bejnre najc benrusguee. Sa' bejnre rdxe'chreni loj Jesucrist.

<sup>8</sup> Colga'p la'tu te na'c chalilajztu xtiidxreni, didi xlia'si biennu dzuun ro'c, te xca'tu guiraa ni guniidx Dios lojtu.

<sup>9</sup> Chutis bejn ni rrajz gugu'ch xtiidxpacni lo xtidx Jesucrist, di bejnğa gumbee Dios. Niluxh chutis bejn ni riu xtidx Jesucrist, rumbeeni Dios, rumbeezani Jesucrist Xi'n Dios.

<sup>10</sup> Palga jiääd te bejn rolijztu ni di chasanäj xtidx Jesucrist, na'c xcäjbtu jiu'ni rolijztu, na'cza guiniitu lojni, "Xchan. Biu'."

<sup>11</sup> Sa'csi chutis bejn ni guinii "xchan" loj te bejn ni di chasanäj xtidx Jesucrist, cayacnäzani redzunguijdx ni rujn bejnğa.

### *Rudeedni xtixtios*

<sup>12</sup> Xhidalduxhru diidx rlazä guiniä lojtu, niluxh di rlazä gucuaäreni lo guiijtz. Cabäzä jiädhuiä lojtu ro'c te guiniä rediidxre lojactu, te guibaalajztu.

<sup>13</sup> Rexi'n bäjllu, nani aguleza Dios, ruxhal xtixtios lojlu. Ni'ctis najc ni rucuaä lojtu. Sugacni si'c.

## Guijtz Ni Riojn Ni Bacuaa Juan

### *Cagucuaani didxsa'c lo Gayo*

<sup>1</sup> Narä nacä te bengool. Caguxhalä guijtzre lojlu, dad Gayo. Rinälazduxhälu sa'csi huililajzlu rextidx Dios.

<sup>2</sup> Sanälazälu, nanä laaca yu' lastoolu loj Dios. Naj rniabä lo Dios gacnäjni luj, guniidxzani yäl'nadaanlu.

<sup>3</sup> Bibalazduxhä che gubi' gaii resa'nu, guniliireni löä xho huililajzlu xtidx Jesucrist, xho basoobzalu xtidx Jesucrist.

<sup>4</sup> Xheti stee diidx ni ruspaa lazä si'c rbaa lazä che racbeä rusoob resa'nu redidxlii xten Jesucrist.

<sup>5</sup> Dad Gayo, laaca cayujnlu che racnäjlu renani rililajz xtidx Jesucrist, mase dilu gumbeereni che riäädreni lojlu.

<sup>6</sup> Aräjpreni lo resa'nu ni rdxagsa' ree xho huinälajzlureni näjza xho gucnäjlureni. Laaca bejnlu gucnäjlu resa'nu, badeedlu xhi biquiiireni lo nejz che biriireni rolizjlu. Si'cza nanab jiennu lo guiraa resa'nu, nalajznu rebejn ni ruluii xtidx Dios.

<sup>7</sup> Ruluiireni xtidx Jesucrist sa'csi sanälajzreni Jesucrist. Xhet rca'direni lo rebejn ni di chalilajz xtidx Jesucrist.

<sup>8</sup> Si'cza nanab gacnäjnu rebejn ni riluii xtidx Jesucrist nen garen-garen guejdx, te si'c jiennänu xtzuun Dios guiraa renani ruluii xtidx Dios.

### *Di Diótfrefes niujn redzunsä'c*

<sup>9</sup> Abaxhalä te guijtz lo rexpejn Jesucrist ro'c. Niluxh Diótfrefes rlajz guinibeeni lo resa'nu ro'c. Dini jju xtidxä.

<sup>10</sup> Ni'cni che guidzünä ro'c, narä siniä rediidxre lo resa'nu ro'c, che guidxaag sa'nu ro'c. Diótfrefes rniyaj narä lo resa'nu ro'c. Dizani jju resa'nu che rdzujnreni ro'c. Dizani gusaan fiitu resa'nu ni riääd ro'c, mase rlajz chu tejtü fiireni. Luxh rlajzni gudxojni guidxagnäjtü rebejn nani ruhuii resa'nu ni ruluii xtidx Jesucrist.

<sup>11</sup> Sa'ä ni rinälazä, na'c gunlu redzunguijdx, bejn redzunsä'c. Nani rujn dzunsä'c ni'c najc Xi'n Dios. Chutis tej ni rujn redzunsä'c najc xpejn Dios. Chutis tej ni rujn redzunguijdx, di ni'c gumbee Dios.

### *Rniireni didxsa'c xcuent Demetrio*

<sup>12</sup> Guiraa rebejn ganax didxsa'c rniireni xcuent Demetrio, luxh huenliisi rusoobni xtidx Jesucrist. Sigajcza narä rniä didxsa'c xcuentni. Najnlu guliipac rediidx ni rniä.

### *Rudeedni xtixtios*

<sup>13</sup> Rlazä guiniä xhidalduxhru diidx lojlu, niluxh di rlazä gucuaä rediidxga lo guijtzre.

<sup>14</sup> Runä xhigab di gaclaa jiädhuiä lojlu, dxejcti jieinu diidx.

<sup>15</sup> Gulecdxi lajzlu. Rexamigwlu ruxhal'reni xtixtios lojlu. Badeed xtixtios lo teja rexamigwä ro'c.

## Guijtz Ni Bacuaa Judas

### *Judas cagucuaa loj renani agule Dios*

<sup>1</sup> Narä nacä Judas, ni rujn xtzuum Jesucrist. Narä nacäza betz Jacob. Cagucuaä guijtze loj renani agule xtadnu Dios, renani sanälazduxhni, nani cayapcheeni par Jesucrist.

<sup>2</sup> Rniabä lo Dios, gulaslazduxhruni la'tu, guscuedxiduxhruni lastootu, gacnäjni la'tu, guniidxruni yäl'sanälajz.

### *Renani ruluii yäl'rusguee*

#### *(2 Pedro 2:1-17)*

<sup>3</sup> Rebetzä nani sanälazä, che cayunduxhä xhigab gucuaä lojtu xcuent yäl'ruslaa lo rextolnu ni rajpnu, benä xhigab riojbru gucuaä te guijtz lojtu te gulidxätu sudzu'tznu, gapdzu'tztu yäl'rilibajz ni basule'reni par tejpas loj rexpejn Dios.

<sup>4</sup> Sa'csi abiuxhiga'tz gaii bejn, renani galooli gunii Dios siädreni, niluxh sinitlojreni. Najcreni bejn ni di chalilajz xtidx Dios, najcreni bejnguidxduxh, rutzuräreni xcälracnäj Dios, rujnreni xtujy, sanäreni te yäl'nabañduudx. Rbälazzareni xpaxhuaannu nani rnibee loonu, Dad Jesucrist.

<sup>5</sup> Mase anajntu guira'ti rediidxga tejpas, rlazä gusnaä lajztu che gudej gulää Dad Jesucrist rexpejn Israel lo guedx Egipto, dxejcti bagu'tni renani di nililajz xtiidxni.

<sup>6</sup> Rexangl Dios nani di nucudiajg diidx, ni birii cadro rlazj Dios chureni, reni'c basäu Diosreni cadro nacäiboo te cabäjzreni gun Dios xcäl'guxhtisni lojreni.

<sup>7</sup> Si'c bejnni guedx Sodoma näjza Gomorra näjza reguedxbäz ni tre' gajxh ro'c, sa'csi bejnreni dojl, reniguii guyunäjreni niguii birääx, regunaa guyunäjzareni regunabirääx. Dxejc gudejdreni trabawduxh huejcreni nen guiboo par tejpas xcuent xtojlrereni, ni'c najc te yäl'rulijdx loonu.

<sup>8</sup> Rebejn ni riu' lojtu najc si'c reben galoo ni bejn dojl. Nabajjnreni si'c ni bisieedreni lo guiraa nani ruluii yäl'rnixcal, ruxhjnreni tiejxhreni, rbälazreni xcäl'rnibee Dios, rniyajzareni rexangl Dios.

<sup>9</sup> Miguejl ni rnibeeru loj rexangl Dios, che gudildiidxni bendxab yejc tiejxh toMoisés, dini niniyaj bendxab, alga räjpni: "Sugun Dad Jesucrist yäl'guxhtis lojlu."

<sup>10</sup> Niluxh rebejnnga rniyajreni nicla ganreni xhini'c rniireni. Niluxh nani racbeepac rebejnnga najc yäl'najn nani nicla niquiin nisieedreni, lala sa' nani rujnza reguidxaa, ni xheti xcäriejnni, reni'c sujn nitlojreni.

<sup>11</sup> ¡Aii! ¡Riazanureni! Sanajlreni xnezyuj Caïn, luxh te gunreni gaan meel ruxhunliren rujnreni sa' dojl ni bejn Balaam agujc xchero, näjza sa' dojl ni bejn Coré, ni gudil'näj Dios, luxh gunitlojni.

<sup>12</sup> Laareni najcni te xtuiduxh lo rexchej ni rajc guidoo, direni guidxebj gauxchenäjreni la'tu, sa'csi xque'tisreni riureni. Najcreni si'c te xcäjy ni xhet nisguij siädnäni, nani sanä bej nezree nezrec; najczareni si'c te yagbigool nani di ninejxh xcaj lojni, tio'p huält agujtreni, najcreni si'c te yajg ni abiliäädx.

<sup>13</sup> Laareni najc si'c nis ni räjs lo nisdoo, che cayajc te bidonduxh, sää, siädäni, carii xtujyreni si'c räjs nis lo nisdoo. Najcreni si'c bale' ni rtejb xhaguibaa, rijreni lo te yäl'nacäiduxh ni benchee Dios par tejpas.

14 Xcuentza redee agunixgaaza Enoc ni najc xagdodoo Adán, rájpní: “Bahuii, siádná Dios xhidalduxh xanglni

15 te gunni yálguxhtis loj guiraa bejn te gusacsíduxhni guiraa rebejn ni di gumbee Dios xcuent redolduxh ni bejnreni, xcuentza redidxnaj ni guniyaj rebendolduxhre Dios.”

16 Rebejnre laa reni rmojm, runduxhreni quej, rujnreni si'ctis ni rlajz tiejxhreni, rniireni guiraloj dídxnaj, rniisireni dídxsa'c loj rebejn te gun rebejn ga si'c ni rlajzreni gunreni.

### *Rulíjdxni rebejn nani ahuililajz xtidx Dios*

17 La'tu, betzá ni sanälazá, riájl guinaj lajztu redíidx nani gunii reapost xten Dad Jesucrist,

18 sa'csi guniireni lojtu: “Neñ redxelult che guibisac Jesucrist, su' bejn ni suxhíznájreni rextídx Dios, sujnreni si'ctis guisia' lajzreni.”

19 Redee najc renani run rlia' rexpejn Dios lo sa'reni; rinuuzareni ni yu' lo guedxliuj, diza Xpřit Dxañ xten Dios cuáz neñ lastooreni.

20 Niluxh la'tu rebetzá nani sanälazá, coltioob loj xcárlililajztu ni siäd lo Diostis, colnab lo Dios xcuent yálrnibee xten Xpřit Dxañ xtenni.

21 Colguibajntis lo yálsanälajz xten Dios, colsusíntis lañ ni cayunlojtu yálrulaslajz xten Dad Jesucrist ni guniídx yálnabajñ par tejpas.

22 Colgacnáj renani di chalilazsa'c te chalilajzpacreni xtidx Dios.

23 Colyacnáj sgaii te guibicajreni lo dojl, gudobxhaxreni, colyejn xhigab lo guiboo cayejreni. Colyacnáj sgaii bejn, colgulaslajzreni con yálrđxjejb, niluxh colnatiru te di guntu lagajc dojl ni rujnreni. Gulälaz nani rujnreni, nani ruhíñreni.

### *Redídx lult*

24 Colguiliá'p xpala'n Dios nani racnáj la'tu didi jiajbtu lo dojl, nani rujñ sajc suutu lo xcálrđimbicha' Dios, nayadujtu, rbaduxh lajztu.

25 Yu' tejtis Dios. Laatisni rajpni yálnajn te guslaani nuurnu lo dojl xcuent ni bejn xtadnu Jesucrist. Colguiliá'p xpala'nñi, rajpni guiralii yálrnibee, yálrđimbicha', galooli, náj ñaj, nájza par tejpas. Sugacni si'c.

## Rediidx Nani Bacuaa Juan Xcuent Recos Ni Churu Gac

### *Baluiloj Jesucrist lo Juan*

<sup>1</sup> Dee najc rediidx ni badeed Dios loj Jesucrist te guluilojnini loj rexmosni, xcuent recos nani di gaclaa gac. Jesucrist baxhal xanglni lo Juan, te baluini guiraa recos lojni.

<sup>2</sup> Ni'cni bacuaa Juan lo guitzre guiraa xtidx Dios nani baluini Jesucrist lojni, xcuent guiraa recos nani bahuilojpacni.

<sup>3</sup> Chichaa renani roj guitzre xcuent recos ni churu gac, renani riuza rediidxga, renani rguchee rediidxga neñ lastooni sa'csi siaddzongajxh redxej che soob rediidxga.

### *Juan cagucuaa guitzga lo gajdz guidoo*

<sup>4</sup> Narä nacä Juan. Cagucuaä guitzre loj guigajdz reguidoo ni tre' lo región Asia. Dios guspajajz la'tu, guscuecdxini lajtzu, lagajc Dios ni sigajc najc nadxej, sigajcza gujajcni naii, sigajcza sajajcni par tejpas. Xca'zatu xcälruspalajz näj xcälrbexilajz guigajdz respit ni suga' guideb gabi cadro rnibeeni,

<sup>5</sup> näj xcälruspalajz, xcälrbexilajz Jesucrist nani gunilii diidx ni badeed Dios lojni, nani ganiddoo gubansac lo rebengut, nani rnibeeza lo guiraa rereii loj guedxliujre. Laani sanälazduxhni nuure, laani rudzucajni xtojlnu con xtejnni.

<sup>6</sup> Laani bejnni gacnu te benro, te guedxro, gaczanu bixhojz lo Dios Xtadni. Suchä'p xpala'nni, suga'pni yälrnibee par tejpas. Sugacni si'c.

<sup>7</sup> ¡Colgacbee! Laani sibisacni lo rexcäy, luxh guiragajc rebejn suhuii lojni, nägajc renani gudzujd cuä' xcustiini. Guiraa rebejn guedxliujre soon xcuentni. Si'cti, sugacni si'c.

<sup>8</sup> —Narä nacä ganid, nacäza lult, si'c najc reletr A con Z —rnii Dad Dios—. Nabanä nadxej, sigajcza gubanaä naii, sigajcza sibanä par tejpas, dipacna gacä ste'ca. Rapä yälrnibeduxhru lo chutis.

### *Bahuiä loj Jesucrist lo xcälrdimbicha'ni*

<sup>9</sup> Narä, Juan, bejtztu, näjza ni cadednäjtu trabajw xcuent Jesucrist, ni riunäjzatu cadro rnibee Dios, ni rsiudzutznäjzatu lo xtidx Jesucrist, guyu'ä lo yuj nani tre' lo nisdoo, ni laa Patmos. Ro'c baxhalreni narä pres sa'csi basule'ä xtidx Dios näjza diidx xcuent ni bejn Jesucrist lo guedxliujre.

<sup>10</sup> Te dumingw, laj ni cayunää Dios, guzacä astoo canixcaälä, dina niacbeä caro yu'ä, dxejcti nez detzä biejn diägä xse' te ni gunii dipduxh, astoo te trompet,

<sup>11</sup> najni loä:

—Narä nacä ganiddoo, nacäza lult. Lo te guitzro bacuaa nani fiilu, dxejcti baxhal guitzga loj guigajdz guidoo ni yu' nez Asia, neñ reguejdxre: Éfeso, Esmirna, Pérgamo, Tiatira, Sardis, Filadelfia, näjza Laodicea.

<sup>12</sup> Dxejc gubireä te bahuiä chuni'c canii loä. Che gubireä bahuiä lo gajdz gandilier oor.

<sup>13</sup> Galäii guigajdz recandilieerga, suga' te ni najc Xi'n Dios nani gujc Xi'n Niguii, najcwini te lajd ni rdzujn lo ni'lini, lastoozani naliib te cinturon gulajz ni najc ganaxduj oor.

<sup>14</sup> Yejcni nájza xquidxejcní najczareni nolbáj si'c xquichlajd xiil, nolbáj si'c yejg. Dxejcrú rbebajl lojni.

<sup>15</sup> Ni'ni rdimbicha' si'c guiib ni laa bronz che cayejcni lo guiboo. Xse'ni riejn nadipduxh astoo che riájt nisro nen regueuu.

<sup>16</sup> Ladbee ca' naani gajdz balxhaguibaa; ro'ni rii te espaad ni guiro'p laad caj ro'ni; dxejctiru lojni rujn si'c rujn loj gubijdx che cagusanijni guideb lagaa.

<sup>17</sup> Che bahuiá lojni, biabroá nez lojni si'c te bengut. Dxejcti batzuubni naani xladbeeni yecá, dxejc guniini loá, najni:

—Na'c guidxejblu, nará nacá ni gubajñ galooli, nará nacáza ni guibajñ lult.

<sup>18</sup> Nará nacá ni nabajñpac; gutá, niluxh naj nabañá par tejpas. Rapá yálrabee lo yálgujt nájza lo gabijl.

<sup>19</sup> Ni'cni bacuaa recos ni abahuuilu, nani cayajc naj, nájza nani churu gac.

<sup>20</sup> Dee najc laa yálxhiga'tz xten regajdz balxhaguibaa ni bahuiilu lo naá ladbee nájza regajdz gandilier oor: guigajdz balguibaa sálojni xangl Dios xten reguidoo. Dxejc gajdz gandilieerga sálojni guigajdz reguidooga.

## 2

### *Rediidx nani cháa loj rexpejn guidoo Éfeso*

<sup>1</sup> Dxejcti najni loá:

—Bacuaa rediidxre lo xangl Dios xten guidoo Éfeso: “Nani ca' guigajdz balxhaguibaa naani ladbee, nájza nani rsiaj galáii guigajdz gandilier oor, rnii rediidxre lojtu:

<sup>2</sup> Nará numbeá xhi redzuun rujntu, xhi trabajw rdejdtu rujntu dzuunga, nájza xho rsiudzu'tztu. Dizatu guchagsa'tu benlatsiaj; nájza bala'tztu xho rujn rebejn nani rniireni najcreni apost ni rnii xtidx Dios, luxh direni gac, luxh la'tu gucbegajctu cagusgueereni bejn.

<sup>3</sup> Rsiudzu'tztu, rujntu huant xcuent xtidxá, gajdtu guidxajg.

<sup>4</sup> Empac yu' te quej ni rbe'cá xcuenttu: dirutu chanálajz nará si'cni huinálajztu nará ganiddoo.

<sup>5</sup> Ni'cni colguzaa lajztu caro banijttu, colgusiejch lajztu, colyejn lagajc redzuun ni bejntu galoo che guslojtu huililajztu xtidxá. Palga ditu gusiech-lajztu, sudzucaá xcandilieertu cadro suga'ni.

<sup>6</sup> Laaca rujntu rbálaztu xtzuum rebejn ni laa nicolaítas, sa'csi nájza nará rbixlazá xtzuumreni.

<sup>7</sup> Nani yu' diajgni te cuadiajgni diidx, sucuadiajgni diidx ni rnii Sprit Dxañ xten Dios loj reguidoo: loj renani gun gaan lo dojl, gudedá gauni ninejxh ni rcaj lo yajg yálnabajñ, ni yu' xhaguibaa cadro yu' Dios.”

### *Rediidx ni rniini loj rexpejn guidoo ni yu' Esmirna*

<sup>8</sup> Dxejcti najni loá:

—Bacuaa rediidxre lo xangl Dios xten guidoo ni yu' Esmirna: “Nani najc ganiddoo, nani najcza lult, nani agujt, dxejctiru gubansacni par tejpas, rnii diidxre lojtu:

<sup>9</sup> Nará naná xho cadejdlu trabajw, nanáza guxilii rajplu, niluxh nez loj Dios yu' xhidajl xhixtenlu. Nanáza yu'reni rniyajlu. Reni rniyajlu rniireni najcreni rexpejn Israel, luxh direni gac. Najcreni xpejn xquidobáz bendxab.

<sup>10</sup> Na'c guidxejblu trabajw nani agojl tedlu. Aree bendxab gusál gaii sa'tu nen latzguiib, te gacbeni don la guliitu ahuililajztu xtidx Dios, te tedzatu trabajw tzuu dxej. Colgutip lajztu mase guettu, dxejcti nará gunidxá te coron xten yálnabajñ.

11 Nani rlanj cuadiajg diidx sucuadiajgni diidx ni rnii Sprit Dxan xten Dios loj reguidoo: nani gun gaan lo dojl, xhet gundi yälgujt ni rojpga lojni.”

*Rediidx ni rniini lo rexejñ guidoo ni yu' Pérgamo*

12 Dxejcti najni loä:

—Bacuaa rediidxre lo xangl Dios xten guidoo ni yu' Pérgamo: “Nani ca' spaad ni caduxh ro'ni guiro'p laad rnii rediidxre lojtu:

13 Narä nanä caro rbäjztu, rbäjztu lo guejdx cadro rnibee Bendxab. Rsiudzu'tztu xcuent xtidxä. Lałtis rsiudzu'tztu rililajztu xtidxä, mase neñ redxej cheni bagu'treni Antipas, ni gunii diidx xcuenta, nani gusudzutzpac nez loä, nani bagu'treni neñ guejdx cadro rnibee Bendxab.

14 Niluxh yu' tiop-choñ xtojltu. Lojtu nadxaag gaii bejn ni rujñ si'c bejn toBalaam agujc xchero. Laani basedni Balac xho gunni te jiajb rexejñ Israel neñ dojl, basednireni gaureni recos ni gurej lo dxan nez loj rebanäjñ, basedzani rexejñ Israel guesñajreni chutis gunaa.

15 Sigajcza nadxaag lojtu gaii bejn ni riu rediidx ni rusule' reni laa nicolaítas.

16 Colgusiechxga lajztu, te di jiälgacä lojtu te gucuanääreni spaad ni yu' ro'ä.

17 Nani rlanj cuadiajg diidx, sucuadiajgni diidx ni rnii Sprit Dxan xten Dios loj reguidoo: renani gun gaan lo dojl, lojni gudedä yätxtiil ni laa mana ni yuchee-xhiga'tz. Sudedäza lojni te guibáz ni najc nol, lojni caj te lajni ni nacoob, nani rutru racheedi, xtebtis nani xca'ni.”

*Rediidx nani rniini lo rexejñ guidoo ni yu' Tiatira*

18 Dxejcti najni loä:

—Bacuaa rediidxre lo xangl Dios xten guidoo ni yu' Tiatira: “Xi'n Dios nani rbebajñ balojni, ni rdimbicha' ni'ni si'c bronz, ni'c rnii rediidxre lojtu:

19 Ananä xtzuumtu, sanälajztu sa'tu, nanä xho rililajztu xtidxä, xho racñajtu resa'tu, näjza xho rsiudzu'tztu, runduxhtu huant. Nanäza cayujntu dzunroru naj loj ni bejntu che guslojtu.

20 Niluxh yu' xhicuent rdxe'chä lojtu. Rcäjbtu riu'tu loj te gunaa ni laa Jezabel. Laani rniisini najcni te profe't, gunaa ni rnii xtidx Dios, rusgueetisni bejn. Luxh xcäl'ruseedni cagusgueeni rexeñä nani ahuililajz xtidxä, te naj rujñreni cosgujdx, si'c yäl'reñäj ni di gac chäälni, rajwzarenii nani gurej lo dxan xten rebanäjñ.

21 Aguläzä xchej te gusiechlajzni, gusaanni gunni dojl, luxh naaddini gusiechlajzni xcuent redzungujdx ni rujñni.

22 Luxh palga laani dini gusaan gunni redzuun nani rujñni, narä siguixäni, gudedä te yäl'racxhuro. Luxh sutedä trabajwduxh guiraa renani bennäjni dzungujdx palga direni gusiejch lajzreni, palga direni guchaa xmoodreni.

23 Sugutxhiä, sunitloä rexi'n gunaaga, te si'c gachee guiraa rebejn ni yu' neñ reguidoo narä nacä ni rula'tz rexhigab ni yu' xcäriejnreni, näjza yäl'rililajz ni yu' neñ lastooreni. Te gacheezarenii narä sunidxä lo tejgatu ni riäjñ xca'tu xcuent redzuun ni rujntu.

24 Dxejc loj guiraa reni yu' lo guedx Tiatira, la'tu ni di guirinañl xnezyuj Jezabel, la'tu ni di gumbee nani rniireni najc recosduxh xten bendxab, xhetru rniäd: lojtu, dirunä gutalä xtzuumtu.

25 Coljyapdu'tz xtidxä nani arajptu dxejli ni guibisacä lojtu.

26 Nani gun gaan lo dojl, näjza nani cagusoob xtidxä dxe lultli, lojni sudedä yäl'rnibee te guinibeeni renacion.



<sup>27</sup> Si'cni baniidx Xtaďa yǎlrmibee loǎ, sudedǎ yǎlrmibee lojni, te guinibeeni guiraa reben guedxliuj, gunnǎjni yǎlguxhtis lojreni te barguiib si'c rujn ni runchee guesbajñ, rlia'ni guiraa regues nani xhet sajcdi.

<sup>28</sup> Sunidxǎza bale' xhaguibaa ni rii rsildoo (ni sǎloj guibannǎjnu Dios).

<sup>29</sup> Nani rľajz cuadiajg sucuadiajgni diidx ni rnií Sprit Dxan xten Dios loj reguidoo."

### 3

#### *Rediidx nani rniini lo rexpejñ guidoo ni yu' Sardis*

<sup>1</sup> Dxejcti najni loǎ:

—Bacuaa rediidxre lo xangl Dios xten guidoo ni yu' Sardis: "Si'c naj nani rajp guigajdz Sprit xten Dios nǎj guigajdz rebal xhaguibaa: Narǎ nanǎ guiraa redzuun nani rujntu, rnií rebejñ nabajñtu, niluxh narǎ nanǎ ascanu agujttu, dirutu gun xtzunǎ.

<sup>2</sup> Colguibajñ, colgula'tzru nani rapsijctu xcuent rextidxǎ nani ameer nitloj nen lastootu. Narǎ ruhuiǎ ditu niunsa'c dzuun xtenǎ nez loj Dios.

<sup>3</sup> Colgusnaj lajztu rediidx ni basule'reni lojtu, nani abacuadiajgtu, colgusoob rediidxga, colgusiech lajztu. Palga ditu guibajñ, palga ditu guchaa xmoodtu, sidzunǎ nez lojtu si'c te gubaañ, nića gaantu cor guidzunǎ lojtu.

<sup>4</sup> Niluxh yu' gaiisi bejñ lo guedx Sardis nani naya, nani gajdreni gun dojl. Sajcwreni ladnolbǎj te sanǎreni narǎ xhaguibaa, sa'csi laareni sǎbyǎjñreni.

<sup>5</sup> Nani gun gaan lo dojl, ni'c sajç gacwni ladnol, luxh dizana guche'nǎ lajni loj xľibr cadro caj laj renani sibajññǎj Dios par tejpas. Sicǎpǎza nez loj Xtaďa nǎjza nez loj guiraa rexquixhajñi, bejñga najç rexpennǎ.

<sup>6</sup> Nani rľajz cuadiajg diidx, sucuadiajgni diidx ni rnií Sprit Dxan xten Dios loj reguidoo."

#### *Rediidx nani rniini lo rexpejñ guidoo ni yu' Filadelfia*

<sup>7</sup> Dxejcti najni loǎ:

—Bacuaa rediidxre lo xangl Dios xten guidoo yu' Filadelfia: "Nani najç dxan, nani najç guliipac, nani rajp xľiǎii toDavid (ni sǎloj guiragajç yǎlrmibee), nani che ruxhalni, rut rusǎuudi, nani che rusǎuuni, rut ruxhaldi, laani rniini diidxre lojtu:

<sup>8</sup> Narǎ nanǎ xhini'c rujntu. Si'c te puert ni naxhal, ni rut rusǎudi, si'cza sunidxǎ yǎlrmibee lojtu te gusule'tu xťidxǎ, rutľiidi sajç gusǎuu ro'tu. Mase guxii nadip-nadaantu, atu canii xťidxǎ, ditu cuatzľajz xťidxǎ.

<sup>9</sup> Suhuiitu xho gunǎ rebejñ ni yu' lo guidobǎz xten bendxab. Rniisireni najçreni xpejñ Israel, luxh direni gac; rusgueereni bejñ. Narǎ sunǎpac jǎdzuxhijbreni nez lojtu, sunǎza gacheepacreni sanǎlazduxhǎ la'tu.

<sup>10</sup> Sa'csi basoobtu xťidxǎ ni gunibeǎ sutijptu, na'c jieedtu, ni'cni narǎ sacnǎǎzatu che guidzujñ dxej tedtu trabajw. Luxh orga ameer guidzujñ lo guideb guedxliuj, luxh sidejđ guiraa reben guedxliuj trabajw, te guibee reben sa'c lo reben guedxliuj.

<sup>11</sup> Narǎ di gaćlaa jǎľǎ; gopdzu'tz ni rajptu, te rut gudzucajđi ni gunidxǎ xca'tu.

<sup>12</sup> Nani gun gaan lo dojl, narǎ gunǎni si'c te pilajr nen xquidoo Xtioozǎ, nalajznu, sajçni te bejñ nani gac guinibee cadro yu' Dios. Sibajñni ro'c par tejpas, diruni guirii ro'c. Lojni gucuaǎ laj Dios nǎjza laj guejdx xten Dios ni najç Jerusalencoob, nani guirii xhaguibaa cadro yu' Dios; lojni sucuaǎza laǎ ni najçza nacoob sa'csi najçni xpenǎ.

13 Nani rlanj cuadiajg diidx, sucuadiajgni ni rni Sprit Dxi xten Dios loj reguidoo.”

*Rediidx nani rniini lo rexpejn guidoo ni yu' Laodicea*

14 Dxejcti najni loä:

—Bacuaa rediidxre lo xangl Dios xten guidoo ni yu' Laodicea: “Nani laa Amén (ni säloj sugacni si'c), nani najc testiigw ni rniliipac, ni di cuääz guiniini didxliiga, nani guläxteiej guedxliujre näj guiralii ni benchee Dios, laani rniini scree:

15 Nanä redzuun ni cayujntu. Ditu sasa'c lo xnezyuä, dizatu cuälaz xnezyuä. ¡Maläii guntu tejni o steeni!

16 Ni'cni, sa'csi najctu si'c nistiib, ditu gac si'c nisnajt, niclaza gactu si'c nislaa, sibäro'ä la'tu.

17 Sa'csi rniilu: Ri'cw narä, rapä xhidalduxh xhixtenä, xhet rquinädi. Luxh dilu gan xhet rajpdilu, alga najclu ben gubijn, te ben probduxhlu, di lojlu jien, luxh suga'lu xhabäalu nez lo Dios.

18 Ni'cni rulidxälu siilu loä oor xtenä nani agudejd lo guiboo te gaclu ri'cw; gusii loä ladnol gacwlu, te di guitujyulu suulu xhabäalu; gusiiza unguent loä te chää balojlu, te jien lojlu.

19 Rebejn nani sanälazä, reni'c rulidxä, runäza riareni che et laadi rujnreni. Ni'cni colsäblajz; colgusiejch lajztu.

20 Colhuii, ana suga'ä roxlä' lastootu, cagusezä, cabedxa'ä. Palga yu' chu tejtü ni jiejn diajgni xse'ä, guxhalni xpuert lastooni, siu'ä lastooni, te gacnäani, te guiban'sa'czani nez loä.

21 Loj nani gun gaan lo dojl, lojni gudedä guinibenäjni narä xhaguibaa, sa'csi näj narä abenä gaan lo dojl, ni'cni gurenä Xtäädä cadro rnibeeni xhaguibaa.

22 Nani rlanj cuadiajg diidx, sucuadiajgni diidx ni rni Sprit Dxi xten Dios loj reguidoo.”

## 4

*Calä'preni xpala'n Dios xhaguibaa*

1 Che gulujx bacuaä rediidxga, guläsä loä, bahuiä astoo naxhal ro puert xhaguibaa. Dxejcru gunii xse' nani biejn diagä ganiddoo, nani riejn si'c xse' te trompet, najni loä:

—Huä'p, gudaä ree, te guluiä lojlu recos ni churu gac che luux gac recosre.

2 Lagajc dxejc astoocanu si'cni huij sprit xtenä xhaguibaa. Ro'c bahuiä te yagxhilo cadro rbejn nani rnibee xhaguibaa, luxh ro'c sobga' nani rnibeeni.

3 Nani sobga' lo yagxhilga, rienni si'c te guisa'c ni rbebalsejs, si'c reguisa'c ni laa jaspe, näj cornalina. Guideb gabi yagxhil cadro rnibeeni dejd te xquitgubijdx ni rbebalsejs si'c guisa'c ni laa esmeralda.

4 Guideb gabi cadro rnibeeni suga' sgalbitajp yagxhil, loj reyagxhilga sobga' galbitajp rebengool, najcwreni ladnol, yu' coron oor yejc tejpgareni.

5 Nez lo yagxhilo cadro rnibeeni rii reyälrdinya' näjza guzii. Nez loj cadro rnibeeni cayalguij gajdz bajl ni najc gajdz Sprit Dxi xten Dios.

6 Nez loj cadro rnibeeni yu' astoocanu te nisdoo ni rien si'c te guihuanro, rdimbichasejsni.

Galäii yagxhilogä näjza guideb gabini suga' tajp man, guideb nez lojreni näjza nez dejtzeni yu' balojni.

7 Manganidga najc si'c te lion; man ni rojppa najc si'c te gonbäz; man ni riojnga rujn lojni si'c rujn loj te niguii; man ni rdajppa najcni si'c te bisiro cagutajt xhaguibaa.

<sup>8</sup> Niluxh guidap remanga tejgareni yu' xho'p xhigareni, guideb gabireni, nāj nez neñreni liguidxa balojreni, niluxh direni gusilajz, dxej-yääl caniireni: D<sub>xan</sub>, dxan, dxan najc Dad Dios ni rajp yäl<sub>r</sub>nibeduxh, nani yu' galooli, nani yu' naj, nani churu jiaäd.

<sup>9</sup> Guidap remanga rliä'preni xpala'n Dios, rusuxhijbreni rajñrenini, rdeedzareni xquixtios loj nani rñibee par tejpas.

<sup>10</sup> Dxejc guigalbitap rebengool, suzuxhijbzareni loj nani rbej lo yagxhilo, te ganreni nani nabajñ par tejpas. Sucuaareni xcoronreni nez loj xyagxhiloni, siniireni lojni, säjpreni:

<sup>11</sup> Dad Dios baxhuaannu, Guej<sub>b</sub>paclu riäj<sub>l</sub> xca' guiraa rebala'n, guiraa reyäl<sub>r</sub>ruzuxhijb, guiraa reyäl<sub>r</sub>mibee, sa'csi Guej<sub>b</sub>lu guläxtiej guira'ti nani yu' naj, yu'reni sa'csi rlajz Guej<sub>b</sub>lu chureni, ni'cni benchee Guej<sub>b</sub>lu guiraareni.

## 5

### *Te guijt<sub>z</sub> nāj te ni najc Xiil xten Dios*

<sup>1</sup> Dxejcru narä Juan bahuiä lo nani sobga' lo yagxhilo<sub>roga</sub>. Naani ladbee ca'ni te libr, najcni si'c te bilii guijt<sub>z</sub>. Caj diid<sub>x</sub> nez lojni caj diid<sub>x</sub> nez dejt<sub>z</sub>ni, nadxe'ni, caj gajdz sei lojni.

<sup>2</sup> Dxejcti bahuiä lo te xangl Dios ni nadipduxh, dip guniini, najni:

—¿Chuni'c riäj<sub>l</sub> guxhal guijt<sub>z</sub>re? ¿Chuni'c riäj<sub>l</sub> gutiäjs reseiire?

<sup>3</sup> Niluxh nicla tej bejñ di nidxäj<sub>l</sub> ni riäj<sub>l</sub> gutiäjs reseiiga te guxhalni guijt<sub>z</sub>ga; nicla xhaguibaa, nicla lo guedxliujre, nicla xhajiät nez neñ guedxliuj. Niclaza nidxäj<sub>l</sub> chu niajc nuhuii lo guijt<sub>z</sub>ga.

<sup>4</sup> Narä ronduxhä sa'csi nicla tej rut riäj<sub>l</sub>di gutiäjs reseiiga, niclaza ni riäj<sub>l</sub> gol guijt<sub>z</sub>ga, niclaza ni riäj<sub>l</sub> fiitis lo guijt<sub>z</sub>ga.

<sup>5</sup> Dxejcti gunii te bengool loä, najni:

—Na'cru goonlu. Bahuii gan, niguii ni rñiireni Lion, xagdo<sub>o</sub> toJudá, xagdo<sub>o</sub> toDavid, abejñni gaan lo yäl<sub>r</sub>gujt ni'c naj riäj<sub>l</sub> guxhalni guijt<sub>z</sub>ga, gutiäjszani guigajdz reseiiga.

<sup>6</sup> Dxejc bahuiä nez cadro suga' yagxhilo<sub>roga</sub> nāj guidap remanga, nāj cadro suga' guiraa rebengool luxh te galäiiga suga' tej ni najc Xiil xten Dios, astoo abagu'trenini. Sojb gajdz xca'chni nājza gajdz balojni, ni najc gajdz Sprit xten Dios nani ruxhalni guiraa nez lo guedxliuj.

<sup>7</sup> Laani gubigni, cua'ni guijt<sub>z</sub>ga, guläänini ñaa ladbee xten nani sobga' lo yagxhilo<sub>roga</sub> canibee.

<sup>8</sup> Che cua'ni guijt<sub>z</sub>ga, guidap remanga nājza guigalbitap rebengool bazuxhijbreni nez loj Xiilga. Tejga rebengoolga ca' te arp, ca'zareni taz oor guidxa te ni najc si'c yaal. Yaalga najc guiraa reyäl<sub>r</sub>rejd<sub>x</sub>, yäl<sub>r</sub>niab xten rexpejñ Dios.

<sup>9</sup> Cayolzareni te dicoob ni najc scree:

Guej<sub>b</sub>lu sacduxh,  
riäj<sub>l</sub>pac xca' Guej<sub>b</sub>lu guijt<sub>z</sub>ga,  
gutiäjs Guej<sub>b</sub>lu reseiiga, sa'csi bagu't rebejñlu,  
nājza xtiejñlu gudijx xcuent bejñ lo Dios.  
Gudijxlu xcuent bejñ ni najc garen-garen raz,  
ni rñii garen-garen didxsaj,  
ni siääd garen-garen guejdx lo garen-garen ladxbejñ.

<sup>10</sup> Badeedlu gacreni reii nājza bixhojz lo Dios.

Laareni sinibeereni rebeñ guedxliuj.

<sup>11</sup> Che bahuiä, biejn diagä xse' xhidalduxh xangl Dios ni suga' guideb gabi yagxhilo cadro rbej nani rnibee, näjza xse' guidap reman, näjza xse' guiraa rebeṅgool. Luxh di gacdi guigab xangl Dios ni tre' ro'c sa'csi xhidalduxhtej najcreni, xhidalduxh miyoṅ najcreni.

<sup>12</sup> Dipduxh najc xse'reni, caniireni scree:

Sacduxh Xiil nani bagu'treni,

ni'c riäjl xca'ni yäl'rnibeduxh, yäl'rapduxh, yäl'nanduxh, yäl'milagwr.

Riäjlza guiliä'pnu xpala'nni, guzuxhijbnu lojni gaṅnuni, gudeednu xquixtios lojni.

<sup>13</sup> Dxejcti biejn diagä xse' guiragajcreni, guiraa reni benchee Dios ni yu' xhaguibaa, näj guiraa reni yu' loj guedxliujre, näjza guiraa reni yu' xhajiät nez neṅ guedxliuj näj lo nisdoo, biejn diagä caniireni scree:

Loj nani sobga' lo yagxhilo cadro rnibeeni,

näjza loj ni najc Xiil xten Dios, laatiski sacduxhni,

guiliä'pnu xpala'nni, guzuxhijbnu nez lojni gaṅnuni,

gäbzanu rinibeeni par tejpas.

<sup>14</sup> Dxejcti guidap remanga rnigajcreni scree:

—Sugacni si'c.

Dxejcti guigalbitap rebeṅgool bazuxhijbreni nez loj nani nabajn par tejpas, gojṅrenini.

## 6

### *Guigajdz reseii*

<sup>1</sup> Dxejcti bahuiä loj ni najc Xiil xten Dios. Batiäjsni tej seiiga. Biejn diagä gunii tej lo guidap remanga, luxh che guniini riejn xse'ni si'c che ni canii guzii, najni loä:

—Gudaa te filu.

<sup>2</sup> Dxejc bahuiä lo te cabai nol. Nani bijb dejtzn ca' te arcw nani rucuaa fle'ch. Badeedreni te coron lojni. Biriini cayujnni gaan te chanuutis gunni gaan.

<sup>3</sup> Che batiäjsni ni rojp seiiga, biejn diagä gunii ni rojp manga, najni loä:

—Gudaa te filu.

<sup>4</sup> Dxejc bahuiä lo te cabai xniaa. Loj nani bijb cabai xniaaga badeedreni yäl'rnibee gudzucajni yäl'nadoo, yäl'rbedxilajz, lo guedxliujre, te ju't sa' rebejn. Badeedreni te spadro cua'ni.

<sup>5</sup> Dxejcti che batiäjsni ni riojn seiiga, biejn diagä gunii ni riojn manga, najni loä:

—Gudaa te filu.

Dxejc bahuiä lo te cabai yas. Nani bijbni naazni te balans.

<sup>6</sup> Biejn diagä astoo galäii guidap remanga, birii xse' te ni canii scree:

—Tej kil xob xca'lu gunlu dzuun tebdxej; choṅ kil salbaad xca'lu gunlu dzuun tebdxej. Niluxh na'c guhuaḷlu bin niclaza se't.

<sup>7</sup> Dxejcti che batiäjsni ni rdap seiiga, biejn diagä gunii ni rdajp manga, najni loä:

—Gudaa te filu.

<sup>8</sup> Dxejc bahuiä lo te cabai gojtz. Nani bijbni laa yälgujt, luxh dejtzn siädnalgajc ni rnibee gabijl. Gula'ni rebejn ni re' lo guedxliujre gujcreni tajp gala', dxejc loj redee badeedreni guinibeereni lo te cuua rebeṅguedxliuj te ju'treni rebejnga con spaad, näj yäl'rliiaan, näj yäl'racxhuu, näjza remanduxh ni yu' dajn.

<sup>9</sup> Dxejcti che batiäjsni ni rajc gaii seiiga, bahuiä nez ni' xpiändxan Dios, ro'c naga' xaim rebejn nani bagu'treni sa'csi huililajzreni xtidx Dios, näjza sa'csi gusutijpreni basule'reni xtidx Dios.

<sup>10</sup> Dipduxh caniireni, canabreni lo Dios, räjpreni:

—Dad, ni najc Dxan, ni najc guliipac. ¿Gucli cuääz, gaclaa gun Guejblu yälguxhtis loj reni bagu't nuure lo guedxliuj te quixreni ni bejnreni?

<sup>11</sup> Dxejcti cua'reni te ladnolbäj gojt tejgareni. Dxejc räjpreni lojreni cuäzsjcreni, gusilajzreni, laḷ ni guiza' resa'reni ni rusule' xtidx Dios, ni churu gugu'treni sigajc bagu'treni laareni.

<sup>12</sup> Bahuiäza cheni batiäjsni ni rajc xho'p seiiga, luxh gujc te xuduxh, bigasboo loj gubijdx si'c te ladyas, sas bäii gujc guidebni si'c rejn.

<sup>13</sup> Rebajl ni yu' xhaguibaa bitejbreni lo guedxliujre, si'c rtejb rebetz yagxhejn che rusniib te beduxh yajgga.

<sup>14</sup> Dxejcti gunitloj guibaa si'cni rnitloj te guiitz che re'ni, rajcni te biliu. Guiraa redajn näjza reyuj ni re' galäii lo nisdoo biniibreni, bidxaa xladreni.

<sup>15</sup> Ni'cni guiraa reben guedxliuj, rebejn nani rnibee, näjza rebenro, näjza recapitán, näjza reben rapduxh, näjza reben ni nadiplajzreni, näjza remos, näjza renani rut lojdi yu'reni, guiragajcreni baxunreni, huicuatxlojreni nen rebiliää nen redajn.

<sup>16</sup> Dxejc räjpreni loj redajn, loj reguilaj:

—Colguitejb yejcnu, colgucua'tz nuure loj nani rbej lo yagxhilro xhaguibaa näjza loj yälguxhtis xten nani najc Xiil xten Dios.

<sup>17</sup> Sa'csi abidzujn dxero xten xcälguxhtisni, ¿chuni'c sajc suu nez lojni?

## 7

### *Tegayuu tiubitajp miḷ rexpejn Israel*

<sup>1</sup> Dxejcti bahuiä lo tajp xangl Dios ni suga' loj guidajp laad guedxliuj. Caguscuaäzreni guidajp rebej xten guedxliuj te xhet bejdi guibi' lo guedxliuj nicla lo nisdoo niclaza yejc reyajc.

<sup>2</sup> Bahuiä lo stee xangl Dios, ni siääd nez cadro rliejn gubijdx, ca'ni sei xten Gueb Dios ni nabajn par tejpas. Dipduxh guniini lo guidap xangl Dios ni rajp yälrnibee te gunreni daan lo guedxliuj, näjza lo nisdoo.

<sup>3</sup> Räjpni lojreni:

—Guläzsjctero, laḷ ni guicuaanu te seen lo cuaj reni najc xpejn Dios, te dxejcn sajg guntu daan lo yuj, näj loj nisdoo, näj loj reyajc.

<sup>4</sup> Dxejcti biejn diagä najreni bal bejn guyu' seenga lo cuajreni, basa'reni tegayuu tiubitajp miḷ bejn ni bibee loj rexpejn Israel.

<sup>5</sup> Loj rexpejn Judá bibee tzubitio'p miḷ; loj rexpejn Rubén bibee tzubitio'p miḷ; loj rexpejn Gad bibee tzubitio'p miḷ;

<sup>6</sup> loj rexpejn Aser bibee tzubitio'p miḷ; loj rexpejn Neftalí bibee tzubitio'p miḷ; loj rexpejn Manasés bibee tzubitio'p miḷ;

<sup>7</sup> loj rexpejn Simeón bibee tzubitio'p miḷ; loj rexpejn Leví bibee tzubitio'p miḷ; loj rexpejn Isacar bibee tzubitio'p miḷ;

<sup>8</sup> loj rexpejn Zabulon bibee tzubitio'p miḷ; loj rexpejn José bibee tzubitio'p miḷ; loj rexpejn Benjamín bibee tzubitio'p miḷ.

### *Benquixhuj ni najcw ladnolbäj*

<sup>9</sup> Dxejcti bahuiä lo xhidalduxh bejn, benquixhuj, nicla tej bejn digacdi gulabreni. Garen-garen ladx-bejn siäädreni, garen-garen najc lajdxreni, näj

raz xtenreni, näj xtiidxreni. Suga'reni nez loj yagxhilo xten ni rnibee, näjza nez lojni ni najc Xiil xten Dios. Najcwreni ladnolbäj, ca'zarenı zıjñ.

<sup>10</sup> Dıpxuxh rniireni, räjpreni:

Dios ni rnibee lo yagxhilo, näjza nani najc Xiilre, baslaareni nuure lo xtojlnu.

<sup>11</sup> Suga'za guiraa rexangl Dios guideb gabi yagxhilo cadro rnibeeni, näjza guideb gabi rebngool näjza guidap remanga, dxejcti bazuxhıjybreni, basajybreni lojreni nez lo Dios,

<sup>12</sup> räjpreni:

Sugacni si'c. Loj Xtıostısnu colye'tz sacduxhni; colguılıä'p xpala'nni; laatisni rajpni yälñajñ; lojtısnı colgudeed xquıxhtıos, laatisni colgan, colıuxhıjyb lojni; laatisni rajpni yälrnıbee näjza yälmilagwr. Sugacni si'c par tejpas.

<sup>13</sup> Dxejç gunii te bengool loä, najni:

—Renani najcw reladnolbäjre, çchu najçreni? çCasiädreni?

<sup>14</sup> Dxejcti räpä lojni:

—Dad, anajñ Guejblu.

Dxejç najni loä:

—Redee najc renani agudejd yältrabajwduxh, renani abia rextojlreni sa'csi xtejn Xiil xten Dios agudıjx xtojlneni.

<sup>15</sup> Ni'cni suga'reni nez loj yagxhilo xten Dios dxej-yääl cayujñreni xtzu- unni neñ xquıdooni. Ni'cni sacnäj nani sobga' lo yagxhıroga guiraa renani suga' nez lojni, sunäjıtsıni laareni.

<sup>16</sup> Dirureni guılıaan, nıclaza jıojlreni, diza gubıjdx guze'c lojreni, dizareni gacnanlaa.

<sup>17</sup> Sa'csi nani najc Xiil xten Dios ni sobga' galäıı loj yagxhilo xten Dios, laani cayajñıreni si'c xılböz, sınanıreni lojni nacledjñ yaal te cachaagnıni loj guiraa rextıdx xpejñ Dios ni rniireni che rbedx-rniabreni lo Dios, te checni lo piändxan ni najc ganax oor, ni yu' nez loj yagxhıroga.

<sup>18</sup> Dxejcti gujxhga nägajç rextıdx rexepejñ Dios, birii ladsnaa xangl Dios ni ca' bacue, huä'preni nez loj Dios.

<sup>19</sup> Dxejcti lagajç anglga cua'ni guıboo ni dzuub lo piändxanga, bachajni bacue, dxejcti baslojñıni lo guedxlıuj. Dxejç guyu' te guzıduxh, bıdınıyaduxh, gujçza te xuduxh.

## 8

### *Nı rajç gajdz seiiga*

<sup>1</sup> Che batiäjısnı ni rajç gajdz seiiga, gucdxı xhaguıbaa si'cti med or.

<sup>2</sup> Dxejcti bahuiä loj guıgajdz xangl Dios ni suga' nez loj Dios. Lojreni badeedreni gajdz trompe't.

<sup>3</sup> Dxejctıru bıäd stee angl, ca'ni te bacue ni najc ganax oor, bazujñıni nez loj piändxan. Badeedreni lojni nacledjñ yaal te cachaagnıni loj guiraa rextıdx xpejñ Dios ni rniireni che rbedx-rniabreni lo Dios, te checni lo piändxan ni najc ganax oor, ni yu' nez loj yagxhıroga.

<sup>4</sup> Dxejcti gujxhga nägajç rextıdx rexepejñ Dios, birii ladsnaa xangl Dios ni ca' bacue, huä'preni nez loj Dios.

<sup>5</sup> Dxejcti lagajç anglga cua'ni guıboo ni dzuub lo piändxanga, bachajni bacue, dxejcti baslojñıni lo guedxlıuj. Dxejç guyu' te guzıduxh, bıdınıyaduxh, gujçza te xuduxh.

### *Retrompe't*

<sup>6</sup> Dxejcti guıgajdz rexangl Dios ni ca' guıgajdz retrompe't, guzısuñreni te guisloj golreni retrompe'tga.

<sup>7</sup> Che bil trompetganid, guixob nāj guiboo nu' chreni rejn gusloj cayajbreni loj guedxliuj. Dxejcti huejc ni riojn la' guedxliuj, huejca ni riojn la' reyajg nājza guiralii recuaan.

<sup>8</sup> Che bil ni rojp xangl Dios trompe't ni ca'ni, ascanu yu' chu bacuaani biajb si'c te danro ni cayejc loj nisdoo. Dxejcti gujc ni riojn la' nisdoo si'c rejn.

<sup>9</sup> Dxejcti gujt ni riojn la' rebājil nāj guiraa reman ni yu' loj nisdoo. Gunitlojza ni riojn la' rebarcw ni sazaj lo nisdoo.

<sup>10</sup> Che bil ni riojn xangl Dios trompe't ni ca'ni, biajb te balro xhaguibaa, cayejcnī si'c te balguejd. Bitejbni loj ni riojn la' regueuu, nājza cadro rliejn nis.

<sup>11</sup> Laj bajlga najc Ajenjo, ni sāloj te cos ni nanladuxh. Ni riojn la' nis gujc nis nanladuxh. Dxejcti gujt xhidalduxh bejn xcuent nisnanlaaga.

<sup>12</sup> Che bil ni rdajp xangl Dios trompe't ni ca'ni, guxhijn ni riojn la' gubijdx, nājza ni riojn la' bāii, nājza ni riojn la' rebal xhaguibaa, bicājyreni. Dxejcti dirureni guzanij ni riojn la' dxej, nāj ni riojn la' yāäl.

<sup>13</sup> Dxejcti bahuiā xhaguibaa, biejn diagā si'c te bisij cagutajt nez galāii xhaguibaa. Biejn diagā cabedxa'ni, caniini rediidxre:

—jAii! jAii! jAii! Riaduxhä rebeņ guedxliuj che gusloj goļ schon rexangl Dios retrompe't ni ca'reni. Sidejd rebeņ guedxliuj trabajwduxhru.

## 9

<sup>1</sup> Che bil ni rgaii xangl Dios trompe't, bahuiā lo te bal xhaguibaa ni bitejb lo guedxliujli. Bajl xhaguibaaga cua'ni liāii ni ruxhal ro' gabijl.

<sup>2</sup> Baxhaltini ro' gabijl, dxejc huājs te gujxh ro'ni si'c rājs gujxh ro' te orguiboro. Dxejcti gujxhga basāuni loj gubijdx, gudxajni lo bej.

<sup>3</sup> Dxejcti lo gujxhga birii betzsu gusujreni guideb lo guedxliuj. Cua'reni yāl̄rnibee gacreni nialajz si'c nialajz renaxejb.

<sup>4</sup> Cua' remanga yāl̄rnibee na'c gunreni daan loj reguixa', loj recuaan, loj reyagbajn; rebejntis nani xhet beedi xten Dios caj lo cuajreni, reni'c gusacsīreni.

<sup>5</sup> Cua'reni yāl̄rnibee na'c ju'tni bejn, gaii bāii gusacsīreni xcāl̄nayanreni bejn. Luxh xcāl̄nayanreni najc si'c yāl̄nayan cadro rauya' te naxejb te bejn.

<sup>6</sup> Neņ redxejga, siguiil rebejñ yāl̄gajt, luxh direni guidxāl̄ni. Luxh mase rlajzreni guetreni, sibicaj yāl̄gajt lojreni.

<sup>7</sup> Rebetsure najc si'c recabaii ni suchee te chāäreni lo guer. Yejceni yu' te ni najc si'c te coron oor; luxh lojreni rujn si'c loj rebejñ.

<sup>8</sup> Xquichejcreni si'c najc xquichejc gunaa; relājyreni najc si'c lājy lion.

<sup>9</sup> Luxh guideb tiejxhreni caj si'c guiib ni rusāudzu'tzreni. Rubeduxh rexhigaarenī, si'c rubej che ruxuñ xhidalduxh cabaii nāj xcarenī che agojl chāäreni guer.

<sup>10</sup> Xhibaanreni najc si'c xhibaan naxejb, xcuchreni yu' yāl̄nayan te gusacsīreni rebeņ guedxliuj gaii bāii.

<sup>11</sup> Yu'za ni rnibee lojreni, xangl beņdxab ni birii gabijl. Xtidx hebreo laani Abadón, xtidx griegw, laani Apolión.

<sup>12</sup> Naj agudejd tej casionroga, naj cayāädx stio'pni.

<sup>13</sup> Che bil ni rxho'p xangl Dios trompe't, biejn diagā te xse' bejn ni lascanu siāādni galāii guidajp reca'ch ni caj loj xpiāndxan ni nac-chee ganax oor, ni yu' nez loj Dios.

<sup>14</sup> Luxh xse' bejñga canii loj ni najc rxho'p xangl Diosga, ni ca' trompe't: —Basīaa guidap reangl nani caduu nez rogueuu ni laa Eufrates.

<sup>15</sup> Dxejcti baslaani guidap reanglga te ju'treni ni riojn la' beñ guedxliuj. Luxh gule Dios reanglga parpac dxejga, bäiiga, ijzga.

<sup>16</sup> Biejn diagä bal najc guiraa resoldaad ni rbijb cabaii: najcreni tio'p gayuu miyon.

<sup>17</sup> Scree bahuiä lo bacal recabaiiga näjza renani bijb recabaiiga. Lastoo reni bijb recabaii caj te guuib, najcni xniaa näj zul näj gojtz. Dxejcru yejc recabaiiga najc si'c yejc te beedz. Ro'reni carii bajl näj gujxh, näj sufr.

<sup>18</sup> Ni riojn cuaa beñ gujt xcuent guichon replaag nani carii ro' recabaii, xcuent bajl näj gujxh, näjza sufr.

<sup>19</sup> Recabaii runnäj daan ro'reni näjza xhibaanreni, sa'csi xhibaanreni najc si'c bäl, yu' yejcreni, näj ni'c runnäjreni daan.

<sup>20</sup> Luxh guiraa rebejn nani di replaagre nugu't, direni nusiejch lajzreni xcuent ni cayujn naareni, te rajnreni rebendxab, näjza rebanäjb ni nac-chee oor, näjza pla't, näjza latón, näjza guij, näjza yajg. Luxh rebanäjbga di gacdi fiireni, di diajgreni jiejn, di gacdi sareni.

<sup>21</sup> Diza rebejnga nusiejch lajzreni xcuent xcälru'g'u'treni, xcälrujreni yälbidxaa, xcälresnäjreni beñ ni di gac chäälni, niclaza xcälgubaanreni.

## 10

### *Te angl ni ca' te guijtz*

<sup>1</sup> Bahuiä stee xangl Dios ni rajp yälrnibeduxh, siädjiäjtnei xhaguibaa, li yu'ni neñ bäj, yejcti dejd xquitgubijdx, luxh lojni najc si'c gubijdx. Reni'ni najc si'c tio'p pilajr bajl.

<sup>2</sup> Ca'ni te librbäze', naxhal libre'ga. Bazujni ni'ni ladbee loj nisdoo, bazujni ni'ni ladbäjgw lo yuj,

<sup>3</sup> dxejc guredxaduxh anglga si'c rbedxa' beedz. Dxejcru gunii guigajdz guzii sigajcsa.

<sup>4</sup> Che gulujx gunii guziiga, narä rlazä nucuaä lo guijtz nani guniireni, per biejn diagä xse' tej ni gunii xhaguibaali, najni loä:

—Guluchedzu'tz rediidxga nani gunii reguzii, na'c gucuaaluni.

<sup>5</sup> Angl nani suj ni'ni loj nisdoo näjza loj yuj, guläs naani ladbee nez xhaguibaa.

<sup>6</sup> Guniliini diidx con laj GuebDios ni nabajn par tejpas, ni guläxtiej xhaguibaa näjza guiraa ni tre' xhaguibaa; ni guläxtiej guedxliujre näjza guiraa ni tre' lojni; ni guläxtiej nisdoo näjza guiraa ni tre' neñ nisdoo. Räjjni:

—Diru redxejre gaclaa.

<sup>7</sup> Che guidzujntis dxej ni agojl goł ni najc rgajdz xangl Dios ni ca' trompe't, dxejc abaza' rextidxxhiga'tz Dios, si'c ni basule' redade' ni gunii xtidx Dios agujc xchero.

<sup>8</sup> Dxejc gunisac xse' nani gunii xhaguibaali, stehuält biejn diagä caniini loä, najni:

—Huij, te xca'lu libre' ni naxhal ni yu' ladznaa angl ni suj te laad ni'ni loj nisdoo, stelaad ni'ni lo guedxliuj.

<sup>9</sup> Dxejcti hua'ä lo anglga, räpä lojni:

—Guniidxlu libre'ga.

Laani najni loä:

—Anire, cua'ni, gudajwni. Sun nanlaani xque'lu, niluxh ro'lu sajcti nejxh si'c dzujn.

<sup>10</sup> Dxejcti cua'ä libre'ga lo naa anglga, dxejc gudauäni. Ro'ä guyu'ni nejxh si'c dzujn, luxh che gudamäni, lacti guc nanlaani xque'ä.



<sup>11</sup> Dxejc najni loä:

—Nanab chasulesaclu xtidx Dios xcuent nani churu gac loj xhidalduxh bejn, näjza guejdx, näjza renani rnii garen-garen xtiidxreni, näjza loj rerei.

## 11

### *Tio'p niguii ni rusule' xtidx Dios*

<sup>1</sup> Dxejcti baniidxni loä si'c te biquii nani rurejxh. Dxejc guyu' chu naj loä: —Huisu te charejxhlu xquidoo Dios, näjza piändxan, balabza baltü bejn rusuxhijb nenga.

<sup>2</sup> Na'c gutiexhlu gabi lole' guidooga, sa'csi ni'c acua' rebenzizjtni te tiubitio'p bäii chaläjsreni guedxdxan si'ctis ni rlanjreni.

<sup>3</sup> Narä sudedä yälrnibee lo tio'p dade' ni guinii diidx xcuentä, luxh guideb najcwreni ladyas, susule'reni xtidxä lojreni te mił tio'pgayuu gayojn dxej.

<sup>4</sup> Guiro'preni najc si'c tio'p yag oliib, si'c tio'p gandilieer ni suga' nez lo Dios.

<sup>5</sup> Palga yu' chu bejn rlanj gun latsiaj loj redade'ga, sirii bajl ro'reni te chec nani rdxe'ch lojreni. Luxh si'cpac riäjł guet chutis ni rlanj gun latsiajreni.

<sup>6</sup> Guiro'p redade'ga rajp yälrnibee te gusaüeni xhaguibaa te na'c jiajb nisguij guideb nen redxej nani cagusule'reni xtidx Dios, rajpzareni yälrnibee te guchaareni nis te gacni rejn, rajpzareni yälrnibee te jiädgusacsí xhitis plaag lo guedxliuj, si'ctis huält ni rlanjreni.

<sup>7</sup> Che luxh gusule'reni xtidx Dios, dxejcti ni najc si'c te man nialajz sirii gabijł te jiädchagdijłni guiro'preni. Sujnni gaanreni, sugu'tnireni.

<sup>8</sup> Dxejcti jia'n guiro'p rebengutga lad caii xten guejdx cadro bacuaareni Dad Jesucrist lo cruzj. Guejdxroga rbälajzareni Sodoma näjza Egipto.

<sup>9</sup> Chon dxej garol guiraa rebejn ni siädä guedxbäz, ni siädä guedxro, ni najc garen-garen raz, ni rnii garen-garen xtidx guiraa rebejn guedxliuj, suhuui loj guiro'p rebengutga, direni gusaan guiga'tzreni nen baa.

<sup>10</sup> Guiraa renani nabajł lo guedxliujre sibalazduxhrene sa'csi gujtreni. Luxh sa'csi rbalajzduxhrene, suxhalzareni xhi xca' sa'reni; sa'csi guiro'p redade' ni basule' xtidx Dios baxhał trabajwduxh lojreni.

<sup>11</sup> Che gudejd chon dxej garolga, baspañsac Diosreni, dxejcti huitiesacreni. Guiraa reni bahuii lojreni, bidxebduxhrene.

<sup>12</sup> Dxejcti biejn diaj guiro'preni xse' te ni canii dipduxh desde xhaguibaali, räjpni lojreni:

—Colchä'p jiaare.

Dxejcti huä'preni xhaguibaa lo te za, luxh guiraa renani rdxe'ch lojreni, bahuiireni huä'preni xhaguibaa.

<sup>13</sup> Lagajc orga gujc te xuduxh, gurebä'n tej lo tzuu la' guejdxga, gujt gajdz mił bejn lo xu ni gujc ro'c. Rebejn ni bia'n ro'c bidxebduxhrene, guslojreni calä'preni xpala'n Dios ni yu' xhaguibaa.

<sup>14</sup> Si'cti gulujx ni rojp casioon, luxh agojł guidzujn ni riojnga.

### *Ni rajc gajdz xangl Dios gol trompe't*

<sup>15</sup> Che bił ni rajc gajdz xangl Dios trompe't ni ca'ni, dxejc biejn xse' reni dipduxh canii xhaguibaa, cayäjpreni:

Xcälrnibee guedxliuj agudejd ladznaa Dad Dios näjza Jesucrist; luxh laani sinibeeni par tejpas.

<sup>16</sup> Galbitajp rebengool nani sobga' lo tron xtenreni cadro rnibee Dios, biabrolojreni nez loj Dios te calä'preni xpala'n Dios.

<sup>17</sup> Räjpreni:

Xquixtioste Guejblu Dios, nani rajp yälrnibeduxh,

nani najclu, nani gujclu, nani churu gac,  
sa'csi acua'lu xcäl'rnibeduxhlu te agusloj canibeelu.

<sup>18</sup> Bidxe'ch reben̄ guedxliuj lojlu,  
luxh abidzuj̄n dxej guidxe'chlu lojreni,  
gunlu yäl̄guxhtis reben̄gut, te gudeedlu cossa'c loj rexpejn̄lu,  
lo renani gunīn xtid̄x Dios, lo renani huililaj̄x xtiid̄xlu, lo renani rusuxhijbni  
nez lojlu;  
reben̄proob sigajc reben̄ro.  
Abidzuj̄nza dxej che cuäcäjlu renani bejn̄ daan guedxliujre,  
te nitlojreni par tejpas.

<sup>19</sup> Dxejc bixal xquidoo Dios ni yu' xhaguibaa, nen̄ guidooga bien̄ te guijn̄  
cadro yu' guij̄ cadro caj rediid̄x ni bia'n Dios loj rexpejn̄ Israel. Dxejcti lacti  
bidinya', lacti guiniiza reguziro, gujc te xu, dxejc biał̄jb te guixobroduxh.

## 12

### *Te gunaa näj te ni najc si'c te gutiatzro*

<sup>1</sup> Dxejcti guyu' te senro xhaguibaa: te gunaa ni najcw si'c gubijdx, ni'ni sojb  
bäi, yejcn̄i yu' te coron̄ ni nac-chee tzubitiio'p balxhaguibaa.

<sup>2</sup> Gunaare nuxi'n̄ni. Rbedxa'ni sa'csi agusloj cayu' yoob xque'ni te gaal  
xi'n̄ni, cadejdni trabajwduxh.

<sup>3</sup> Dxejcti bahuiä stee seen xhaguibaa: te manxniaa ni rujn̄ lojni si'c loj te  
gutiatzro, manduxhni. Yu' gajdz bitiuvejcn̄i, sojb tzuu xca'chni. Tejga yejcn̄i  
yu' te coron̄, najcreni gajdz coron̄.

<sup>4</sup> Dxejcti xhibaanni cagobxajxhni ni riojn̄ la' rebalxhaguibaa, dxejcti  
bacuaanireni lo guedxliuj. Dxejcti biädsu manroga nez loj gunaaga ni ameer  
gaal xi'n̄ni, te gauni xi'n̄ni che gaalni.

<sup>5</sup> Dxejcti gojl̄ xi'n̄ gunaaga, najcn̄i te niguii, luxh te bar guiib nungäj̄l  
guinibenäjni lo guiraa reben̄ guedxliuj. Guläsgajcreni bāzga te sanärenini  
xhaguibaa cadro rnibee Dios.

<sup>6</sup> Dxejcti baxun̄ gunaaga, siini nez loj reyubijdz cadro yu' te lajt ni ba-  
suee Dios te cuäāzni, te ro'c guyaannini te mił̄ tio'p gayuu gayojn̄ dxej.

<sup>7</sup> Dxejc guyu' guer̄ xhaguibaa, xangl Dios nani laa Miguejl̄ näj resa'ni  
bacuanäjreni gutiatzro. Gutiatzroga näjza rexanglni gudil̄duxhrenei,

<sup>8</sup> Niluxh direni niujn̄ gaan, luxh di niajcdiru nia'n manga näjza resa'ni  
xhaguibaa.

<sup>9</sup> Dxejcti bacuaareni manroga näjza resa'ni lo guedxliujre. Laani najc ni  
gujc bäl̄ galoroga, ni najc gueb̄ Ben̄dxab, ni laaza Satanás, ni rusguee guideb̄  
guedxliujre.

<sup>10</sup> Dxejcti biejn̄ diagä xse' te ni canii dipduxh xhaguibaali, räjpni:

—Abidzuj̄n yäl̄ruslaa lo dojl̄, näj yäl̄milagwr, näj yäl̄rnibero xten Dios, näjza  
yäl̄rnibee xten Jesucrist, sa'csi agulääreni bejn̄ nani entis rbe'c xquej rexpejn̄  
Dios loj Dios dxej-yääl.

<sup>11</sup> Laareni gujc bejn̄reni gaan loj bendxobre, xcuent xtiejn̄ ni najc Xiil  
xten Dios, näjza sa'csi huililazsa'creni xtid̄x Dios, dizareni nidxejb mase  
niejtzareni.

<sup>12</sup> Ni'cn̄i, guiraa la'tu ni yu' xhaguibaa näjza gueb̄ xhaguibaa,  
col̄quibalazduxh. Niluxh riaduxhnu renani rbājz lo guedxliujre, näjza lo  
nisdoo, sa'csi abiāj̄t ben̄dxab lo guedxliuj, luxh cadxechduxhni sa'csi anajnni  
guxii dxej rajpni.

<sup>13</sup> Che gucbee gutiatzroga abacuaarenini lo guedxliuj, birinajlni gunaa nani guyu' xi'ngaanni te gusacsínini.

<sup>14</sup> Dxejc badeed Dios lo gunaaga tio'p xhiga xten bisiro, te gac gutajtnei nez lo reyubijdz cadro nac-chee cadro cuääzni. Chon ijz garol guyu'ni ro'c, nacuatzlojni lo bälga.

<sup>15</sup> Dxejcti ro' gutiatzrore birii nis si'c te gueuu te nuslo'ni gunaaga.

<sup>16</sup> Dxejc gucnäj guedxliuj gunaaga, baxhal guedxliuj ro'ni, gu'ni gueuu ni birii ro' gutiatzroga.

<sup>17</sup> Dxejc bidxechduxh gutiatzroga loj gunaaga, ni'c sääni te gucuanäjni sgaai rexi'n gunaaga, renani cagusoob diidx ni gunibee Dios, renani rililajzza xtidz Jesucrist.

## 13

### *Tio'p manduxh*

<sup>1</sup> Narä gusuä lo yujxh ni tre' ro' nisdoo, dxejc bahuiä carii te manro lo nisdoo. Sojb tzuu xca'chni. Dxejc lo tejga xca'chni yu' te coron. Yu' gajdz bitiuvejcti cadro caj diidx ni rniyaj Dios.

<sup>2</sup> Manduxhre najc si'c te beedz, ni'ni najc si'c ni' te os, luxh ro'ni najc si'c ro' te bedzro. Gutiatzroga badeed xcälmlaagwrni lojni, näjza tron cadro rbejni, näjza xcälrnibeduxhni.

<sup>3</sup> Dxejcti bahuiä te yejcti najc ascanu yu' chu batiuugni con madxed, ameer guetni, luxh biajc cadro guruuj yejcti. Ni'cni rdxeloduxh guiralii rebejn guedxliuj, sanajlreni manduxhga.

<sup>4</sup> Bazuxhijbreni gojnreni gutiatzroga sa'csi badeedni xcälrnibeeni lo manduxhga, dxejctireni bazuxhijbreni gojnzareni manroga, räjpreni:

—¿Chu stee najc si'c manrore, ä? ¿Chu laa ni gac guichagdijlni, gucuanäjnini?

<sup>5</sup> Yu' chu badeedza lo manroga diidx dxejcti gusloj caniini guiraloj didx-guyalajz, diidx ni rniyaj Dios. Yu'za chu badeed ga'pni yälrnibee tiubitio'p bäii, gunni si'ctis ni rlajzni.

<sup>6</sup> Baxhalni ro'ni, guniyaduxhni Dios, guniyajni laj Dios, näjza xquidoo Dios, nalajznu renani yu' xhaguibaa.

<sup>7</sup> Dxejcti yu' chu basaan bacuanäj manroga rexepejn Dios. Bejn manroga gaan rexepejn Dios, dxejcti gunibee manroga guiraa reguedxbäz, näj guiraa rebejn ni rni garen-garen xtiidxreni, näjza guiraa reguedxroduxh.

<sup>8</sup> Dxejcti guiraa reben guedxliuj sazuxhijbreni, sagajlreni manroga, guiraa rebejn nani di lajreni nicaj lo libr xten yäl'nabajn xten Xiil nani gujt xcuentreni, sa'csi galooli guirixtiej guedxliuj cuaj lo guijtzre laj guiraa ni gac xpejn Dios.

<sup>9</sup> Palga yu' chu rlajz cuadiajgni, sugucuadiagsa'cni.

<sup>10</sup> Palga yu' chu nungäjlni jiäuu nen latzgüiib, siäupacni. Chutis ni ju't te bejn con te madxed, con madxedza guetni. Ni'cni renani anumbee Dios, riäjlni gunreni huant, chanuutis chalilazsa'cni xtidz Dios.

<sup>11</sup> Dxejcti bahuiä loj stee manro, cariini nen yuj. Sojb tio'p xca'chni si'c xca'ch te xiil, rniini si'c rni te gutiatz.

<sup>12</sup> Luxh rnibeezani si'cni rnibee manroga lagajc nez loj manroga, rujnzani rusuxhijb reben guedxliuj loj manrogalooga ni guruuj yejcti, luxh biajc yejcti.

<sup>13</sup> Manroga ni birii nen yuj rujnzani remilagwrro, rujnni rtejb bal-guiboo xhaguibaali, rtejbni lo guedxliuj nez loj rebejn.

<sup>14</sup> Rusgueeni rebejn nani nabajn lo guedxliuj xcuent remilagwrrro nani rujnni nez loj manrogalooga. Guinibeeni gun reben guedxliuj te banäjb si'c najc manroga nani batiuug madxed yejcnì, luxh biajczà yejcnì.

<sup>15</sup> Dxejcti man ni rojppa baspajn banäjbga te guinii banäjbga, dxejcti gunibeeni guet guiraa rebejn nani di guzuxhijb lojni te ganrenini.

<sup>16</sup> Gunibeezani chu bejn te seen lo cuajni o naani ladbèe, guiraa rebejn ni xhet rajpdi, guiraa rebejn ni rajp, guiraa reni najc mos, guiraa reni najc lam, guiraa reni najc benro, guiraa reni najcza benbáz.

<sup>17</sup> Gunibeezani digacdi sii, digacdiza guto' bejn palga xhet seendi caj naani o lo cuajni. Seenga najc laj manga o numbr xten laj manga.

<sup>18</sup> Dee rquiin yäl'najn. Renani rajp yäl'najn sugulabreni xseen manga, numbrga najc si'c xnumbr bejn; numbr xten manga najc xho'p gayuu gayonbixho'p.

## 14

### *Dij ni rol te gayuu tiubitajp mil*

<sup>1</sup> Che bahuiä stee, bahuiä suga' Xiil xten Dios yejc dajn ni laa Siön. Sugañjni te gayuu tiubitajp mil bejn nani caj lo cuajreni laj Xiil näj laj Xtdadni.

<sup>2</sup> Biejn diagä rubej xhaguibaali, rubeduxh, riejnni si'c rubej xhidajl gueuro, näj te guziro; riejnzani si'cni riejn che cayol xhidajl bejn ni rol arp.

<sup>3</sup> Cayolreni te dicoob nez loj tron cadro rbej nani rnibee, näjza nez loj guidap reni najc si'c man ni nabajnpac, näjza nez loj rebenool. Rutliidi gujc bisieeddi dijga, xtebtis tegayuu tiubitajp mil bejn nani gulaa lo reben guedxliuj.

<sup>4</sup> Reniguiire najc renani gajd xhin con gunaa; nicla tejreni di niesnäj te gunaa, najcreni ben dxan. Laareni rinajlreni Xiil xten Dios cadrotis sääni. Redee gulaa lo reben guedxliuj si'c te gojn lo Dios näjza lo Xiil xten Dios. Gojnre najc si'c gonganid ni rudeed bejn xten te cose'ch.

<sup>5</sup> Nicla tej didx-xhii di guirii ro'reni, sa'csi xhetliidi xtojlni, nayareni suga'reni nez loj tron cadro rnibee Dios.

### *Rediidx nani bazule' jion rexangl Dios*

<sup>6</sup> Dxejcti bahuiä loj stee xangl Dios, rutajtñi nez galäii xhaguibaa, siädnäni diidx ni najc par tejpas xten Dios te gusule'nini loj reben guedxliuj, guiraa lo reguedxro, guiraa lo reguedxbáz, loj reben ni najc garen-garen raz, nani rñii garen-garen xtiidreni.

<sup>7</sup> Dipduxh guniini, räjpni:

—Colguidexjb Dios, colguiliä'p xpala'n Dios sa'csi abidzujn or gunni yälguxhtis guiraa rebejn. Colguzuxhijb loj nani benchee xhaguibaa, näjza guedxliuj, näjza nisdoo, näjza cadro rliejn nis.

<sup>8</sup> Dxejcti siädnajl stee angl nani canii:

—Abiajb, abiajb guejdxroga nani laa Babilonia, sa'csi baquiielni guzojz guiraa reguejdx xten guedxliuj xcuent xcäl-latsiajni, xcuent dojl ni bejnñi guideb lagaa; najcni si'c reni rä' nejp.

<sup>9</sup> Dxejc biädnajl ni riojn xangl Dios, dipduxh guniini, Räjpni:

—Palga yu' chu bejn guzuxhijb loj manroga o loj banäjb ni najc si'c manroga, o xcäjbnì xca'ni xseen manro lo cuajni o lo naani,

<sup>10</sup> sidxechduxh Dios lojni, di xcälguuxhtisduxh Dios tedcaj lojni. Sidejdpacni trabajwduxh nen balro näjza azufr nez loj rexangl Dios näjza nez loj Xiil xten Dios.

<sup>11</sup> Luxh gujxh xten reni cayejc sä'p nez lojreni guixe-guixee par tejjpas. Digacdi gusilajzreni dxej-yääl, renani guzuxhijb, reni gojñ manroga näjza reni gojñ banäjb ni najc si'c manroga, chutisza ni rca' seen xten lajni.

<sup>12</sup> Ni'cni renani huililajz xtidx Dios, reni rusoobza xtidx Dios, ni rinuutis lo xnezuy Jesucrist, nanab di guidxajgreni.

<sup>13</sup> Biejn diagä xse' te ni caniini loä xhaguibaali:

—Scree bacuaa: “Chicbaa rebejn ni guet najli nani rililajz xtidx Jesucrist.” “Guliini”, naj Sprit Dxan xten Dios: “Te gusilajzreni, na'cru gunreni dzuun, sa'csi anancheenu xhi dzuun bejnreni.”

### *Yäl'nasa'c ni rudeed guedxliujre*

<sup>14</sup> Dxejcti bahuiä tre' te bänol, loj bänolga sobga' te ni najc si'c Xi'n Dios ni gujc Niguii. Yu' te coron ganaxduj oor yejcti, dxejcti naani ca'ni te guiboz ni caduxh ro'ni.

<sup>15</sup> Dxejcti birii te xangl Dios loj xquidoo Dios, dipduxh caniini loj ni sobga' loj bäjga, räjpni:

—Basäl xquibozlu, batiuug, te batie' yäl'nasa'c, sa'csi agojl or guire' yäl'nasa'c, guideb guedxliuj aguyajlni.

<sup>16</sup> Dxejcti nani sobga' lo bäjga basniibni xquibozni, batiuugni yäl'nasa'c ni caj lo guedxliujre.

<sup>17</sup> Dxejcti stee xangl Dios birii neñ guidoo ni yu' xhaguibaa, ca'zani te guiboz ni caduxh ro'ni.

<sup>18</sup> Dxejcti birii stee xangl Dios nez loj piändxan xten Dios. Laani rajpni yäl'nibee lo balro. Dipduxh guniini, räjpni loj ni ca' guiboz ni caduxh ro'ni, räjpni:

—Basäl xquibozlu nez ni' reyaguub, batiuug guiraa reresim uub ni yu' lo guedxliujre, sa'csi aguyajlni.

<sup>19</sup> Dxejc batiuug anglga guiraa reresim uub ni yu' lo guedxliujre nalajznu rebenguidx, basäl'nireni neñ tanc cadro guläjreni yejcti sa'csi rdxechduxh Dios lojreni.

<sup>20</sup> Dxejcti baläjreni yejc reuub nez orii te guejdx. Biriiduxh rejn yejcteni, gutiäs rejnga, bidzujn rejnga ro'li recabaii, gujcti si'c che riu' nisro gueuu, biäjtni si'cti choñ gayuu mił metr guideb gabi cadro baläjreni yejc reuub.

## 15

### *Guigajdz xangl Dios näj lult xcäl'guxhtis Dios*

<sup>1</sup> Dxejcti bahuiä stee senro xhaguibaa, nani bascheloduxh narä. Bahuiä loj gajdz xangl Dios, tejjgareni ca' te plaag ni gusacsí reben guedxliuj. Redeetis najc lult, sa'csi che ted redee ati agulujx yäl'rdxe'ch xten Dios.

<sup>2</sup> Dxejcti bahuiä loj tej ni najc si'c te nisdoo ni najc si'c biidr nu'chni bajl. Dxejcti galäi nisdooğa suga' renani bejn gaan loj manroga näjza lo banäjb ni najc si'c manroga, ni bejnza gaan di nica'reni seen xten lajni. Ca'reni arp xten Dios.

<sup>3</sup> Cayolreni dij xten to Moisés ni gujc xpejn Dios, cayolzarenı dij xten Xiil xten Dios. Scree najc dijga:

Sacduxh, ruschelöj guiraa redzuun ni rujn Guejblu, Dad Dios, ni rajp guiraa yäl'nibee.

Rujn Guejblu ganax dzunsa'c, rnii Guejblu ganax didxlii.

Guejblu rnibee loj guiralii reguejdx ni yu' lo guedxliuj.

<sup>4</sup> Bahuii, Dad, ¿chu laa ni di guidxajb Guejblu ni di guiliä'p xpala'n Guejblu? Sa'csi Guejbtislu najc dxan, ni'cni guiraa reguejdx ni yu' guedxliuj siädzuxhijbreni,

siädgajñreni Guejblu,

sa'csi abaluiloj guiraa rextzunsa'cpac Guejblu.

<sup>5</sup> Dxejcti bahuiä xhaguibaa, bixal ro' yu' ni najc dxanro neñ guidoo, cadre yuchee guij cadre caj xleii toMoisés.

<sup>6</sup> Ro' yudxanroga birii gajdz xangl Dios ni ca' plaag te gusacsíreni reben guedxliuj. Najcwreni te ladliñ ni najc nolbäj, ni rdimbichaduxh. Dejd si'c te cinturon lastooreni ni najc ganaxduj oor.

<sup>7</sup> Dxejcti yu' tajp reni najc si'c man nabajñ ni yu' nez loj Dios xhaguibaa. Tej reni badeed loj tejsa reanglga te co'p ni najc ganaxduj oor. Guidxa tejsa rexhijgga xcälguختيسرو Dios nani nabajñ par tejsas.

<sup>8</sup> Gudxaj guidoo ni najc yudxanroruga gujxh ni siääd xcuent xcälmilaagwr, xcälrdimbichaduxh xten Dios. Rut gujcdi biu' neñ yudxanroruga che gulujxli guiraa replaag ni ca' guigajdz reanglga.

## 16

### *Rexhij ni guidxa xcälguختيس Dios*

<sup>1</sup> Dxejcti biejn diagä xse' te ni canii dipduxh xquidoolini, caniini loj guigajdz rexangl Dios, räjpni:

—Cołchäj, cołchasloj guigajdz rexhijgga lo guedxliuj, cołca' rexhij ni guidxa xcälguختيس Dios.

<sup>2</sup> Anglalo ni huij, baslojni ni yu' neñ xhijg ni ca'ni lo guedxliuj. Dxejc loj guiraa rebejn nani caj xseen manduxh, reni rusuxhijb, rajñreni banäjb ni najc si'c manroga, birii tiejxhni te guedxyanduxh ni najc si'c cancer.

<sup>3</sup> Dxejc ni rojp anglga baslojni ni yu' neñ xhijg ni ca'ni loj nisdoo, te bejnii gubixhloj nisdooaga gujcnii si'c rejn xten te bengut. Dxejcti gujt guiralii reman ni yu' lo nisdoo.

<sup>4</sup> Ni riojn anglga baslojni ni yu' neñ xhijg ni ca'ni loj regueuu näjsa cadre rliejn nis. Gubixhlojreni gujcreni rejn.

<sup>5</sup> Dxejcti biejn diagä gunii angl ni rajp yälñrñibee lo nis räjpni:

—Huenduxh najc Guejblu Dad ni najc naj sigajc gujc Guejblu galoo, dxanduxh najc Guejblu sa'csi cayujñ Guejblu yälguختيس redzunguijdx.

<sup>6</sup> Sa'csi laareni baxhe'reni rejn, bagu'treni rexpejnlu näjsa renani gunii xtiidxlu, luxh naj badeed Guejblu rejn cayä'reni. Si'cpac nungäjñ gacreni.

<sup>7</sup> Dxejcti biejn diagä canii steeni lagajc lo piändxan, räjpni:

—Guliipacni Dad Dios ni rajp guiralii yälñrñibee, xcälguختيس Guejblu najc laaca, si'c riäjñ gacni.

<sup>8</sup> Dxejcti ni rdajp anglga cua' xhijg ni ca'ni, baslojni ni yu' neñ xhijgga lo gubijdx, te badeedni lo gubijdx yälñrñibee guze'cnäjñi rebejn guiboo.

<sup>9</sup> Guiraliireni gusloj cayejcreni, lacti nanladuxh, dxejc gusloj caniyajreni Dios ni rajp yälñrñibee loj recosga. Niluxh direni nusiechłajzreni, nicłaza niliä'preni xpala'n Dios.

<sup>10</sup> Dxejcti ni rajc rgaii anglga cua' xhijg ni ca'ni baslojni ni yu' neñ xhijgga lo tron cadre rñibee manroduxh. Bicäjy guideb cadre rñibee manduxhga, luxh rebejn rauya'tisreni lujdxreni sa'csi cayajcreni yälñayanduxh.

<sup>11</sup> Guniyajreni Guejb Dios ni yu' xhaguibaa sa'csi rajcreni yälñayanduxh, xcuenta rexquedxnayanreni. Luxh direni nusiechłajzreni xcuent xtojñreni.

<sup>12</sup> Dxejcti ni rajc xho'p anglga cua'ni xhijgñi, baslojni ni yu' neñ xhijgga loj gueuro ni laa Eufrates. Gueuga gubidzlii nisni te guc-chee te nezyuj xten rereii ni jiaäd nez cadre rliejn gubijdx.

<sup>13</sup> Bahuiäza birii ro' gutiatzro, näjza ro' manro, näjza ro' ni najc profe't ni rusguee, birii choñ spritguijdx ni najc si'c bedz,

<sup>14</sup> sa'csi najcreni respit xten bendxab, rujnreni milagwr, senro. Rijreni loj guiraa rereii loj guedxliuj te gutie'reni guiraa bejn loj guedxliuj te gac gue'roduxh, te gucuanäjreni Gueb Dios ni rajp guiralii yäl'rnibee che guidzujjni lo guedxliuj.

<sup>15</sup> "Narä siädxhiga'tzä si'c riääd te gubaan. Chicbaaza renani cabäjz, cagutie'chreni bacal lojni che guibi'ä si'c rujn nani najcw guiraa xhajbni, te na'c guiga'ni xhabäälni, jianxtujjni che guibi'ä."

<sup>16</sup> Dxejc gutie'reni guiraa rebejnre te lajt ni laa lo didx hebre "Armagedón".

<sup>17</sup> Dxejcti ni najc rgajdz anglga cua'ni xhijgni baslojni ni yu' nen xhijgni loj bej. Dxejcti biejn xse' te ni gunii dipduxh xquidooli Dios xhaguibaali cadro yu' tron cadro rnibee Dios, räjpni:

—Agujcni, agulujxhni.

<sup>18</sup> Dxejc guyuduxh yäl'rdinya' näj guziro. Gujzca te xuroduxh lo guedxliuj, te xu sa' ni gajdpac gac.

<sup>19</sup> Che gujc xuroga, biräjs guedxroduxhga, gujcnj choñ la', dxejcti gurebän guiraa reguejdx guideb guedxliujre. Dxejc banaj lajz Dios guedxro ni laa Babilonia, bialoj bejn Dios yälguxhtis guedxga.

<sup>20</sup> Li gubicaj, gunitloj reyuj ni tre' lo nisdoo, gunitlojza redajn.

<sup>21</sup> Xhaguibaali biajz te guixhobro yejc rebejn; tejga guixhobga na' si'cti tiuu kil. Guniyaj rebejn Dios xcuent guixhobroga, sa'csi cuentroduxh gujcnj.

## 17

### *Gun Dios yälguxhtis te gunadxab*

<sup>1</sup> Lo regajdz anglga ni ca' gajdz xhijg birii tej ni gunii loä, najni:

—Gudaa ree te guluiä lojlu retrabajwduxh ni ted gunadxabre ni sobga' cadro yu sijn nis.

<sup>2</sup> Guiraa rereii lo guedxliujre bennäjreni gunaaga dojl, sigajzca guiraa reben guedxliuj bennäjreni gunaaga dojl. Gusosnäjreni gunaaga bejnreni si'ctis ni rlajzreni.

<sup>3</sup> Dxejcti huinäni narä si'c lo te bacal nez lo reyubijdz. Bahuiä loj te gunaa, bijbni dejtz te manro ni najc xniaa, luxh guidebni caj diidx ni rniyaj Dios. Gajdz najc bitiuvejcnj, sojbza tzuu xca'chni.

<sup>4</sup> Gunaaga najcw te lad moraad cu xniaa, sucheduxh gunaaga oor, näj reguisa'c, näj perl ni sa'cduxh. Ca'ni te copro ni najc ganaxdij oor ni guidxa ganax recosguijdx, recosdxab ni bennäjni reben guedxliuj.

<sup>5</sup> Caj te diidx lo cuajni, luxh rut racbeedi xhi sälojni. Scree nrii diidxga: "Babilonro, xnan regunadxab, xnan recosdxab ni rajc lo guedxliuj."

<sup>6</sup> Bahuiä agusojz gunadxabga. Agusosnäjni xtiejn rexpejn Dios nani bagu'tni, näj xtiejn renani basule' xtidz Jesucrist ni bagu'tzani. Che bahuiä lojni, bidxeloduxhä.

<sup>7</sup> Dxejcti gunii anglga loä, najni:

—¿Xhicuent rdxelojlu, ä? Narä siniä xhi säloj gunadxabga, näjza manroga ni sojb gajdz bitiuvejcnj näj tzuu xca'chni.

<sup>8</sup> Manroga ni bahuiilu gubajjni galoo, niluxh agunitlojni naj, luxh agojl guiriini gabijl, dxejcti sinitlojni stee, sejtni par tejpas. Rebejn ni nabajn lo guedxliuj nani di lajreni nicaj lo guijtz xten yäl'nabajn xten Dios, guijtz ni guc-chee che birixtiejli guedxliuj, rebejnğa sidxeloduxhreni che fiireni loj manroga nani gubajn galoo, ni gunitloj, niluxh naj agubansacni.

<sup>9</sup> 'Ree nanab ga'pni yälñajn. Gajdz rebitiuyejčni säloj gajdz dajn cadro sobga' gunaaga,

<sup>10</sup> sälojzareni gajdz reii. Agujc gaii reiiga ni cayajb. Tej rereiiga canibee naj. Stee reiiga churu jääd. Luxh che jääd lult reiiga, guxii dxej guinibeeni.

<sup>11</sup> Manro ni gubajñ galoo, ni agunitloj naj, ni'c rac xhujñ reii, najczani tej loj guigajdz rerei, luxh sinitlojni, sejtni par tejpas.

<sup>12</sup> 'Guidzoo rexca'chni ni bahuiilu säloj tzoo reii. Gajdreni guisloj guinibee naj. Laareni näjza manroga xca'reni yälñabee teb or, nalajznu guxii dxej.

<sup>13</sup> Tejtis xhigab gun rereiiga, gudeedreni xcälñadipreni, xcälñabeeereni lo manroga.

<sup>14</sup> Laa redee ni sucuanäj Xiil xten Dios. Dxejcti sujn Xiilga gaan lojreni sa'csi laani najcni Dad ni rnibee loj guiraa redad, najcni Reii ni rnibee lo guiraa rerei. Luxh renani siädñajlni najc reni agurejdxni, reni aguleni, sisiudzu'tznäjreneni.

<sup>15</sup> Dxejcti najza anglga loä:

—Reni ni bahuiilu cadro sobga' gunadxabga säloj guiraa guejdx, guiraa beñ guedxliuj, guiraa beñ ni rñii garen-garenca xtiidxreni, ni siäd garen-garen reguejdx.

<sup>16</sup> Guitzoo reca'chga näjza manroga ni bahuiilu, sidxe'chreni loj gunadxabga, suro'nreni gunadxabga, susa'nreni gunadxabga xhabäälni, sajwreni bältiejxhni, suze'creni gunadxabga lo guiboo.

<sup>17</sup> Sa'csi abasniib Diosreni te gunreni tejsi xhigab, te gudeedreni xcälñabeeereni lo manroga che guidzujñli dxej ni chale' guira'ti ni gunii Dios gac.

<sup>18</sup> Gunadxabga ni bahuiilu säloj guedxro ni rnibee loj guiraa rerei loj guedxliuj.

## 18

### *Xho jiajb guedx Babilonia*

<sup>1</sup> Dxejcti bahuiä loj stee xangl Dios ni siädñajt xhaguibaa. Siädñani yälñibeduxh, xcälñdimbicha'ni bazanij loj guedxliujre.

<sup>2</sup> Dxejcti dipduxh gunii anglga, guredxa'ni:

—Abiajb, abiajb guedx Babilonia, agubixhlojni, naj najcni guejdx cadro rbäjz rebenñxab, ro'c rcañzaj guirali cuaa spritdxab, najczani xpitiääz guiraa reman xhaguibaa ni najc mandxab, mandxuudx.

<sup>3</sup> Sa'csi guiraa reben guedxliuj agusojzreni xcuent dojl ni bennäjreni gunadxabga, guiraa rerei loj guedxliuj bejn dojl guälñäjreni gunadxabga, luxh guiraa reben guedxliuj ni ruto' abejnreni ganduxh, agujcreni ri'cw xcuent recosdxab ni rujñ gunabdxabga.

<sup>4</sup> Dxejcti biejn diagä xse' stee nani canii xhaguibaa:

—Colguirni guejdxga repenä, te di näj la'tu gunnäjtü guonadxabga dojl, te di tedtu trabawduxh lo replaag xtenni.

<sup>5</sup> Sa'csi yuduxh rextojñli, abidzujñreni xhaguibaali, luxh abanajza lajz Dios rextojñli.

<sup>6</sup> Colgudeed loj gunaaga sigajc ni badeedni lojreni. Colquix loj gunaaga tio'pli huält lo ni bejnni laani. Nen co'p cadro badeedni gu' bejn (te trabajw ni bateedni bejn), lagajc nenga coljejn te ni najc tio'p huält maazru fuert yä gunadxabga, nalajznu tedni trabajw tio'p huält.

<sup>7</sup> Lacti gulä'p gunaaga xpala'nni, gubajñni si'ctis ni rlanjzni lo guedxliuj. Naj colguteed gunaaga trabajw, si'cti mediid ni gulä'pni xpala'nni; si'cti mediidza



ni bibalaznäjni mood ni gubajñni, sigajcza gac-huin lastooni sa'csi bejnni xhigab nen lastooni: “Narä sobga'ä ree si'c te rein, te benroduxh, dina gacä biuud, niclaza gac-huin lazá.”

<sup>8</sup> Ni'cni tejsi dxej siajb yejci guiraa replaag xten Dios: yälgujt, yälhuin lajz, näj yälrliaan, luxh seiczani lo balguiboo, sa'csi rnibeduxh Dad Dios ni gun xcälguxhtisni.

<sup>9</sup> Guiraa rereii lo guedxliujre ni bennäj gunaadxabga cosguijdx, reni cuansanäjnini, sonduxhreni, siaduxhreni che fiireni gujxh ni carii cadro cayejci.

<sup>10</sup> Zijtru sisiujreni sa'csi rdxejbreni replaag xten gunadxabga, dxejc sini-zareni:

—Aii, aii, riaduxhnu guedxrore, Babilonia, guedxdipduxh gujclu, luxh chela gucbeenu, ala bidzujñ yälguxhtis yejclu.

<sup>11</sup> Rebejn ni ruto' loj guedxliuj sonduxhreni, siareni guejdxga sa'csi rutru rsiidi xhixtenreni ni ruto'reni.

<sup>12</sup> Laareni ruto'reni oor, pla't, guiraloj reguisa'c, perl, ladlin, ladmuraad, ladseed, näjza guiraloj baräjd yagdoo, näj guiraloj cos saru, ni nacchee läi elefant, näj cos saru ni nacchee bronz, näj guuib, näj márm,

<sup>13</sup> näjza caneel, guiraloj laj comiid, näjza valnejxh, näj perfum, näjza yaal, näjza bin, näjza se't oliib, näjza arinsa'c, näjza triuu, näjza gon, näjza rexiiil, näjza cabaii, näjza gare't, näjza bejn ni ruto'reni tiejxhreni, xaimreni. Guiraa reni'c ruto'reni.

<sup>14</sup> Dxejc guniiza xse' ni canii xhaguibaali, najni:

—Ninexhsa'c ni rladuxhlu, agunitloj. Guiraa recossa'c, recossaruduxh agubicajreni lojtu, luxh di gacdiru guidxäl bejn reni'c.

<sup>15</sup> Reni ruto' guiraloj recosga, nani gujcreni ri'cw xcuent guedxroga, zijtru sisiujreni sa'csi rdxejbreni trabajw ni cadeed guejdxga, sonduxhreni, sac-huinduxh lajzreni,

<sup>16</sup> säjbreni:

—Aii, aii, riaduxhnu guedxrore, naii gojtñi ladsacduxh, guiraa ladlin, ladmuraad, ladxniaa, gususcheeni con oor, con guisa'c, con perl,

<sup>17</sup> tera'tbäzsi baralii recoso ni najc xhixtenni, guxhijñreni.

Guiraa recapítan xte barcw, näjza guiraa remarineer, näjza rebejn ni rij biaj lo rebarcw näjza guiraa reni rujñ dzuun lo nisdoo, gusujreni zijt,

<sup>18</sup> näjza laareni cahuiireni cayäjs gujxh guejdxga, cabedxa'reni, caniireni:

—¿Xhi stee guejdx najc si'c najc guedxrore, ä?

<sup>19</sup> Bachajreni yuyol yejcreni sa'csi rac-huin lajzreni, binduxhreni, guredxa'reni:

—¡Aii! ¡Aii! Riaduxhnu guedxro sa'csi xcuentis guedxduxhre gujc ri'cwduxh guiraa rebejn ni rajp barcw ni rujñ dzuun loj nisdoo. Luxh naj tera'tbäzsi aguxhijñ guedxrore.

<sup>20</sup> Guniiza xse' ni yu' xhaguibaa, najni:

—La'tu ni yu' xhaguibaa, la'tu rexejñ Dios, reapost xtenni, rebejn ni gunii xtidx Dios galoo, colbalasduxh sa'csi abiajb guedxrore, abejñ Dios yälguxhtis xcuent ni bejnni lojtu.

<sup>21</sup> Dxejcti te xangl Dios ni rajp yälrnibee, guläs te guiro ni najc si'c te guij ni ro't dojb, bacuaanini loj nisdoo, dxejc najni:

—Sreeza gac guedxro ni laa Babilonia siajbni lo trabajwduxh, sinitlojni par tejpas, dirutu fi lojni.

<sup>22</sup> Diru guibi' jiejn cayel nez xladcaiiilu reharp, reflaut, retrompe't; diru guibi' chu tej ni gun xhifis dzuun; diruza guibi' chubej molin ni cayo't.

<sup>23</sup> Diru guibi' jien xcälrdimbicha' te bajl ni cagusanij; diruza guibi' jiejn xse' bi'n näj dxa'p loj te sa' sa'csi rexpejnlu ni ruto' gujcreni beñroduxh lo guedxliuj sa'csi basguezalu reben guedxliuj xcuent rextzundxablu.

<sup>24</sup> Nen guejdxga bidxälza xtiejn renani gunii xtidx Dios, näjza xtiejn rexpejn Dios, näjza xtiejn guiraa reben guedxliuj ni bagu'treni.

## 19

<sup>1</sup> Che gulujx recosre, biejn diagä lascanu xse' xhidaltro bejn ni canii xhaguibaa, cayäjpreni:

¡Colguiliä'p xpala'n Dios!

Xtentis Dios, xtenni najc yälruslaa lo dojl,  
näj yälrdimbicha', näj yäl'milagwr.

<sup>2</sup> Sa'csi xcälguxhtisni najc ganax laaca,

huentis najcni, sa'csi abejnni yälguxhtis gunadxabga nani caguxhin reben guedxliuj xcuent xcäl'nadxabni.

Abejn Dios yälguxhtisni,

agudijxhni xcuent xtiejn rexpejn Dios ni baxhe' gunadxabga, che bagu'tnireni.

<sup>3</sup> Guibi' guniizareni:

—¡Colguiliä'p xpala'n Dios! Gujxh xten gunadxabga sanuutis cayä'p par tejpas.

<sup>4</sup> Guiraa regalbitajp rebeñgool näjza guidap remanbajnga bazuxhijbreni, biabrojreni gojnreni Dios ni rbej lo tron cadro rnibeeni, caniireni:

—Sugacni si'c. ¡Colguiliä'p Xpala'n Dios!

<sup>5</sup> Dxejcti nez lo tron cadro rnibee Dios biejn xse' tej ni canii:

Colgudeed xquixtios lo Dios,

guira'tu ni rujn xtzuum Dios,

guira'tu ni rajntu Dios, rebeñro sigajc rebeñnadolajz.

### *Sa' xten Xiil xten Dios*

<sup>6</sup> Dxejcti biejn diagä ascanu xse' xhidalduxh bejn, riejnni si'c che cayät nisro xhidajl gueu, näjza si'c che caguidxaduxh guzii, caniireni:

¡Colguiliä'p xpala'n Dios!

Sa'csi Gueb Dios, Dad xtenu ni rajp guiraliü yälrnibee, ani acanibee.

<sup>7</sup> Guibalajznu, guibalazduxhnu, guiliä'pnu xpala'nni sa'csi abidzujñ dxej guchnaa Xiil xten Dios, aguzucheeza dxa'p.

<sup>8</sup> Abadeedreni ladlin ni najc nuiduxh gacwni.

Ladnolni, luxh rdimbicha'ni sa'csi nayadujni.

Ladnayare säloj redzunsac ni bejn rexpejn Dios.

<sup>9</sup> Najza anglga loä:

—Bacuaa diidxre: “Chicbaa renani bidon jääd lo xsa' Xiil xten Dios.”

Guniizani loä, najni:

—Rediidxre najc didx-guliipac xten Dios.

<sup>10</sup> Dxejcti bazuxhibä lojni te ganäni, dxejc laani najni loä:

—Na'c gunlu si'c, sa'csi narä nacä sigajc najclu, nacä te ni rujn xtzuum Dios, näjza bejtzlu ni rusule' xtidx Jesucrist. Bazuxhijb lo Diostis sa'csi Dios ruedeed gusule' bejn xcuent Jesucrist, gusule'zareni xtidx Dios.

### *Nani bijb te cabainol*

<sup>11</sup> Dxejcti bahuiä bixal xhaguibaa, biricaj te cabainol. Luxh laj nani rbijbni säloj casobsa'cpacni diidx, rniizani ganax didxguliü. Entis laaca rujnni yälguxhtis, entis laaca rucuaani che rujnni guer.

<sup>12</sup> Rebalojni rbebajl, yejcnì yu' xhidalduxh coron, luxh caj te laj lojni nani rutliidi racbee, luxh laatisni racbeeni xhi sälojni.

<sup>13</sup> Najcwni te lajd ni nadiini rejn; lajni najcza Xtidx Dios.

<sup>14</sup> Guiraa resoldaad guibaa xten Dios siädñajni najcwreni ladnol, ladnaya, bijbzareni cabainol.

<sup>15</sup> Ro'ni carii te spaad ni caduxh guiro'p laad ro'ni te ni'c tilnäjni guiralii reguejdx lo guedxliuj, te guinibeeni guiraa reben guedxliuj ca'ni si'c te barguiib. Sujnzani yälguxhtis loj reni rdxechlajz lo Dios, si'c ruläjreni yec uub che rbääreni bin, si'c sujnza Dios ni rajp guiralii yälrbnee.

<sup>16</sup> Lo xhajbni näjza cuä' cujdni caj lajni: "Reii xten rerei, Dad xten redad."

<sup>17</sup> Bahuiä loj te angl suga'ni galäii gubijdx, cabedxa'ni caniini loj guiraa reman ni rutajt xhaguibaa, räjpni:

—Coltaa, colguire' ree, te gautu xcheroduxh xten Dios;

<sup>18</sup> te gautu xpääl rerei, näjza xpääl recapitän, näjza xpääl rebenro, näjza xpääl recabaii, näjza xpääl renani rbijb recabaii, näjza xpääl guiraasi bejn, bejn ni rdo' si'c rdo' guidxaa sigajc rebejn ni di gun xtzuum bejn, rebenbäz sigajc rebenro.

<sup>19</sup> Dxejcti bahuiä loj manro näjza loj rerei guedxliuj, abire'reni te gucuanäjreni nani rbijb cabainol näjza guiraa resoldaad xtenni.

<sup>20</sup> Biga' manroga näjza profetxhii ni bejn senro nez loj manroga te basgueeni guiraa renani cua' seen xten manroga, näjza renani bazuxhijb lo banäjb xten manroga. Guiro'p redee bacuaareni guideb nabajñreni neñ te bal guiboduxh ni recnäj sufr.

<sup>21</sup> Dxej guiraa reni bia'n bagu't spaad ni birii ro' ni bijb cabainol. Guiraa reman xhaguibaa gudajw xpäälreni.

## 20

### *Te mił ijz*

<sup>1</sup> Dxejcti bahuiä loj te xangl Dios ni siädjiajt xhaguibaa, siädñäni liäii ni ruxhal guedro ni laa gabijl. Ca'zani te cadenro.

<sup>2</sup> Angre gunaaz gutiatzroga, ni gujc bäl galooli, ni najcza benđxab, ni laaza Satanás. Bacuaduunini te mił ijz.

<sup>3</sup> Basälñini neñ gabijl, te ro'c basäunini, bacuaani liäii te na'cru gusgueeni reben guedxliuj lał ni guiza' te mił ijz. Che guiza' reijzga, empac sibi' lasacni bale'si dxej.

<sup>4</sup> Dxej bahuiä retron cadro rbejreni rnibeereni, bahuiäza loj renani rbej lo retron, cua'reni yälrbnee te gunreni yälguxhtis. Dxejcti bahuiä xaim rebejn nani biru' yejcnì sa'csi huililajzreni xtidx Jesucrist näjza sa'csi basule'reni xtidx Dios. Direni nuzuxhijb loj gutiatz niclaza lo banäjb ni najc si'c manroga, dizareni nica' seen lo cuajreni nicla lo ñaareni. Gubañsacreni loj rebengut, gurenäjreni Jesucrist te laani gunibenäjreni te mił ijz.

<sup>5</sup> Dee najc yälrbñsac galoo lo rebengut. Niluxh stecuaa rebengut, direni guibañsac che guisa'li te mił ijz.

<sup>6</sup> Chicbaa rebejn nani guibañsac ganiddoo, najczeni bendxan ni agubicaj xtojñreni. Ni rojp yälgujt di guidzujñ lojreni. Laareni sajcreni xpixhojz Dios näjza Jesucrist, sibenäjreni Jesucrist, sinibenäjreni Jesucrist te mił ijz.

<sup>7</sup> Che guiza' te mił ijzga, suslasacni Satanás neñ gabijl.

<sup>8</sup> Che guiriini ro'c, gusgueeni guiraa reguejdx ni tre' lo guidap laad guedxliujre. Susgueeni reben Gog näjza reben Magog te gutie'nireni te gunreni guer. Xhidalduxh gacreni, pet si'cti yujxh ni tre' ro' nisdo.

<sup>9</sup> Huä'preni lo te camp cadro gulagduxh. Gudäyreni guideb gabig cadro rnibee rexpejn Dios nen guejdx nani sanälajz Dios. Per baxhał Dios bal guiboo xhaguibaali bitejbni, te guyejc guiragajczeni.

<sup>10</sup> Dxejc bacuaareni bendxab nani biädgusguee rebejn lo bal guiboo ni cayecnäj sufr, lagajc cadro yu' manro, näjza profetxhii nani basguee; lo bal guibooga susacsirenini sidejdreni trabawduxh dxej-yääl par tejpas.

### *Yälguxhtis ni gujc nez loj tronronol*

<sup>11</sup> Dxejcti bahuiä lo te tronronol näjza lo nani sobga' lojni te rujnni yälguxhtis. Nez lojni gunitlojli guedxliuj näjza guibaa, xhetru lajtdi bidxäjł par laareni.

<sup>12</sup> Bahuiä lo rebengut, benro sigajc bennadolajz, tre'reni nez lo Dios. Bixal rexquijtz Dios, dxejcti bixalza stee xquijtz Dios ni najc guijtz xten xcäl'nabannäj Dios par tejpas. Dxejcti bejnii yälgutxhtis rebengut xcuent ni bejnreni, xcuentza rediidx nani caj loj reguijtzga.

<sup>13</sup> Guiranejz biääd rebengut: nisdoo batzuug rebengut ni yu' lojni, gabijł näjza yälgujt batzuugza rebengut ni yu' lojreni. Dxejcti bejn Dios yälguxhtis tejgareni xcuent ni bejnreni.

<sup>14</sup> Dxejcti bacuaani yälgujt näjza gabijł lo bal guiboo ni najc si'c te nisdoo te ro'c checreni par tejpas. Dee najc yälgujt ni rojp.

<sup>15</sup> Guiraa bejn ni di lajni nidxäjł lo xlibr yäl'nabajł bacuaazani reni'c lo bajłga.

## 21

### *Xhaguibacoob näjza guedxliucoob*

<sup>1</sup> Dxejcti bahuiä te xhaguibacoob näjza te guedxliucoob, sa'csi agunitloj guibabiejw, näjza guedxliubiejw, luxh xhettiruzza nisdoo.

<sup>2</sup> Narä Juan, bahuiä lo guedx Jerusalencoob, guedxdxan, siädjiäjtni xhaguibaali cadro rnibee Dios. Sucheduxhni si'c rsiuchee te dxa'p nani agojł guchnaa.

<sup>3</sup> Dxejcti biejn diagä te xse' te ni canii dipduxh, ascanu lo tron cadro rnibee Diosli carii se'ga, scree caniini:

—Colhunii, aguzuj xquidoo Dios galäii rebejn, anabannäj Dios rebejn, sajczareni rexpejnii. Sibannäj lagajc Gueb Diosreni.

<sup>4</sup> Sutura Dios guiraa nisbee balojreni te na'cru goonreni. Sinitloj yälgujt, xhetru xliajsdi chu, diru bejn goon, dirureni jiajn, sa'csi guiraa redee ni guyu' galoo agunitloj.

<sup>5</sup> Dxejcti ni sobga' lo tron cadro rnibeeni guniini, najni loä:

—Bahuii, najrä guscobä guira'ti.

Guniizani loä:

—Bacuaa rediidxre, sa'csi guliipaczeni, sajč chalilajz bejn rediidxre.

<sup>6</sup> Dxejcti najzani loä:

—Agujcni. Narä nacä A näjza Z, ni säloj nani rbaxtiej näjza nani ruluux. Lo chutis ni cayojł, sudedxlia'ä nis yäni, nalajznu yäl'nabajł par tejpas.

<sup>7</sup> Chutis nani gun gaan lo dojł, sica'zani guiraa dee si'c yäl'nasa'c, luxh narä sacä Xtiosni, laani sacni xi'nä.

<sup>8</sup> Niluxh renani rdxejb, renani di chalilajz xtidxä, reni rdxe'ch loä, reni rugu't sa'reni, reni runnäj gunaa dojł, renani najc bidxaa, renani rusuxhijb lo banäjb, guiraa renani rusguee rniireni didxhii, guiragajc reni'c sij lo

nisdoo ni najc ganax bal guiboo, cadro rejc guiboo nájza sufr par tejpas. Dee ni najc yálgujt ni rojp.

### *Guejdx Jerusaléncoob*

<sup>9</sup> Dxejcti lo guigajdz xangl Dios ni ca' guigajdz xhijg ni guidxa guigajdz reyálguxhtis xten Dios, birii tejni, najni loá:

—Gudaa, te guluiá lojlu dxa'p nani guchnaa Xiil xten Dios.

<sup>10</sup> Dxejcti bejnii gunixcalá, huináni nará lo te danro ni jiaduxh, ro'c baluini loá te guedxro, te guedxdxan ni laa Jerusalén, luxh xhaguibaali siádjájtnei nez lo Dios.

<sup>11</sup> Guejdxga rdimbicha' guideb xcálrndimbicha' Dios. Luxh yálrndimbicha'ga najc si'c najc te guisacduxh ni laa jaspe, rdimbicha'zani si'c biidr.

<sup>12</sup> Guideb gabi guejdxga dejd te paderro cadro caj tzubitio'p xportonroni. Te angl xten Dios suga' ro' tejga portonga. Loj tejga portonga, caj laj tej retzubitio'p cuaa xten rexpejn Israel.

<sup>13</sup> Chon portonga caj nez cadro rliejn gubijdx, yu'za chon portonga nez ladbee, yu'za chon portonga nez ladbáw, yu'za chon portonga cadro rááz gubijdx.

<sup>14</sup> Yu' tzubitio'p guiro lo cimient xten guejdxga. Lo tejga reguijga caj laj tej retzubitio'p apost xten Xiil xten Dios.

<sup>15</sup> Angl ni caniná nará ca' si'c te biquii ni najc ganaxduj oor te gurejxhni guejdxga, náj reportonga, nájza padeerga.

<sup>16</sup> Guejdxga najc cuadraad: sigajc ni siolnii, sigajcza ni gulajgni. Dxejcti cua'ni bíquii barejxni guejdxga, barejxni tio'p mil' tio'p gayuu kilómetros tejga laad. Sigajc siolnii, sigajcza gulajgni, sigajcza jiaani.

<sup>17</sup> Dxejcti barejxni padeerga, yu'ni gayonbitajp metr segun mediid xten bejn, sa'csi ni'c najc ni cagutiexhnájza angla.

<sup>18</sup> Padeerga naccheeni guij ni laa jaspe. Guejdxga najc ganaxduj orsa'c, rdimbicha'ni si'c guihuajn.

<sup>19</sup> Recimient xten padeerga nac-chee guisa'c. Guiganid najc guijaspe; ni rojpa najc zafiro; ni riojnga najc ágata; ni rdajpga najc esmeralda;

<sup>20</sup> ni rgaüiga najc onix; ni rxho'pga najc cornalina; ni rgajdzga najc crisólito; ni rxhujnga najc berilo; ni rgaaga najc topacio; ni rtzuuga najc crisopraso; ni rtzubiteebga najc jacinto; ni rdzubitio'pga najc amatista.

<sup>21</sup> Guitzubitio'p portonga najc tzubitio'p perl. Tejga portonga guc-chee tej perl. Nezyuro ni rdeed galáii guejdxga najc ganaxduj oor, rienni si'c te guihuajn.

<sup>22</sup> Dina nuhiá nicla tej guidoo nen guejdxga, sa'csi suga' Gueb Dios ni rajp guiralií yálrnibeduxh, nájza Xiil xten Dios. Laani najc xquidoo guejdxga.

<sup>23</sup> Guejdxga dini guiquiin gusanij nicla gubijdx ni claza báii, sa'csi lagajc xcálrndimbicha' Dios nájza Xiil xten Dios ruzanij ro'c.

<sup>24</sup> Rebejn guedxliuj ni rililajz xtidx Dios sajc sareni lo bianijga, luxh rereii ni siáad lo guedxliujre siádnázareni xcálrnibeereni, náj xpala'nreni ro'c.

<sup>25</sup> Di ro' reportanga jáuu rdxej, luxh ro'c xhettiza yáál.

<sup>26</sup> Ro'c chanázareni yálnasa'c náj xpala'n reguejdxro ni yu' lo guedxliuj.

<sup>27</sup> Niluxh di gacdipac jiu' nicla tej cosguijdx ro'c, ni claza te bejn ni rujn cosguijdx náj yálrusguee. Ro'c siu' ganaxduj renani caj lajni lo libr xten yálnabajn par tejpas nani ca' Xiil xten Dios.

## 22

<sup>1</sup> Dxejc baluui anglga te gueuro loä, cadre yu' nisya xten yäl'nabajn. Rdim-bicha'ni si'c te guihuajn, luxh cariini lo tron cadre rnibee Dios näjza Xiil xten Dios,

<sup>2</sup> rdejdn loj nezyujro ni rdejđ galäii guejdxga. Guiro'p laad gueuga sojb reyajg xten yäl'nabajn, lojreni rcaj tzubitio'p cuaa ninejxh neñ tebijz, tejsa cuaani tejsa bäii; luxh rebalajg ni rcaj lo reyajgga najc te gusiajcn reben guedxliuj.

<sup>3</sup> Dxejcti ro'c xhettiru yäl'rdzubde, sa'csi ro'c yu' tron cadre rnibee Dios näjza Xiil xten Dios, ruzuxhijbza rexpejn, rajnreni laareni.

<sup>4</sup> Suhuiireni lojpacni si'cpac ni najcni, sicajza laj Dios lo cuajreni.

<sup>5</sup> Ro'c diru yääl chu. Luxh reni rbäjz ro'c di guiquiin nicla bajl, niclaza xhanij xten gubijdx, sa'csi Gueb Dios susanij lojreni. Luxh sinibenäjrenini par tejpas.

*Siäddzungajxh dxej ni guibisac Jesucrist*

<sup>6</sup> Dxejc naj anglga loä:

—Guliipac najc rediidxga, sajcpac chalilajzlureni. Dad Dios lagajc nani basniib lastoo rebejn ni gunii xtidxn agujc xchero, lagajc laani baxhalni xanglni te baluilojni loj rexpejn guira'ti nani agojl gac.

<sup>7</sup> —Sajngalu gan, siojb jiälä. ¡Chicbaa nani riu rediidx ni caj lo libbre!

<sup>8</sup> Luxh narä, Juan, biejn diagä rediidxre, bahuiäza recosre. Luxh che bahuiä, che biejn diagä bazuxhibä te ganä xangl Dios nani baluui loä guiraa redee.

<sup>9</sup> Luxh laani najni loä:

—Na'c gunlu si'c, sa'csi narä runä xtzuunni sigajc rujnluni, sigajc rujn rebejn ni gunii xtidx Dios agujc xchero, sigajc rujn rebejn ni rusoob rediidx ni caj lo libbre. Bazuxhijb loj Diostis.

<sup>10</sup> Dxejc najni loä:

—Na'c gusaüulu guitz cadre caj rediidxre xcuent nani churu gac, sa'csi asiäddzungajxh redxaj ni chale'reni.

<sup>11</sup> Luxh laj ni guidzujn dxejsa, basaan suchanuu gun dojl renani cayungajc dojl; basaan suchanuu gun dzunguijdx renani cayungajc dzunguijdx. Per renani cayujn dzunsa'c, chanuu gunreni dzunsa'c, nani najcza beñnaya, si'cza chanuu gacni beñnaya.

<sup>12</sup> Gunajtiro:

—Siojb jiälä, luxh siädnaä xhi gunidxä loj tejsatu si'c ni riäj l xca'tu xcuent dzuun ni bejntu.

<sup>13</sup> Narä Jesucrist nacä si'c najcza A näjza Z, ni säloj nani rbäxtiej näjza nani ruluux.

<sup>14</sup> Chicbaa renani riu xtidx Dios, najcreni si'c ni rguuib xhajbreni te sajc jiu'reni nez porton xten guejdxga, sajczä gauni ninejxh ni caj lo yajg xten yäl'nabajn par tejpas.

<sup>15</sup> Per dejtz guejdxga chajia'n reni najc si'c bä'cw, nalajznu rebidxaa, renani rusguee chälbejn, renani rugu't sa'reni, renani ruzuxhijb lo rebanäjb, näjza ni rchaglajz rnii didx-xhii te gusgueeni.

<sup>16</sup> 'Narä Jesucrist, abaxhalä xanglä lojlu te gusule'ni lojtu diidx xcuent guiraa redee, te gusule'zalu rextidxä neñ reguidoo loj rexpeñä. Narä nacä te xajg to'reii David, nacäza si'c balxhaguibaa nani rdimbidxa' cäjysi che gajđ jianij lo guedxliuj.

<sup>17</sup> Sprit Dxan xten Dios näjza chääl Xiil canii, najreni:

—Coltaa.

Suguiniiza nani riejn diajgreni diidxre, gäbreni:

—Coltaa.

Sujiäädza chutis ni cayojl, sujiädyäxlia'ni nis yäl'nabajn par tejpas.

<sup>18</sup> Sa'csi narä rniliä'ppac lojtu, guiraatu ni riejn diajgtu rediidx ni caj lo guijtze xcuent recos ni churu gac, palga yu' chu tejtu gutajlru diidx ni caj guijtze, sutedru Dios bejnga replaag yejcnj loj ni caj lo guijtze.

<sup>19</sup> Palga yu' chu gudzucaj loj rediidx ni caj lo guijtze, sudzucajza Dios nani nica'ni lo yajg xten yäl'nabajn par tejpas, näjza lo guedx Dxan, ni caj xcuentreni lo guijtze.

<sup>20</sup> Nani cagusule' diidx xcuent guiraa redee guniini, najni:

—Guliipacni siojb jiälä.

Sugacni si'c. Gudaa Dad Jesucrist.

<sup>21</sup> Sujiääd xcäl'racnäj Dad Jesucrist lo guiraatu. Sugacni si'c.